


Diidz ne rdeed  
guielmban



New Testament in Zapotec, Mixtepec (MX:zpm:Zapotec,  
Mixtepec)

# **Diidz ne rdeed guielmban**

## **New Testament in Zapotec, Mixtepec (MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

### **Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Mixtepec

#### **© 1998, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 22 Feb 2024 from source files dated 29 Jan 2022

5317ca58-7555-5e4c-a420-e1e9210e2df2

## Contents

MATEO . . . . .	1
MARCOS . . . . .	70
LUCAS . . . . .	113
JUAN . . . . .	186
HECHOS . . . . .	240
ROMANOS . . . . .	306
1 CORINTIOS . . . . .	335
2 CORINTIOS . . . . .	366
GALATAS . . . . .	386
EFESIOS . . . . .	398
FILIPENSES . . . . .	409
COLOSENSES . . . . .	417
1 TESALONI- CENSES . . . . .	424
2 TESALONI- CENSES . . . . .	430
1 TIMOTEO . . . . .	433
2 TIMOTEO . . . . .	442
TITO . . . . .	449
FILEMON . . . . .	453
HEBREOS . . . . .	455
SANTIAGO . . . . .	477
1 PEDRO . . . . .	485
2 PEDRO . . . . .	494
1 JUAN . . . . .	499
2 JUAN . . . . .	507
3 JUAN . . . . .	508
JUDAS . . . . .	510
APOCALIPSIS . . . . .	513

# XTIIDZ NDZON DIOS MINE PQUIAĀ MATEW

<sup>1</sup> Jesús meñ ne pxeel Dios ga, lo xtií Abraham, lo xtií David, ga brieequia me. Lëë grë xmeñgoldoo me nu:

<sup>2</sup> Abraham goc pxoz Isaac, Isaac goc pxoz Jacob, Jacob goc pxoz Judá (bio zla xpëed Jacob),

<sup>3</sup> Judá goc pxoz Far ni Zar (Tamar brieelë tseeel Judá),

Far goc pxoz Srom, Srom goc pxoz Aram.

<sup>4</sup> Aram goc pxoz Minadab, Minadab goc pxoz Naasón, Naasón goc pxoz Salmon.

<sup>5</sup> Salmóngoc pxoz Booz (Rahab brieelë tseeel Salmon),

Booz goc pxoz Obed (Rut brieelë tseeel Booz), Obed goc pxoz Isai.

<sup>6</sup> Isai goc pxoz rey David, David goc pxoz Salomón (lëë Salomón ga gop tseeel Urí wnaa ne bionie David).

<sup>7</sup> Salomón goc pxoz Roboam, Roboam goc pxoz Abí, Abí goc pxoz Asá,

<sup>8</sup> Asá goc pxoz Josafat, Josafat goc pxoz Joram, Joram goc pxoz Uzí.

<sup>9</sup> Uzí goc pxoz Jotam, Jotam goc pxoz Acáz, Acáz goc pxoz Ezequí.

<sup>10</sup> Ezequí goc pxoz Manasés, Manasés goc pxoz Amón, Amón goc pxoz Josí,

<sup>11</sup> Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee zhoo zha Babiloin grë zha Israel, beynie zho zho Babiloin.

<sup>12</sup> Babiloin, ga gol tib xpëed Jeconí brieelë Salatiel, Salatiel goc pxoz Zorobabel.

<sup>13</sup> Zorobabel goc pxoz Abiud, Abiud goc pxoz Liaquim, Liaquim goc pxoz Azor.

<sup>14</sup> Azor goc pxoz Sadoc, Sadoc goc pxoz Aquim, Aquim goc pxoz Liud.

<sup>15</sup> Liud goc pxoz Leazar, Leazar goc pxoz Matán, Matán goc pxoz Jacob.

<sup>16</sup> Jacob co nagon goc pxoz José, meñ ne ptsieelnia Marí.

Marí goc xniaa Jesús, Meñ ne nacle diidz ga cxeel Dios guiaad lo guidzliu.

<sup>17</sup> Zig choopchop bdziñ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta leñ dze ne bey zho Babiloin; stsiida zho wban desde leñ dze co haxta bdziñ dze ne goc me mëed.

## *Gol Jesús (Lc. 2:1-7)*

<sup>18</sup> Znu bzhaac Marí grop José leñ dze ne ziaadyob gal Jesús. Gard ctsieelnia Marí loxaque xtiidz me no ne laa me ycaa José, zeeñe bnabey Espíritu Sant pquialo tib mëed zdoo me. <sup>19</sup> Zeeñe bien Joséw, miñe been me gocladz me mazd nsaan me Marí; sac sca rnabey ley ni zianalpa

me mine rnabey ley; per laa me gocladz zhliaanse nzozit me, sacne racladzd me nriee xquielto Marí. <sup>20</sup> Zhgab co no me, tibaque blulo tib xanjł Dios lo me lo mcaal.

—José (xiag David) —rëb anjł co—, peet tsienied guic luu, pcaania Marí gac me tsieel luu; sac gon mëdyeen ne zoney me ga, Espíritu Sant bnabey pquialo win zdoo me.

<sup>21</sup> Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo dol.

<sup>22</sup> Ga briequia mine bnee Dios padzeela, zeene bzeet zha ne biadnee xtiidz mew, rëb zho:

<sup>23</sup> Bii zan to ganle zeene laa tib mëëdbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelë win.

(Emanuel nac zig nacre rnee ne: Dioszhal ziaad lo ne.)

<sup>24</sup> Zeene bna José laa guic me goc tibli; bin me xtiidz anjł co laa me ptsieelnia Marí. <sup>25</sup> Laa me wban tipse grop me per ib bgaald me Marí, haxta bded dze ne laa mëdyeen co gol. Bdziñ dzew, laa win gol, dzigo bleelë José win JESUS.

## 2

### *Güeygan bla zha rac Jesús*

<sup>1</sup> Tib guiedz win ne ndxie xtan Judé lë Belén, ga gol Jesús. Lëëtse leñ dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén, <sup>2</sup> bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdziñ no tib mel nëz ne no no, mel co blu lo no laa win gol-le, miñ co ne ziaad no nu ziaaddzian no win.

<sup>3-4</sup> Grë menguietz Jerusalén, zeene bin zhow bzee zdoo zho. Laa Herod, riendraa me zha gun me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga. <sup>5</sup> Dzigo rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

<sup>6</sup> Tel Belén, niicle ne winraaw lo grë guiedz ne ngab Judé, per nroob nona; sac gon ga griequia tib men ne gnabey, men ne so yquiaanap grë men Israel, ne nac zho zha ne ngab lo naa.

<sup>7</sup> Nacne zhliaanse bnabey Herod gocredz gza zha rac co, bnabdiidz me lo zho dien bla-paa dze rac psilo gon zho blan mel co.

<sup>8</sup> Blozhse ga, dzigo pxeel me zho Belén, rëb me lo zho:

—Ga gołtsie gołtsieguib mëed co. Zigne gdziel to win,

goltëniegash diidz lo naa nu, zeena ye naa ga gagan naa win.

<sup>9</sup> Blozhse sca pso me diidz lo zho, laa zho bio nëz stib laa zho zie. Laa mel ne gon zho briequia nëz ne ziaad zho ga, laa ma neraque lo zho; haxta bdziñ ma ngali guic yu ne no mëdyeen co, gataa laa ma blëz.

<sup>10-11</sup> Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquitsgzhib zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zhō or, blee zho tiblo yaalnex, ni tiblo nceit nex rnee zho mirr, bgad zho lo win.

<sup>12</sup> Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

<sup>13</sup> Laa gza zha rac co zey, zeene güeylulo tib xanjl Dios lo José lëetse nixguies me, rëb anjl co lo me:

—José, na zeena guche i pcaanie mëdyeen qui nëz grop xniaa win, golsë nëz Egipt, sac laa Herod yquiaguib win gut me win. Egipt, ga cuëznie to win, na naaque guialnie diidz lo to zeene laa to gbi ga.

<sup>14</sup> Guieel cogazh guche José, pcaanie me mëdyeen co nëz grop xniaa win, laa zho ziese nëz Egipt; <sup>15</sup> ga blëz me haxta bdziñ dze ne laa Herod gut. Ga briequia miñe bnee

zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

*Bnabey Herod gut grë mëëdlas*

<sup>16</sup> Laa zeene gon Herod wbiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëëdbguyeen ne no grë guiedz co, desde win ne golnëz, haxta win ne rap chop iz. Tibaque nan me sca ngaa mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co. <sup>17</sup> Guieñdëox ne bio grë miech co, ga briequia miñe bzeet Jeremi men ne biadteed xtiidz Dios padzeela, zeene znu rëb me:

<sup>18</sup> Tib redz nroob ne zëeb len guiedz Ramá.

Grë wnaa Judá, zha ne ziaad lo xtii Raquel,

mbanse rac zho, roon zho no zho xquieñe xpëed zho;

zha rna zha ne cchoobladz zdoo zho, sac laa xpëed zho gut.

<sup>19</sup> Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nëz Egipt, rëb me lo José:

<sup>20</sup> —José, guche i, pcaanie mëdyeen qui nëz grop xniaa win, golbire nëz Israel stib; laa zha ne quianał win ga gutle.

<sup>21</sup> Dzigo brieenie José mëdyeen co ga grop xniaa

win, bio me nēz laa me wbiere zeynie win nēz Israel. <sup>22</sup> Per zeene bin José lēēque tib xpēēd Herod men ne lē Arquelá, men co biaan xlugar Herod zobnabey xtan Judé, bdzieb José ndziñnie me mēdyeeñ co nēz co. Dzigo bneequē Dios lo me lo mcaal tsie me nēz Galilé.

<sup>23</sup> Goł zho Galilé, bdziñaque zho guiedz Nazaret, ga wban nie zho mēdyeeñ co. Ga brieequia miñe bzeet grē zha ne biadteed xtiidz Dios padzeela, zeene rēb zho: men Nazaret guiab miech nac Jesús.

### 3

*Psilo Juan Bautist noseed me miech*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Leñ dze ne psilo Juan Bautist noseed Juan miech xtan zha Judé, dan zit ne no me ga; <sup>2</sup> rnee me lo zho:

—iGołsaan xquiełntseeb to, gołnab lo Dios gun me to perdon grētaa dol ne ziyuñ to; sac goñ laa dze bdziñle laa me csilo gnabey!

<sup>3</sup> Lēē Juan Bautist ga bzeet profet Isá, zeene znu pquiiaa me:

Bii zon miech ganle zeene laa tib tsi men zēēb tib dan zit, rnee me:

“Gołzhixcuuaa nēz ne ted men ne rnabey,

gołsaan grē guiełntseeb ne ruñ to.”

<sup>4</sup> Niapse guits lad camell niaa xab Juan, guid nac ncuaane ndxie leñ me, ni niapse nguzhanch ni dzin dan row me.

<sup>5</sup> Nzian grē menguedz Jerusalén, grē men Judé, grē men ne no gax ro guiubee Jordán, rriee zho riequiaadiag zho zhiwseed me. <sup>6</sup> Grē zha ne rxobdol grēse xtol zho, dzigo rchoobnis me zho ro guiubee co.

<sup>7</sup> Laa zeene ran me grē zha farisé, zha saducé ne rdziñ lo me ga racladz zho ye zho chobnis, dzigo rnee me lo zho:

—iMiech ngoopdol, masaque nac to zig nac meeł! Nañ to na lēē, loxaque chobnis to laa to laale lo grē guiełnēdox ne ziaadyob. <sup>8</sup> Led scada goñ, none zaacse gban to zeena glu nli dib zdoo to psaan to grē xquiełntseeb to. <sup>9</sup> Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grē quie zac gnabey me tsaalow miech ne gac zha xtii Abraham. <sup>10</sup> Nanle to ganle, grē yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdieelo miech ne gband zigne racladz Dios, sac rrieequia laa me nzhenle xquiiyag me cchug me yag ne sca nac.

<sup>11</sup> 'Nli tib wrobnisse nu rnedz naa lo to, nacsew zig tib señ, sac lēē gdib rluw laa to psaan xquiełntseeb to, laa to bzēēb xnēz Dios. Sangue men ne no guiaad ga, mesi Espíritu Sant gdeed me lo zha ne gliladz me; ni scagaa zha ne gliladz me, sonēz me zho

zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguald naa gac naa. <sup>12</sup> Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdziind dze guiuuw.

### *Brobnis Jesús*

(*Mr. 1:9-11; Lc. 3:21-22*)

<sup>13</sup> Len dze co brieë Jesús nëz Galilé zie me nëz ro guiubee Jordán, laa me zie par cchoobnis Juan me. Bdzin me <sup>14</sup> nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

<sup>15</sup> Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne mine rnabey Dios.

Dzigoraa pchoobnis Juan me. <sup>16</sup> Laa me zieriee lo nis zeene laa zhan gbaa bzhal, gonpaa me zig rlu tib palom rlu Espíritu Sant laa me ziadzëeb bdzin me guic me, <sup>17</sup> ni blu zëeb tib tsi men co nëz gbaa rnee me:

—Xpëed naa gon nac men qui, rleynie naa me, men nz-iuu nac me lo naa.

## 4

*Gocladz mendox niungüet ma Jesús*

(*Mr. 1:12-13; Lc. 4:1-13*)

<sup>1</sup> Zeene blozh brobnis Jesús, dzigo güeynie Espíritu Sant

me tib dan zit, zaatne guiend miech; ga gocladz mendox niungüet ma me niun me mine racladz ma.

<sup>2</sup> Zeene goc choo ngbidz choo guieel no me dan co ni tib lë peet rowd me, laa me pcaabedz <sup>3</sup> hor co bdzin mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuane gow luu.

<sup>4</sup> Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

<sup>5</sup> Blozh ga güeynie ma me Jerusalén, blep ma me glaa guic yadoo nroob ne zob lad guiedz co, <sup>6</sup> rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj l me yquiaanap luu, zha queedz luu, zeena ni tib quie ycaand ni luu.”

<sup>7</sup> Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me ncuane nod gun me.”

<sup>8</sup> Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuane ndaan ne rap tib tib guiedz co, <sup>9</sup> rëb ma lo me:

—Bui ganle, grëse ncuane qui gon gnedz naa lo luu telne



squitsgzhib luu lo naa niina, gunnon luu naa.

<sup>10</sup> Horco pquiab me rëb me lo ma:

—iBiche lo naa nu menox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquitsgzhib luu; ni mine rnabey me min co none gun luu.”

<sup>11</sup> Dzigoraa biche ma lo me, dzigo bdziñ bla anjl bdeed zho ncuane dow me.

*Psilo Jesús pseed me miech nëz Galilé*

(Mr. 1:14-15; Lc. 4:14-15)

<sup>12</sup> Zeene bin Jesús laa Juan biab ladzguuib, dzigo briece me ga güey me nëz Galilé, guiedz ne lë Nazaret.

<sup>13</sup> Zhisaque goca, briece me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulon ni zha xtii Neftali. <sup>14</sup> Ga briecequia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

<sup>15</sup> Grëse menzit ne ndxie xtan Galilé,

nëz dan ro guiubee Jordán, gax ro Nisdoo Galilé, zaatne gocchen Zabulon ni Neftali;

<sup>16</sup> miech ne no lo ncow nac zho,

per niina tib biini nroob biab lo zho.

Ladzniale guielgut no zho, per laa biini co biab lo zho par griece zho ga.

<sup>17</sup> Ga psilo Jesús pseed me miech, rnee me lo zho csaan zho xquientseeb zho, gbig

zho lo Dios, sac laa dze ne csilo gnabey Dios ziaadgaxle.

*Bredz Jesús tap ngoozmel*

(Mr. 1:16-20; Lc. 5:1-11)

<sup>18</sup> Len dze co, tib dze zieded Jesús gax ro Nisdoo Galilé gon me chop ngoozmel, tib zho lë Simón Pedr, stib zho lë Ndrés; grop bets zho lëetse laa zho noron guiech ne rgaa mel lo nis. <sup>19</sup> Dzigo bredz me zho, rëb me lo zho:

—iGoltë goltënal zhits naa! iLaa naa cxel to tsie to stib gooz, tsietop to grë miech ne sëeb xnëz Dios!

<sup>20</sup> Horcogazh psan zho guiech ne rgaa mel ga, laa zho zienal zhits me.

<sup>21</sup> Zhisaque bzë me ro nis co, gon me laa Jacob ni Juan (lëe grop xingan men ne lë Zebedé ga) no tib len barcw gza pxoz zho, noquiaabdie zho guiech ne rgaa mel; dzigo bredz me zho. <sup>22</sup> Zigne bredz me zho biaannieque pxoz zho barcw ga, laa zho zienal zhits me.

*Zëeb diidz grëtaa milagr ne run Jesús*

<sup>23</sup> Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grë men rzacnë, tel pe guielguidztaa rzac zho.

<sup>24</sup> Tel pa lotaaw zëeb didz scataa run me grë milagr, haxta nëz Siria bin miecha. Nzian grë men co briece ga bdziñnie zho grë zhimguidz zho lo me: no grë men rzacnë co noguitnie menox, no

zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoob; grëse zho beenguiac me zho.  
 25 Zaatne zieetaa me, miech guizhiu ne nal zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nöz ro guiubee Jordán.

## 5

*Cho nac zha ne wen zie  
 (Lc. 6:20-23)*

1 Tib dzew, gon Jesús laa grë miech guizhiu co bdzin lo me, dzigo bzoquia me glaa tib guic gui win. Ga zob me, bdzin grë xpëédscuel me lo me, 2 dzigo psilo me pseed me zho, rëb me:

3 —jWen zie zha ne rien ib none gbig zho lo Dios, sac ib dzin zho zaatne rnabey me!

4 jWen zie zha ne mban rac roon niina, sac schoobladz Dios zdoo zho!

5 jWen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

6 jWen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

7 jWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

8 jWen zie zha ne mbele zdoo, zha ne biaanmbele lo xto, sac zanlo zho Dios!

9 jWen zie zha ne noxco zaacse gban miech, til d zho, sac masaque mëed gac zho lo Dios!

10 jWen zie zha ne loxaque porne quiayun zho mine rnabey Dios, rquiana miech zho, sac ible dzin zho zaatne rnabey me!

11 Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne riladz to naa, jwen zie to ga! 12 jNley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

*Nac to zig nac zed, zig nac biini*

*(Mr. 9:50; Lc. 14:34-35)*

13 Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, pa dien rquiina? jLëe gdib rliaala lo guizh, zaatne rded rzë miech rzëeni zhow!

14 Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa. 15 Golguien ganle nacd biini parne tsolana, sinque parne gziiniw lo grë miech ne no len yu. 16 Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac PxoZ to men ne no gbaa.

17 'Guiabde to togo bod laa naa zial<sub>l</sub> zial<sub>t</sub>ichee naa ley ne psan<sub>n</sub> Moisés, o grëgaa minë bnee zha ne biadteed xti-idz Dios padzeela; sac led min<sub>c</sub>od zial<sub>l</sub> naa, sinque laa naa zial<sub>l</sub> gun<sub>n</sub> naaw zigne no gaca. 18 Gneli naa lo to gan<sub>l</sub>e: Laga niaa guidzliu rii, laga niaa gbaa, ib none gac minë zhobnee lo ley, minë bnee-gaa zha ne biadteed xtiidz Dios, ni tib lë paat gdzëëda. 19 Gacxe waa zha ne quiits tib ley niicle minë mazdraa wina, ni cseed zho miecha zigne run<sub>n</sub> zho ga, ib tedsod zha nac zha ne mazdraa win guiaan<sub>n</sub> lo grë zha ne yгаа заатне rnabey Dios. Sangue zha ne gun<sub>a</sub> zigne rnabeya, ni cseed zho miech scaque tsienal<sub>l</sub> zhow, zha cosi nroob gacnon zho lo grë zha ne gdzi<sub>n</sub> zaatne rnabey Dios.

20 'Rso naa diidz lo to sca, zaacse gol<sub>g</sub>ac gunde to zigne run<sub>n</sub> grë maistr ley, grë zha farisé; sac tel<sub>n</sub>e tsoxcode to gban to zigne racladz Dios, grielod gdzi<sub>n</sub> to zaatne rnabey me.

*Nodne gut miech  
(Lc. 12:57-59)*

21 'Led nan<sub>l</sub>e to gan<sub>l</sub>e, no tib ley ne biaan<sub>n</sub> lo xmengol to padzeela, rneew: "Gute luu samiech luu"; rnabeya zha ne gut samiech, ib none gue-taque zho, quizhgazh zho dol<sub>l</sub> co. 22 Sca rnee ley co, per zig nac zha ne gon<sub>n</sub> në rac zdoor an<sub>n</sub> samiech, rriequia beetle zho ga, ye zho riegual<sub>l</sub> quizh falt co. Zig nac zha ne gnee pe tib diidznë lo samiech, none

gacredz zho lo wxtis zeena gun<sub>q</sub>uizh zho zho dol<sub>l</sub> co; zha ne quiegaa samiech, lëëque zha rguib guey zho gabil<sub>l</sub> ga.

23 'Gacxe waa tel<sub>l</sub> ziesan<sub>n</sub> to tib gon, per lo pcoogle zo to rsoladz to rdil<sub>n</sub>ie to tib samiech to, 24 gase gol<sub>s</sub>an<sub>n</sub> gon co, gol<sub>t</sub>sie gol<sub>t</sub>sienabgazh perdon lo zha ne rlëë to lo ga, gbireraa to dzigo gdeed to gon co. 25 Zha ne sca rlëënie to, gol<sub>t</sub>soxco pront gol<sub>g</sub>uiaan<sub>n</sub> wen; zeena tsiezod zho to lo wxtis, sac tel<sub>l</sub> laa zho tsiezo to lo wxtis ib znabey wxtis tso to ladzguiib. 26 Gneli naa lo to gan<sub>l</sub>e grieede to ga, hax-taque lozh quizh to grë dimi ne gnab wxtis lo to.

*Nodne tsonie miech zha ne led tsieeld zho*

27 'Nan<sub>l</sub>aque to gan<sub>l</sub>e zha rnee stib ley ne biaan<sub>n</sub> lo xmengol to, rneew: "Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho." 28 Per zig nac zha ne gon<sub>n</sub>, ran<sub>n</sub> tib wnaa ni rsilo zho riogui zho tsonie zho wnaa co, laa zho bdiitsle ley co.

29 'Gacxe waa, bziaalo to minë rquiaqui run<sub>t</sub>al to xtol<sub>l</sub> to, mazd gol<sub>c</sub>ueegazha; niicle tel<sub>l</sub> bziaalo derech tow. Peet nacd nitlo tib lëque xcuerp to, lëdle dib nacsew tsietsobe gabil<sub>l</sub>. 30 Laa tel<sub>l</sub> niagaa tow, minë rquiaqui run<sub>t</sub>al to xtol<sub>l</sub> to, niicle tel<sub>l</sub> nia derech tow, gol<sub>c</sub>huggazha. Peet nacd nitlo tib nia to, lëdle nitlo to len<sub>n</sub> gabil<sub>l</sub> dib nacse xcuerp to.

*Nodne csëbtsieel miech*  
(Mt. 19:9; Mr. 10:11-12;  
Lc. 16:18)

<sup>31</sup> 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa." <sup>32</sup> Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

*Nodne yquidie miech*

<sup>33</sup> 'Ziyon to ganle zha nac stib ley ne biaan lo xmengol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gunгаа zho pe tib dziina, ib none gun zhow." <sup>34</sup> Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios; <sup>35</sup> per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me; <sup>36</sup> guiaabгаа to gzeet to guic to. Gunscade to, sac gon zig nac guic to, per ni tib guitsguic to grieelod csan nquits to, grieelodгаа csan ngas tow. <sup>37</sup> Gacxe waa ncuaane rgobey to zrieelo gun to, golguiab: "zun naaw", togo riengaa to grieeloda, golguiab: "grieeeloda"; tso de dieen cho gzeet to, sac gon led Diosdraa rnabey min co.

*Nodne ctsire miech guielnë*  
(Lc. 6:27-36)

<sup>38</sup> 'No stib ley znu rnee: "Tel cuee zho tib bziaalo luu, guiaand luu scase bleequie stib bziaalo zho, tel cueegaa zho tib lay luu, scaque been blee stib lay zho." <sup>39</sup> Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

<sup>40</sup> 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho. <sup>41</sup> Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow. <sup>42</sup> Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

<sup>43</sup> 'Ziyonle to ganle no zha ne znu rnee: "Zha ne rdzieel xtiidz luu bleynie zho, scaгаа zha ne rlëe lo luu, blëenie zho." <sup>44</sup> Per led scada gon, jnone zaacse gac to lo zha ne rlëe lo to! jZha ne rgodee to, golnab lo Dios gunlay me zho! <sup>45</sup> Zeena sca glu nli xpëed men ne zob gbaa nac to. Gogan ganle tel me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dieen cho ngable lo me, chogaa ngabd lo me. <sup>46</sup> jGase nasca golwi! Tel loxaque zha ne ndzieeldi-

idz to zha cose rleynie to, çniacxe zgaa to guiel<sub>n</sub>zaac ne gdeed Dios? Haxta zha ne mazdraa ntseeb run<sub>n</sub> min<sub>n</sub> co. <sup>47</sup> Tel<sub>n</sub> loxaque zha ne nacse men<sub>n</sub>lidz to, lo zha cose zacse rnee to, çpe lëë guiel<sub>n</sub>wen ga na rlu to? Haxta zha ne run<sub>n</sub>beyd Dios run<sub>n</sub> min<sub>n</sub> co. <sup>48</sup> Gol<sub>n</sub>soxco sca ndzinli gol<sub>n</sub>gac, zigne rleynie Pxo<sub>n</sub>z to (men<sub>n</sub> ne zob gbaa) grëse miech, scaque none gun<sub>n</sub> to.

## 6

*Zha ne run<sub>n</sub> xyudar samiech*

<sup>1</sup> Zeene gun<sub>n</sub> to xyudar samiech to, ib gunde to zaatne ndxiepa<sub>n</sub> miech ga so to glu to xquiel<sub>n</sub>wen to, par gan<sub>n</sub> zho min<sub>n</sub>e run<sub>n</sub> to. Tel<sub>n</sub>e sca gun<sub>n</sub> to, ygaade to guiel<sub>n</sub>zaac ne gdeed Pxo<sub>n</sub>z to men<sub>n</sub> ne zob gbaa. <sup>2</sup> Gacxe waa, zeene gun<sub>n</sub> to xyudar zha ne guien<sub>n</sub>d pe yquiin, gooldide tow zigne run<sub>n</sub> grë zha ne rquiaalo rquia zdoo samiech; sac zha co tel<sub>n</sub> pe ncuaane rgad zho, rzo zho len<sub>n</sub> yadoo, rzo zho ro nëz rlozhd yquiaabdzie zhow par gacnan<sub>n</sub>pa<sub>n</sub> miecha, zeena zha ne gona guiab zho: ¡Zha wentaa zha qui! ¡Gneli naa lo to gan<sub>n</sub>le ne sca rian<sub>n</sub>ziuu zho lo miech, lëële gdib guiel<sub>n</sub>zaac ne yгаа zho ga!

<sup>3</sup> Gol<sub>n</sub>guien<sub>n</sub> sca, zeene gun<sub>n</sub> to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiidz to nodne gacna<sub>n</sub>na. <sup>4</sup> Dzigo scagaa Pxo<sub>n</sub>z to nroob guiel<sub>n</sub>zaac ne gneedz

me lo to, sac tel<sub>n</sub> me grësew ran me.

*Zha gzodiidznie miech Dios*

(Lc. 11:2-4, 34-36; 12:22-31, 33-34; 16:13)

<sup>5</sup> Scaque zeene gzodiidznie to me, gunde to zigne run<sub>n</sub> grë zha ne rquiaalo miech wen nac zho. Sac tel<sub>n</sub> zha co zeene rzodiidznie zho me, rzo zho zaatne gan<sub>n</sub>pa<sub>n</sub> miech zho, zig nac len<sub>n</sub> yadoo, zig nac len<sub>n</sub> guiedz zaatne rded rzë miech. Gneli naa lo to gan<sub>n</sub>le lëële guiel<sub>n</sub>zaac ne yгаа zho ga. <sup>6</sup> Gol<sub>n</sub>guien<sub>n</sub> zeene gzodiidznie to me, gol<sub>n</sub>sëeb len<sub>n</sub> lidz to dziits gol<sub>n</sub>sioog ro yu, ga gol<sub>n</sub>zodiidznie me. Ible tedsod nroob guiel<sub>n</sub>zaac gneedz me lo to, sac niicle ncuaane mazdraa ngueets zhliaana, ran mew.

<sup>7</sup> Ni zeene nozodiidznie to me, gunde to ncuaane nonee to lëëw rlozh, lëëw rsilo zigne run<sub>n</sub> grë zha ne run<sub>n</sub>beyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew. <sup>8</sup> Gun<sub>n</sub>scade to, sac me ne nac me Pxo<sub>n</sub>z to gardle gnee to xliaadz to lo me laa me nan<sub>n</sub>le pe nac ncuaane rquiin to. <sup>9</sup> Gacxe waa zeene gzodiidznie to me, znu gol<sub>n</sub>nee:

Dios, luu ne nac luu Pxo<sub>n</sub>z no, zob luu gbaa;

luuse nac men<sub>n</sub> ne mazdraa ndzon.

<sup>10</sup> Luu nac men<sub>n</sub> ne gnabey no, min<sub>n</sub>e gnabeytaa luu zigne raca gbaa,

scaque none gaca lo guidzliu nu.

11 Been guiel<sub>n</sub>zaac bneedz ncuaa<sub>n</sub>e dioow no nadze.

12 Bzhiguie<sub>l</sub> been no perdon grëse do<sub>l</sub> ne ziodziuu<sub>n</sub> no lo luu,

zigne rdziuu<sub>n</sub> no samiech no perdon grë falt ne ru<sub>n</sub> zho lo no.

13 Gdeete luu diidz yquuil men<sub>d</sub>ox no,

been guiel<sub>n</sub>zaac bla no lo ma. Luu nac men<sub>n</sub> ne rnabey, men<sub>n</sub> ne rap poder, men<sub>n</sub> ne mazdraa nroob. Mi<sub>n</sub>e rnab no nu, ndion<sub>p</sub>aa no zu<sub>n</sub> luuw.

14 'Sca nagon<sub>n</sub> none gnee to. Ni gol<sub>g</sub>ona gan<sub>l</sub>e, zha ne gon<sub>n</sub> gun<sub>n</sub> samiech zho perdon tel<sub>n</sub> pe nactaa falt ne been zho lo zho, scaque Pxoz to men<sub>n</sub> ne zob gbaa, zu<sub>n</sub> me zho perdon. 15 Zha ne gund samiech zho perdon, niicle megaa gund me perdon xtol zho.

16 'Stiba, zeene nocuan to nozodiidznie to me, gun<sub>m</sub>bande to lo to. Sac grë zha ne rquiaa<sub>l</sub>o miech wen nac zho, sca ru<sub>n</sub> zho; zeene nocuan zho xtsiin<sub>p</sub>aa ru<sub>n</sub> zho ru<sub>n</sub>m<sub>b</sub>an zho lo zho par gan<sub>n</sub> miech laa zho nocuan. Gneli naa lo to gan<sub>l</sub>e, zha ne sca ru<sub>n</sub> lëele guiel<sub>n</sub>zaac ne yгаа zho ga. 17-18 Gun<sub>s</sub>cade to, nguiee<sub>l</sub> gol<sub>g</sub>ac in<sub>e</sub> gol<sub>z</sub>ëë biegw guic to, gol<sub>q</sub>uiib lo to, zeena ni tib choot guiend<sub>n</sub> laa to nocuan, loxaque Pxoz to gacna<sub>n</sub>a, sac grëse ncuaa<sub>n</sub>e rac ngueets ran<sub>n</sub> mew. Grëse ncuaa<sub>n</sub>e rac, me ra<sub>n</sub>a, me nac men<sub>n</sub> ne gneedz tib guiel<sub>n</sub>zaac nroob lo to.

19 'Tsienal<sub>d</sub>e to loxaque dien<sub>n</sub> zha gapchen<sub>n</sub> to lo guidzliu rii, sac nac ncuaa<sub>n</sub> lo guidzliu rii rban ngbaana, rnitlo mxil<sub>a</sub>, haxta noxtseeb guioochena. 20 Mazd

gol<sub>t</sub>soxco yгаа to guiel<sub>n</sub>zaac ndzon ne no gbaa, sac mi<sub>n</sub>e no gbaa, led yed mi<sub>n</sub> co guioochen, led yed mi<sub>n</sub> co cuan ngbaan, led yedgaaw gnitlo mxil. 21 Gol<sub>g</sub>ona gan<sub>l</sub>e, guiel<sub>n</sub>zaac ne gon<sub>n</sub> gun<sub>l</sub>o to, ga glu pa gdzi<sub>n</sub> xalm to, sac zaatne gun<sub>l</sub>o to guiel<sub>n</sub>zaac co ga nac zaatne gdzi<sub>n</sub> xalm to.

22 'Rrieequia nac bziaalo to zig nac tib biini. Tel<sub>n</sub>e niapse lo grë ncuaa<sub>n</sub>e ndzinli rwi to, dzigo gdipse xcuerp to no lo guiel<sub>b</sub>iini. 23 Laa tel<sub>n</sub>e loxaque lo grë ncuaa<sub>n</sub>e nonguiel<sub>d</sub> rwi to, dzigo gdipse xcuerp to no lo guiel<sub>c</sub>ow ga. jZha rnazhe lo guiel<sub>c</sub>ow co, tel<sub>n</sub> lëëque biini noyac guiel<sub>c</sub>ow!

24 'Gol<sub>g</sub>ona gan<sub>l</sub>e, grieelod gon<sub>n</sub> gleynie to dimi, ni gleynieque to Dios. Ib none tel<sub>n</sub>e Dios rleynie to, me none gleynie to, togo dimigaaw, dimi gol<sub>l</sub>eynie.

25 'Gacxe waa, gni naa lo to gan<sub>l</sub>e: Tsode to zhgab dien<sub>n</sub> zha gban to lo guidzliu rii, pa griee pe gow to, pe guie to, pe gacwxabгаа to. Stiba, ¿niacxe mazdraa non guiel<sub>w</sub>wagw lo xquiel<sub>m</sub>ban to? Xabгаа tow, ¿niacxe mazdraa nona lo xcuerp to? 26 Gol<sub>w</sub>i lo grë ngu<sub>n</sub> gan<sub>l</sub>e, led yed ma rquia gon, led yed ma rquia wlaap, led yed ma rgotsow

## 7

pe guielgon, per row ma, sac Pxo<sub>z</sub> to me<sub>n</sub> ne zob gbaa, me<sub>n</sub> co rdeed ncuaane row ma. iTel to gon, mazdraa non to lo gre mguin co! <sup>27</sup> Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, zniacxe zrieelo to gunnool tow?

<sup>28</sup> 'Zig nac lar, zpe nacne tant tso to zhgab dien pe gacwxab to? Pe rwide to lo gre guiee ne ganle zeeb dan, zha rrooba, led yeda rio zhgab dien zha gacwxaba, per niow rnaw; <sup>29</sup> gni naa lo to ganle, per ni rey Salomón con gre xab niazh me, blud me scataa niow.

<sup>30</sup> 'Gase na ganle golwi, nicxe gre guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, zpe lel to dzigo ygacwxabd me, niicle ne squi gard guien to dib zdo to gnalo to me?

<sup>31</sup> 'Tso<sub>d</sub>e to zhgab sca guiab to: "zBay pa grie<sub>e</sub> pe dioow ne, pa grie<sub>e</sub> pe dio ne, pa grie<sub>e</sub> pe dziaacwxab ne?"

<sup>32</sup> Gre miech ne runbeyd Dios, tibaque zhgab co rio zho. Sangue to golsoladz ganle, Pxo<sub>z</sub> to me<sub>n</sub> ne zob gbaa, nanle me pe nac gre xliaadz to, <sup>33</sup> me nac me<sub>n</sub> ne gneedz ncuaane yquiin to, per ib none glo tsoxco to gban to zigne rnabey me. <sup>34</sup> Golguien sca tso<sub>d</sub>e to zhgab dien zha ted to gzhe widz, sac gzhe widz co zhaalacque xco ne ziaad. Tib tib dze zhaase zhaase zhgab ne ziaadniew.

*Nodne gzee zdo<sub>o</sub> ne cho zharac*

(Lc. 6:37-38, 41-42)

<sup>1</sup> Blozh ga rebchaa me lo zho:

—Golguien, ib gunde to ne gac zdo<sub>o</sub> to zeene ran to ncuaan nonguield ne run stib miech, sac to tozhal gunquish zhow; zeena scagaa Dios, gunscad me to. <sup>2</sup> Sac gon tel zha rzac to samiech to, scasaque sac Dios to.

<sup>3</sup> 'iLeda ga gon tso to lozhd gzee zdo<sub>o</sub> to dien cho pe run, ni nenda mazdraa mine run to! <sup>4</sup> zPe ro to glisqui to mine run stib zho, ni tel mazdraa nac mine run to? <sup>5</sup> iGolguien sca glude to ncuaane nacle to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

<sup>6</sup> 'Ndzon nac Xtiidz Dios, gdeete tow lo zha ne rleeniew, sac gon rrieequia lo mecw ga gdeed tow, ib zun zho mine run mecw zacntseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzee<sub>n</sub>i maw.

*Ncuaane gnabtaa ne zgaa new*

(Mr. 1:22; Lc. 6:31, 43-44, 47-49; 11:9-13; 13:24-27)

<sup>7</sup> 'Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac me<sub>n</sub> ne gacnie to gdziel tow. Golcuedzle me, scagaa me

scaania me to. <sup>8</sup> Sac grëse zha ne rbig lo me rnab zho ncuaa<sub>ne</sub> rquiin zho, rdeed mew. Zha ne rguib ncuaa<sub>ne</sub> racladz, racnie me zho rdziel zhow. Zha ne rbedzlë me, rcaania me zho.

<sup>9</sup> 'Golwi ganle, zig nac to zeene rnab xpëed to guiet gow win, ζniacxe ziazh to co to tib quie nia win? <sup>10</sup> Zeene rnabgaa win mel, ζniacxe zdeed to tib meel lo win? <sup>11</sup> Led rioxco to lëe niapse ncuaa<sub>ne</sub> wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel Pxoz to dzigo, men ne zob gbaa, tsoxcd me to. Ib tedsod grëse zha ne gnab lo me gdeed me ncuaa<sub>ne</sub> rquiin zho, zdeed mew.

<sup>12</sup> 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mi<sub>ne</sub> bnee grë zha ne biadteed xtiidz Dios padzeelaw, sca rnabeya.

<sup>13-14</sup> 'Goltsoxco sca tsienal to mi<sub>ne</sub> rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zgaa miech guielmban ndzon ne rdeed Dios. Sac gon zha ne mban zigne notaa guic zho, rrieequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

<sup>15</sup> 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiil yeen, per zha ntseeba, masaque nac zho

zig grë coyot blë. <sup>16</sup> Zigne runbey miech tib yag por nex ne rquia low, scaque wen wen golwi zha nac ncuaa<sub>ne</sub> run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets. <sup>17</sup> Tib tib yag nex rdeedsew xnexa. Tib yag wen, nex wen rquia low; scagaa yag ncuaa<sub>na</sub>, nex ncuaa<sub>n</sub> rquia low. <sup>18</sup> Grieelod yquia nex ncuaa<sub>n</sub> tib lo yag ne rquia nex wen, ni grieelodgaa yquia nex wen tib lo yag ncuaa<sub>n</sub>. <sup>19</sup> Gacxe waa grë yag ne rquia nex ncuaa<sub>n</sub>, paat rquiinda, lëe gdib rruga, rlozh ga rzëeg zhow. <sup>20</sup> Min co nagon rne naa lo to, zha ne sca guiaad, por ncuaa<sub>ne</sub> run zho ga gunbey to cho nac zho.

<sup>21</sup> 'Grë zha ne rnee noxco zho mi<sub>ne</sub> rnabey Dios, no zho lega rneesew. Nenda haxta rnee zho, naa nac men ne rnabey zho, per gdzi<sub>nd</sub> zho zaatne rnabey Pxoz naa. Sac zha ne nlipaa run mi<sub>ne</sub> rnabey me, zha cose gdzi<sub>n</sub> ga. <sup>22</sup> Gal dze co, nzian zha ne grieequia gnë lo naa: "Conque rdziunbey no luu, blactaa name bio no bionee no Xtiidz luu lo miech, nzian milagr ne bdziun no, haxta mendox bdziuncxoon no zeene bzeet no lë luu."

<sup>23</sup> Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaa<sub>ne</sub> ndzinli.

<sup>24</sup> 'Zha ne rquiaadiag mi<sub>ne</sub>



rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie. <sup>25</sup> Niicle riab guiedox per peet racd lidz zho, niicle rriee medox, nis naal ne raclo rded zaatne zoba ga, per rbixcheda.

<sup>26</sup> 'Laa grè zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh. <sup>27</sup> Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biand.

<sup>28</sup> Zeene blozh bnee Jesús, grè miech ne noquiaadiag ga, per nli rzee zdoo zho gon zho zha rseed me, <sup>29</sup> sac rlu men r nabey nac me, led yed me rseed miech zig rseed grè maistr ley.

## 8

*Biac tib mgui ne rlan lepr  
(Mr. 1:40-45; Lc. 5:12-16)*

<sup>1</sup> Laa Jesús ziad-zëëb cho gui win co, miech guizhiu ne nal zhits me, <sup>2</sup> tibaque brieëquia tib mgui ne rlan guiedzdox ne lë lepr, wbig me pquitsgzhìb me lo Jesús, rëb me:

—Tebaa siguiel l u lu gunguìac l u lu naa.

<sup>3</sup> Dzigo pxobnia Jesús guic mgui, rëb Jesús:

—Zunguìac naa l u lu. ¡Ni-inagazh laa l u lu guiaanmbel!

Horcogazha laa grè guiedz co bnitlo. <sup>4</sup> Dzigo rëbchaa Jesús lo me:

—Bina ganle, choot lo gzodiidzd l u lu gon zha biac l u lu; sinque güey lo pxoz güey san gon ne rieguiald gdeed l u lu zigne r nabey ley ne psan Moisés, zeena gan zho ganle laa l u lu biacle.

*Biac tib zha ne rquia dziin  
tib lo menguiib  
(Lc. 7:1-10)*

<sup>5</sup> Loxaque bdziñ Jesús guiedz Capernaum, laa tib men ne r nabey lo xmen guìib zha Roma bdziñle lo me, r nab men co gunguìac Jesús tib zha ne quia xtsiin me, rëb me:

<sup>6</sup> —Been tib guielnzaac beenguìac tib zha ne rquia xtsin naa, laa zho nix lidz naa ib gacd grial zho, mban rac zho yoobdox ne rquia zho.

<sup>7</sup> Dzigo rëbchaa Jesús:  
—Peet nacda, na sè naa guio ne gunguìac naa zho.

<sup>8</sup> —Coo —rëb menguiib co—, rieguiald csodziin naa l u lu sèe l u lu haxta lidz naa. Nanpaa naa zrieelo l u lu nugazh gnabey l u lu guìac zho. <sup>9</sup> Sac zig nac naa no zha ne r nabey lo naa, ni ron naa mine r nabey zho; scagaa tel guiep naa tib lo zhaguiib ne r nabey naa: “Güey nu”, rie zho; rnegaa naa: “Dë nu”, riaad zho; zha ne runгаа dziin lo naaw, mine r nabeytaa naa zho, run zhow. Scaque l u lu nagon nanpaa naa zrieelo sca gnabey l u lu guìac xmoz naa.

<sup>10</sup> Zeene gon Jesús sca rnee men co, rley me, rëb me lo grè zha ne zianal zhits me ga:

—Lo grè zha Israel, gard gon gan naa tib zha ne squitaa dib zdoo rnalò Dios.

<sup>11</sup> Ni golquiaadiaga ganle, zdzin dze grële zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios. <sup>12</sup> Laa grë zha Israel, niicle nac zho zha ne nac diidz gdziñ ga, leļ lo ncow nëz ley guiaan zho, ga tso zho goonnë zho, haxta gow lay zho lo guielnëdoh co.

<sup>13</sup> Blozh ga rëbchaa me lo menġuiib co:

—Bzë nasca, gocnañ ganle zigne bililadzse luu guiac xmoz luu, sca gaca.

Horcogazha laa moz co biac.

*Biac xniadzoop Pedr*  
(Mr. 1:29-34; Lc. 4:38-41)

<sup>14</sup> Laa zeene bdziñ Jesús lidz Pedr, goñ me laa xniadzoop Pedr nix rlan xlëë. <sup>15</sup> Dzigo bded me zaatne nix zhuz co, zigne bzhen me nia zhuz laa xlëë co blëz. Horcogazh guche zhuz beenlo zhuz ncuaañe dow zho.

<sup>16</sup> Ziedzele dzew, laa ng-bidz rzëëblew, zeene bdziñ grë miech co, nzian grë zha ne nosacsi mendoh bdzinnie zho lo me. Grëse zho beenġuiac me, goctox me lo grë mendoh ne nosacsi zho ga, beñcxoon me ma; ni zha ne rlangaa pe stib guielguidz, grëse zho beenġuiac me. <sup>17</sup> Ga briequia miñe bzeet Isá, men ne biadteed xtiidz Dios lo miech padzeela, zeene rëb me: “Grëse xquielnë ne, grëse guielguidz ne rziac ne, me biw.”

*Zha ne racladz sëëb xnëz Jesús*

(Mr. 4:35-41; Lc. 8:22-25; 9:57-62)

<sup>18</sup> Zeene goñ Jesús scataa ndal miech ne goclo lo me ga, dzigo bnabey me xpëëdscuel me gzhixcuaa zho, sac laa zho no tedquia stib nëz ro nis-doo co. <sup>19</sup> Dzigo wbig tib men ne nac maistr ley lo me, rëb maistr co:

—Zaatne tsietaa luu goñ, sënal naa zhits luu.

<sup>20</sup> Dzigo rëbchaa me:

—Gocnaña ganle, naa ne nac naa Mgui ne pxeļ Dios, peet rapd naa nu, mazd zig nac grë mëz, grë mġuin, rap ma zhibliee ma, rap ma zhipt-sieez ma; per naa per ni zaatne gaguies naa quianied naa.

<sup>21</sup> Wbigaque stib zha ne rzënalte zhits me, rëb zho:

—Ye naa goñ sënal naa zhits luu, per bzhiguel bneedz di-idzbey cuëz naa gangazh naa tsoliu pxoz naa.

<sup>22</sup> Pquiab me rëb me:

—Dënal zhits naa. Psaan, nzian grë zha gut no, tsow tsiequeets zho samġgut zho.

<sup>23</sup> Dzigo laa me bzëëbnie xpëëdscuel me tib len barcw, laa zho zie. <sup>24-25</sup> Laa zho zie lo nis co, tibaque zeene psilo brieet tib medox, masaque rlis me lo nis co, laaw psilo rzëëb len barcw. Dzigo lëëled güey zho güeycuaan zho me, sac lëëtaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

<sup>26</sup> Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëë gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze. <sup>27</sup> Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

*Men Gadar ne nosacsi mendox*

(Mr. 5:1-20; Lc. 8:26-39)

<sup>28</sup> Laa zho bdzi<sup>n</sup>dze stib nëz ro nisdoo co, zaatne nac xtan zha Gadar, zeene brieekuia chop mgui ne nosacsi mendox, bdzi<sup>n</sup> lo Jesús ga. Zha ntseeba, rdzieb miech zho, choot rdete nëz co. Len baa brieekuia grop mgui co bdzi<sup>n</sup> zho ga, <sup>29</sup> nguiedz roptsie zho rnee zho:

—¡Peet gund luu no Jesús, psaan no! Rdziunbey no luu, Xpëed Dios nac luu. Ne nligaa been guielnzaac csacsid luu no ninaga.

<sup>30-31</sup> Zitlaaque ga ndxie tib dzoon nguts notop lag, dzigo b<sup>n</sup>ab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdzi<sup>n</sup> no.

<sup>32</sup> —Ninaga sca goltsie —rëb me.

Zigne psaan mendox co grop mgui co, güey ma bdzi<sup>n</sup> ma lo grë nguts co. Horcopsilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

<sup>33</sup> Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga. <sup>34</sup> Grëse miech co, brieekuia zho zieso zho. Zeene bdzi<sup>n</sup> zho gon zho laa Jesús zo ga, dzigo b<sup>n</sup>ab zho lo me siguiel me gbi me xtan zho.

## 9

*Biac tib men ne gutoo*

(Mr. 2:1-12; Lc. 5:17-26)

<sup>1</sup> Dzigo wbiireque bzëeb zho len barcw, bdzi<sup>n</sup> zho guiedz Capernaum stib, sac ga nac zaatne rbëz Jesús len dze co. <sup>2</sup> Zhisaque goc bdzi<sup>n</sup> me, laa zho bdzi<sup>n</sup>niele tib men rzacne lo me, dipse men co gutoo, ib gacd së me. Lo yag zhoob me bdzi<sup>n</sup>nie zho me ga.

Zeene gon Jesús dib zdoo grë zha co rnalo zho ne me gunguiac men rzacne co, rëbchaa me lo men rzacne co:

—¡Nley bloo zdoo luu xin!  
¡Laa naa benle perdon grëse xtol luu!

<sup>3</sup> Ga zob blalaa maistr ley, zeene gon zho sca bnee me, bza zdoo zho rëb zho: “¡Quiaguitnie men qui Dios gon squi rzë xtiidz me!” <sup>4</sup> Bienga Jesús sca rza zdoo zho, dzigo rëbchaa me:

—Lëda i gon squi rza zdoo to. <sup>5</sup> Nli nganda guiab ne lo miech: “Laa naa benle perdon grëse xtol luu”; per grieelod lega guiab ne laa ne gunguiac zho. <sup>6</sup> Gacnan to sca ganle naa ne nac naa Mgui ne

pxeel Dios, ible rap naa poder par gun naa miech perdon.

Dzigo rëbcha me lo men rzacné co:

—iNiinagazh guche i, bi yag ne bzhoob luu i, zeen bzë!

<sup>7</sup> Zigne sca bnee me, laa mgui co bzoli, laa me zey.

<sup>8</sup> Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

### *Bredz Jesús Matew*

(Mr. 2:13-17; Lc. 5:27-32)

<sup>9</sup> Blozh ga laa Jesús brieeg ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

<sup>10</sup> Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdsuel me.

<sup>11</sup> Blalaa zha farisé, gon zho sca tipse zobnie me grë zha co, bded ga, rëbcha zho lo xpëëdsuel me:

—iMod scataa na rownie xmaistr to grë zha ngoopdol, grë zha beed ne nac recaudador!

<sup>12</sup> Bin Jesús sca quianee zho, dzigo rëbcha me lo zho:

—Nanle to ganle, zha ne run rmed, zaatne no zha rzacné ga rquiin zho, çniacxe squiin zho zaatne no zha ne ndip ndaan? <sup>13</sup> Golsoladz

ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltzie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

*çPe nacne rcuand xpëëdsuel Jesús?*

(Mr. 2:18-22; Lc. 5:33-39)

<sup>14</sup> Bdziinaque xpëëdsuel Juan Bautist, bnabdiidz zho lo Jesús, rëb zho:

—çPe nac waa ib rcuand xpëëdsuel luu? Ni no grë no zha farisé, zhiga zhiga laa no rcuanle.

<sup>15</sup> Pquiab me rëb me lo zho:

—Zaatne nadien noyac tib guieltsieel, çpe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual tso zho guielnë, riegual ycuan zho.

<sup>16</sup> Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëëw gunnat zaatne nriez lar gox.

<sup>17</sup> Scaque tsod zha ne cot-sow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba

none len guid cubaque tsot-sowa.

*Brieaban tib mēdwanaa yeen*  
(Mr. 5:21-43; Lc. 8:40-56)

<sup>18</sup> Lēētaaque sca quianee Jesús lo xpēēdiscuel Juan Bautist, zeene bdziṅ tib mgui ne nac zha non yadoo. Zigne bdziṅ me pquitsgzhib me lo Jesús, rēb me:

—Been tib guielnzaac sē luu guio ne lidz naa. Laa tib xpēdwanaa naa blozh niina, per nanpaa naa telne cxobnia luu guic win, zbeeban luu win.

<sup>19</sup> Dzigo bio Jesús nēz zienal me zhits men co, gza xpēēdiscuel me. <sup>20</sup> Lad grē miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grē men wnaa gzob mēē, tibaque rlan mew ib rbēzda.

Ga zie me, zeene wbig me nēz zhits Jesús, bzhen me ro lar ne mbix Jesús, <sup>21</sup> sac tibaque güeynie guic me, ziac me totsaque ygaa xab Jesús nia me. <sup>22</sup> Dzigo wbire lo Jesús, dze bui Jesús lo me.

—Xin —rēb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

<sup>23</sup> Laa zeene bdziṅ Jesús lidz men rnabey co, laa zha ne rool ndxie, noquiaa zho grē di ne rac lo ngutoo, grēraa zha ne ndxie ga, nguiedz zēēb tsi zho roon zho, tib ruid ne rac. <sup>24</sup> Dzigo rēbchaa me lo zho:

—Golree nēz ley, sac gon gute mēēd qui, nixguiesse win.

Zha ne rlēē, zha ne rzhidzniegaa me, laa zho brieē ley. <sup>25</sup> Dzigo laa me bzēēb len yu zaatne nix mēēd co, bzhen me nia win. ¡Horcogazha laa win guche!

<sup>26</sup> Grēse guiedz ne ndxie dib gax ga, gocnan miech scataa milagr nroob ne been me, bleeban me mēēd co.

*Biac chop zha ne rold lo ni tib zha ngop*

<sup>27</sup> Zeene laa Jesús wbi ga, nēz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdoo no!

<sup>28</sup> Bdziṅ Jesús yu ne rbēz me, laa zho wbig lo me. Dzigo rēbchaa me lo zho:

—¡Dib zdoo to dzigo lēē rililadz to zrieelo gunguiac naa to?

—Dib zdoo now —rēb zho.

<sup>29</sup> Dzigo pquiaania me zhits bziaalo zho, ni rēb me:

—Mine bliladz to i nasca, laaw gac niina zigne bliladz tow.

<sup>30</sup> ¡Horcogazha laa lo grop zha co biac!

Dzigo pso Jesús diidz lo zho choot lo gzodiidzd zho zha biac zho, <sup>31</sup> ni zigne brieē zho ga, laa zho bzodiidzlew. Blozh ga, grēse guiedz ne ndxie dib gax ga, gocnan miech scataa nac milagr ne run me.

<sup>32</sup> Loxaque wbi grop zha ne biac lo ga, laa bla zho bdziṅlaque, bdziṅnie zho tib men ne nosacsi menox,

psanngop ma men co. <sup>33</sup> Dzigo ben<sub>c</sub>xoon Jesús men<sub>d</sub>ox co, zeene laa ma bzhoon laa men co psilo bnee. Grë miech guizhiu ne ndxie ga, per ni rzee zdoo zho, rnee zho:

—iWaltaa gard dzian ne tib men ne squitaa gun grë mi-lagr qui!

<sup>34</sup> Laa grë zha farisé rnee:

—Ma ne rnabey lo men<sub>d</sub>ox nacie men qui, gane rrieelo run<sub>c</sub>xoon me men<sub>d</sub>ox.

<sup>35</sup> Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdzi<sub>n</sub>taa me, rie me xyadoo zho rnee me lo zho zha racladz Dios gban zho, ni run<sub>g</sub>uiac me zho tel<sub>p</sub>e nactaa guiel<sub>g</sub>uidz ne rzac zho.

<sup>36</sup> Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacie zho, rac zho zig grë mëcwxiiil yeen ne guiend xbaxtor.

<sup>37-38</sup> Tib vuelt haxta rëb me lo xpëëdsuel me:

—Gol<sub>n</sub>ab lo Dios cxeel<sub>r</sub>aa me zha ne gun xtsiin me. Gol<sub>w</sub>i gan<sub>l</sub>e pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guiel<sub>g</sub>on ne goll<sub>e</sub> gliiap.

## 10

*Bzo Jesús zha ne tsienee xtiidz me*

(Mr. 3:13-19; Lc. 6:12-16)

<sup>1</sup> Blozhse sca bnee Jesús, dzigo bredz me gza tsiipchop zha ne nac xpëëdsuel me ga,

bzo me zho tsienee zho Xtiidz Dios lo miech, bdeed me poder lo zho gun<sub>c</sub>xoon zho men<sub>d</sub>ox zaatne nosacsi ma miech, ni gun<sub>g</sub>uiac zho grë men<sub>r</sub>zacnë.

<sup>2-4</sup> Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz gree zha Roma Israel),

ni Judas Iscariot (zha ne güeyto Jesús).

*Pxeel Jesús zha ne tsienee xtiidz me*

(Mr. 6:7-13; Lc. 9:1-6)

<sup>5</sup> Blozhse ga, pso me diidz lo zho zha tsie zho, rëb me lo zho:

—Nan<sub>l</sub>e to nagon, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar. <sup>6</sup> Zaatne no grë zha Israel, gase gol<sub>t</sub>sie; lëë grë mëcwxiiil ne nonziaab ga.

<sup>7</sup> 'Gol<sub>t</sub>sie, gol<sub>t</sub>sienee lo zho gacnan zho gan<sub>l</sub>e laa dze zi-aadgaxle zeene laa Dios csilo gnabey.

<sup>8</sup> 'Grëse zha ne rzacnë, gol<sub>g</sub>un<sub>g</sub>uiac zho; zha ne rlan guiedz lepr, gol<sub>s</sub>an<sub>m</sub>be zho; zaatne nix zha ne gutle,

golcueeban zho; grë zha ne nosacsi mendox, golguncxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

9-10 'Peet güeyde to, xab tow, lab tow, mine nacwse to, mine quiase ni to, mincose goltsienie. Güeyde to dimi, per ni tib quiet güeyde to; sac zaatne tsiegun to dziin rii, ib ga none gneedz zho ncuaane gow to.

11 'Guiedz ne gdzintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co. 12 Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co, 13 golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me. 14 Zha ne sca siguield ycaania to, golrieegazh lidz zho; guiedz ne siguield zho yquiaadiag zho mine nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo. 15 Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

16 'Nsin golso, golguien ganle rrieequia tib mëcwxiil yeense nac to, ni laa naa rxel to zaatne no grë coyot dox. Ndooladz golgac, niowse

golgac lo miech zig rac grë palom, per scagaa con cuidado goltsie, golgan ganle zha rzë meel. 17 Nligaa nsin golso, sac gon ib ziezo miech to lo wxtis, ni lëëque len yadoo ga quin zho to, 18 haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtidz naa lo grë zha co, ni lo grëragaa miech ne nacd zha Israel.

19 'Zeene sca tsiezo zho to lo grë zha rnabey co, tsode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to. 20 Led tod gnee, sinque, jzhiEspíritu Pxoz to men ne zob gbaa, men co gnee ga!

21 'Zlëeniedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëëd zho ctsidil zho, tsielo zho zho ladznia zha ne gut zho. 22 Tel to, guiets yag gan miech to, per telne dziits so to tel pe nactaa lo guielnë ne ted to, ib zgaa to tib guielmban ndzon ne gdzindraa dze lozh. 23 Guiedz ne no to, zeene laa miech csilo yquiaanal to, golrieë ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

24 'Golwi ganle zha ne nac mëëdscuel, tsod zha ne ndziibraa non lo maistr, zha ne rquiagaa dziin, tsod zha ne

nonraa lo zha ne rree zho.  
<sup>25</sup> Tel̄ zha guṅ miech maistr,  
 scaque guṅ zho mēēdsuel; tel̄  
 pe cteed zho bizhuan dziin,  
 miṅcoque cteed zho zha ne  
 quia dziin. Gacxe waa peet  
 tsienied guic to, tel̄ pe nactaa  
 ncuaane gnee miech to, sac  
 gon̄ niicxe naa name ne nac  
 naa Dad, mendox rnee zho  
 nac naa.

<sup>26</sup> 'Gdziebde to, zdziṅ dze  
 ne glu gan̄le cho zienal̄ miṅe  
 nac diidzli, chogaa zienal̄  
 guiel̄ntseeb, gal̄ dze co grēsew  
 xoobnen̄.

<sup>27</sup> 'Grēse mine rne naa lo  
 to zeene nese rziodiidza,  
 gol̄new lo miech, haxta  
 glaa guic yu gol̄so, nguiedz  
 gol̄new.

<sup>28</sup> Gdziebde to  
 miech, gol̄guien̄ gan̄le no  
 tib men̄ nroobraa, lēē men̄  
 co nac Dios. Tel̄ miecha,  
 loxaque cuerpse zrieelo  
 zho csacsi zho, saṅgue Dios,  
 zrieelo me gnitlo me miech  
 dib xcuerp zho, dib xalm zho  
 len̄ gabil̄.

<sup>29</sup> 'Nligaa gdziebde to,  
 csaand Dios lega pe gac  
 to. Gol̄wi gan̄le, zig nac grē  
 mguin̄ niicle ne rzac miech  
 peet nond ma, haxta chop  
 ma rdeed zho por tib gaay  
 centav; per Pxoꝛ to gon̄ men̄  
 ne zob gbaa rsaanladzd me  
 ma, ni tib ma guete tel̄ne  
 gdeete me diidz. <sup>30</sup> Pelel̄ to  
 dzigo csaan me, haxta guits  
 guic tow, grēsew ngaba lo me.

<sup>31</sup> Gdziebde to sca, gol̄guien̄  
 gan̄le nonraa to lo tib dzoon  
 mguin̄.

<sup>32</sup> 'Gneli naa lo to gan̄le, zha  
 ne glu lo miech nacie zho  
 naa, scaque naa zeen̄ gal̄ dze

co zlu naa lo Pxoꝛ naa men̄  
 ne zob gbaa, nacie naa zhō.

<sup>33</sup> Saṅgue zha ne ctoladznie  
 naa lo miech, scaque naa ziep  
 naa lo me run̄beyd naa zho.

<sup>34</sup> 'iGuiabde to togo laa  
 naa zial̄ loxaque par cuiṅ  
 wense miech! Lēda gon̄, ye  
 zial̄ naa zial̄guṅctil̄ naa zho.

<sup>35</sup> Sac zha ne sēēb xnēz naa,  
 zlēēnie xpēēd zho zho, tel̄  
 mēēdgaaw, zlēēnie pxoz zho  
 zho; scaque men̄ wnaaw,  
 zlēēnie xinzhizh zho zho,  
 zha ne nacgaa nguzhizha,  
 zlēēnie xnīaa tsieel̄ zho zho.

<sup>36</sup> iLēēque men̄lidz miech gac  
 zha ne glēē gan̄ zho!

<sup>37</sup> 'Zha ne mazdraa rquia  
 zdoo glēēnie pxoz zho zho,  
 glēēnie xnīaa zho zho,  
 glēēniegaa xpēēd zho zho,  
 porne guṅ zho miṅe rnabey  
 naa, peet xtsiind zha co par  
 ygab zho xnēz naa. <sup>38</sup> Scaque  
 zha ne yquia zdoo cueeladz  
 zho zho guīaadnal̄ zho zhits  
 naa, grieelod ygab zho lo  
 naa. <sup>39</sup> Sac grēse zha ne rquia  
 zdoo guiel̄mban ne rap zho  
 lo guidzliu rii, ygaad zho  
 guiel̄mban ndzon ne gneedz  
 Dios; saṅgue zha ne cueeladz  
 xquiel̄mban, niicle tel̄ csacsi  
 miech zho loxaque ne no  
 zho xnēz naa, ib zgaa zho  
 guiel̄mban ndzon co.

<sup>40</sup> 'Niina gon̄ ne squi tsie  
 to, grēse zha ne zaacse ycaa-  
 nia to, zaacse gnee zho lo  
 to, rrieequia naa ga sca ycaa-  
 nia zho; ni zha ne sca ycaa-  
 nia naa, rrieequia men̄ ne  
 pxeelle naa ga sca ycaania  
 zho. <sup>41</sup> Zha ne cuēzlo tib  
 men̄ ne noteed xtiidz Dios lo



miech, guieḷnzaac ne gdeed Dios lo men co, ye zho yгаа guieḷnzaac co. Zha ne cuēzlo tib miech ndzinli, guieḷnzaac ne gdeed Dios lo zha co, ye zho yгааw. <sup>42</sup> Ni zha ne gneedz maase tib zhigaque nis yag lo cho tib zha win ne nac to ne nac to xpēēdsuel naa, ib tedsod zdeed Dios guieḷnzaac ne tsieguiaḷ zho.

## 11

### *Zha ne pxeel Juan Bautist (Lc. 7:18-35)*

<sup>1</sup> Zeene blozh pso Jesús didz lo gza tsiipchop zha co, dzigo laa zho zie. Blozh ga laa me brieque, güey me grē guiedz ne ndxie gax ga, güeyseed me grē miech co.

<sup>2-3</sup> Leḅ dze co no Juan Bautist ladzguiib, ga no Juan bin Juan zha nactaa grē milagr ne ruḅ Jesús, dzigo pxeel Juan bla xpēēdsuel Juan güeynabdiidz zho lo me, dien pe lēēle Meḅ ne zēēble diidz cxeel Dios lo guidzliu ga nac me, te dzigoraa gdziḅ meḅ co ye. <sup>4</sup> Dzigo rēbchaa me lo zho:

—Grē ncuaane bin to rne naa, grēgaa ncuaane goḅ to ruḅ naa, goḷtsie goḷzodiidza lo Juan. <sup>5</sup> Raḅ to ganle grē zha ne roḷd lo, grē zha ne gacd sē, grē zha ne rlan guiedz lepr, grē zha ne rcuaat, laa zho riac; haxta grē zha ne gutle, laa zho rrieaban. Xtiidz Diosa, laaw quiagaaz lo grēse zha ne rquiina. Grēsew, goḷzodiidza. <sup>6</sup> Ni goḷguiab lo me, dichos zha ne racchopd

guic, sinque tiblrique rac zho rliladz zho cho nac naa.

<sup>7-8</sup> Zeene laa xpēēdsuel Juan zey, dzigo psilo me bzeet me Juan lo miech guizhiu ne ndxie lo me ga, rēb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rēb to rlu me zig tib goobgui ne nēzrii nēzrec rey me, te rēb to ye masaque grē lar niazh ne racw zha non nacw me? Per nanle to ganle zha ne scataa racwxab riod zho dan. <sup>9</sup> Nligaa cho dien güeynie guic to nac me, ¿te rēb to ye tib meḅ ne noteed xtiidz Diosa? Gacnaḅ to ganle tib meḅ ne noteed xtiidz Dios goḅ nac me, ni me nac tib zha ne mazdraa nroob lo grē zha ne ziyuḅ dziin co. <sup>10</sup> Me ga raquiet lo Xtiidz Dios zaatne znū rnee:

Sxel naa tib zha ne tednerga lo luu,  
zha co gzhixcuaa nēz ne ted luu.

<sup>11</sup> Ne nligaa lo grēse mguie ne zieded lo guidzliu gard grieequia tib zha ne mazdraa non lo Juan Bautist; per zha ne goḅ winraa zaatne rnabey Dios, nonraa zha co lo me.

<sup>12</sup> 'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlēēnie zhiwseed Dios, gacxe waa zha ne nlipaa rdziebd, zha cose rcaaniaw, rzēēb zho xnēz me. <sup>13</sup> Mazd glo tibaque raquiet ne laa meḅ ne cxeel Dios ga guiaad, zigtaa lo leya, zigtagaa grē zha ne

biadteed xtiidz Diosa, bzeet zhow. Ni niina ne laa Juan biaad, laa men co blanso. <sup>14</sup> Juan gon biaad niina zig no diidz guiaad Lí; golgacnan sca ganle cho nac me. <sup>15</sup> Zha ne racladz guien zho zha nac grē mine none naa nu, iquiaadiag zhow!

<sup>16-17</sup> 'Nac grē miech rii, riend zho pe racladz zho. ¿Cho ganle run zig run zho? Lēē zho run mine run mēēdlas ne rio wguít ro nēz, niicle rool xcompañer win di nguieel ried win, niicle roolga zho di ngan, roond win. <sup>18</sup> Sac gon biaad Juan, ran zho rowd me tel pe ncuane row zho, ried me ncuane rie zho, dzigo laa zho rnee mendox nacie me. <sup>19</sup> Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib riend me cho rtsielsa me, haxta grē zha ngoopdol, haxta grē zha yozh ne rtop dimi ne razh lo zha Roma rzēnie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

*Miech ne bzhiguiel d ncaania xtiidz Jesús*

*(Lc. 10:13-15, 21-22)*

<sup>20</sup> Blozhse ga, dzigo psilo Jesús bzeet me mine ygaa grē zha ne pcaaniad xtiidz me; sac nzian guiedz ne güey me niicle gon zho grētaa milagr ne been me, per ib psaand zho xquielntseeb zho, rēb me:

<sup>21</sup> —iProbsaxe grē men guiedz Corazín, grē men

guiedz Betsaid! Sac gon gonpaa zho grē poder ne rap Dios, per ib psaand zho xquielntseeb zho. Tel niaca mine nian grē men guiedz Tiro, grē men guiedz Sidón, grē milagr ne gon zho ben naa, ib ndedsod mban niac grē zha co nio zho guielnē, zēēb nsaan zho xquielntseeb zho, mbig zho lo Dios. <sup>22</sup> Gacnan zha Corazín, gacnan zha Betsaid sca ganle, gal dze ne gun Dios guielwxtis, lēētaa caxtigw ne ygaa zha Tiro ni zha Sidón, mazdraa mine ygaa zho. <sup>23</sup> Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grē milagr ne ran zho noyun naa, ible nsaan zha co xquielntseeb zho, nitlod zho. <sup>24</sup> iGacnan zha Capernaum ganle gal dze ne gun Dios guielwxtis, lēētaa caxtigw ne ygaa zha Sodom, mazdraa mine ygaa zho!

<sup>25</sup> Dzigo bzodiidznie Jesús Dios, rēb me:

—Dios luu ne nac luu Pxo z naa, luu rnabey gbaa luu rnabey guidzliu, rnedz naa xquizh lo luu sac grē mine noyun luu nu niina bdeete luu diidz niacnan grē zha raca, sinque laaw blu luu lo grē zha ne nac zig grē mēēdlas. <sup>26</sup> Sca quiayun luu, sac ib scale racladz luu gaca.

<sup>27</sup> Blozh ga rēb me lo grē miech ne ndxie ga:

—Grëse ncuaane ran to quiayun naa, Dios men ne nac PxoZ naa, me bneedz poder rii lo naa; sac ib laa me bzo naa, naa guna. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

<sup>28</sup> Grëse to ne nac to zha ne nē noded, rdib rdzag to quiaguib to dien zha guiaanwen zdoo to, goltē lo naa, naa gneedz tib wdziiladz ndzon lo to. <sup>29</sup> Nligaa golbig lo naa, goltēnal zhiwseed naa, golgac tib miech tibliladz, tib miech ndooladz zigne nac naa; zeena gap to descans co. <sup>30</sup> Nacda ncuaane ngan, nacda ncuaane guiab to glēbde to gun tow.

## 12

*Dze ne rdziiladz zha Israel lo dziin*

(Mr. 2:23-28; Lc. 6:1-5)

<sup>1</sup> Len dze coquew, tib dze lēetaque dze ne rdziiladz zha Israel lo dziina, bded Jesús zaatne zēeb zhobxtil grē xpēēdscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co. <sup>2</sup> Gon bla zha farisew, dzigo rēb zho:

—iLēda i gon noyun to, noguīts to ley i! Golguien ganle dze nda nac dze rii.

<sup>3</sup> Pquiabchaa me rēb me lo zho:

—iPe gard glab to zaatne ziaad ganle zha been rey David, tib dze zeene pcaabedz me grē me zha ne ziegza me,

ni zienied zho pe gow zho? <sup>4</sup> Rneew, bzēeb me len yadoo güeynab me guietxtil ne nac gon, downie me grē zha ne ziegza me ga, ni loxaque zha ne nacse pxoz row guietxtil co, ipe led bdiitsd me ley ga? <sup>5</sup> Lo xley Moisés name zhobnee ganle zha haxta dze ne rdziiladz to lo dziin run grē pxoz dziin len yadoo, ni rneeda dol ga sca run zho.

<sup>6</sup> Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

<sup>7</sup> Rnee Dios lo Xtiidz me, quiambēzd me dien peraa gun miech, dien peraa cogan zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdoide to zha ne rapd dol. <sup>8</sup> Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia*

(Mr. 3:1-6; Lc. 6:6-11)

<sup>9</sup> Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co. <sup>10</sup> Lad grē miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe

yquiaaqui zho me tsiezo zho me lo wxtis.

<sup>11</sup> Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiil to tib len blë nroob, ¿led zëëb lëë rie to riebee to ma? <sup>12</sup> Tel sca rquia zdoo to mëcwxiil, igolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

<sup>13</sup> Dzigo rëbchaa me lo mgui ne në nia ga:

—jBzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

<sup>14</sup> Grë zha farisé co, zigne brieë zho ga laa zho psilo bnediidz dien zha gdeeda didz gut zho Jesús. <sup>15</sup> Bien Jesús sca no guic zho, dzigo mazd brieë me ga. Miech guizhiu ne zienal zhits me, grëse men rzacnë ne zienal ga, beenguiac me zho; <sup>16</sup> per pso me diidz lo zho, choot lo gzodiidzd zhow.

<sup>17</sup> Ga brieëquia mine pquiaa Isá, tib men ne biadteed xtiidz Dios padzeela, zeene rëb me:

<sup>18</sup> Lëë men rii bzooblo naa gun xtsin naa,

rleynie naa me, rzac zdoo naa grë ncuaane run me.

Zded naa zhiEspíritu naa gacnie me,

me nac men ne cxobnen xtidz naa lo grëse miech.

<sup>19</sup> Tilnied me miech, sedzd yan me lo zho, sod me ro nëz goptsie me.

<sup>20</sup> Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele,

csand me zdoo zho; zha ne mban rac lo xliaadz zho,

csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

<sup>21</sup> Haxta zeene gan me ye grë zha ne nacdraa zha Israel,

laa zho gnalo me.

*Rëb zho mendox nacie Jesús*

(Mr. 3:20-30; Lc. 6:43-45; 11:14-23; 12:10)

<sup>22</sup> Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui. <sup>23</sup> Grë miech ne ndxie lo me ga, per nli bzee zdoo zho, rnee zho:

—jBay pe lëë men qui naye nac Men ne zëëble diidz ga cxeel Dios!

<sup>24</sup> Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rñabey lo mendox ma co nacie me, gane rrieelo runcxoon me mendox.”

<sup>25</sup> Bien Jesús sca rza guic zho, dzigo rëbchaa me lo zho:

—jNcuaane gacd gon rnee to! Tel tib wxtis nadien lëëque zha ne nacie zho csilo tilnie

zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co? <sup>26</sup> Scaque mendox nagon, telne lëëque lëë ma guncxoon samendox ma, ipe nale na bnitlo ma! <sup>27</sup> Nana ne squi rnee to Beelzebú nacie naa gane rrieelo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dolldox i quiayun to, squi rnee to. <sup>28</sup> Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

<sup>29</sup> ¡Masaque nac mendox zig tib zha ne no xfuers, zha ne gacladz cuee grë ncuaane no lidz zha co, none cxidoogazh zho zho! <sup>30</sup> Tel mendoxa rlëënie ma naa, ni nanle to ganle zha ne rlëë lo ne, gacnied zho ne.

<sup>31-32</sup> Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

<sup>33</sup> Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuaangaaw, nex ncuaanaque rquia low. <sup>34</sup> ¡Scaque to nagon zhin mendox! ¿Zha nan to nadien gac to miech wen, tel desde

zdoo to ntseeb? Miech ntseeb to gane squi rzë xtiidz to, sac gon, jgrëse diidz ne rrieë ro miech, zdoo zho rzaw! <sup>35</sup> Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse diidznë rrieëche ro zho. <sup>36</sup> Ni gal dze ne gon gun Dios guielwxtis, ib tedsod zunquizh me miech tib tib diidz ntseeb, tib tib diidznë ne sca rrieë ro zho. <sup>37</sup> Sac gon zigne rzë xtiidz zho niina, min co cueequia zho gal dze co, o mincogaa cteedquie zho.

*Racladz zha farisé gan zho milagr*

(Mr. 3:31-35; 8:12; Lc. 8:19-21; 11:24-26, 29-32)

<sup>38</sup> Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

<sup>39</sup> Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to?

<sup>40</sup> Stibaque milagr gon gan to, lëë min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel. <sup>41</sup> Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios,

laa to nëde to gon to diidz niicle ne lo to nu zo tib men ne mazdraa non lo Jonás. <sup>42</sup> Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

<sup>43</sup> "Telne csaande to xquielntseeb to i gon, low lozh to. Sac to zig bzhaac tib zha ne psacsi menox. Zeene brie ma zdoo zho, güey ma güeyquianzë ma grë dan zit güeyguib ma dien pa cuëz ma. Gonse ma rdzielz zaatne cuëz ma, <sup>44</sup> rëb ma: "Mazd laa naa gbireque guia naa zaatne brie naa ga." Zeene biire ma bdziñ ma zdoo zha co, gon ma nroob lugar no, pale tib yu dets, <sup>45</sup> nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. ;Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

<sup>46</sup> Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëeb zho haxta len yu, sac scataa miech guizhiu ne ndxie lo me ga. <sup>47</sup> Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

<sup>48</sup> Pquiab me rëb me:

—;Xnia naa ye, bets naa ye?

<sup>49</sup> Blis nia me, blu me grë xpëëdsuel me, dzigo rëbchaa me:

—Zha ne gon nac zig zha rii, lëë xnia naa ga, lëë bets naa ga. <sup>50</sup> ;Sac grëse zha ne run mine rnabey PxoZ naa men ne zob gbaa, grëse zha co nac bets naa, nac bzian naa, nac xnia naa!

## 13

*Nac Xtiidz Dios zig zhobxtil*

(Mr. 4:1-20; Lc. 8:4-15)

<sup>1</sup> Blozh ga brie Jesús güey me ro nisdoo. Ga zob me, <sup>2</sup> zeene gon me nzian miech ne nocaalsa lo me ga, nacne biepe me güeysob me tib len barcw zo gax ro nis co, psilo me pseed me zho.

<sup>3-4</sup> Ndal grë ncuaañe pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grë mguin znuse dow maw. <sup>5</sup> Mine bliaal zaatne nac lad quie, znuse znuse blana, <sup>6</sup> per zeene laa lo ngbidz brie, znusaque bgoola, bidzgaw; sac guiend nroob low. <sup>7</sup> Mine bliaal zaatne nac len yag guiets co, zeene laa yag guiets pxii, bnitlogaw. <sup>8</sup> Sanguie mine bliaal zaatne nac lo liu naal, blana, brooba ni goca; lo tib tib zhob co no zhimziona brie galptsii zhob, now brie

tsongala, nogaaw brieë haxta tib gayoow.

<sup>9</sup> Blozh ga, rëbchaa me:

—Zha ne racladz guien mine rne naa nu, yquiaadiag zhow.

<sup>10</sup> Zeene laa grë miech co zey, dzigo wbig xpëëdsuel me bnabdiidz zho lo me dien pe nac ne sca niapse con cuent rseed me grë miech.

<sup>11</sup> Pquiab me rëb me:

—Tel to, Dioszhal rlu lo to zha rnabey me, niicle ncuaane mazdraa ngueetsa; laa grëraa miech ne gard gbig lo me, grielod guien zhow.

<sup>12</sup> Sac zha ne noxcole dien zha rnabey me, zeedraa me guielbiini lo zho guien zhow, laa zha ne noxcoda, mine riense zho, stiche mew.

<sup>13</sup> Sca rseed naa zho parne tsoguc zho zha rnabey Dios, per nac zho niicle nzhal lo zho rwi zho, per peet rand zho; niicle nzhal diag zho per peet rond zho; ib peet riend zho. <sup>14</sup> Lëë mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet rand zho.

<sup>15</sup> Ne nlipaa miech nad, miech ndip zdoonac zho,

rrieequia ntse zho diag zho, ntse zho lo zho;

parne peet gond zho, peet gand zho.

Ib riend zho zha gbig zho lo naa, ygab zho xnëz naa, parne csilaa naa zho.

<sup>16</sup> 'Sangue to —rëb Jesús lo zho—. ¡Dichos to porne rien to pe ran to, ni riengaa to mine ron to! <sup>17</sup> Blactaa zha ne biadteed xtiidz Dios padzeela, blactaa zha ne güeynal mine nac diidzli, bzoobladz zho nian zho grë ncuaane ran to niina, per bgaad zho nian zhow; bzoobladz zho nquiaadiag zho grë ncuaane noquiaadiag to, per bgaad zho nion zhow.

<sup>18</sup> 'Golquiaadiag sca ganle zha nac xcuent zha ne güey gon ga. <sup>19</sup> Ro nëz ne sca bliaal zhob co, sca nac palal miech ne riepaa zha ne rienee Xtiidz Dios lo zho, per riogucd zhow, rlozh ga rdzinaque mendox, rietiche ma tel palalse mine rien zho. <sup>20</sup> Lad quie ne bliaal spalal zhob co, sca nac grë zha ne rley rcaania Xtiidz Dios; <sup>21</sup> per led dib zdood zho rcaania zhow, gane zeene laa miech rsilo rlëë lo zho, laa miech rtsidil zho porne rililadz zhow, rsaanga zhow.

<sup>22</sup> Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuaane no lo guidzliu rii mazdraa rionie guic zho, rquidie grë dimi zho. Grë ncuaan co rioxcoraa zho, laa ne tsonie Xtiidz Dios guic zho, min co rquiaqui ib rund zho mine rnabey me. <sup>23</sup> Laa liu naal ne bliaal mine scataa goc ga, sca nac grë zha ne dib zdoon rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuaane run

zho, no zho nac zig mzion ne brie e galptsii zhob ga, no zho nac zig mine brie e tsongalā, nogaa zho nac zig mine brie e tib gayoow ga.

*Zha nac xquielrnabey Dios  
(Mr. 4:30-34; Lc. 13:18-21)*

<sup>24</sup> Biire pcaalsa miech lo me stib, dzigo psiloque me pseed me zho con stib cuent, rēb me:

—Ziaad gac xquielrnabey Dios lo guidzliu rii zig bzhaac tib men ne gon zhobxtil. Niapse zhob wen, zhob nal gon me, <sup>25</sup> per no tib zha ne rlēē lo me, goḷ tib pcow liu, horne grēse miech nixguies, güey zho güeylaal zho xmidz guizh ncuaan zaatne gon me.

<sup>26</sup> 'Zeene laa zhobxtil co psilo blaṅ mzion, hor coraa blu laa guizh ncuaan co no lada. <sup>27</sup> Grē zha ne quia xtsiin me, zeene gon zhow güey zho rēb zho lo me: "Tebaa gan luu ganle, dipse lad xoob luu zēēb guizh ncuaan, ¿dieen pa brieew gocbniw ga?" <sup>28</sup> Dzigo rēb me: "Rien naa no cho tib zha ne rlēē lo naa, zha co been dziin co."

'Gocladz zho, hor cogazh nielaadz zhow per bzhiguiel me, <sup>29</sup> rēb me lo zho: "Tsielaadzde tow, sac tel glaadz tow niina ye zhobxtil gliaadzniew. <sup>30</sup> Goḷsaan sca zēēba ga, na zeene laa wlaap gac, hor co gnabey naa zha ne quiits zhob, ctopgazh zhow gdziin zhow tib lad tseca; lozhraa ga quiits zho zhob, tsasa ga, glansow ro yu."

<sup>31</sup> Blozh ga bzeet me midz moxtaz, rēb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win, <sup>32</sup> ni tel gacbniw, rooba ni lēew roobraa lo grē guizh ne ran zho ro yu, raca lal tib yag nex, haxta rdziṅ grē mguin rhixcuaa ma zhiptsieez ma lo grē zhicwa.

<sup>33</sup> Rēbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nase ncob co rzibe.

<sup>34</sup> Grēse mine pseed Jesús grē miech co, niapse con cuent bnee mew lo zho. <sup>35</sup> Ga brieequia mine bzeet zha ne biadteed xtiidz Dios padzeela, zeene rēb zho: "Niapse con cuent cseed naa miech, sca gnee naa lo zho grētaa ncuaane gard gacnan miech wlal ne bre guidzliu."

*Zha nac xcuent guizh ncuaan co*

<sup>36</sup> Blozhse bnee Jesús lo grē miech co guey zho, yeque me laa me zey gza xpēēdscuel me. Bdziṅ zho ro yu, ga bnab zho lo me siguiel me gnee me lo zho dieṅ zha nac xcuent guizh ncuaan ne bzeet me ga.

<sup>37</sup> Dzigo rēbchaa me lo zho:

—Goḷgona sca, znu gon nac cuent co. Rrieequia gon naa ga nac men ne gon zhob co. <sup>38</sup> Liu ne bniaaw ga, nac lo guidzliu, zhobxtil co nac grē miech ne nole xnēz Dios, laa guizh ncuaan co nac grē zha ne no ladznia menḍox. <sup>39</sup> Zha ne güeygan



guizh ncuuan co, lëe mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëe anjl ga. <sup>40</sup> Ni zigne sca cuee zho guizh ncuuan co lad zhobxtil, gzëëg zhow, scapaa nagon gal dze ne gac xquielwxtis Dios, <sup>41</sup> sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa. <sup>42</sup> jGrëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdox co. <sup>43</sup> Laa grë zha ne güeynal minë nac diidzli, zha co gdziñ zaatne rnabey Pxoz naa, masaque zig xbiini ngbidz glu zho ga. jZha ne racladz guiena yquiaadiag zhow!

<sup>44</sup> 'Ziaad gac xquielrnabey Dios zig tib ncuuan non ne noliu tib lo xcuaa miech. Zha ne gdziel tib ncuuaane sca non, ib tedsod zie zho sto zho grëse ncuuaane rap zho grieë dimi si zho liu co, parne gunchen zho ncuuan non co.

<sup>45</sup> 'Zha ne rzëëb lo xquielrnabey Dios ziaad gac zho zig tib zha ne rzi quie perl minë mazdraa niäzh. <sup>46</sup> Zeene ron zho pa no tib perl co, rto zho grëse ncuuaane rap zho, rie zho rzi zhow.

<sup>47</sup> 'Nacaque xquielrnabey Dios, zig tib guix nroob ne rgaa mel niina, zeene rsëëb ngooz mela lo nis grë lose mel rtopa. <sup>48</sup> Rlozhse riodzëw, dzigo rbeequia zhow ro nis, garaa rzob zho rbe zho grë

mel co; ma ne rquiin laa tib chicuid zole rio ma, laa ma ne rquiind rsëëb zho. <sup>49</sup> Scapaa nagon gac miech gal dze ne gun Dios xquielwxtis me, ziaad grë xanj me cuee zho grë zha ntseeb lo zha ne no xnëz me, <sup>50</sup> tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdox co.

<sup>51</sup> Blozhse ga, rëb me lo zho:

—jPe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

<sup>52</sup> Dzigo rëbcha me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quianie chop lo ncuuan non lidz zho, quianie zho grë min gol-le ni quianiequegaa zho min cub.

*Güey Jesús ladz me*

*(Mr. 6:1-6; Lc. 4:16-30)*

<sup>53</sup> Blozhse sca bzodiidz me grë cuent co lo zho, laa me brieë ga zie me nëz ladz me.

<sup>54</sup> Bdziñ me ga güey me yadoo, psilo me pseed me grë miech co. Per nli rzee zdo zho ron zho grë minë rnee me, rnabdiidzlsa zho rnee zho:

—jPazhe waa squitaa pseed men qui? jZha nac guielbiini ne squitaa rap me i, ne rnee miech ndal grë milagr ne run me? <sup>55</sup> Tib zhinse ngurëëyag name nac me. Led lëe xingan Mari i, bets me name nac Jacob, nac José, nac Simón ni Judas; <sup>56</sup> grë bzian mew, nu

no zho grë zho. ¿Pa dzigo güey me wseed qui?

<sup>57</sup> Ib been<sub>casd</sub> zho me, haxta rlëe zho lo me. Zeene gon me sca rac zho, rëb<sub>chaa</sub> me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

<sup>58</sup> Beend me nzian milagra, sac sca ndip zdoogrë miech co ib nëd zho nliladz zho cho nac me.

## 14

### *Gut Juan Bautist*

(Mr. 6:14-29; Lc. 9:7-9)

<sup>1</sup> Len dze co bin rey Herod (men ne rnabey Galilé) grë ncuaa<sub>ne</sub> run Jesús, sac tel pa lotaaw zëeb xtiidz me; <sup>2</sup> dzigo rëb Herod lo grë zha ne run dziin lo me:

—Rien naa lëe Juan Bautist ga quiayun grë min co, segur brie<sub>eban</sub> me.

<sup>3</sup> Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib, <sup>4</sup> loxaque ne rnee Juan lo me nongui<sub>lda</sub> ga lëeque Herodí ptsieel<sub>nia</sub> me, sac tsielpaa bets me Lip nac Herodí. <sup>5</sup> Gocladz Herod niut me Juan, per bdzieb me menguedz, sac rleynie zho Juan, rien zho xtiidz Dios ziadteed Juan lo miech.

<sup>6</sup> Laa tibtaa dzew, lëetaque noyac zhilni Herod dze ne bloozh me stib iz, bded tib xindzoo<sub>p</sub> Herodí squi ndxie grë zha ne zobnie me psilo ndzoo<sub>p</sub> biee ndzoo<sub>p</sub>. Bdziladz me gon me zha

biee ndzoo<sub>p</sub>, <sup>7</sup> haxta brie<sub>e</sub> ro me rëb me: “Ncuaa<sub>ne</sub> gacladz<sub>taa</sub> luu gnab luu, znedz naaw.” <sup>8</sup> Per glole pquiil Herodí ndzoo<sub>p</sub>, nacne rëb ndzoo<sub>p</sub> lo me: “Min<sub>e</sub> racladz naa, xoob guic Juan tib len<sub>e</sub> bandej gneedz luuw lo naa niinagazh.”

<sup>9-10</sup> Zeene bin Herod sca rëb ndzoo<sub>p</sub>, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaa<sub>ne</sub> gnab<sub>taa</sub> ndzoo<sub>p</sub>. Dzigo racse me pxee<sub>l</sub> me zha ne güeychug guic Juan len<sub>e</sub> ladzguiib. <sup>11</sup> Zeene wbire zho, zhoobse guic Juan tib len<sub>e</sub> bandej bdeed zhow lo ndzoo<sub>p</sub>, dzigo güey ndzoo<sub>p</sub> güeydeed ndzoo<sub>pa</sub> lo xn<sub>iaa</sub> ndzoo<sub>p</sub>.

<sup>12</sup> Zeene gocnan xpëedscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

*Bguiaan Jesús gaay mil miech*

(Mr. 6:30-44; Lc. 9:10-17; Jn. 6:1-14)

<sup>13</sup> Zeene bin Jesús sca bzhaac Juan, dzigo brie<sub>e</sub> me ga bzëeb me barcw zie me tib zaatne guiend miech. Per znuse bien diidza, nzian grë guiedz co zha ne gocna<sub>na</sub>, tib ro nis güey zho, glole zho bdzi<sub>n</sub> zaatne no gdzi<sub>n</sub> me ga.

<sup>14</sup> Laa me noyet len<sub>e</sub> barcw, zeene blis lo me gon me laa grë miech guizhiu co ndxiele ga; pquia zdoogrë miech, beenguiac me grë mguidz ne zienie zho.

15 Laa dze ziedzelew, wbig xpëedscuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuane gow zho; sac gon laa dze bdzele.

16 Pquiab me rëb me lo zho:

—¿Pe nacne guey zho squise? To none gdeed ncuane gow zho.

17 Rëbchaa zho:

—¿Per pe dien yguiaan no zho? Pe rnase gaay quietxtil ni chop mel ne ziaadnie no nu, lo grëtaa miech qui.

18 Dzigo bnabey me zho güeynie zho quietxtil co, güeynie zho mel co lo me, 19 ni bnabey me grë miech co bzob zho lo grë guizh nguia ne zëeb ga. Horco bzhen me gza quietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza quietxtil co, mel co ne, zigse rdeed mew lo xpëedscuel me scase scase bdiiz zhow lo grë miech co. 20-21 Grëse zho dow zho haxta zaatne bieltaa zdo zho. Miech tafa, zha bguise rgaa zig gaay mil, nandragaa grë men wnaa, grë mëedlas; ni zeene blozh dow zho, scase ncuane nroob biaan, biodzë tsiipchop chicuid bio grë quietxtil co, bio grë mel co.

*Rzë Jesús lo nisdoo*

*(Mr. 6:45-56; Jn. 6:16-21)*

22 Zeene blozh ga, bnabey Jesús xpëedscuel me bzëeb zho len barcw, zeena zienerga zho tedquia zho stib

nëz ro nis co; laa me bii blëz ga, nozonëz me grë miech co.

23 Blozhse bzonëz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

24 Horco laa barcw ne zie xpëedscuel me ga no lo nis co, ib gacd csëeniob zhow, sac rriee me rtsire mew, nëzrii nëzrec raca lo nis. 25 Merle guini liuw, tibaque zeene laa me bdziñ zaatne zie zho ga, tib lo nis co ziezë me.

26 Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¿Tib ndziin i gon ziaad i!

27 Dzigo bnee me lo zho rëb me:

—¿Gdziebde to, naa zial nu!

28-29 Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—¿Dë sca! —rëb me.

Lëelëd biet Pedr len barcw, laa Pedr ziezële lo nis co 30 zeene gon Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, hor co broptsiedan Pedr, rbedz Pedr me, tsiebee me Pedr ga.

31 Dzigo wbig me bzhen me nia Pedr, bzoli me Pedr lo nis co.

—¿Aque luu gon Pedr! —rëb me—. ¿Pe nacne gocchop guic luu? ¿Gard gon gliladz wen luu cho nac naa?

32 Zeene laa me biepnie Pedr len barcw, laa me co blëz. 33 Grëraa zha ne no len barcw ga, rleynie zho me, rzee zdo zho rnee zho:

—iNasi nagon ndion no nli Xpëed Dios nac luu!

<sup>34</sup> Zeene bdziñ zho stib nēz ro nis co, zaatne rnee zho Genesaret, ga biet zho barcw.

<sup>35</sup> Grē miech co zeene gocnan zho laa me bdziñ ga, znuse znuse pxoon zho diidz grēraa guiedz ne ndxie gax ga. Dzigo brieē grē miech co, güeynie zho grē meñ rzacnē lo me, <sup>36</sup> rnab zho lo me siguiel me maase ni xabse me xeñ grē meñ rzacnē co. Grēse zha ne bzheñ ni xab me, biac zho.

## 15

*Ncuaane runctal xtol miech (Mr. 7:1-23)*

<sup>1</sup> Tib dze, bdziñ bla zha farisé ni zla maistr ley ne ziaad nēz Jerusalén, lo Jesús; rēb zho lo me:

<sup>2</sup> —iPe nacne dien zienald xpëedscuel luu miñe blu xmengol ne, pe nacne zeene laa zho row, ib rguibd zho nia zho zigne nopaa tsara?

<sup>3</sup> Pquiab me rēb me lo zho: —iTo waa, pe nacne quiaguiits to xley Dios? Golguien ganle laa ne gun to miñe rnabey Dios zigne naca, lel ncuaane blu xmengol to, miñ co zienal to. <sup>4</sup> Led znu gon rnee lo xley Dios: “Gon pxoz luu, gon xniaa luu”, ni rneew: “Zha ne quie pxoz, quiegaa zho xniaa zho, ib none guet zho.” <sup>5</sup> Laa to gon rnee to: “Peet nacda gund zho xyudar xmengol zho niicle no me liaadz, totsaque gdeed zho gon.” <sup>6</sup> Tib lad rsan to xley Dios, miñe blu xmengol to miñ co noxcoraa to. <sup>7</sup> iLoxaque guielwquidie qui

no to! Rquiaalo to miech wen nac to, per lēepaa miñe run to i ga bzeet Isá zeene rēb me:

<sup>8</sup> Grē miech rii, rquiaalose zho runnon zho naa, rond zho diidz gun zho miñe rnabey naa.

<sup>9</sup> Zhlēse nac grē ncuaane run zho, rnee zho laa zho riaadgan naa;

sac niapse guicle zho riab grē wseed ne quialu zho lo miech.

<sup>10</sup> Dzigo bnee me lo grē miech ne ndxie lo me ga, rēb me:

—Golquiaadiag miñe gni naa lo to nu, ni goltsoxco guien to zha naca. <sup>11</sup> Golgacnan ganle, grē ncuaane rdziñ zdoō miech, led miñcod runctal xtol zho; sinque grē ncuaan ntseeb ne rza guic zho, diidz ntseeb ne rrieē ro zho, miñ co runctal xtol zho.

<sup>12</sup> Horco wbig xpëedscuel me, rēb zho:

—iPe bien luu ganle blēē zha farisé gon zho sca rēb luu lo zho?

<sup>13</sup> Pquiab me rēb me:

—Grēse yag ne squi beenbnid Pxoz naa men ne zob gbaa, ib none laaw gliaadz zolo zolow. <sup>14</sup> Golsaan zho, nli zha noseed miech per nac zho zig nac zha ne rold lo. Ni nanle to ganle, tel tib zha ne sca roldle lo ni xenaque zho nia stib zha ne rand, zaatne nac tib len blē, ib tedsod grop xcuaa zho tsietsobe ga.

<sup>15</sup> Bdedse ga, wbig Pedr lo me rēb Pedr:

—Bzhiguiel bnē lo no dien zha nac diidz ne nē luu ga,

ne rnee luu led ncuaane rowd  
miech runctal xtol zho.

<sup>16</sup> Pquiab me rëb me:

—¿Pe niicle to riendaquew  
dzigo lëë? <sup>17</sup> ¿Pe riende to  
grë ncuaane row miech, led  
mincod runctal xtol zho? Sac  
grë ncuaane row zho rdzinda  
len zdoomban zho, zhaa  
zaatne rdzina; tib rietedsew  
xcuerp zho, rlozh ga rriee-  
gaw. <sup>18</sup> Sangue grë diidznë  
ne rrie ro zho, zdoomban  
zho ga rzaw, ni lëë min co  
nac mine runctal xtol zho.  
<sup>19</sup> Zdoomban zho nac zaatne  
rza grë ncuaan ntseeb ne run  
zho, zig nac:

zeene rio zho grë zhgab yozh,  
zeene rut zho samiech zho,  
zeene rionie zho zha ne nole  
tsieel,

zeene rionie zho zha ne nacd  
tsieel zho,

zeene run zho guielgbaan,  
zeene lega rnexuu zho  
samiech zho,

zeene rneenë zho samiech  
zho.

<sup>20</sup> Grë ncuaan ntseeb co  
nagon nac mine runctal xtol  
miech, gunctald zho xtol zho  
niicle tsard nia zho zigne  
nacpaa grë zhiwseed menjol.

*Biac xpëed tib wnaa zit  
(Mr: 7:24-30)*

<sup>21</sup> Ga briece Jesús, güey me  
haxta nëz Tiro ni nëz Sidón.

<sup>22</sup> Nëz co no me güey tib  
wnaa ne ziaad lo xti zha  
Canaán lo me, nguiedz zëeb  
tsi wnaa co rnab me lo Jesús  
siguiel Jesús tsiegunguiac  
tib xpëdwnaa me nosacsi  
mendox. <sup>23</sup> Per ib pquiabd  
Jesús lo xtiidz wnaa co, dzigo  
wbig xpëedscuel me, rëb zho:

—Mazd bzhiguiel pquiaa-  
diag mine rnee wnaa qui, bui  
ganle zha ncuëtaa zëeb tsi me  
nal me zhits ne.

<sup>24</sup> Pquiab Jesús rëb me:

—Ziald naa par gun naa  
xyudar zha zit, sinque laa  
Pxoz naa pxeel naa par gun  
naa xyudar grë zha Israel  
ne rzac zig grë mëcwxiiil ne  
zonziaab lo xbaxtor.

<sup>25</sup> Scaque nonee me laa  
wnaa co wbig pquiitsgzhib lo  
me.

—Bzhiguiel —rëb me—,  
been tib guielnzaac been  
xyudar naa.

<sup>26</sup> Rëbchaa Jesús lo me:

—Nonguielda gon, cob ne  
guiet ne no nia mëed gdeed  
new lo mëcw.

<sup>27</sup> —Nliw, scaw —pquiab  
wnaa co—, per niicle mëcwa  
name rsaanaque bizhuan ma  
rbig ma row ma mine rrieen-  
gaa nia mëed.

<sup>28</sup> Horco pquiab Jesús rëb  
me:

—¿Squiw nagon! ¿Rlu ni  
dib zdoo luu rnalo luu naa!  
Gacxe waa mine rnab luu i  
gun naa, niinagazh laaw gac.

Horcogazh biac xpëed  
wnaa co.

*Nzian miech ne beenguiac  
Jesús*

*(Mr: 8:1-10)*

<sup>29</sup> Nëz co wbi Jesús bdziñ  
me ro Nisdoo Galilé.

Ro nis co no me, miech  
guizhiu ne pcaalsa lo me.  
Tib dze gon me scataa nzian  
miech co, dzigo güey me  
güey sob me tib guic gui win  
zob gax ga. <sup>30</sup> Ga zob me  
rdziñ grë miech co rdziñnie  
zho grë zhimguidz zho lo me,

no zho zienie grē zha ne nē ni,  
no zho zienie grē zha ne rold  
lo, grē zha ne guiend tib nia,  
grē zha ne guiend tib ni, grē  
zha ngop, ni grēragaa zha ne  
rlan pe stib guielguidz; grēse  
zho beenguiac me. <sup>31</sup> ¡Ncuaane  
gzee zdoo ne goc ga! Grē  
zha ne ni tib diidz gard gnee,  
per nli rley zho laa zho psilo  
rnee; grē zha ne guiend tib ni,  
guiend tib nia, laa ni zho laa  
nia zho biaan zigne no gaca;  
grē zha ne rgob ni, haxta rias  
zho laa ni zho goc-wen; grē  
zha ne rold lo, rlozhd gzee  
zdoo zho grē ncuaane ran  
zho. Grēse miech ne ndxie  
ga, rzee zdoo zho, rley zho  
roolnie zho Dios.

<sup>32</sup> Dzigo bredz me  
xpēēdscuel me rēb me lo zho:

—Rquia zdoo naa grē  
miech rii. Nadzele rac tson  
ngbidz blanso zho lo ne nu,  
ni na quianiedraa zho pe gow  
zho. Telne squise gzonēz naa  
zho, nend pa lo zie zho nēz  
ycow zho.

<sup>33</sup> Pquiab zho rēb zho:

—¡Per pe yguiaan ne zho?  
¡Pa guioxi ne guielwagw ne  
yquiin grētaa miech qui  
dan rii, naca zaatne guiend  
miech?

<sup>34</sup> Dzigo bnabdiidz me lo  
zho, rēb me:

—¡Bla quietxtil ziaadnie to  
i?

—Gadzaquew no —rēb  
zho—, ni chop tson mel win.

<sup>35-36</sup> Dzigo bnabey me grēse  
miech co bzob zho lo liu.  
Blozh bzhen me gza gadz  
quietxtil co, ni gza mel co,  
bdeed me xquizh lo Dios;

blozhse bdeed me xquizh,  
zigse rungröl me quietxtil co  
scase scase rdeed mew lo  
xpēēdscuel me rguizh zhow  
lo grē miech co; scaque been  
me gza mel co.

<sup>37-38</sup> Grēse miech co dow  
zho haxta zaatne bieltaa  
zdoo zho. Miech guizhiuw,  
zha bguise rgaa zho maase  
tap mil, nandragaa grē men  
wnaa, grē mēēdla; ni zeene  
blozh ga bii biodzē gadz  
chicuid bio grē mine biaan.

<sup>39</sup> Blozhse bnee me lo grē  
miech co, blozhse bzonēz me  
zho, dzigo laa me bzēēb len  
barcw zie ne nēz xtan zha  
Magdal.

## 16

*Gocladz zha farisé  
niungüet zho Jesús*

*(Mr. 8:11-21; Lc. 12:54-56)*

<sup>1</sup> Magdal no Jesús, bdzin  
bla zha farisé ni zla zha  
saducé lo me, gocladz zho  
niungüet zho me dien pe  
nxind me tib diidz, pe tib  
ncuaane nonguieldgaa niun  
me. Rquiaalo zho rnab zho  
lo me gun me pe tib milagr,  
zeena gliladz zho nli Dios  
pxeel me.

<sup>2-3</sup> Dzigo pquiab me rēb me  
lo zho:

—¡Pe nlipaa rnee to riende  
to zha nac grē ncuaane noyac  
len dze rii! Zha zēēb dzigo  
runbey to pe rlu lo xcow.  
Zeene ran to rquia xcow nizh-  
nie bdze dze, rienle to quiet  
stib dze co zriee lo ngbidz. Sil  
ne rangaa to quia xcow nizh-  
nie, quia xcow nlaan zhan  
gbaa, rienle to guixoo quiab

dze co. <sup>4</sup> Nazdpaa ntseeb to, squitaa gocndip zdoos to nēz lo Dios, ¿zha rnaraa milagr ne racladz to gan to? Stibaque milagr gon gan to, tib minē gac zigne bzhaac Jonás.

Blozhse sca rēb me lo zho, zoque zho ga, ziega me.

<sup>5</sup> Zeenē brieē zho ga, zoladzd xpēēdscuel me ney zho quietxtil ne niow zho. <sup>6</sup> Lega nacle psilo me nonee me lo zho, rēb me:

—Golguien gon, napaa noyab to lo zhincobi zha farisé, lo zhincobigaa zha saducé.

<sup>7</sup> Zeenē gon zho sca rēb me, rneehaa zho:

—Porne nagon ziaadnied ne quietxtil, gane squi rnee me lo ne.

<sup>8</sup> Bien me sca nonee zho, dzigo rēb me lo zho:

—¿Gardaque lēē guien to cho nac naa! ¿Pe nacne tso to zhizhgab quietxtil? <sup>9</sup> ¿Ni lalnu lēē peet riēnde to! ¿Pe rsoladzde to zeenē gaayaque quietxtil bguiaa ne gaay mil miech, bla chicuida biaan?

<sup>10</sup> Scaque zeenē gadzaque quietxtil ni bgaaw dow tap mil miech, ¿pe niicle min co rsoladzdraa to? <sup>11</sup> ¿Zha nac dzigo rzac to quietxtil nozet naa? Golguien ganle zhincobi zha farisé, zhincobi zha saducé ni naa.

<sup>12</sup> Dzigoraa bien zho led ncobidpaa rzeet me, sinque rēb me lo zho gap zho cuidad lo zhiwseed zha farisé, lo zhiwseedgaa zha saducé.

*Bnee Pedr cho nac Jesús  
(Mr. 8:27-30; Lc. 9:18-21)*

<sup>13</sup> Bdzin Jesús nēz xtan zha Cesarea de Filipino grē xpēēdscuel me, nēz co no me bnabdiidz me lo zho rēb me:

—¿Cho dien ron to rnee miech nac naa?

<sup>14</sup> Pquiab zho rēb zho:

—No zho rnee Juan Bautista, no zho rnee Lív, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

<sup>15</sup> Dzigo rēb me lo zho:

—¿To waa? ¿Cho rzac to nac naa?

<sup>16</sup> Pquiab Pedr, rēb Pedr:

—¿Luu nac Men ne zēēble diidz ga cxeel Dios! ¿Xpēēd Dios nac luu!

<sup>17</sup> Dzigo rēbchaa me:

—Dichos luu Simón (xingan Jonás) brieē diidz qui ro luu, sac gon Pxoz naa men ne no gbaa, men co bneedz guielbiini qui lo luu, nacda ncuane cho miech nēw lo luu. <sup>18</sup> Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda. <sup>19</sup> Laa naa rzo luu, luu gnee Xtidz naa lo miech zeena gacnan zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

<sup>20</sup> Dzigo pso me diidz lo zho choot lo gneed zho, me nac Men ne zēēble diidz ga cxeel Dios.

*Bzeet Jesús zha guñ miech me*

(Mr. 8:31-9:1; Lc. 9:22-27)

<sup>21</sup> Leñ dze co psilo Jesús bzeet me lo xpëëdsuel me zha csacsi miech me. Rëb me nroob ncuaañe cteed zho me, zeene laa me tsie Jerusalén; grë zha non lo menquiedz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieëban.

<sup>22</sup> Goñ Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet. <sup>23</sup> Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par guñgüet luu naa! Zienied guic luu mine rnabey Dios, sinque mine rleynie miech, min co zienie guic luu.

<sup>24</sup> Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnañ zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, <sup>25</sup> sac zha ne yquia zdoo xquielmban, lel znu nitlo zho; sañgue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh. <sup>26</sup> Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho leñ gabil? <sup>27</sup> Naa

ne nac naa Mgui ne pxeel Dios, zdziñ dze ne gbiire guial naa stib, guialnie naa grë xanjñ naa, glu naa ganle pa lotaa men nroob nac Pxoz naa; dze co gded naa mine tsieguial tib tib miech, tel zha wban zho. <sup>28</sup> Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

## 17

*Bdzëëlo Jesús*

(Mr. 9:2-13; Lc. 9:28-36)

<sup>1</sup> Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

<sup>2</sup> Guic gui co no zho, zeene goñ zho laa me bdzëëlo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona. <sup>3</sup> Tibaque zeene goñ zho laa Moisés ni Lí men ne biadteed xtiidz Dios padzeela, nozodiidznie me. <sup>4</sup> Rdzieb zho, lo dzeb co brieer ro Pedr rëb Pedr:

—Maestro, ¡tebaa zha grieelo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

<sup>5</sup> Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëëb tsi tib men co, rnee me:

—Lëe xpëed naa i goñ, rleynie naa me, rzac zdoo naa mine quiayun me. Mine rnee me, golgona.



<sup>6</sup> Mazdraa bdzieb zho bin zho sca rnee meḅ co, lēēlēd pquiiṡgzhīb zho haxta bđziḅ lo zho lo liu. <sup>7</sup> Dzigo wbig Jesús, pcaannia me zho, rēb me:

—Goḷsoli, gdziebde to.

<sup>8</sup> Zeēne blis lo zho bui zho, mese zo ga, gonḅdraa zho schop meḅ co.

<sup>9</sup> Blozhse ga, laa zho wbi ga. Cho gui co ziad-zēēbnie me zho, pso me diidz lo zho miḅe gon zho ga, choot lo gzodidzd zhow, nieeda gaḷ dze ne laa me brieēban.

<sup>10</sup> Dzigo bnabdiidz zho lo me, rēb zho:

—¿Bay zha nacne rnee maistr ley, glo Lí no guiaad stib, dzigoraa guiaad Meḅ ne zēēble diidz ga cxeel Dios?

<sup>11</sup> Rēbchaa me:

—Nliw, ible nacle diidz ne glo Lí guiadseed miech gon zho xtiidz Dios. <sup>12</sup> Ni gacnaḅ to ganḷe laa me biaadle, per beenbeyd miech me, leḷpsacsi zho me been zho me miḅe gocladztaa zho; ni ib tedsōd gon, scaque csacsi zho Mgui ne pxeel Dios.

<sup>13</sup> Zeēne blozh sca rēb me, dzigo biēḅ zho Juan Bautist ga rzeet me.

*Biac tib mēēd ne nosacsi mendox*

(Mr. 9:14-29; Lc. 9:37-43)

<sup>14</sup> Zeēne blozh biet zho cho gui co, gon zho miech guizhiu ndxie ga quiambēz Jesús. Lad co brieē tib mgui, wbig me lo Jesús, pquiiṡgzhīb me lo Jesús, rēb me:

<sup>15</sup> —Laa naa rnab lo luu, bzhiguiel beenguaiac xpēēd naa, nrooble nosacsi guidz

gutye win. Blactaa ziyobe win lo gui, ziyobe win lo nis ne. <sup>16</sup> Blansonie naa win lo xpēēdscuel luu nu, per rrieelod zho gunguiac zho win.

<sup>17</sup> Dzigo rēbchaa Jesús lo xpēēdscuel me:

—¡Pe na squitaa miech ntseeb nac to, ib nēde to gnalo to Dios! ¿Palal tiemp ne so naa gne naa lo to? ¡Ncuaaḅe cxcwdraa naa lo to squi nac to! ¡Goltēnie mēēd qui nu!

<sup>18</sup> Dzigo goctox Jesús lo mendox ne nosacsi mēēd co, beḅcxoon me ma, hor cogazh laa mēēd co biac.

<sup>19</sup> Haxta wbiraa zho ga, wbig zho lo me bnabdiidz zho dien pe nacne brieelod zho niuḅcxoon zho mendox ne nosacsi mēēd co. <sup>20-21</sup> Dzigo rēbchaa me:

—Brieelode to niuḅcxoon to ma, sacne rnalode to Dios. Teḷniaca miḅe rnalole to Dios siquier palal yeen, gzoob ne siquier lal tib midz moxtaz, niicxe ncuaaḅe mazdraa ngaḅ gnab to lo me, zuḅ mew; tsod ncuaaḅe grieelod gun to.

*Bzeet Jesús laa miech csacsi me*

(Mr. 9:30-32; Lc. 9:43-45)

<sup>22</sup> Xtan zha Galilé no zho, tib dzew rēb me lo zho:

—Naa ne nac Mgui ne pxeel Dios, ib znaaz miech naa, <sup>23</sup> haxta zut zho naa; per zeēne gac tson ngbidz gut naa, zrieēbaan naa.

Zeēne bin zho sca rnee me, bio zho guielnē, mbanse rac zho.

<sup>24</sup> Bđziḅ me guiedz Capernaum, loxaque bzēēb me lad

guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

<sup>25</sup> —Rguizh mew, ¿pe nacne quizhd mew?

Zeene bdziñ zho len yu ne rbëz me, gardle guiab Pedra lo me, glole me bnabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

<sup>26</sup> Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho, <sup>27</sup> per par guiabd zho rdziond ne diidz, güey güeyron xanzuel luu lo nis. Mel ne glopaa yгаа low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

## 18

*¿Cho nonraa?*

(Mr: 9:33-37, 42-48;  
Lc. 9:46-48; 15:3-7; 17:1-3)

<sup>1</sup> Len dze co bnabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

<sup>2</sup> Dzigo bredz me tib mëedbgui win, bzo me win glowtaa lo zho, <sup>3</sup> rëb me:

—Gneli naa lo to ganle, telne csaande to xquielntseeb to, telne gacnguudzlazde to, gac to zig mëedwin rii, per ni xnëz Dios grielod sëeb to. <sup>4</sup> Zha ne racladz gac zho

zha non, none gac zho tib miech ndooladz, none gac zho zig tib mëedlas. <sup>5</sup> Miech ne gacnie zha ne sca nac, zha ne rleynie naa, rrieequia naale ga racnie zho.

<sup>6</sup> 'Per miech ne yquuil zho gunctal zho xtol zho, jprobsaxe zha co! Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo. <sup>7</sup> ¡Nac lo guidzliu rii, runfalte guielntseeb low! Runfalte ncuaane gunctal xtol miech, jper probsaxe zha ne yquuil zha ne nole xnëz naa, gunctal zho xtol zho!

<sup>8</sup> 'Golguien telne tib nia to, tib nigaa to rquiaqui runctal to xtol to, goltichegazha. Peet nacda maase tibaque ni to, tibaque nia to zob totsaque yгаа to guielmban ndzon ne gdziñd dze lozh, lëdle zob grupa ni laa to guey gabil, lo beldox ne gdziñd dze guuu. <sup>9</sup> Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque yгаа to guielmban ndzon ne gdziñd dze lozh, lëdle zob grupa ni laa to guey lo beldox ne nac gabil.

<sup>10</sup> 'Ib gunde to csañwin to grëraa zha ne no xnëz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoz naa men ne zob gbaa.

<sup>11</sup> 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

12 'Rzac Dios miech zig tib men ne rquianë zdo xpëcwxiil. Telne quianie zho tib gayoo ma, ni gziaab tib ma, led zëëb lëë rsan zho stapgal tsiimtap ma ne zo lo zho, rbire zho rieguib zho ma ne bziaab ga. 13 Zeene rdziel ma lo zho, rlozhd gleynie zho ma, lëë ma rac guielbley que grëraa xcompañer ma. 14 Scadaa nagon rzac Pxo naa miech, grë zha ne nole xnëz me, ib racladz me gziaab zho.

15 'Golguien sca, tib tib to zeene cho tib zha ne nacgrë to gun pe tib falt lo to, goltsie goltsiinee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib. 16 Laa telne nëd zho, dzigo golguib tib zha ne së, chopgaa zha ne së gan ganle zha rac zho. 17 Telniicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuae zho lad to, golsac zho zig rzac miech grë zha ne zienal guielntseeb.

18 'Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

19 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuane

gnabtaa zho lo Pxo naa men ne zob gbaa, zdeed mew. 20 Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

21 Dzigo wbig Pedr rëb Pedr lo me:

—Zha ne sca dzigo gun falt lo naa, çblataa vuelt no gun naa zho perdon? çGadztaaw lëë?

22 Pquiab me rëb me:

—Lëda gon Pedr, led loxaque gadzse vuelt. Tel blataa vuelt gun zho falt lo luu, none gun luu zho perdon.

### *Zha ne beend perdon*

23 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiayun zho dziin.

24 Loxaque psilo me, zeene laa xcuent tib zha co blozh brieë, nroob brieëquia zho lo me; 25 par quizh zhow, peet nzhend zho. Dzigo bnabey me to zho grop tsiel zho, xpëed zho ne, ni grëse ncuane rap zho, parne grieelo gazh xquielqui zho.

26 Zeene gon zho sca rëb me, pquitsgzhib zho lo me, rëb zho: "iBeen guielnzaac, gop tib paciens, na dien zha gun naa quizh naa xquielqui naa lo luu!" 27 Gon me zha rac zho, pquia zdo me zho, psilaa me zho, beenquizhdaque me zho xquielqui zho.

28 'Loxaque brieë zho ga, bdziel zho tib zha ne nzeëb

palal yeen dimi lo zho, tib zha ne rquiaque xtsiin rey cow. Zigne gon zho zha co, zolinöz wbig zho bdie zho yan zho, rnab zho gagazh quizh zho xtimi zho. <sup>29</sup> Dzigo pquiits-gzhib zha co lo zho, rnab zho siguiel zho gap zho paciens, dien zha gaclo dimi co quizh zhow. <sup>30</sup> Pe nquiaadiag zho ga, bnaab zho bio zha co ladzguiib, haxta bdiizh zho dimi ne zëeb zho ga. <sup>31</sup> Grëraa zha ne rquia dziin lo rey co, zeen gocnan zhow, bdeednë zho, güey zho güeyzodiidz zhow lo me. <sup>32</sup> Zeene bin mew, bnabey me gocredz zho, goctox me lo zho rëb me: “iPe clas miech nac luu! Pe rsoladz luu zha rac luu bnaab luu pquia zdoo naa luu, haxta beenquizhd naa luu guielquidox ne zëeb luu ga. <sup>33</sup> iPe nacle pquiad zdoo luu zha co, zigne pquia zdoo naa luu?” <sup>34</sup> Blëe me gon me sca been zho, bnabey me bio zho ladzguiib, haxta blozh bdiizh zho grëse xquielqui zho. <sup>35</sup> Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

## 19

*Zha ne rsëbtsieel*  
(Mr. 10:1-12; Lc. 16:18)

<sup>1</sup> Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nöz dan ro guiubee Jordán, nöz ne rlan ngbidz. <sup>2</sup> Miech guizhiu ne rrieë grë guiedz co, rdzin lo me; grë

men rzacnë ne rdzinne zho, beenguiac me zho.

<sup>3</sup> Ga no me, bdzin bla zha farisé gocladz zho niungüet zho me, par dien pe nxind me tib diidz; bnaabdiidz zho lo me rëb zho:

—Pe gnë luu dien, ipe wena csëbtsieel zha bgui ne gacladz-taa csëbtsieel?

<sup>4</sup> Pquiab me rëb me:

—iMod rande to zha zhobnee lo Xtiidz Dios? Lo co zhobnee ganle zeene psan me miech, tib nöz zho psan me, tib mgui ni tib wnaa. <sup>5</sup> Ni rneew, ib none greezhaa mgui lo pxoz zho, lo xniaa zho par gbannie zho wnaa ne nac tsieel zho, gac zho tibaque miech grop zho.

<sup>6</sup> Nligaa nacdraa zho chop miech, sinque laa zho rac tibaque. Dios nac men ne psan ycatsieel miech, cho dzigo nac miech par quiits zho mine rnabey me.

<sup>7</sup> Dzigo rëb zho lo me:

—iPex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

<sup>8</sup> Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sanque Dios psand me diidz csëbtsieel miech. <sup>9</sup> Gacnan to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga gun zho csëeb zho tsieel zho ycaa zho stib wnaa.

Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

<sup>10</sup> Dzigo rëbchaa xpëedscuel me:

—Tel scataa nac xcuent guieltsieel, mazd lëequew dzigo ctsieelniad ne.

<sup>11</sup> Pquiab me rëb me:

—Nligaa no mgui ne rt-sieelniad, per zhis zho, ni no pe nacne sca riana zho. <sup>12</sup> No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

*Beenlay Jesús mëedlas*

(Mr. 10:13-16; Lc. 18:15-17)

<sup>13</sup> Ga no Jesús, ndal zha ne bdzin bdzinne zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodzinne zho grë mëedlas co lo me.

<sup>14</sup> Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, goisaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

<sup>15</sup> Dzigo psilo me pxobnia me guic grë mëedlas yeen co, beenlay me win. Blozhse ga, laa me brieeg ga.

*Bzodiidznie tib zha ricw Jesús*

(Mr. 10:17-31; Lc. 18:18-30)

<sup>16</sup> Laa me zieriee ga, zeene bdzin tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, çpe nac mine gun naa parne grieelo ygaa naa guielmban ndzon ne gdzind dze lozh?

<sup>17</sup> Pquiab Jesús rëb me:

—Rnee luu lëe tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

<sup>18</sup> Pquiab zho rëb zho lo me:

—çPa min waa?

Rëbchaa me:

—Mine rnee:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquiadiidzguizhd luu samiech luu,

<sup>19</sup> gon pxoz luu, gon xnial luu, cued luu xquielto me.

Bleynie samiech luu, zigne rleynie luu luu.

<sup>20</sup> Dzigo rëbchaa zho:

—Ni tib mine rnee luu i gard quits naa, grësew zana naaw zigne naca. Racladz naa gacnan naa, dien peraa no gun naa.

<sup>21</sup> Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuaane rap luu, dzigo güeytiiz dimi co lo grë zha ne guieind pe yquini. Lozh ga,

dē dēnal zhits naa. Min co nagon gun luu, dzigo zгаа luu guielmban ndzon co; ni scagaa nroob guielnzaac ne ygaa luu nēz lo Dios.

<sup>22</sup> Zeene bin zho sca rēb me, mbanse rac zho laa zho zey, sac nroob ncuaane quianie zho.

<sup>23</sup> Dzigo rēbchaа Jesús lo xpēēdscuel me:

—Gneli naa lo to ganle, grē zha ne squi rapchen rzacxuu zho par sēēb zho xnēz Dios gnabey me zho. <sup>24</sup> ¡Ne nligaa ngañ rzac zhow! Mazd ngandse rded tib camell guieer guzh lēdle sēēb tib zha ne squi rapchen xnēz Dios.

<sup>25</sup> Zeene bin zho sca rēb me, rzee zdoо zho, rnee zho:

—Bay, ¿chosezhe dzigo waa nac zha ne zrieelo sēēb xnēz Dios?

<sup>26</sup> Dze bui me lo zho, dzigo rēbchaа me:

—Nligaa par miech zootle tsod zha ne grieelo sēēb xnēz me; sangue me nañ me no zho. Sac tel me, tsod ncuaane grieelod gun me.

<sup>27</sup> Horco pquiab Pedr rēb Pedr lo me:

—No dzigo waa, ¿pe nac miñe ygaa no? Nanle luu ganle, tel no grēse ncuaane rdziaap no, laa no psana, zi-aadnal no zhits luu.

<sup>28</sup> Pquiab me rēb me:

—Golgona ganle, dze ne gac-ncub grēse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne bi-aadnal zhits naa, sob to lo gza tsiipchop xcan ne rieguial to.

To gac zha ne gun guielwxtis lo gza tsiipchop dii ne nac zha Israel. <sup>29</sup> Grēragaa zha ne psan lidz, psan zho bets zho, bzian zho, xniaa zho, pxoz zho, tsiel zho, xpēēd zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib ted-sod zгаа zho tib guielmban ndzon ne gdziindraа dze lozh.

<sup>30</sup> 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grē zho.

## 20

*Lalga nac grē zha ne no xnēz Dios*

<sup>1</sup> 'Grē zha ne no xnēz Dios, zac zho lo me zig bzhaac grē zha ne güey xtsiin tib men co.

'Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me. <sup>2</sup> Bziel me palal zho, biaan zho diidz palal quizh me zho dze, laa zho bzēēb lo dziin. <sup>3</sup> Glaale ngbidza brie me güeyted me len guiedz, lēētse güeytsib me lo bla zha ne zob ga racladz dziin. <sup>4</sup> Dzigo bree me zho, rēb me: "Goltsie xtsin naa, na quizh naa to miñe non xtse to."

<sup>5</sup> 'Rwe ngbidza, biire me güey me güeyguib me spalal zho. Maase las treza güeya que me stib.

<sup>6</sup> 'Zhile sēēb ngbidza, biire me güey me len guiedz. Ga bdziel me zla zho, gon me

scase zob zho ga. Dzigo rëbchaa me lo zho: “¿Pe nacne squise noded dze to?” <sup>7</sup> Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maasë quizh naa xtse to.” Dzigo laa zho zie.

<sup>8</sup> Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb.” <sup>9</sup> Dzigo bded zha ne bdzele dze bzëëb lo dziin ga, tib tib zho pcaase zho mine non zho tib dze. <sup>10</sup> Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

<sup>11</sup> Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho: <sup>12</sup> “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ¿zha nac dzigo lalga quizh luu no grë no zha qui, ni niipyeenaque been zho dziin?” <sup>13</sup> Pquiab me rëb me: “Bets, nosacsid naa to, biaanle ne diidz name palal quizh naa xtse to. <sup>14</sup> Nana sca golgüey xtimi to i, zeena golsë. Ib zdoo naa rala lalga quizh naa to grëse to. <sup>15</sup> Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

<sup>16</sup> Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

*Bzeet Jesús stib laa miech csacsi me*

(Mr. 10:32-45; Lc. 18:31-34)

<sup>17</sup> Nëz no Jesús zie me nëz Jerusalén, tibaque bredz me gza tsiipchop xpëëdsuel me, <sup>18</sup> bzeet me lo zho zha gon miech me zeene laa zho gdziñ Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa. <sup>19</sup> Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

<sup>20</sup> Tibaque zeene wbig tsiel Zebedé wbignie me grop xingan me Jacob ni Juan, pquiitsgzhib me lo Jesús rnab me gon Jesús tib favor ne racladz me. <sup>21</sup> Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdziñ dze ne laa luu zob zobnabey luu; tib zho nëz derech, stib zho nëz revés.

<sup>22</sup> Pquiab Jesús rëb me lo wnaa co:

—Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëëb no.

<sup>23</sup> Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gnedz naa diidz sob to cue naa nëz derech, nëz revësgaa, led naad raguial min co; sac laa lugar co biaanle par zha ne tsieguiala, ni Pxoz naa men ne zob gbaa men cose nan dien chow.

<sup>24</sup> Grëraa xpëëdsuel me, zeene bin zho pe nac mine rnab Jacob grop Juan, blëe zho lo zho. <sup>25</sup> Dzigo bredz Jesús zho grë zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho. <sup>26</sup> Saingue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin,

gac zho zig tib ngundziin lo to. <sup>27</sup> Scaquegaa zha ne racladz gnabey zho lo to, none glo cseed zho gun zho mine gnabey to zho.

<sup>28</sup> Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

*Biac chop zha ne rold lo*

(Mr. 10:46-52; Lc. 18:35-43)

<sup>29</sup> Miech guizhiu nal zhits Jesús, laa me zieriee guiedz

Jericó. <sup>30</sup> Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, men xtii rey David, pquia zdoo no!

<sup>31</sup> Blalaa zha ne zie ga, psilo zho ndox zho lo grop zha co parne guioog ro zho, per lej hor cole nguiedzraa rbedz zho me. <sup>32</sup> Nacne zeene bdzin me zaatne zob zho, blëz me, bnabdiidz me lo zho rëb me:

—¿Pe nadien gun to naa?

<sup>33</sup> Pquiab zho rëb zho:

—¡Racladz no guiac lo no!

<sup>34</sup> Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho zienal zhits me.

## 21

*Bdzin Jesús Jerusalén*

(Mr. 11:1-11; Lc. 19:28-40; Jn. 12:12-19)

<sup>1</sup> Sca no Jesús nëz grë xpëëdsuel me, laa me bdzin guiedz Betfagé. Gaxle ga riaan Jerusalén, nëz danse squi riaan Gui Oliv. Dzigo pxeel me chop xpëëdsuel me, rëb me lo zho:

<sup>2</sup> —Goltzie guiedz win ne ndxie danse lo ne i. Ga gdzin to zaatne quiadoo tib burr gus grop xpëëd, dzigo golxad ma goltënie ma nu. <sup>3</sup> Tel cho gnabdiidz pe nacne noxadz to ma, golguiab lo zho: Men ne rnabey ne, men co rquiin ma, na zigne lozh xtsiin ma guiaadsan no ma.

<sup>4</sup> Ga brieequia mine bnee tib men ne biadteed xtiidz



Dios lo miech padzeela, zeene rëb me:

<sup>5</sup> Golguiab lo men Jerusalén:  
“Golwi ganle, laa men ne nac zhirey to ziaad i.

Tib men ligase rlu me, zob me lad tib burr win,  
tib ladse ma ne rey yo zob me.”

<sup>6</sup> Laa zho zie, zigne bnabeyse me zho ga, scase been zho. <sup>7</sup> Zeene wbiere zho, laa zho bdziñnie burr co grop xpëed ma. Pxob zho lar ne rbix zho lad xpëed ma, laa me bzob ma. <sup>8</sup> Zigse zie me, no grë miech guizhiu co, rta zho lar ne rbix zho ro nëz rded burr ne zob me ga; no-gaa zha ne rchoo nia grë yag nguia, rdziñ zhow ro nëz rded me. <sup>9</sup> Grëse zho, zig-taa zha ne nera, zigtaa zha ne naļa, nguiedz roptsie zho rnee zho:

—iGolgotsaa co ne xviv xingan David! iGolgotsaa gleynie ne me! iZha ndzontaa Dios, pxeel me men nroob qui lo ne!

<sup>10</sup> Zeene bdziñ me Jerusalén, rlozhd gzee zdoogrë miech ne ndxie ga, rnabdiidzlsa zho rnee zho:

—iBay cho nac men qui?

<sup>11</sup> Rquiab grë zha ne nalzhits me ga, rnee zho:

—iLëe Jesús i! iLëe men Galilé qui, noteed xtiidz Dios lo miech!

*Blee Jesús miech len yadoo*

(Mr. 11:15-19; Lc. 19:45-48; Jn. 2:13-22)

<sup>12</sup> Biini liu co, zeene bdziñ Jesús Jerusalén stib, güey me yadoo nroob ne zob lad guiedz co. Bdziñ me gon

me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha ne notsëe dimi, ptiixche me xmezha ne no wto palom; blee me zho ga grëse zho, <sup>13</sup> rëb me lo zho:

—Led znu gon zbobnee lo Xtiidz Dios: “Zaatne nac lidz naa nu, nu none guiaad grëse miech sodiidznie zho naa.” Laa to gon, quiayun to lugar rii zig tib zhibliee ngbaan.

<sup>14</sup> Ga no me bdziñ bla zha ne rold lo, zla zha ne në ni, wbig zho lo me. Gzase zho beenguiac me. <sup>15</sup> Nzian mëedlas yeen ne ndxie len yadoo ga, psilo win nguiedz rnee win: “iZha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mëedlas co, rlëe zho, <sup>16</sup> rëb zho lo me:

—iPe ib rond luu ganle pe nonee grë mëedlas qui?

Pquiab me rëb me:

—Ron naaw. iTo waa, pe rande to ganle zha zbobnee lo Xtiidz Dios, zaatne raquiet mine noyac nu? Led rneew lëe:

Haxta grë mëedlas ne bii radz, ye win rley win roolnie win me.

<sup>17</sup> Blozhse sca rëb me, zoque zho ga, laa me bio nëz zie me nëz Betain. Ga blëz me wdze co.

*Wbidz tib yag guigw*

(Mr. 11:12-14, 20-33; Lc. 20:1-8)

<sup>18</sup> Sil co zeene no me nëz gdziñ me Jerusalén,

pcaabedz me. <sup>19</sup> Gon me zob tib yag guigw gax ro nēz, dzigo güey me güeyso me low dien pe ndziel tib nex low niow me. Bdziñ me gon me loxaque zhiblagsew zēēb, nacne rēb me low:

—jLēē blozh xtse luu nu gon! jGdziñdraa dze ne yquia nex lo luu!

<sup>20</sup> Biini liu, zeene laa zho zie Jerusalén stib, gon xpēēdscuel me, laa yag guigw co bidzle. Bzee zdoo zho, bnabdiidz zho lo me rēb zho:

—¿Bui ganle, bay zha nacne squi znuse wbidz yag guigw qui?

<sup>21</sup> Pquiab me rēb me:

—Gneli naa lo to ganle, telne dib zdoo to rnalo to Dios, niicle ncuaane mazdraa ngan gnab to lo me, zun mew. Lēēraasi none dib zdoo to gliladz to zaca, ni palal gacchopd guic to. <sup>22</sup> Grēse ncuaane gnab to zeene rzodi-idznie to me, zneedz mew, totsaque dib zdoo gliladz to laa to ycaaniaw.

<sup>23</sup> Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo menquiedz, bnabdiidz zho lo me rēb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

<sup>24</sup> Pquiab me rēb me lo zho:

—Ye naa laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grē ncuaane noyun naa. <sup>25</sup> Golnē dien,

¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to mine bnee me?” <sup>26</sup> Tel na dzieetsgaa ne, miechse pxeel Juan, greeequiadaque ne.

Rdzieb zho niab zho miechse pxeel Juan, sac nan menquiedz nli Dios pxeel Juan biadteed Juan xtiidz me lo miech.

<sup>27</sup> Dzigo mazd mine been zho rēb zho lo me:

—Ndiiond no dien cho pxeel Juan.

Dzigo rēbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grē min ri.

*Zha nac zha ne rond diidz*

<sup>28</sup> 'Golquiaadiaga ganle. Tib mgui, quianie me chop mēēdbgui. Tib dzew, bredz me tib zho rēb me lo zho: “Xin, none gon tsie luu nadze, tsietop luu uv xcuaa ne.”

<sup>29</sup> Pquiab zho rēb zho: “jGad naa!” Wdzeelaaw, bien zho nonguiēda ga sca gun zho, dzigo bio zho nēz güey zho.

<sup>30</sup> Laa stib zho, zeene bredz me zho rnabey me zho tsie zho lo dziin, rēb zho: “Peet nacda, na maase ga naa.” Blozh ga pasē zho nie.

<sup>31</sup> Golnē dien, lo grop mēēd co, ¿cho nac zha ne bin xtiidz pxoz?

Pquiab zho rēb zho:

—Zha glo cow.

Dzigo rëbchaa me:

—Gneli naa lo to ganle, miñcodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëeb xnëz Dios, lëdle to. <sup>32</sup> Biaadpaa Juan Bautist name biadseed me miech csaan zho xquiełntseeb zho, gban zho zigne racladz Dios, ni pe liaadz to nion to miñe rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquiełntseeb zho. Laa to, niicle ran to nosaan grë zha co xquiełntseeb zho, per ib rsaande to miñe nac to.

*Xcuent zha ne pquianap liu*  
(Mr. 12:1-12; Lc. 20:9-19)

<sup>33</sup> Dzigo bzodiidz me stib cuent lo zho rëb me:

—Tib meñ name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediñ me liu co lo bla zha ne ran liu, dzigo laa me brieë, laa me zey zit.

<sup>34</sup> Zeene gol mëe ne laa nex co gol, pxeel me bla zha ne quia xtsiñ me zie lo zha ne quianap liun me ga, parne gdeed zha co uv ne rieguial me ycaa me. <sup>35</sup> Per leł bnaaz zho zho, zha ne blooquie zho, zha ne bdeedgolp zho, haxta beet zho tib zho. <sup>36</sup> Wbiire pxeel me zla zho, hor cole

nzianraa zho pxeel me, per niapse sca psacsi zha co zho.

<sup>37</sup> Tibaque zeene pxeelaque me xpëed me, bza guic me rëb me: “Ganse zho xpëed naaw, zon zho miñe gnee me.”

<sup>38</sup> Pex nion zho diidz, zeene gon zho xpëed me, rëbchaa zho: “ıLëe zha qui nagon guiaannie liu riil! ıGolgotsaa dziuut ne zho, zeena guiaana lo ne!” <sup>39</sup> Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

<sup>40</sup> ıZha sca dien rzac to gun bizhuan liu co gza zha co, zeene laa me gbire?

<sup>41</sup> Pquiab grë zha ne nac pxoz ne rnabey, ni zha ne nac zha non lo menquiedz ga, rëb zho:

—Ni lalnu yquiad zdoos me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

<sup>42</sup> Dzigo rëbchaa me lo zho:

—Haxta lo Xtiidz Dios no tib zaatne znu rnee, ıpe gard ganle glab tow? Rneew:

Quie ne psëeb zha ne nozaa yu,  
ni nanđ zho lëepaa quie co nac miñe rnazdziits yu.

ıNcuaañe gzee zdoos new! Sac Dios bnabey sca goca.

<sup>43</sup> Gacnan to ganle, scadaa nagon griee to lad grë zha ne ngab lo Dios, parne gbig zha ne tsoxcopaa gun xtsiñ me, zha cole guiaan xlugar to. <sup>44</sup> Zha ne tsietsobe lo quie ne raquiet ga, zac zho zig tib ncuaañe rac tson tap lë; laa

teḷ lëëgaaw tsoḃe lad zho, zac zho zig tib ncuaaḅe die die rac.

<sup>45</sup> Grë zha ne nac pxoz rnabey ga, ni grë zha farisé, zeēḅe blozh pquiaadiag zho cuent ne bzodiidz me lo zho ga, biēḅ zho zha ga rzeet me.

<sup>46</sup> Nacne gocladz zho naaz zho me, per bdziebaque zho; sac ndal miech rleyḅie me, niicle ne rzac zho tib zha ne noteedse xtiidz Dios nac me.

## 22

### *Zha ne nēd sēēb xnēz Dios*

<sup>1</sup> Bzodiidz Jesús stib cuent lo zho, rēb me:

<sup>2</sup> —Grë zha ne rbedz Dios ygab zho xnēz me, none tsoxco zho gon zho miḅe rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpēēd me.

<sup>3</sup> "Tib rey name, ziaadyob ctsieelḅia xpēēd me, nzian zha ne bredz me tsie lo lni. Zeēḅe laa dze co bdziḅ, pxeel me zha ne quia dziin lo me zietsedz grë zha ne bredz me lo lni ga, per nēd zho nienal zho.

<sup>4</sup> Wbiire me pxeel me zla zho rēb me: "Goltsietsedz zho, golguiab, laa guielwagw ne yquiin goclole, siguiel zho na guiaad zho."

<sup>5</sup> Per ib beēḅcasd zho zha ne pxeel me ga, no zho brieē zie lo xcuaa, no zho brieē zie zhiwto, <sup>6</sup> nogaa zho leḷ bnaaz zho zha co, psacsi zho zho, beet zho zho. <sup>7</sup> Zeēḅe gon me sca beēḅ zho, blēē me, bnabey me grë xmeḅguiib me güey zho güeygut zho grë zha ntseeb ne psacsi xmandad

me ga, ni bnabey me bzēēg zho guiedz co. <sup>8-9</sup> Blozh ga biire pxeel me zla zho, rēb me: "Laa guielwagw rii goclole, miḅe naca goltsie tib nēz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguiald zho guiaad zho nu."

<sup>10</sup> 'Dzigo brieē zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdziḅnie zho zho lo lni. Gol hor wagw, biodzēse len yu ndxie miech. <sup>11</sup> Zeēḅe laa rey bzēēb zienee me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel. <sup>12</sup> Dzigo rēbchaa me lo zho: "Bets, ḷpe nacne squise luu bzēēb luu nu, bui ganle nacwd luu lar ne bneedz zho niacw luu?"

'Dzese zob zho, rdziēd zho pe guiab zho lo me. Gonse me sca rac zho, <sup>13</sup> bnabey me zha ne nodziib lo mezh rēb me: "Golzobdoo zha rii, golxidoo grop nia zho, grop ni zho, golcuee zho nu goltsieron zho lo ncow nēz ley. ḷGa nac zaatne rieguial zho, ga gan zho guielnēdox ne no ted zho, goonnē zho, haxta gow lay zho!"

<sup>14</sup> 'Miḅcodaa nagon rac len dze rii —rēb Jesús—, ndal zha ne racredz sēēb xnēz Dios, per zhis nac zha ne rioxco rzēēb.

*Pe nonguiel quizh miech contribucion*

(Mr. 12:13-17; Lc. 20:20-26)

15 Blalaa zha farisé ne ndxie ga güey zho bnediidz zho dien zha guᅅgüet zho Jesús cxin me tib diidz, zeena min co yquiaaqui tsiezo zho me lo wxtis. 16 Dzigo pxeel zho bla zha ne nacgrë zho, ni güey zla zha ne racnie Herod gogza zho. Bdzin zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu mine nac diidzli min co rnee luu lo zho. 17 Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguielda ye.

18-19 Bienga me racladz zho guᅅgüet zho me, dzigo rëbchaa me lo zho:

—¿Pe nan to na riend naa pe no guic to? Masaque rëb to na lëe, znuse guᅅgüet to naa. Golneedz tib pes ne rguizh to nu ganle.

Dzigo bdeed zho tib pes plat lo me. 20 Blozh ga, rëbchaa me lo zho:

—¿Cho nu, cho lë nu quia lo pes rii?

21 Pquiab zho rëb zho:

—Lëe rey i, lëe lë me i quia lo qui.

Dzigo rëb me lo zho:

—Mine riegual sca ycaa rey, goldeeda lo rey; scaquegaa mine riegual ycaa Dios, lo Dios goldeeda.

22 Zeene gon zho sca ptsire me lo xtiidz zho, bzee zdoos zho, mazd mine been zho laa zho wbichese ga, laa zho zey.

¿Pe nli zrieeban miech?

(Mr. 12:18-27; Lc. 20:27-40)

23 Dze coquew, güey bla zha saducé lo Jesús. Nac zha saducé rliadzd zho zdzin dze grieeban miech. Dzigo bdzin zho, 24 rëb zho lo me:

—Maestro, znu psan Moisés diidz: Telne glo mguiguet lo wnaa ne nac tsiel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

25 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëed zho. Dzigo ptsieelnia stib bets zho wnaa co. 26 Blozh ga gutaque zha co, pa së zho nsan mëed. Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me, 27 tibaque zeene yeque me laa me gut. 28 Mine racladz no gacndion no, ¿chopaa dzigo gac tsiel wnaa co zeene laa zho grieeban? Sac gza gadzse zho ptsieelnia me.

29 Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle rliadzde to zrieele me gon me ncuaan ro ne gard gan miech. 30 Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grë anjl ne no gbaa. 31 Stiba, ib nli zrieeban

mengut. Mod ran̄de to zha zhubnee zaatne raquiet zeene rēb Dios: <sup>32</sup> “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel̄ Dios, jnac̄ me xDios mengut, sinque xDios zha mban nac me!

<sup>33</sup> Grē miech ne ndxie ga, zeene gon̄ zho sca ptsire me lo xtiidz zha saducé co, rzee zdoo zho.

*Xley Dios min̄e mazdraa non*

(Mr. 12:28-34)

<sup>34</sup> Grē zha farisé ne ndxie ga, gon̄ zho sca psioog Jesús ro grē zha saducé co.

Horco biire grē zha farisé co bzodiidz zho stib. <sup>35-36</sup> Lad zho no tib maistr ley, dzigo wbig maistr ley co lo Jesús, rēb zho:

—Maestro, lo grē xley Dios, bzhiguiel̄ bnē lo naa dien̄, ¿pa min̄ nac min̄e mazdraa non?

Sca rēb zho, sac gocladz zho niunḡuet zho me. <sup>37-38</sup> Pquiab me rēb me lo zho:

—Lēew min̄e mazdraa non nu znu rnee: “Dib zdoo luu, dib xalm luu, dib guiel̄biini ne no guic luu, bleynie Dios, men̄ nroob ne rnabey luu.” Lēew nac min̄e mazdraa non, ni lēew glopaa raquiet lo grēse ley. <sup>39</sup> No stib min̄e rnee: “Bleynie samiech luu zigne rleynie luu luu.” Ye min̄ rii nona, meraque lala con min̄ glo. <sup>40</sup> Zha ne gban zigne rnabey grop ley rii, lēele grē ley ne psan̄ Moisés ga, lēele

grē zhiwseed zha ne biadteed xtiidz Dios ga, zienal̄ zho.

*¿Cho xpēed nac Crist?*

(Mr. 12:35-37; Lc. 20:41-44)

<sup>41-42</sup> Gon̄ Jesús nzian farisé ndxie lo me ga, nacne bñabdiidz me lo zho rēb me:

—¿Zha dien̄ rzac to guiaad Men̄ ne zēēble diidz ga cxeel Dios? ¿Cho lo xtii griequia me?

Pquiab zho rēb zho:

—Lo xtii David griequia me.

<sup>43</sup> Dzigo rēbchaa me lo zho:

—¿Pe scaw sca? Zha nac waa zeene bdeed Espiritu Sant guiel̄biini lo David bzeet David men̄ co, rēb David me nac men̄ ne rnabey David. Golgan̄ ganle znu bnee David:

<sup>44</sup> Rēb Dios lo men̄ ne rnabey naa:

“Cue naa nēz derech, nu bzob,

nieeda lozh gnaz naa grēse zha ne rlēē lo luu, csan̄ naa zho ladsnia luu.”

<sup>45</sup> Gase nagon̄ tel̄ne nli zha xtii David gac Men̄ ne cxeel Dios ga, ¿zha nac dzigo rnee David men̄ co rnabey David?

<sup>46</sup> Ni tib zho ib bdziidz zho zha ntsire zho lo xtiidz me; desde dze co ni stib zho bi-azhdraa pe nabdiidz zho lo me.

## 23

*Min̄e nac maistr ley grē zho zha farisé*

(Mr. 12:38-40; Lc. 11:37-54; 13:34-35; 20:45-47)

<sup>1</sup> Dzigo psilo Jesús bnee me lo grē miech co, ni lo xpēedscuel me, <sup>2</sup> rēb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés. <sup>3</sup> Golguien golgon xtiidz zho, jper nsin golso, ib gunde to mine run zho! Nac zho, ni lalnu rund zho mine rseed zho miech. <sup>4</sup> Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

<sup>5</sup> jGrë ncuaane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba. <sup>6</sup> jZee ne rbedz miech zho tib wagw nroob, rdziladz zho zhapaa rzob groj mezh, niicle len yadoogaaw, zaatne glupaa zha non nac zho, ga rzob zho! <sup>7</sup> Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

<sup>8</sup> Saṅgue to gon yguibde to dien zha gnee miech “zha rac” nac to, sac tibaque men rac no, lëë me ga zëëble didz cxeel Dios; golguien ganle tel to lalga nac to, rrieequia bets to grë to. <sup>9</sup> Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoz to, lëë men co no gbaa. <sup>10</sup> Yguibde to sac miech topaa gunctsin zho

lo Dios, sac loxaque Men ne nole diidz ga cxeel me, men cose zrieelo gunctsin zho lo me. <sup>11-12</sup> Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

<sup>13</sup> jProbsaxe to maistr ley, probsaxe to zha farisé! Lëda i gon noyun to, rzac to noxco to sëëb miech xnëz Dios, per lel noca to sëëb zha ne racladz sëëb. Ni stiba, per ni to nod xnëz me. <sup>14</sup> jProbsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuaane rapse grë wnaa viud; ib tedsod gon guielnëdox ne ygaa to.] <sup>15</sup> jProbsaxe to, rzac to na lëëw ga run to! Rio to gui dan rbix to, haxta rded to nisdoo, rquiaguib to dien cho sëëb xnëz to ni rlozh ga laa ne ygab zho nëz lo Dios, lel nëz len gabil zienie to zho. <sup>16</sup> jProbsaxe to, nac diidz name to noseed miech, ni per ni to rien pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho.” <sup>17</sup> jNadzpaa nxen to, nadzpaa ncow nac guic to! jNiacxe mazdraa non or lo yadoo? Golguien ganle por yadoo, naclay grë or co. <sup>18</sup> Rneequa to: “Zha ne gzeet lo pcoog, led dolda telne gund zho mine rnee

zho; per tel gzeet zho gon ne ndziib lo pcoog ni gund zhow, dol ga gun zho.”<sup>19</sup> ;Pe nlipaa rnee to peet riende to! ;Niace mazdraa dzigo non gon que lo pcoog? ;Pe rande to por lo pcoog co raclay gon?<sup>20</sup> Golguien ganle, zha ne rzeet lo pcoog, yele gre ncuane ndziib low ga quiazeet zho;<sup>21</sup> zha ne gzeetgaa yadoo, haxta Diosle ga gon rzeet zho, sac ga rböz me.<sup>22</sup> Scasaque zha ne gzeet gbaa, zaatne rzoble Dios ga nozeet zho, masaque rriequia me ga rzeet zho.

<sup>23</sup> ;iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta gre guizh bitxtil, guizh nizh, guizh comin run to tsii lal, rdeed to tib lala mine rieguial tsiesan to yadoo, laa ley ne mazdraa non zienied guic to gun to mine rnabeya. Nli rieguiala gdeed to gre gon co, per none scaque tsoxco to gun to mine nac diidzli, none yquia zdoos to samiech to, none dib zdoos to gnalo to Dios. Min rii nac mine mazdraa non.

<sup>24</sup> ;iNe nlipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuane row to, ni riende to rriequia haxta tib camell rab to.<sup>25</sup> ;iProbsaxe to, masaque nac to zig tib plat, zig tib tas ne nez zhitssew mbe rna, laa nez lena rnadraa! Laglaase rquiaalo to miech wen nac to, per tibaque noban to,

tibaque nosacsi to samiech to.<sup>26</sup> Golguien none glo csaan to xquielntseeb to, none gac to zig tib plat zig tib tas ne zigtaa mbe nez zhitsa, scagaa mbe nez lena.<sup>27</sup> ;iProbsaxe to, nac to gon zig gre baa ne dieen paraa nquitsbie rna! Niow rlu nez zhitsa, laa nez lena loxaque gre ncuane biodz, loxaque gre dzit ngutoo nodzē.<sup>28</sup> Sca gon nac to, ne rac to zootxe luu waa nli miech ndzinli nac to, per nez len zdoos to loxaque zhgab ne dien zha yquidie to miech, zha csacsi to miech no to.

<sup>29</sup> ;iProbsaxe to maistr ley, probsaxe to farisé! Ni lalnu guielto guien lo to, rio to rzhixcuua to ro xpaagre zha ne biadteed xtiidz Dios, ni leepaa gre pxozgol to beet zho. Dieen peraa run to rquiaalo to rsoladz to zho.<sup>30</sup> Rnee to: “Telne niaca mine nole ne len dze co, ndeete ne diidz nsacsi xmen gol ne gre men rii.”<sup>31</sup> ;iLeēque to gon nobeero ga, zha nactaa lo dii ntseeb ne ziaad to!<sup>32</sup> ;iScaque nasca golgun! ;iGoltsienal gre mine been pxozgol to ga!<sup>33</sup> ;iMiech ngoopdol! ;iZhin mendox! Telne csaande to xquielntseeb to i, ib tedsod gon gabil guey to.

<sup>34</sup> ;iGre zha ne cxel naa, zig nac zha ne guiadteed xtidz naa, zha ne nacie Espiritu Sant, zha ne ygaaguielbiini yquiaa zho mine gnabey Espiritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho leēque



len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho. <sup>35</sup> Blactaa grë miech ne sca peet xtold ziyut to grë xmenḡol to, psilow desde Abel haxta Zacarí xingan Berequí, men ne beet xmenḡol to zaatne nac gax lo pcoog len yadoo. Ni ye to gon zëeb xchen grëse zha co. <sup>36</sup> ¡Gneli naa lo to ganle, grë miech ne gon mban len dze rii, grë to zho yгаа guieḡnëdodox ne tsieguial to por grëtaa guieḡntseeb co!

<sup>37</sup> ¡Aque tow men Jerusalén! ¿Pe nacre squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa go-cladz naa, niacnie naa to, nquianaap naa to, zig run nguid rgueedz ma xpëed ma, per bzhiguielde to. <sup>38</sup> Gacnan to sca ganle, nadzetaa gon laa lidz to nu guiaan ngan, <sup>39</sup> sac gandraa to naa, haxta gal dze ne guiab to: “¡Zha ndzontaa men qui pxeel Dios lo ne!”

## 24

*¡Nsin golso!*

*(Mr. 13:1-23; Lc. 17:22-24; 21:5-24)*

<sup>1</sup> Laa Jesús zieriee len yadoo grë xpëedscuel me, zeene pcuëezdze zho me, rëb zho:

—Gotsaa gwi ne ganle zha niaataa yadoo rii.

<sup>2</sup> Blozhse bui zho low, rëbchaa me lo zho:

—Niicle squitaa nagon ni-aaw, per zdziḡ dze ne nitlow dib nacesew. Ni stib quie qui

guiaandraa zigne squi zhobx-cuaaw i.

<sup>3</sup> Bree me len yadoo ga grë me zho, laa zho zie nëz Gui Oliv. Bdziḡ zho cho gui co, ga bzob me grë me zho. Dzigo wbig gax bla zho lo me, bnaab-diidz zho rëb zho:

—Bzhiguiel bnë lo no dieḡ, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacndion no laa dze co ziaadyoble?

<sup>4</sup> Pquiab me rëb me lo zho:

—Nsin golso, zeena choot yquidiede to. <sup>5</sup> Sac nzian zha ne greequia guiab zho zha nac Men ne zëeble diidz cxeel Dios; ni nzian miech ne yquidie zho. <sup>6</sup> Zeene gon to nëzrii nëzrec noxtseeb csilo dil, guiabde to togo lëele dze ne guial naa ga bdziḡ; sac niicle noyacle dila, noxtseebragaa pa csilo gaca, led lëdle ne nitlo guidzliu ga. <sup>7</sup> Garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin. <sup>8</sup> Ni lega loxaque mine rsilosew ga, sac nroobraa guieḡnë ne gan miech lozh ga.

<sup>9</sup> Zeene laa grë ncuuan rii noyac, ¡nsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa. <sup>10</sup> Nzian zha ne nole xnëz naa, len dze co

laa zho gbiche, laa zho csilo lëëque zha glëënie zha ne nac-grë zho, haxta zielo zho zho ladznia zha ne gut zho. <sup>11</sup> Len dze co zrieequia nzian zha ne yquidie miech guiab zho xti-idz Dios noteed zho, ni nzian zha ne gliladza. <sup>12</sup> Grë zha ne nole xnëz naa, zeene gan zho grëtaa guieIntseeb, grëtaa dol ne quiayun miech len dze co, ndal zho gleyniedraa zho Dios dib zdoo zho. <sup>13</sup> Per zha ne tibleque gac, gbiched zho lo Dios, niicle tel petaa gan zho noyac, zha co gac zha ne gdzin lo me. <sup>14</sup> Niicle scataa noyac grë ncuaan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

<sup>15</sup> 'Zeene gan to zaatne nac Lugar Nda len yadoo, zo tib ncuaane rieguiald so ga, tib ncuaane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to. <sup>16</sup> Zha ne no grëraa guiedz ne ngab Judé, none xoon zho tsie zho dan, ga tsietsolan zho. <sup>17</sup> Zha ne lëëtaque hor co no glaa guic lidz, none lëëléd xoon zho, ib guiabd zho sëëb zho len yu tsiebee zho ncuaane rap zho. <sup>18</sup> Zha ne quiagaa lo dziin dan, ib gund zho tsie zho lad guiedz tsixi zho xab zho. <sup>19</sup> iProb grë men wnaa ne lëëtse len dze co zoney xpëed, men ne quianiegaa mëdyeen ne bii

radz! <sup>20</sup> Golnab lo Dios gande to guieInë co len mëë ne rac nal, dze ne rdziiladzga to lo dziin. <sup>21</sup> Ne nligaa guieInëdoxa. Wlal ne biaan guidzliu haxta lo nadze, gard gan miech tib guieInëdox sca, ni gandragaa zhow ted ga. <sup>22</sup> Telne csaan Dios nroob dze gac guieInë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

<sup>23</sup> 'Zigne rne naa ga, len dze ne scataa gan miech grë dil co, zha ne gnë lo to: "Golte nu ganle, lëë Men ne nole cxeel Dios ga blanso nu", gnëgaa zho: "Goltsie nec ganle, laa me bdzin ga", gliladzde tow. <sup>24</sup> Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho. <sup>25</sup> iNsin sca golso! Benque laa naa nilew lo to. <sup>26</sup> Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: "Goltsie ganle laa me no ga", gnëgaa zho pa tib len yu ne no me, ni tib xtiidz zho gliladzde to. <sup>27</sup> Sac zeen gal dze ne guiaad me stib, gacda ncuaan ngeets zhlian, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëëb

ngbidz, ¿niacxe ganḁ grēse miecha? <sup>28</sup> Zlupaa zeene laa me guiaad; nanle to ganle zaatne nix ma gut, ga rcaalsa pech.

### Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

<sup>29</sup> 'Zeene lozhse gan miech grē guieḁnēdox co, laa lo ngbidz ycow, gziinidraa mēē. Grē mel ne ndziib gbaa, laa ma gliaaḁ; grēraa ncuaane no gbaa, masaque nēzrii nēzrec gaca. <sup>30</sup> Horco zlu ganle zeene laa Mgui ne pxeel Dios ga, ziad-zēēb lo xcow con grē guieḁndzon, con grē poder ne rap me, grēse miech mban gac zho, zoon zho gan zho me. <sup>31</sup> Grē xanjḁ Dios, hor co laa Dios cxeel zho tsiecuedz zho zhitrompet zho parne ycaalsa grēse zha ne ngab xnēz me, tel pa lotaa lo guidzliu no zho.

<sup>32</sup> 'Golzoob cuidad zha nac yag guigw. Led nanle to ganle, zeene laa grē zhicwa racnieen, ni rsilo rdzib zhiblaga, gase rlu ne laa mēē nēēg ziaadgaxle. <sup>33</sup> Scaque nagon zeene gan to laa grē mine rne naa lo to nu rsilo noyac, dzigo nanle to laa dze ne guiaad men co ziaadgaxle. <sup>34</sup> Gneli naa lo to ganle, nzian miech ne mban niina bii zan zho zeene laa grē ncuaan co csilo gac; sac ible ncuaane gaca. <sup>35</sup> Zdziin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

<sup>36</sup> 'Lēēraasi choot nanḁ dien pa dzew, dien pa horgaaw,

per ni grē anjḁ ne no gbaa, per ni naa nanḁ, loxaque Pxoze naa nana.

<sup>37-39</sup> 'Nanle to ganle zha bzhaac miech len dze ne wban Noé, ib bliladzd zho xtiidz me. Guxt no zho lo zhilni zho, zha ne notsieelnia, zha ne nobediingaa xpēēd, laa dze bdziin laa Noé bzēēb len barcw; tibaque zeene biala zho biini laa guiedox co nonitlole zho. Scadaa nagon sac grē miech nad rii, tibaque zeene tsaazho biini laa Mgui ne pxeel Dios ga ziaadle. <sup>40</sup> Horco zaatne quia chop mgui lo dziin dan; tib zho tsienal zhits me, stib zho guiaan. <sup>41</sup> Zaatne quiayot chop wnaa, tib zho tsienal zhits me, stib zho guiaan.

<sup>42</sup> 'iNsin sca golso, sac gon nande to dien pa horpaa guiaad me, benque laa vis racle lo to! <sup>43</sup> Golgan ganle, tel niaca mine gacnan miech laa ngbaan tsieban lidz zho guieel, per nanḁ zho dien pa horpaaw; ¿niacxe zaaguies zho? Led sobna zho lēē, nsin nsin so zho. <sup>44</sup> Scaque to nagon, none nsin so to, sac gon lega naclew zeen gan to laa me ziaadle.

<sup>45</sup> 'Golgan ganle, masaque laa to gac nagon zig tib ngundziin ne riaannie ro lidz men ne rquia zho xtsiin.

'Ngundziin ne ndzinli, zeene laa men ne quia zho xtsiin ga grieē, ine niowse guiaan zho guiaannie zho grēraa zha ne no lidz me. <sup>46</sup> Zha ne sca gun, iwēn tsie zho, sac zeene gbire me gan me scataa noxco zho dziin ne

pso me zho, zian<sup>n</sup>ziuu zho lo me <sup>47</sup> haxta so me zho, zha yquiaanap grëse ncuaa<sup>n</sup>e rap me!

<sup>48</sup> 'Tel ngundziin yozhgaaw, mi<sup>n</sup>e tsienie guic zho guiab zho gbireniobd me<sup>n</sup> ne quia zho xtsi<sup>n</sup> ga, <sup>49</sup> csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho, <sup>50</sup> tibaque ze<sup>n</sup>e gan zho laa me bdzi<sup>n</sup>le. <sup>51</sup> Zha ne sca gun, per peraa die<sup>n</sup> gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guie<sup>n</sup>ëdox ne ted zho.

## 25

*Zha bzhaac tsii wnaa nguieg*

<sup>1</sup> Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guie<sup>n</sup>tsieel.

'Tsii wnaa nguieg name, brie<sup>e</sup> zho ziexinëz zho mgui ne ctsieelnia, tib tib zho bise zho psin win ne rec nceit ne rziini. <sup>2-4</sup> Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhe<sup>n</sup>se zho psin co scase bi zhow, bid zho nceit ne niodzëraaw.

<sup>5</sup> 'Goc pa hora rio zhimcaalo zho, ni rdzi<sup>n</sup>daque mgui ne ziexinëz zho ga, tibaque

ze<sup>n</sup> laa zho pquia mcaal. <sup>6</sup> Gol grol guieela, ze<sup>n</sup> laa vis rac, laa mgui co ziaadle, zha ne ziexinëz me ga, zac grie<sup>e</sup> zho tsiedzieel zho me. <sup>7</sup> Lëëlëd brie<sup>e</sup> mcaallo gza wnaa nguieg co, psilo zho nozhixcuaa zho zhipsin zho. <sup>8</sup> Ze<sup>n</sup>e gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule. <sup>9</sup> Pquiab zho rëb zho: "Grieeloda, sac mi<sup>n</sup>e yquiinse zhipsin no ziaadnie no. Mazd gol<sup>t</sup>sie zaatne rto zhow, ga gol<sup>t</sup>siexiw." <sup>10</sup> Per lo lal ne ziexi zho nceit, laa mgui co bdzi<sup>n</sup>. Ze<sup>n</sup>e wbi<sup>r</sup>e zho, laa ro yu nioogle, loxaque gza zha ne nsinle zo ga, zha cose bzëëb le<sup>n</sup> yu. <sup>11</sup> Dzigo psilo zho, rcaan<sup>n</sup> nia zho ro yu, rbedz zho mgui co cخال me ro yu sëëb zho. <sup>12</sup> Per bdeete me diidz nzëëb zho, rëb me: "Run<sup>b</sup>eyd naa to gon, nand naa die<sup>n</sup> cho nac to."

<sup>13</sup> 'iNsin sca gol<sup>s</sup>o! —rëb Jesús—. Sac gon nand<sup>e</sup> to pa dzepaa, pa horpagaa gbiire guiaad Mgui ne pxeel Dios.

*Zha ne biaan<sup>n</sup>ie dimi*

<sup>14</sup> 'Mgui ne pxeel Dios ga, ziaad gac me zig tib me<sup>n</sup> ne no grie<sup>e</sup> tsie tib viaj zit.

'Tib me<sup>n</sup> name no grie<sup>e</sup> me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow le<sup>n</sup> dze ne guie<sup>n</sup>d me ga. <sup>15</sup> Tib zho pcaania gaay mil pes plat, tib zho chop mila, stib zho pcaania tib mila. Tib tib

zho, bdeedse me miñe rgobey me grielo zho gundziin zho, dzigo laa me brieelaa me zie.

16 'Zha ne biaanñie gaay mil pes plat co, güey zho bloonon zhow, beena gan zgaay mila.

17 Zha ne biaanñie chop mila, ye zho güey zho bloonon zho dimi co, scaque beena gan schop mila. 18 Laa zha ne pcaania tib mila ga, lel güey zho güeyteen zho tib guieer güeyloliu zhow.

19 'Goc bla iza laa men co bdziñ, dzigo bredz me zho tib tib zho, tsie zho gzodiidz zho dien yo dimi ne biaanñie zho ga.

20 'Bdziñ zha ne pcaania gaay mil pes plat co, bdziñnie zho xtimi me, rëb zho: "Laa xtimi luu nu gon, lëe gaay mil pes ne psan luu lo naa nu, laa zgaay mil miñ rii nac miñe bdziniaaw." 21 Rley me rëb me lo zho: "iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miñe gnedz naa gundziin luu. iNa bded, zeena ygaa luu grë guielbley ne quiayac nu!"

22 'Blozh ga, bdziñaque zha ne biaanñie chop mila ga, ye zho laa zho bdziñnie xtimi me, rëb zho: "Laa xtimi luu nu gon, lëe chop mil pes ne psan luu lo naa nu, laa schop mil miñ rii nac miñe bdziniaaw." 23 Pquiab me rëb me: "iSquiw nagon! Rley naa ran naa squitaa ndzinli

luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa miñe gnedz naa gundziin luu. iNa bded, zeena ygaa luu grë guielbley ne quiayac nu!"

24 'Zeene bdziñta zha ne biaanñie tib mila ga, rëb zho lo me: "Nli bendziin naa xtimi luu, sac nanle naa zha nac luu, niicle paraa niundziin naaw, grëse miñe niuna gan lo luu niaana; 25 gane mazd bialoliu naaw. Tib mil naca bneedz luuw, ledaaw nu." 26 Blëe guic me, rëb me lo zho: "iBiche nu, paat rquiind naa miech yozh, miech nroladz ne squi nac! Conque nanle luu sca nac naa, 27 ipex nac dzigo waa bioxcod luu maase mbediin luu dimi qui, ndziniaaw palal ncaania naaw niina?"

28 Dzigo rëbchaa me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiw i. 29 Sac zha ne rioxco rundziin ncuane rcaania zho, zacnroobraa ncuane yquianie zho. Laa zha ne squi nac, haxta miñe pcaaniale zho, zdiooba lo zho. 30 Golxen zha yozh qui, goltsiesan zho lo ncow nëz ley. Ga gan zho guielnëdox ne tsieguial zho, ga goon zho haxta gow lay zho."

*Zha gun Jesús guielwxtis*

31 Blozhse bzodiidz Jesús cuent co lo zho, rëbchaa me:

—Naa ne nac naa Mgui ne pxeel Dios, zeen gal dze

ne laa naa guial stib, zialnie naa grë xanj naa, zlu grëtaa guie<sub>l</sub>ndzon ne rap naa, laa naa sob lo xcan ne raguial naa soob naa. <sup>32</sup> Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho. <sup>33</sup> Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

<sup>34</sup> 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxoza naa. Golted zeena ycaania to zaatne cuëz to, ible par to bzaa mew desde zeene bzaa me guidzliu. <sup>35</sup> Sac zeene pcaabedz naa, bneedz to ncuaane dow naa; zeene bnab zhis naa, bneedz to ncuaane go naa; zeene bial naa ladz to, bneedz to lidz to blëz naa; <sup>36</sup> zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa." <sup>37-39</sup> See zdoo zho gnë zho: "¿Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguiib?"

<sup>40</sup> 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa

to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to."

<sup>41</sup> 'Laa zha ne ndxie nëz revés, hor co laa naa gzonëz zho, guiep naa lo zho: "¿Golbiche lo naa nu, miech ndziibdee! ¿Golsë lo guidox ne rieguial to, zaatne no guey mendox grë xanj ma! <sup>42</sup> Sac gon, bio dze pcaabedz naa ni bneedzde to ncuaane niow naa; bnab zhis naa, ni bneedzde to pe nie naa. <sup>43</sup> Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa."

<sup>44</sup> 'Squiab zho gnë zho lo naa: "Per pa hor bdzion no luu rcaabedz luu, rnabgaa zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixgaa luu rzacnë luu."

<sup>45</sup> 'Dzigo guiep naa lo zho: "Grëse vuelt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rrieequia naa ga sca been to."

<sup>46</sup> 'Horco grëse zha co laa zho guey lo guidox ne gdzindraa dze grieë zho; laa zha ne bioxco wban zigne rnabey naa, grëse zho laa zho ygaa tib guie<sub>l</sub>mban ndzon ne gdzindraa dze lozh.

## 26

*Bnediidz zho dien zha*

*gnaaz zho Jesús*

(*Mr. 14:1-2; Lc. 22:1-2; Jn. 11:45-53*)

<sup>1</sup> Zeene blozh sca bnee Jesús lo grë miech co, dzigo rëbchaa me lo xpëëdsuel me:

<sup>2</sup> —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa lадznia zha ne yquiaa naa lo cruz.

<sup>3</sup> Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob. <sup>4</sup> Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza. <sup>5</sup> Rnee zho: “Lëëraasi choot gnabeyd ygaa me merpaa dze lni, zeena gacntseebd men guiedz.”

*Pchoob tib wnaa nceit nex guic Jesús*

(*Mr. 14:3-9; Jn. 12:1-8*)

<sup>6</sup> Betain ga no tib men ne biac lo guiedz lepr, lë Simón. Lëëtaaque no Jesús lidz men co, <sup>7</sup> zeene bdzin tib wnaa bdzinnie tiblo nceit nex, nosew tib len ncuaan win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús. <sup>8</sup> Zeene gon xpëëdsuel Jesús sca been wnaa co, blëë zho, rnee zho:

—iPa rieguiala squi pxin zhlë wnaa qui nceit qui! <sup>9</sup> Tel niaca mine ndow, pe zhidaa

dimi ne nguizh zhow, nquiin-paa dimi co ngaaza lo grë zha ne guieñd pe yquiin.

<sup>10</sup> Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non mine been me i. <sup>11</sup> Tel nli lëë racladz to gun to xyudar zha ne guieñd pe yquiin, zac ygad to lo zho stib dze, sac tibaque ran to zho; sangue naa zhile laa naa gbiche lo to. <sup>12</sup> Led pxin zhlëd wnaa rii zhinceit me, sac gon rriequia laa me bzhixcuaale xcuerp naa nu gal dze ne ygueetsa. <sup>13</sup> Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

*Güeyto Judas Jesús*

(*Mr. 14:10-11; Lc. 22:3-6*)

<sup>14</sup> Lo gza tsiipchop zha ne nac xpëëdsuel Jesús ga, brie zha ne lë Judas Iscariot güeyzodiidznie Judas grë zha ne nac pxoz ne rnabey, <sup>15</sup> rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat. <sup>16</sup> Nacne psilo Judas noguib Judas dien zha gdeeda diidz csañ Judas me ladznia zho.

*Dowxtseenie Jesús xpëëdsuel me*

(*Mr. 14:12-25; Lc. 22:7-23; Jn. 13:21-30; 1Co. 11:23-26*)

<sup>17</sup> Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëëdsuel

Jesús lo me dien pa lo racladz me tsiegunlo zho ncuane gowxtseenie me zho wdze co.

<sup>18</sup> Dzigo rëbchaa me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu nē xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grē no me.”

<sup>19</sup> Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>20-21</sup> Wdze co, laa me no xtsee grē me zho, zeene bnee me lo zho rëb me:

—Gacnan to ganle, lëeque tib to gon tsielo naa ladznia zha ne gnaaz naa nawdze rii.

<sup>22</sup> Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnē dien, ¿cho gun min co? ¿Pe naaw?

<sup>23</sup> Pquiab me rëb me lo zho:

—Zha ne gan to csëeb xcuun leñ xquien naa, lëe zho ga. <sup>24</sup> Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! jMazd wen nie zho, ib niacd zho miech lo guidzliu!

<sup>25</sup> Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

<sup>26</sup> Laa zho noyow, zeene bzhen Jesús tib quietxtil,

bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëe xcuerp naa i gon.

<sup>27</sup> Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golgue vin qui, <sup>28</sup> sac lëe xchen naa i, miñe no gzhiee par guiaanmbe grē miech lo xtol zho sëeb zho xnëz Pxoza naa, sac lëe stib mod cub nu psan me parne sëeb miech xnëz me. <sup>29</sup> Lëe lultm vuelt nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxoza naa.

Dzigo psilo me biilnie me Dios gza me zho.

*Bzeet Jesús zha gun Pedr*

(Mr. 14:26-31; Lc. 22:31-34; Jn. 13:36-38)

<sup>30</sup> Blozhse biilnie zho Dios, laa me brie ga gza me zho, laa me zienie zho nëz Gui Oliv.

<sup>31</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiil.” <sup>32</sup> Mincopaa nagon gun miech naa, per zeene laa naa grieegan glole naa ga Galilé, ga cuëz naa to.

<sup>33</sup> Dzigo rëbchaa Pedr lo me:

—Niicle telne saan grē zha qui luu, sangue naa gon csaand naa luu.

<sup>34</sup> Pquiab me rëb me lo Pedr:



—Gneli naa lo luu ganle, guieel riigazh, gardle ycuedz gall, laa luu csale tson vüelt guiab luu runbeyd luu naa.

<sup>35</sup> Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëedscuel me.

*Bzodiidznie Jesús Pxoze me Getsemani*

(Mr. 14:32-42; Lc. 22:39-46)

<sup>36</sup> Zeene bdzinie Jesús zho zaatne lë Getsemani, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

<sup>37</sup> Horco psilo mban rac zdoo me, riabguieelnë me, dzigo bredz me Pedr, ni grop xingan Zebedé, bzënie me zho palal <sup>38</sup> dzigo rëbchaa me lo zho:

—Mban rac zdoo naa, zootle zig zet naa lo guieelnë rii. Nuse nagon golguiaan, per golsobna.

<sup>39</sup> Bzë me spalal, dzigo pquitsgzhib me haxta bdzin lo me lo liu; psilo me bnaab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grë guieelnë rii. Min rii rnab naa lo luu, per telne grieeloda, mine gnëtaa luu, min co gac.

<sup>40</sup> Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to? <sup>41</sup> Golsobna, gonab lo Dios zeena yquild mendox to. Niicle ne squi lëbdraa xcuerp to sobna to, per gonab lo Dios, sac gon min co nac mine racladz zhiespiritu to.

<sup>42</sup> Dzigo güey me stib, güeyzodiidznie me Dios; scaque mine bnaab me glo mincoque bnaab me. <sup>43</sup> Zeene wbiire me bdzin me lo zho, gon me laa zho nixguieslaque, sac lëbdraa zho mcaal. <sup>44</sup> Wbiire güey me güeynab me lo Dios, scaque mincoque bnaab me. <sup>45</sup> Zeene laa me wbiretaa bion vüelt co, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdzin zeene laa grë miech ntseeb rii guiadnaaz naa. <sup>46</sup> Goltieso, zeena zio ne; sac gon laa zha ne glu naa lo zho ziaadle nu.

*Bnaaz zho Jesús*

(Mr. 14:43-50; Lc. 22:47-53; Jn. 18:2-11)

<sup>47</sup> Laa Jesús bii quianeeque, zeene laa Judas (tib zha ne nac xpëedscuel me) bdzin, bdzinie Judas tib dzoon zha ne pxeel grë pxoze ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag. <sup>48</sup> Biaaniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me. <sup>49</sup> Zigne bdzin Judas pquiaabdiuzh Judas me, blozhse ga wbig Judas

dow Judas bzhid cuas me.

<sup>50</sup> Dzigo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me. <sup>51</sup> Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoz nroob. <sup>52</sup> Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho.

<sup>53</sup> ¿Niacxe nan to na grieelod gnab naa lo Pxoaz naa niina cxeel me tsiipchop partid xanj l me guiaadla ne nu?

<sup>54</sup> Per telne sca gon naa, ¿zha dzigo gac mine zhubnee lo Xtiidz Dios, zaatne raquiet mine noyac nu?

<sup>55</sup> Dzigo rëbchaa me lo grë zha ne bdziñ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga? <sup>56</sup> Per ible laa grë ncuuan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhoon, tipse me psan zho ga.

*Güeynie zho Jesús lo zhiwxtis zha Israel*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ga brieenie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguedz Israel, laa zho ndxiele ga. <sup>58</sup> Ye Pedr maase zit zit nal Pedr laa Pedr bdziñ xley men co. Bdziñ Pedr güeysoyoga Pedr lo grë zha ne ndxienap, quiambëz Pedr dien zha gon zho Jesús.

<sup>59</sup> Grë pxoz ne rnabey, grë zha ne nac zha non lo menguedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuua maase diidzguizh ycaadz zho Jesús, parne gdeeda diidz gnab zho guet me. <sup>60</sup> Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho, <sup>61</sup> rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

<sup>62</sup> Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

<sup>63</sup> Gon pxoz nroob co rquiabdaque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

<sup>64</sup> Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios nēz derech, ni zeene laa naa guieet gbaa zialzēeb naa lo xcow.

<sup>65</sup> Horco ptsiez pxoz nroob co xab me, sac blēē me bin me sca rēb Jesús.

—¿Pe mazdraa textigw ne racladz ne? —rēb me—. Laa to binle ganle zha rzētaa xti-idz me noguitnie me Dios.

<sup>66</sup> Nana waa, ¿pe gnē to zha dziuun ne me?

Pquiab be zho rēb zho:

—¿Ib rieguial guet me!

<sup>67</sup> Dzigo hor co psilo zho nosacsi zho me. Zha ne rt-suc lo me, zha ne rdeed puñet me, nogaa zho rgap lo me, <sup>68</sup> rlozh ga rzhidznie zho me rnee zho:

—Luu ne nac luu men ne pxeel Dios, ¿bnē dien cho ga bdiñ luu?

*Rēb Pedr runbeyd Pedr Jesús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Horco laa Pedr bii zob nēz ley. Ga zob Pedr, güey tib ndzoop ne quia dziin lidz men r nabey co; rēb ndzoop lo Pedr:

—¿Ye luu lēē rzēnie Jesús, men Galilé ne bdziñnie zho i?

<sup>70</sup> Per bneelid Pedr. Squi zob grē zha co, rēb Pedr:

—Riend naa dien cho men rnee luu.

<sup>71</sup> Laa Pedr ziele nēz ro puert ne quia ro nēz, zeene gon stib ndzoop ne rquia dziin ga Pedr, rēb ndzoop lo zha ne ndxie ga:

—Ye mgui qui gon nacgrē men Nazaret ne bdziñnie zho i.

<sup>72</sup> Scaque bneelid Pedr, haxta rzeet Pedr Dios rēb Pedr runbeyd Pedr me.

<sup>73</sup> Wdzeepaaw, rēb zha ne ndxie ga lo Pedr:

—Ne nligaa ye luu rzēnie men ne bdziñ i. ¿Rlupaa name zig rnee zha nēz Galilé rnee luu!

<sup>74</sup> Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca briece ro Pedr zeene laa tib gall pcuedz. <sup>75</sup> Horco psoladz Pedr xtiidz Jesús zeene rēb me lo Pedr: “Gardle ycuudz gall, tsonle vuilt rēb luu runbeyd luu naa.” Dzigo mbanse rac Pedr. Briece Pedr ga, psilo Pedr biin Pedr guielñē co.

## 27

<sup>1</sup> Ziadyiinile liuw, wbiire pcaalsa grē pxoz rnabey, grē zha non lo menguedz, bnedidz zho dien zha gnabey zho guet Jesús. <sup>2</sup> Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

*Gut Judas*

(Mr. 15:1; Lc. 23:1-2; Jn. 18:28-32)

<sup>3</sup> Laa Judas Iscariot zha ne pto Jesús ga, zeene bin Judas laa zho rnab guet me, lēēlēd güey Judas lo grē pxoz rnabey co, lo grē zha non lo

menguiedz ga, zietsire Judas dimi ne bdiizh zho Judas ga. Mban rac Judas, <sup>4</sup>bdzin Judas rëb Judas lo zho:

—Naraa rien naa lëda nu beñ naa. ¡Tib dol nrooble nu, znu bialto naa tib men ne peet xtold!

Pquiab zho rëb zho:

—¡Minçotaa gon ndiond no! ¡Xcuentzhe luu ga!

<sup>5</sup>Horco pchel Judas dimi co len yadoo. Lo guielnë co briece Judas ga güey Judas lëëque Judas pxiiyan Judas.

<sup>6</sup>Grë zha ne nac pxoz rnabey ga, güey zho ptop zho dimi co. Per blozh ga, rienð zho dien zha gun zhow.

—¿Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëew.

<sup>7</sup>Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne ríaa grë ncuaan psin ne rquiin; parne lo liu co ygueets grë zha zit ne guet Jerusalén. <sup>8</sup>Nacne brieelë liu co “Liu ren”, ni sca runbey zhow len dze rii. <sup>9-10</sup>Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuaan psin ne rquiin. Sca në Dios lo naa.”

*Bnab zho guet Jesús*

(Mr. 15:2-20; Lc. 23:3-5, 13-25; Jn. 18:33-19:16)

<sup>11</sup>Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

<sup>12</sup>Grë zha ne nac pxoz rnabey ga, ni grë zha ne nac zha non lo menguiedz, rzadraa ncuaane rquiaqui zho me; per ni tib diidz rtsired me lo zho. <sup>13</sup>Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuaane rquiaqui zho luu i?

<sup>14</sup>Bzee zdoo Pilat gon Pilat, ible rquiabd me.

<sup>15</sup>Gzobse iz, zeene ral lni Pascw rnabey Pilat ríaa tib zha ne no ladzguiib, zha ne gnabtaa menguiedz laa. <sup>16</sup>Len dze co no tib zha ntseeb ladzguiib lë Barrabás, zëeb xtiidz zho. <sup>17</sup>Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

<sup>18</sup>Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

<sup>19</sup>Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsieel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tsieel luu.

<sup>20</sup>Grë zha rnabey co, bio zho pquiil zho menguiedz gnab zho csilaa Pilat

Barrabás, ni gnab zho guet Jesús. <sup>21</sup> Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—jBarrabás psilaa!

<sup>22</sup> Dzigo rëbchaa Pilat:

—Men ne waa nac diidz px-eel Dios lo to nu, ¿zha guñ naa me?

Pquiab zho rëb zho:

—jBnabey yquia me lo cruz!

<sup>23</sup> —¿Per pe nacne yquia men rii lo cruz? —rëb Pilat—. jNi tìb dol rapd me!

Biireque zho nguiedz ropt-sie zho rnab zho yquia me lo cruz. <sup>24</sup> Gonse Pilat rquiaa-diagd zho xtiidz me, leñ maz-draa rac zho, dzigo bnab me nis, squi ndxie zho bdiib me nia me, rëb me lo zho:

—jNañle to nasca, led xtoldraa naa nu ne laa xchen men rii gzhiee, sac nañpaa naa peet falt rapd me!

<sup>25</sup> Pquiab be zho rëb zho:

—jPeet nacd ga! jZhits no grë xpëed no cuib dol co, na no guiotizha!

<sup>26</sup> Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psañ Jesús ladznia menquiib ne tsiequiaa me lo cruz.

<sup>27</sup> Biire grë menquiib co bzëebnie zho me nëz len yulow, ga pcaalsa grëraa menquiib ne nacgrë zho, brin zho igose me. <sup>28</sup> Blee zho xab me, bgacw zho me tib lar nizhnie nlaan, zig rna lar ne racw grë rey, <sup>29</sup> bzieecw zho bla lë yag guiets, bzoob zhow

guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquiitsgzhìb zho lo me, rnee zho:

—jGolwi ganle zha ractaa zhirey zha Israel!

<sup>30</sup> No zho rtsuc zho lo me, rgob zho goobgui ne no nia me ga, rdeed zhow guic me.

*Güeyquiaa zho Jesús lo cruz*  
(Mr. 15:21-32; Lc. 23:26-43; Jn. 19:17-27)

<sup>31</sup> Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz. <sup>32</sup> Nëz zienie zho me bdzieel zho tib men Ciren lë Simón, bnabey zho men co bi me zhicruz me.

<sup>33</sup> Zeene bdziñ zho zaatne nac “Gui Beerguic Ngutoo” (Gólgota), <sup>34</sup> ga bdeed zho nziu lo me notsa tiblo guizh nlayag, per zeene pquiaaro mew bieñ me nziu cow, bnëd me nie mew.

<sup>35-36</sup> Blozhse pquiaa zho me lo cruz, bzhen zho tib xab me pchug zhow biaannie zho tib lëgaw, laa stiba bio zho rif; dzigo laa zho bzob ga, bzobnap zho. <sup>37</sup> Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA IS-RAËL.” Sca pquiaa zho, sac miñco pquiaqui sca pquiaa zho me lo cruz. <sup>38</sup> Ye chop ngbaan pquiaagza zho me lo cruz, tìbga zhicruz zho bzo tib nëz cho zhicruz me. <sup>39</sup> Grëse miech ne rdedtaa ran zho laa me quia ga, rzhidznie

zho me, haxta rdzi zho guic zho <sup>40</sup> rnee zho lo me:

—Led rëb luu lëë laa luu ntsil yadoo, ni tsonaque ng-bidz nzaalo luu stiba, ¿pe nac dzigo rrieelod luu guieet luu i? Teñe nli Xpëed Dios nac luu, biet lo qui.

<sup>41</sup> Scaque grë pxoz rnabey, grë maistr ley, grë zha farisé ni grë zha ne nac zha non lo menquiedz, rzhidznie zho me, rnee zho:

<sup>42</sup> —Stib miech scataa beenguiaac me, stib miech scataa bla me, ¿pe nac dzigo rrieelod me gla me me? ¡Goon me name nac zhirey ne, guiet me i sca zho; zeena dziuunbey ne men rnabey nac me!  
<sup>43</sup> ¡Conque tant rnalo me Dios, haxta rnee me Xpëed Dios nac me, guiaadsilaa Dios me i nazho!

<sup>44</sup> Ye ngbaan ne quiagza me lo cruz ga, mincoque rbidzgo zho lo me.

*Gut Jesús*

(Mr. 15:33-41; Lc. 23:44-49; Jn. 19:28-30)

<sup>45</sup> Zig grol dzew, tibaque zeen goc tib ncow dipse lo guidzliu, haxta las tres biao biini stib. <sup>46</sup> Horco nguiedz zëëb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacre psaan luu naa?

<sup>47</sup> Zha ne ndxie ga, zeene bin zho sca rbedz me, no zho rëb Lí, men ne biadteed xti-idz Dios padzeela, men co rbedz me. <sup>48</sup> Dzigo rias tib zho güeygadz tib lë zhiil lo nziu bla, bzoob zhow tib guic

goobgui pquiaa zhow ro me.

<sup>49</sup> Laa zla zho rnee:

—Psaan, nu dzian ne dien pe ziaad Lí guiaadlit Lí me i.

<sup>50</sup> Tibaque zeene pquiaa me stib redz nroob, znuse blozh me.

<sup>51</sup> Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbiła, <sup>52</sup> nzian ro baan grë zha ne bnalo Dios mazd padzeela bzhial.  
<sup>53</sup> Zeen gol dze ne brieaban me, ye zho laa zho brieaban, brie zho len baa, bzëëb zho lad guiedz; nzian miech ne gon zho.

<sup>54</sup> Grë menguiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—¡Ne nlipagaa —rnee zho—, Xpëed Dios nac men qui!

<sup>55</sup> Nzianlaa men wnaa, zit zo zho rwi zho. Lëë grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé. <sup>56</sup> Lad co no Marí Magdal, Marí tsieel Zebedé, ni Marí ne nac xniaa Jacob grop José.

*Bgueets Jesús*

(Mr. 15:42-47; Lc. 23:50-56; Jn. 19:38-42)

<sup>57-58</sup> Zhile sëëb ngbidza, zeene bdzin tib mgui lë José lo Pilat, bnab me diidzbey tselit me xcuerp Jesús lo cruz; tib zha ricwa, men guiedz Arimaté nac me, ye me ziana

zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

<sup>59</sup> Dzigo güey José. Blozhse blit José me lo cruz, laa José neyle tib læ lar cub, pchel José me lar co, <sup>60</sup> güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey. <sup>61</sup> Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

<sup>62</sup> Biini liu co, pcaalsa grë pxoz rnabey, grë zho zha farisé, güey zho lo Pilat, <sup>63</sup> rëb zho:

—Gūn luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieegan. <sup>64</sup> Gane ziaad no lo luu, bzhiguiel pxeel zha ne yquiaanap ro baañ me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieegan. Nanle luu ganle, tel gac min co, cho gnë peraa gzhixcuaa zho.

<sup>65</sup> Dzigo rëbchaa Pilat lo zho:

—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

<sup>66</sup> Dzigo laa zho zie zienie zho grë menguiib co. Bdzin zho bloo zho tib bey cho quie ne nioog ro baañ Jesús ga,

par glu tel cho zha ne tsie-gaala, ni biaan grë menguiib co yquiaanapa.

## 28

### BRIEEBAN JESUS

(Mr. 16:1-8; Lc. 24:1-12; Jn. 20:1-10)

<sup>1</sup> Zna dze goc dze ne rdziladz zho lo dziin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baañ Jesús.

<sup>2</sup> Lëëtaaque hor co bni tib zhodox, lo zho co biet tib xanjl Dios gbaa bdoob me quie nroob ne nioog ro baa co, bdiix mew tib lad, bzobga me lada. <sup>3</sup> Masaque rlu me zigne rlu belye, xab mew, nquitsbie rnaw, zig rlu zaatne ndxie guieg. <sup>4</sup> Grë menguiib ne quianap ro baa ga, zeene gon zho anjl co, per nli bdzieb zho, rhidz zho. Lo dzeb co, pcowgazh zho, grëse zho biab liu. <sup>5</sup> Zeene laa grop wnaa co bdzin, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to. <sup>6</sup> Per guiendle me nu, jlaa me brieeganle zigne bneelee me ga! Golwi ganle nu nac zaatne pxob zho me. <sup>7</sup> Niinagazh goltsie goltsienie diidz lo xpëedscuel me, golguiab lo zho laa me brieeganle. Galilé me cuëz me zho, ga gan zho me. Laa to nanlew nasca.

<sup>8</sup> Lëëlëd brieegrop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho. <sup>9</sup> Laa zho zie, tibaque

zeene gon zho laa Jesús zole lo zho, ine pquiaabdiuzh me zho. Horco wbig zho pquiitsgzhib zho lo me, bdeedz zho ni me. <sup>10</sup> Dzigo rëbcha me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

<sup>11</sup> Horcoraa laa bla zhaguiib ne pquianap ro baan Jesús ga bdzin lad guiedz. Güey zho lo grë pxoz rnabey, bzodiidz zho zha gon zho bzhial ro baa co. <sup>12-13</sup> Dzigo pcaalsa grë pxoz co grë zho zha ne nac zha non lo menɡuiedz, dien zha gun zho. Nacne biaan zho diidz, mazd gdeed zho dimi lo grë menɡuiib co, parne gneelid zho, sinque guiab zho, segur xpëedscuelaque me güeybee me len baa, per biend zhow sac nixgues zho. Nroob dimi bdeed zho lo grë menɡuiib co, <sup>14</sup> rëb zho:

—Peet tsienied guic to, nicele telne gon gobernadora na no guionee lo me, zeena peet gund me to.

<sup>15</sup> Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

<sup>16</sup> Zeene bdzin dze ne gdzieelo Jesús xpëedscuel me nëz Galilé, brie gza tsiptib zha ne bzo gaxpaa lo me ga, güey zho nëz co; bdzin zho guic gui ne rëble me ga gdzieelo me zho. <sup>17</sup> Zeene gon zho me pquiitsgzhib zho liu.

Lo grë zha ne ndxie ga, no zho rienpaa lëë me ga, no-gaa zha ne bii racchop guic. <sup>18</sup> Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladznia naa psan Pxoz naaw. <sup>19</sup> Niina nagon, laa naa rsan diidz lo to: goltsie dipse lo guidzliu, goltsieseed miech gac zho zha ne sëëb xnëz naa, golchoobnis zho, golguiab lo zho lëë min co rnabey Pxoz naa, rnabey naa ne nac Xpëed me, ni rnabeygaa Espíritu Sant. <sup>20</sup> Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.



## XTIIDZ NDZON DIOS MINE PQUIAĀ MARCW

<sup>1</sup> Nu ganle laa naa csilo gzodiidz naa, miñe been Jesús, Men ne bneele Dios cxeel me lo guidzliu.

<sup>2</sup> Lo guits ne pquiaa Isá, tib men ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co: Sxel naa tib zha ne tedner lo luu, zeena zha co gzhixcuaa nēz ne ted luu.

<sup>3</sup> Dan tso zho, zon miech zeene laa tsi zho zēeb gnee zho:

“Golzhixcuaa nēz ne ted men ne rnabey, golsaan grē guiełntseeb ne run to.”

<sup>4</sup> Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquiełntseeb zho gbig zho lo Dios, ni chobnis zho, zeena csilaa Dios zho lo grētaa xtol zho. <sup>5</sup> Dzigo rrieed miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grē xtol zho, dzigo rchoobnis me zho len guubee Jordán.

<sup>6</sup> Guits lad camell niaa xab me, ncuaane rzhidoo len me guid niaaw ni niapse nguzhanch ni dzin dan row

me. <sup>7</sup> Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guiełnzaac nroob ga yгаа naa telne niaca miñe grieelo maase lab me glit naa; per na ni miñ co rdzind naa. <sup>8</sup> Laa naa rchoobnis to niina con nis; sangue me con Espiritu Sant cchoobnis me to.

*Brobnis Jesús*

(Mt. 3:13-17; 4:1-17;

Lc. 3:21-22; 4:1-15)

<sup>9</sup> Len ngbidz coquew, laa Jesús brieed guiedz Nazaret xtan zha Galilé, güey me pchoobnis Juan me len guubee Jordán. <sup>10</sup> Laa me norieedze lo nis, zeene gon me laa zhan gbaa bzhial, laa men ne nac Espiritu Sant biet gbaa zig tib palom laa me ziad-zēeb guic me. <sup>11</sup> Ni lēetaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

<sup>12</sup> Zeene blozh brobnis me, dzigo güeynie Espiritu Sant me tib dan ngan, zaatne no grē ma ntseeb; <sup>13</sup> bio me ga choo ngbidz. Ga no me güey Satanás (ma ne rnabey lo grēse menđox), gocladz ma niungüet ma me.

Bdedse ga, güey grē xanjł Dios güeygan zho me.

<sup>14</sup> Len ngbidz co bnabey Herod bio Juan ladzguiib. Ladzguiible no Juan zeene brieed Jesús güeyted me grē guiedz ne ngab Galilé güeyseed me miech Xtiidz

Ndzon Dios, <sup>15</sup> rnee me lo zho:

—Laa dze ne gnabey Dios ziaadgaxle, laaw bdziñ dzele. ¡Golsaan grë xquielntseeb to, golnab perdon lo Dios; dib zdoo to golliladz Xtiidz me!

*Tap zha ne quia gooz mel*  
(Mt. 4:18-22; Lc. 5:1-11)

<sup>16</sup> Tib dze zieded Jesús ro Nisdoo ne lë Galilé, gon me laa Simón grop Ndrés quia gooz mel lo nis co; sac ible dziin co nac xtsiñ zho. Grop bets zho laa zho noron guix ne rgaa mel lo nis. <sup>17</sup> Dzigo bredz me zho, rëb me lo zho:

—¡Goltë, goltënal zhits naa! ¡Laa naa cxel to tsie to stib gooz, tsietop to grë miech ne sëeb xnëz Dios!

<sup>18</sup> Horcogazh psan zho guix ne rnaaz zho mel ga, laa zho zienal zhits me.

<sup>19</sup> Zhisaque bzë Jesús ro nis co, gon me laa Jacob ni Juan no tib len barcw noquiaabdie zho guix ne rnaaz zho mel, lëë grop xingan Zebedé ga; <sup>20</sup> dzigo bredz me zho. Zigne bredz me zho, zoque Zebedé lo barcw ga grë xmoz Zebedé, laa zho zienal zhits me.

*Tib mgui ne nosacsi mendox.*

(Lc. 4:31-37)

<sup>21</sup> Laa zho bdziñ guiedz ne lë Capernaum. Zeene gol dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech. <sup>22</sup> Grë miech ne ndxie len yadoo ga, rzee zdoo zho ran zho zha rnee me, sac rlu men rnaabey nac me; led

yed me rseed zigne rseed grë zha ne nac maistr ley.

<sup>23</sup> Lad grë miech co no tib mgui ne nosacsi mendox, tibaque zeene nguiedz pcooptsie ma mgui, <sup>24</sup> rnee ma:

—¿Pe gun luu no Jesús Nazaren? ¿Ziaad luu lëë par gnitlo luu no? Runbey naa luu, tib men peet xtold nac luu ni Dios pxeel luu.

<sup>25</sup> Dzigo goctox Jesús lo ma, rëb me:

—¡Psoog ro luu! ¡Na zeena psaan men qui!

<sup>26</sup> Horco masaque beencxidz ma mgui co, ni rquiaadan ma redz laa ma psaan mgui. <sup>27</sup> Grëse miech ne ndxie ga, bzee zdoo zho rnabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene ractox me lo ma!

<sup>28</sup> Znuse brieets bliaal diidz zha beenguiac Jesús mgui co; grëse guiedz ne ngab Galilé gocnan miecha.

*Biac xniadzoop Simón Pedr*

(Mt. 8:14-17; Lc. 4:38-41)

<sup>29</sup> Ga brieë Jesús güey me lidz Simón grop Ndrés gza me Jacob ni Juan. <sup>30</sup> Bdziñ zho, lëëtaque laa xniadzoop Simón nix rlan xlëë, nacne rëb zhow lo me. <sup>31</sup> Dzigo bded me zaatne nix zhuz co, bzhen me nia me, blische me me. Horcogazh laa zhixlëë me blëz, guche me ga psilo me beenlo ncuane dow zho.

<sup>32</sup> Ziedzele dzew, laa ngbidz rzëëblew, zeene psilo

grë miech co zo zo rdziñnie zho grë men rzacnë, grë zha ne nosacsi menḁox ne; bioogse ro yu co ndxie miech. <sup>33</sup> Zootle zig grëse miech ne no lad guiedz co pcaalsa ga.

<sup>34</sup> Ndal grë men rzacnë co zhaase zhaase guielguidz ne rzac zho, per beenḁguiac Jesús zho; zha ne nosacsi menḁox, benḁxoon me grë menḁox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

*Pseed Jesús miech Galilé  
(Lc. 4:42-44)*

<sup>35</sup> Silgaw, scase bii ncow rnaw guche Jesús brie me lad guiedz co, güey me zaatne guiendḁraa miech, güeyzodiidznie me Dios. <sup>36</sup> Zeene rnit me choot guiend; dzigo brie Simón ni zla zha ne nacgza Simón güeyguib zho me. <sup>37</sup> Zeene bdziel me, rëbchaa zho lo me laa grë miech co quiguible me.

<sup>38</sup> Dzigo pquiab me rëb me lo zho:

—¡Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible miñ co pxeel me naa zial naa lo guidzliu.

<sup>39</sup> Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runḁxoon me grë menḁox ne nosacsi miech.

*Biac tib mgui ne rlan lepr  
(Mt. 8:1-4; Lc. 5:12-16)*

<sup>40</sup> Tib vuelt, wbig tib mgui ne rlan guiedzdox ne lë lepr lo Jesús (masaque riaal dipse guid lad mgui), pquitsgzhib mgui lo me, rëb mgui:

—Tebaa siguieel luu gunḁguiac luu naa.

<sup>41</sup> Pquia zdoo Jesús mgui, pxobnia me guic mgui rëb me:

—Zunḁguiac naa luu. ¡Ni-inagazh laa luu guiaanmbel!

<sup>42</sup> Zigne sca bnee me laa mgui co biac, mbese biaan xcuerp mgui. <sup>43</sup> Blozh ga bzonëz me mgui, ni pso me diidz lo mgui <sup>44</sup> rëb me:

—Bina ganle, choot lo gzodiidz luu gon zha biac luu. Bzë, güey lo pxoz, güeyson gon ne rnabey xley Moisés gdeed luu; zeena gan zho ganle laa luu biacle.

<sup>45</sup> Ni zigne brie mgui ga, psilo mgui grë lo miech bzodiidz mgui zha biac mgui. Grëse miech gocnaa, nacne brieelodraa nenlo ndzin Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rree grë guiedz co rdziñ lo me.

## 2

*Biac tib men ne gutoo  
(Mt. 9:1-8; Lc. 5:17-26)*

<sup>1</sup> Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu, <sup>2</sup> miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

<sup>3</sup> Laa grë miech co ndxie ga, zeene bdziñ tap zha bgui ney zho stib meñ bgui, zhoobse me lo yag, ib gacd sē me sac dipse me gutoo. <sup>4</sup> Ni ne scataa miech guizhiu ne ndxie, gacd ted zho nēz ro yu gdziñnie zho me lo Jesús, nacte biepaque zho guic yu. Pخال zho ngali zaatne zob Jesús, dzigo ga pteed zho meñ co dib yag ne zhoob me ga. <sup>5</sup> Zeene gon Jesús ne nli dib zdoo zho rililadz zho me gunguiac meñ rzacnē co, dzigo rēbchaa me lo meñ co:

—Xin, niinagazh laa naa gun perdon grēse xtol luu.

<sup>6</sup> Blalaa zha ne nac maistr ley zob ga, zeene bin zho sca rēb me lo meñ rzacnē co, bzachaa zdoo zho: <sup>7</sup> “iLēda i gon squi rnee meñ qui! Quia-guitnie me Dios i squi rzē xti-idz me. iTibaque meñ ne run perdon xtol miech, ni lēē meñ co nac Dios!”

<sup>8</sup> Biēnga Jesús sca rza zdoo zho, dzigo rēbchaa me:

—iPe nacte rlēē to ron to miñe rne naa? <sup>9</sup> Parga nli, cholze zha ne zac guiab: “Laa naa gun perdon grēse xtol luu.” <sup>10</sup> Per laa naa glu lo to ganle, naa ne nac naa Meñ ne pxeel Dios zial naa lo guidzliu, ible naa no gun miech perdon.

Dzigo bnee me lo meñ rzacnē co, rēb me:

<sup>11</sup> —iGuche i, bi yag ne bzhoob luu i, zeen bzē!

<sup>12</sup> Zigne sca bnee me laa mgui co bzoli, blis me yag co, grop lo grē miech co gon zho laa me brieē ga, laa me

zey. Grēse zho rzee zdoo zho, rleynie zho Dios rnee zho:

—iNasi laa ne nodzian ncuanea gard dzian ne!

### *Bredz Jesús Leví*

(Mt. 9:9-13; Lc. 5:27-32)

<sup>13</sup> Blozh ga, laa Jesús brieē ga laa me zie nēz ro nisdoo stib; nzian miech ne pcaalsa lo me ga, dzigo pseed me zho.

<sup>14</sup> Ro nis co ziezē me gon me Leví, xingan Alfé, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

<sup>15</sup> Bded ga, bredz Leví me güey me tib wagw lidz Leví. Grē zha ne nac recaudador, grē zha ne zēēb diidz nac zha yozh, tipse lo mezh bzobnie me zho grē xpēēdscuel me; sac ndal grē zha co zienal zhits me.

<sup>16</sup> Blalaa maistr ley ne nac-grē zha farisé, gon zho sca tipse noyownie Jesús grē zha co; bded ga, rēbchaa zho lo xpēēdscuel me:

—iMod sca na rownie xmaistr to grē zha ngoopdol, grē zha beed ne nac recaudador!

<sup>17</sup> Dzigo rēbchaa Jesús lo zho:

—Nanle to ganle, meñ ne run rmed, zaatne no zha ne rzacnē, ga rquiin zho, iñiacxe squiin zho zaatne no zha ne ndip ndaan? Ni miñ co rac niina, tel naa zialguibd naa miech wen, sinque laa naa zialguib miech ngoopdol.

*iPe nacte rcuand xpēēdscuel Jesús?*

(Mt. 9:14-17; Lc. 5:33-39)

18 Lëëtaaque dze co nocuan xpëëdscuel Juan Bautist, grë zho zha farisé. Dzigo bdzin bla zha ne bhabdiidz lo Jesús, rëb zho:

—¿Pe nac waa ib rcuand xpëëdscuel luu? Zha grë xpëëdscuel Juan Bautist ni grë zha farisé, rcuan zho.

19 Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban? <sup>20</sup> Per zdzin dze zeene laa mgui co gbiche; ni zeene laa dze co gdzin, dzigosi nagon riegual tso zho guielnë, riegual ycuan zho.

<sup>21</sup> 'Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox. <sup>22</sup> Scaque tsod zha ne cotsow vin cub tib len guid ne padzeelale noquiin, sac stsiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

*Ptop xpëëdscuel Jesús mzion zhobxtil*

(Mt. 12:1-8; Lc. 6:1-5)

<sup>23</sup> Tib dze ne rdziiladz zho lo dziin nëz Israel, bdednie Jesús xpëëdscuel me zaatne zëëb zhobxtil, dzigo zigse zieded zho pchoo zho palal mzion zhobxtil co. <sup>24</sup> Gon zha farisew, dzigo rëbchaa zho:

—¡Lëda i gon noyun to! ¡Golguien ganle dze nda nac dze rii!

<sup>25</sup> Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho?

<sup>26</sup> Rneew, bzëëb me len yadoo güeynab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co. Len iz co nac men ne lë Abiatar pxoz nroob.

<sup>27</sup> Golgacnan sca ganle, biaan dze rii par csacsi miech xcuerp zho, sinque ne rleynie Dios miech gane psan mew.

<sup>28</sup> Naa ne nac naa Men ne pxee! Dios zial naa lo guidzliu, naa rnabey dze rii, nanpaa naa pe nac mine nonguiel gac.

### 3

*Biac tib mgui ne mband tib nia*

(Mt. 12:9-14; Lc. 6:6-11)

<sup>1</sup> Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia. <sup>2</sup> Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me. <sup>3</sup> Dzigo bredz me mgui co, bnabey me bzo mgui groltaa lo grë zha ne ndxie ga; <sup>4</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuanea yquiu, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd. <sup>5</sup> Dze bui me lo zho grëse zho, wbinladz guic me, ni mban goc zdoo me gon me scataa ntseeb zdoo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

<sup>6</sup> Grë zha farisé, ni grë zha ne nacie rey Herod, zigne brie zho ga laa zho psilo bnediidz dien zha gdeeda didz gut zho Jesús.

<sup>7</sup> Leñ dze co, tib vult bdziñ Jesús ro nisdoo grë xpëedscuel me. Miech guizhiu ne nañ zhits zho, ga zie grë zha ne ziaad nëz Galilé, grë zha ne ziaad nëz Judé, <sup>8</sup> grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

<sup>9</sup> Dzigo bnabey Jesús xpëedscuel me, yguib zho tib leñ barcw zaatne gac so me zeeña ctaagwd grë miech co me. <sup>10</sup> Zëëble diidz ndal miech ziyunguiac me, dzigo grëse zha ne rlan pe guielguidz, rbigbe zho dien zha grielo maase lad xab me xen zho.

<sup>11</sup> Grë mendox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—¡Xpëed Dios nac luu!

<sup>12</sup> Per ractox me lo ma, rsaand me gnee ma parne xoobneñd cho nac me.

*Ble Jesús gza tsiipchop xpëedscuel me*

(Mt. 10:1-4; Lc. 6:12-16)

<sup>13</sup> Blozh ga biep me tib guic gui win zob ga, ga bredz me zha ne gocladzse me. Zeene pcaalsa zho grë zho, <sup>14</sup> dzigo lad co ble me tsiipchop zha ne sënie me, zha ne cxeel me tsieseed miech Xtiidz Dios. Lëë zha co bleelë me poxtl, <sup>15</sup> ni bdeed me poder lo zho guncxoon zho mendox.

<sup>16-19</sup> Znu lë gza tsiipchop zha ne ble me ga:

Simón (lëë Simón co bleelë me Pedr),

Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

*Rëb zho mendox nacie Jesús*

(Mt. 12:22-32, 46-50; Lc. 8:19-21; 11:14-23; 12:10)

<sup>20</sup> Wbire Jesús ga, laa me bdziñ ro yu grë me zho.

Scasaque ndal miech ne pcaalsa ga stib, ni rdeetew didz gownie me zho. <sup>21</sup> Zeene bin menlidz mew, dzigo briece zho ziexi zho me, sac rëb zho bod rzhinle guic me.

<sup>22</sup> Haxta grë maistr ley, zha ne briece nëz Jerusalén bdziñ ga, rnee zho:

—Beelzebú, ma ne rnabey lo men<sub>d</sub>ox, ma co nacie me gane rrieelo run<sub>c</sub>xoon me men<sub>d</sub>ox.

<sup>23</sup> Dzigo bredz me zho bzodiidz me tib cuent lo zho, rëb me:

—¿Pa nan to na grieelo lëëque men<sub>d</sub>ox gun<sub>c</sub>xoon samendox ma? <sup>24</sup> Tel tib guiedz nadien gac miech chop dii, csilo zho tillsa zho, ¿niacxe nitlod guiedz co? <sup>25</sup> Tib diigaa miecha, tel csilo zho lëëque zha tilnie menlidz zho, ¿niacxe nitlod zho? <sup>26</sup> Scaquegaa men<sub>d</sub>ox nagon, telne lëëque lëë ma tilnie samendox ma, ipe nale na bnitlo ma! <sup>27</sup> Masaque nac men<sub>d</sub>ox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho.

<sup>28</sup> 'Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co; <sup>29</sup> sangue zha ne gneenë Espíritu Sant, dol nroob ga run zho, gdziñd dze ne gun Dios zho perdon.

<sup>30</sup> Sca rëb me lo zho, sac sca quianee zho rëb zho men<sub>d</sub>ox nacie me.

<sup>31</sup> Horco laa xniaa me ni zha bets me bdziñ, per leyse

blëz zho; dzigo pxeel zho zha ne zietsedz me. <sup>32</sup> Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

<sup>33</sup> Pquiab me rëb me:

—¿Xnia naa ye, bets naa ye?

<sup>34</sup> Dze bui me lo grë zha ne ndxie ga, dzigo rëbchaa me:

—To gon nac xnia naa, to nac bets naa. <sup>35</sup> Sac grëse zha ne run mine racladz Dios, lëë bets naa ga, lëë bzian naa ga, lëë xnia naa ga.

## 4

*Xcuent zha ne güey gon  
(Mt. 13:1-23; Lc. 8:4-15)*

<sup>1</sup> Dze coquew, laa Jesús psilo quiasseed miech zaatne nac ro Nisdoo Galilé ga. Miech guizhiu ne pcaalsa lo me, nacie güeytsep me tib len barcw ne zo ro nis co, ga bzob me laa grë miech co bre tib ro nis. <sup>2</sup> Ndal grë ncuane pseed me zho, per niapse con cuent rnee mew lo zho. Lëë tib cuent ne bzodiidz me ga nu, rëb me:

<sup>3</sup> —¿Golquiaadiaga ganle! Tib mgui name, briece me güey me gon zhobxtil. <sup>4</sup> Zeene laa me quialaal zhob co, mine bliaal gax ro nëz; znuse güey grë mguin güeytow maw. <sup>5</sup> Laa mine bliaal zaatne nac lo quie, znuse znuse blana; <sup>6</sup> per zeene laa lo ngbidz briece, znusaque bgoolä blozh ga bidzgaw; sac guiend nroob low. <sup>7</sup> Laa mine bliaal zaatne nac len yag guiets, zeene laa grë yag guiets co broob znuse bnitlo yag guietsa,

pasëw niac. <sup>8</sup> Sanguë grë mine bliaal zaatne nac lo liu naal, blana, brooba ni goca; lo tib tib zhob co no mzion co brieë galptsii zhob, now brieë tsongalä, nogaaw brieë haxta tib gayoow.

<sup>9</sup> Blozh ga, rëbchaa me lo zho:

—Zha ne racladz guien mine rne naa, yquiaadiag zhow.

<sup>10</sup> Zeene laa grë miech co zey, laa gza tsiipchop xpëëdscuel me, ni zla zha ne rzënie me, laa zho bnabdiidz lo me dien zha nac cuent co. <sup>11</sup> Dzigo rëbchaa me lo zho:

—Tel to, Dioszhal rlu lo to zha rnabey me, niicle ncuaane mazdraa ngueetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow. <sup>12</sup> Per niicle scaw, nzhal diag zho ron zho, per peet riend zho; nzhal lo zho rwi zho, per peet rand zho; ib nëd zho gbig zho lo Dios, gnab zho gun me zho perdon.

<sup>13</sup> Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca: <sup>14</sup> Mgui ne güeylaal zhob ga, rrieëquia lëë zha ne rieneë Xtiiidz Dios lo miech ga, laa zhobxtil co nac Xtiiidz Dios. <sup>15</sup> No miech nac zig nac ro nëz ne bliaal palal zhob co: rquiaadiag zho Xtiiidz Dios, rlozh ga lëëlëd rdziñ mendox rquuil ma zho, rsaanga zhow. <sup>16</sup> Nogaa zho nac zigne nac

lo quie co: zeene rquiaadiag zho Xtiiidz Dios, ine rley zho rcaania zhow, <sup>17</sup> per led dib zdood zho rcaania zhow; gane zeene laa miech rsilo rlëë lo zho, laa miech rt-sidil zho porne rliladz zhow, rsaanga zhow. <sup>18</sup> Zzhisgaa zho nac zigne nac len yag guiets co: nli rquiaadiag zho Xtiiidz Dios, <sup>19</sup> per rsilo zho lel grë ncuaane no lo guidzliu rii mazdraa rionie guic zho, rquidie grë dimi zho, rzoobladz zho yquianie zho grëse ncuaane racladz zho. Grë ncuaan co rioxcoraa zho, laa ne tsonie Xtiiidz Dios guic zho, min co rquiaqui ib rund zho mine rnabey me. <sup>20</sup> Laa nogaa zho nac zigne nac liu naal co: rquiaadiag zho Xtiiidz Dios, dib zdoo zho rliladz zhow, ni rban zhow zigne naca. Grë zha co, no zho nac zig mzion ne brieë galptsii zhob ga, no zho nac zig mine brieë tsongalä, nogaa zho nac zig mine brieë tib gayoow ga.

*Xcuent biini ni midz moxtaz*

(Mt. 13:31-32, 34-35; Lc. 8:16-18; 13:18-19)

<sup>21</sup> Blozh ga, biire pcaalsa miech lo me, dzigo rëb me lo zho:

—¿Pa dien rquiin biini? ¿Pe rquiaguiw par tsolana tib len guin o soogaaw tib zhan lon? Led zeene rquiaguiw lëë, zaatne grieelo gziiniw ga rzoob zhow. <sup>22</sup> Scaque nagon grëse ncuaane rac ngueetsa, grëse ncuaane rnee miech zhliiana, ib none xoobneña.



23 *Te*ne racladz to guien to mine rne naa, golquiaadiaga; 24 ni zigne ron tow scagaa goltsoxco golguna. *Te*ne tsoxco to gun tow, scagaa zioguicraa tow. 25 Sac zha ne tsoxcow, zdeddraa Dios guielbiini lo zho; sangue zha ne tsoxcoda, haxta tel palalse guielbiini ne bdeed me lo zho stiche mew.

26 Ni rëb me lo zho:

—Znu gon nac zha ne ngab lo Dios; nac zho zig bni ne ran miech. 27 Zha ne rielaal bni co, liu rcow, liu riini, laa zho raaguies, laa zho rieche. Sca sca laa dze zie, laa bni co ratslo, laaw rlan, laaw rroob, per riend zho zha nacne laaw rroob.

28 *Zha*l guidzliu rdeeda guielnzaac co, guizh nac zhob co zeene rlana, rac palal dzew laaw rlan mzion. 29 Laa zeene laaw ral, dzigo laa zho rietiitsa, sac laa dze bdzinle ne laaw tsas.

30 *Zha* ganle gni naa lo to zeena guien to zha nac xquielrnabay Dios? —rëb Jesús—. *Pa* tib cuent ganle gzodiidz naa lo to zeena guien to zha naca? 31 Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win, 32 ni tel gacbniw, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

33 Nzian grë cuent rii pquiin me par cseed me grë miech co, ni laa me bnee mine rgobey me guien zho. 34 Niapse sca rseed me zho,

laa zha ne nac xpëedscuel me, zeene zhasew rnee mew lo zho zigne naca.

*Pcuëez Jesús tib medox*  
(Mt. 8:23-27; Lc. 8:22-25)

35 Zeene bdze dze co, rguetsle liuw rëbchaa me lo xpëedscuel me:

—Golgotsaa dieedquia ne stib nëz lo nis rii.

36 Blozhse bnee me lo grë miech co, laa zho biepl len barcw ne zob me ga grë me zho, laa zho zie. Ye blalaa barcw ne zob lo nis co zienal.

37 Laa zho zie, tibaque zeene laa tib medox psilo brie, masaque rlis me lo nis co; zeene riasoli low riechoona len barcw, laa barcw psilo noyodzële nis.

38 Dzigo güey zho güeycuaan zho Jesús, sac lëëtaque laa me nixguies nëz zhan barcw ncoogse me tib lmad.

—*Maestro!* —rëb zho—. Bui ganle, *pe* znuse csaan luu nitlo ne nu?

39 Dzigo guche Jesús, bnee me lo me co, bnee me lo nis co, rëb me:

—*Lëew* ga na! *gol*cuedze!

Zigne sca bnee me, laa me co blëz, niicle nis cow laaw bredze. 40 Dzigo rëbchaa me lo zho:

—*Pe* nacne squitaa rdzieb to? *Garda*que dzigo lëë gliladz to cho nac naa!

41 Rienddraa zho zha gun zho lo dzeb co, ni rnabdiidzlsa zho rnee zho:

—*Bay* cho nac me, zha nacne haxta me, haxta nis-doo ron xtiidz me?

## 5

*Men Gadar ne nosacsi mendox*

(Mt. 8:28-34; Lc. 8:26-39)

<sup>1</sup> Bdzin Jesús nēz dan ro nisdoo co gza xpēēdsuel me, ga nac xtan zha Gadar. <sup>2</sup> Laa me bietdze leñ barcw, zeene laa tib mgui ne nosacsi mendox bdzin lo me. Leñ baa briee mgui co bdzin me ga, <sup>3-4</sup> sac leñ baa nac zaatne rbēz me. Miech ne lēbd zho low, nzian vuelz ziezoob zho caden nia me, ni me ne, per znuse rchug mew, rzhooṅga me. ¡Choot rlēbd lo me! <sup>5</sup> Dze, guieel quianzē me grē dan co, rietso me grē leñ baa. Roptsiedan me, ni lēēque me rzheñ quie rchug me guidlad me. <sup>6</sup> Laa dze co, zitraa goṅ me Jesús, rias me bdzin me pquitsgzhib me lo Jesús. <sup>7-8</sup> Dzigo goctox Jesús lo mendox ne noguitnie me, rēb Jesús:

—¡Mendox, psaan men qui!

Horco pcooptsiedan mendox co mgui co, ni rnee ma lo Jesús:

—¿Pe guṅ luu naa Jesús? Runbey naa luu, Xpēēd Dios ne no gbaa nac luu. ¡Ne nli-pagaa been guieṅzaac csacsid luu naa!

<sup>9</sup> Dzigo bnabdiidz Jesús lo ma dien cho lē ma. Pquiab ma rēb ma:

—Legion lē no, sac nzian nac no.

<sup>10</sup> Rnab grē mendox co lo Jesús, gzonēzd me ma zit. <sup>11</sup> Gaxaque zhan gui co ndxie tib dzoon nguts noyow, <sup>12</sup> dzigo bnab ma lo Jesús, rēb ma:

—Bzhiguiel lose grē nguts qui bzonēz no.

<sup>13</sup> Bdeed Jesús diidz. Dzigo laa grē mendox co psaan mgui co, laa ma zie bzēēb ma zdoo grē nguts ne ndxie ga; psilo grē nguts co rquiaa ma corr güeypix ma glaa tib ro yee ne quia ro nisdoo co, bliaal ma haxta lo nis. Ga bieṅ ma nis, grēse ma gut. Rgaa ma zig chop mil.

<sup>14</sup> Zha ne quianap grē nguts co, gzase zho bzhoon güeyzodiidz zhow lad guiedz, ni grēraa yu ne zob gax ga. Briee grē miech co, zieso zho. <sup>15</sup> Zeene bdzin zho, per nli bdzieb zho, sac goṅ zho laa mgui ne sca bdziitnie mendox ga zobse lo Jesús, laa mgui nacwxable, rlu ndzinlile nac guic mgui. <sup>16</sup> Psilo grē zha ne goṅ zha biac mgui co, ni zha goc grē nguts co, psilo zho rzodiidz zhow lo grē zha ne bdzin ga. <sup>17</sup> Miṅ co bin grē zha co, mazd bnab zho lo Jesús siguiel me gbi me xtan zho.

<sup>18</sup> Zeene laa Jesús zie sēēb me leñ barcw, dzigo laa mgui co wbigaque lo me, nan mgui nziguiel me nienal mgui zhits me. <sup>19</sup> Per bdeete me diidz, rēb me:

—Wbire, güey güeyzodiidz lo grē menlidz luu ganle pa lotaa pquia zdoo Dios luu, zha nactaa milagr nroob ne been me beenguiac me luu.

<sup>20</sup> Dzigo wbire mgui. Güey mgui dib xtan zha Decápolis, güeyzodiidz mgui lo grē miech co zha beenguiac Jesús mgui.

Grëse zha ne rona, rzee zdoos zho.

*Brieaban xpëdwnaa tib men læ Jair*

(Mt. 9:18-26; Lc. 8:40-56)

<sup>21</sup> Zeene laa Jesús biire briequia stib nëz ro nisdoos co, miech guizhiu ne pcaalsa lo me ga. <sup>22</sup> Ga zo me zeene laa tib men ne nacgrë zha ne rnabey yadoo læ Jair bdziñ. Zigne bdziñ me lo Jesús pquitsgzhib me, <sup>23</sup> rëb me:

—Been tib guielnzaac got-saa guio ne guñguiac luu xpëed naa. Laa win rlozhle; nanpaa naa telne cxobnia luu guic win, ziac win.

<sup>24</sup> Dzigo laa Jesús zie nëz lidz men co. Ndal miech ne zienal zhits me, haxta rtaagw zho me. <sup>25</sup> Lad grë miech co zienal tib wnaa, gogle tsiipchop iz rlan me tib guielguidz, rzac me zigne rzac men wnaa gzob mëë, tibaque rlan mew ib rbëzda.

<sup>26</sup> Nzianle lo men ne run rmed ziye me, grëse ncuane rap me bloozh me lo rmed; per laa ne cuëz guielguidz co, leļ znu rzhizhooraaw.

<sup>27-28</sup> Ziyonle me grë milagr ne run Jesús. Bza zdoos me rëb me: “Totsaque yгаа maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús. <sup>29</sup> Nligaa hor cogazh laa guielguidz co blëz, bien me laa me biac.

<sup>30</sup> Zeene bien Jesús ne laa me beenguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

<sup>31</sup> Rëbchaa xpëedscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

<sup>32</sup> Per laa me rwi lo grë miech co dien chow.

<sup>33</sup> Nanpaa wnaa co ne me ga, rdzieb me, rzhidz me laa me wbig pquitsgzhib me lo Jesús bneeli me zha nacne sca been me. <sup>34</sup> Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guielguidz co bichele.

<sup>35</sup> Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëed luu gutle.

<sup>36</sup> Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoos luu bliladz naa.

<sup>37</sup> Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

<sup>38</sup> Zeene bdziñ zho lidz men co, tib ruid ne rac, nguiedz zëëb tsi zho roon zho no zho xquielnë mëed co. <sup>39</sup> Dzigo bzëëb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzooop win rii, nixguies ndzooop.

<sup>40</sup> Leļ rzhidznie grë miech co me, bin zho sca rëb me. Dzigo bnabey me brie zho ley grëse zho, loxaque pxoz mëed co, xniaa win ni gza

tson xpëëdsuel me zha ne nal zhits me ga bzëëbnie me len yu ne nix win. <sup>41</sup> Wbig me bzhen me nia win, rëb me lo win:

—¡Guche i na, ndzooop yeen! (Talita, cumi.)

<sup>42</sup> Zigne sca bnee me laa mëed co guche, laa win bzë. Tib mëed tsiipchop iza. Grëse miech co per nli rzee zdoo zho. <sup>43</sup> Dzigo pso me diidz lo zho choot lo gneed zhow; blozh ga bnabey me bdeed zho ncuaane dow mëed co.

## 6

*Güey Jesús ladz me*

(Mt. 13:53-58; Lc. 4:16-30)

<sup>1</sup> Ga brieë Jesús grë xpëëdsuel me, laa me bdzin Nazaret zaatne nac ladz me.

<sup>2</sup> Laa zeene gol dze ne rdziladz zho lo dziin, laa me bdzin len yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me? <sup>3</sup> Tib ngurëeyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me. <sup>4</sup> Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

<sup>5</sup> Brieelod niun me nzian milagr ga, blase zha rzacné pxobnia me guic, beenguic me. <sup>6</sup> Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

*Pxeel Jesús xpëëdsuel me tsieseed zho miech*

(Mt. 10:5-15; Lc. 9:1-6)

<sup>7</sup> Tib dze, bredz me gza tsiipchop xpëëdsuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho mendox. <sup>8</sup> Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaane gow zho, zig nac dimi, pe tib bziudgaa, güeyd zhow. <sup>9</sup> Lab zho, mine quiase ni zho; xab zho, mine nacwse zho mincose tsienie zho. <sup>10</sup> Ni rëb me lo zho:

—Guiedz ne gdzin to, zha ne gneedz zaatne cuëz to, lidz zha co golcuëz haxta gdzin dze ne gbi to guiedz co. <sup>11</sup> Laa zaatne ne ib gneedzd zho pa cuëz to, niicle nëdgaa zho yquiaadiag zho mine gnee to, dzigo gollit grë yudie co ni to, golrieegazh ga, zeena guien zho ganle lëda ga been zho.

<sup>12</sup> Dzigo laa zho brieë, laa zho zie. Güey zho, güeynee zho lo grë miech csaan zho xquielntseeb zho, gbig zho lo Dios. <sup>13</sup> Nzian zha ne nosacsi mendox, beencxoon zho mendox co; grë zha ne

rzacnë, bdëëb zho nceit guic zho, been<sub>g</sub>uiac zho zho.

*Gut Juan Bautist*

(Mt. 14:1-12; Lc. 9:7-9)

<sup>14</sup> Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac brieaban Juan Bautist lëë me ga nac Jesús, gane run me grëtaa milagr co; <sup>15</sup> nogaa zho rnee Líw, men ne biaad pteed Xtiidz Dios padzeela; zzhisgaa zho rnee, no cho stib men ne ziaad noteed Xtiidz Dios, zig biaad grë zha ne biaad padzeela.

<sup>16</sup> Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëë me ga brieaban.

<sup>17-18</sup> Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me nonguielda ga lëëque Herodí ptsieelna me; sac tsieelpaa bets me Lip nac Herodí.

<sup>19</sup> Blëënie wnaa ne nac Herodí ga Juan, rzac me tebaa zha gut me Juan; per rdeetew diidz, <sup>20</sup> sac rdzieb Herod lega pe gun me Juan, riën me tib zha ne zienal miñe nac diidzli, tib zha ne peet xtold nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgab riënd me dien zha gun me, per rdziladz me rquiaadiag me grë miñe rnee Juan.

<sup>21</sup> Laa tibtaa dze laa miñe no guic Herodí ga goc. Dze

ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo men<sub>g</sub>uiib, ni grë zha non lo zha Galilé. <sup>22-23</sup> Laa zho no mezh noyow zho, zeene bzëëb xindzooop Herodí psilo ndzooop biee ndzooop. Bdziladz Herod gon me zha biee ndzooop, grë zha ne zob lo mezh ga ne. Dzigo rëb Herod lo ndzooop, tel petaa gnab ndzooop zdeed mew; haxta brieero me rëb me:

—Ncuaa<sub>ne</sub> gacladztaa luu gnab luu, niicle zig gro<sub>l</sub> grë ncuaa<sub>ne</sub> rap naaw, znedz naaw.

<sup>24</sup> Rias ndzooop güeynabdiidz ndzooop lo xniaa ndzooop. Dzigo rëbchaa me lo ndzooop:

—Bnab lo me gnabey me tsiechug zho guic Juan gneedz zhow lo luu.

<sup>25</sup> Bdziñ ndzooop lo Herod rëb ndzooop:

—Racladz naa xoob guic Juan Bautist tib len plat, gneedz luuw lo naa niinagazh.

<sup>26</sup> Zeene bin Herod sca rëb ndzooop, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaa<sub>ne</sub> gnabtaa ndzooop. <sup>27</sup> Dzigo racse me pxeel me tib men<sub>g</sub>uiib ne tsiechug guic Juan.

<sup>28</sup> Güey men<sub>g</sub>uiib co len ladzguiib pchug zho guic Juan. Bdziñ zho, zhoobsew tib len plat bdeed zhow lo ndzooop, dzigo güey ndzooop

güeydeed ndzoopa lo xniaa ndzoop.

<sup>29</sup> Zeene bin xpëedscuel Juana, dzigo güey zho güeylis zho me ga güeyqueets zho me.

*Bguiaan Jesús gaay mil miech*

(Mt. 14:13-21; Lc. 9:10-17; Jn. 6:1-14)

<sup>30</sup> Zeene laa gza xpëedscuel Jesús bdziñ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grë xpëedscuel me. Dzigo rëb me lo zho:

<sup>31</sup> —Mazd golgotsaa guio ne tib zaatne zitlaa lo grë miech rii, zeena grieelo gdziiladz to niip.

<sup>32</sup> Dzigo bzëeb me tib len barcw grë me zho, laa zho zie. <sup>33</sup> Nzian zha ne gon zie me, beenbey zho ne mew. Dzigo ndal miech ne no grë guiedz gax co brieë, rias zho zie zho glole zho bdziñ zaatne no gdziñ me. <sup>34</sup> Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiiil yeen ne guiend xbaxtor, dzigo psilo me nzian grë ncuane pseed me zho.

<sup>35-36</sup> Gol bdze dze co, wbig xpëedscuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuane gow zho; sac gon laa

dze bdzele, ni choot miech guiend nu.

<sup>37</sup> Pquiab me rëb me lo zho: —To goldeed ncuane gow zho.

Rëbchaa zho lo me:

—¿Pe zhizhe dimi ne yquiin gziuu guietxtil ne gow grëtaa miech qui?

<sup>38</sup> Dzigo bnabdiidz me lo zho, rëb me:

—¿Bla guietxtil ziaadnie to? ¡Golwi dien!

Zeene biire zho güeyso zho, rëbchaa zho lo me:

—Loxaque gaay guietxtil ziaad, ni ziaad chop mel.

<sup>39</sup> Dzigo bnabey me bzob grë miech co, wdzeepaaw bioogse lo guizh nguia ne zëeb ga ndxie zho. Tib dzoonga tib dzoonga zho bre, <sup>40</sup> zaatne bre tib gayoo zho, zaatne bregaa grol gayoo zho.

<sup>41</sup> Dzigo bzhen me gza gaay guietxtil co, ni grop mel co, blis lo me bui me nëz gbaa, bdeed me xquizh lo Dios. Blozh ga, beengrol me guietxtil co, zigse rdeed mew lo xpëedscuel me, scase scase noguiiz zhow lo grë miech co. Scaque been me grop mel co. <sup>42</sup> Grëse miech co, dow zho haxta zaatne bieltaa zdoo zho. <sup>43-44</sup> Miech tafa, zha bguise rgaa zig gaay mil; ni zeene blozh dow zho, scase ncuane nroob biaan, biodzë tsiipchop chicuid bio grë guietxtil co, bio grë mel co.

*Rzë Jesús lo nisdoo*

(Mt. 14:22-27, 34-36; Jn. 6:16-21)

<sup>45</sup> Zeene blozh ga, bnabey Jesús xpëedscuel me

bzëeb zho len barcw, zeena zienerga zho tedquia zho stib nêz ro nis co, gdziñ zho guiedz ne lë Betsaid; laa me bii blëz ga, nozonëz me grë miech co. <sup>46</sup> Blozhse bzonëz me zho, dzigo güey me tib guic gui zob gax ga, güeyzodiidznie me Dios.

<sup>47</sup> Zig rguets liuw, laa barcw ne zie xpëedscuel me ga no lo nis co. Laa me zo ga tipse me, <sup>48</sup> ran me rlu ib gacd csëeniob zhow, sac rrie me rtsire mew. Merle guimbe liuw, tibaque zeene gon zho laa me bdziñ zaatne zie zho ga; tib lo nis co ziezë me, rac me zig nac zeene tibted me lo zho.

<sup>49</sup> Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

<sup>50</sup> Sac grëse zho ranlo zho laa me sca ziezë lo nis co. Dzigo bnee me lo zho rëb me:

—¡Gdziebde to, naa zial nu!

<sup>51</sup> Zeene laa me biep len barcw ne zie zho ga, laa me co blëz; dzigo mazdraa bzee zdoo zho. <sup>52</sup> ¡Per ib riend zho cho nac me, niicle ne gonle zho been me milagr nroob co bguiaan me miech guizhiu co!

<sup>53</sup> Zeene laa zho bdziñ stib nêz ro nis co, zaatne nac xtan zha Genesaret, dzigo laa zho pxidoo xbarcw zho ro nis ga. <sup>54</sup> Loxaque biet me len barcw laa grë miech co beenbeyle me. <sup>55</sup> Rias zho güey zho grë guiedz co, güeynie zho diidz laa me bdziñ ga. Dzigo psilo grë miech co rxob zho zhimguidz

zho lo yag, rdziñnie zho zho lo me zaatne rontaa zho no me. <sup>56</sup> Zaatne gdziñtaa me, niicle guiedz nrooba, niicle guiedz lasa, rbee grë miech co zhimguidz zho rienie zho zho zaatne nac len guiedz; ga rnab zho lo me siguiel me maase ni lar ne mbixse me xen grë men rzacnë co. Ni grëse zha ne rzhen xab me, riac zho.

## 7

*Ncuuane runctal xtol miech (Mt. 15:1-20)*

<sup>1</sup> Tib dze, bdziñ bla zha farisé, ni zla maistr ley ne ziaad nêz Jerusalén, lo Jesús.

<sup>2</sup> Dzigo gon zho blalaa zha ne nac xpëedscuel Jesús, zeene laa zho row rguibd zho nia zho zigne nacpaa grë zhiwseed xmengol zho.

<sup>3</sup> (Nac zha farisé, ni grësegaa zha Israel telne tsard nia zho zigne nac xcostumbr xmengol zho, ible rowd zho; sac zienaldox zho mine nac costumbr. <sup>4</sup> Zeene rbire zho lo lgui, ib no mod ne riar nia zho dzigoraa rzob zho row zho. Nzian grë wseed co psan xmengol zho zienal zho, zig nac zha riar grë tas, grë cant, grë xtsiin rotie zho mine niaa guib, ni grë lo bangw ne rzob zho row zho.)

<sup>5</sup> Dzigo rëb zho lo Jesús:

—¿Pe nacne zienald xpëedscuel luu mine blu xmengol ne? ¿Pe nacne squize nia beed zho i row zho?

<sup>6</sup> Pquiab Jesús rëb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiaa me:

Grè miech rii, rquiaalose zho runnon zho naa, rond zho diidz gun zho mine rnabey naa.

7 Paat rquiind riaad zho riaadgan zho naa;

sac niapse guicle zho riab grè wseed ne quialu zho lo miech.

8 Sac tel to gon, nosaan to grè mine rnabey Dios, lel grè xcostumbr miech ziana to.

9 Xcostumbr to nac mine mazdraa rioxco to, laa mine rnabey Dios quiasan to tib lad. 10 Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib mine rnee: “Zha ne quie pxoz, quiegaa xniaa, ib none guet zho.”

11 Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me. 12 Tole rdeete diidz ga gun zho xyudar pxoz zho, xyudar xniaa zho. 13 Tib ladle gon rsan to Xley Dios ga sca run to, lèepaaze grè costumbr ne biaannie to, ni quiasangaa to lo zha ne ziaadquia, min co noxcoraa to. Ni nzianraa grè falt ne squi quiaayun to.

14 Dzigo bnee me lo grèraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca. 15-16 Golgacnan ganle: Grè ncuaane rdzin zdoo miech, led mincod runctal xtol zho; sinque grè

ncuaane ntseeb ne rza zdoo zho, min co nac mine runctal xtol zho.

17 Laa zeene laa me bdzin ro yu grè xpèédscuel me, dzigo bnabdiidz zho lo me dien zha nac diidz ne sca rëb me lo grè miech co. 18 Rëbchaa me lo zho:

—¿Pe niicle to riendaquew dzigo lëe? ¿Pe riende to, grè ncuaane row miech, led mincod runctal xtol zho? 19 Sac grè ncuaane row zho rdzinda len zdoomban zho, zhaa zaatne rdzina. Grè guielwagw, len bziuud zdoose zho, len zhitriipse zho rieteda, rlozh ga rriiegaw xcuerp zho.

Ga blu me lo zho ganle, grëse ncuaane nac guielwagw lëda runctal xtol miech. 20 Ni rëb me lo zho:

—Mine rza zdoomban miech, min co nac mine runctal xtol zho. 21 Sac zdoomban zho rza grè ncuaane ntseeb ne run zho, zig nac:

zeene rio zho grè zhgab yozh, zeene run zho grè guielyozh, zeene rban zho,

zeene rut zho samiech zho, 22 zeene rionie zho zha ne nacd tsieeld zho,

zeene rzoobladz zho ncuaane rap stib miech,

zeene run zho grè guielntseeb, zeene rquidie zho,

zeene rien zho run zho grè ncuaane ndzinlid,

zeene në rac zdoo zho ran zho cho zha ne stibnoded,

zeene rzhixcuaa zho didzguizh,

zeene racniats zho,

zeene run zho grèraa ncuaane paat rquiind.



23 Grëse ncuaane ntseeb rii, zdoomban miech rzaw, ni lëew nac mine runctal xtol zho.

*Biac xpëed tib wnaa zit*  
(Mt. 15:21-28)

24 Ga brieë Jesús, laa me zie nëz Tiro. Zeene bdziñ me nëz co ga bdziel tib yu ne blëz me, gocladz me choot niacnand ne laa me no ga; per brieeloda, znuse bien diidza.

25-26 Zeene bin tib wnaa Sirofenis laa Jesús bdziñ ga, dzigo güey me, sac noguitnie mendox tib xpëed me. Zigne bdziñ me pquitsgzhib me lo Jesús, rnab me tsieguncxoon Jesús mendox co. Tib wnaa zit nac wnaa co; 27 dzigo rëbchaa Jesús lo me:

—Blëz niip dien. None glo mëed gow, nonguielda cuee ne guiet nia mëed gdeed new lo mëcw.

28 Pquiab wnaa co, rëb me:

—Nli scaw, zigne rnee luu i; per niicle mëcwa led rio ma zhan mezh rtop ma grë mine rrieengaa nia mëed.

29 Dzigo rëbchaa Jesús:

—iSquiw nagon! Lëëgazha i rnee luu. Peet tsieniedraa guic luu naa sca; bzë, laa mendox ne nosacsi xpëed luu bichele.

30 Laa wnaa co zey. Zeene bdziñ me lidz me, gon me ine laa xpëed me nixse lo lon, per laa mendox co psaanle win.

*Biac tib men ne rcuaat*

31 Ga brieë Jesús, güeyted me nëz Sidón. Sidón brieë me bdziñ me ro Nisdoo Galilé stib, zaatne nac xtan zha Decápolis. 32 Ga bdziñnie zho tib mgui lo me, rcuaat mgui

ni nca rnee mgui; bnaab zho lo me cxobnia me guic mgui gunguiac me mgui.

33 Dzigo blee me mgui lad grë miech ne ndxie ga. Zitlaa güeynie me mgui, ga psëeb me mzhugnia me gropse len diag mgui ni bdëeb me zhindzuc me lo ludz mgui. 34 Blozh ga, blis lo me bui me nëz gbaa, bneeladz zdo me, dzigo rëb me:

—iBzhial! (iEfata!)

35 Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal. 36 Dzigo pso Jesús diidz lo grë miech co, choot lo gzodiidzd zho zha biac mgui co.

Per laa ne rso me diidz lo zho, dzigole nëzrii, nëzrec rzodiidz zhow; 37 sac rzeedox zdo zho gon zho mine been me ga.

—iNcuaane gzee zdo ne i been men qui! —rnee zho—. Zha haxta nguaat, haxta ngop, runguiac me.

## 8

*Bguiaan Jesús tap mil miech*  
(Mt. 15:32-39)

1 Len dze co, miech guizhiu ne biire pcaalsa lo Jesús stib. Zeene goc tson ngbidza, guiendraa ncuaane gow zho. Dzigo bredz me xpëedscuel me, rëb me lo zho:

2 —Rquia zdo naa grë miech rii, tsonle ngbidz ga rac blanso zho nu, ni na quianiedraa zho ncuaane gow zho. 3 Telne squise zho gzonëz naa zho, glëbd zho,

scow zho nēz, sac no zho zit brieē zho ziaad zho nu.

<sup>4</sup> Pquiab zho rēb zho:

—¿Per pe yguiaan ne zho?

¿Pa guioxi ne guietxtil ne gow grētaa miech qui dan rii, naca zaatne guieñd miech?

<sup>5</sup> Dzigo bnabdiidz me lo zho, rēb me:

—¿Bla guietxtil ziaadnie to i?

—Gadzaquew —rēb zho.

<sup>6</sup> Dzigo bnabey me grēse miech co bzob zho liu. Blozh ga bzheñ me gza guietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpēēdscuel me rguiz zhow lo grē miech co. <sup>7</sup> Zienie zho zla meļ las; bzheñ me gza meļ co bdeed me xquizh lo Dios, blozh ga bnabeyaque me zho bdiiz zho ma.

<sup>8-9</sup> Grēse miech co, dow zho haxta zaatne bieltāa zho dzigo laa me bzonēz zho. Rгаа zho maase tap mil, ni zeēne blozh dow zho bii bdop gadz chicuid miñe biaan.

<sup>10</sup> Blozh ga, laa me bzēēb leñ barcw grē xpēēdscuel me, laa zho zie nēz xtan zha Dalmanut.

*Racladz zha farisé gan zho milagr*

(Mt. 16:1-12; Lc. 12:54-56)

<sup>11</sup> Blalaa zha farisé ne no nēz co, zeēne bin zho laa me bdziñ ladz zho, güey zho rzadraa ncuaane rlisqui zho lo me. Rnab zho glu me cho nac me, rēb zho lo me:

—Racladz no dzianlo no gun luu tib milagr, telne nli gbaa ziaad luu.

<sup>12</sup> Zeēne gon me sca rac zho, bio me guieñē; dzigo haxta bneeladz zdoo me, rēb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

<sup>13</sup> Blozhse sca rēb me lo zho, ndxieque zho ga laa me bzēēb leñ barcw laa me zie stib nēz ro nis co.

<sup>14</sup> Zeēne brieē zho ga, zoladzd xpēēdscuel me ney zho ncuaane niow zho, lēē gdib tib guietxtil zienie zho leñ barcw. <sup>15</sup> Laa zho zie, tibaque zeēne rēb me lo zho:

—Golguieñ gon, napaa noyac-wet to lo zhincobi zha farisé, lo zhincobigaa rey Herod.

<sup>16</sup> Zeēne bin zho sca rēb me, bza zdoo zho rnee zho:

—Ne gon me nagon ziaad-nied ne guietxtil gane squi rnee me.

<sup>17</sup> Bien me sca rnee zho, dzigo rēbchaa me lo zho:

—¿Pe nacne rnee to ziaad-niede to guietxtil? ¿Riende to lēē zha rne naa? Ndip nac zdoo to gane riende tow.

<sup>18</sup> ¿Pa rquiin lo to, pa rquiin diag to ne laaw zob? <sup>19</sup> ¿Pe rsoladzde to zeēne gaayaque guietxtil ni bgaaw bguian naa gaay mil miech? ¿Bla chicuid biodzē miñe biaan hor co?

Pquiab zho rēb zho:

—Tsiipchopa.

<sup>20</sup> Dzigo rēbchaa me:

—Zeēne waa gadzaque guietxtil co, ni bguian naa tap mil miech, ¿bla chicuida biaan?

—Gadz chicuida —rēb zho.

21 Dzigo rëb me lo zho:

—¿Pe niicle nana rien<sub>da</sub>que to pe rne naa?

*Biac tib me<sub>n</sub> ne rcow lo*

22 Bdzi<sub>n</sub> Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui. 23 Dzigo bzhe<sub>n</sub> me nia mgui güeynie me mgui zaatne nacle ro guiedz co. Ga bdëëb me zhinzuc me len bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

24 Zeene laa mgui bui, rëbchaa mgui:

—Ranle naa niina nagon laa miech ziezë; per masaque ran naa zho zig rlu grë yag.

25 Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuaa<sub>ne</sub> ran mgui, niicle zitraaw niini ran mguiw.

26 Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidzd mguiw lad guiedz.

*Bnee Pedr cho nac Jesús*

*(Mt. 16:13-20; Lc. 9:18-21)*

27 Blozhse ga, laa Jesús brie<sub>e</sub> ga grë xpëedscuel me laa zho zie nëz Cesarea de Filipo, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien ron to rnee miech nac naa?

28 Pquiab zho, rëb zho:

—No zho rnee Juan Bautista, no zho rnee Lív, men ne biadteed xtiidz Dios padzeela; nogaa zho rnee no cho stib me<sub>n</sub> ne ziadteed xtiidz Diosa.

29 Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¿Luu nac Me<sub>n</sub> ne zëëble diidz ga cxeel Dios guiaad lo guidzliu!

30 Dzigo pso me diidz lo zho choot lo gneed zhow.

*Bzeet Jesús zha gu<sub>n</sub> miech me*

*(Mt. 16:21-28; Lc. 9:22-27)*

31 Bded ga, psilo Jesús bzeet me lo grë xpëedscuel me zha csacsi miech me. Rëb me nroob grë ncuaa<sub>ne</sub> cteed zho me; grë zha non lo men<sub>g</sub>uiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson<sub>n</sub> ngbidz gut me laa me grieeban. 32 Grëse mi<sub>n</sub>e ted me, laaw nozodiidz me lo zho.

Go<sub>n</sub> Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet. 33 Zeene go<sub>n</sub> me zha rzë xtiidz Pedr, zoque Pedr ga biecw me bui me lo grëraa xpëedscuel me, goctox me rëb me:

—¿Biche lo naa nu men<sub>do</sub>x! Zienied guic luu mi<sub>n</sub>e rnabey Dios, sinque laa guic luu zienie mi<sub>n</sub>e racladz luu.

34 Dzigo blunia me lo grë miech ne ndxie ga, yquiaa<sub>diag</sub> zho mi<sub>n</sub>e gnee me; rëb me:

—Zha ne racladz sēeb xnēz naa, none cueeladz zho zho, none lēb zho guiaadna<sub>l</sub> zho mi<sub>n</sub>e rnabey naa, niicle tel<sub>l</sub> mi<sub>n</sub> co yquiaaqui csacsi miech zho. Nodne yquia zdoo zho xquiel<sub>l</sub>m<sub>a</sub>n zho. <sup>35</sup> Sac zha ne yquia zdoo xquiel<sub>l</sub>m<sub>a</sub>n, lel<sub>l</sub> znu nitlo zho; sa<sub>n</sub>gue zha ne sca cueeladz xquiel<sub>l</sub>m<sub>a</sub>n porne rleynie zho naa, porne rleynie zho grē Diidz Ndzon rii, zha co ygaa tib guiel<sub>l</sub>m<sub>a</sub>n ne mazdraa ndzon. <sup>36</sup> Nana, tel<sub>l</sub> zha ne gu<sub>n</sub>lo grēse ncuaa<sub>n</sub>e no lo guidzliu rii. ¿Pa yquiin grē ncuaa<sub>n</sub> co lo zho, tel<sub>l</sub> lēew yquiaaqui laa zho guey gabil<sub>l</sub>? <sup>37</sup> ¿Niacxe zrieelo gdziib zho dimi co laa zho len<sub>l</sub> gabil<sub>l</sub>? <sup>38</sup> Naa ne nac naa Men<sub>l</sub> ne pxeel<sub>l</sub> Dios zial<sub>l</sub> naa lo guidzliu, zha ne ctoladz guiab zho lo grē miech ngoopdol<sub>l</sub> rii laa zho no xnēz naa, o ctoladzniegaa zho xtidz naa, scaque naa stoladznie naa zho gal<sub>l</sub> dze ne laa naa guial<sub>l</sub> stib. Dze ne guial<sub>l</sub>nie naa grē anjl, ni glu naa grē guiel<sub>l</sub>ndzon ne rap Dios.

## 9

<sup>1</sup> Ni rēb me lo grē miech co:

—Gneli naa lo to gan<sub>l</sub>e, nzian grē zha ne ndxie nu niina ib tedsod gardaque guet zho, bii zan<sub>l</sub> zho gan<sub>l</sub>e zeene laa Dios glu ne nli men<sub>l</sub> rnabey nac me.

*Bdzēēlo Jesús*

(Mt. 17:1-13; Lc. 9:28-36)

<sup>2</sup> Goca xoop ngbidz, briece Jesús gza me Pedr, Jacob ni

Juan, güey zho bzoquia zho tib guic gui glaa.

Bdzi<sub>n</sub> zho glaa guic gui co, tibaque zeene gon<sub>l</sub> zho laa me bdzēēlo. <sup>3</sup> Masaque rquiabni xab me, nquitsbie rnaw; ni tib miech grielod scataa mbe quiib lar. <sup>4</sup> Gon<sub>l</sub>lo zho zeene laa Lí ni Moisés (grop zha ne biadteed xtiidz Dios glo) bdzi<sub>n</sub>aque, laa zho nozodiidznie me. <sup>5</sup> Dzigo rēbchaa Pedr lo me:

—Maestro, ¡ne nligaa wena guiaan<sub>l</sub> ne nu! Laa no gzaa tson<sub>l</sub> yu yag xiid win nu tso to: tiba tso luu, tiba tso Moisés, stiba tso Lí.

<sup>6</sup> Rdzieb Pedr gza Pedr schop zha co, lo dzeb co niicle riendaque Pedr pe rnee Pedr.

<sup>7</sup> Tibaque znuse bdop tib xcow pquia ngali zaatne zo zho ga; dzigo bin zho zēeb tib tsi men<sub>l</sub> co lo xcow co, rnee me:

—Lēē xpēed naa i gon<sub>l</sub>, rleynie naa me. Gol<sub>l</sub>gon mi<sub>n</sub>e rnee me.

<sup>8</sup> Lēēléd biecw lo zho rwi zho, choot gon<sub>l</sub>draa zho, Jesússe zo lo zho ga.

<sup>9</sup> Blozhse ga, laa zho wbique ga. Laa zho ziezēeb dan noyet zho cho gui co, zeene rēb me lo zho:

—Mi<sub>n</sub>e gon<sub>l</sub> to gon<sub>l</sub>, choot lo gneede tow. Gol<sub>l</sub>cuēz haxta gal<sub>l</sub> dze ne grieeban Men<sub>l</sub> ne pxeel<sub>l</sub> Dios.

<sup>10</sup> Nacne choot lo bneed zhow, per psilo zho gza tson<sub>l</sub> zho rnabdiidzlsa zho, zha mod grieeban tib zha ne gutle.

<sup>11</sup> Dzigo bnabdiidz zho lo me, rēb zho:

—¿Bay zha nacne rnee maistr ley, glo Lí no guiaad stib, dzigoraa guiaad Men ne zëëble diidz ga cxeel Dios?

12-13 Pquiab me rëb me lo zho:

—Nliw, ible nacle diidz ne glo Lí guiadseed miech gon zho xtiidz Dios, per laa me biaadle; ni zigne bzeetse grë zha ne biadteed xtiidz Dios ted me, scase been miech me. Scaque Men ne cxeel Dios ga, rnee lo Xtiidz Dios nroob csacsi miech me, ible gandzed zho me.

*Biac tib niib ngop*

(Mt. 17:14-21; Lc. 9:37-43)

14 Zeene bdziñ Jesús zaatne biaan grëraa xpëëdsuel me ga, gza me Pedr Jacob ni Juan; gon zho miech guizhiu ne ndxie lo zho; blalaa zha ne nac maistr ley zo lo zho ga, nodildiidznie zho. 15 Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me. 16 Dzigo bnaabdiidz me rëb me:

—¿Pe nadien squitaa nodildiidz to?

17 Lad grë miech co pquiab tib zho, rëb:

—Maestro, lo luu zialnie naa tib xpëëd naa gunguiac luu win; ib gacd gnee win sac noguitnie mendox win. 18 Tel pataa zo win, zeene laa ma rzëëb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbdraa win së win. Blansonie naa win nu, dzigo bnaab naa lo xpëëdsuel luu

guncxoon zho mendox co, per brieelod zho.

19 Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¡Ncuane cxeewdraa naa lo to squi nac to! ¡Goltënie mëédwin qui nu!

20 Güey zho güeynie zho mëédwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win. 21 Dzigo bnaabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win. 22 Pe zhidaa vuelte zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpëëd naa, ¡pquia zdoo naa, been tib guielnzaac beenguiac win!

23 Rëbchaa Jesús lo me:

—¿Zha rnee luu “telne zrieelow”? ¿Zha ne dib zdoo rnalo Dios, grëse ncuane racladz zho, zaca!

24 Lëëlëd pquiab pxoz mëéd co, rëb me:

—Rnalo naa Dios, per bzhiguiel been xyudar naa, ¡dib zdoo naa gnalo naa me!

25 Zeene gon Jesús laa grë miech co rbigberaa, dzigo goctox me lo mendox ne noguitnie mëéd co, rëb me:

—Mendox, luu gon psan ngop mëéd rii, luu psan nguaat win. ¡Niinagazh psaan

win, ib gbiiredraa luu ygaal luu win!

<sup>26</sup> Horco biire beencxidz ma mëed co stib, masaque ropt-siedan ma laa psaan win, nix-taque win ga, zootle gutle win. Nzian grë miech co, tibaque nan zho gutle win.

<sup>27</sup> Laa zeene bzhen Jesús nia win, blis me win ga, laa win bzoli.

<sup>28</sup> Zeene bdziñ Jesús len yu ne rbëz me grë xpëedscuel me, bnaabdiidz zho lo me rëb zho:

—¿Bay pe nacne brieelod no ndziunxoon no menox co?

<sup>29</sup> Dzigo rëbcha me lo zho:

—Grë menox ne sca nac, rquiin dib zdoo ne gnab ne lo Dios dzigo zrieelo gunxoon ne ma.

*Bzeet Jesús laa miech csacsi me*

(Mt. 17:22-23; Lc. 9:43-45)

<sup>30-31</sup> Brie Jesús ga grë xpëedscuel me, laa zho wbiire nëz xtan Galilé stib. Racladzd me cho gacnan pa lo no me; sac len dze co nzian grë ncuane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieaban.

<sup>32</sup> Per ib riend zho pe nacne sca rnee me, niicle gnabdiidzga zho rdzieb zho gnabdiidz zhow lo me.

*¿Cho nonraa?*

(Mt. 18:1-5; Lc. 9:46-50)

<sup>33</sup> Bdziñ zho guiedz ne lë Capernaum; grëse zho laa zho ndxie len yu ne blëz zho,

tibaque bnaabdiidz Jesús lo zho, rëb me:

—Golnë dien, ¿pe scataa nodildiidz to zeene ziaad ne nëz?

<sup>34</sup> Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

<sup>35</sup> Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaan win zho gac zho zig tib nguñdziin lo samiech zho.

<sup>36</sup> Dzigo bzo me tib mëedbgui win glowtaa lo zho; blozh ga bdeedz me win ni rëb me lo zho:

<sup>37</sup> —Zha ne ngab xnëz naa, ni gleynie zho tib mëedwin zig mëedwin rii, gun naa cuent naa ga rleynie zho; ni zha ne sca rleynie naa, yele men ne pxeel naa ga rleynie zho.

<sup>38</sup> Blozh ga, rëbcha Juan lo me:

—Maestro, bdziñ no gon bzeet tib zha co lë luu zeene benxoon zho menox; nacne nli blisqui now lo zho, sac gon, led yed zho nacgrë ne.

<sup>39</sup> Dzigo pquiab me rëb me lo zho:

—¿Gunscade to! Sac gon zha ne sca rzeet lë naa zeene run zho milagr, niacxe lëëque zha glëe lo naa. <sup>40</sup> Zha ne nacie ne, glëed zho lo ne.

<sup>41</sup> 'Golgacnan sca ganle, grëse zha ne gdeed maase tib zhigaque nis guie zha ne ngab lo naa, ib tedsod stsire Dios mine been zho ga.

<sup>42</sup> Sañgue zha ne yguib gunctal zho xtol zho ne nac zho zig tib mëedlas yeen; mazd lëetaa

mine ted zha co sobdoo tib  
 quie molin zhobxtil yquaw  
 yan zho tsieron zho zho  
 nisdoos.

*Choot gdeete diidz guiab lo  
 dol*

(Mt. 18:6-9; Lc. 17:1-2)

<sup>43-44</sup> 'Zha ne rien nia  
 zho nac mine rquiaqui  
 runctal zho xtol zho, mazd  
 cchuggazh zho nia co zho.  
 Peet nacd maase tibaque  
 nia zho zob totsaque yгаа  
 zho guielmban ndzon ne  
 gdziṅd dze lozh, lēdle zob  
 gropa ni laa zho guey gabil,  
 lo beldox ne gdziṅd dze  
 guiuu. <sup>45-46</sup> Telne rienгаа zho  
 ni zho nac mine rquiaqui  
 runctal zho xtol zho, mazd  
 cchuggazh zho ni co zho.  
 Peet nacd maase tibaque ni  
 zho zob totsaque yгаа zho  
 guielmban ndzon ne gdziṅd  
 dze lozh, lēdle zob gropa ni  
 laa zho guey gabil, lo beldox  
 ne gdziṅd dze guiuu. <sup>47</sup> Tel tib  
 logaa zho nac mine rquiaqui  
 runctal zho xtol zho, mazd  
 cueegazh zho bziaalo co zho.  
 Peet nacd maase tibaque  
 bziaalo zho zob totsaque  
 yгаа zho guielmban ndzon co,  
 lēdle zob grop bziaalo zho ni  
 laa zho guey gabil. <sup>48</sup> Zaatne  
 nac gabil, ib gdziṅd dze ne  
 guiuu lo bel co; grē mziog ne  
 ndxie ga, gdziṅd dze ne nitlo  
 ma. <sup>49</sup> Grēse zha ne gdziṅ ga,  
 masaque cuib gui lad zho zig  
 rbib zed lad bēel.

<sup>50</sup> 'Zig nac zed, rquiindoxa  
 zeene nzhiw, per zeene  
 nzhida, ¿pa dien yquiina?  
 Scaqueгаа to nagon golgac  
 zig zed ne nzhi, zeena

yquiin to lo guidzliu rii;  
 niowse golbannie samiech to,  
 glēelsade to.

## 10

*Zha ne rsēbtsieel*

(Mt. 19:1-12; Lc. 16:18)

<sup>1</sup> Brieē Jesús Capernaum  
 güeyted me grē guiedz ne  
 ndxie nēz xtan zha Judé,  
 grē guiedz ne ndxie nēz dan  
 ro guiubee Jordán. Miech  
 guizhiu ne rcaalsa lo me,  
 dzigo rsilo me rseed me zho  
 zigne runtaque me.

<sup>2</sup> Tib vuelt bdzin bla zha  
 farisé gocladz zho niungüet  
 zho me, par dien pe nxind me  
 tib diidz; bnabdiidz zho rēb  
 zho:

—Maestro, mgui ne racladz  
 csēbtsieel, ¿pe gnē luu pe  
 zrieelo csēbtsieel zho?

<sup>3</sup> Pquiab me rēb me lo zho:

—¿Zha zho psan Moisés di-  
 idz lo to?

<sup>4</sup> Pquiab zho rēb zho:

—Tel Moisésa, bdeed me di-  
 idz csēbtsieel zha ne racladz  
 csēbtsieel, lēeraasi none yquia  
 tib guits gdeed zho lo wnaa  
 zaatne raquiet ne laa zho  
 psaan wnaa.

<sup>5</sup> Dzigo rēbchaa me lo zho:

—Ne squicxe waa miech  
 nad nac to ib ronde to di-  
 idz, miṅ co nache biaan ley  
 co. <sup>6</sup> Per ib nodne csēbtsieel  
 miech; sac gon, zeene psan  
 Dios grētaa ncuane no, tib  
 nēz miech bzaa me: tib mgui  
 ni tib wnaa. <sup>7-8</sup> Gacxe waa,  
 mgui ne rtsieelnia ib none  
 grieezhaa zho lo pxoz zho, lo  
 xniaa zho, par gbannie zho  
 wnaa ne nac tsieel zho; laa

zho gactipse grop zho. Nac-draa zho chop miech, sinque laa zho rac tibaque. <sup>9</sup> Dios nac men ne psan ycatsieel miech, cho dzigo nac miech par quiits zho mine rnabey me.

<sup>10</sup> Laa zeene bdzin me len yu ne rbëz zho, dzigo bnabdiidzaque xpëedscuel me min co lo me stib. <sup>11</sup> Dzigo rëbchaa me lo zho:

—Mgui ne rsëbtsieel ni rbannie zho stib wnaa, no-guitnie zho wnaa ne gocpaa tsieel zho ga, ni dol ga run zho. <sup>12</sup> Niicle wnaagaaw, wnaa ne rsëbtsieel ni rbannie zho stib mgui, lëëque dolaque ga run zho.

*Beenlay Jesús mëédlas*

*(Mt. 19:13-15; Lc. 18:15-17)*

<sup>13</sup> Tib vuelt nzian men ne bdzin bdzinne zho xpëédlas zho lo Jesús, par cxobnia me guic win gunlay me win. Grë zha ne nac xpëédscuel me, lel psilo zho ndox zho lo grë zha ne bdzinne grë mëédlas co.

<sup>14-15</sup> Zeene gon me sca quiayun zho, wbinladz guic me, dzigo rëb me lo zho:

—Ctsirede to grë mëédlas yeen qui, golsaan guiaad win lo naa. Sac gon grë mëédlas yeen, ni zha ne nac zigne nac win, zha co nac zha ne sëëb ygab lo Dios.

<sup>16</sup> Blozhse sca bnee me, dzigo psilo me bdeedz grë mëédlas co, ni pxobnia me guic win beenlay me win.

*Bzodiidznie tib zha ricw Jesús*

*(Mt. 19:16-30; Lc. 18:18-30)*

<sup>17</sup> Laa Jesús nole nëz tsie me stib guiedz, zeene rias tib niib nguieg bdzin pquiitsgzhib lo me, rëb niib lo me:

—Nan naa luu nac tib men ne noseed miech, ni tib men wen nac luu; ÷bnë dien pe nac mine gun naa zeena ygaa naa guiëmban ndzon ne gdzindraa dze lozh?

<sup>18</sup> Rëbchaa Jesús lo niib:

—Rnee luu lëë tib men wen nac naa. ÿNligaaw, Diosse nac men wen! <sup>19</sup> Nanle luu ganle zha nac Xley Dios, rneew:

Gute luu samiech luu, telne nole tsieel luu, tsonied luu zha ne led tsieeld luu,

cuand luu samiech luu, yquiadiidzguizhd luu samiech luu, yquidieed luu samiech luu, gon pxoz luu, gon xniaa luu; bin mine rnabey me luu.

<sup>20</sup> Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

<sup>21</sup> Dze rwi Jesús lo niib, rlyenie me niib.

—Stibaque mine rquiin gun luu —rëb me—, güey, güeyto grëse ncuaane quianie luu, dzigo bdiiz dimi co lo grë zha mban ne guiend pe yquiin; sca nroobraa guiëlnzaac ne ygaa luu gbaa. Lozh ga, bleeladz xquiëmban luu dënal zhits naa.

<sup>22</sup> Zeene bin niib co sca rëb Jesús, biab guiëlnë niib, mbanse rac niib laa niib zey;



sac ne nligaa nroob ncuaane quianie niib.

<sup>23</sup> Dze rwi me gon me laa zha nguieg co zey, dzigo rëb me lo xpëedscuel me:

—iGrë zha ne squi rapchen, rzacxuu zho par sëëb zho xnëz Dios gnabey me zho!

<sup>24</sup> Zeene bin zho sca rëb me, rzee zdoo zho. Dzigo biire me bnee me rëb me lo zho:

—Xin, jne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho! <sup>25</sup> Mazd znuse rded tib camell guieer guzh, lëdle sëëb tib zha ricw xnëz Dios.

<sup>26</sup> Zeene bin zho sca rëb me, mazdraa bzee zdoo zho, rnabdiidzlsa zho rnee zho:

—Bay, çchose dzigo nac zha ne zrieelo sëëb xnëz Dios?

<sup>27</sup> Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Sangue me, nan me no zho; sac tsod ncuaane grieelod gun me.

<sup>28</sup> Dzigo rëb Pedr lo me:

—Tel no, grëse ncuaane rdziaap no laa no psana, laa no ziaadnal zhits luu.

<sup>29</sup> Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëed zho, liun zho, porne riladz zho naa ni riladz zho Xtidz Ndzon Dios; <sup>30</sup> nli nroob guielnë gan zho, per gneli naa lo to ganle: grëse ncuaane sca psan zho ga, lo guielmban riique laa zho gbiire gana stib tib gayoogaw tib tiba; ni ib

tedsod zgaa zho tib guielmban ndzon ne gdzindraa dze lozh.

<sup>31</sup> 'Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

*Biire bzeet Jesús laa miech csacsi me*

(Mt. 20:17-28; Lc. 18:31-34)

<sup>32</sup> Brieë Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëedscuel mew, rzee zdoo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëedscuel me ga, psilo me bzeet me grëse tel zha zi-aadyob ted me, rëb me lo zho:

<sup>33</sup> —Bii zan to ganle, naa ne nac naa Men ne pxeel Dios, niina ne laa ne gdzin Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdreaa zha Israel. <sup>34</sup> Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieëban.

<sup>35</sup> Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

<sup>36</sup> Dzigo rëb me:

—çPe favor ne racladz to gun naa lo to?

<sup>37</sup> Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nēz derech stib no nēz revés.

<sup>38</sup> Pquiab Jesús, rēb me lo zho:

—iNi to gon riend pe rnab to! ¿Pe zlēb to gan to grē guielnē ne gan naa, pe zlēb to ted to grē miñe teed naa?

<sup>39</sup> Rēbchaa zho:

—iZlēb no!

Dzigo rēbchaa me lo zho:

—Nli zan to guielnē ne gan naa, ni zded to miñe teed naa; <sup>40</sup> per ne gnedz naa diidz sob to cue naa nēz derech o nēz revésgaa, led naad raguial miñ co; laa lugar co biaanle par zha ne nole diidz ygaaw.

<sup>41</sup> Grēraa zha ne nac xpēēdsuel me, zha ne nacgza Jacob ga grop Juan, zeene bin zho zha rzē xtiidz Jacob grop Juan blēē zho lo zho. <sup>42</sup> Dzigo bredz Jesús zho grēse zho, rēb me lo zho:

—Ran to ganle zha run grē zha ne rnabey grē guiedz ne ndxie lo guidzliu, ni grē zha ne nac zha non, masaque rnabey zho samiech zho zigne racladztaa zho. <sup>43</sup> Sañgue to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to. <sup>44</sup> Scaquegaa, zha ne racladz gnabey lo to, none glo cseed zho gun zho miñe gnabey to zho.

<sup>45</sup> Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial

par gac naa tib ngundziin lo zho, ni gded naa xquielmban naa zeena laa zho lo grētaa ncuane ngadoo zho. Ni nanpaa naa miech guizhiu ne laa.

*Biac tib men lē Bartimé*

(Mt. 20:29-34; Lc. 18:35-43)

<sup>46</sup> Sca no grē miech guizhiu co nēz, laa zho bdziñ guiedz Jericó. Laa zeene laa grē miech taf co zieriee ro guiedz co, laa tib mgui ciegw lē Bartimé zob ga rtop gon (xingan tib men lē Timew). <sup>47</sup> Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—iJesús, men xtii rey David, pquia zdoo naa!

<sup>48</sup> Nzian grē miech co ndox lo me nan zho guioog ro me, per dzigole mazdraa nguiedz roptsie me, rnee me:

—iJesús, pquia zdoo naa!

<sup>49</sup> Dzigo pcuēēzni Jesús, bnabey Jesús güeytsedz zho me. Bdziñ zho lo me, rēb zho:

—iLigier guso i! Dē ganle laa me rbedz luu.

<sup>50</sup> Zeene bin mew, haxta squi bron me lar ne mbix me, guso me ga laa me bdziñ lo Jesús. <sup>51</sup> Dzigo rēbchaa Jesús lo me:

—Bnē nadien, ¿pe racladz luu gun naa?

Pquiab me rēb me:

—Maestro, racladz naa guiac lo naa.

<sup>52</sup> Dzigo rēbchaa Jesús:

—iNiinagazh laa lo luu gan! Laa luu biac, sacne dib zdoo luu bnalo luu naa. Ligier na bzē.

Horcogazha laa lo men co psilo bui, laa me zienal zhits Jesús.

## 11

*Bdzin Jesús Jerusalén*

(Mt. 21:1-11, 18-19;  
Lc. 19:28-40; Jn. 12:12-19)

<sup>1</sup> Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nöz dan squi riaan Gui Oliv, zeene bredz Jesús chop xpëëdsuel me <sup>2</sup> rëb me lo zho:

—Goltsie guiedz win ne ndxie danse lo ne i. Zigne sëëb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltënie ma nu. <sup>3</sup> Tel cho gnabdiidz pe nacne noxadz to ma, dzigo golguiab: men ne rnabey ne men co rquiin ma, na zigne lozh xtsiin ma guiaadsan no ma.

<sup>4</sup> Laa zho zie, nligaaw laa zho güeydziel burr co quiadoo ma tib ro nöz, gax tib ro yu.

<sup>5</sup> Blalaa zha ne zo ga, zeene gon zho laa zho noxadz ma, rëbcha zho:

—iPe gun to burr qui dzigo na, ne noxadz to ma?

<sup>6</sup> Dzigo pquiab zho zigne rëbse Jesús lo zho ga, nacne bdeed men co diidz laa zho zienie ma.

<sup>7</sup> Bdzinnie zho ma lo Jesús lëëque lar ne rbix zho pxob zho lad ma, bzobga me ma.

<sup>8</sup> Nzian grë miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grë pe yag rdziin zho zaatne rded me. <sup>9</sup> Grëse zho, niicle zha ne

ner lo mew, niicle zha ne nal zhits mew, rley zho nguiedz roptsie zho, rnee zho:

—iZha ndzontaa men qui pxeel Dios lo ne! <sup>10</sup> iZha wentaa ziaad me gac me zhirey ne! iMe gnabey zigne bnabey pxozgol ne rey David! iZha ndzontaa Dios ne zob gbaa!

Sca nguiedz roptsie zho rleynie zho me, laa me bdziñ Jerusalén.

<sup>11</sup> Bdziñ me Jerusalén, güey me güeyso me len yadoo. Blozhse bui me dipse len yadoo, laa me brieque ga laa me zie nöz Betain grë xpëëdsuel me, sac bdzele dzew.

<sup>12</sup> Biini liu, loxaque zierie zho Betain laa me psilo rcaabedz. <sup>13</sup> Zitlaa ziaad me gon me tib zhan yag guigw, nxii nac low zëëb zhiblaga; dzigo zie me zieso me dien pe gdziel tib guigw low gow me. Bdziñ me zaatne zoba, ni tib guigw guiend low loxaque zhiblagsew scataa zëëb, sac gardpaa gdziñ mëë ne rquia guigw. <sup>14</sup> Dzigo rëb me lo yag guigw co:

—iSquitaa nagon guiaan luu! iGdziñdraa dze yquia nex lo luu gow miech!

Grëse xpëëdsuel me, bin zho sca bnee me lo yag co.

*Blee Jesús miech len yadoo*  
(Mt. 21:12-17, 20-22;  
Lc. 19:45-48; Jn. 2:13-22)

<sup>15</sup> Bdziñ zho Jerusalén, bzëëb me len yadoo. Psilo me blee me grëse miech ne quiayun lgui ga, zigtaa zha ne no wtow, zigtaa zha ne no wziw. Grë zha ne no wto

palom, grë zha ne notsëe dimi, ptiixche me xmez h zho. <sup>16</sup> Blozh ga, pso me diidz choot nodraa sëëbnie grë ncuaan co len yadoo, <sup>17</sup> rëb me lo zho:

—Led znu gon rnee lo Xti-idz Dios: “Zaatne nac lidz naa nu, nu guiaad grëse miech ne ndxie lo guidzliu sodiidznie zho naa.” Laa to gon quiayun to lugar rii zig tib zhibliee ng-baan.

<sup>18</sup> Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me. <sup>19</sup> Zeene laa liu pcow, laa me wbique Jerusalén stib grë xpëëdsuel me.

<sup>20</sup> Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low. <sup>21</sup> Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

<sup>22</sup> Pquiab me rëb me:

—Zha ne dib zdoos rnalos Dios, <sup>23</sup> gneli naa lo to ganle: Niicle ncuaane mazdraa ngan gnab zho lo me, zun mew; lëëraasi none dib zdoos zho gliladz zho zac mine rnee zho, ni palal gacchopd guic zho. <sup>24</sup> Golgona sca ganle, grëse ncuaane gnab to lo Dios, dib zdoos to goliladz ne zneedz mew, dzigo sca zac mine rnab to. <sup>25</sup> Ni zeene gnab to lo Dios, golsoladz dien pe no

cho rlëënie to, dzigo golgun zho perdon; zeena scagaa, Pxoos to men ne zob gbaa zun me to perdon tel pe nactaa xtol to. <sup>26</sup> Sac telne gunde to samiech to perdon, dzigo niicle megaa, gund me to perdon.

### *Cho rnabey Jesús*

(Mt. 21:23-27; Lc. 20:1-8)

<sup>27</sup> Blozh ga, laa zho bdzinaque Jerusalén stib. Lëëtaaque laa Jesús quiawi dib len yadoo, zeene bdzin bla zha ne nac pxoos nroob, bla zha ne nac maistr ley ni zha ne nac men non lo menguedz, <sup>28</sup> rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

<sup>29</sup> Pquiab me rëb me lo zho:

—Laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaane noyun naa. <sup>30</sup> Gole dne, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

<sup>31</sup> Psilo zho rnabdiidzla zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” <sup>32</sup> Tel na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menguedz nan ne nli Dios pxeel Juan biadteed Juan xtiidz Dios lo miech. <sup>33</sup> Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë ncuaan rii.

## 12

*Xcuent zha ne pqüianap liu (Mt. 21:33-46; Lc. 20:9-19)*

<sup>1</sup> Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me briece ga, laa me zey zit.

<sup>2</sup> 'Zeene gol mëe ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me. <sup>3</sup> Per lel bnaaz zho moz co, bdiin zho zho; blozh ga, scase bzonëz zho zho.

<sup>4</sup> 'Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pqüiaago zho zho, bdiin zho zho, blë zho guic zho.

<sup>5</sup> 'Biireque me pxeel me stib zho, zha cole beet zho. Ni bii pxeel me nzianraa zho, no zho psiwee zho, nogaa zho beet zho. <sup>6</sup> Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: "Ganse zho xpëed naaw, zon zho mine gnee me."

<sup>7</sup> 'Zeene gon zho laa xpëed me bdziin, rëbchaa zho: "iLëë zha qui nagon guiaan nie liu rii! iGolgotsaa dziuut ne zho zeene guiana lo ne!" <sup>8</sup> Dzigo bnaaz zho men co, beet zho me, güeyga zho güeyron zho me tib lad lo liu co.

<sup>9</sup> 'Sca nagon —rëb Jesús—, been zha ne quianap liu co. Golnëse nadien, ipe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csan me liun me.

<sup>10</sup> 'Golsoladz ganle znu rnee lo Xtüidz Dios: Quie ne psëeb zha ne nozaa yu,

ni nand zho lëepaa quie co nac mine rnazdziits yu.

<sup>11</sup> iNcuane gzee zdoo new! Sac Dios bnabey sca goca.

<sup>12</sup> Zeene gon zho sca bnee me, gocladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacne zeyga zho.

*Pe nonguie! quizh miech contribucion*

*(Mt. 22:15-22; Lc. 20:20-26)*

<sup>13</sup> Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wxtis. <sup>14</sup> Bdziin zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu ziana! cseed

zho mine nac diidzli zeena sēeb zho xnēz Dios. Min co nagon, nacne racladz no gnē luu lo no dien, ꝑe nonguiela ga rdeed no dimi ne razh lo rey te nonguiēda ye? ꝑe zdizhraa no dimi co, te mazd dizhdraa now ye?

15 Biēnga Jesús racladz zho gungūet zho me, dzigo rēbchaa me lo zho:

—ꝑe nacne racladz to gungūet to naa? Golguiid tib xpes to nu ganle.

16 Dzigo bdeed zho tib pes lo me. Blozh ga, rēbchaa me lo zho:

—Golnē lo naa dien, ꝑcho nu quia lo pes rii? ꝑcho lē nu quia low?

Pquiab zho rēb zho:

—Lēē rey Roma i, lēē lē me i quia low.

17 Dzigo rēb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdzieldraa zho zha gūn zho.

*ꝑe nli zrieaban miech?*

*(Mt. 22:23-33; Lc. 20:27-40)*

18 Bdziṅaque zla zha saducé, rēb zho lo me:

19 —Maestro, znu pquiaa Moisés lo libr ley ne psan Moisés lo no: tel glo mguiguet lo wnaa ne nac tsiel mgui ni gopd wnaa mēēd, dzigo none betsaque zho ctsieelnia wnaa co stib, zeena gap wnaa mēēd ne guiaan xlugar xpēēd zha ne gut ga.

20 'Bio tib dii zha co znu bzhaac, gadz bets nac zho. Ptsieelnia zha ne nac zha

gol, zeene laa zho gut, biaand xpēēd zho. 21 Dzigo ptsieelnia stib bets zho wnaa co, blozh ga gutaque zha co, pasē zho nsaṅ mēēd. Ptsieelniaque me stib zho, goc zho tson, niicle zha co psandaque mēēd. 22 Sca sca haxta bza gza gadzse zho ptsieelnia me, per ziese zho ni tib zho psand mēēd; tibaque zeene yeque me, laa me gut. 23 Mine racladz no gacndion no, ꝑchopaa dzigo gac tsiel wnaa co gal dze ne laa zho grieegan; sac gza gadzse zho ptsieelnia me?

Sca bnabdiidz zho, sac nac zha saducé rliladz zho ne nli zdziṅ dze grieegan zha ne ret.

24 Dzigo pquiab Jesús rēb me lo zho:

—I nagon laa to rxin. Mine naca riende to zha nac Xtiidz Dios, niicle rliladzde to zrieelo me gūn me ncuaan ro ne gard gan miech. 25 Sac gon, zeene gal dze ne laa grē miech grieegan, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac grē anjl ne no gbaa. 26 Stiba, ible nli zrieaban menṅut. ꝑe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rēb Dios lo Moisés: "Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob." 27 Niicle ne gutle gza zha co hor co, per zeene sca bnee Dios, gase rlu ne mban zho no zho lo

me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

*Xley Dios mine mazdraa non*

(Mt. 22:34-40)

<sup>28</sup> Zeene sca nozodiidznie Jesús zha saducé co, gon tib maistr ley niapse diidzli pt-sire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguel bnë lo naa dien, lo grë xley Dios, ¿pa min nac mine mazdraa non?

<sup>29</sup> Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne riladz ne, tibaque me ni me nac men ne rnabey ne. <sup>30</sup> Dib zdoo to, dib xalm to, dib guielbiini ne no guic to, dipse xfuers to golleynie me.” Lëë tiba nu, <sup>31</sup> laa stiba znu rnee: “Bleynie samiech luu zigne rleynie luu luu.” Tsodraa stib ley ne mazdraa non lo grop ley rii.

<sup>32</sup> Dzigo rëbchaa maistr ley co lo Jesús:

—Diidzli rnee luu maestro, tibaque Dios no. <sup>33</sup> Ni none dib zdoo ne, dib guielbiini ne no guic ne, dipse xfuers ne gleyne ne me; ni gleyne ne samiech ne zigne rleynieque ne ne. Min co nac mine mazdraa non, lëdle gzëëg ne pe cos cogon ne lo me o dien peragaa gon ne.

<sup>34</sup> Zeene gon Jesús sca niini rzë xtiidz me, rëbchaa Jesús lo me:

—Zhile runfalt sëëb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

*¿Cho xpëëd nac Crist?*

(Mt. 22:41-46; Lc. 20:41-44)

<sup>35</sup> Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacne rnee grë maistr ley, lo xtii rey David ga grieequia Men ne nacle diidz ga cxeel Dios? <sup>36</sup> Sac zeene bdeed Espiritu Sant guielbiini lo rey David, znu bnee David: Bnee Dios lo men ne rnabey naa, rëb Dios lo me:

“Cue naa nëz derech, nu bzob,

nieeda lozh gnaz naa grëse zha ne rlëë lo luu, csan naa zho ladzna luu.”

<sup>37</sup> Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga noquiaadiag zhiwseed me, per nli rley zho ron zho zha rnee me.

*Zha run grë maistr ley*

(Mt. 23:1-36; Lc. 11:37-54; 20:45-47)

<sup>38</sup> Laa me noseed grë miech co, zeene pso me diidz lo zho rëb me:

—Ible tsienalde to mine run maistr ley gon. Sac grë zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz. <sup>39</sup> Zig nac

## 13

len yadoow, zha nac zha ne rzob lo xcan zaatne rzob grë zha non, zeene tsiegaa zho tib lni lidz miech, lëëpaaze zha nac zha ne rzob grol mezh zeene laa wagw gac. <sup>40</sup> Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne gool zho.

'Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw ygaa.

*Gon ne bdeed tib wnaa viud*  
(Lc. 21:1-4)

<sup>41</sup> Blozh ga, güey Jesús güeysob me gax zaatne zhoob grë alcanci. Dzese rwi me ran me zha riesan miech gon len grë alcanci co; ndal grë zha ricw rdzin, nroob dimi rsan zho.

<sup>42</sup> Tibaque zeene bdzin tib wnaa viud, tib men prob nac me, ye me laa me psan chop gaay win len alcanci co.

<sup>43</sup> Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui. <sup>44</sup> Sac zha, dimi ne rianle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

*!Nsin golso!*

(Mt. 24:1-28; Lc. 17:22-24; 21:5-24)

<sup>1</sup> Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, !bui ganle zha niaataa yadoo rii! !Zha nataa grë quie ngol ne niaaw!

<sup>2</sup> Pquiab me rëb me lo zho:

—Nligaa lëë zha niaataaw. Per niicle squitaa gon ran tow niina, dzin dze ne nitlow dib nacsew. Ni stib quie qui guiaandraa zigne squi zhobxcuaaw i.

<sup>3</sup> Brie me ga, laa me zie gza me zho. Bdzin zho cho Gui Oliv, ga bzob zho grë zho. Nienpaa ro yadoo co zaatne zob zho ga; dzigo wbig Pedr, Jacob, Juan ni Ndrës lo me, gza tap zho bnabdiidz lo me rëb zho:

<sup>4</sup> —Bzhiguiel bnë lo no dien, !pa hor dzigo gac mine bzeet luu ga? !Zha nac señ ne tso zeene laaw csilo gac?

<sup>5</sup> Dzigo psilo me bnee me lo zho, rëb me:

—Nsin golso zeena choot yquidiede to. <sup>6</sup> Sac nzian zha ne griequia gnë zho zha nac Men ne zëëble diidz cxeel Dios; ni nzian miech ne yquidie zho.

<sup>7</sup> Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga. <sup>8</sup> Sac garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec



csilo gni grë zhodox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

9 Zeene laa grë ncuuan rii rsilo noyac, insin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co, 10 sac ib none brieets bliaallow lo grëse miech zeene gal dze ne laa guidzliu nitlo. 11 Zeene tsiezo zho to lo wxtis, tsode to zhgab dien pe guiab to lo wxtis; sac Espiritu Sant nac men ne gacniën to, ni mine csiab me guic to min co gnee to.

12 Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho. 13 Ible gandzed miech to, grëse zho glëë lo to sacne rililadz to naa; per scagaa, grëse zha ne dziits so haxta lozh grë guielnë co, ible scaania Dios zho.

14 Zeene gan to laa ncuane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho

dan, ga tsietsolan zho. 15 Zha ne no glaa guic yu, none lëëled xoon zho, ib guiabd zho sëëb zho len yu tsiebee zho ncuane nacchen zho. 16 Zha ne zogaa dana, ib gund zho ne laa zho tsie ro lidz zho tsiexi zho xab zho. 17 iProb grë men wnaa ne lëëtaque len dze co zoney xpëed, men ne quaniegaa mëdyeen ne bii radz! 18 Golnab lo Dios gande to guielnë co len mëë ne rac nal, sac ne nligaa guielnë nrooba. 19 Wlal ne biaan guidzliu haxta lo nadze, gard gan miech tib guielnëdox sca, ni gdzindragaa dze ne gan zhow stib. 20 Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

21 Len dze co, tel cho zha gnë lo to: "Golwi ganle, lëë men rii nac Men ne nole diidz ga cxeel Dios", gnëgaa zho: "Golwi nec ganle, lëë me i", gliladzde tow. 22 Sac ndal grë zha ne grieequia guiaadquidie miech, no zho gnë zha nac men co, no-gaa zho gnë zha ziadteed Xtidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios. 23 iNsin sca golso! Ib cxende to, benque laa naa nilew lo to.

*Ziaad Jesús stib*  
(Mt. 24:29-35, 42, 44;  
Lc. 21:25-36)

24 Zeene lozhse gan miech grë guielnëdox co, laa lo ng-

bidz ycow, gziinidraa mēē.  
<sup>25</sup> Grē mel ne ndziib gbaa, laa ma glial; grēraa ncuaane no gbaa, masaque nēzrii nēzrec gaca. <sup>26</sup> Horco bii zaṅ zho ganle, zeene laa Men ne pxeel Dios ziad-zēēb glaa lo xcow con grē guieṅdzon con grē poder ne rap me. <sup>27</sup> Lozh ga laa me gnabey grē xanj me, tsie zho tsietop zho grēse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

<sup>28</sup> 'Golzoob cuidad zha nac yag guigw. Led nanle to ganle, zeene laa grē zhicwa racnieen, ni rsilo rdzib zhiblaga, gase rlu ne laa mēē nēēg ziaadgaxle. <sup>29</sup> Scaquegaa nagon, zeene gan to laa grē mine rne naa lo to nu rsilo noyac, dzigo nanle to lēē dze co ziaadyoble. <sup>30</sup> Gneli naa lo to ganle, nzian miech ne mban niina bii zaṅ zho zeene laa grē ncuaan co csilo gac; sac ible ncuaane gaca. <sup>31</sup> Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac. <sup>32</sup> Lēēraasi choot nand dien pa dzew, dien pa horgaaw, per ni grē anjl ne no gbaa, per ni naa nanda; loxaque Pxoze naa naṅa. <sup>33</sup> Gacxe waa, nsin golso, gōlnab lo Dios; sac gon nande to dien pa hora.

<sup>34</sup> 'Nac cuent rii zig nac tib zha ne rriee zie tib guiedz zit. Zeene laa zho rriee, rsaṅse zho diidz dien pe guṅ tib tib moz ne guiaan ro lidz zho, ni rso zho diidz lo zha ne rquianap ro puert

nsin so zho, ib gaguiesd zho. <sup>35</sup> Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu. <sup>36</sup> Nsin golso, zeena ine zobna to zeene laa naa glanso. <sup>37</sup> Mine rne naa lo to nu, laaw rne naa par grēse miech.

## 14

*Bnediudz zho dien zha gnaaz zho Jesús*  
 (Mt. 26:1-5; Lc. 22:1-2;  
 Jn. 11:45-53)

<sup>1</sup> Schop ngbidz runfalt csilo lni Pascw, lni ne row zho quietxtil ne riotsd ncobi; grē pxoz nroob ni grē maistr ley, laa zho noguib dien zha ngueetsse gnaaz zho Jesús gut zho me, <sup>2</sup> rnee zho:

—Laa me no ygaa, per lēēraasi gnaazd ne me mer dze lni, sac miech guizhiu ne ndxie lo lni dze co; zrieequia nzian zha ne glisquiw.

*Pchoob tib wnaa nceit nex guic Jesús*  
 (Mt. 26:6-16; Lc. 22:3-6;  
 Jn. 12:1-8)

<sup>3</sup> Len dze co, laa Jesús no guiedz Betain. Lēētaaque laa me no mezh lidz Simón ne blan guiedz lepr, zeene bdzin tib wnaa bdzinnie tiblo nceit nex, nosew tib len ncuaan win niaa niapse quie rbebnī, tiblo nceit niazha. Dzigō blē wnaa co ncuaan win co, blozh ga pchoob me nceit co guic Jesús.

<sup>4</sup>Blalaa zha ne zobgrë Jesús ga, zeene gon zho sca been wnaa co, blëe zho, rëb zho:

—¿Pa rieguiala squi pxin zhlë wnaa qui nceit qui?  
<sup>5</sup>Telne niaca mine ndow, nguizhpaa zhow tson gayoo pes plat, nquiinpaa dimi co ngaaza lo grë zha mban ne guiend pe yquuin.

Laa zho nolisquiw lo wnaa co, <sup>6</sup>dzigo rëbchaa Jesús lo zho:

—Goltsaan me. ¿Pe nacne rlisqui tow lo me? Led lega pxind mew, tib guielnzaac nroob i been me lo naa.  
<sup>7</sup>Telne nli rquia zdo to zha ne guiend pe yquuin, zac ygad to lo zho stib dze, sac tibaque ran to zho; sangue naa zdzin dze ne gbiche naa lo to, gandraa to naa. <sup>8</sup>Laa wnaa qui been mine brieelo lo me, laa me pchoob nceit nex rii guic naa zeena nzhixcuaale xcuerp naa gal dze ne laa naa ygueets. <sup>9</sup>Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

<sup>10</sup>Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas grë zha ne nac pxoz nroob, rëb Judas laa Judas gun me ntregar.  
<sup>11</sup>Zee ne bin zhow, per nli rley zho ni rëb zho zdeed zho dimi lo Judas. Dzigo psilo Judas noguib Judas dien pa hor gdeeda diidz gun Judas me ntregar.

*Dowxtseenie* *Jesús*  
*xpëedscuel me*

(Mt. 26:17-29; Lc. 22:7-23; Jn. 13:21-30; 1 Co. 11:23-26)

<sup>12</sup>Mer dze ne rsilo lni Pascw, dze ne rowxtsee zho tib carner, ni rsilo zho row zho quietxtil ne rquiad ncobi lad, dze co bnabdiidz xpëedscuel Jesús dien pa lo racladz me tsiegunlo zho ncuaane gowxtseenie me zho wdze co. <sup>13</sup>Dzigo pxeel me chop zho Jerusalén, rëb me lo zho:

—Goltsie Jerusalén. Ga gan to tib mgui nzobyan tib re nis, dzigo goltsienal zhits me. <sup>14</sup>Yu ne gan to sëeb me, golguiab lo bizhuan yu co: “Znu në maestro: ¿Pa len yu me gneedz luu gac zaatne gowxtseenie me xpëedscuel me wdze rii?” <sup>15</sup>Dzigo ga glu me tib len yu nroob ne riaan glaa, nzhixcuaale lena, grële ncuaane yquuin no ga; dzigo ga golgunlo zhixtsee ne.

<sup>16</sup>Laa grop zha co brie, laa zho zie. Bdzin zho lad guiedz Jerusalén, nligaa laa zho bdziel yu co zigne rëbse me lo zho ga, dzigo psilo zho beenlo zho xtsee co.

<sup>17</sup>Bdze dzew, laa me bdzin len yu co grë xpëedscuel me.

<sup>18</sup>Laa me no mezh noy-ownie me zho, zeene rëb me lo zho:

—Laa naa gni lo to ganle, lëeque tib zha ne gon noy-ownie naa nu tsielo naa ladznia zha ne gut naa.

<sup>19</sup>Zee ne bin zho sca rëb me, mban rac zho, dzigo psilo zho tibga tibga zho rnabdiidz lo me, rnee zho:

—¿Pe naaw?

<sup>20</sup> Pquiab me rëb me lo zho:

—Ladaque to no zho, zha ne nosëeb xcuun len xquien naa, lëe zho ga. <sup>21</sup> Naa ne nac naa Men ne pxeel Dios, niina laa miech gut naa zigne raquietsew lo Xtiidz Dios; per, ¡probsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

<sup>22</sup> Laa zho noyow zeene bzhen Jesús tib quietxtil, bdeed me xquizh lo Dios, blozh ga beengrol mew dzigo bdiiz mew lo zho, ni rëb me:

—Golquiina, lëe xcuerp naa i gon.

<sup>23</sup> Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co.

<sup>24</sup> Ni rëb me lo zho:

—Lëe xchen naa i, miñe gzhiee par grëse miech ne sëeb xnëz Dios, sac lëe stib mod cub nu psan Dios parne sëeb miech xnëz me. <sup>25</sup> Lëe lultm vuelt nu guie naa vin rii, sac zhaale stib vin cub ne guie naa zeene laa naa gdzin zaatne rnabey Pxoza naa.

Dzigo psilo me biil me bla salm gza me zho.

*Bzeet Jesús zha gun Pedr*

(Mt. 26:30-35; Lc. 22:31-34; Jn. 13:36-38)

<sup>26</sup> Blozhse biilnie me Dios grë me zho, dzigo laa me brieenie zho ga zienie me zho nëz Gui Oliv.

<sup>27</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios

diidz csiwee zho baxtor, lozh ga nëzrii nëzrec gliaal mëcwxiil.” <sup>28</sup> Sca gun zho naa, per zeene laa naa grieeban glole naa ga Galilé, ga cuëz naa to.

<sup>29</sup> Dzigo rëbchaa Pedr lo me: —Niicle telne saan grë zha qui luu, sangue naa gon csaand naa luu.

<sup>30</sup> Pquiab me rëb me lo Pedr:

—Gneli naa lo luu ganle, guieel riigazh, gardle grop gall tsonle vuelt rëb luu runbeyd luu naa.

<sup>31</sup> Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

*Bzodiidznie Jesús Pxoza me Getsemani*

(Mt. 26:36-46; Lc. 22:39-46)

<sup>32</sup> Bdzin Jesús zaatne lë Getsemani gza me zho, dzigo rëbchaa me lo zho:

—Nuse nagon golsob, laa naa ga gazodiidznie naa Pxoza naa.

<sup>33</sup> Horco psilo mban rac zdoo me, riabguielnë me, dzigo bredz me Pedr, Jacob ni Juan, bzënie me zho palal

<sup>34</sup> dzigo rëbchaa me lo zho:

—Mban rac zdoo naa, zootle zig zet naa lo guielnë rii. Nuse nagon golguiaan, per golsobna.

<sup>35</sup> Bzë me spalal, dzigo pquitsgzhie me haxta bdzin lo me lo liu; psilo me bnab me lo Dios ne telne zrieelow mazd tete me grë guielnë ne no gan me, <sup>36</sup> rëbchaa me:

—¡Papá, par luu grëse cos zrieelo guñ luuw! ¡Bzhiguiel psilaa naa lo guielnë rii! Per telne grieloda, minë gnëtaa luu, sca gaca.

<sup>37</sup> Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëe? ¿Pe ni palal blëëbd luu nzobna luu? <sup>38</sup> Golsobna, golnab lo Dios zeena yquuild mendox to. Niicle ne squi lëbdraa xcuerp to sobna to, per golnab lo Dios, sac gon min co nac minë racladz zhiespíritu to.

<sup>39</sup> Dzigo biire güey me tib, güeyzodiidznie me Dios; scaque minë bnaab me glo mincoque bnaab me tib. <sup>40</sup> Zeene bdziñ me lo zho, gon me laa zho bii nixguies. Ni rdziel zho pe guiab zho lo me.

<sup>41</sup> Laa zeene goc tson vuelt biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa. <sup>42</sup> Goltsieso, zeena zio ne; sac gon laa zha ne glu naa lo zho ziaadle nu.

### *Bnaaz zho Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Laa Jesús bii quianeeque, zeene laa Judas (tib zha ne nac xpëëdsuel me) bdziñ, bdziñnie Judas tib dzoon zha ne pxeel grë pxoz ne rnabey, grë maistr ley ni grë zha non lo menquiedz Israel. No zho

nzhen spad, nogaa zho nzhen yag. <sup>44</sup> Biaaniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

<sup>45</sup> Nligaaw, zigne bdziñ Judas bredz Judas Jesús; blozh ga dow Judas bzhid cuas me. <sup>46</sup> Horco wbig grë zha ne zienal zhits Judas ga bzhen zho me. <sup>47</sup> Lo grë zha ne nacgza Jesús ga, hor co biasaque tib zho bdoob zho zhispad zho pchug zho tib diag xmoz men ne nac pxoz nroob.

<sup>48</sup> Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa? <sup>49</sup> Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuaan rii gon noyac zeena gac grë minë raquiet lo Xtiidz Dios.

<sup>50</sup> Grë zha ne nac xpëëdsuel me ga, grëse zho bzhoon, tipse me psan zho ga. <sup>51</sup> Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho; <sup>52</sup> per znuse brie mgui len lar co, bzhoon mgui coletse mgui.

*Güeynie zho Jesús lo zhiwx-tis zha Israel*

(Mt. 26:57-68; Lc. 22:54-55, 63-71; Jn. 18:12-14, 19-24)

53 Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menguedz, laa zho pcaalsa ga.

54 Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëëtaque laa zho quiadzëë lo gui.

55 Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew.

56 Nzian zha ne pquidie rëb zho znu znu nac ncuane noyun me, per rrieequiäd xtiidz zho; sac zhaase zhaase rnee zho. 57 Tibaque zeene guso blalaa zho, bnexuu zho rëb zho:

58 —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

59 Niicle scaw, rzëdaque xtiidz zho tipse.

60 Dzigo hor co bzoli men ne nac pxoz nroob, bzo me glowtaa lo grë miech co, bnabdiidz me lo Jesús rëb me:

—¿Pe nacle rquiabd luu? ¿Diidzli dzigo lëë nac grë mine rnee zho i!

61 Dzese zo Jesús ib rquiabd me. Biireque men co bnabdiidz me stib rëb me:

—¿Nligaa cho nac luu? Bnë tel nli Xpëed Dios nac luu,

Men ne nacle diidz ga cxeel me lo guidzliu.

62 Dzigo pquiab Jesús rëb me:

—Nliw, naa nac men co. Naa ne nac naa Men ne pxeeļ Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëëb naa lo xcow.

63 Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—, 64 laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

65 Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

*Rëb Pedr runbeyd Pedr Jesús*

*(Mt. 26:69-75; Lc. 22:56-62; Jn. 18:15-18, 25-29)*

66 Laa Pedr bii zoque ley. Ga zo Pedr, zeene laa tib wnaa ne nac zhicriad men rnabey co bdziñ; 67 gon me laa Pedr zob gax lo gui nodzëë Pedr. Dze rwi me lo Pedr, tibaque zeene rëb me:

—¿Ye luu lëë rzënie Jesús, men Nazaret ne bdziñnie zho i?

68 Per bneelid Pedr.

—Dieen pe rool luu —rëb Pedr—. Runbeyd naa men co.

Brieega Pedr zie Pedr nēz ro zawan, lēētaque hor co pcuedz tib gall. <sup>69</sup> Dzeque rwi wnaa co lo Pedr, dzigo rēbchaa me lo grē zha ne ndxie ga:

—jLēēw, zha ne rzēnie me nac mgui qui!

<sup>70</sup> Biire Pedr rēb Pedr runbeyd Pedr me. Wdzeepaa goca, biire zha ne ndxie ga rēb zho lo Pedr:

—Ne nligaa, ye luu rzēnie meḅ co. jZha Galilé name nac luu!

<sup>71</sup> Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—jDios zobwi ganle, telne rned naa diidzli, maase cuibdee naa!

<sup>72</sup> Lēētaque hor co laa gall pcuedz stib. Dzigoraa psoladz Pedr xtiidz Jesús zeen rēb me lo Pedr: “Gardle grop gall, tsonle vuelt rēb luu runbeyd luu naa.” Dzigo mbanse rac Pedr, psilo Pedr biin Pedr guielnē co.

## 15

*Güeynie zho Jesús lo Pilat*

(Mt. 27:1-2, 11-14;  
Lc. 23:1-5; Jn. 18:28-38)

<sup>1</sup> Ziadyiinile liuw, scase bii nchool r naw, wbiire pcaalsa grē pxoz non grē zho zha ne rnabey lo maistr ley, grē zha non lo menquiedz ni grē zha ne nac zhiwxtis zho. Blozhse bnediidz zho, laa zho pxidoo Jesús güeyšan zho me lo Pilat meḅ ne nac gobernador.

<sup>2</sup> Bdzin me lo Pilat, bnabdiidz Pilat rēb Pilat lo me:

—jPe nli na luu nac zhirey zha Israel?

Pquiab me rēb me:

—Nliw.

<sup>3</sup> Tibaque quia grē zha ne nac pxoz non, rzadraa grē ncuaaḅ rcaadz zho me. <sup>4</sup> Nacne wbiire Pilat bnabdiidz Pilat lo me, rēb Pilat:

—jPe nacne rquiabd luu? Bui ganle zha nactaa grē ncuaaḅ rcaadzdoḅ zho luu.

<sup>5</sup> Bzee zdoo Pilat gonḅ Pilat ible pquiabd me.

*Bnab zho guet Jesús*

(Mt. 27:15-31; Lc. 23:13-25;  
Jn. 18:38-19:16)

<sup>6</sup> Gzobse lni Pascw rsilaa Pilat tib zha ne no ladzguiib, tel cho zha ne gnabtaa menquiedz laa. <sup>7</sup> Leḅ dze co no tib mgui lē Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern. <sup>8</sup> Nacne psilo grē miech co, rnab zho lo Pilat csilaa Pilat tib zha ne no ladzguiib zigne runtaque Pilat grēraa iz.

<sup>9</sup> Dzigo bnabdiidz Pilat lo zho, rēb Pilat:

—jCho racladz to csilaa naa? jPe silaa naa meḅ ne rnee zho zhirey to nu?

<sup>10</sup> Sca rēb Pilat lo zho, sac nanle me niapse por rlēē grē pxoz non co ranḅ zho Jesús gane bnabey zho bgaa me güeyšan zho me ga. <sup>11</sup> Per lel psilo grē miech co rnab zho csilaa Pilat Barrabás; ni lēēque grē pxoz co pquiil zho. <sup>12</sup> Dzigo rēb Pilat lo zho:

—jZha dzigo racladz to gac meḅ rnee zho zhirey to nu?

13 Pq*ui*ab be gr*e* miech co, roptsie zho rnee zho:

—j*B*nabey y*q*uia me lo cruz!

14 —¿Pe nac falt ne been me? —r*e*b Pilat—. ¿Pe nacne racladz to y*q*uia me lo cruz?

Biire zho roptsie zho rnee zho:

—j*B*nabey y*q*uia me lo cruz!

15 Go*n* Pilat zha rac zho ni racladzaque me guia*n*ziuu me lo zho, nacne mazd bzoob me xtiidz zho, bnabey me bla Barrabás; laa Jesús, blozhse bnabey me bdi*n* zho Jesús laa me been Jesús ntregar lo gr*e* me*n*guiib ne tsiequiaa me lo cruz.

16 Biire gr*e* me*n*guiib co bz*e*ebnie zho Jesús n*e*z len yulow, ga p*ca*alsa gr*e*raa me*n*guiib ne nacgr*e* zho. 17 Psilo zho r*g*uitnie zho me, bgacw zho me tib lar morad zig rna lar ne racw gr*e* rey, ni bz*ie*ecw zho bla l*e* yag guiets bzoob zhow guic me, zig rzob coron guic gr*e* rey. 18 Dzigo psilo zho nguiedz roptsie zho rnee zho:

—j*G*olwi gan*le* zha ractaa zhirey zha Israel!

19 Bzhe*n* zho tib goobgui, rdeed zhow guic me, rtsuc zho lo me, r*q*uiaalo zho r*q*ui-itgzh*ib* zho lo me zig r*q*uiitgzh*ib* zho lo zha non.

*Güeyquiaa zho Jesús lo cruz*

(Mt. 27:32-44; Lc. 23:26-43; Jn. 19:17-27)

20 Blozhse sca bdziitnie zho me, laa zho blee lar morad ne nacw me ga, biire zho bgacw zho me mi*ne* nac xab me; dzigo laa zho brienie me ga

zienie zho me zaatne y*q*uia me lo cruz.

21 N*e*z zienie zho me, bdzieel zho tib m*g*ui Ciren l*e* Simón (l*e*e p*x*oz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

22 Ze*e*ne bdzi*n*nie zho Jesús zaatne l*e* Gólgota (nac diidz co zig nac ne rnee ne “Gui Beer-guic Ngutoo”); 23 ga bdeed zho nziuu notsa guizh rmed ne l*e* mirr, nan zho nie mew, per god mew. 24 Dzigo laa zho p*q*uiaa me lo cruz.

Blozhse p*q*uiaa zho me lo cruz, bzhe*n* zho tib xab me pchug zhow, bia*n*nie zho tib l*e*gaw tib tib zho, laa stiba bio zho rif. 25 Zig hor wxeeeren ga p*q*uiaa zho me lo cruz.

26 Glaa guic cruz ne p*q*uiaa zho me ga, ga p*q*uiaa zho bla lan diidz zaatne rnee pe nacne sca psaci zho me, rneew: “L*E*È MEN RII Q*U*IA NU, P*OR*NE NAC ME ZHIREY ZHA ISRAEL.” 27 Ye chop ngbaan p*q*uiaagza zho me lo cruz, t*ib*ga zhicruz zho bzo tib n*e*z cho zhicruz me. 28 [Ga brieequia mi*ne* raquiet lo Xtiidz Dios, zaatne rnee: “Bloo zho me lad zha ntseeb.”]

29 Gr*e* miech ne rded zaatne quia me lo cruz ga, ru*n*guzee zho me, rzhidznie zho me, haxta rdzi guic zho rnee zho lo me:

—j*P*e led r*e*b luu l*e*e, laa luu ntsil yadoo ni tsonaque ngbidz nzaalo luuw stib! 30 Nana zho, j*p*e gacd l*e*eque luu bla luu lo caxtigw qui, biet lo cruz qui!



<sup>31</sup> Scasaque grē pxoz non ni grē maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rriee lod me gla me me.

<sup>32</sup> ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh quiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

### *Gut Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Gol grol dzew, tibaque zeene goc tib ncow dipse lo guidzliu, haxta las tres biao biini stib. <sup>34</sup> Horco nguiedz zëëb tsi Jesús, rnee me:

—¡Eloi, Eloi! ¿Lama sabac-tani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

<sup>35</sup> Grē zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me. <sup>36</sup> Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

<sup>37</sup> Tibaque zeene pquiaa me stib redz nroob, znuse blozh me.

<sup>38</sup> Lëëtaaque laa me nolozh, zeene briez nzoli lar nroob ne quia len yadoo, groltaa goca.

<sup>39</sup> Gax lo me ga zo men ne rnabey lo grē mennguiib co, zeene gon men co zha gut me, rëbchaa me:

—¡Ne nligaa, Xpëed Dios nac men qui!

<sup>40</sup> Ye blalaa men wnaa güeyso ga, zit zo zho rwi zho; lad co no Marí Magdal, Salomé ni Marí ne nac xniaa Jacob niab grop José.

<sup>41</sup> Nzianlaa nac zho, lëë grē wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdzin me Jerusalén.

### *Bgueets Jesús*

(Mt. 27:57-61; Lc. 23:50-56; Jn. 19:38-42)

<sup>42-43</sup> Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdzin dze ne gnabey Dios.

<sup>44</sup> Bzee zdoo Pilat zeene bin me laa Jesús gutle. Bnabey me gocredz zha ne rnabey lo mennguiib ne quianap Jesús; <sup>45</sup> haxta bdzinraa men co rëb nliw, dzigoraá bdeed me diidz tsielit José Jesús lo cruz.

<sup>46</sup> Nacne güey José, güeysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh

ga, psodan me tib quie nroob psioog me ro baa co.

<sup>47</sup> Ga zo Marí Magdal ni Marí xniaa José, goṅ zho pa lo bguets me.

## 16

### BRIEBAN JESUS

(Mt. 28:1-10, 16-20;  
Lc. 24:1-53; Jn. 20:1-23)

<sup>1</sup> Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güey si zho grë nceit nex ne tsietëeb zho lad xcuerp Jesús. <sup>2</sup> Laa zeene biini liu, dze ne rzobni zhmał, silgaw loxaque ziaadlan ngbidza laa gza wnaa co brieelaa zho zie ro baan Jesús.

<sup>3</sup> Nöz no zho, r nabdiidzlsa zho dien zha gdioob quie nroob ne niioog ro baa, cho siguiel coba. <sup>4</sup> Ni zeene bdziṅ zho, goṅ zho laa quie co bdiooble.

<sup>5</sup> Laa zho bzëeb leṅ baa, zeene goṅ zho nöz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho goṅ zho me; <sup>6</sup> dzigo rëbchaa me lo zho:

—Gdziebde to. ¿Jesús lëe, meṅ Nazaret ne pquiaa zho lo cruz, meṅ co ziaadguib to? Guienḍle me nu, ¡laa me brieelaa! Gołwi ganle nu nac zaatne pxob zho me. <sup>7</sup> Gołtsie, gołguiab lo Pedr ni lo grëraa xpëedscuel me tsie zho Galilé, ga tsiedzieel zho me zigne rëble me lo zho glo.

<sup>8</sup> Rias gza wnaa co laa zho brieelaa, masaque rzhidz zho

rdzieb zho. Lo dzeb co ni par gnee zho gacđ.

<sup>9</sup> [Dze ne rzobni zhmał ga, sil co brieelaa Jesús, ni Marí Magdal nac zha ne glopaa goṅ me; lëe Marí co ga beenguiac me zeene benxoon me gadz menđox ne nosaci Marí. <sup>10</sup> Dzigo güey Marí güeynie Marí diidz lo grë zha ne bzënie me ga. Lëetaaque laa zho ndxie mban rac zho, roon zho no zho xquielnë me. <sup>11</sup> Niicle bin zho rëb Marí laa me brieelaa, goṅ lo Marí me; per bliladz zhow.

<sup>12</sup> Bded ga, brieequia me lo schop xpëedscuel me lëetaaque no zho nöz zie zho dan. <sup>13</sup> Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladz zho.

<sup>14</sup> Laa stibtaa vult, lëetaaque ndziib zho lo mezh no zho wagw gza tsiiptib zho, tibaque zeene laa me brieequia; dzigo goctox me lo zho sac goṅ me ib bliladz zho xtiidz me; ni goṅ me scataa nad zdoo zho, sac niicle güey zha ne goṅ me güeynie zho diidz ne ni brieelaa me, ni bliladz zhow. <sup>15</sup> Ni rëb me lo zho:

—Gołtsie dipse lo guidzliu, gołtsieed miech Xtiidz Ndzon Dios. <sup>16</sup> Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga. <sup>17-18</sup> Grë zha ne sca dib zdoo gliladz naa: znee zho stib diidz ne rneed zho. Niicle xen zho grë meel ntseeb, concuaangaa miech zho, ib

peet gacd zho. Ni zeene cxob-  
 nia zho guic grë men rzacnë,  
 zun<sub>g</sub>uiac zho zho; grë men<sub>d</sub>ox  
 ne noguitnie miech, zeene  
 gzeet zho lë naa zun<sub>c</sub>xoo<sub>n</sub> zho  
 ma.

<sup>19</sup> Blozhse sca bnee me lo  
 zho, laa me zey gbaa bzob me  
 cue Dios nëz derech.

<sup>20</sup> Dzigo grëse xpëëds<sub>c</sub>uel  
 me laa zho brieë, brieets bli-  
 aal zho zieseëd zho miech  
 Xtii<sub>d</sub>z Dios. Ni me nac men  
 ne noyacnie<sub>n</sub> zho ru<sub>n</sub> zho grë  
 milagr nroob, zee<sub>n</sub>a glu ne nli  
 Xtii<sub>d</sub>z me nac mi<sub>n</sub>e noseëd  
 zho miech.]

## XTIIDZ NDZON DIOS MINE PQUIAĀ LUC

¡Diuzh Tiofl!

<sup>1</sup> Nanle luu ganle, nole bla zha ne bioxco pquiaa zho grē ncuaañe goc zeñe biaad Jesús men ne pxeel Dios ga. <sup>2</sup> Ncuaañe nlipaa goca, grē ncuaañe pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzēniepaa mew, zha ne pso me noneew lo miech.

<sup>3</sup> Yeque naa pquiaa naa wen wen bñabdiidz naa, bleeni naa diidz grēse dien zha psilo grē ncuaañ co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw; <sup>4</sup> zeena lozh gacnañ luu zha nac diidzli rii, wseed ne blu zho lo luu i.

<sup>5</sup> Len dze ne nac Herod rey rnābey me dib xtan zha Judé, len dze co no tib pxoz lē Zacarí, me nac tib zha ne nacgrē “Zha Abí”. Niicle tsiel mew, zha xtii pxoz Aarón ziaad wnaa co, lē me Lisabet.

<sup>6</sup> Zigtaa Zacaríw, zigtaa Lisabet, noxco me mine rnābey Dios, mban mew zigne naca, ni tib xley Dios rguiitsd me. <sup>7</sup> Men gol-le nac me grop me, per ni tib mēed quianied me, sac niaad Lisabet gapd me mēed.

<sup>8</sup> Laa tib dzew bgaa grē zha ne nacgrē Zacarí gun zho

dziin len yadoo. <sup>9</sup> Nac xcostumbr grē zha ne nac pxoz, rio zho tib rif dien chopaa ygaa tsielaadz goxyaal len yadoo, dzigo bgaa Zacarí. <sup>10</sup> Goxyaal co nolaadz me len yadoo, laa grē miech ne ndxie nēz ley nonabgaa lo Dios, <sup>11</sup> tibaque zeñe brieequia tib xanjl Dios bzo cue pcoog nēz derech, zaatne nozēg me yaal ga. <sup>12</sup> Zeñe gon me anjl co bdzieb me, rdzieldraa me zha gun me lo dzeb co. <sup>13</sup> Dzigo rēb anjl co lo me:

—¡Gdzieebd luu! Diidzse zialnie naa lo luu, gacnañ luu ganle mine bñab luu lo Dios ga, pquiaadiag mew; gane niina laa tsiel luu gap tib mēēdbgui. Zeñe gal win, Juan cueelē to win. <sup>14</sup> Tib guielbley nroob gac win lo to, niicle lo grēragaa miecha, <sup>15</sup> sac tib men nziuu gac win lo Dios. Zeñe gac win zha broob, ni tib ro nziuu guied win, per ni vin yquiaarod win; ansraa gal win, laa Espíritu Sant nacniele win. <sup>16</sup> Win gac men ne co guic nzian grē zha Israel, gbiire gbig zho lo Dios, men ne rnābey zho. <sup>17</sup> Zigne goc Lí, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grē miech rii, gbiire gleynie zho me zigne goc xmengol zho zha ne bleynie me; csaan zho grē xquientseeb zho, gban zho zigne racladz me; zeena niowse gac zho ycaania zho me.

<sup>18</sup> Pquiab Zacarí rēb Zacarí

lo anjl co:

—iNcuaane gacd i gon rnee luu! Zigtaa naaw, zigtaa tsieel naaw, mengol-le nac no.

<sup>19</sup> Rëbchaa anjl co:

—Bien ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii. <sup>20</sup> Per ne squi rliadzd luuw, na laa luu guiaan ngop, haxta gal dze ne gac mine rne naa lo luu nu, dze co glan xtiidz luu stib.

<sup>21</sup> Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rrieed me zaatne ziezëeg me yaal ga. <sup>22</sup> Zeene brieed me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

<sup>23</sup> Bzase dze ne been me dziin len yadoo, dzigo laa me zey lidz me. <sup>24</sup> Goca bla ngbidz, laa mëed co pquialo zdoo tsieel me.

Dipse len gaay mëe bio zhuz co ro yu, ib brieed me, rley me rnee me:

<sup>25</sup> —iZha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

*Güeynie tib anjl diidz laa Jesús gac mëed*

<sup>26</sup> Goc xoop mëe zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé. <sup>27</sup> Ga no tib ndzooop nguieg lë Marí, len dze co no xtiidz ndzooop co ctsieelna ndzooop tib zha xtii rey David,

lë José. <sup>28</sup> Bdziñ anjl co zaatne no ndzooop, pquiaabdiuzh me ndzooop, rëb me:

—iDichos luu gon, sac tib zha nziuu nac luu lo Dios! Me quianap luu.

<sup>29</sup> Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzë xtiidz me.

<sup>30</sup> Dzigo rëbchaa me lo Marí:

—iGdzieebd luu! Laa Dios gon bzooblo luu yгаа luu tib guielnzaac nroob. <sup>31</sup> Zdoo luu yquiaalo tib mëedbgui, zeene laa win gal, JESUS cueelë luu win. <sup>32</sup> Tib men nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmengol win David. <sup>33</sup> Win gnabey lo grëse zha Israel, ni gdziñd dze ne lozh xquielrnabey win.

<sup>34</sup> Pquiab Marí rëb Marí lo anjl co:

—iMëed ye? iPer zha grieelo gap naa mëed, ni tib naa zo nu?

<sup>35</sup> Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëed co yquiaalo zdoo luu; gacxe waa Xpëed Dios gunbey miech win, mine rnabey Dios min co gun win.

<sup>36</sup> Ye belyeen luu Lisabet, niina lo guielgol-le laa tib mëed pquialo zdoo me; zëeb diidz ib grieelod gap me mëed, per na racle xoop mëe zoney me mëed, <sup>37</sup> sac par Dios tsod ncuaane grieelod gac.

<sup>38</sup> Dzigo rëb Marí:

—Tel scaw, minē rnee luu i, maase gaca. Laa naa zo nu par guṇ naa minē gnabeytaa Dios naa.

Blozhse ga, laa anjḷ co zey.

### *Güeygaṇ Marí Lisabet*

39-40 Goc bla dzew, briece Marí ga zie me ziegan me Lisabet tib guiedz win ne ndxie gui glaa ne nac xtan zha Judé. <sup>41</sup> Bdziṇ me, wbig me pquiaabdiuzh me Lisabet. Bdiuzh co bnee me, zeene biasoli xpëéd Lisabet zdoo Lisabet; dzigo hor co bdeed Espíritu Sant guieḷbiini lo Lisabet, <sup>42</sup> nguiedz bnee Lisabet rëb me lo Marí:

—iDichos luu Marí bgaa luu guieḷnzaac qui! Sac goṇ, lo grëraa no nac no meṇ wnaa, luu bzooblo Dios. Mëéd ne zoney luu i, zha nziuu nac win lo me. <sup>43</sup> iḷb guiaanladzd naa dze rii, znu biaad luu nac luu xniaa meṇ ne rnabey naa, biaadgaṇ luu naa! <sup>44</sup> Haxta mëéd ne zoney naa nu, rley win biasoli win zdoo naa, zeene pquiaabdiuzh luu naa. <sup>45</sup> iDichos luu, bin luu minē nē Dios, ni bliladz luu zuṇ mew!

<sup>46</sup> Dzigo hor co bnee Marí rëb me:

iMeṇ nroob nac Dios! iGdib zdoo naa roolnie naa me!

<sup>47-48</sup> Rleynie naa me nac me meṇ ne psilaa naa, sac goṇ niicle peet nond naa, tib ngundziin winse nac naa lo me, per laa me bzooblo naa.

Grë miech, zigtaa leṇ dze riiw, zigtaa leṇ dze ne ziaadragaaw,

ziab zho naa nac tib wnaa ne mazdraa dichos.

<sup>49</sup> Ne nligaa zha nactaa guieḷnzaac rii bneedz me lo naa.

Meṇ ro, meṇ nroob nac me, i guieḷndraa cho zig me!

<sup>50</sup> Grëse miecha, zha ne ri-oxco rquiaadiag minē rnabey me,

tibaque racnie me zho, ib rsaand me zho.

<sup>51</sup> iGolwi ganle zha nactaa grë ncuaane ruṇ me!

Grë ncuaane no guic zha niats guṇ zho, bnitlo mew,

<sup>52</sup> ptiche me grë zha ne zob rnabey.

Laa grë zha ndooladz, zha ne rzac miech peet nond,

beennon me zho.

<sup>53</sup> Grë zha mban ne guieḷnd pe yquiin, nroob guieḷnzaac ne bdeed me lo zho,

laa grë zha ne rapchen, scase bzonëz me zho.

<sup>54</sup> iPe zhidaa ziyacnie me grë zha ne nac xtii Israel, mengol ne goc zig tib ngundziin lo me ga! iTibaque rlu me rleynie me zho!

<sup>55</sup> Ib biaanladzd me xtiidz me minē bnee me lo pxozgol ne Abraham,

zeene rëb me gdziṇd dze ne csaan me Abraham, ni grëraa zha ne grieequia lo xtii Abraham.

<sup>56</sup> Maase tsoṇ mëë biaan Marí ga blëz me lo Lisabet, dzigoraaw wbi me ga bdziṇ me lidz me stib.

*Gol xpëéd Lisabet*

57 Bdzin̄ dzew, laa xpëed Lisabet bza mëë, laa me gop win. 58 Grë zha ne no gax lidz me, grë zha ne nac menlidz me, zeene bin zho scataa pquia zdoo Dios me bdeed Dios mëed co lo me, rley zho güeygan̄ zho me.

59 Dze ne goc mëëdbgui yeen co xon ngbidz, blalaa zha ne güeynal̄ zhits pxoz win, zhits xniala win güeynie zho win bio win bey ne rio xpëëdbgui zha Israel, parne glu lo Dios ngab win. Tibaque nan̄ zho Zacarí nrieele win, zigne lëque pxoz win, haxta scale nonee zho lo win, 60 per hor co rëb Lisabet, led scad gac lë win, Juan grieele win.

61 Dzigo pquiab zho rëb zho:

—¿Pe nacne sca grieele win? Ni tib menlidz to lëd Juan.

62 Bnabdiidzaque zho lo pxoz win, blu zho señ lo me dien̄ zha racladz me gac lë win. 63 Dzigo bnab me bdeed zho tib lë lo zaatne yquiaa me; bzee zdoo zho zeene blozh pquiaa me gon̄ zho rnee lo co: “Juan grieele win.” 64 Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios. 65 Grë zha ne zo ga, zha ne runbey me, zeene gon̄ zhow, per nli rzee zdoo zho.

(Nëzrii nëzrec bzhoon̄ diidz laa mëed co gol, grëse guiedz ne ndxie gui glaa co gocnan̄ miecha. 66 Zha ne rona, rza zdoo zho rnee zho: “¿Bay cho

gac mëdyeen co?” Sac nligaa rlu nacnie Dios win.)

67 Horco bdeed Espíritu Sant guiel̄biini lo Zacarí, psilo me bnee me rëb me:

68 ¿Xquizh xquiel̄nzaac men̄ nroob ne rnabey, men̄ ne nac xDios ne nac ne zha Israel!

Sac gon̄ laa me ziaad, ziaadgan̄ me ne, ziadbee me ne lo xquiel̄ne ne.

69 Nasi laa me pxeel̄ men̄ nroob ne ziaadsilaa ne,

lëë men̄ co ga no grieequia lo zha xtii David, men̄ ne been̄ xtsiin̄ me ga.

70 Padzeelale bzeet me cxeel̄ me men̄ co,

grë zha ne biaad pteed xtiidz me, bzeet zhow.

71 Rëb zho, ib sxeel̄ me men̄ ne guiaadsilaa ne ladznia zha ne nosacsi ne, zha ne rlëë lo ne.

72 Sac ib gdziind̄ dze csaan me grë zha xtii pxozgol ne, rquianëpaa zdoo me zho.

Ib guiaanladz me min̄e rëb me lo Abraham,

73 zeene rëb me laa me cxeel̄ men̄ ne csilaa ne,

74 zeenā dziodzbedraa ne lo zha ne rlëë lo ne, lo zha ne rsacsi ne;

sinque in̄e tibli gac ne dziuun̄ ne min̄e rnabey me.

75 Gzataa dze ne gneedz me guiel̄mban lo ne,

in̄e mbe zdoo ne, dziuun̄ ne min̄e rleynie me.

76 Luu gon̄ xin, bzooblo Dios ro ne zob gbaa, cteed xtiidz me lo miech,

luu tedner tsienee luu lo zho, laa men̄ co no guiaad.

77 Luu gnee lo grë zha Israel, guien zho ganle zha guñ Dios zho perdon, parne ycaania me zho.

78 Ne nligaa rleyne me ne, rquia zdoo me ne, gane laa me cxeel Xpëed me, men co gac zig tib biini,

79 Biini co gziini lo grë zha ne mban lo guielcow, zeena biini co glu nëz lo ne, guio ne nëz ne peet zhgab, peet dzeb guien.

80 Zigse zie dzew, scase scase zieroob mëdyeen co, ni scaquegaa dib zdoo win rleyne win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

## 2

### *Gol Jesús* (Mt. 1:18-25)

1 Lëëtaaque len dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho. 2 Lëë primer vuelt ga ptop zho lë miech, lëë iz co zob men ne lë Cirein zobnabey me guiedz Siria.

3 Bnabey August grëse miech zha ne no stib ladz ben, laa zho no tsie zaatne nacpaa ladz zho tsiedeed zho lë zho, parne ga ygab zho. 4 Min co nagon nacne brie José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz

xmengol me rey David. 5 Gard ctsieelniapaa me Marí, per nole xtiidz me grop me. Len dze co ziaadyobpaa gal xpëed Marí.

6-7 Bdziñ me Belén, bgaadraa me zaatne nrieelo mbëz me len yu, lega nac ti len lidz ma bdeed zho blëz me. Lëëtaaque bdziñ me ga, laa mëed co gol. Racse Marí pchel me win lar, bdiix me win tib len yag ne row ma guizh; lëë mëedglo ga lo me.

8 Guieel co, blalaa zha ne nac baxtor, laa zho ndxie quianap zho xpëcwxiil zho dan, 9 tibaque zeene brieequia tib xanj Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho. 10 Dzigo bnee anjl co, rëb me lo zho:

—¡Gdziebde to! ¡Golgon didz cub ne ganle zialnie naa lo to nu! ¡Tib guielbley nroob gac diidz rii lo grëse miech! 11 Men ne gon quiambëz to ga guiaad csilaa to, laa me blansole lo guidzliu. Me nac Men ne zëëble diidz ga cxeel Dios, me nac men ndzon ne rnabey. Belén, zaatne goc ladz rey David, ga gol me naguieel. 12 Goltsie, zaatne tsiedziel to tib mëedbguiyeen, nrielse win lar zhoob win len yag ne row ma guizh, lëë me ga.

13 Tibaque zeene gon zho laa stib dzoon anjl brieequia gocgrë anjl ne quianee lo zho ga, psilo grë anjl co roolnie zho Dios, rnee zho:



14 ¡Haxta zaatne glaaraa gbaa, nozhoobnen ganle pa lotaa men nroob nac Dios!

¡Nasi, grëse miech zrieelo guiaanwen zho lo me; zdo me rala laa me nobedz zho!

15 Zeene laa grë anjl co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

16 Lëelëd bio zho nëz laa zho zie. Bdzin zho zaatne blëz José ga grop Marí, nli-gaa laa mëdyeen co nix ga, nixse win tib len yag ne row ma guizh. 17 Dzigo bzodiidz zho grëse zha rëb anjl co lo zho, zeene güeynie me diidz laa win gol.

18-19 Grë zha ne bina, per nli rzee zdo zho; laa Marí nosew zdo me, tibaque rso-ladz mew.

20 Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjl me güeynie diidz lo zho, rley zho sac brieelo gon zho mëdyeen co.

21 Dze ne goc xon ngbidz gol win, dze co bio win bey ne rio xpëedbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanjl Dios zeene güeynie me diidz ne laa win gac mëed lo Marí.

### Güeynie zho Jesús yadoo

22-24 Nac ley ne psan Moisés lo zha Israel, wnaa ne sca rap mëedbgui, zeene rac

zho tap zhmal, none tsienie zho chop ma cogon zho len yadoo; yase tsienie zho tib nëz coc, tib nëzga palom. Ni rnabeya: “Grëse mëedbgui ne rac mëedglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csañ me win ladznia Dios; lëe nëzle ga zienieque me gon ne no gdeed me ga.

25 Lëëtaaque dze ne bdzinne zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Men ne nole diidz ga cxeel Dios csilaa zha Israel, 26 sac rëble Espíritu Sant lo me ible laa me no gan men co. 27 Laa dze co, Espíritu Santaque psiaab guic me zie me yadoo. Nacne lëëtaaque no me len yadoo, laa zho bdzinne mëdyeen co ga, ziesañ zho win ladznia Dios zigne rnabey ley. 28 Dzigo me wbig bdeedz win, rdeed me xquizh lo Dios, rëb me:

29 Xquizh xquieInzaac luu Dios, mine në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

30-31 ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

<sup>32</sup> iGrëse miech ne ndxie lo guidzliu, me nac biini ne gziini lo zho!

iMe csannziuu zha Israel, ne nac zho zha ne ngab lo luu!

<sup>33</sup> Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdo me. <sup>34</sup> Dzigo bnaab Simeón lo Dios gacniin Dios me gza me mëdyeen co. Blozh ga, rëbchaa Simeón lo xnäa win:

—Tib guielbley nroob ne gac mëed rii lo zha Israel, por win ndal zho griece lo guielcow ne no zho, laa zho gbig lo Dios. Ni scagaa zrieequia zha ne glëenie win, per lëëque zha csacsi zho ga. Mban gac zdo luu, nroob guielnë ne tso luu gan luu zha sac miech win. <sup>35</sup> Ga glu ganle zha nac zdo tib tib miech.

<sup>36-37</sup> Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsieel me. Lëë pxoz me ga brieelë Fanuel, lëë zhey co ga nac zha xtii Aser. Tib men ne rteed xtiidz Dios lo miech nac me, <sup>38</sup> dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac men ne quiambëz zho ga guiaadsilaa zho.

<sup>39</sup> Blozhse been José mine rnabey xley Dios grop me Marí, dzigo laa me wbi ga.

Bdedraa ga, beynie me mëed co Nazaret, zaatne nac ladz me. <sup>40</sup> Ga broob win, zigse zierooob win scase scase rac macis win, scase riabiiniraa win. Tibaque nacie Dios win.

### *Biaan Jesús len yadoo*

<sup>41-42</sup> Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëedbgui ne rap lalga iz, zrieelole tsie zho lo lni co.

<sup>43</sup> Zeene laa lni co bded, laa me bio nëz grop me laa me wbi ga. Ib biend me biaan win Jerusalén, <sup>44</sup> tibaque güeynie guic me lad grëraa miech ne wbire lni, lad co zienal win. Laa me no nëz, zeene bdzetaa dzew, laa me psilo rguib win, bnaabdiidz me lo grë zha lidz me, lo grë zha ne runbey me, <sup>45</sup> per ni tib zho choot rdeete win diidz. Nacne wbireque me nëz Jerusalén stib, zieguib me win.

<sup>46</sup> Dze ne racle tson ngbidz blozh lniw, dzigoraa güeydziel me win len yadoo, laa win zob lo grë zha ne nac maistr ley, noquiaadiag win grë zhiwseed zho ni nzian grë ncuaañe rnaabdiidz win lo zho. <sup>47</sup> Rzee zdo zho ran zho scataa nixbiini win, niicle zeene rnee wina, zeene rtsiregaa win lo xtiidz zho. <sup>48</sup> Zeene gon me laa win zob lad grë men co, bzee zdo

me; dzigo rëbchaa xniaa win lo win:

—Xin, ¿pe nacne squi been luu? Ptseeb luu no gon, quia no grop no pxoz luu noguib no luu.

<sup>49</sup> Pquiab win rëb win:

—Nguibde to naa. ¿Pe ran̄de to ib none guṅ naa xtsiin Pxoz naa?

<sup>50</sup> Ib bien̄d me pe nacne sca rëb win. <sup>51</sup> Dzigo laa win zienal zhits me, laa me zeynie win Nazaret; nose grë miṅ co zdoo xniaa win.

Tib mēēd nguzobdiidz nac win, ron win xtiidz me. <sup>52</sup> Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

### 3

*Psilo Juan Bautist noseed me miech*

(Mt. 3:1-12; Mr. 1:1-8; Jn. 1:19-28)

<sup>1-2</sup> Bdziṅ dzew, laa Juan psilo pseed miech. Lēē leṅ iz co rac tsiin iz zob men̄ ne lē Tiber nac me rey, rnabey me grë guiedz ne ngab lo zha Roma. Leṅ dze co zob Pilat rnabey me grë guiedz ne ndxie nēz Judé, laa Herod zob rnabey grë guiedz ne ndxie nēz Galilé. Leṅ dze coque zob bets Herod, men̄ ne lē Lip rnabey me grë guiedz ne ndxie nēz Ituré ni nēz Traconit; laa Lisian rnabey grë guiedz ne ndxie nēz Abilin. Zha ne nac zhipxoz nroob zha Israel leṅ dze co, nac Anás ni Caifás. Leṅ dze copaa nagon güeynee

Dios lo Juan (xpēēd Zacarí) dan ngan ne no Juan ga.

<sup>3</sup> Nacne hor co psilo Juan güeyted me grë guiedz ne ndxie ro guiubee Jordán, rnee me lo grë miech co, csaan zho xquieṅtseeb zho gbig zho lo Dios ni chobnis zho, zeena csilaa Dios zho lo grë xtoṅ zho. <sup>4</sup> Ga brieequia mine bnee Isá, men̄ ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men̄ zēēb tib dan ngan, rnee me:

“Golzhixcuaa nēz ne ted men̄ ne rnabey,

golsaan grë guieṅtseeb ne run to.

<sup>5</sup> Zaatne nac leṅ blē, golcodzēēw,

grë gui glaa, grë gui las, golsiaablow.

Nēz ne niecw, nēz ne quiaya quiaguiet nac, golzhixcuaaw.

<sup>6</sup> Grēse miech, laa zho gan men̄ ne pxeel Dios ga ziaadsilaa zho.”

<sup>7</sup> Zeene ran Juan laa miech rdziṅ lo me cchoobnis me zho, rnee me lo zho:

—¡Miech ngoopdoṅ, masaque nac to zig nac mee! Naṅ to na lēē, loxaque chobnis to laa to laale lo grë guieṅnēdox ne ziaadyob guiaad. <sup>8</sup> Led scada gon, none ndzinli gban to zeena glu nlipaa psaan to xquieṅtseeb to. Ni gacniatsde to guiab to, loxaque por nacse to zha xtii Abraham, laa Dios csilaale to; sac gneli naa lo to ganle, telne gacladz Dios, haxta grë quie zac gnabey me tsaalow miech

ne gac zha xti Abraham.  
 9 Nanle to ganle, grē yag nex  
 ne rquiad nex lo, zeene ran  
 zho sca naca, rchug zhow,  
 rzēeg zhow; scadaa nagon  
 sac grē zha ne gband zigne  
 racladz Dios, ib tedlaad zho  
 lo gui; sac rriequia laa me  
 nzhenle xquiibyag me, cchug  
 me grē yag ne sca nac.

10 Dzigo rnabdiidz zho lo  
 Juan, pe no gun zho parne  
 ygaad zho grē guielnē co.  
 11 Dzigo rquiab me rnee me  
 lo zho:

—Telne quianie to chop lar  
 ne racw to, none gdeed to  
 tiba lo zha ne guieṅd xab;  
 telne quianiegaa to ncuaane  
 gow to, none gdeed to palala  
 yquiin zha ne quianieda.

12 Wbigaque bla recau-  
 dator ne zie chobnis, rnab-  
 diidz zho dien pe gun zho.  
 13 Pquiab Juan, rēb Juan lo  
 zho:

—Cuandraa to samiech to,  
 mine rieguialse zho quizh  
 zho, min co golnab lo zho.

14 Ye zla menṅuiib wbig, rn-  
 abdiidz zho rēb zho:

—¿Telzhe no waa, pe nac  
 mine dziuun no?

Rquiab Juan rnee Juan lo  
 zho:

—Ndzinli golgac, ib ctsebde  
 to samiech to par dien pe gla  
 to lo zho; zha ne peet xtold, ib  
 yquiaaquide to zho ncuaane  
 beenḍ zho. None sac zdoō to  
 dimi ne quiayazh to.

15 Nzian grē miech co  
 quiambēznē zho gacnan zho  
 dien pe lēēle Men ne bzooblo  
 Dios ga cxeel me nac Juan.  
 16 Dzigo rēb Juan lo zho:

—Tib wrobnisse nu rnedz  
 naa lo to, sangue men ne no  
 guiaad ga Espiritu Sant gdeed  
 me lo zha ne gliladz me; ni  
 scagaa zha ne gliladz me,  
 sonēz me zho zaatne nitlo  
 zho. Ne nligaa men non nac  
 me, tel naa peet nond naa,  
 per ni par tib ngunḍziin ne glit  
 lab me ni me, raguald naa  
 gac naa. 17 Laa me guiaad  
 zig tib zha ne rbeeguizh  
 zhobxtil, sac zha co, rlozhse  
 rbeeguizh zho zhob rgotsow  
 zhow, laa paj rlaal zho lo gui,  
 ga reca. Per gui ne gzēeg  
 grē paj ne guiadbee me ga,  
 gdziṅd dze guiuuw.

18 Sca rnee me lo zho, par  
 guien zho zha nac Xtiidz  
 Dios. 19 Tib vuelte haxta lo rey  
 Herod goctox me, sac lēēque  
 Herodi, wnaa ne nac tsieel  
 bets Herod nonie Herod;  
 grē guielntseeb ne quiayun  
 Herod, blisqui mew. 20 Per  
 laa ne nion Herod diidz,  
 lel been me stib guielntseeb,  
 bnabey me bgaa Juan bio  
 Juan ladzguiib.

### *Brobnis Jesús*

(Mt. 3:13-17; Mr. 1:9-11)

21 Len dze ne nochoobnis  
 Juan miech ga, tib dzew laa  
 Jesús bdziṅ lo Juan ga, ye  
 me bnaab cchoobnis Juan me.  
 Blozhse brobnis me, laa me  
 quiazodiidznie Dios, tibaque  
 zeene bzhiāl zhan gbaa, 22 laa  
 men ne nac Espiritu Sant biet,  
 rlu me zig rlu tib palom, laa  
 me bdziṅ guic Jesús, hor co  
 blu zēēb tib tsi men co nēz  
 gbaa, rnee me:

—Xin, rleynie naa luu gon,  
 nziuu luu lo naa.

*Xmengol Jesús**(Mt. 1:1-17)*

<sup>23</sup> Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

<sup>24</sup> José co goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

<sup>25</sup> José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

<sup>26</sup> Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

<sup>27</sup> Judá goc xpëed Joan,

Joan goc xpëed Resa,

Resa goc xpëed Zorobabel

Zorobabel goc xpëed Salatíel,

Salatíel goc xpëed Neri,

<sup>28</sup> Neri goc xpëed Melqui,

Melqui goc xpëed Adi,

Adi goc xpëed Cosam,

Cosam goc xpëed Lmodam,

Lmodam goc xpëed Er,

<sup>29</sup> Er goc xpëed Josué,

Josué goc xpëed Liezer,

Liezer goc xpëed Jorim,

Jorim goc xpëed Matat,

<sup>30</sup> Matat goc xpëed Leví,

Leví goc xpëed Simeón,

Simeón goc xpëed Judá,

Judá goc xpëed José,

José goc xpëed Jonán,

Jonán goc xpëed Liaquim,

<sup>31</sup> Liaquim goc xpëed Melé,

Melé goc xpëed Mainán,

Mainán goc xpëed Matata,

Matata goc xpëed Natán,

<sup>32</sup> Natán goc xpëed David,

David goc xpëed Isaí,

Isaí goc xpëed Obed,

Obed goc xpëed Booz,

Booz goc xpëed Salmon,

Salmóngoc xpëed Naasón,

<sup>33</sup> Naasón goc xpëed Minadab,

Minadab goc xpëed Aram,

Aram goc xpëed Srom,

Srom goc xpëed Far,

Far goc xpëed Judá

<sup>34</sup> Judá goc xpëed Jacob,

Jacob goc xpëed Isaac,

Isaac goc xpëed Abraham,

Abraham goc xpëed Taré,

Taré goc xpëed Nacor,

<sup>35</sup> Nacor goc xpëed Serug,

Serug goc xpëed Ragau,

Ragau goc xpëed Peleg,

Peleg goc xpëed Heber,

Heber goc xpëed Sala,

<sup>36</sup> Sala goc xpëed Cainán,

Cainán goc xpëed Rfaxad,

Rfaxad goc xpëed Sem,

Sem goc xpëed Noé,

Noé goc xpëed Lamec,

<sup>37</sup> Lamec goc xpëed Matusalén,

Matusalén goc xpëed Enoc,

Enoc goc xpëed Jared

Jared goc xpëed Mahalaleel,

Mahalaleel goc xpëed Cainán,

<sup>38</sup> Cainán goc xpëed Enós,

Enós goc xpëed Set,

Set goc xpëed Adán.

Adán goc zig tib xpëed Dios.

**4**

*Gocladz mendox niungüet ma Jesús*

*(Mt. 4:1-17; Mr. 1:12-15)*

<sup>1</sup> Zeeñe blozh brobnis Jesús guiubee Jordán ga,

nacnie Espíritu Sant me, dzigo güeynie me Jesús tib dan ngan, zaatne choot miech guiend. <sup>2</sup> Ga bio Jesús, ni tib lë peet dowd me; gzase dze pquianał mendox niungüet ma me niun me mine racladz ma. Zeene goc choo dze no me ga, gon ma lëbdraa me rcaabedz me, <sup>3</sup> dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaane gow luu.

<sup>4</sup> Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

<sup>5</sup> Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me, <sup>6</sup> rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guielndaan ne no low, znedz naaw lo luu <sup>7</sup> telne squiitsgzhib luu lo naa, gunnon luu naa.

<sup>8</sup> —iBiche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquiitsgzhib luu; ni mine rnabey me min co none gun luu.”

<sup>9</sup> Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu, <sup>10</sup> benque

led znu rnee lo Xtiidz me: “Znabey Dios grë xanj me yquiaanap luu, <sup>11</sup> zguedz zho luu, zeena ni tib quie ycaand ni luu.”

<sup>12</sup> Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me gun me ncuaane nod gun me.”

<sup>13</sup> Gonse ma rdziel zha gunüet ma Jesús, dzigo biche ma lo me palal dze.

<sup>14</sup> Blozhse ga, dzigo laa Jesús wbi ga bdzin me nëz Galilé, scaque nacnie Espíritu Sant me. Znuse beenbey miech me por grëtaa ncuaan ro ne run me, grëse guiedz ne ndxie nëz co, rzeet zho me. <sup>15</sup> Zaatne rdziintaa me, rie me xyadoo zho, rseed me zho Xtiidz Dios, rleynie zho me, rley zho ron zho grë mine rnee me.

### Güey Jesús Nazaret

(Mt. 13:53-58; Mr. 6:1-6)

<sup>16</sup> Tib dzew, laa me bdzin Nazaret, zaatne broob me. Gol dze ne rdziiladz zha Israel lo dziin, güey me xyadoo zho zig runaque me grëraa zaatne ziye me. Zeene gol horne rlab zho Xtiidz Dios, dzigo bded me, <sup>17</sup> bdeed zho mine pquiaa Isá glab me. Pخال me low, lëetse zaatne znu rnee blab me:

<sup>18</sup> ZhiEspíritu Dios nacnie naa,

ible Dios bzooblo naa, gnee naa Diidz Ndzon ne nac xtiidz me lo grëse zha ne rquinnëw.

Laa me pxeel naa gne naa lo grë zha ne ngadoo lo ncuaañe nosacsi zho, zeena guien zho zha grieë zho lo grë ncuaañ co.

Laa me pxeel naa gziini naa lo grë zha ne no lo guielcow,

grë zha ne rzac guien draa zha grieë zho lo zhizhgab zho, laa me pxeel naa, naa cuee zho lo zhgab co.

19 Laa naa zialnie diidz lo miech, gacnañ zho pa lotaa noxco Dios gunlay me grëse zha ne gbig lo me.

20 Blozhse blab me lo co, ptibëd mew bdeed mew lo zha ne quianapa, dzigo laa me bzob. Grëse zha ne no leñ yadoo ga, dze rwi zho lo me, 21 dzigo bnee me lo zho, rëb me:

—Grë diidz ne blozh blab naa lo to nu, leñ dze rii gon laaw noyac cumplir.

22 Grëse zho rleynie zho me, rlozhd gzee zdoo zho ron zho grëtaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed men qui? ¿Led lëë xingan José i!

23 Dzigo rëb me lo zho:

—No tib diidz ne rnee: “Zha ne racnie stib miech, none guien zho glo menladz zho gacnie zho.” Rienpaa naa gon, min co racladz to gnë to lo naa; quiambëz to gan to grë milagr ne ziyon to beñ naa guiedz Capernaum.

24 Gneli naa lo to ganle: Zha ne riaad rteed xtiidz Dios, ible znu ranzed menladz

zho zho; gane rriee lod pe gun zho. 25-26 Golsoladz ganle zeene biaad Lí, bio tib tiemp ne biabd guie tson iz grol, tib gbindox ne gon miech Israel nu. Ndal wnaa viud ne nac menladz me mban bded zho, guien pe nquiin zho, per brieelod niun me xyudar zho; leñ xyudar tib wnaa Sarept pxeel Dios me güeygun me, guiedz ne ndxie gax Sidón. 27 Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; leñ tib zha Siria lë Naamán, men co beenguiac me.

28 Zeene gon zho sca rnee me, blëë zho. 29 Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga, 30 zeene znuse bded me lad zho, ziega me.

*Biac tib mgui ne nosacsi mendox*  
(Mr. 1:21-28)

31 Ga wbi Jesús, bdzin me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho.

32 Rzee zdoo zho ron zho grë zhiwseed me, grëse mine rnee me, rlu zha rnabey nac me.

33 Tib vult, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

34 —¿Psaan no! ¿Pe gun luu no Jesús Nazaren? ¿Ziaad luu lëë par gnitlo luu no? ¿Runbey

naa luu, luu nac meṇ ndzon ne pxeel Dios!

<sup>35</sup> Dzigo goctox me lo ma, rēb me:

—iPsoog ro luu! iNa zeena psaan meṇ qui!

Horco, squi ndxie grē miech co bron ma mgui co liu, mincose been ma, laa ma brieē laa ma zie. <sup>36</sup> Rlozhd gzee zdoo grē miech co, rnabdiidzlsa zho rnee zho:

—iZha nac xtiidz meṇ qui, zha nacne haxta mendox rdzieb ma me, rzhoon ma zeene laa me ractox lo ma?

<sup>37</sup> Grēse guiedz ne ndxie gax ga, zigse zie dze rzhoon diidz scataa milagr ne ruṇ me.

### *Biac xniadzoop Pedr*

(Mt. 8:14-17; Mr. 1:29-39)

<sup>38</sup> Brieē Jesús leṇ yadoo, zie me nēz lidz Simón. Bdziṇ me lēētaque laa xniadzoop Simón nix rlan xlēē, nzhoorac me; dzigo wbig zha ne been vis laa zhuz co rzacnē, bnab zho lo me guṅguiac me me. <sup>39</sup> Nacne bded me zaatne nix zhuz co, goctox me lo xlēē co. Horcogazha laaw blēz, guche zhuz co ga, beenlo me ncuaaṇe dow zho.

<sup>40</sup> Laa ngbidz rzēēblew, zeene bdziṇ grē miech co lo Jesús, bdziṇnie zho grē zhimguidz zho. Zhaase zhaase guielguidz ne rzac tib tib mguidz co, per grēse zho zigne rxobnia me guic zho laa zho riac. <sup>41</sup> Nzian zho beṇcxoon me mendox ne nosacsī zho, zeene laa ma rrieē, nguiedz roptsie ma rnee ma lo me:

—iRdziuunbey no luu, Xpēēd Dios nac luu!

Dzigo ractox me lo ma, rsaand me gnee ma cho nac me, sac wen wen naṇ ma me nac Meṇ ne nacle diidz ga cxeel Dios.

<sup>42</sup> Biini liu co, silgaw brieē Jesús lad guiedz co güey me tib zaatne choot miech guiend. Zeene bnit me lo grē miech co, brieē zho güeyguib zho me haxta bdziel me lo zho; rnab zho lo me Capernaumse ga cuēz me, paat tsiedraa me. <sup>43</sup> Dzigo rēbchaa me lo zho:

—Grieeloda, ib none ga naa grēraa guiedz, gaseed naa miech gacnaṇ zho zha racladz Dios gban zho; sac ible miṇ co pxeel me naa zial naa.

<sup>44</sup> Nligaaw, grēse guiedz ne ndxie nēz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grē miech co.

## 5

### *Nroobdox mel bgaa*

(Mt. 4:18-22; Mr. 1:16-20)

<sup>1</sup> Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grēse zho racladz yquiaadiag zho Xtiidz Dios.

<sup>2</sup> Gax ga zo chop barcw, blalaa ngooz mel biet leṇa, laa zho no lo nis ga noguiib zho guiex ne rnaaz zho mel.

<sup>3</sup> Nacne güey me bieṇ me tib leṇ barcw co, bnabey me Simón psēē Simóna bzēēba lo nis palal; sac lēē xbarcw Simón ga. Dzigo leeṇ co bzob me pseed me grē miech co.

<sup>4</sup> Zeene blozh bnee me lo zho, rēbchaa me lo Simón:



—Nana ganle zeeynie barcw rii guionie new zaatne quietlaa nis, zeena gron to guix ne rgaa mel i gnaaz to palal ma.

<sup>5</sup> Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

<sup>6</sup> Bron zho guix co lo nis, zeene laa zho cueew, ya zig zrieza, biodzëse lena no mel.

<sup>7</sup> Horco blunia zho lo grëraa zha ne nacgrë zho no stib len barcw co, parne tsie zho gun zho xyudar zho. Bdziñ zha co gogcza zho, gropse len barcw co pcodzëe zho grë mel co; ya zig zdedquiew lo nis.

<sup>8</sup> Zeene gon Simón scataa mel taf ne bgaa, pquiitsgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

<sup>9</sup> Zigtaa Simóna, zigtaa zha ne ziegza mew, rzee zdo zho ni rdzieb zho scataa nac milagr ne gon zho ga.

<sup>10</sup> Scasaque rac Jacob ni Juan (xingan tib men lë Zebedé), zha ne nacgza Simón.

—Gdziebd luu —rëb Jesús lo Simón—. Zigne squi gon rioxco luu riaad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëeb xnëz Dios.

<sup>11</sup> Zigne bdziñnie zho barcw co ro nis, bzo zhow ga, laa zho ziena zhits me.

*Biac tib zha ne rlan guiedz lepr*

(Mt. 8:1-4; Mr. 1:40-45)

<sup>12</sup> Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquiitsgzhib mgui haxta bdziñ lo mgui liu, rëb mgui lo me:

—Tebaa siguieel luu gunguiac luu naa.

<sup>13</sup> Dzigo pxobnia me guic mgui, rëb me:

—Zunguiac naa luu. ¡Ni-inagazh laa luu guiaanmbel!

Horcogazha laa mgui biaanmbel lo guiedz co. <sup>14</sup> Dzigo pso Jesús diidz lo mgui, choot lo gzodiidzd mgui zha biac mgui; ni rëb me lo mgui:

—Bzë, güey lo pxoz, güeysan gon ne rnabey xley Moisés gdeed luu; zeena gan zho ganle laa luu biacle.

<sup>15</sup> Niicle sca nëd me gacnan miecha, per znuse znuse rliaal diidz grëtaa milagr ne ruñ me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho. <sup>16</sup> Zhiga, zhiga rbiche me lo miech, rie me zaatne choot guiend riezodiidznie me Pxoz me.

*Biac tib zha ne gutoo xcuerp*

(Mt. 9:1-8; Mr. 2:1-12)

<sup>17</sup> Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieed dib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë miñe rnee me.

18 Laa grë miech co ndxie ga, zeene bdziñ bla zha bgui, ney zho stib men bgui, zhoobse me lo yag, ib gacd sē me sac dipse me gutoo. Gocladz zho nzëebnie zho me len yu ne no Jesús ga, ndziñnie zho me lo me. 19 Per ib gōcd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacnë co dib yag ne zhoob me ga, bdziñ me lo Jesús.

20 Zeene gon Jesús ne nli dib zdoo zho rnalo zho me, me gunguiac men rzacnë co, rëbchaa me lo men co:

—Peet tsienied guic luu, ni-inagazh laa naa gun perdon grëse xtol luu.

21 Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëe men co nac Dios!”

22 Bienga Jesús sca quianee zho, dzigo rëbchaa me:

—¿Pe nacne rzac to laa naa quiayun falt? 23-24 Nli cholze zac guiab laa zho gun perdon xtol miech, per grieelod gunguiac zho zho. Golwi ganle laa naa gunguiac mgui rii, zeena gacnañ to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacnë co, rëb me:

—¡Niinagazh guche i, bi yag ne bzhoob luu i, zeen bzé!

25 Zigne sca bnee me, laa mgui co bzoli, squi ndxie grë

miech co laa me blis yag co, ine roolnie me Dios laa me zey. 26 Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—¡Nadzesi, laa ne bdzian ncuaane gard dzian ne!

### *Bredz Jesús Leví*

(Mt. 9:9-13; Mr. 2:13-17)

27 Blozh ga, laa Jesús briece ga. Ro nëz zieded me gon me tib men lë Leví, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús. 28 Biaanque xmezh me ga, guso me ga, laa me zienal.

29 Bded ga, güeynie me Jesús tib wagw lidz me. Grë zha ne run dziin co, ni grëragaa zha ne bdziñ ga, tipse brenie Jesús zho grë xpëedscuel me.

30 Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbchaa zho lo xpëedscuel me:

—¡Lëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

31 Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan? 32 Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

*¿Pe nacnercuand xpëëdscuel Jesús?*

*(Mt. 9:14-17; Mr. 2:18-22)*

<sup>33</sup> Bdzinaque bla zha ne bn-abdiidz, rëb zho lo Jesús:

—¿Pe nac waa ib rcuand xpëëdscuel luu, tibaque quiayow zho, tibaque quiaye zho? Zha xpëëdscuel Juan, zha xpëëdscuel farisé, rdzian no tibaque nocuan zho, tibaque nonab zho lo Dios.

<sup>34</sup> Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuand grë zha ne ndxie lo lni, ni ran to laa mgui ne not-sieelnia zo lo zho? <sup>35</sup> Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual ycuand zho.

<sup>36</sup> Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox.

<sup>37</sup> Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stsiez vin cuba; lozh ga zigtaa vina, zigtaa guid cow, laaw nitlo ga.

<sup>38</sup> Gacxe waa, tel vin cuba none len tib guid cubaque tsotsowa.

<sup>39</sup> 'Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: "Vin ne padzeela

notsow, min co nizhrra rdioow."

## 6

*Dze ne rdziiladz zha Israel lo dziin*

*(Mt. 12:1-8; Mr. 2:23-38)*

<sup>1</sup> Tib vuelt, lëetse dze ne rdziiladz zho lo dziina, bded Jesús zaatne zëëb zhobxtil grë xpëëdscuel me; psilo zho pchoo zho mzion zhobxtil co, zigse runmbe zho zhob co, scase row zhow. <sup>2</sup> Gon blalaa zha farisé sca no zhò, dzigo rëbchaa zho:

—iLëda i gon noyun to! Golguien ganle dze nda nac dze rii.

<sup>3</sup> Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

<sup>4</sup> Rneew, bzëëb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

<sup>5</sup> Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia*

*(Mt. 12:9-14; Mr. 3:1-6)*

<sup>6</sup> Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me.

<sup>7</sup> Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

<sup>8</sup> Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga; <sup>9</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaane yquuin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

<sup>10</sup> Dze rwi me lo zho tib tib zho, dzigo rëbchaa me lo mgui co:

—¿Bzigaa nia luu!

Zigne bzigaa mgui co nia mgui, laaw biac.

<sup>11</sup> Zeeñe gon zho sca beenguiac me nia mgui, per nli rlëe zho, psilo zho quianediidz zho dien zha gun zho me.

*Bzo Jesús zha ne tsienee xtiidz me*

(Mt. 4:23-25; 10:1-4; Mr. 3:13-19)

<sup>12</sup> Tib vuel, güey Jesús tib guic gui, dipse guieel blëz me ga bzodiidznie me Dios.

<sup>13</sup> Biini liu co, bredz me grëse zha ne nac xpëedscuel me, dzigo lad co blë me tsiipchop zho, zha ne tsiepaa tsienee xtiidz me lo miech. <sup>14-16</sup> Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

<sup>17</sup> Cho gui co biet me grë xpëedscuel me, bdzin zho tib ro lets. Loxaque bdzin zho ga, laa stib dzoon xpëedscuel me bdzinaque lo me ga; zhiits co nal stib dzoon miech, no zho racladz yquiaadiag zhiwseed me, nogaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

<sup>18</sup> Nzian grë zha co nosacsi mendox, grëse zho beenguiac me zho. <sup>19</sup> Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguiidztaa rzac zho, runguiac me zho por grëtaa poder ne rap me.

*Cho nac zha ne wen zie*  
(Mt. 5:1-12, 38-48; 7:1-5, 12)

<sup>20</sup> Dzigo dze bui Jesús lo grëse zha ne nac xpëedscuel me, rëb me lo zho:

—¿Wen zie zha ne rien none gbig zho lo Dios, sac ib zdzin zho zaatne rnabey me!

<sup>21</sup> ¿Wen zie zho! Sac niicle telne noyan zho gbin, per me

gdeed ncuane yquiiin zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

<sup>22</sup> 'Zig nac to, zeene csilo miech glëenie zho to, guncxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, iwen zie to ga! <sup>23</sup> iNley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

<sup>24</sup> 'Sanguë grë zha ne rzac grëse ncuane rquiiin zho quianie zho, ib rquiind zho gbig zho lo Dios, iprobsaxe zho, sac lo guidzliu riise gac ncuaan co guielbley lo zho!

<sup>25</sup> iProbsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielnë!

<sup>26</sup> 'Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, iprobsaxe to telne yguib to sca gleynie miech to!

<sup>27</sup> 'Golquiaadiaga ganle: Zha ne rlëe lo to, golleynie zho, tel pe nac xliaadz zho golgacnie zho. <sup>28</sup> Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho. <sup>29</sup> Tel gneedz zho tib puñet lo

to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho. <sup>30</sup> Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho. <sup>31</sup> None zaacse gac to lo miech, zeena scagaa zha, zaacse gac zho lo to.

<sup>32</sup> 'Sac gon, tel loxaque zha ne ndzieeldiidz to, zha cose rleynie to, jled ncuaan nroobd ga run to! Haxta grë zha ntseeb run min co. <sup>33-34</sup> Tel loxaque zha ne runsegaa favor lo to, lo zha cosegue run to favor; zeene rungaa to tib pextad, lo zha ne rgobeyse to zguizh lo to, lo zha cose runxtad to, jni lalnu peet nond ncuane run to ga! Sac gon haxta grë zha ntseeb run min co.

<sup>35</sup> 'Golguien sca, none gleynie to zha ne rlëe lo to, none gacnie to zho lo xliaadz zho. Zha ne guiaad tib pextad lo to, goldeed ncuane rnab zho, ib guiabde to nend lega scase gun to favor co lo zho. Zha ne gun grë min rii, nroob guielnzaac ne gdeed Dios lo zho, ni ga glu zho ganle nli xpëed me nac zho; sac gon tel me wen me lo grëse miech, niicle zha ne run falt lo mew, niicle zha ne riendgaa gdeed xquizh lo me, rsaand me zho. <sup>36</sup> Ndzinli sca golgac, zigne sca wen Pxoz to lo grëse miech, scaque none wen gac to lo zho.

<sup>37</sup> 'Ib gunde to në gac zdoo to, zeene ran to ncuane nonguield ne run stib miech,

sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon; <sup>38</sup> sac grëse ncuane run miech, mincoque rcaania zho. Grëse ncuane gun to, scaania tow, ni haxta ndziibraa mine ycaania to. Sac ncuane gun to lo samiech to, mincoque gun Dios to.

<sup>39</sup> Blozh sca bnee me, dzigo rëbchaa me:

—Golwi ganle, zig nac zha ne rold lo, ĩniacxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

<sup>40</sup> 'Grë zha ne nac mëedsuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, zdzin zho medid co.

<sup>41</sup> 'jLëda ga gon tso to lozhd gzee zdoo to dien cho pe run, ni nenda mazdraa mine run to! <sup>42</sup> ĩPe ro to glisqui to mine run stib zho, ni tel mazdraa nac mine run to? ĩGolguien sca glude to ncuane nacde to! ĩGlo goltsoxco ndzinli gac to, dzigo lozh ga zac tsienee to zha gacndzinli stib zho!

*Nex rlu zha nac tib tib yag*  
(Mt. 7:17-20, 24-27;  
12:34-35)

<sup>43</sup> 'Tib tib yag rdeedsew xnexa. Grieelod yquia nex ncuaan tib lo yag ne rdeed nex wen; grieelodgaa yquia nex wen tib lo yag me rquia nex ncuaan. <sup>44</sup> Tel zha nac

nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbë zarz ne gdeed uv. <sup>45</sup> Scadaa nagon nac miech, zha ne wena, ncuaan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

<sup>46</sup> 'Grieelod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

<sup>47</sup> 'Zha ne rquiaadiag mine rne naa, ni rioxco zho rban zhow zigne naca, <sup>48</sup> rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda. <sup>49</sup> Laa zha ne rquiaadiag xtidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bixchew, ni stib lëw biaand.

## 7

*Biac tib zha ne rquia dziin*

*tib lo menquiib*  
(Mt. 8:5-13)

<sup>1</sup> Zeene blozh bnee Jesús lo grë miech co, dzigo laa me wbi ga, bdziñ me Capernaum. <sup>2</sup> Lëëtaaque len dze co rzacnë tib zha ne run dziin lo tib men ne rnabey lo xmenguiib zha Roma, no guiedz co; nzhoo rac zho zootle laa zho guetle. Rleyniedox men co zho, <sup>3</sup> zigne bin me laa Jesús bdziñ, lëëlëd pxeel me bla zha ne nac zha non lo menguedz Israel, güey zho güeynee zho lo Jesús siguiel Jesús tsiegunguiac Jesús zhingundziin me. <sup>4</sup> Bdziñ zho bnaab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me, <sup>5</sup> rleynie me menladz ne, haxta bzaa me tib xyadoo no lad guiedz nu.

<sup>6</sup> Dzigo zienal Jesús zhits zho. Zhile gdziñ zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csödziin naa lo luu guiaad luu haxta ro lidz naa. <sup>7</sup> Nligaa rien naa tib zha winse nac naa par gbig naa lo luu, gane niicle biald naa nialdziej naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa.

<sup>8</sup> Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene

rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacgaa zhingundziin naaw, mine rnabeytaa naa zho, run zhow.

<sup>9</sup> Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

<sup>10</sup> Grë zha ne güey mandad ga, zeene bdziñ zho gon zho laa ngundziin co biacle.

*Rrieban xpëed tib wnaa viud*

<sup>11</sup> Bded ga, güey Jesús tib guiedz lë Naïn grë xpëedscuel me, miech guizhiu ne zienal zhits zho.

<sup>12</sup> Zeene bdziñ zho gax ro guiedz co, lëëtaaque bdzieelo zho tib dzoon miech ziequeets xpëed tib wnaa viud; lëese mëed ga lo wnaa co. <sup>13</sup> Gon Jesús zha rac me, pquia zdoo Jesús me, wbig Jesús rëb Jesús lo me:

—¡Goondraa luu!

<sup>14</sup> Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, iguche i!

<sup>15</sup> Horcogazha brieban niib co, bzobli niib, laa niib psilo bnee.

Rley xniaa niib, pcaania me niib.

<sup>16</sup> Zeene gon grë miech co sca brieban mëed co, lala

rdzieb zho, lala rdeed zho xquizh lo Dios, rnee zho:

—¡Tib men nroob ne gon ziadteed xtiidz Dios i, ziaad lo ne! ¡Laa ne bdzian niina ganle, laa Dios ziaadgan ne, ziadbee me ne lo xquielnē ne!

<sup>17</sup> Gdipse nēz Judé, ni grēraa guiedz ne ndxie dib gax ga, gocnan miech milagr nroob ne been Jesús ga.

*Zha ne pxeel Juan Bautist  
(Mt. 11:2-19)*

<sup>18</sup> Bin Juan Bautist grētaa milagr ne run Jesús ga, sac rie xpēēdsuel Juan riezodiidz zhow lo Juan. Dzigo pxeel Juan chop zho, <sup>19</sup> zienabdiidz lo Jesús, dien pe me nac Men ne nole diidz ga cxeel Dios, te dzigora a gdziñ men co ye.

<sup>20</sup> Bdziñ zho lo Jesús, wbig zho lo me, rēb zho:

—Laa Juan pxeel no ziaadnabdiidz no lo luu, dien pe lēēle Men ne nacle diidz ga cxeel Dios i nac luu, te naraa guiaad me ye.

<sup>21</sup> Lēētaaque ndal miech ndxie lo me ga, quiayunguiac me grē men rzacnē. Nzian zho, tel pe guielguidztaa rzac zho, no zho nosacsi mendox, no zho rold lo, grēse zho runguiac me zho. <sup>22</sup> Dzigo rēbchaa me lo zha ne pxeel Juan ga:

—Grēse mine bin to rne naa, grēgaa ncuaane gon to quiayun naa, goltsie golzodiidza lo Juan. Rañ to ganle, grē zha ne rold lo, zha ne nē ni, zha ne rlan guiedz lepr, zha ne rcuaat, grēse zho laa zho riac, haxta grē mengut, rrieeban. Grēsew

golzodiidza lo me, golguiab lo me ganle blactaa zha ne rquuin gbig lo Dios, laa zho noquiaadiag xtiidz Dios; <sup>23</sup> ni golguiab lo me: dichos zha ne tiblrique riladz cho nac naa.

<sup>24</sup> Zeene laa xpēēdsuel Juan zey, dzigo psilo me bzeet me Juan lo grē miech guizhiu ne ndxie ga, rēb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rēb to rlu me zig tib goobgui ne nēzrii nēzrec rey me, <sup>25</sup> te rēb to ye masaque grē lar niazh ne racw zha non nacw me? Per nanle to ganle, zha ne scataa racwxab, len grē yu ne rzob zha rnabey, ga rio zho. <sup>26</sup> Nligaa cho güeynie guic to nac me, ¿te rēb to ye tib men ne noteed xtiidz Diosa?

‘Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grē zha ne ziyun dziin co. <sup>27</sup> Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nēz ne ted luu.” <sup>28</sup> Ne nligaa lo grēse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

<sup>29</sup> Len dze ne nochoobnis Juan miech ga, ndal zha ne bin zhiwseed me, haxta grē zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho. <sup>30</sup> Sangue grē maistr ley ni grē zha farisé,



pe liaadz zho nion zho mine rnabey Dios, ib güeyd zho nchoobnis Juan zho.

<sup>31</sup> Blozhse sca bnee me, rëbcha me:

—Nac grë miech rii, ib riend zho pepaa racladz zho. ¿Cho ganle run zigne run zho?

<sup>32</sup> Lëe zho run mine run grë mëedlas ne rio wguít dib ro nëz. Niicle rool xcompañer win di nguieel, rieded win; niicle roolga zho di ngan, roond win. <sup>33</sup> Sac gon, ziaad Juan, ran zho rowd me grë ncuane nac xquielwagw zho, niicle vina rieded mew; dzigo rnee zho mendox nacie me. <sup>34</sup> Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me. <sup>35</sup> Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

*Güey Jesús lidz tib zha farisé*

<sup>36</sup> Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mezh.

<sup>37</sup> Lad guiedz co no tib wnaa ro nëz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha, brieet me zie me nëz lidz zha co. <sup>38</sup> Bdziñ me ga, wbig me zaatne zob Jesús, psilo me roon me. Zigse roon me, lëeque nis ne riet lo me

ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga blee me nceit co bdëeb mew.

<sup>39</sup> Zeene gon zha farisé co sca been wnaa co, bza zdoo zho rëb zho: “Telne niaca mine nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëebnia zho zhits ni me.”

<sup>40-41</sup> Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediñ dimi lo zho. Tib zho zëeb gaay mil pes plat, stib zho zëeb gaay gayoow. <sup>42</sup> Gonse men co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

<sup>43</sup> Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—. <sup>44</sup> ¡Mincopaa nagon squi rac wnaa prob qui! Gon ganle zeene bzëeb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuiidz mew con guits guic me. <sup>45</sup> Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me

nu tibaque quiatsieelro me ni naa. <sup>46</sup> Nac costumbr none nchoob luu nceit guic naa, per beend luuw; mazd mele gon bиаad biadtēeb me nceit nex rii zhits ni naa. <sup>47</sup> Laa me noyūn min rii, sacne nlipaa rzac zdoo me ben naa me perdon grētaa doḏdox ne nzēeb me. Zigne rneeque ne ga, tel zha ne zhis xtolā, zhi rzac zdoo zho zeene laa zho rac perdon.

<sup>48</sup> Dzigo bnee Jesús lo wnaa co, rēb Jesús peet tsienied guic me, laa Jesús beenle perdon grēse xtol me. <sup>49</sup> Zha ne zobgza Jesús lo mezh ga, zeene gon zho sca rēb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

<sup>50</sup> Horco biire Jesús bnee me lo wnaa co, rēb me:

—Laa naa psilaa luu lo xtol luu, sac dib zdoo luu bnalo luu naa. Bzē naa, peet tsieniedraa guic luu.

## 8

*Güeyseed Jesús miech dipse Galilé*

<sup>1</sup> Bded ga, brie Jesús grē xpēēdscuel me güey me grēraa guiedz ne ndxie nēz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

<sup>2-3</sup> Ye blalaa men wnaa güeynal zhits zho, tel pe ncuaane quianie grē men wnaa co, rdeed zhow run zho xyudar me; sac rzac zdoo zho

beenguiac me zho. No zho beenguiac me lo guielguidz, nogaa zho beñcxoon me mendox ne nosacsi zho. Ga güeynal tib wnaa lē Marí Magdal (lēē wnaa co beñcxoon Jesús gadz mendox ne nosacsi me), ga güeynal stib men lē Zhuan (lēē tsieel Chuz ga, men ne quianap grē lo xtsiin rey Herod) ni stib men lē Susan.

*Nac Xtiidz Dios zig zhobxtil*

(Mt. 13:1-23; Mr. 4:1-20)

<sup>4</sup> Tib dzew, miech guizhiu ne pcaalsa lo Jesús; nzian guiedz ne brie zho bdzin zho lo me. Laa me noseed zho, zeene bzodiidz me tib cuent rii lo zho, rēb me:

<sup>5</sup> —Tib mgui name, brie zho güey zho gon zhobxtil. Zeene laa zho quialaal zhob co liu, now bliaal gax ro nēz, now bliaal lad quie, nogaaw bliaal len yag guiets. Mine bliaal ro nēz ga, zha ne bded bzēni zhow, blozh ga güeyaque grē mguin dow maw. <sup>6</sup> Mine bliaal zaatne nac lad quie, blana per znuse bidza sac guiend gop ga. <sup>7</sup> Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa. <sup>8</sup> Sañgue mine bliaal zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rēb me:

—¿Zha ne racladz guien mine rne naa, yquiaadiag zhow!

<sup>9</sup> Dzigo wbig grē zha ne nac xpēedscuel me, bñabdiidz zho lo me dien zha nac cuent co.

<sup>10</sup> Rēbcha me lo zho:

—Tel to, Dioszhal rlu lo to ganle zha rnabey me, niicle ncuaañe mazdraa ngueetsa; sañgue grēraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguidz zho zha naca.

<sup>11</sup> 'Znu gon nac cuent co: Zhobxtil co nac Xtiidz Dios.

<sup>12</sup> Ro nēz ne sca bliaal zhob co, ga rlu ganle zha rzac zha ne rquiaadiag Xtiidz Dios, per znusaque rdziñ mendox rquiil ma zho gliladzd zhow, zeena laad zho lo dol.

<sup>13</sup> Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdo zho. Nli rliladz zhow palal dze, per zeene ran zho zha run miech zho, zha rnee miech lo zho, rsaanga zhow. <sup>14</sup> Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grē zhgab ne dien zha gapchen cho, dien zha gdeedguxt xcuerp zho lo guidzliu rii, min co rionie guic zho; pa sē zho gban zigne rnabey Dios. <sup>15</sup> Laa lo liu naal co, ga rlu ganle zha rzac zha ne nguudz zdo. Zeene rquiaadiag zho Xtiidz Dios, dib zdo zho rcaania zhow, dib zdo zho rliladz

zhow. Grēse ncuaañe run zho, ndzinli rrieequiaw; sac tiblrique rac zho.

*Xcuent biini*

(Mt. 12:46-50; Mr. 3:31-35; 4:21-25)

<sup>16</sup> Blozh ga, bnee me lo grē miech ne ndxie ga, rēb me lo zho:

—Tsod zha ne yquiaagui tib biini, lozh ga ctoos zho pe cos low, gzolanga zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grēse zha ne sēeb len yu.

<sup>17</sup> Scaque nagon, grē ncuaañe rac ngueets, grē ncuaañe rnee miech zhlian, none xoobneña.

<sup>18</sup> 'Wen wen golquiaadiag mine rne naa, ni goltsoxcow. Sac zha ne tsoxcow, zdeddraa Dios guielbiini lo zho; sañgue zha ne tsoxcoda, haxta tel palalse guielbiini ne rzac zho quianie zho, stiche mew.

<sup>19</sup> Dze co, scaque noseed me miech, zeene bdziñ xniaa me ni zha bets me ziegan zho me. Per brielod ndzin zho haxta lo me, sac miech guizhiu ne ndxie lo me ga.

<sup>20</sup> Dzigo rēb tib zho lo me:

—Laa xniaa luu gon, ni zha bets luu bdziñ ley ziaadguib zho luu.

<sup>21</sup> Pquiab me rēb me:

—¿Xnia naa ye, bets naa ye? Grēse zha ne gon rquiaadiag Xtiidz Dios ni rioxco zho mban zhow, lē zha co nac xniaa naa, zha co nac bets naa, zha co nac bzian naa.

*Pcuēz Jesús tib medox*

(Mt. 8:23-27; Mr. 4:35-41)

<sup>22</sup> Tib bdze dze, bzëëbnie Jesús xpëedscuel me tib len barcw, rëb me lo zho, tedquia zho stib nëz ro nis co.

<sup>23</sup> Laa zho zie lo nis co zeene laa me gootgues. Tibaque zeene psilo brieetib medox, masaque riasoli lo nis co, zootle laa barcw ne no zho ga yguitsle len nis. <sup>24</sup> Zeene gon zho scataa ntseeb rac lo nis co, lëëlëd güey zho güeycuaan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co. <sup>25</sup> Dzigo rëbchaame lo zho:

—¿Pe nacne rdzieb to? ¿Niacne riladzde to Dios dib zdooto?

Ne nligaa rdzieb zho, ni lala rzee zdoozho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

*Men Gadar ne nosacsi mendox*

(Mt. 8:28-34; Mr. 5:1-20)

<sup>26</sup> Bdziñ zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé. <sup>27</sup> Laa Jesús bietdze len barcw, zeene laa tib mgui ne no nëz co bdziñ lo me. Mban rlu mgui co nosacsi mendox me, niicle xab me nacwdraa me; ib rbëzd me lidz me, niapse grë len xpaan gutoo rio me. <sup>28</sup> Zeene gon me Jesús, masaque roptsie me bdziñ me pquitsgzhib me lo Jesús, zëëb tsi me rnee me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguiel csacsid luu naa!

<sup>29</sup> Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzë me grë dan ngan, zaatne choot miech guiend.

<sup>30</sup> Dzigo bnabdiidz Jesús lo ma dien cho lë ma. Pquiab ma rëb ma:

—Legion lë no.

Sca rëb ma sac nzian nac ma no ma zdoomgui co. <sup>31</sup> Ni bnab ma lo Jesús gzonëzd me ma lo ncowdoo ne noraa ma ne nacgrë ma. <sup>32</sup> Gaxaque gandxie tib dzoon nguts notop lag, bnab ma gdeed me didzbeyle lose grë nguts co gdzin ma. Dzigo bdeed me diidz.

<sup>33</sup> Horco laa grë mendox co psaan mgui co, güeysëëb ma zdoogrë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaal ma haxta lo nis; grëse ma gut.

<sup>34</sup> Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga. <sup>35</sup> Nacne brieegrë miech co ziewi zho. Zeene bdziñ zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me. <sup>36</sup> Psilo grë zha ne gon zha biac me rzodiidz zhow lo grë zha ne

bdziṅ ga. <sup>37</sup> Mazdraa bdzieb grē miech co bin zhow, dzigo mazd bñab zho lo Jesús siguiel me gbi me xtan zho.

<sup>38</sup> Zeene laa Jesús zie sēeb me leṅ barcw par gbi me ga, dzigo wbig mgui co rñab me lo Jesús siguiel Jesús tsienal me zhits Jesús; per bzhiguiel Jesús nienal me, rēb Jesús lo me;

<sup>39</sup> —¡Biaan! Güey, güeyzodiidz lo grē menlidz luu ganle zha nactaa milagr ne been Dios beenguiac me luu.

Dzigo wbire meṅ co. Güey me lad guiedz, grēse lo miech güeyzodiidz me zha nactaa guielnzaac ne been Jesús ga, beenguiac Jesús me.

*Brieban tib xpēdwnaa tib meṅ lē Jair*

(Mt. 9:18-26; Mr. 5:21-43)

<sup>40</sup> Zeene laa Jesús biire bdziṅ stib nēz ro nis co, miech guizhiu ne quiambēz me ga, rley zho goṅ zho laa me bdziṅ. <sup>41</sup> Loxaque bdziṅ me, laa tib meṅ ne rñabey yadoo lē Jair wbigle pquitsgzhib lo me. Rñab Jair siguiel me tsienal me lidz Jair tsiegunguiac me tib xpēdwnaa win Jair.

<sup>42</sup> Nzoo rac mēed co, tib mēed tsiipchop iza, ni lēese mēed ga lo me.

Dzigo laa Jesús zie nēz lidz meṅ co. Miech guizhiu ne zienal zhits me, haxta rtaagw zho me. <sup>43</sup> Lad grē miech co zienal tib wnaa rzacnē, gogle tsiipchop iz rlan me tib guielguidz, rzac me zigne rzac grē meṅ wnaa gzob mēē; tibaque rlan mew ib rbēzda.

Grēle ncuaane rap me bloozh me lo grē meṅ ne run rmed, per ni tib zho runguiacd me. <sup>44</sup> Laa me no lad co, tibaque wbig gax me nēz zhits Jesús, bzheṅ me ni lar ne mbix Jesús; hor cogazha laa me biac. <sup>45</sup> Bien Jesús sca bzheṅ wnaa co lad xab me, dzigo rēbchaa me:

—¿Cho ga bzheṅ lad xab naa?

Grēse zho rnee led zhada. Dzigo rēbchaa Pedr lo me:

—Maestro, wi ganle zha ndaagwtaa ziaad luu lad grē miech rii, haxta rcheep zho luu, ¿zha nan luu choot xend lad xab luu?

<sup>46</sup> —Per no cho bzheṅ lad xab naa —rnee me—, sac bienpaa naa beenguiac naa zho.

<sup>47</sup> Zeene goṅ wnaa co bien Jesús sca bzheṅ me lad xab me, rdzieb me laa me wbig pquitsgzhib me lo Jesús. Squi ndxie grē miech co, bzodiidz me zha nacne sca been me, ni zha zigne bzheṅ me lad xab Jesús laa me biac.

<sup>48</sup> Dzigo rēbchaa Jesús lo me:

—Xin, laa luu biac sacne dib zdoo luu bnalo luu naa. Bzē na, peet tsieniedraa guic luu.

<sup>49</sup> Laa Jesús bii quianeeque lo wnaa co, zeene laa tib zha ne nac mandad ziaad nēz lidz Jair bdziṅ, rēb zho lo Jair:

—Csodziindraa luu lo men qui, laa xpēed luu gutle.

<sup>50</sup> Zeene goṅ Jesús sca rēb zha co, rēbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpēed luu.

<sup>51</sup> Bdzin zho lidz Jair, psaandraa Jesús nał grē miech co zhits me ndzin zho zaatne nix mēēd co. Loxaque Pedr, Jacob, ni Juan, pxoz win ni xniaa win bzēēbnie me len yu ne nix win. <sup>52</sup> Grē miech ne ndxie ga, roon zho no zho xquielnē win; dzigo rēbchaa Jesús lo zho:

—Goonde to; sac gon nixguiesse mēēdwin rii, gute win.

<sup>53</sup> Psilo zho lel rzhidznie zho me, sac nanpaa zho gutle win. <sup>54</sup> Dzigo whig me, bzhen me nia win, nguiedz bnee me lo win, rēb me:

—¿Guche i na, ndzooop yeen!

<sup>55</sup> Zigne sca bnee me, laa mēēd co brieaban, laa win guche ga; dzigo bnabey me bguiaaṅ zho win.

<sup>56</sup> Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidzd me zha brieaban win.

## 9

*Pxeel Jesús xpēēdscuel me güeyseed zho miech*

(Mt. 10:5-15; 14:1-12; Mr. 6:7-29)

<sup>1-2</sup> Tib dze bredz Jesús gza tsiipchop xpēēdscuel me, pxeel me zho tsienee zho lo miech gacnaṅ zho zha racladz Dios gban zho; bdeed me poder lo zho guṅcxooṅ zho grē menḍox ne nosacsi miech, ni guṅguiac zho grē men rzacnē.

<sup>3</sup> —Goltsie —rēb me lo zho—. Per ib güeyde to ncuaane yquiiin to nēz. Zig nac dimi, zig nac ncuaane

gow to, pe bziuud, pe bax-tongaa, güeyde tow; xab tow, minē nacwse to mincose goltsienie. <sup>4</sup> Guiedz ne gdzin to, zha ne gneedz zaatne cuēz to, lidz zha co golcuēz, haxta gdzin dze ne gbi to guiedz co. <sup>5</sup> Per telne gdzin to tib guiedz, nēd miech yquiaadiag zho minē zienee to, dzigo gollit grē yudie co ni to, golrieegazh ga, zeena guien zho ganle dol ga been zho lo Dios, nēd zho ycaania zho xtiidz me.

<sup>6</sup> Dzigo laa zho brieē, laa zho zie. Grēse guiedz ne ndxie dib gax ga, güey zho güeynee zho Xtiidz Dios lo miech, ni beenguiaac zho grē men rzacnē.

<sup>7</sup> Bin rey Herod rzeet zho Jesús, sac tel pa lotaaw zēēb diidz grētaa milagr ne ruṅ me. Grē miech co, no zho rzac Juan Bautist ga brieaban, lēē me ga nac Jesús; <sup>8</sup> nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieaban me gane ziaad me stib.

<sup>9</sup> Zeene ron Herod rnee grē miech co lēē Juan ga, rio me zhgab, rnee me:

—¿Bay cho nac men co? Per gacda Juan; naazhal name bnabey pchug zho yaṅ Juan.

Racladz Herod tebaa zha gan me Jesús.

*Bguiaaṅ Jesús gaay mil miech*

(Mt. 14:13-21; Mr. 6:30-44; Jn. 6:1-14)

<sup>10</sup> Goc bla dzew, laa grë zha ne pxeel Jesús ga w bire bdzin lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

<sup>11</sup> Zeene bin grë miech co laa me brieë, dzigo brieena zho me, bdzin zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grë zha ne rzacnë. <sup>12</sup> Laa dze rdzelew, wbig gza tsiipchop xpëedscuel me rëb zho lo me, mazd gnee me lo grë miech co gbi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

<sup>13</sup> Dzigo rëbchaa me lo zho:

—To goldeed ncuane gow zho.

Pquiab zho rëb zho:

—Gaayaque guietxtil ni chop mel ziaadnie no nu, jpe rnase ncuana co lo grëtaa miech qui! Niicle niaca mine gziuu ncuane gow zho, pe zhidaa dimi yquuin, zpa guioxi now?

<sup>14-15</sup> Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar. <sup>16</sup> Laa grë miech co bzob, dzigo bzhen Jesús gza gaay guietxtil co ni grop mel co, blis lo me nëz gbaa, bdeed me xquizh lo Dios. Blozhse ga, beengrol

me gza guietxtil co, mel co ne, dzigo zigse rdeed mew lo xpëedscuel me, scase scase rguiz zhow lo grë miech co. <sup>17</sup> Grëse zho dow haxta zaatne bieltaa zdoo zho; ni zeene blozh dow zho, biodzë tsiipchop chicuid bio grë mine biaan.

*Bnee Pedr cho nac Jesús*

(Mt. 16:13-19; Mr. 8:27-30)

<sup>18</sup> Tib dze biche Jesús lo miech palal, güey me tib zaatne güeyzodiidznie me Dios; loxaque xpëedscuelse me güeynal zhits me. Ga bnabdiidz me lo zho rëb me: —¿Cho dien ron to rnee miech nac naa?

<sup>19</sup> Pquiab zho rëb zho:

—No zho rnee Juan Bautista, nogaa zho rnee Lív (men ne biadteed Xtiidz Dios padzeela); nogaa grol zho rnee no cho stib men ne biadteed Xtiidz Dios padzeelaw, sinque brieëban me gane ziaad me stib.

<sup>20</sup> —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me:

—jLuu nac Men ne zëëble diidz ga cxeel Dios!

<sup>21</sup> Dzigo pso me diidz lo zho choot lo gneed zhow.

*Bzeet Jesús zha gun miech me*

(Mt. 16:21-28; Mr. 8:31-9:1)

<sup>22</sup> Tib vuilt bzeet Jesús lo grë xpëedscuel me zha csaci miech me. Rëb me, nroob grë ncuane cteed zho me; grë zha non lo men guiedz, grë pxoz rnabey, grë zha ne rseed miech ley, ible stsidil zho me, ni haxta zut zho me;

per zeene gac tson ngbidz gut me laa me grieeban.

<sup>23</sup> Ni rëb me lo grë miech ne ndxie lo me ga:

—Zha ne racladz sëeb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho, <sup>24</sup> sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdzind dze lozh. <sup>25</sup> Zha ne zienie guic loxaque gapchen, çpa dien yquiina lo zho, tel por lëew rsacsi zho zho, tel lëew yquiaaqui guey zho gabil? <sup>26</sup> Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtudz naa; scaque naa stoladznie naa zho gal dze ne laa naa guial stib. Dze ne guialnie naa grë xanjl Pxoz naa, guiallu naa guielndzon ne rap me.

<sup>27</sup> Blozhse sca bnee me, rëbcha me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zan zho zeene laa Dios glu zha rnabey me.

### *Bdzëëlo Jesús*

*(Mt. 17:1-8; Mr. 9:2-8)*

<sup>28</sup> Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

<sup>29</sup> Laa me nozodiidznie Dios, zeene laa me bdzëëlo.

Masaque biinidoo ne rrie lo me, xab mew, nquitsbie rnaw, haxta rquiabniw. <sup>30-31</sup> Tibaque briequia Lí grop Moisés bdzin lo me ga, psilo zho nozodiidznie zho me grë guielne ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoo new.

<sup>32</sup> Laa zha ne zienal zhits me, rcow zho mcaal zöb zho ga; per zeene biab biini nroob co, hor co bzhal lo zho gon zho zha rlu me gza me Lí ni Moisés. <sup>33</sup> Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rien daque dien pe nacne sca rnee Pedr.

<sup>34</sup> Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan len xcow co. <sup>35</sup> Dzigo bin zho zëeb tib tsi men co lo xcow co, rnee me:

—Lëe Xpëed naa i gon, rleynie naa me. Golgon mine rnee me.

<sup>36</sup> Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

*Biac tib mëed ne nosacsi mendox*

*(Mt. 17:14-21; Mr. 9:14-29)*

<sup>37</sup> Biini liu co, laa Jesús wbi guic gui co gza me zha ne güeynie me ga. Miech guizhiu



ne güeydzieelo me. <sup>38</sup> Lad grë miech co brieet tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëëdbgui rii nac mëed lo naa, <sup>39</sup> ni na laa mendox nosacsi win. Zeene rdziñ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win. <sup>40</sup> Blansonie naa win nu, bnab naa lo xpëedscuel luu guncxoon zho mendox co, per brieelod zho.

<sup>41</sup> Dzigo rëbchaa Jesús:

—iPe nac squitaa miech ntseeb nac to, ib nëde to gnalo to Dios! ¿Pa lal dze ne so naa gne naa lo to? ¡Ncuane cxeewdraa naa lo to squitaa nac to! Dënie xpëed luu nu —rëb me lo men co.

<sup>42</sup> Zeene laa mëed co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, bencxoon me ma. Horcogazh biac mëed co, laa me bdeed win lo pxoz win. <sup>43</sup> Grë miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

*Bzeet Jesús stib laa miech csacsi me*

(Mt. 17:22-23; Mr. 9:30-32)

<sup>44</sup> Biire Jesús bzeet me lo xpëedscuel me zha gun miech me, rëb me:

—Wen wen golquiaadiag mine gni naa lo to nu ganle.

Naa gon ne nac naa Mgui ne pxeel Dios, ible zielo zho naa ladznia miech.

<sup>45</sup> Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzгаа zho, rdzieb zho gnabdiidz zhow lo me.

*¿Cho nonraa?*

(Mt. 18:1-5; Mr. 9:33-40)

<sup>46</sup> Horco psilo zho noneelsa zho dien cho tib zho gac zha non.

<sup>47</sup> Bien Jesús sca no zho, dzigo bnee me lo zho, bredz me tib mëëdbgui win, <sup>48</sup> rëb me:

—Grë zha ne no xnëz naa, zha ne guncas tib mëedwin zig mëed rii, gleynie zho win, rriequia naa ga rleynie zho. Ni zha ne gleynie naa, rriequia men ne pxeelle naa ga rleynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

<sup>49</sup> Blozh ga, rëbchaa Juan lo me:

—Maestro, bdzion no tib zha co gon bzeet zho lë luu zeene bencxoon zho mendox, nacne nli blisqui now lo zho, sac led yed zho nacgrë ne.

<sup>50</sup> Dzigo pquiab me, rëb me:

—iGunscade to! Sac gon zha ne racnie ne, grieelod lëëque zha glëenie ne.

*Ndox Jesús lo Juan grop Jacob*

(Mt. 8:19-22)

<sup>51</sup> Len dze ne ziaadyob ghi Jesús lo guidzliu rii, len dze co bio me nëz laa me zie nëz Jerusalén. Tiblique bio guic

me, ib pquiad zdoo me, laa me zie. <sup>52</sup> Zeene bdziñ me xtan Samar, pxeel me blā zho bbedner zie zho tib guiedz win ne ndxie nēz co, par dien pa lo gdeed miech co cuēz me. <sup>53</sup> Bdziñ zho guiedz co, choot bzhiguiel d ndeed zaatne mbēz me; sac bien zho nēz Jerusalén tsie me. Nac zha Samar, rlēenie zho zha Israel.

<sup>54</sup> Zeene bin Jacoba grop Jacob Juan, blēe guic zho, rēbchaa zho lo me:

—Maestro, jmazd tibaque gotsaa gnab ne gliaal gui lad grē miech rii, zeena nitlogazh zho!

<sup>55</sup> Biecwaque me, goctox me lo zho rēb me:

—Riende to lēe zhapaa nac men ne nacie to. <sup>56</sup> Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brie zho güey zho stib guiedz.

<sup>57</sup> Nēz zie zho, zeene wbig tib mgui co rēb me lo Jesús, laa me racladz tsienal me zhits Jesús, tel pa lotaa nac zaatne tsie Jesús. <sup>58</sup> Dzigo pquiab Jesús rēb Jesús lo me:

—Gocnaña ganle, naa ne nac naa Mgui ne pxeel Dios, peet rapd naa nu, mazd zig nac grē mēz, grē mguin, rap ma zhibliee ma, rap ma zhipt-sieez ma; per naa per ni zaatne gaguies naa quianied naa.

<sup>59</sup> Laa zha ne bredz me tsienal zhits me, pquiab zho rēb zho:

—Sēnal naa zhits luu, per bzhiguiel bneedz diidzbey cuēz naa, gangazh naa tsoliu pxoz naa.

<sup>60</sup> Rēbchaa me lo zho:

—Nzian grē zha gut no, psaan tsow tsie samengut zho tsiequeets zho. Sangue luu zhits naa dēnal, zeena tsie luu tsienee luu lo miech, gacnan zho zha racladz Dios gban zho.

<sup>61</sup> Pquiab stib zho rēb lo me:

—Maase sēnal naa zhits luu, per bneedz diidz ganiegazh naa diidz lo grē menlidz naa.

<sup>62</sup> Dzigo rēbchaa me:

—Zha ne xen nia rad ni csilo zho gwi zho nēz zhits zho, niacxe zrieelo ygan zho ngon. Scaque zha ne sēeb xnēz Dios, grieelod sēeb zho telne mazdraa rleynie zho grē ncuaan lo guidzliu rii.

## 10

*Güey tsongaltsii zha ne güeynee Xtiidz Dios  
(Mt. 11:20-24)*

<sup>1</sup> Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grē guiedz ne no ted me, pxeel me zho chopga chopga zho.

<sup>2</sup> —Golnab lo Dios —rēb me—, cxeelraa me zha ne gun xtsiin me. Sac ne nligaa ndaldoo miech ne quiambēz yquiaadiag Xtiidz me, zha ne gneelew lo zho rgaad. <sup>3</sup> Goltsie sca, per nsin nsin golso. Golguien ganle rriequia nac to zig cho mēcwxii yeen, ni laa naa rxel to zaatne no grē coyot dox.

4 Peet güeyde to, güeyde to dimi, güeyde to ncuaaṅe gow to, lab tow, miṅe quiaṅe ni to miṅcose goṽtsienie.

'Miech ne yquiaabdiuzh to nēz, sode to dieeṅ zharaa yquiaabdiuzh to zho. <sup>5</sup> Zeēṅe yguib to zaatne cuēz to, yu ne gdziṅtaa to, goṽnab guṅlay Dios grē zha ne no yu co. <sup>6</sup> Telne squiaadiag zho miṅe rnee to, zunlay me zho; telne nēdgaa zho yquiaadiag zhow, dzigo toque guṅlay me. <sup>7</sup> Zha ne gneedz zaatne cuēz to, lidzse zha co goṽcuēz, tsiede to stib yu stib yu; guieṽwagw ne gneedz zho lo to, ctoladzde to goṽgowa; sac goṽ zha ne ruṅ dziin, ib none ycaa zho miṅe non xtsiin zho.

<sup>8</sup> 'Guiedz ne yquiaadiag miech miṅe zienee to, zaacse goṽgac lo zho, tel pe guieṽwagw ne gneedz zho, goṽquiina; <sup>9</sup> goṽguṅguiac grē meṅ rzacnē ne no ga. Goṽguiab lo zho, laa dze ne nolū Dios zha sēēb miech xnēz me, laa dze co bdzinle. <sup>10</sup> Saṅgue guiedz ne siguiēd miech yquiaadiag zho miṅe zienee to, goṽrieē grē ro xnēz zho, <sup>11</sup> gaṅlo zho glit to grē yudie co ni to, zeēṅa guieṅ zho gaṅle nēz ne nitlo zho ga zie zho. Goṽguiab lo zho, zha bguiba, sac binpaa zho zha grieelo sēēb zho xnēz Dios ni nēd zho gon zho diidz. <sup>12</sup> Gacnaṅ zho gaṅle, gaṽ dze ne guṅ Dios xquieṽwxtis me, lēētaa gac guieṽnē ne tsieguiāṽ zha Sodom, mazdraa nac guieṽnē ne tsieguiāṽ zho.

<sup>13</sup> 'Scadaa nac zha Corazín ni zha Betsaid. iProbsaxe zho,

sac goṽ goṽpaa zho grē milagr ne ruṅ Dios, per ib psaand zho xquieṽntseeb zho! Tel niaca miṅe ngaa grē meṅ Tiro, grē meṅ Sidón, niaṅ grē milagr ne goṽ zho, ib ndedsod mban niac grē zha co nio zho guieṽnē, zēēb nsaan zho xquieṽntseeb zho mbig zho lo Dios. <sup>14</sup> Gacnaṅ zho gaṅle, gaṽ dze ne guṅ Dios guieṽwxtis, lēētaa caxtigw ne yгаа zha Tiro ni zha Sidón, mazdraa miṅe yгаа zho. <sup>15</sup> Scaque zha Capernaum, masaque rzac zho niina zha nziuuraa lo Dios, per gacnaṅ zho gaṅle haxta quiet leṅ gabiṽ ga guey zho.

<sup>16</sup> Blozhse sca bnee me, rēbchaa me lo zho:

—Grēse zha ne yquiaadiag miṅe gnee to, rrieequia naa ga rcaania zho. Zha ne nēdgaa ycaania to, rrieequia naa ga nēd zho ycaania zho; ni zha ne nēd ycaania naa, rrieequia meṅ ne pxeṽ naa ga nēd zho ycaania zho.

*Wbire tsonḡaltsii zha ne pxeṽ eṽ Jesús ga*

*(Mt. 11:25-27; 13:16-17)*

<sup>17</sup> Zeēṅe laa gza tsonḡaltsii zha co wbire, rley zho bdzin zho lo Jesús. Rēb zho haxta grē meṅdox bdzieb ma zho, zeēṅe bzeet zho lē me.

<sup>18</sup> Dzigo pquiab me rēb me lo zho:

—Haxta ma ne rnabey lo ma, goṽpaa naa goṽ bringaa ma, biab ma zig riabse tib belye. <sup>19</sup> Laa naa bneedz poder qui lo to, parne gdeete to diidz guṅ ma miṅe racladz ma; grē meṽdox, grē meegu

ntseeb, niicle gzoobni to ma, peet gacde to. <sup>20</sup> Nli laa to runcxoon mendox niina, per gleyde to por min co, sinque mazd golley porne laa lë to zhooble lo Dios, laa to ngable lo me.

<sup>21</sup> Horco biaad tib guielbley nroob zdoo Jesús, bnee me lo Dios, rëb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grë mine noyū luu nu niina, bdeete luu diidz niacnañ grë zha raca, sinque laaw blu luu lo grë zha ne nac zig grë mëédlas. Sca quiayū luu, sac ib scale racladz luu gaca.

<sup>22</sup> Blozh ga rëb me lo grë miech ne ndxie lo me ga:

—Grëse ncuaane ran to quiayū naa, Dios men ne nac PxoZ naa, me bneedz poder rii lo naa; sac ib laa me bzo naa, naa gūna. Xpëéd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

<sup>23</sup> Dzigo rëbchaa me lo xpëédscuel me:

—Dichos to bгаа to noyan to grë min rii. <sup>24</sup> Sac gon blactaa zha ne biadteed xtiidz Dios padzeela, haxta grë zha ne bnabey len dze co, bzoobladz zho nian zho grë ncuaane noyan to, bzoobladz zho nquiaadiag zho grë ncuaane noquiaadiag to.

*Xcuent tib zha Samar*

<sup>25</sup> Tib dze wbig tib zha ne nac maistr ley lo Jesús, bnab-diidz zho lo me, rëb zho:

—Maestro, bnë lo naa dien, ¿pe nac mine gun naa parne grieelo ygaa naa guielmban ndzon ne gdzind dze lozh?

<sup>26</sup> Pquiab Jesús rëb me:

—¿Zha dien zhubnee lo ley? ¿Pe rnabeya?

<sup>27</sup> Rëbchaa maistr ley co:

—Znu rneew: “Dib zdoo luu, dib nacse luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

<sup>28</sup> —¡Min qui nagon bioxco gun luu —rëb Jesús—, zeena ygaa luu guielmban ndzon ne gdzind dze lozh ga!

<sup>29</sup> Per par glud ne noxcod me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

<sup>30</sup> Dzigo bzodiidz Jesús tib cuent lo me, rëb Jesús:

—Tib men wladz name brie me Jerusalén zie me guiedz Jericó. Nëz zie me briequia ngbaan, bdiñ ngbaan me, mer niut ngbaan me; grëse ncuaane ney me, haxta xab me blan ngbaan.

<sup>31</sup> Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad. <sup>32</sup> Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho. <sup>33</sup> Sca nix me ga, zeene laa tib zha Samar

bdzin. Zeene gon zho me, wbig gax zho lo me; pquia zdoo zho me gon zho zha rna me. <sup>34</sup> Gagazh been zho me rmed, blee zho vin bdiib zho lo grë rid ne ney me, bdëeb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdzinne zho me tib yu ne rbëz miech ne zo nëz; ga blëznie zho me, pquianap zho me.

<sup>35</sup> 'Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: "Peet tsienied guic luu, telne nroobraa gon luu gaxt, na zeene gbire naa dzigo quizh naaw."

<sup>36</sup> Blozhse bzodiidz me cuent co, rëbcha me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

<sup>37</sup> Pquiab maistr ley co rëb me:

—Zha ne bion bded gaw, sac zha co pquia zdoo me.

Dzigo rëbcha Jesus lo me:

—Sca nagon none gon luu.

*Blëz Jesus lidz Mart ni Mari*

<sup>38</sup> Laa Jesus no nëz gza xpëedscuel me. Bdzin me tib guiedz win, ga no tib wnaa lë Mart, dzigo men co bdeed zaatne blëz zho.

<sup>39-40</sup> Bdzin zho lidz Mart, lëelëd bzëeb Mart ro tie. Zhixco ro tie no Mart, laa tib bel Mart lë Mari zob noquiaadiag grë zhiwseed

Jesus. Gon Mart rgaadraa nia Mart, dzigo wbig Mart rëb Mart lo Jesus:

—Bzhiguiel bnee lo bel naa guiaad me gon me xyudar naa. Bui ganle tipse naa psan me ro tie.

<sup>41</sup> Pquiab Jesus rëb Jesus lo me:

—Aque luuw nli Mart, squitaa noxco luu dien zha gac xtsiin ro tie luu. <sup>42</sup> No tib ncuaane mazdraa none tsoxco luu, ni lëe min co nu gon noyun Mari; gane grieelod ycaa naa mine quiaayun me.

## 11

*Zha none gzodiidznie ne Dios*

(Mt. 6:9-15; 7:7-11)

<sup>1</sup> Tib vuelt, loxaque blozh bzodiidznie Jesus Dios, wbig tib xpëedscuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëedscuel me zha gzodiidznie zho Dios.

<sup>2</sup> Dzigo rëbcha Jesus:

—Zeene gzodiidznie to Dios, golguiab:

Dios, luu nac Pxoz no, zob luu gbaa;

luuse nac men ne mazdraa ndzon.

Luu nac men ne gnabey no, mine gnabeytaa luu, zigne raca gbaa,

scaque none gaca lo guidzliu nu.

<sup>3</sup> Been guielnzaac bneedz ncuaane dioow no nadze.

<sup>4</sup> Bzhiguiel been no perdon grëse dol ne ziodziun no lo luu,

zigne rdziuun no samiech no  
perdon grë falt ne run  
zho lo no.

Gdeete luu diidz yquuil  
mendox no,

been guielnzaac bla no lo ma.

<sup>5</sup> 'Sca nagon gnee to —rëb  
Jesús—. Ncuane gnab to lo  
me zneedz mew. Samiechse  
to name, gzoob ne wxina,  
lega nacle glanso tib zha ne  
ndzieeldiidz to ni guien pe  
gdeed to gow zho. Dzigo  
tsie to lidz stib zha ne  
ndzieeldiidz to guiab to lo  
zho: “Bzhiguiel beenxtad  
tsonaque xcuun luu lo naa.

<sup>6</sup> Lega nacle blanso tib zha  
ne runbey naa, na guien pe  
gded naa yquuin zho.” <sup>7</sup> Segur  
znë zho: “Gunnneete luu naa  
nu, dziitsle niöog ro lidz naa,  
nataa nixguies grë xpëed  
naa; grielod gache naa  
gnedz naa ncuane racladz  
luu.” <sup>8</sup> Per telne sonaad to ga,  
ganse zho tibaque quianee  
to, gnid naa zho tsieched zho  
gneedz zho ncuane racladz  
to. Per gneedzd zhow porne  
ndzieeldiidz to zho, sinque  
laa zho gneedza porne gon  
zho tibaque quianab tow.

<sup>9</sup> Scaque nagon none gun  
to, zeene pe gnab to lo Dios.  
Ncuane rquuin to, glnaba lo  
me, scagaa me zneedz mew.  
Golguib tel pe racladz to, me  
nac men ne gacnie to gdziel  
tow. Golcuedzlä me, scagaa  
me scaania me to. <sup>10</sup> Sac grëse  
zha ne rbig lo me rnab zho  
ncuane rquuin zho, rdeed  
mew. Zha ne rguib ncuane  
racladz zho, racnie me zho

rdziel zhow. Zha ne rbedzlä  
me, rcaania me zho.

<sup>11</sup> 'Golguien ganle, zig nac  
to, zeene rnab xpëed to tib  
mel gow win, ¿niacxe ziazh  
to co to tib meel nia win?  
<sup>12</sup> Zeene rnabgaa win tib dzit,  
¿niacxe zgo to tib meegu nia  
win? <sup>13</sup> Led rioxco to lëë  
niapse ncuane wen rdeed to  
lo xpëed to, niicle ne miech  
ntseeb nac to. Telne sca ri-  
oxco to xpëed to, pelel Pxo-  
z to dzigo, men ne zob gbaa,  
tsoxcod me to. Ib tedsod grëse  
zha ne gnab lo me gdeed me  
ncuane rquuin zho, zdeed  
mew; haxta zha ne gnab cx-  
eel me Espiritu Sant gacnie  
zho, zun me mine gnab zho.

*Rëb zho mendox nacie  
Jesús*

(Mt. 12:22-30, 43-45;  
Mr. 3:20-27)

<sup>14</sup> Tib vuelte bencxoon Jesús  
mendox ne nosacsi tib mgui  
co. Ib gacd gnee mgui, sac  
psan ngop ma mgui. Dzigo  
zigne bencxoon Jesús ma, laa  
mgui psilo bnee. Grë miech  
ne ndxie ga, bzee zdoo zho  
gon zhow. <sup>15</sup> Nogaa zho  
rnee, Beelzebú ma ne rn-  
abey lo mendox, ma co nacie  
me gane rrieelo runcxoon me  
mendox. <sup>16</sup> Briequia spalal  
zho, rnab zho lo me gun me  
pe stib milagr, parne gliladz  
zho nli Dios pxeel me.

<sup>17</sup> Bien Jesús zha rza guic  
zha ne noneenë me ga, dzigo  
rëbchaa me lo zho:

—|Ncuane gacd gon rnee  
to! Tel tib guiedz nadien,  
csilo miech, lëëque zha tilnie  
menladz zho, ¿niacxe nitlod

guiedz co? Tib diigaa miecha, tel lëëque zha tilnie menlidz zho, led znuse lëë nitlo dii co. <sup>18</sup> Scaque mendox nagon, telne lëëque lëë ma guncxoon samendox ma, ipe nale na bnitlo ma! Laa naa rne min rii lo to, porne rnee to ma ne rnabey lo mendox nacie naa, gane rrieelo runcxoon naa ma. <sup>19</sup> Nana telne sca rzac to, ¿zha ne nacgrë to dzigo, cho nacie zho ne ye zho runcxoon ma? Gase naganle rlu doldox i quiayun to squi rnee to. <sup>20</sup> Sangue tel naa, Dios nacie naa runcxoon naa mendox, ni ga rlu ganle laa Dios pxeelle men ne gnabey lo to.

<sup>21</sup> ¡Masaque nac mendox zig tib zha ne no xfuers! Tib zha ne no xfuers, tel tibaque ney zho xquiib zho, ¿cho dien lega sëëb lidz zho gla ncuaane quianie zho? <sup>22</sup> Per zeene rrieequia stib zha ne mazdraa no xfuers, zha cole rtiche zha co, runcxoon zho zho, riaannie zho grë ncuaane gopchen zho. <sup>23</sup> Golgacnan sca ganle, zha ne rlëë lo naa, ga rlu nacnied zho naa; ni zha ne racnied naa lo xtsin naa, paat yquiind zho.

<sup>24</sup> Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuëz ma; ranse ma rdziel zaatne cuëz ma, rnee ma: "Mazd gbire naa guia naa lidz naa stib." <sup>25</sup> Dzigo rbire ma, zeene rdzin ma lo zha ne psacsi ma ga, masaque rzac ma

zho zig rzac miech tib yu ne griin blioob, tib yu ne ine nzhixcuaa len. <sup>26</sup> Dzigo rie ma riexi ma zgadz samendox ma, ma ne mazdraa ntseeb, rdzin ma gza ma rzëëb ma zdoo zha co, rsilo ma rsacsi ma zho. ¡Horcole mazdraa mban run ma zho!

<sup>27</sup> Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¡Dichos wnaa ne gop luu, wnaa ne bgadz luu!

<sup>28</sup> Pquiab Jesús rëb me:

—¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

*Zha ne riladzd cho nac Jesús*

(Mt. 5:15; 6:22-23; 12:38-42; Mr. 8-12)

<sup>29</sup> Miech guizhiu ne quiadzinraa lo me ga, dzigo bnee me rëb me:

—Nadzpaa ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib mine csoladz to zha goc Jonás. <sup>30</sup> Haxta dzigoraa nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me. <sup>31</sup> Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, stedquie me to.

Sac gon pa lo ga brie me, biaad me biadquiaadiag me grē xtiidz Salomón; ni to, lo to nu zo men ne mazdraa non lo Salomón, ni nēd to gon to xtiidz me. <sup>32</sup> Scaque grē zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

<sup>33</sup> Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngeets. Sac biini ne rquia, glaa rzoba par gziiniw len yu, zeena guiab biini lo grēse zha ne sēēb len yu. <sup>34</sup> Rrieequia nac bziaalo miech zig nac tib biini. Telne niapse lo grē ncuaañe ndzinli rwi zho, dzigo gdipse xcuerp zho no lo guielbiini. Laa telne loxaque lo grē ncuaañe nonguieldgaa rwi zho, dzigo gdipse xcuerp zho no lo guielcow ga. <sup>35</sup> Golguien sca pa lo rwi to, napaa laa ne tso to lo biini, lel lo guielcow no to. <sup>36</sup> Sac gon, tel dipse xcuerp to no lo guielbiini, ni tib lēw nod lo ncow, zlupaa to; sac masaque nac to ga zig tib zha ne zo gax tib lo biini nroob.

*Güey Jesús lidz tib zha farisé*

(Mt. 23:1-36; Mr. 12:38-40; Lc. 20:45-47)

<sup>37</sup> Zeene blozhse bnee Jesús lo grē miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh, <sup>38</sup> psilo me dow me, per bdiibd me nia me zigne nacpaa xcostumbr grē zha Israel. Zeene gon zha farisé cow, rlozhd gzee zdoos zho; <sup>39</sup> dzigo rēbchaa me:

—Grē to ne nac to zha farisé, laglaase rlu to miech wen nac to, per zdoos to ntseeb to, sac niapse guielntseeb, niapse guielggaan run to; masaque nac to gon zig tas, zig plat ne nēz zhitse mberna, laa nēz lena rnadraa di beed. <sup>40</sup> ¡Nadzpaa ncow nac guic to! ¿Pe riende to racladzd Dios ne laglaase glu miech wen nac to, sinque racladz me desde zdoos to gac to miech wen? Sac dib nacse to psan me to. <sup>41</sup> Laa ne squi no to noban to, mazd goldeed ncuaañe nacchenpaa to lo grē zha ne guien pe yquini, zeena gac to miech ne nliipaa wen.

<sup>42</sup> ¡Probsaxe to! Rzac to demas nguzobdiidz to lo Dios, rio to haxta grē guizh bitxtil, grē guizh rud, ni grēragaa guizh ne ran to, rdeed to xdiezm to yadoo; per rioxcod to gban to zigne rnabey Dios, ib rioxcod to gleynie to samiech to. Ible none tsoxco to miñ rii, ni bii scaquegaa tsoxco to gdeed to xdiezm to. <sup>43</sup> ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nēz. <sup>44</sup> ¡Probsaxe to, lēētaa rdzieel to grē to maistr ley!



Masaque nac to zig nac grē baa ne rludraa pa nac. Tel baa cow, zeene rded zho zaatne niaaw, ib riend zho lad grē ncuaan noyodz ga, noded zho.

<sup>45</sup> Horco pquiab tib maistr ley, rēb zho lo me:

—Maestro, ¿ye no dzigo lēe rzoob luu squi nac?

<sup>46</sup> Pquiab Jesús rēb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcod to siquier csilo to gun tow. <sup>47</sup> ¡Probsaxe to! Paat rquiinda gon squi rio to, rlozhd dieen paraa rzhixcuaa to ro xpa grē zha ne biadteed xtiidz Dios padzeela. <sup>48</sup> ¡Igal ntseeb to grē pxozgol to! Sac gon, zha beet grē zha co, laa to no rzhixcuaa to ro baa. <sup>49</sup> Nanle Dios squitaa ntseeb zdoo to, mine run to ga bnee me, zeene rēb me: “Sxel naa grē zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho grol zho.” <sup>50</sup> Gacnan to sca ganle, grē to miech ne mban len dze rii, grē to gunquizh Dios xchen grē zha ne pxeel me biadteed xtiidz me wlal ne ndxie guidzliu, <sup>51</sup> desde Abel haxta Zacarí men ne beet pxozgol to len yadoo zaatne nac gax lo pcoog. ¡Ne nligaa grēse dol co gon, to quizha! <sup>52</sup> ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nēde to gliladz tow, ni

niicle nēedgaa to gliladz zha ne racladz ycaaniaw.

<sup>53-54</sup> Blozhse ga, laa me brie ga. Grē zha farisé, grē maistr ley, per nli rlēē zho bin zho sca rēb me. Psilo zho nzian grē ncuaane rnabdiidz zho lo me, rguib zho dien zha gunglēē zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

## 12

*Grē ncuaane rac ngueets zhliaan*  
(Mt. 10:19-20, 28-33; 12:32)

<sup>1</sup> Miech guizhiu ne pcaalsa lo Jesús, haxta rcheeplsa zho. Dzigo bnee me lo xpēēdsuel me, rēb me:

—Golguien gon, gunde to mine run zha farisé, tel zha rquiaalose zho miech wen nac zho. <sup>2</sup> Sac grēse ncuaane sca ngueets rac, grēse ncuaane rlud miech, zdziñ dze ne xoobneña.

<sup>3</sup> 'Zig nac grē ncuaane zhlianse rnee to lo ncow niina, zdziñ dze ne gon miecha zobna ngbidz; grē ncuaane rnee to len yuse, zdziñ dze ne dib lad guiedz gacnan miecha.

<sup>4</sup> 'Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho gun zho. <sup>5</sup> Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga

zrieelo me gzonëz me zho nëz  
leṅ gabil.

<sup>6</sup> Nligaa gdiebde to miech,  
csaand Dios lega pe gac  
to. Golwi ganle, zig nac grë  
mguin, niicle ne rzac miech  
peet nond ma, haxta chop ma  
rto zho por tib gaay centav;  
per tel Dios, ib rsaanladzd me  
ma. <sup>7</sup> Pelej to dzigo csaan me,  
haxta guits guic tow, grësew  
ngaba lo me. Gdiebde to sca,  
golguien ganle nonraa to lo tib  
dzoon mguin.

<sup>8</sup> Ni gni naa lo to ganle,  
zha ne glu lo miech nacie  
zho naa, scaque naa ne nac  
naa Mgui ne pxeel Dios, zeen  
gal dze co zlu naa lo grë  
xanjl Dios, nacie naa zho.  
<sup>9</sup> Sangue zha ne ctoladznie  
naa lo miech, scaque naa ziep  
naa lo grë anjl co runbeyd naa  
zho. <sup>10</sup> No zha ne rneenë  
naa, per zun Dios zho per-  
don dol co; sangue zha ntseeb  
ne gneenë Espíritu Sant, ib  
gundraa me zho perdon.

<sup>11</sup> Zeene tsiezo miech rii to  
lo grë zha ne rnabey xyadoo  
zho, tsiezogaa zho to lo grë  
zha ne nac wxtis, tsode to zh-  
gab dien pe gnee to; <sup>12</sup> sac  
zeene sca tsiegala, Espíritu  
Sant csaab guic to pe nac  
mine gnee to lo zho.

### *Zha ne loxaque rapchen*

<sup>13</sup> Horco wbig tib zha ne no  
lad grë miech co, rëb zho lo  
Jesús:

—Maestro, bzhiguiel bnee  
lo bets naa glë zho ncuane  
psan pxoz no, gneedz zho  
mine raguial naa yca naa.

<sup>14</sup> —Aque luuw nli —rëb  
Jesús—, ¿cho në lo luu laa  
naa noyun guielwxtis co?  
Ziald naa gon par quizz naa  
ncuaane rap miech.

<sup>15</sup> Dzigo bnee me lo grë  
miech co, rëb me:

—¡Golguien gon, gzoobladzde  
to demas gapchen to! Sac  
niicle ndziibraa gapchen  
miech, grieelod por grë  
ncuaan co ndzon gac lo  
xquielmban zho. <sup>16</sup> Znu gon  
bzhaac tib men ne nroob  
gopchen. Nat liu quianie me,  
zeene rlaap me grë ncuane  
ran me, nroob ncuane rlis  
me low. <sup>17</sup> Bdzin tib dze  
rgaadraa pa tsotsow grë  
ncuaan co, dzigo bzob me  
dien zha gun me. <sup>18</sup> Tibaque  
zeene rëb me: “Mine naca laa  
naa gun nroob grë yu qui,  
zeena zigtaa grë guielnzaac  
quiw, grëragaa ncuane rap  
naa, ga tsotsowa grësew. <sup>19</sup> ¡Pe  
zhidaa iz ne lëb grë ncuane  
co! Peet tsieniedraa guic naa,  
ine guxt sob naa, gow naa,  
guie naa ncuane gacladztaa  
naa.” <sup>20</sup> Min co rza guic  
me, tibaque zeene rëb Dios  
lo me: “Nadzpaa nxen luu.  
Guieel riigazh gon laa luu  
guet. ¡Zhaale zha ne guiaanne  
grëtaa ncuane beenlo luu i!”

<sup>21</sup> Zeene blozh bzodiidz  
Jesús cuent co, rëbchaa me:

—Sca nagon rzac grë zha  
ne loxaque dien zha gapchen  
zho zienie guic zho. Ncuane  
cose rionie guic zho, ib riox-  
cod zho gun zho ncuane non  
nëz lo Dios.

*Rsaand Dios zha ne no xnëz me*

(Mt. 6:19-21, 25-34)

<sup>22</sup> Blozh ga, rëbcha me lo xpeëdsuel me:

—Gacxe waa, gni naa lo to ganle: Tsoode to zhgab dien zha gban to lo guidzliu rii, pa griee pe gow to par gban to, pa gdzielgaa ncuaane gdze xcuerp to. <sup>23</sup> Mazd golconie guic to dien zha gac xquielmban to, dien pa tsiebannie to xcuerp to.

<sup>24</sup> 'Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuaane row ma. ;Tel to gon, mazdraa non to lo grë mguin co! <sup>25</sup> Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ;niacxe zrieelo to gunnool tow? <sup>26</sup> Nanle to ganle led ncuaane grieelod ga. ;Pe nac dzigo tant tso to zhgab ncuaane mazdraa nroob? <sup>27</sup> Zig nac lar, ;pe nacne tant tso to zhgab dien pe gacwxab to? Pe rwide to lo grë guiee dzil ne ganle zëëb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow. <sup>28</sup> Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecl, ni scataa niow rgacwxab Dios; ;pe lel to dzigo ygacwxabd me, nicle ne squi gard guien to dib

zdo to gnalo to me?

<sup>29</sup> 'Tsodraa to zhgab sca, guiab to: “;Pa griee pe dioow ne, pa griee pe dio ne?”

<sup>30</sup> Grë miech ne runbeyd Dios, tibaque zhgab co rio zho. Sangue to, golsoladz ganle Pxoze to men ne zob gbaa, nanle me pe nac grë xliaadz to. <sup>31</sup> Me nac men ne gneedz ncuaane yquiin to, per ib none glo tsoxco to gban to zigne rnabey me.

<sup>32</sup> 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley Pxoze to men ne zob gbaa, laa me rneedz grëse ncuaane rap me lo to. <sup>33</sup> Gacxe waa, laa ne tsonie guic to dien zha gacnroob ncuaane rap to, mine quianie to goltow, dzigo goldeed dimi co yquiin zha ne rappaa liaadz; zeena sca nroobraa guielnzaac ne yгаа to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebгаа lo mxil.

<sup>34</sup> 'Sca golgun, sac gon guielnzaac ne gunlo to, zaatne gunlo tow, ga gdziñ to.

*;Nsin golso!*

(Mt. 5:25-26; 10:34-36; 16:1-4; 24:45-51; Mr. 8:11-13)

<sup>35</sup> 'Nsin sca golso —rëb me lo zho—. <sup>36</sup> Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdziñ me, rxal zho ro yu rzëëb me.

<sup>37</sup> 'Dichos zha ne nsin zo zeene laa men ne rnabey zho glanso. Ib tedsod, steed me zho nēz len yu, soob me zho lo mezh, csilo me mezh al gdziib ncuaane gow zho. <sup>38</sup> Nligaa dichos zha ne sca nsin so, horne glansotaa me; niicle tel wxina, ziadyiinigaa liuw. <sup>39</sup> Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw, ĩniacxe zaaguies zho? Led sobna zho lēē, nsin nsin so zho parne csaand zho sēēb ngbaan lidz zho. <sup>40</sup> Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

<sup>41</sup> Zeene blozh sca bnee me, rēbchaa Pedr lo me:

—Maestro, mine blozh bnee luu i, ĩpe par nose naca, te ye par grēraa miecha ye?

<sup>42</sup> Pquiab me rēb me:

—Laaw rne naa, par grēse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrē zho, zig riaannie tib ngundziin sangundziin zho parne gdeed zho ncuaane gow zho.

<sup>43</sup> 'Dichos zho, telne ine niowse noyun zho dziin co zeene laa men ne rnabey zho glanso. <sup>44</sup> Zeene gan mew, ib tedsod so me zho, zha gnabey grēse ncuaane quianie me. <sup>45</sup> Per tel tsienie wguic guic zho quiab zho gbireniobd me, csilo zho lel csaci zho grē zha ne biaannie zho, tso

zho loxaque gowcho zho, loxaque gzudz zho, <sup>46</sup> tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonēz me zho guey zho zaatne no grēraa zha ne rond diidz. Nroob caxtigw ne cteed me zho.

<sup>47</sup> 'Sac gon zha ne sca nanle pe nac mine racladz men ne rnabey zho, ni tsoxcd zho gun zhow; ible nroob nac caxtigw ne ted zho. <sup>48</sup> Mazd lēētaa caxtigw ted zha ne peet nand, niicle gund zho mine rnabey me. Grēse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

<sup>49</sup> 'Niina ne laa naa zial, rriequia zialzobgui naa lo guidzliu. ĩNi zoot naa gon, tebaa ranle naa laaw quiayazbel! ĩTebaa psiaalle naa lo dziin ne zialgun naa! <sup>50</sup> Per na naraa none teed naa tib guielnē nroob, ni mbanse gon rac zdoo naa quiambēz naa gdziin dze co. <sup>51</sup> ĩMasaque nan to na lēē, laa naa zial loxaque par cuin wense miech? Lēda gon, ye zial naa zialgunctil naa zho. <sup>52</sup> Sac desde len dze rii, yu ne no gaay miech, laa zho ctsolsa. Tel sēēb chop zho xnēz naa, laa ston zha ne guiaan ga, ctsidil zho; tel sēēbgaa tson zho, scaque grop zha ne guiaan ga, gandzed zho zho. <sup>53</sup> Mēēd ne gan laa pxoz zho, laa xniaagaa

zho bzëeb xnëz naa, gandzed zho pxoz zho, gandzed zho xniaa zho; scaquegaa zha ne quanie mëëda, zeene gan zho laa xingan zho, laa xindzoopgaa zho bzëeb xnëz naa, gandzed zho zho. Zha ne nac nguzhizha, zläënie xniaa tsieel zho zho; tel xniaagaa tsieel zhow, zläënie zho me.

<sup>54</sup> Blozhse sca bnee me, rëbchaa me lo grë miech ne ndxie ga:

—iPe nlipaa rnee to riende to pe nac grë ncuane noyac len dze rii! Zha zeene ran to rquia xcow nëz ne rzëeb ngbidz, znuse rien to laa guie guiab. <sup>55</sup> Zeene rangaa to ziaad me nëz ne rzë ngbidz len mëë nal, nanle to laa nëëg gac. <sup>56</sup> iGuieiwquiaalo i lo to gon! Zha zëeb dzigo runbey to grë señ ne rlu zhan gbaa, rlu-gaa lo guidzliu, laa grë mine quiaayan to len dze rii riende to.

<sup>57</sup> iNone guien to tozhal cobey dien pe nac mine nonguiel gun to! <sup>58</sup> Gzoob ne bdilnie to tib samiech to, laa to nole nëz zie to lo wxtis grop to. None guien to, laga no to nëz mazd golguiaan mpas, lëdle tsiezo zho to lo wxtis; sac tel laa to gdzin lo wxtis, ib znabey wxtis zha ne co to ladzguiib. <sup>59</sup> Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

## 13

*Grëse miech, ngoopdol nac zho*

<sup>1</sup> Len dze co, bdzin bla zho lo Jesús bzodiidz zho lo me zha bnabey Pilat gut bla zha Galilé, lëetse zeene no zho len yadoo noyut zho ma ne no-gogon zho lo Dios. <sup>2</sup> Dzigo rëbchaa Jesús lo zho:

—Segur na lëë, rëb to mazdraa ngoopdol grë zha co lo grëraa zha ne no nëz Galilé, gane sca bdzieelo zho. <sup>3</sup> iLëda gon! Zigtaa ngoopdol zha co, scaque to ngoopdol nac to; telne csaande to xquieintseeb to gbig to lo Dios, ye to znitlo to. <sup>4</sup> Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho. <sup>5</sup> Per gacnan to ganle, iLëda! iZigrne naa ga, ye to miech ngoopdol nac to, ni telne csaande to xquieintseeb to gbig to lo Dios, ye to zdzin dze ne nitlo to!

<sup>6</sup> Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quanie me lbë uv. Cad rdzin mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex, <sup>7</sup> dzigo bnabey me zha ne quianap liu co cchuggazh zhow, rëb me: “iPchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.”

<sup>8</sup> Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na

laa naa gdziñ beeba. <sup>9</sup> Teñe yquiadaque nex low iz ne ziaad, maase cchug new dzigo.”

*Biac tib zhuz ne nosacsi mendox*

(Mt. 13:31-33; Mr. 4:30-32)

<sup>10</sup> Tib dze ne rdziiladz zha Israel lo dziina, bdziñ Jesús leñ yadoo, psilo me noseed me miech.

<sup>11</sup> Lad grë zha ne noseed me ga, lad co no tib men wnaa nlengw nac zhits, gogle tsiimtson iz sca nosacsi mendox me, ib gacd gacnli me. <sup>12</sup> Zeene gon Jesús me, dzigo bredz me me, pxobnia me guic me, rëb me lo me:

—iNiinagazh gon, laa luu guiac!

<sup>13</sup> iHorcogazh laa zhits me ga gocnli, rley me, psilo me rdeed me xquizh lo Dios!

<sup>14</sup> Laa zha ne rnabey yadoo, zeene gon zho sca beenguiac Jesús me dze co, blëë zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho leñ dze ne rac dziin, jled tsod zho guiaad zho guiac zho dze nda rii!

<sup>15</sup> Dzigo pquiab Jesús rëb me:

—iNazdpaa ntseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis? <sup>16</sup> Zha nac dzigo rzac to, nonguielda nu ben naa beenguiac naa wnaa rii, dze rii. Golwi ganle zha xtii Abraham nac me, leñ tsiimtson iz goc sca nosacsi mendox me.

<sup>17</sup> Zha ne rlëë ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

<sup>18</sup> Blozh ga, bnee me rëb me:

—¿Zha ganle racnroob lo xtsiin Dios lo guidzliu rii?

<sup>19</sup> Racnrooba gon zig rroob tib midz moxtaz ne ran zho dan rii. Teñ midz moxtaza niicle tib midz winsew, zatne racnwiw, rrooba, raca tib yag nroob; haxta rie grë mguin riezhixcuaa ma zhipt-sieez ma low.

<sup>20</sup> Ziaadaque gon gaca, zig ncobi. <sup>21</sup> Sac teñ ncobiw, niipaquew rcots men wnaa tson lmud rin, ni dib nase ncob co rzibe.

*Zha ne ycaania Dios*

(Mt. 7:13-14, 21-23)

<sup>22</sup> Laa Jesús no nëz zie me nëz Jerusalén. Guiedz ne rdëtaa me rseed me miech; zigtaa guiedz nrooba, zigtaa guiedz wina. <sup>23</sup> Tib vuelte bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

<sup>24</sup> —Nligaa zhis zho, sac masaque naca zig tib puert niase. Goltsoxco sca niinas-raa golsëëb xnëz me ycaania me to, sac zdziñ dze ne nzian zho gacladz sëëb, per grieelodraaw. <sup>25</sup> Deque laa men ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëëb to, per cxaldraa mew. “Runbeyd naa to”, gnë me, “nand naa dien cho zha to.” <sup>26</sup> Niicle

guiab to runbey me to, bi-aadpaa me ladz to pseed me miech, haxta downie to me. <sup>27</sup> "Laa naa nile", gnë me, "runbeyd naa to. iGuñneetraa to naa, ib rdziguiend naa grë miech yozh, miech ngoopdol ne nac to!"

<sup>28</sup> 'Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guieñe co. <sup>29</sup> Ni mazdraaw gon, zeene gan to pa lo guidzliu brieë grë miech ne bdzin ga, ine zobnie me zho lo xmez h me noyownie me zho. <sup>30</sup> Grë zha ne rzac to niina peet nond, lëëtse zha co yгаа guieñzaac co; laa grë zha ne rzac non zho niina, peet ygad zho.

*Bzeet Jesús zha nac zha Jerusalén*  
(Mt. 23:37-39)

<sup>31</sup> Dze coquew, bdzin bla zha farisé rëb zho lo Jesús grieeniob me ga, sac laa Herod racladz gut me. <sup>32</sup> Dzigo rëbchaa me lo zho:

—Gołtsie golguiab lo mëz win co cxecw me spalal, nadzese ni gzhe guñguiac naa miech nu, zigtaa zha ne rzacnëw, zigtagaa zha ne nosacsi mendoxa; gal widz guieñdle naa nu. <sup>33</sup> iNligaa nadzesew ni gzhe, widz laa naa gdzinle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

<sup>34</sup> iAque tow men Jerusalén! iPe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa niacnie naa to, nquianaap naa to zig run nguid rgueedz ma xpëed ma, per bzhiguielde to. <sup>35</sup> Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: "iZha ndzontaa men qui pxeel Dios lo ne!"

## 14

*Biac tib men ne rrieë gui*

<sup>1-2</sup> Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziinaque tib men bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co. <sup>3</sup> Dzigo rëbchaa Jesús lo zho, ni lo grë maistr ley ne ndxie ga:

—Golnë dien, ipe nonguiela guñguiac naa miech dze rii, te nonguielda ye?

<sup>4</sup> Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui, <sup>5</sup> rëbchaa me lo zho:

—iPe nli na peet dziin runde to dze rii? Tel zha tsiëtso be tib xpëed to, tib xmagaa to tib len guiuu dze rii, i niacxe tsiebeegazhde to xpëed to, tsiebeegazhdgaa to xma to ga?

<sup>6</sup> Loxaque lo zho rac, ib bdziel zho pe nquiab zho.

<sup>7</sup> Grëraa miech ne nodzin ga, no zho rguib zho dien zha ygaa zho zaatne nzhixcuaaraa sob zho. Gon Jesús zha rac zho, dzigo bnee me lo zho, rëb me:

<sup>8</sup>—Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaaraa. Sac gon, nenda glanso tib zha ne nonraa lo to, <sup>9</sup>lozh ga, laa zha ne bredz to lo lni guiaadliso to ga, gnë zho: “Guso i dien sob men rii.” Led tib guielto ga par to, racse to laa to tsieso ga, tsiesob to zaatne rialle ro beel. <sup>10</sup> Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaadxi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, ziaanzuu to lo zho. <sup>11</sup> Golsoladz ganle: grë zha ne lëëque zha runnon zho, lel rianwin zho; laa zha ne rianwin, runnon miech zho.

<sup>12</sup> Blozh ga, rëbcha me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëga zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho mine been luu ga. <sup>13</sup> Mazd bredz grëse miech, zig nac zha ne

guiend pe yquiin, zig nac zha ne guiend tib nia, zha ne guiend tib ni, zha ne roldga lo; <sup>14</sup> zeena gal dze ne grieelod grë zha ne bioxco wban zigne racladz Dios, ine gley luu ygaa luu guielnzaac ne tsieguial luu gneedz me lo luu.

<sup>15</sup> Lad zha ne zobgrë me lo mezh ga, pquiab tib zho rëb:

—¡Dichos grë zha ne sca ygaa tsiesob lo mezh, tsi-etownie zho Dios zaatne rnabey me!

<sup>16</sup> Pquiab Jesús rëb me:

—Tib men name, nzian zha ne bredz me tsie tib wagw lidz me. <sup>17</sup> Zeene gol dze ne laa guielwagw co gac, pxeel me tib zhingundziin me ziexi grë zha co. <sup>18</sup> Per pasë zho nie, zhaase zhaase ncuane pquiaqui zho. Tib zho rëb: “Grieelod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar.” <sup>19</sup> Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.” <sup>20</sup> Laa stib zho rëb: “Grieelod së naa, sac niina wriin pt-sieelnia naa, bzhiguiel gudz lo me gacd guial naa.”

<sup>21</sup> 'Bdzin ngundziin co bzodiidz zho lo me zha rzë xtiidz grë zha co. Zeene bin mew, wbinladz guic me, bnabey me zho güey zho dib lad guiedz güeyxi zho grë zha ne guiend pe yquiin, grë zha ne guiend nia, zha ne guiend ni, zha ne rold lo, grëse zho



bdzinne zho ga. <sup>22</sup> Blozh ga, rëbchaa zho lo me: "Laa naa wbirole xmandad luu gon, per scase noraa zaatne cue miech." <sup>23</sup> Dzigo pxeel me zho stib, rëb me: "Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa. <sup>24</sup> Sac grë zha ne bredz naa glo ga, ni lalnu racladzdraa naa ygaa zho guielwagw rii."

*Zha ne racladz sëëb xnëz Jesús*

(Mt. 10:37-38)

<sup>25</sup> Laa Jesús no nëz zie me nëz Jerusalén, miech guizhiu ne nal zhits me. Tibaque pt-sire lo me bui me lo grë miech co, rëb me lo zho:

<sup>26</sup> —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleyne zho mine rnabey naa. Sac zha ne mazdraa rleyne pxoz, mazdraa rleyne xnial, mazdragaa rleyne zho tseel zho, xpëed zho, bets zho, bziangaa zho, xquielmban zhow, rquia zdoo zhow, peet xtsiind grë zha co par sëëb zho xnëz naa. <sup>27</sup> Sac ni tib zha ne sca yquia zdoo cueeladz zho zho guiaadnal zho zhits naa, grielod ygab zho lo naa. <sup>28</sup> Antes ne yquiabladz to sëëb to xnëz naa, none wen wen sob to dien pe zleb to ted to mine rieguial to. Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zгаа xtimi zho tsaalow. <sup>29</sup> Sac gon

nenda loxaque cueeze zhow, ni lozh ga grielod gzaalo zhow. Miech ne gana laa zho gzhidznie zho, <sup>30</sup> guiab zho: "Golwi lo zha qui ganle, loxaque bleeze zho lidz zho, na blëbd zho nzaalo zhow." <sup>31</sup> Scaque rey ne no tilnie stib rey, led none sobgazh zho gan zho dien pe zlëeb tsi mil xmenguiib zho tsietilnie gal mil xmenguiib stib rey co. <sup>32</sup> Telne rgobey me lëbd me, laga bii zit ziaad stib rey co, rxeel me bla zha ne tsie tsiennee dien zha gataa cuëz lo xtil zho.

<sup>33</sup> 'Scaque to nagon none glo gwi to pe nac grë ncuane no csaan to, parne grielod ygab to xnëz naa. <sup>34</sup> Sac gon zed ne nzhid, ðpa dien yquina? <sup>35</sup> Per ni par gaca beeb peet xtsiinda; mine ractaaw, laaw rziaab. Zha ne no li-aadz guien zho pe rnee naa, yquiaadiag zhow.

## 15

*Zha rzac Dios zha ne zozit lo me*

(Mt. 18:10-14)

<sup>1</sup> Zeene rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me. <sup>2</sup> Nacne grë zha farisé ni grë maistr ley, rneenë zho me, rnee zho lëda ga run me sca rtsieelsa me grë zha co, rownie me zho. <sup>3</sup> Dzigo bnee me lo zho, rëb me:

<sup>4</sup> —Togase nadien, gzoob ne quianie to tib gayoo mëcwxiil, ni lega naclew

rzaab tib ma, ¿zha dien run to? Led rŕan to ma ne ndxie lo to ga lëë, laa to rie rieguib to ma ne bziaab ga, haxta rdziel to ma. <sup>5</sup> Zeene rdziel ma lo to, lo guielbley co haxta rxobyan to ma rdziñnie to ma ro yu. <sup>6</sup> Lëëlëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiil to brieequia. <sup>7</sup> Gni naa lo to ganle, scadaa nagon rzac Dios, tib guielbley nrooba lo me, zeene ran me laa tib zha ngoopdol rŕaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

<sup>8</sup> 'Zig rzacгаа tib men wnaa, gzoob ne nzhen me tsii gayoo pes, ni lega naclew rsëëb me tib gayoow, ¿zha dien run me? Led hor cogazh lëë rquiaa me biini, rsilo me dzega dzega rloob me len lidz me haxta rdziel me dimi co. <sup>9</sup> Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me. <sup>10</sup> Zig rne naa ga, scadaa nagon rzac grë xanjl Dios, tib guielbley nrooba lo zho zeene ran zho laa tib zha ngoopdol rŕaan xquielntseeb, laa zho rbig lo Dios.

<sup>11</sup> Dzigo psilo Jesús bzodiidz me tib cuent lo zho, rëb me:

—Tib men name quianie me chop mëëdbgui. <sup>12</sup> Tib dze, rëb zha ne nac zha niab lo me: "Papá, tel pe nac ncuaane no gneedz luu lo no, bzhiguiel niinaga beengrola, zeena

gneedz luu mine raguial naa." Dzigo beengrol me ncuaane rap me, bdeed mew lo zho.

<sup>13</sup> 'Zhisaque goca, pto zha niab co grëse ncuaane bial zho, brieë zho laa zho zie. Bdziñ zho stib dan, ga been zho grë guielyozh ne gocladz-taa zho, grëse xtimi zho pxin zho ga. <sup>14</sup> Tibaque zeene laa xtimi zho blozh, mbanse rac zho guiendraa pe gow zho, ni lëëtaque len dze co laa tib gbin psiloque nëz co. <sup>15</sup> Dzigo racse zho güeyguib zho dziin lad guiedz co, ga brieequia tib men co bree zho, pxeel me zho yquiaanap zho nguts. <sup>16</sup> Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

<sup>17</sup> 'Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaane raclo row grë zha co, haxta ri-aana, ni laa zho sca noded ga; rëbchaa zho: <sup>18</sup> "Mazd mine naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne beñ naa lo me, falt ne bengaa naa lo Dios. <sup>19</sup> Maase sacdraa me naa zig xpëëd me, siguiel me ycaania me naa gac naa zig tib zha ne quiase dziin lo me." <sup>20</sup> Horco bio zho nëz laa zho zey nëz lidz pxoz zho. Zitraa ziaad zho laa me gonle zho, pquia zdoo me zho gon me zha rac zho; rias me güeydzieelo me zho bnaaz me nia zho, bdeedz me zho.

21 “Papá”, rëb zho lo me, “rien naa nroob falt ne ben naa lo Dios, bengaa naa lo luu. Rieguialdraa sac luu naa zig tib xpëed luu.”

22 ‘Ni blëzd me nlozh nee zho, lëëlëd bredz me zha ne quia xtsiin me, rëb me: “¡Na goltënie tib nëz lar wen nu gacw xpëed naa! ¡Goltënie tib nil wen tso nia me, tib nëz guielguid cub yquia ni me!”  
23 Bnabey me zho güeyxi zho tib ngon ne mazdraa ndaan, beet zho, rëb me: “¡Ib none gac tib lni, none dioow ne, none dio ne! 24 ¡Sac gon gun naa cuent, brieegan xpëed rii naa! ¡Bnitle me ga, na laa me bdziel!” ¡Laa lni psilo!

25 ‘Lni co noyac, zeene laa stib xpëed me zha ne nac zha gol ga, wbire lo dziin dan. Bdziin zho gax ro yu, rlu rquia di, haxta wiee rlu noyac; 26 dzigo bredz zho tib zha ne quia dziin lo pxoz zho ga, bnabdiidz zho dieñ pe lni ne noyac. 27 Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.”  
28 Blëe zha gol co bin zhow, lo guielblëe co bzëëbd zho ro yu. Nacne brieeg pxoz zho, bnee me lo zho sëëb zho ro yu.  
29 Dzigo rëbchaa zho lo me: “¡Lëdraaw i gon papá noyun luu! Bui ganle blactaa iz ne quiayun naa dziin lo luu, wlaataa gard quits naa tib xtiidz luu. Ni zha rna tib dze, siquier tib chiv yeen ygad luu

lo naa, gownie naa grë zha ne ndzieeldiidz naa. 30 Cho dzigo nac zha qui, blozhse güeyloozh zho xtimi luu lo grëtaa guielyozh ne been zho, na no luu beet luu ngon ne mazdraa ndaan, noyun luu zhilni zho.” 31 Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuane quianie naa, luu guiaanniew. 32 Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. ¡Dziuun ne cuent brieegan me nu!”

## 16

*Ligier miech par lo guielntseeb*

1 Tib vuelte bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuane rap me; tib dzew, lega nacle bded diag me zhliian noxin zha co xtimi me. 2 Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dieñ zha quiayun luu dziin; sac grielodraa so luu lo grë ncuane rap naa.”

3 ‘Wbire zho ga, rëb zho: “Zha na ganle gun naa, telne guiab ne ga naa dziin dan, lëbdraa naa gun naa dziin co; tel guiaabgaa ne na ga naa gatop naa gon, rtoladz naa gnab naa gon lo miech.”  
4 Tibaque zeene biab guic zho

rëb zho: “¡Laa naa bienle zha gun naa, zeena tso zha ne gun xyudar naa zeene laa naa grie lo xtsiin men rii!”

<sup>5</sup> Dzigo psilo zho bredz zho zha ne quia guielqui lo men ne quia zho xtsiin ga. Bdziñ tib zha co bñabdiidz zho lo zho dien palal nzeëb zho lo me. <sup>6</sup> Rëb zha co: “Tib gayoo tamb nceit nac mine nzeëb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, groñ tamba zëëb luu.” <sup>7</sup> Bdziñaque stib zha co, bñabdiidz zho lo zho dien palal nac xquielqui zho lo men co. Zha co rëb zëëb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu miñ rii, bzhixcuaa stiba, pquiaa lo co tapgalaque saca zëëb luu.”

<sup>8</sup> Zeene bien men co zha noyun zho, bzee zdoo me gon me scataa ndzielguic zho. Ncuane ntoladza, per grëse miech ne zianal ncuuan lo guidzliu rii, ndzielguic zho par gun zho grë guelntseeb. Par miñ co ndziibraa ndzielguic zho lo zha ne no xnëz Dios. <sup>9</sup> Sangue to gzoobladzde to gun to miñ co, ncuane rap to lo guidzliu rii, golquiina per par gun to xyudar samiech to. Zeene laa ncuuan co grë, nenda zacnie zho to, per mine mazdraa non Diosi iblë zacnie me to, zneedz me tib lugar ndzon cuëz to, led yedraa ga pe nitlo.

<sup>10</sup> Zha ne ndzinli rundziin

tel palal yeense ncuane riaannie zho, scaque ndzinli gundziin zhow zeene guiaannie zho nrooba. Laa zha ne ndzinlid, mine gun zho zeene guiaannie zho ncuuan zhis, mincoque gun zho zeene guiaannie zho ncuane nroob. <sup>11</sup> Nana zha ne sca gacd ne ndzinlise gundziin zho ncuane no lo guidzliu rii, zha dzigo grieelo gundziin zho ncuuan ndzon ne gdeed Dios lo zho zaatne no me? <sup>12</sup> Stiba, tel sca ndzinlide to lo chen ben, zpe naczhe ncuane gun to tib ncuane chenpaa to? <sup>13</sup> Golgona ganle, grieelod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

<sup>14</sup> Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi.

<sup>15</sup> Dzigo rëbchaa me lo zho:

—Masaque rzac to nalëë nli miech wen nac to nëz lo Dios, sangue me gon, wen wen nan me zha nac zdoo to. Nli miech ne ran to, zha wen rzoob zho to; sangue Dios ni lalnu rzacd zdoo me mine run to.

<sup>16</sup> Len dze ne gard guiaad Juan Bautist, niapse xley Moisés ni grë mine bnee zha ne biadteed xtiidz Dios, miñ co nac mine güeynal to. Per zeene psilo Juan pseed me miech, desde hor co laa miech quiayacnan stib mod ne grielo ygaa zho zaatne rnabey Dios; gane na nzian zha ne noxco ygaa

lugar co. <sup>17</sup> Per guiabde to togo nondraa ley, sac grëse miñe zhobnee lo ley, jib laaw none gac! jZig nac guidzliu, zig nac gbaa zrieelo nitlow, sanque ley nitloda, tibaque naca! <sup>18</sup> Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniagaa tib wnaa ne psëëbtsieel, dol ga quiayun zho; zigtaa dola padzeela, scaque niina dola.

*Xcuent tib zha prob lë Lazh*

<sup>19</sup> Tib ricw name —rëb Jesús—, niapse grë lar niazh racw me, gzobse dze run me lni lidz me. <sup>20</sup> Zaatne noque me ga, guiedz co no tib zha prob lë Lazh, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co, <sup>21</sup> rquiambëz me dien pe grieelod gow me maase ncuane rrieengaale lo xmez h men co; ga zob me haxta rdzin grë mëcw rzëëludz ma lo guiedz ne rlan me ga.

<sup>22</sup> 'Bdzin dzew laa Lazh gut, dzigo biet xanj Dios beynie zho me lo Abraham, zaatne rdzin grë zha wen. Goc palal dzew, laa men ricw co gutaque, blozhse pquianap zho me, laa zho güeyqueets me; <sup>23</sup> zeene biao me biini laa me nole gabil. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga. <sup>24</sup> Horco bnab me lo Abraham siguiel Abraham cxeel me Lazh, maase guic

mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga. <sup>25</sup> Dzigo rëbchaa Abraham lo me: “Xin, psoladz ganle zeene wban luu lo guidzliu, ncuane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnë qui. <sup>26</sup> Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.” <sup>27</sup> “Bzhiguiel sca”, rëb men ricw co, “pxeel Lazh tsie me lidz pxoz naa, <sup>28</sup> tsienie me diidz lo zgaay bets naa zha ne biaan, guiab me lo zho ib gund zho miñe ben naa, zeena guiaate zho nu ygaa zho lo guielnëdox rii.” <sup>29</sup> Pquiabchaa Abraham, rëb Abraham: “Tel miñcow, tso w glab zho lo grë ley ne psan Moisés, lo grë miñe bnee grë zha ne güeyteed xtiidz Dios, benque lo co zhobnee zha no gban zho.” <sup>30</sup> “Nliw”, rëb me, “per tel squi tib men ne gutle tsie tsienee lo zho, rien naa znuse csaan zho xquielntseeb zho gbig zho lo Dios.” <sup>31</sup> Dzigo rëbchaa Abraham: “Telne rond zho miñe rnabey grë ley ne psan Moisés, grë miñe bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienee lo zho.”

*Zha ne gunctal xtol stib zho*  
(Mt. 18:6-7, 21-22;  
Mr. 9:42)

<sup>1</sup> Tib vuelte rëb Jesús lo xpëedscuel me:

—Nac lo guidzliu rii, ib gunfalte ncuaane rgogui miech gunctal zho xtol zho, iper probsaxe zha ne rquuil samiech runctal zho xtol zho! <sup>2</sup> Mazd zhi guieinew lo zho ygadoo tib quie molin zhobxtil yan zho tsieron zho zho nisdoo, ledle guieinodox ne gan zho; sac gon dol nroob ga gun zho yquuil zho zha ndooladz ne no xnëz naa. <sup>3</sup> ¡Golguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon. <sup>4</sup> Niicle telne nzian vuelte sca gun zho falt lo luu tib dze, been zho perdon zeene laa zho rbig r nab zho perdon lo luu.

<sup>5</sup> Stib dzew, rëb zha ne rzënie me lo me:

—Bneedz guieibiini lo no dib zdooraa no gnalo no Dios.

<sup>6</sup> Pquiab me rëb me:

—Tel niaca mine gzoob ne rnalole to Dios siquier lal tib midz moxtaz, niicle ncuaane mazdraa ngan gnab to lo me, zun mew.

<sup>7</sup> ¿Pe ran to ganle, zha nac zha ne ran xtsiin ben? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: “Na bded, bzob, zeena gowxtsee luu.” <sup>8</sup> Mine run me, gloque rnabey me zho gunlo zho ncuaane gowxtsee

me, gdziib zhow lo me; rlozhraa row me, dzigora rowxtsee zho. <sup>9</sup> Niicle scataa ron zho mine rnabey me, ni rlozh ga, per ni xquizh rdeete me lo zho. <sup>10</sup> Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziinse nac to, mine rieguial to ga, min co been to.

*Biac tsii zha ne rlan guiedz lepr*

<sup>11</sup> Laa Jesús no nëz zie me nëz Jerusalén. Laa me zieded tib guiedz win ne riaan zatne ndzieel xtan Samar xtan zha Galilé, <sup>12</sup> zeene briequia tsii zha ne rlan guiedz lepr. Zit zo zho, <sup>13</sup> nguiedz rbedz zho me, rnab zho lo me yquia zdoo me zho. <sup>14</sup> Zeene gon me zho, rëbchaa me lo zho:

—¡Goltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co. <sup>15-16</sup> Lo gza zho, hor co rias tib zho wbire, nguiedz rnee zho:

—¡Zha ndzontaa Dios! ¡Golwi ganle laa me beenguiacle naa!

Zigne bdzin zho lo Jesús, pquitsgzhib zho lo me, haxta bdzin lo zho lo liu, rdeed zho xquizh lo me. Tib zha Samara, zha zit nac zho. <sup>17</sup> Dzigo rëbchaa Jesús:

—¿Yoraazhe grë zha co waa? Conque tsii zho name beenguiac naa. <sup>18</sup> ¿Tibaque zha zit rii dzigo lëe rzac zdoo mine been Dios lo zho?

<sup>19</sup> Dzigo bliso me zha co ga, rëb me lo zho:

—Porne dib zdoos luu gon bnalo luu Dios, gane biac luu. Bzë, peet tsieniedraa guic luu.

*Zeene gbiire guiaad Mgui ne pxeel Dios*

*(Mt. 24:23-28, 36-41)*

<sup>20</sup> Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuaane ganlopa miech. <sup>21</sup> Grieelod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

<sup>22</sup> Bded ga, rëbcha me lo xpëedscuel me:

—Zdziñ dze, gacladz to tebaa zha znu so naa lo to maase tibaque dze, per gacdraaw. <sup>23</sup> Len dze co, zio zha ne gnë lo to: “Goltë ganle laa Mgui ne pxeel Dios bdziñ nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho. <sup>24</sup> Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëeb ngbidz, ¿niacxe gand grëse miecha?

<sup>25</sup> Per ansraa ne gac min co, ible nroob guielnë ne cteed miech rii naa, ni lalnu gandzed zho naa. <sup>26-27</sup> Len dze ne guial naa ga, grë miech ne ndxie lo guidzliu gal hor co, zhaa grë ncuaane tsonie

guic zho. Rsoladz to ganle zha rac miech len dze ne biaad Noé, lel lo grë zilni zho no zho, zha ne notsieelna, zha ne nobediin xpëed, tibaque zeene biala zho biini laa guiedox co psilole. Laa Noé nole len barcw, laa zho biala grëse zho bnitlo lo nis co. Scadaa nagon no miech len dze ne guial naa. <sup>28</sup> Zig racgaa miech Sodom len dze ne brie Lot ga. Scaque, loxaque ncuaan lo guidzliu rii noxco zho, zha ne no lo zilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz. <sup>29</sup> Lega naclew, zeene laa Lot brie, hor co laa tib guidox biet gbaa, notsa zufr bliala lad guiedz co, grëse miech co bnitlo lo guidox co. <sup>30</sup> Scapaa nagon rac miech ne ndxie lo guidzliu len dze ne laa naa guial.

<sup>31</sup> 'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuaane no len lidz zho, zha ne quiagaa lo dziin dana, ib guiabd zho gbi zho guey zho ro yu. <sup>32</sup> ¿Golsoladz ganle zha bzhaac wnaa ne goc tsieel Lot! <sup>33</sup> Grëse miech, zha ne sca rquianë zdoos grë ncuaane rap zho, ible znitlo zho xquielmban zho; sangue zha ne rquiad zdoos grë ncuaan co, haxta xquielmban zho rbeeladz zhow, nitlod zho. <sup>34</sup> Gal hor co, zaatne tipse nixguies chop zho, tib zho sēnal zhits naa, laa stib zho guiaan. <sup>35-36</sup> Zaatne tipse quaiyot chop wnaa, zaatne

tipseгаа quia chop mgui lo dziin dana, tib zho sēnał zhits naa, laa stib zho guiaan.

<sup>37</sup> Dzigo rēbchaа xpēēdsцuel me lo me:

—¿Pa lo dzigo gdziñ grē zha co?

Pquiab me rēb me:

—Horco bii zlu ganle paw. Zig nac grē pech, zaatne nix magut ga rdziñ ma.

## 18

### *Zha ne rnab lo Dios*

<sup>1-2</sup> Stib dzew, bzodiidz Jesús tib cuent lo xpēēdsцuel me, par guien zho ib guiaan d zdoо zho zeene racniobd mine quianab zho lo Dios, rēb me:

—Tib guiedz name, no tib men co nac me wxtis, ni palal rquiad zdoо me samiech me, per ni Dios rdziebd me. <sup>3</sup> Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlēē lo zhuz. <sup>4-5</sup> Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rēb me: “Ncuaañe lēbdraa guic naa lo men rii, tibaque squi quia me. Nli rdziebd naa Dios, niicle nodгаа naa liaadz pe rzac miech, per parne guiadgunneetraa me naa, mine naca mazd laa naa gun guielwxtis ne rnab me.”

<sup>6</sup> Blozhse bzodiidz Jesús cuent co, rēbchaа me lo zho:

—Telne sca bdziñ dze ne pquiaadiag zha ntseeb co mine bñab wnaa viud co, <sup>7</sup> ¿pe

leł Dios dzigo yquiaadiagd xtiidz zha ne ngab lo me, tel tibaque gnab zho mine racladz zho? <sup>8</sup> ¡Nligaa, ib tedsod zun me mine rnab zho! Per segur zhis zho quiambēz gac xquielwxtis me, zeene laa naa guial stib.

<sup>9</sup> Laa grē zha ne riats, zha ne rzac masaque zha wen nac zho nēz lo Dios, haxta rbix zdoо zho ran zho grēraа miech, bnee Jesús lo zho, rēb me:

<sup>10</sup> —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma. <sup>11</sup> Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grē miech ngoopdol, zig nacse zha ne zo i. Wlaltaa run d naa guielgbaan, run d naa guielntseeb, niicle rquiangoobd naa stib wnaa. <sup>12</sup> Haxta chop vuelt rcuan naa tib len zhmal, grēse ncuaañe run naa gan, run naaw tsii lal, rnedz naa tib lal mine rieguial luu.” <sup>13</sup> Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiase nia zho zdoо zho, rnee zho lo Dios: “¿Dios, rnab naa lo luu pquia zdoо naa znutaa miech ngoopdol nac naa!”

<sup>14</sup> ‘Gneli naa lo to ganle —rēb Jesús—, mazdraa gon wen biaan recaudador co lo Dios, lēdle zha farisé co. Sac zha ne lēēque zha runnon zho, racnond zho lo Dios, laa zha



ne riaanwin, runnon me zho.

*Beenlay Jesús mēēdlas*

(Mt. 19:13-15; Mr. 10:13-16)

<sup>15</sup> Tib dze, nzian men ne bdziñ lo Jesús, bdziñnie zho xpēēdlas zho lo me, parne cxobnia me guic win gunlay me win. Grē zha ne nac xpēēdscuel me, leḷ psilo zho ndox zho lo grē zha ne bdziñnie grē mēēdlas co. <sup>16</sup> Zeene gon me sca quiayun zho, dzigo bredz me zho, rēb me lo zho:

—iCtsirede to grē mēēdlas yeen qui! iGolsaan guiaad win lo naa! Sac gon grē mēēdlas yeen qui, ni zha ne nac zig nac win, zha co nac zha ne sēēb ygab lo Dios. <sup>17</sup> Nligaa zha ne gacndooladz, zha ne gliladz dib zdo, zigne run grē mēēdlas, grielod gdziñ zho zaatne rnabey Dios.

*Ncuane run dimi*

(Mt. 19:16-30; Mr. 10:17-31)

<sup>18</sup> Tib vuelt, wbig tib men ne nac zha non lo menquiedz Israel, rēb me lo Jesús:

—Nan naa luo nac tib men ne noseed miech, ni tib men wen nac luo, ḷbnē lo naa dien, pe nac mine gun naa parne grielo ygaa naa guielmban ndzon ne gdziñd dze lozh?

<sup>19</sup> Pquiab Jesús rēb me:

—Rnee luo lēē tib miech wen nac naa. iNligaaw, Diosse gon nac men wen! <sup>20</sup> Telne nli racladz luo ygaa luo guielmban co, none tsoxco luo gban luo zigne nac Xley Dios. Nanle luo ganle zha naca, rneew:

Tsonied luo zha ne led tsieeld luo,  
gute luo samiech luo,

cuand luo samiech luo,  
yquiadiidzguizhd luo  
samiech luo.

Gon pxoz luo, gon xniaa luo,  
cued luo xquielto me.

<sup>21</sup> Dzigo rēbchaa men co:

—Maestro, grēse mine bzeet luo i, ni tiba gard quits naa wlal ne nac naa zha nguieg.

<sup>22</sup> Horco rēb Jesús lo me:

—Stibaque mine rquiin gun luo. Güey, güeyto grēse ncuane quianie luo, dzigo bdiiz dimi co lo grē zha mban ne guieñd pe yquiin; sca nroobraa guielnzaac ne ygaa luo gbaa. Lozh ga, dē, dēnal zhits naa.

<sup>23</sup> Zeene bin men co sca rēb Jesús, mbanse rac me laa me zey; sac nroob ncuane quianie me. <sup>24</sup> Dzigo rēbchaa Jesús lo xpēēdscuel me:

—iZha nganta lēē, rzac zha ne squi rapchen sēēb zho xnēz Dios gnabey me zho! <sup>25</sup> Mazd ngandse rded tib camell guieer guzh.

<sup>26</sup> Grē zha ne ndxie ga, zeene bin zho sca rēb me, rneechaa zho:

—Telne scataa ngan sēēb miech xnēz Dios, ḷchosedhe dzigo waa nac zha ne zrieelo sēēb xnēz me?

<sup>27</sup> Dzigo rēbchaa Jesús:

—Nligaa par miech, zootle tsod zha ne grielo sēēb xnēz me; sangue me nan me no zho. Sac tel me, tsod ncuane grielod gun me.

<sup>28</sup> Horco pquiab Pedr, rēb Pedr lo me:

—Tel no, grē ncuane rdzi-aapse no psan now, laa no ziaadnal zhits luo.

29 Pquiab me rëb me:

—Golgacnaṅa ganle, grëse zha ne psan lidz, psan zho tsiel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëëb zho xnëz Dios, 30 na lo guielmban riique, mazdraa nroob mine gan zho, ni lozh ga ib tedsod zgaa zho guielmban ndzon ne gdzindraa dze lozh.

*Bzeet Jesús stib zha csacsi miech me*

(Mt. 20:17-19; Mr. 10:32-34)

31 Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun miech me, rëb me:

—Grëse mine bzeetle zha ne biadteed xtiidz Dios padzeela teed naa, niina ne laa ne gdziṅ Jerusalén, laaw gac cumplir. 32 Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa, 33 zguin zho naa, ni haxta zut zho naa. Per zeene gac tson ngbidza, zriebaan naa.

34 Per ib bienḍ zho dien zha nacne sca rnee me.

*Biac tib zha ne rold lo*

(Mt. 20:29-34; Mr. 10:46-52)

35 Laa Jesús bzëëb ro guiedz Jericó, miech guizhiu ne naḷ zhits me. Ro nëz co zob tib men ne rold lo, rnab me gon. 36 Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co

ga. 37 Dzigo rëb zho lo me, Jesús, men Nazaret ziaad ga, zhits me ziaadnaḷ grë miech co. 38 Horco psilo me nguiedz rbedz me, rnee me:

—¡Jesús, men xtii rey David, pquia zdoo naa!

39 Grë zha ne ner, psilo zho ndox zho lo me parne guioog ro me, per leḷ hor cole nguiedzraa rbedz me Jesús, rnab me yquia zdoo Jesús me.

40 Nacne zeene bdziṅ Jesús gax zaatne zob me, blëz Jesús, bnabey Jesús güeyxi zho me. Bdziṅ me lo Jesús, rëbchaa Jesús lo me:

41 —¿Pe nadien gun luu naa?

Pquiab me rëb me:

—¡Racladz naa guiac lo naa!

42 Dzigo rëbchaa Jesús:

—¡Niinagazh gon laa luu gan stib! Laa luu biac, sacne dib zdoo luu bnalo luu naa.

43 Horcogazh laa men co psilo bui, ine rley me roolnie me Dios, laa me zienal zhits Jesús. Haxta grë miech ne zienal ga, zeene gon zhow, ye zho roolnie zho Dios.

## 19

*Güey Jesús lidz tib men læ Zaquew*

1-2 Guiedz Jericó, ga no tib men ne rnabey lo grë zha ne rtop dimi ne razh lo rey Roma, læ me Zaquew. Zeene laa Jesús zieded lad guiedz co, 3 brieë me, ziewi me, sac racladz me gunbey me Jesús. Bdziṅ me, pasëse me gan me Jesús, sac lala miech guizhiu ne naḷ zhits Jesús, ni lala ndopse me. 4 Mine been me,

rias me bdedner me güeytsep me tib lo yag guigw zob ro nēz co, par gdeeda diidza gaṅ me Jesús, zeene laa Jesús ted ga. <sup>5</sup> Zeene laa Jesús bded ga, blis lo Jesús goṅ Jesús laa me zob ga, dzigo bredz Jesús me, rēb Jesús lo me:

—Zaquew, na zeena biet i. Sac racladz naa, lidz luu cuēz naa nadze.

<sup>6</sup> Rley Zaquew goṅ Zaquew sca rēb Jesús, lēēlēd biet me lo yag co, laa me zienie Jesús nēz lidz me.

<sup>7</sup> Zeene goṅ grē miech cow, rlēē zho, rnee zho:

—iPe lēētaa lidz zha ngoop-dol qui ziebēz me!

<sup>8</sup> Laa Zaquew, ine rley zob-nie Jesús. Tibaque bzoli Zaquew, rēb Zaquew:

—Gacnaṅ luu goṅ, lo grē ncuaane rap naa, laa naa gded groḷa ygaaz lo grē zha ne guiend pe yquuin, ni tel nogaa zha ne ndziibraa miṅe beenquizh naa zho, naa maase ctsiree naa tap lal miṅe blan naa zho ga.

<sup>9</sup> Horco pquiab Jesús, rēb me lo zha ne ndxie ga:

—I nagon rlu laa meṅ qui wbigle lo Dios, parne ycaania Dios me. Nli zha xtii Abraham nac me, per bzonziaab me <sup>10</sup> ni naa ne nac naa Mgui ne pxeel Dios, ible laa naa zial zialsilaa naa grē zha ne zonziaab.

### *Zha ne biaan̄nie dimi*

<sup>11</sup> Grē miech ne zienal zhits Jesús ga, rzac zho zigne laa me gdziṅ Jerusalén, laa me sob gac me zhirey zho; nacne

bzodiidz me tib cuent rii, rēb me lo zho:

<sup>12</sup> —Tib xpēēd zha non name, no me tib guiedz win, nacle diidza laa me no tsie zaatne zob meṅ nroob ne rnabey, parne gzo zho me gac me rey guiedz ne no me ga. <sup>13</sup> Zeene laa dze co bdziṅ, dzigo bredz me tsii zha ne quia xtsiin me, nroob dimi ne psan me lo zho tib tib zho, parne gundziin zhow, mientras gbire me.

<sup>14</sup> 'Nzianlaa zha ladz me, rlēē zho raṅ zho me, dzigo pxeel zho bla zha ne güey lo meṅ ne rnabey ne zie me ga, güeynab zho gdeete meṅ co dziin co lo me. <sup>15</sup> Per niicle sca güey grē zha co, peet brieelod niuṅ zho. Blozhse bzo rey co me, laa me bdziṅ ladz me. Zeene bdziṅ me, bredz me gza zha ne biaan̄nie xtimi me ga, par dieṅ palal ziyaca. <sup>16</sup> Bdziṅ tib zho, rēb zho: “Laa xtimi luu nu goṅ, tsii lal miṅe psan luu ga naca niina.” <sup>17</sup> Rley me rēb me lo zho: “iZha squi nagon racladz naa! iWen brieequia xtsiin luu! Niicle zhis ncuaane psan naa lo luu, per bien luu niowse beṅdziin luuw. Na nagon, laa naa gzo luu, gnabey luu tsii guiedz.” <sup>18</sup> Bdziṅ stib zho, rēb zho: “Laa xtimi luu nu goṅ, gaay lal miṅe psan luu lo naa ga naca niina.” <sup>19</sup> Scaque rley me. Bzo me zho gnabey zho gaay guiedz. <sup>20-21</sup> Zeene bdziintaa tib zho, rēb zho: “Nli beṅdziind naa xtimi luu, sac nanle naa zha nac luu, niicle paraa niuṅdziin naaw,

grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.”<sup>22</sup> Blëë guic me, rëb me lo zho: “iBiche nu, paat rquiind naa miech yozh ne squi nac! Conque nanle luu zha nac naa,<sup>23</sup> çpex nac dzigo waa bioxcod luu maase mbediin luu dimi qui, ndziniaaw palal ncaania naaw niina?”<sup>24</sup> Dzigo rëbchaa me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.”<sup>25</sup> Pquiab zho rëb zho: “Per pe nacne zha coque ycaaniaw, ni nrooblew beenlo zho.”<sup>26</sup> “Ib sca no gaca”, rëb me, “sac zha ne rien zha gundziin zho ncuane rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiooba lo zho.”<sup>27</sup> Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

### *Bdzin Jesús Jerusalén*

(Mt. 21:1-17; Mr. 11:1-11, 15-19; Jn. 2:13-22; 12:12-19)

<sup>28</sup> Blozhse bzodiidz Jesús cuent co lo zho, laa zho bio nëz stib, nerse me lo zho.<sup>29</sup> Zeene bdzin zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedscuel me,<sup>30</sup> rëb me lo zho:

—Goltsie guiedz win ne ndxie danse lo ne i. Ga gdzin to zaatne quiadoo tib burr yeen ne choot gard sob lad, dzigo golxadz ma, goltënie ma nu.<sup>31</sup> Tel cho gnabdiidz

lo to pe nacne noxadz to ma, golguiab lo zho: men ne rnabey ne, men co rquiin ma.

<sup>32</sup> Laa zho zie. Bdzin zho, zaatne quiadoo burr co,<sup>33</sup> nligaa, lëëtaque noxadz zho ma, zeene laa bizhuan ma bdzin.

—çPe gun to xpurr naa? —rëb me lo zho—. çPe nacne noxadz to ma?

<sup>34</sup> Dzigo rëbchaa zho:

—Men ne rnabey ne, men co rquiin ma.

<sup>35</sup> Bdzinne zho ma lo Jesús, pxob zho lar ne rbix zho lad ma, bzob me ma.<sup>36</sup> Zigse zie me, no grë miech guizhiu co rta zho xab zho ro nëz rded burr ne zob me ga.<sup>37</sup> Grëse miech co, rleynie zho me. Laa zho xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne ziyan zho run Jesús;<sup>38</sup> rnee zho:

—iNasi laa Dios pxeel zhirey ne! iZha ndzontaa Dios! iHaxta gbaa noyac guielbley dze rii!

<sup>39</sup> Blalaa zha farisé ne ziana ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho.<sup>40</sup> Dzigo rëbchaa me:

—iZac guioog ro zho, per hor co dzigo laa grë quie rii csilo goolniew naa!

<sup>41</sup> Zeene bdzin me zaatne nieenpaa Jerusalén, psilo biab guielnë me, biin me gon me guiedz co,<sup>42</sup> rëb me:

—iProb to men Jerusalén! iTebaa ye to niën niunbey to men ne needz guielbley rii

lo to! Per na ib biende tow, masaque rzac to zig zha ne nioog lo. <sup>43</sup> Na nagon laa dze co bdedle. Grë zha ne rlëe lo to, ible ziaad zho ziadsioog corral zho to, ni tib nëz tedlaade to lo zho, <sup>44</sup> haxta guiab to ladznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

<sup>45</sup> Bdziñ me Jerusalén, güey me yadoo, psilo me blee me grëse zha ne noyūñ lgui ga, rëb me lo zho:

<sup>46</sup> —Znu zhobnee lo Xtiidz Dios: “Zaatne nac lidz naa, ga none guiaad miech gzodidznie zho naa.” Laa to gon, quiayūñ to lugar rii zig tib zhibliee ngbaan.

<sup>47</sup> Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menquiedz, quiaguib zho dien zha gdeeda diidz gut zho me. <sup>48</sup> Per rdziid zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

## 20

*Bnabdiidz zho cho nac Jesús*

(Mt. 21:23-27; Mr. 11:27-33)

<sup>1</sup> Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdziñ bla zha ne nac pxoz ne rnabey, grë zho bla maistr ley ni zla men ne nac men non lo menquiedz,

<sup>2</sup> rnabdiidz zho lo me dien cho nac me, cho rnabey me, zha nacne sca quiayūñ me.

<sup>3</sup> Dzigo rëbchaa me lo zho:

—Ye naa laa naa gun tib w nabdiidz lo to. <sup>4</sup> Golnë dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

<sup>5</sup> Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?” <sup>6</sup> Tel na dzieetsgaa ne, miechse pxeel Juan, grieequiadaque ne; zgoquie menquiedz ne, sac grëse zho riladz Dios pxeel Juan.

<sup>7</sup> Dzigo mazd lëe gdib mine been zho, rëb zho nan zho dien cho pxeel Juan. <sup>8</sup> Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayūñ naa grë miñ rii.

*Xcuent zha ne pquianap liu*  
(Mt. 21:33-46; 22:15-22;  
Mr. 12:1-17)

<sup>9</sup> Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenni me lo liun me. Blozh gā blediñ me liu co lo bla zha ne ran liu, dzigo laa me brieeg ga, zey me stib dan.

<sup>10</sup> Zeene gol mëe ne laa nex co gol, pxeel me tib zha ne quia xtsiñ me zie lo zha ne quianap liun me ga, parne gdeed zha co nex ne rieguial

me ycaa me. Per le<sub>l</sub> bnaaz zho zha ne pxeel me ga, bdi<sub>n</sub> zho zho, blozh ga scase bzonēz zho zho. <sup>11</sup> Wbiire pxeel me stib zho, scaque peet bdeete zho lo zho, le<sub>l</sub> ndox zho lo zho, bdi<sub>n</sub> zho zho. <sup>12</sup> Pxeelaque me stib zho, goc zho tson, scasaque been zho, haxta psiwee zho zho. <sup>13</sup> Quianie me tib mēēd, rleynie me mēēd co. Zeene gon me sca been zha co, rēbchaa me: “Mi<sub>n</sub>e naca laa naa cxel xpēēd naa, zeene gan zho xpēēd naaw, peet gund zho me, nend zon zho xtiidz me.”

<sup>14</sup> 'Pex guien zho cho nac xpēēd me, zeene gon zho men co, rēb zho: “iLēē zha qui nagon guiaannie liu rii! iGol<sub>g</sub>otsaa dziuut ne zho, zeena guiana lo ne!” <sup>15</sup> Bnaaz zho xpēēd me, güeynie zho me zaatne nac tib lad lo liu co, ga güeygut zho me.

‘Zha sca dien rzac to gun bizhuan liu co gza zha ntseeb co? <sup>16</sup> Ib tedsod lēē, zeene gbire me, znitlogazh me zho. Lozhse ga, cuediinga me liu me lo zla zha ne gundziina.

Zeene bin zho sca rēb me, rneechaa zho:

—iIb lic Dios qui, dziuunscad no!

<sup>17</sup> Dze bui me lo zho, dzigo rēbchaa me:

—Per led znu lēē, zhubnee lo Xtiidz Dios: “Qui<sub>e</sub> ne psēēb zha ne nozaa yu, ni nan<sub>d</sub> zho lēēpaa quie co nac mi<sub>n</sub>e rnazdziits yu.”

<sup>18</sup> 'Ni quie co gon, zha ne tsietso<sub>b</sub>e low, zac zho zig tib

ncuaane rac tson tap lē; laa tel lēēgaaw tso<sub>b</sub>e lad zho, zac zho zig tib ncuaane die die rac.

<sup>19</sup> Grē zha ne nac pxoz ne rnabey, ni grē maistr ley, hor co bien zho mi<sub>n</sub>e nac zho ga, bzeet me lo cuent co. iGocladz zho gagazh naaz zho me! Per bdzieb zho, niactseeb grē miech ne ndxie ga. <sup>20</sup> Dzigo mi<sub>n</sub>e been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho li-aadz dien zha gzoobdiag zho xtiidz Dios, <sup>21</sup> bdzin zho lo me, bnabdiidz zho rēb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guianziuu luu lo zho, sinque niapse mi<sub>n</sub>e nac diidzli, mi<sub>n</sub>e rlu zha sēēb zho xnēz Dios, min co rnee luu lo zho. <sup>22</sup> Gane niina, racladz no gnē luu dien pe nonguiela ga rdeed no dimi ne razh lo rey Roma, te nonguielda ye.

<sup>23</sup> Bienga me racladz zho gungüet zho me, dzigo rēbchaa me lo zho:

<sup>24</sup> —iGol<sub>l</sub>needz tib xpes to nu ganle!

Dzigo bdeed zho tib pes lo me. Blozh ga, rēbchaa me lo zho:

—iCho nu? iCho lē nu quia lo pes rii?

Pquiab zho rēb zho:

—Lēē rey Roma i, lēē lē me i quia lo qui.

<sup>25</sup> Dzigo rēb me lo zho:

—Mīne rieguial sca ycaa rey Roma, goldeeda lo rey Roma; scaquegaa mīne rieguial ycaa Dios, lo Dios goldeeda.

<sup>26</sup> Bzee zdoo zho gon zho sca ptsire me lo xtiidz zho. Mazd dzese bre zho, sac bdziel zho zha niungüet zho me; gocladz zho squi ndxie miech nxin me pe tib diidz, per brielod niungüet zho me.

*¿Pe nli zrieeban miech?*

*(Mt. 22:23-33; Mr. 12:18-27)*

<sup>27</sup> Blozh ga, güeyaque zla zha saducé lo Jesús. Nac zha saducé riladzd zho zdzin dze grieeban miech; bdzin zho, rēb zho lo me:

<sup>28</sup> —Maestro, znu psan Moisés diidz: telne glo mgui guet lo wnaa ne nac tsiel mgui, ni gopd wnaa mēed, dzigo none betsaque zho ctsieelnia wnaa co stib, zeena gap wnaa mēed ne guiaan xlugar xpēed zha ne gut ga.

<sup>29</sup> 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpēed zho. <sup>30</sup> Dzigo ptsieelnia wnaa co stib bets ngutoo co. Blozh ga, gutaque zha co, pa sē zho nsan mēed.

<sup>31</sup> Ptsieelniaque me stib zho, goc zho tson, niicle zha co psandaque mēed. Sca sca haxta bza gza gadzse zho ptsieelnia me, <sup>32</sup> tibaque zeene yeque me laa me gut.

<sup>33</sup> Mīne racladz no gacndion no, ¿chopaa dzigo gac tsiel wnaa co, zeene laa zho

grieeban, ne sca gza gadzse zho ptsieelnia me?

<sup>34</sup> Pquiab Jesús rēb me:

—Tiba, gacnan to ganle, lo guielmban riise rtsieelnia miech. <sup>35</sup> Zeene grieeban zho, zig nac zha ne yгаа guielnzaac gdzin zho zaatne no Dios, led yedraa ga ctsieelnia zho. <sup>36</sup> Sac laa zho mbanle ga, gdzindraa dze guet zho. Masaque laa zho gac zig nac grē xanj me, mēed gac zho lo me. <sup>37</sup> Laa stiba, gacnan to ganle ible zrieeban grē mengut. Golwi ganle, zeene bzeet Moisés zha rēb Dios lo me zeene gon me tib yag zarz ne noyazbel ga; ga rlu rrieeban mengut. Rēb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rēb me, ga rlu ganle mban zha co. <sup>38</sup> Sac tel me, nacd me xDios mengut, sinque xDios zha mban nac me. ¿Par me, grēse zha ne ngab lo me, zha mban nac zho!

<sup>39</sup> Blalaa maistr ley zo ga, gon zho sca rēb me lo zha co, dzigo rēbchaa zho lo me:

—Maestro, nli squi naca zigne rnee luu i.

<sup>40</sup> Dzigotaa ni stib zho beendraa pe nabdiidz zho lo me.

*¿Cho xpēed nac Crist?*

*(Mt. 22:41-46; 23:1-36; Mr. 12:35-40; Lc. 11:37-54)*

<sup>41</sup> Horco bnabdiidz Jesús lo zho, rēb me:

—¿Zha nac dien ne rnee zho tib xpēedaque rey David gac Men ne nacle diidz cxeel Dios ga? <sup>42</sup> Led Davitaque

name znu bnee tib lo salm ne pquiaa me:

<sup>43</sup> Bnee Dios lo men ne rn-  
abey naa, rëb Dios lo  
me:

“Cue naa nëz derech, nu  
bzob,

nieeda lozh gnaz naa grëse  
zha ne rlëë lo luu, csan  
naa zho ladsnia luu.”

<sup>44</sup> Gase ganle rlu, led scada;  
telne nli zha xtii David gac  
men co, ¿zha nac dzigo ne  
lëëque David rnee ne me rn-  
abey David?

<sup>45</sup> Squi ndxie grë miech co  
noquiaadiag zho, zeene bnee  
me lo xpëëdsuel me, rëb me:

<sup>46</sup> —Golguien gon, ib  
tsienalde to mine run maistr  
ley. Sac grë zha ne nac maistr  
ley, rdziladz zho racw zho  
lar nool, haxta zhits ni zho  
rbiba, rdziladz zho ndooladz  
rquiaabdiuzh miech zho  
zaatne rdzieel zho zho ro  
nëz. Zig nac len yadoow,  
zha nac zha ne rzob lo xcan  
zaatne rzob grë zha non;  
zeene riegaa zho tib lo lni lidz  
miech, lëëpaaze zha nac zha  
ne rzob groj mezh zeene laa  
wagw rac. <sup>47</sup> Ni rlozh ga, rio  
zho rla zho tel pe ncuaane  
rapse grë wnaa viud; ni  
parne peet guiabd miech lo  
zho, xtse rzo zho rzadraa pe  
lay ne rool zho. Sca run zho,  
iper ib tedsod nroob caxtigw  
ne yгаа zho!

## 21

*Gon ne bdeed tib wnaa  
viud*  
(Mt. 24:1-2; Mr. 12:41-44;  
13:1-2)

<sup>1</sup> Laa Jesús no len yadoo  
ga noseed me miech. Ga no

me, gon me zha rdzin grë zha  
ricw, nroob dimi rсан zho len  
alcancí ne zob ga. <sup>2</sup> Tibaque  
zeene bdzin tib wnaa viud,  
tib men proba, ye me laa me  
psan chop gaay win len al-  
cancí co. <sup>3</sup> Zeene gon Jesús,  
rëbchaa me:

—Gneli naa lo to ganle,  
mazdraa gon non gon ne  
bdeed wnaa viud qui, lëdle  
grë gon ne psan grë zha qui.  
<sup>4</sup> Sac tel zha, dimi ne riaanle  
lo zho i rgogon zho; sangue  
wnaa prob qui gon, centav  
yeen ne quianiese me, mine  
rnalopaa me gziuu pe yquii  
me, per laa me bloogona.

<sup>5</sup> Laa Jesús zieriee ga,  
zeene psilo bla zha ne nac  
xpëëdsuel me, rlozhd gwi  
zho zha niaa yadoo co, rzee  
zdoo zho ran zho grë quie ne  
niaaw, grë ncuaane ngalguiee  
lena. Zeene gon mew, rëbchaa  
me lo zho:

<sup>6</sup> —Niicle squitaa gon ran  
to niaaw niina, per dzin dze  
ne nitlow, dib nacsew. Ni  
stib quie qui guiaandraa zigne  
squi zhobxcuaaw i.

*¡Nsin golso!*

(Mt. 24:3-28; Mr. 13:3-23)

<sup>7</sup> Bded ga, bnabdiidz zho lo  
me, rëb zho:

—Maestro, ¿poc dzigo gac  
mine bzeet luu ga? ¿Zha glu  
zeene laaw ziaadyob gac?

<sup>8</sup> Dzigo rëbchaa me lo zho:

—Nsin golso, zeena choot  
yquidiede to. Sac nzian zha  
ne griequia, guiab zho laa  
dze co bdzinle, guiab zho zha  
nac Men ne zëëble diidz ga  
cxeel Dios. ¡ib gliladzde tow!  
<sup>9</sup> Zeene gon to pa lo ndxiedil



tib guiedz, pa lo noyacgaa grē dildox, ib gdziebde to. Ib none gac grē ncuaan co, per lega loxaque minē csilosew ga.

10 'Grē guiedz nroob, laaw tilnie saguiedz nrooba; grē zha ne rnabey grē guiedz nroob, laa zho tilnie sazha rnabey zho. 11 Nēzrii nēzrec csilo gni grē zhodox, nzian zaatne gan miech gbin, zaatne glaangaa zho grē guielguidzdox. Nzian grē ncuaane glu zhan gbaa, nzian grē ncuaan co, ncuaane ctseb miecha. 12 Per ansraa gac grē ncuaan co, stsidil miech to, squianał zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnēz naa. 13 Ga nagon gdeeda diidz gnee to lo grē zha co, gacnan zho ganle cho nac naa. 14 Ib gunde to tso to zhgab dien pe guiab to lo zho, zeene laa to ctsire lo minē rquiaqui zho to; 15 sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

16 'Haxta pxoz to, xniaa to, bets to, grē menlidz to, grē zha ne ndzieeldiidz to, stsidil zho to, lēēque zha tsielo to ladznia zha ne csacsi to. Lo grē to, zio zha ne haxta zet ladznia grē zha co. 17 Grēse miech glēē gan to porne nac to zha ne no xnēz naa. 18 Nli stiche zho xquielmban to lo guidzliu rii, per, jni tib guits

guic to, grieelod zho gnitlo zho! 19 Tiblique sca golgac, sozite to lo naa, zeena ygaa to guielmban ndzon ne gnedz Dios.

20 'Zeene gan to igose guiedz Jerusalén ndxienap menGUIIB, nanle to len dze co laaw nitlo. 21 Grē zha ne no guiedz ne ngab Judé, none xoon zho tsie zho nēz yagui, ga tsietsolan zho. Zha ne no Jerusalén nu, none grieeniob zho. Grēgaa zha ne quia dziin dana, ib guiabd zho gbire zho lad guiedz. 22 Tib guielnēdox ne csiaab Dios gan grē miech rii len dze co, ga gac grē minē raquiet lo Xtiidz me ted zho. 23 jProb grē men wnaa ne lēetse len dze co zoney xpēēd, men ne quianiegaa mēēd ne bii radz! jMbandox ted miech, guielnēdox ne csiaab Dios gan zho guiedz rii! 24 Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grē zha zit co, sēēb gunchen Jerusalén; haxta gdzin dze ne gnabey Dios gree zho.

*Ziaad Jesús stib*  
(Mt. 24:29-35, 42-44;  
Mr. 13:24-37)

25 'Nzian grē ncuaane glu lo ngbidz, glu lo mēē, glu lo mel. Mbanse gac miech, zdziebdox zho zeene gon zho bidox ne tso tsasoli nisdoo. 26 Nzian zha ne haxta scow zho lo dzeb, zeene laa zho gan grētaa ncuaane noyac lo guidzliu len dze co. Grē ncuaane no zhan gbaa, nēzrii nēzrec gaca. 27 Horco bii

zan zho ganle zeene laa naa zialzëeb tib lo xcow con grë guielndzon, con grë poder ne rap naa. <sup>28</sup> Zeene gan to laa grë ncuuan co rsilo noyac, nley golco zdoo to; jsac hor co laa Dios ycaania to!

<sup>29</sup> 'Golzoob cuidad ganle zha nac yag guigw, beelzegaa pe stib yag. <sup>30</sup> Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëe nëëg ziaadgaxle. <sup>31</sup> Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle. <sup>32</sup> Gneli naa lo to ganle, nzian grë miech ne mban niina, bii zan zho zeene laa grë ncuuan co gac; sac ible ncuuane gaca. <sup>33</sup> Zdziñ dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac. <sup>34-35</sup> jNsin sca golso, zaacse golgac! jAdel gal dze ne laa naa guial, lel lo grë ncuuane ndzinlid, lel lo guielgonziu, lel lo grë zhgab ne rac lo guidzliu rii no to, zigne gun grëraa miech! Sac gon, lega naclew glanso naa. <sup>36</sup> Nligaa nsin golso. Tibaque glnab lo Dios, gacnien me to peet gacde to lo grë guielnë co, ine peet xtolde to zeene laa to gacredz lo naa.

<sup>37-38</sup> Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebëz me cho Gui Oliv.

## 22

*Bnediidz zho dien zha gnaaz zho Jesús*

(Mt. 26:1-5, 14-16;  
Mr. 14:1-2, 10-11; Jn. 11:45-53)

<sup>1</sup> Ziaadyoble lni Pascwa, zhilni nroob men Israel, lni ne row zho guietxtil ne rquiad ncobi lad. <sup>2</sup> Grë zha ne nac pxoz rnabey ni grë maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

<sup>3</sup> Tib dzew, laa mendox bzëeb zdoo Judas Iscariot, tib zha ne rzëniepaa me ga, <sup>4</sup> rias Judas güey Judas lo grë pxoz rnabey co, lo grë men ne zo lo zha ne rquianap yadoo, rëb Judas zha csan Judas Jesús ladznia zho. <sup>5</sup> Zeene bin zhow per nli rley zho, nacne biaan zho diidz quizh zho Judas. <sup>6</sup> Dzigo desde hor co psilo Judas noguib Judas dien zha gdeeda diidz guien miech csan Judas me ladznia zho.

*Dowxtseenie Jesús  
xpëedscuel me*

(Mt. 26:17-29, 31-35;  
Mr. 14:12-25, 27-31; Jn. 13:21-30, 36-38;  
1Co. 11:23-26)

<sup>7</sup> Mer dze ne rsilo lni Pascwa, len dze ne sca row zho guietxtil ne rquiad ncobi lad, ni rut zho carner yeen ne rowxtsee zho. <sup>8</sup> Dze co bnabey Jesús Pedr grop Juan tsiegunlo zho xtsee ne gownie me zho wdze co. <sup>9</sup> Dzigo bnabdiidz zho lo me, rëb zho:  
—jPa lo racladz luu guio no guiodziunlo now?

10 Rëbchaa me lo zho:

—Goltsie Jerusalén. Zeene sëeb to lad guiedz, ga gan to tib mgui nzobyan tib re nis, goltsienal zhits me. Yu ne gan to sëeb me, <sup>11</sup> golguiab lo bizhuan yu co: “Znu në Maestro, ¿pa len yu me gneedz luu gac zaatne gowxtseenie me xpëedscuel me wdze rii?” <sup>12</sup> Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

<sup>13</sup> Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>14</sup> Wdze co, zeene gol hor xtsee laa Jesús bded lo mezh gza me gza tsiipchop xpëedscuel me. Xtsee co no zho, <sup>15</sup> zeene rëb me lo zho:

—¡Blactaa gon pquiambëz naa gdziñ dze rii, znu gowxtseenie naa to nawdze rii, ansraa csacsi miech naa, gut zho naa! <sup>16</sup> Lëe lultm vuelt nu gon teed naa lni Pascw rii, haxta gdziñ dze ne laa Dios csilo gnabey, dze ne glupaa ganle zha nac xtsee rii.

<sup>17</sup> Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Golquiin vin rii gza to. <sup>18</sup> Gneli naa lo to ganle, lëe lultm vuelt nu guie naa vin rii, haxta gdziñ dze ne laa Dios csilo gnabey.

<sup>19</sup> Ni bzhen me quietxtil, bdeed me xquizh lo Dios, blozh ga beengrol mew bdiiz mew lo zho, rëb me:

—Golquiina, rrieequia gon lëe xcuerp naa i, sac gon znu gun zho xcuerp naa parne csilaa naa to grë to. Zeene gdeedtaaw diidz, golgun min rii parne glu to ganle tibaque rsoladz to naa.

<sup>20</sup> Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëe stib trat cub nu gon riaan Dios grë me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona. <sup>21</sup> Ni gacnan to ganle, lo mezhaque nu gon zob zha ne tsielo naa ladznia zha ne gut naa. <sup>22</sup> Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, iper probsaxe zha ne tsielo naa ladznia zha co!

<sup>23</sup> Horco psilo gza zha ne zobnie me ga, rnabdiidzlsa zho dien cho nac zha ne rzeet me ga; <sup>24</sup> haxta psilo zho nodildiidz zho dien cho gac zha ne gacnon lo zho. <sup>25</sup> Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëe gdib rxecw zho, haxta rnee zho nroob quiayun zha co xyudar guiedz. <sup>26</sup> Sangue to gon, zha ne gnabey lo to, none guien zho gac zho zig tib ngundziin lo to; zha ne racladzga gacnon, none guien zho guiaanwin zho. <sup>27</sup> Lo guidzliu rii, zha ne

rnabey, rzobse zho, zha ne nac ngundziin, zha co rdziib ncuaane row zho. ¡Sangué lo ne, led scad naca! ¡Golwi ganle, tib ngundziin nac naa lo to!

<sup>28</sup> Tose goc zha ne tibaque gocnie naa lo grëtaa mine bdeed naa len dze rii. <sup>29</sup> Gane niina, laa naa gneedz tib guielnzaac nroob lo to yгаа to gdziñ to zaatne bneedz Pxoз naa gnabey naa; <sup>30</sup> zeena ine znu tipse zioob ne lo xmez h naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

<sup>31</sup> Horcoque bnee me lo Pedr rëb me:

—Bina ganle Pedr, racladz Satanás gon ycuiib ma to, zigne run zho zhobxtil. <sup>32</sup> Per laa naa bnable lo Dios, gacnien me luu, csaand me soz- itpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoо zho gnalo zho naa.

<sup>33</sup> Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, ¡telne gutгаа zho luu, zaatne guet luu, ga guet naa!

<sup>34</sup> —Bina ganle Pedr —rëb Jesús—. ¡Guieel riigazh gon, gardle ycuedz gall, tsonle vueltrëbluu runbeyd luu naa!

<sup>35</sup> Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuaane

gow to, per ni lab to bide to. ¿Pe beenfalt ncuaane nquiin to hor co?

Pquiab zho rëb zho:

—Beenfaltedew.

<sup>36</sup> Dzigo rëbchaa me:

—Horco nagon peet bide to, sangue niina zha ne quianie dimi, zha ne quaniegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba.

<sup>37</sup> Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

<sup>38</sup> Pquiab zho rëb zho lo me:

—¡Bui ganle laa chop spad nule!

Dzigo rëbchaa me:

—¡Mazd peet gnedraa naa lo to!

*Bzodiidznie Jesús Pxoз me Getsemani*

(Mt. 26:36-46; Mr. 14:32-42)

<sup>39</sup> Blozhse ga, laa me briece zie me nëz Gui Oliv, zaatne rietaque me; zienalaque gza xpëedscuel me zhits me. <sup>40</sup> Bdziñ zho ga, rëbchaa me lo zho:

—Golnab lo Dios gacnien me to, zeena yquild mendox to.

<sup>41</sup> Bzë me spalal, bdziñ me zig zaatne riab tib quie ne rchel ne nia ne, dzigo ga pqui- itsgzhib me, psilo me bnab me lo Dios, <sup>42</sup> rëb me:

—Papá, laa naa rnab lo luu, telne zala zdoо luu, psilaa naa lo grë guielnë rii. Per

telne grieeloda, miñe gnëtaa  
luu sca gaca.

<sup>43</sup> Horco biet tib anjl gbaa  
bdziñ pchoobladz zdo me.

<sup>44</sup> Mban rac me laa me  
nozodiidznie Pxo me, per  
hor cole mazdraa rnab me  
lo Pxo me; lo guielnë ro co  
haxta rzonis me, masaque  
zëbdzuun grë nis co lo me  
zootle ren.

<sup>45</sup> Zeene laa me guso  
ga, bdziñ me zaatne biaan  
xpëëdsuel me, gon me gzase  
zho laa zho nixguies. Ye zho  
mban rac zho, lo guielnë co  
bguudz zho mcaal. <sup>46</sup> Dzigo  
pcuaan me zho, rëb me lo  
zho:

—¿Nixguies to ye? Lëda i  
gon, jgolsobna! Golinab lo Dios,  
gacniñ me to, zeena yquild  
mendox to.

### *Bnaaz zho Jesús*

(Mt. 26:47-58, 67-75;  
Mr. 14:43-50, 53-54, 65-72;  
Jn. 18:2-18, 25-27)

<sup>47</sup> Laa Jesús quianeeque,  
zeene laa Judas bdziñ  
bdzinnie Judas tib dzoon  
miech. Zigne bdziñ Judas,  
wbig Judas lo me, dow Judas  
bzhid cuas me.

<sup>48</sup> —jJudas! —rëb me—. ¿Con  
tib bzhid dzigo lëë glu luu naa  
lo grë zha qui?

<sup>49</sup> Zeene bien xpëëdsuel  
me, me zienaaz grë miech co,  
rëbcha zho lo me:

—Maestro, ¿zha dziuun ne?  
¿Pe zdeed spad no zho?

<sup>50</sup> Znuse biet tib zho pchel  
zho tib nia spad, pchug zho  
diag tib xmoz men ne nac  
pxoz nroob. <sup>51</sup> Dzigo bnee  
Jesús lo zho rëb me:

—Golsaan zho, ndzinli  
golgac.

Horco wbig me bzhen me  
diag zha co, beenguiac mew,  
lëetse min derecha.

<sup>52</sup> Lad grë miech co no ndal  
grë pxoz ne rnabey, grë zha  
ne zo lo zha ne rquianap  
yadoo, ni spalal men ne nac  
zha non lo menquiedz; dzigo  
bnee Jesús lo zho, rëb me:

—¿Pe nacne squitaa ziaad  
to, nzhen to yag, nzhen to  
spadziadnaaz to naa? ¿Niacxe  
naa cho ngbaan? <sup>53</sup> Blactaa  
dze name gon to no naa len  
yadoo, ni bnaazde to naa  
ga. Per nole guic to nagon  
nawdze rii gnaaz to naa;  
grë miñe racladz to grë to  
mendox, niina laaw gac.

<sup>54</sup> Horco wbig be zho bnaaz  
zho me, laa zho zienie me  
nëz lidz men nac pxoz nroob.

<sup>55</sup> Bdziñ zho lidz men co, bre  
zho xley me, bzëëg zho gui,  
laa zho no nodzëë zho. Ye  
Pedr maase zit zit nal Pedr,  
laa Pedr bdziñ ga; laa Pedr  
wbig bzob lo zho ga. <sup>56</sup> Zeene  
gon tib wnaa ne quia xtsiin  
men co laa Pedr zob ga, dze  
rwi me, tibaque rëb me:

—jYe mguí qui gon rzënie  
men ne blansonie to i!

<sup>57</sup> —¿Naa ye? —rëb Pedr—,  
jper ni runbeyd naa men qui!

<sup>58</sup> Wdzeepaaw, laa tib zha  
ne zo ga, gonaque Pedr, rëb  
zho lo Pedr:

—¿Segur lëë ye luu nacie  
men ne bгаа i?

Scasaque bneelid Pedr.  
<sup>59</sup> Wdzeelaaque goca, zeen  
laa stib zho brieequia, rëb  
zho:

—Lëe tib zha ne nacnie men qui nu gon. iRlu zha galilé nac zho!

<sup>60</sup> Pquiab Pedr, rëb Pedr:

—iRiend naa gon, pe nacne squi rnee luu!

Gardle lozh greee diidz co ro Pedr, zeene laa tib gall pcuedz. <sup>61</sup> Gall co nocuedz, zeene ptsire lo Jesús, dze bui me lo Pedr; dzigoraa psoladz Pedr zeene rëb me lo Pedr: “iGuieel riigazh gon, gardle ycuedz gall, tsonle vuel rëb luu runbeyd luu naa!” <sup>62</sup> Mbanse rac Pedr. Brie Pedr ga, psilo Pedr biin Pedr guieinë co.

<sup>63</sup> Grë zha ne zopaa quianap Jesús, nzian grë ncuaane run zho me, psilo zho noyunguzee zho me. <sup>64</sup> Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ÷bnë sca dien cho ga bdiin luu?

<sup>65</sup> Nzian grë ncuaane rgoredz zho lo me.

*Güeynie zho Jesús lo zhiwx-tis zho*

(Mt. 26:59-66; Mr. 14:55-64; Jn. 18:19-24)

<sup>66</sup> Zeene biini liu, pcaalsa grë men ne nac zha non lo menquiedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwx-tis zho. Bdziin me ga, bnabdiidz zho lo me rëb zho:

<sup>67</sup> —Bnë lo no dien, ÷pe lëe Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëe men co nu nac naa, gliladzde tow, <sup>68</sup> tel pe gnabdiidzгаа naa lo to, ctsirede to low; sac gliladzde to mine nac diidzli. <sup>69</sup> Naa ne nac naa Mgui ne pxeel Dios, zhile laa dze gdziin zeene laa naa sob cue Dios nëz derech, men nroob ne rrieelo run grëse ncuaane racladz me.

<sup>70</sup> Horco grëse zho pquiab, rëb zho lo me:

—÷Xpëed Dios dzigo lëe nac luu?

Dzigo rëbchaa me:

—Tozhal name rnee, nli Xpëed me nac naa.

<sup>71</sup> Horco rëb zho:

—iPe mazdraa textigw ne racladz ne! iLaa ne bdzionle ganle mezhal rnee Xpëed Dios nac me!

## 23

*Güeynie zho Jesús lo Pilat*

(Mt. 27:1-2; 11-14; Mr. 15:1-5; Jn. 18:28-38)

<sup>1</sup> Horcogazh pcaanie zho Jesús nëz, bdziinnie zho me lo Pilat, men ne nac gobernador ne nzoob zha Roma ga. <sup>2</sup> Ga psilo zho nzian grë ncuaane rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquuil me menladz no gacntseeb zho. Rnee me lo zho nonguielda gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

<sup>3</sup> Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

<sup>4</sup> Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¡Ni tib dol rapd men rii!

<sup>5</sup> —¿Zha gapd me dol? —rëb zho—. Ni zaatne zieetaa me noquiil me miech gacntseeb zho lo zhirey ne. ¡Dible nëz Judé nu güeyted me; desde nëz Galilé brie me ziaad me haxta nu!

<sup>6</sup> Gon Pilat sca rëb zho, dzigo bnabdiidz me dien pe zha Galilé nac Jesús. <sup>7</sup> Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëetaque len dze co laa Herod no Jerusalén ga.

<sup>8</sup> Rley Herod zeene gon Herod me, sac ziyon Herod grëta mine run me; quiambëz Herod gdziñ dze ganlo Herod me, ganlo Herod gun me pe tib milagr. <sup>9</sup> Psilo Herod nzian grë ncuaane rnabdiidz Herod lo me, per ni tib lo w nabdiidz co ib ptsired me. <sup>10</sup> Zeene gon Herod rquiabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw, <sup>11</sup> nacne lel psilo Herod grë xmenquiib Herod rzhidznie zho me, runguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat. <sup>12</sup> Glo ib

rdzieeld xtiidz Herod grop Pilat, laa dze co laa zho psilo bneewen stib.

*Bnab zho guet Jesús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menquiedz, <sup>14</sup> rëb Pilat lo zho:

—Laa zho biad-zoob xde-mand men rii lo naa nu, nac diidz noquiil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me. <sup>15</sup> Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaane guiab ne rieguial guet me. <sup>16</sup> Mine gaca, laa naa gnabey ted me tib caxtigw, lozh ga dzigo laa naa csilaa me.

<sup>17</sup> Nac costumbr, gzobse lni Pascw rsilaa zho tib zha ne no xcuent lo wxtis. <sup>18</sup> Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me! ¡Barrabás psilaa!

<sup>19</sup> Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len quiedz Jerusalén ga, ni zëëbaque me tib ngutoo. <sup>20</sup> Bguiib Pilat dien zha nrieelo nsilaa me Jesús, <sup>21</sup> per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

22 —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

23 Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho. 24 Racse Pilat, laa Pilat bdeed diidz. 25 Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

*Güeyquiaa zho Jesús lo cruz  
(Mt. 27:32-44; Mr. 15:21-32;  
Jn. 19:17-27)*

26 Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbire lo dziin dan, pcuëez zho men co, bnabey zho me bi me zhicruz Jesús; nalse me zhits Jesús, laa zho zienie Jesús. 27 Miech guizhiu ne zie ga, ndal grë men wnaa psilo zho roon zho no zho xquielnë me, 28 dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to; 29 sac zeene gal dze co grë men wnaa ne quianie mëed, ziab zho: “Mazd wenaque zie zha ne quianied mëed, zha ne nanđ zha radz mëed, zha ne

niaadgaa gap mëed.” 30 Horco grë miech, laa zho gnab tebaa zha pixche grë gui guiaan zho zhana. 31 ¡Golwi ganle, telne znutaa mine nodeed naa nac naa zig tib yag nguia, pelej to dzigo ne nac to zig tib yag bidz!

32 Ye schop zha ne nac ngbaan, zienie zho ga yquiaagza zho me lo cruz. 33 Zeene bdzin zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nëz cue zhicruz me. 34 Lo cruz co quia me, zeene nguiedz bnee me rëb me:

—¡Papá! Ncuane quiayun grë miech rii nu, bzhiguiel gunquizhd luu zhow; sac riend zho pe run zho.

Gza menguiib ne bdzin ga yquiaanap me, hor co tib tib zho bzhense zho tib lë xab me, laa stiba bio zho rif. 35 Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguiaac me, stib miech scataa bla me. ¿Pe rac me na ne riete me i? ¡Guet me i zho, telne nli me nac Men ne zëëble diidz cxeel Dios, telne nli Dios bzooblo me ziaad me!

36 Wbig menguiib co rdeed zho nziu bla guie me, rzhidznie zho me, rnee zho:

37 —¡Zhirey zha Israel name nac luu! Psilaa luu lo guielnë qui nazho.

38 Glaa guic zhicruz me quia choplan diidz ne pquiaa zho, rneew: “LËË ZHIREY ZHÁ ISRAEL NU.”



<sup>39</sup> Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—iLed rëb luu lëe, luu nac Men ne zëëble diidz ga cxeel Dios! iBlu nazho nli men co nac luu, psilaa ne lo guielnë rii!

<sup>40</sup> Horco pquiab stib zha co, rëb zho lo zho:

—iPsioog ro luu! iPe nicle niina ne laa luu guetle ib rdzieebd luu Dios? <sup>41</sup> Bien ganle, jtel ne ible min rii rigual ne grop ne, nu nodizh ne grë guielntseeb ne bdziun ne; sangue men qui, peet dol rapd me!

<sup>42</sup> Dzigo rëb zho lo me:

—iBzhiguel zeene guiaad luu gnabey luu, ib csand luu naa tib lad!

<sup>43</sup> Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquielbley Pxoz naa.

*Gut Jesús*

(Mt. 27:45-56; Mr. 15:33-41; Jn. 19:28-30)

<sup>44-46</sup> Gol groł dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biala biini stib. Horco pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grołtaa goca.

<sup>47</sup> Zha ne rnabey lo zhaguiib ne pquiaa me lo cruz

ga, zeene gon zho zha blozh me, bien zho Dios been min co, rëb zho:

—iNe nlipagaa tib men peet xtold goc men qui!

<sup>48</sup> Scaque grë miech ne goclo ga, zeene gon zho zha blozh me, biabguielnë zho, mbanse rac zho laa zho wbiga. <sup>49</sup> Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brieer me nëz Galilé, grë zho laa zho ndxiese tib lad rwi zho.

*Bgueets Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Lad grë zha ne nac zhiwxtis men Israel ga, no tib men guiedz Arimaté lë me José; lëe guiedz co ndxie xtan Judé. Tib miech wen nac me, noxco me mine rnabey Dios, <sup>51</sup> ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho. <sup>52</sup> Nacne hor co güey me lo Pilat, bnab me didzbey tsielit me xcuerp Jesús lo cruz. <sup>53</sup> Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

<sup>54</sup> Lëe bdze dze co no zho xco ne laa dze ne gdziiladz zho lo dziin sëeb. <sup>55</sup> Grë men wnaa ne sca nacgza grë zha ne brieenal zhits me zeene brieer me nëz Galilé ga, ye zho güeynal bgueets me, gon zho pa lo bio me. <sup>56</sup> Blozhse

bgueets me, laa zho zey. Bdzin zho bzhixcuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no gun zho.

## 24

### BRIEEBAN JESUS

(Mt. 28:1-10; Mr. 16:1-8; Jn. 20:1-10)

<sup>1</sup> Laa zeene gol dze ne rzobni zhmał, silgaw laa gza men wnaa co brieë, bi zho grë zënex ne bzhixcuaa zho ga, laa zho zie ro baan Jesús.

<sup>2</sup> Bdzin zho, gon zho laa quie ne bioog ro baan me ga bdiooble; <sup>3</sup> bzëëb zho len baa gon zho, niicle xcuerp me guiendle ga. <sup>4</sup> Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop men bgui zole lo zho ga, masaque riaazbel lad xab grop men co. <sup>5</sup> Horco per nli bdzieb zho, lo dzeb co mine been zho laa zho pquitsgzhìb haxta bdzin lo zho lo liu. Dzigo rëb grop men bgui co lo zho:

—¿Pe nacne ziaadguib to men mban zaatne rio mengut? <sup>6</sup> ¿Laa me brieëbanle! ¿Guiendle me nu! Golsoladz ganle zha në me lo to len dze ne no me nëz Galilé, <sup>7</sup> në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieëban.”

<sup>8</sup> Dzigoraa psoladz zho, nli-gaa sca bnee me, <sup>9</sup> hor co lëëlëd güeynie zho diidz lo gza tsiiptib zha ne nac xpëëdsuel me, ni lo grëraa zha ne nacgza zho ga. <sup>10</sup> Nzianlaa nac men wnaa co, lad co no Marí Magdal, no Zhuan, ni Marí ne nac xniaa Jacob.

<sup>11</sup> Niicle bzodiidz zhow lo xpëëdsuel me, per con rnee zho led ncuaan gacd ga, ni lalnu biladzd zhow. <sup>12</sup> Tibaque zeene brieë Pedr, rias Pedr laa Pedr zie nëz ro baa. Bdzin Pedr bdiixlo Pedr len baa co, gon Pedr nligaa, jloxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

*Gon zho Jesús nëz Maús*  
(Mr. 16:12-13)

<sup>13</sup> Dze co brieë chop xpëëdsuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdzin zho ga. <sup>14</sup> Nëz no zho nozodiidz zho grë mine pteed miech Jesús ga, <sup>15</sup> tibaque zeene bien zho laa zho bgaa tib lo men co, gocgza me zho laa zho no nëz, per, jib biend zho lëë Jesús ga! <sup>16</sup> Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaane ptse lo zho. <sup>17</sup> Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guielnë no to?

Dzigo bzodze zho. Mban rac zho, haxta lo zho rlu

nroob guielnë no zho.  
 18 Pquiab tib zha ne lë Cleof,  
 rëb zho:

—¿Niacxe bind luu ganle  
 zha nactaa ncuaane goc  
 Jerusalén len dze rii? Grëse  
 zha ne name güey Jerusalén,  
 gocnaa.

19 —Nligaa —rëb me—, ¿pe  
 dien goc ga?

Rëbchaa zho:

—Len dze rii psacsi zho  
 men Nazaret ne lë Jesús.  
 Tib men ne biadteed xtiidz  
 Dios lo miech nac me, nzian  
 grë milagr nroob ne been  
 me; miech guizhiu ne bley  
 pquiaadiag zhiwseed me.  
 Rlu tib men nziuu nac me lo  
 Dios. 20 Per lel briece grë pxoz  
 rnabey, grë zho zha ne nac  
 wxtis, bnaaz zho me, bnaab  
 zho gut me, pquiaa zho me lo  
 cruz. 21 Tibaque rdzieets no,  
 me niac tib men ne nsilaa zha  
 ladz ne ladznia zha Roma.  
 Pasëse min co niac, nadzele  
 rac tson ngbidz beet zho me.  
 22 Per riend no dien zha nac  
 cuent co, sac nasil güey bla  
 men wnaa ne nacgrë no ro  
 baan me, 23 zeene wbire zho  
 bzodiidz zho lo no në zho  
 guiendle xcuerp me len baa,  
 loxaque chop anjl briecequia  
 lo zho ga, rëb anjl co mban  
 me. 24 Blozh ga, güeyaque bla  
 zha bgui ne nacgrë no, gon  
 zho nligaa guiendle xcuerp  
 me ga.

25 Dzigo rëbchaa me lo zho:

—¿Nadzpaa ncow nac guic  
 to, nadzpaa ndip nac zdoo  
 to! ¿Riladzde to grë mine  
 dzigo lëe bzeet zho padzeela  
 ted Men ne nole diidz ga cx-  
 eel Dios? 26 Bzeetle zha co

name ible no csacsi miech  
 me, antes ne gbire me lo  
 guielndzon ne no me.

27 Dzigo psilo me bnee me  
 lo zho pa lo zho bnee grë mine  
 bded me ga, psilo me desde  
 grë mine pquiaa Moisés,  
 haxta grë mine pquiaa grëraa  
 zha ne biadteed xtiidz Dios.  
 28 Sca no zho nëz laa zho  
 bdzin Maús. Bdzin zho ga,  
 rac me zig nac zeene tib ted  
 me, 29 dzigo quia zho rnab  
 zho lo me cuëz me ga, sac laa  
 dze bdzele, zhile laa liu ycow.  
 Nacne blëz me.

30 Laa zho zob lo mezh  
 gowxtsee zho, bzhen me  
 quietxtil bdeed me xquizh  
 lo Dios, blozh beengrol  
 mew bdeed mew lo zho.  
 31 Dzigoraa zig nac zeene  
 bzhal lo zho, laa zho beenbey  
 me. Per par nianraa zho me,  
 znuse bnit me lo zho, gondraa  
 zho me. 32 Horco per nli rley  
 zho rnee zho:

—Con razon zeene sca zi-  
 aadgza ne me nëz nonee me  
 lo ne zha raquiet lo Xtiidz  
 Dios, masaque tib guielbley  
 nroob ne biaadnie xcodiidz  
 me zdoo ne.

Sca rnee zho, sac bien zho  
 bdzin tib guielbley nroob  
 zdoo zho, zeene sca nonee  
 me lo zho. 33 Lëëldaque briece  
 zho ga, bio zho nëz wbire zho  
 Jerusalén stib. Bdzin zho lo  
 gza tsiiptib zha ne bzëniepaa  
 me ga, ni grëraa zha ne nacgrë  
 zho, 34 rëbchaa zha co lo zho:

—¿Tebaa gan to ganle nli  
 brieceban xmaistr ne! ¿Laa  
 Pedr gonle me!

35 Psiloque zho grop zho  
 bzodiidz zho zha gon zho

me no zho n̄ez, per haxta horne no zho xtsee, zeene laa me beengrol̄ quietxtil̄ dzigo-raa been̄bey zho me.

*Brieequia Jesús lo gr̄e xp̄eēds̄cuēl̄ me*

(Mt. 28:16-20; Mr. 16:14-20; Jn. 20:19-23)

<sup>36</sup> Lēētaaque sca nozodiidz zho, tibaque zeen̄ gon̄ zho laa Jesús zole lo zho ga, p̄quiaabdiuzh me zho, rēb me lo zho, peet tsieniedraa guic zho. <sup>37</sup> Leḷ rdzieb zho, haxta rzhidz zho lo dzeb co, sac rēb zho bod ndziin ga ran̄ zho. <sup>38</sup> Dzigo bnee me lo zho rēb me:

—¿Pe nacne rdzieb to? ¿Pe nacne r̄liladzde to naa nu? <sup>39</sup> Golwi len̄ nia naa, golwi zhits ni naa gan̄le. Gol̄xeen̄ naa, zeena gliladz to gan̄le nli naaw; sac teḷ ndziina, mese naca, gacd xen̄ tow.

<sup>40</sup> Sca quianee me, blu me nia me, blu me ni me lo zho, zaatne biaaz me clav. <sup>41</sup> Per nli rley zho, rzee zdoo zho, per r̄liladzdaque zho dien pe n̄lipaa lēē me ga. Gon̄ me sca rac zho, nacne bnab me ncuaane gow me lo zho. <sup>42</sup> Dzigo bdeed zho tib lē mel̄ bguiee lo me, <sup>43</sup> bnaaz me mel̄ co, squi ndxie zho gon̄ zho dow me ma. <sup>44</sup> Dzigo rēb me lo zho:

—¿Pe ib r̄soladzde to nile naa laa gr̄e miñ̄ rii no gac? Led ni naa lo to, gr̄ese miñ̄e bzeet Moisés, gr̄ese miñ̄e bzeet gr̄e zha ne biadteed xtiidz Dios, miñ̄e raquietgaa lo Salm teed naa, ible laaw none gac.

<sup>45</sup> Psilo me clar nonee me lo zho, parne guien̄paa zho zha zhobnee lo gr̄e guits co, <sup>46</sup> rēb me:

—Ible lo co zhobnee sca teed naa ne nac naa Mgui ne p̄xeel̄ Dios, rneew ib no gut miech naa, per zeene gac tson̄ ngbidza, laa naa greeban. <sup>47</sup> Rneew, Jerusalén nu, nu csilo gacnan̄ miech ible none csaan zho x̄quieḷntseeb zho, gnalo zho naa, parne gun̄ Dios zho perdon. <sup>48</sup> Ni to gon̄ gan̄le gr̄ese miñ̄ co, goca. <sup>49</sup> Na len̄ dze ne ziaadaque nu, laa naa cxel̄ Esp̄ritu Sant gacniēn̄ to, sac ib scale nac xtiidz P̄xoz naa. Per guiabde to niinaga gree to tsienee to lo miech, Jerusalénse nu gol̄cuēz, haxta nieeda ygaa to poder ne gneedz Esp̄ritu Sant lo to.

<sup>50</sup> Zeene gol̄ dze ne laa me guey gbaa, dzigo güey me güeynie me zho n̄ez Betain. Bdziñ̄ zho ga, blis me nia me, psilo me noyun̄lay me zho. <sup>51</sup> Laa me quiayun̄lay zho, tibaque zeene laa me bias lo guidzliu, ijon̄lo zho laa me bzoquia gbaa!

<sup>52</sup> Horco p̄quitsgzhib zho liu, been̄non zho me, rnee zho gr̄e diidz ndzon lo me; blozh ga in̄e rley zho laa zho wbi ga, bdziñ̄ zho Jerusalén stib. <sup>53</sup> Psilo zho gzataa dze rie zho yadoo rool̄nie zho Dios, rdeed zho x̄quizh lo me.

# XTIIDZ NDZON DIOS MINE PQUIAĀ JUAN

1-2 Jesús, meñ ne nac Diidz Ndzon, nole me zeene biała grētaa ncuaañe no; lo Dios no me ni Diosaque nac me. Notaque me, tibaque nac me; me ni Dios. <sup>3</sup> Me bzaa grētaa ncuaañe no, tsod ncuaañe lega scase niaan; sac me bzaaw grēsew. <sup>4</sup> Ladznia me no guielmban ne gdzind dze lozh, nac guielmban co zig tib biini ne rziini lo miech. <sup>5</sup> Me nac biini ne quiaziini zaatne nac lo guielcow, ni rriee lod guielcow ctsew lo biini co.

<sup>6-7</sup> Bio tib mgui brieelē Juan, Dios pxeel Juan biadnee Juan lo miech cho nac Jesús, zeena grēse zho giladz Jesús. <sup>8</sup> Led Juand nac biini, sinque loxaque biaad Juan biaadlu Juan Jesús, meñ ne nac biini co. <sup>9</sup> Bdzin dzew laa Jesús biaad, ni niina me nac meñ ne noziini lo grēse miech, sac mepaa nac biini co.

<sup>10</sup> Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me. <sup>11</sup> Per ni menladz me, niicle ne lopaa zho bdzin me ib gondzed zho me; tib chop zha ne blēzlo me. <sup>12</sup> Ni grē zha ne sca bleynie me, grē zha ne dib zdoo giladz cho nac me, grēse zha co laa me

bzo zho gac zho xpēed Dios. <sup>13</sup> ¡Grēse zho, rrieequia gol zho stib! Per guiabd ne togo gol zho zigne ral grē miech guidzliu rii, sinque laa zho gol zigne racladz Dios; gane niina xpēed me nac zho.

<sup>14</sup> Zeene bdzin dze ne laa meñ ne nac Diidz Ndzon ga goc miech biaad me lo guidzliu, grop lo no bdzion no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mēed lo Dios, meñ ne nac Pxoze.

<sup>15</sup> Zeene bzeet Juan Bautist me lo miech, tib vuilt haxta blu Juan me lo zho, rēb Juan: “Lēē meñ rii ga gon rzet naa lo to zeene rne naa: Iraa zi-aad tib meñ ne mazdraa non lo naa, sac notaque me; nole me zeene blanso naa lo guidzliu.”

<sup>16</sup> Nquialadzdox Jesús ne, grēse ne gzataa dze laa ne nogaa grētaa guielnzaac ne rsiaab me. <sup>17</sup> Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

<sup>18</sup> Wlaltaa ib choot gard gan Dios; sangue niina ne laa Xpēed me Jesús biaad, meñ co biaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús*

(Mt. 3:11-12; Mr. 1:7-8; Lc. 3:15-17)

19 Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan. 20 Dzigo bneeli Juan lo zho, rëb Juan:

—Golgacnañ ganle, led naad nac Men ne quiambëz to ga cxeel Dios.

21 —¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lí naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

22 —¿Cho dzigo nac luu? —rëb zho—. Bnë dien cho nac luu; sac gon ib none gdziñnie no tib xtiidz luu lo zha ne pxeel no.

23 Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zëeb tsi tib mgui dan rnee me lo miech: ¡Golgun nguudz zdoo to, sac gon ile ziaad men ne rnabey ne!”

24 Horco laa zha ne pxeel zha farisé pquiab, rëb zho lo Juan:

25 —Telne led luud nac Men ne zëëble diidz ga cxeel Dios, niicle led luud nac Lí, niicle nacdga luu cho stib zha

ne pxeel Dios ziadteed xtiidz me, ¿zha nac dzigo ne nochoobnis luu miech?

26 Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to. 27 Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

28 Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiap zho me.

*¿Cho nac Jesús?*

29 Biet stib dzew, laa Jesús bdziñ zaatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëe men qui gon csilaa miech lo grëtaa xtol zho! ¡Me gac zig tib carner yeen ne guet tsoyon lo Dios par guiaanmbe miech lo dol!

30 Lëe men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.” 31 Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

32 Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

33 —Ne nligaa runbeyd naa me —rëb Juan—. Per zeene pxeel Dios naa zialchobnis

naa miech, hor co nē me lo naa: “Zeene gan luu guiet Espíritu Sant gbaa cuēz me guic tib mgui ne nochoobnis luu, dzigo gocnan lēē men co nac men ne rxeeļ Espíritu Sant zdoo miech.”<sup>34</sup> Gonlo naa blēz Espíritu Sant guic me; gane nanween naa ne nli Xpēēd Dios nac me.

*Zha ne gloopaa goc xpēēdscuel Jesús*

<sup>35</sup> Biini liu co, laa Juan zoque ga zonie me chop xpēēdscuel me. <sup>36</sup> Ga zo me, gon me laa Jesús zieded ga; dzigo rēbchaa me lo zho:

—¡Golwi ganle! ¡Lēē men qui gon nac Xcarner yeen Dios!

<sup>37</sup> Zigne bin zhow, laa zho zienal zhits Jesús. <sup>38</sup> Zeene ptsire lo me, gon me laa zho nalle zhits me; dzigo rēbchaa me lo zho:

—¿Pe nac ziaadnal to zhits naa?

—Maestro —rēb zho—, laa no racladz gacndion no dien pa rbēz luu.

<sup>39</sup> Dzigo rēbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blēz zho lo me ga. Ga blozh ptse zho dze, sac ziedzele dze zie zho.

<sup>40</sup> Ndrés lēē tib zha ne güeynal zhits me ga; lēē Ndrés co nac bets Simón Pedr. <sup>41</sup> Dzigo zigne brieē Ndrés ga güey Ndrés güeyguib Ndrés Simón. Bdziñ Ndrés rēb Ndrés lo Simón:

—¡Nasi gon laa no bdzion Men ne nacle diidz ga cxeel Dios!

<sup>42</sup> Dzigo güeynie Ndrés Simón zaatne no Jesús ga. Zeene gon Jesús Simón, rēbchaa me lo Simón:

—Bina ganle, nli Simón nac lēē luu ni xingan Jonás nac luu, sangue niina laa luu grieeļ Cef.

(Cef rnee zha Israel quie, laa xtiidz zha Gres rnee zhow Pedr.)

<sup>43</sup> Biet stib dze co, laa Jesús no nēz tsie me nēz Galilē. Laa me zieriee dze ga, zeene bdzieel me tib mgui lēē Lip; dzigo rēbchaa me lo Lip:

—Dēnal zhits naa.

<sup>44</sup> Zha Betsaid nac Lip, ni zha coque nac Ndrés grop Simón.

<sup>45</sup> Dzigo güey Lip güeyguib Lip Natanael; rēb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo librey ne psan me, men ne scataa bzeet grē zha ne biadteed xtiidz Dios padzeela. ¡Laa no bdzion me, tib men Nazareta, lēē me ga nac Jesús, xingan José!

<sup>46</sup> Pquiab Natanael, rēb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rēb Lip—, zeena ganzhal luu me.

Dzigo laa zho zie. <sup>47</sup> Squi ziaad Natanael, zeene gon Jesús Natanael rēbchaa me:

—¡Golwi ganle, lēē zha qui gon nac merpaa zha Israel, sac mesi ib rquidied me!

48 —¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigora a bredz Lip luu. Zeene zob luu tib zhan yag guigw, hor co gon naa luu.

49 Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

50 Dzigo rëbcha a Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaane mazdraa nroob!

51 Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhial, zlupaa grë xanj l Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

## 2

*Güey Jesús tib lo guieltsieel*

1 Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co, 2 ni bredz zho me; nacne bional no zhits me grëse no ne nac no xpëedscuel me.

3 Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvin men rii blozh. ¡Guiendraa pe quiiz zho!

4 Pquiab Jesús rëb me:

—¿Pe nacne rnee luuw lo naa? Gon ganle naraa gdzin dze ne gacnan miech cho nac naa.

5 Niicle sca rëb Jesús lo me, güey me lo zha ne quiaguiz vin ga rëb me lo zho:

—Mine gnabeytaa me to, golguna.

6 Lidz men co ga ndxie xoop guies ne niaa quie; za-atne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena. 7 Dzigo bnabey Jesús zha ne rguiz vin ga pcodzëe zho nis len gza guies co. 8 Blozhse guiel guiel pcodzëe zhow, rëbcha a me lo zho:

—Golcuae niip nis qui, golt sieniew lo men ne zo lo lni.

Zeene laa zho blee niip nis co tsienie zho, laaw nacle vin. 9 Ni lalnu ib güeynied guic men co pa brie e vin co (loxaque zha ne nace ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelnia ga, rëb me:

10 —¿Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon le l naraa bnabey luu brie e vin niazh.

11 Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedscuel me, zeene bdzion now, hor co bliladz



no nli me nac Men ne zëëble diidz ga cxeel Dios.

<sup>12</sup> Zeene blozh guieltsieel co, laa no wbiere guiedz Capernaum stib grë no me, xniaa me, ni zha bets me ne. Bdzin no Capernaum, ga bliaaz no blalaa ngbidz.

*Blee Jesús grë zha ne noyun lgui len yadoo*

(Mt. 21:12-13; Mr. 11:15-18; Lc. 19:45-46)

<sup>13</sup> Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co brieer Jesús zie me nëz Jerusalén.

<sup>14</sup> Bdzin me Jerusalén, güey me len yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiil, zha ne no wto palom ne, haxta zha ne rtsëë dimi ndxie ga. <sup>15</sup> Dzigo bzhixcuaa me tib lë doo zig rias dooguid ne rcaa ma, bzhen me doo co bençxoon me zho ga grë xma zho; blozh ga, ptiixche me xmez zha ne notsëë dimi ga, nëzrii nëzrec blaal me xtimi zho.

<sup>16</sup> —iNiinagazh golcuae grë ncuuan qui nu! —rëb me lo zha ne rto palom—. iGolguien ganle lidz Pxoz naa nu! iNacda yu lgui parne tso to wto nu!

<sup>17</sup> Dzigo psoladz no zha ziaad lo Xtiidz Dios, zaatne rnee: “Rbinladz guic naa, sac ne nligaa racladz naa yquiaanap naa lidz luu.”

<sup>18</sup> Blalaa zha non lo mençguiedz Israel, zeene gon

zho sca bençxoon me grë miech co, wbig zho lo me rëb zho:

—iCho nac luu ne squitaa noyun luu grë ncuuan qui? iBen tib milagr, dzigo ziladz no men rnabey nac luu!

<sup>19</sup> —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

<sup>20</sup> Pquiab zho rëb zho:

—iNcuane gliladzdraa no rnee luu! iLen choopxoopraa iz name biao yadoo rii! iZhazhe gon luu, tsonaque ngbidz zгаа luuw stib?

<sup>21</sup> Per zeene sca bnee Jesús lo zho, xcuerp me ga nac yadoo ne bzeet me. <sup>22</sup> Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

<sup>23</sup> Len dze lni Pascw co, nzian miech zeene gon zho grëta milagr ne run me, bliladz zho ne nli me nac Men ne zëëble diidz ga cxeel Dios.

<sup>24</sup> Per ib pxend me lo zho, sacne nanwen me zha nac zho tib tib zho. <sup>25</sup> Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdo zho.

### 3

#### *Jesús ni Nicodem*

<sup>1</sup> Ziecowle liuw, bdzin tib zha farisé lë Nicodem zaatne rbëz Jesús; tib zha non nac me lo mençguiedz Israel. Bdzin me rëb me lo Jesús:

2 —Maestro, ndion no ible Dios pxeel luu ziadseed luu no. Grë milagr nroob ne run luu, ga rlu ne Dios nacie luu.

3 —Gneli naa lo luu ganle Nicodem —rëb Jesús—, grëse miech, telne gald zho stib grieelod gdziñ zho zaatne rnabey Dios.

4 Pquiab Nicodem, rëb Nicodem:

—¿Gal zho stib ye? ¿Zha grieeo gal miech stib? Tib zha ne nacle mençol, çniacxe zrieelo sëëb zho zdoo xniaa zho gbiire gal zho?

5 Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grieelod sëëb zho zaatne rnabey Dios. 6 Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho. 7 Gacxe waa, gzeed zdoo luu znu rne naa: “Grëse miech, ib none gal zho stib.” 8 Nac cuent rii zig nac me ne rtop xcow, zeene rree me, nëzrii nëz rec zie me, ron luu razh zhoob me; per rand luu dien pa nëz zie me dien pa nëz ziaadgaa me. Scaque nagon nac zha ne ral stib, grieelod guien miech zha rnabey Espíritu Sant lo xquielmban zho.

9 —Riend naa zha rnee luu —rëb Nicodem—. ¿Riend naa dien zha grieeo gac grë miñe rnee luu i!

10 Rëbchaa Jesús:

—¿Riend luu ye zha rne naa? ¿Men rseed miech name nac luu lo mençuedz Israel!

11 Mine rne naa nu ncuaane rien naaw, ncuaane gon naaw, ni riende to zha naca. 12 Telne riend luu zha nac grë miñe rne naa nu zeene rzet naa ncuaane rac lo guidzliu, çzha dzigo guien luu miñe gne naa telne gzet naa grë ncuaane rac gbaa?

13 Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa. 14 Ni zigne pquiangaa Moisés tib meel brons tib guic yag zeene nonie me zha Israel dan zit co; scaque none yquiangaa naa tib lo yag. 15 zeena grëse miech, zha ne gbig dib zdoo zho gnalo zho naa, zgaa zho tib guielmban ne gdziñd dze lozh. 16 Sac gon rleyniedox Dios grëse miech ne ndxie lo guidzliu; gane niicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdziñd dze lozh; led yed zho nitlo. 17 Laa Dios pxeel naa lo guidzliu par csilaa naa miech lo dol, ziald naa par gdziibdol naa miech. 18 Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod naa, laa zho bnitole ga, sac gon Xpëed Dios nac naa ni bliladzd zho naa. 19 Laa zho bnitole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac miñe ziana zho. 20 Grëse

zha ne run guielntseeb, rlëe zho ran zho biini. Ib rbigd zho lo biini, sac racladzd zho xoobnen grë guielntseeb ne quiayun zho. <sup>21</sup> Sañgue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

*Rzeet Juan Bautist Jesús stib*

<sup>22</sup> Ga brieë Jesús güeynie me no nëz xtan zha Judé. Xtse-laa bliaaz no ga grë no me, rchoobnis me grë miech co.

<sup>23-24</sup> Len dze co gard guiab Juan Bautist ladzguiib; dzigo ye me nochoobnis miech za-atne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

<sup>25</sup> Tib dzew, wbig tib zha Israel lo zla xpëëdsuel Juan, psilo zho nodildiidz zho dien cho zhiwrobnis nonraa; pe zhiwrobnis Jesúsá, te zhiwrobnis Juana ye. <sup>26</sup> Blozhse bdildiidz zho, wbig xpëëdsuel Juan lo Juan, rëb zho:

—Maestro, meñ ne gon bzodiidznie luu ro guiubee Jordán ga, meñ ne scataa bzeet luu lo miech, iye me laa me quiachooobnis miech niina, ni ndal miech niapse lo me zie zho, ziaatraade zho nëz ri!

<sup>27</sup> Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos. <sup>28</sup> Mine pso Dios naa, laaw ben naa: laa naa biallu ganle cho nac Meñ ne zëëble diidz ga cxeel Dios. Ni bneeli

naa lo to ganle led naad nac men co; laa naa zial loxaque par gzet naa me lo miech zeena gunbey zho me. <sup>29</sup> Ible lo me none gdziñ miech. Nac me niina zig tib mgui ne not-sieelnia: Mgui ne notsieelnia, jled zha lëe rzobnie ndzooop ne notsieelnia zho! Ni grë zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaane run me. <sup>30</sup> Zigse zie dze, laa me gacnonraa; scagaa naa, zigse zie dze laa naa guiaanwinraa.

<sup>31</sup> 'Nëz gbaa ziaad me, miñ co ne mazdraa non me lo grë miech. Tel naa tib miech guidzliuse nac naa, ni ncuaane riense tib miech lo guidzliu miñ co rne naa; <sup>32</sup> sañgue me, niapse grë mine bin me, grë mine gon me miñ co rnee me lo miech; jni choot riladzda! <sup>33</sup> Zha ne riladzse xtiidz me, rien zho ganle niapse diidzli rnee Dios. <sup>34</sup> Xtiidz Dios rnee me lo miech; sac Espíritu Sant rdeed guielbiini lo me, ni Dios nac meñ ne pxeel me. <sup>35</sup> Rleyniedox Dios me, nac me Xpëëd Dios; gane grëtaa ncuaane no gbaa, no lo guidzliu, ladznia me psan Diosa. <sup>36</sup> Grëse zha ne gnalo me, laa zho bgaale tib guielmban ne ib gdziñd dze lozh; sañgue zha ne gond xtiidz me, gdziñd zho gbaa, zaatne ygaa zho guielmban co. jGrëse zha co, ible zгаа zho guielnedox ne csiab

Dios!

## 4

### *Tib wnaa Samar*

<sup>1</sup> Zeene bien Jesús laa zha farisé gocnañle ndalraa miech zienal zhiwseed me, ni ndalraa miech ne quiachoobnis me lo Juan <sup>2</sup> (niicle ne led medpaa rchoobnis, sinque zha ne nac xpëëdscuel me zha co rchoobnis), <sup>3</sup> nacne briece me xtan zha Judé ga, wbire me nêz xtan men Galilé stib.

<sup>4</sup> Par gdziñ me Galilé, none ted me xtan men Samar. <sup>5</sup> Xtan men Samar zieded me, zig groļ dzew, laa me zie gax guiedz ne lë Sicar, <sup>6</sup> dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëëd me José padzeela. Rdzag me ziaad-zë me lo nëëg co, bdziñ me bzob me ro guiuu co; <sup>7-8</sup> ga blëz me, laa no zio lad guiedz Sicar zioxi no ncuaane dioownie no me.

Ro guiuu co zob me bdziñ tib wnaa Samar ziexi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

<sup>9</sup> Bzee zdoo wnaa co gon me bñab Jesús nis lo me, sac rlëëdox zha Judé ran zho zha Samar, per ni rneed zho lo zho.

—jNcuaane gliladzd naa! —rëb me—. jTi zha Judé gnab nis lo ti zha Samar!

Dzigo rëbchaa Jesús:

<sup>10</sup> —Tel niaca mine guien luu ganle cho rñab nis lo luu, ni guien luu zha nactaa ncuaane rzoladz Dios lo miech, haxta znab luu nis lo

naa. Ni naasi gon, znedz naa nis ne rdeed guielmban.

<sup>11</sup> Pquiab wnaa co, rëb me:

—Per ni nzhend luu name pe cuee luu nis, ĵpa dzigo tsiebee luu nis ne rdeed guielmban ga? jGon ganle, guietdox bzie rii! <sup>12</sup> Stiba, ĵniacxe mazdraa dzigo nac luu que pxozgol ne Jacob, men ne psan bzie rii? Nu name go me nis grë xma me; niicle grë xpëëd mew, nuque go zho nis.

<sup>13</sup> —Grëse zha ne rie nis rii —rëb Jesús—, rbiire rñab zhis zho; <sup>14</sup> sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

<sup>15</sup> Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

<sup>16</sup> —Güeygazh —rëb Jesús—, güeyxi tsieel luu, dzigo goļtë grop to.

<sup>17</sup> —Guiend tsieel naa —rëb wnaa co—. Gard ctsieelnia naa.

—Nli rnee luu —rëb Jesús—; <sup>18</sup> sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. jNli mine rnee luu i!

<sup>19</sup> Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu. <sup>20</sup> Tel scaw, bzhiguiel

bnë dien, ¿zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmengol no ga güeygan zho Dios.

21-24 Pquiab Jesús rëb me:

—Bina ganle, zdzin dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoze ne. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espíritu Sant guielbiini lo zho.

’Choot grielod gan Dios; gacxe waa zha ne gleynie me, none gleynie zho me zigne rdeed Espíritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziuunbey no men ne riogan no, sac gon lo xtii men Israel ziaad men ne guiaadsilaa miech lo dol.

25 —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

26 Pquiab Jesús, rëb me:

—¡Naa gon nac men co! Lëë me nu nonee lo luu.

27 Lëëtaaque hor co grëse no ne nac no xpëëdsuel me

laa no bdzin. Bzee zdoo no bdzion no laa me nozodidznie wnaa co, per ni tib no bnabdiidz lo me dien pe quianabdiidz me, dien pegaa quiazodidznie me wnaa co.

28 Laa wnaa co, zoque xche me ga, rias me laa me zie nëz lad guiedz. Bdzin me, rëb me lo grë miech co:

29 —¡Goltë ganle gunbey to ti men co! ¡Bzeet me grëse zha nac lo xquielmban naa! ¿Bay pe lëdle Men ne nole diidz cxeel Dios ga?

30 Horco brie grë miech co lad guiedz, ziaad zho zaatne gon wnaa co Jesús.

31 Laa no, quia no rdeed no ncuaane gow me, per nëd me.

32 —Gowd naa —rnee me—. No stib xquielwagw naa mine runbeyde to.

33 Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

34 Nëchaa me lo no:

—Lëë xquielwagw naa nac ne gun naa mine rnabey Dios naa, ni csiaal naa dziin ne pxeeel me naa zialgun naa. 35 To lëë rnee to: “Len stapraa mëë csilo gac wlaap.” ¡Per golwi lo grëtaa miech qui ganle, nac zho niina zig grë guielgon ne golle gliiap! 36 Gacxe waa, ib none tsie to tsielaap to, tsietop to zho, zeena ygaa zho tib guielmban ne gdzind dze lozh. Ni zigne razh zha ne rie wlaap, scaque zguzh Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne

rlaapa! <sup>37</sup>Ible nli diidz ne znu rnee: “Zhaa zha ne rie gon, stible zha ne rie wlaap.” <sup>38</sup>Zig nac niina, laa naa rxel to tsielaap to zaatne ni tib xtsiin to psëebde to; zhaa zha ne güey gon, na tole tsie wlaap.

<sup>39</sup>Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús. <sup>40</sup>Laa zeene blanso zho ga, bnaab zho lo me cuëz me ladz zho zhis. Dzigo nacne blëz me lo zho chop ngbidz. <sup>41</sup>Nzianraa grë miech co bliladz me, zeene bin zho grë zhiwseed me.

<sup>42</sup>—Nasi nagon laa no rililadz me —rnee zho lo wnaa co—, sac nozhal bdzion me, ni bdzion no grë mine rnee me. Nliw, ible me nac men ne ziaadsilaa grëse miech lo xtol zho.

*Biac xpëed tib zha ne quia dziin lo rey*

<sup>43</sup>Zeene goc chop ngbidz co, laa no brie ga gza no me, laa no bdzio nëz stib zio no nëz Galilé. <sup>44</sup>Niicle ne bzeetle me: grëse zha ne ziadteed xtiidz Dios, ib randzed miech zho zaatne nac ladz zho; per <sup>45</sup>zeene bzëeb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

<sup>46</sup>Nëz no no bdzin no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin

lo rey; lëëtaque len dze co rza-cnë xpëed me.

<sup>47</sup>Bin me laa Jesús brie xtan men Judé, laa me no gdzin Galilé. Dzigo biaad me biaddzieelo me Jesús ga, bnaab me lo Jesús tsienal Jesús zhits me Capernaum, tsiegunuiac Jesús xpëed me; sac nzhoo rac win. <sup>48</sup>Dzigo rëbchaa Jesús lo me:

—¿Pe haxta gan to dzigo gun naa milagr, dzigoraa gliladz to naa?

<sup>49</sup>—Been tib guielnzaac got-saa guionioab ne —rëb men co—, nend znuse lozh xpëed naa.

<sup>50</sup>Rëbchaa Jesús:

—Bzë, tsod luu guielnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nëz laa me zey. <sup>51</sup>Zhilew gdzin me lidz me, zeene bdzieelo me bla zha ne quia xtsiin me, rëb zho laa xpëed me biacle. <sup>52</sup>Dzigo bnaabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brie zhixlëe win.

<sup>53</sup>Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

<sup>54</sup>Ga goc brob milagr ne been Jesús lo zha Galilé. Min co been me zeene w bire me nëz Judé.

## 5

*Biac tib men ne gacd grial*

<sup>1</sup> Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

<sup>2</sup> Ro guiedz Jerusalén, gax zaatne quia puert ne rded mëcwxiiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

<sup>3</sup> Lo nsaap co, ga ndxie nzian men rzacnë, no zho rold lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len pil co, <sup>4</sup> sac nac diidz poc poc riet tib xanj] Dios riesini lo nis co, dzigo zha ne znuse sëeb lo nis co, tel pe guielguidztaa rzac zho, riac zho].

<sup>5</sup> Ga nix tib mgui, gocle galptsiipton iz rzacnë me.

<sup>6</sup> Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

<sup>7</sup> —Racladz naa —rëb me—, per guiend cho csëeb naa len pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

<sup>8</sup> Dzigo rëbchaa Jesús lo me:

—¿Nasca zeena guche i! ¿Bzoli, bi yag ne bzhoob luu i, zeena bzë!

<sup>9</sup> Zigne sca rëb Jesús, laa men co biac. Horcogazh blis me yag co, nzëni me laa me brie ga.

Ni ne dze co nac tib dze nda lo zha Israel, <sup>10</sup> zeene gon zho

ney me yag ne bzhoob me, rëbchaa zho lo me:

—¿Pe riend luu nda nadze! ¿Lëda i gon squi yquianlan luu ncuuan qui dze rii!

<sup>11</sup> Pquiab me rëb me:

—Men ne beenguiac naa, mezhal në lo naa, güey naaw.

<sup>12</sup> —¿Cho men sca në lo luu? —rëb zho.

<sup>13</sup> Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co. <sup>14</sup> Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz, nend dzigole glaan luu tib guielguidz ne mazdraa ntseeb.

<sup>15</sup> Zeene laa me brie ga, güey me lo zha ne rnabey lo zha Israel ga, rëb me lo zho Jesús nac men ne beenguiac me. <sup>16</sup> Nacne psilo zho quiana] zho dien zha gnaaz zho Jesús pe nacne runguiac me miech dze nda. <sup>17</sup> Blisqui zhow lo me, dzigo rëbchaa me:

—Tel Pxoz naa gzataa dze quiayun me dziin; ni mincoque nac mine quiayun naa.

<sup>18</sup> Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zienald me dien pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

*Men nroob nac Xpëd Dios*

<sup>19</sup> Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuaane ran me run Pxo<sub>z</sub> me, min co run me. <sup>20</sup> Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoo to; ncuaane palalse i gon to niina ne biac men qui. <sup>21</sup> Sac telne gacladz me cueeban me tib mengut, zbeeban me zho, zigne rbeebanaque Pxo<sub>z</sub> me mengut. <sup>22</sup> Ni bzo Dios me, me gun guielwxtis, <sup>23</sup> zeena grëse miech guien ganle zigne nonaque Pxo<sub>z</sub> me, scaque men non nac me, ni sca none gunnon zho me. Sac tel zha ne gunnond me, yele Pxo<sub>z</sub> me ga (men ne pxeel me) runnond zho.

Ni rëb me:

<sup>24</sup> —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdzi<sub>nd</sub> dze lozh. Led yedraa zho ygaa guielnëdox ne ygaa grëraa miech ntseeb; sac laa zho brieete ladznia guielgut ga, bdzi<sub>n</sub> zho lo guielmban co. <sup>25</sup> Zdzi<sub>n</sub> dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëe dze co bdzi<sub>n</sub> niina! <sup>26</sup> Sac gon, zigne rdeed Dios guielmban lo miech, scaque zrieelo gded naa guielmban lo miech. <sup>27</sup> Ni bzo me naa, naa gun guielwxtis, gded naa mine tsieguial tib tib miech.

<sup>28</sup> ¡Gzeed zdoo to! Sac ne nligaa, zdzi<sub>n</sub> dze, grëse

mengut ne no len baa, laa zho grieeban <sup>29</sup> zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielnëdox ne rieguial zho.

<sup>30</sup> 'Per grieelod gun naa guielwxtis naase, ib none gacnan Pxo<sub>z</sub> naaw. Grëse guielwxtis ne gun naa, laaw gun naa zigne gnabey Pxo<sub>z</sub> naa, laaw gun naa zigne nonguie<sub>la</sub>, sac gon gund naa mine guiaabtaa guic naa, sinque laa naa gun mine racladz Pxo<sub>z</sub> naa.

<sup>31</sup> 'Telne niaca mine naase rne chō nac naa, zrieequia zha ne guiab nlida. <sup>32</sup> Per na, no stib men ne rzeet naa lo miech; ni nan naa diidzli rnee me. <sup>33</sup> Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw. <sup>34</sup> Laa naa rzet min rii lo to, zeena gliladz to chō nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa. <sup>35</sup> Zeene bi-aad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me. <sup>36</sup> Nli bnee me cho nac naa; per grë milagr ne run naa min co quiaxobnenraa ganle cho nac naa. Pxo<sub>z</sub> naa rneedz diidz run naaw; ni ga rlu ganle ne me pxeel naa. <sup>37</sup> Haxta ye me mezhah quialu ganle cho nac naa, parga nli gard gan to me, niicle gard gon to tsi me. <sup>38</sup> Ronde to pe



rnee me, sac rliiladzde to naa; sac gon me pxeel naa zialne naa xtiidz me.

<sup>39</sup> Nli rioxco to rseed to grē guits ne ziaad Xtiidz me, sac rien to ga ziaad dien zha ygaa to guielmban ne gdzind dze lozh. Ni niicle ne lo co zhubnee ganle cho nac naa, <sup>40</sup> per nēde to gbig to lo naa, zeena ygaa to guielmban co. <sup>41</sup> Nēde to gunbey to naa, nēde to guien to cho nac naa, per peet nacd min co; <sup>42</sup> runbey naa to, ni lalnu rleyniede to Dios. <sup>43</sup> Sac gon, me pxeel naa zial naa lo to, ni rlēē to ran to naa; mazd zha ne lega ziaadse, zha cosi lēēlēd rcaania to zho. <sup>44</sup> iMin co gon, ib rliiladzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios. <sup>45</sup> Ni guiabde to togo naapaa gazo to lo Pxoza naa, glisqui naa grē ncuaaṅe run to. Moisés gon nac men ne glisquiw; sac ley ne psan me, mine rnalō to csilaa to lo xtol to, lēēw glu ganle pe nac grētaa ncuaaṅe quiayun to. <sup>46</sup> Sac gon, telne niaca mine nlipaa rliiladz to grē mine pquiaa Moisés, zliiladz to dzigo cho nac naa; golgan ganle, lo grē guits ne pquiaa me, ga rzeet me naa. <sup>47</sup> Rlu rliiladzde to grē mine pquiaa Moisés ga, gane rliiladzde to mine rne naa lo to.

## 6

*Row gaay mil miech*

(Mt. 14:13-21; Mr. 6:30-44; Lc. 9:10-17)

<sup>1</sup> Bded ga, tib dzew briece Jesús bdedquia me nēz dan ro Nisdoo Galilé (lēēque nisdoo co ga rnee zho Nisdoo Tiberias).

<sup>2</sup> Miech guizhiu ne brieenal zhits me, sac ziyaṅ zho grētaa milagr ne run me, runguiac me grē men rzacnē. <sup>3-4</sup> Nzian zho nac zha ne zie lni Pascw, lni nroob ne rac Jerusalén gzobse iz.

Grēse no ne nac no xpēēdscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grē no me, <sup>5</sup> zeene bdzion no miech guizhiu ne ziaadquia cho gui co, laa zho glansole lo no ga. Dzigo rēbchaa me lo Lip:

—Lip, ¿pa guioziu ne ncuaaṅe gow grētaa miech qui?

<sup>6</sup> Per lega scase rēb me lo Lip, par dien pe guiab Lip; sac nanle me pe nac ncuaaṅe gun me.

<sup>7</sup> —iNe nligaa pe zhidaa zho! —rēb Lip—. Niicle telne niaca mine gziuu nzian gayoo quietxtil, ni ygaad ncuaaṅ co ygaa zho tiblē wingaw tib tib zho.

<sup>8</sup> Dzigo pquiab Ndrés, bets Pedr, stib zha ne nacgza no; rēb Ndrés:

<sup>9</sup> —Nu zo tib mēēdbgwi win ney gaay quietxtil cebad ni schop mel win. ¿Per pa ygaa ncuaaṅ co lo grētaa miech qui?

<sup>10</sup> —Golnee lo zho dien —nē me lo no—. Golguiab lo zho sob zho.

Ndzon zëeb guizh nguia ga, dzigo laa grë miech guizhiu co bzob lo guizh nguia co (zig gaay mil rgaax loxaque zha bguise). <sup>11</sup> Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grë miech co; scaque been me grop mel co. ¡Grëse miech co, dow zho zaatne bieltaa zho! <sup>12</sup> Blozhse dow zho, nëchaa me lo no:

—¡Goltsietop grëse miñe biaan i, zeena nitloda!

<sup>13</sup> Psilo no ptop no grë quietxtil ne biaan ga, zeene blozh bdopa, ¡lo gaay quietxtil cebad co, biodzë tsiipchop chicuid biow!

<sup>14</sup> Zeene gon grë miech co milagr ro ne been Jesús ga, rneechaa zho:

—¡Ne nlipagaa, lëe men qui ga quiambiaaz ne! ¡Me nac Men ne zëëble diidz ga cxeel Dios lo guidzliu guiadteed xtiidz me!

<sup>15</sup> Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

### *Rzë Jesús lo nis*

(Mt. 14:22-27; Mr. 6:45-52)

<sup>16</sup> Rguetsle liuw, bzhiuxto no dan bdziñ no ro nisdoo co; ga bliiaz no me. <sup>17</sup> Bdzionse no choot rlansod ni laa liu rcowraa, dzigo mazd laa no bziaab len canó, laa no zio nëz Capernaum.

<sup>18</sup> Laa no zionie canó co lo nis, tibaque zeene psilo rrie me, ntseeb riasoli lo nis co. <sup>19</sup> Maase gaay kilómetro o xoopgaaw goc zio no, tibaque zeene bdziñ no laa me

ziaad-zë lo nis co, gaxle lo no ga. Zeene bdziñ no sca ziaad-zë me lo nis, bdzieeb no. <sup>20</sup> Dzigo bnee me, në me lo no:

—¡Gdziebde to! ¡Naa ziañ nu!

<sup>21</sup> Dzigoraa rley no bdziñ no laa me bzëeb len barcw; tibaque zeene bien no laa no brieequiale zaatne no gdziñ no ga.

<sup>22</sup> Biini liu co, grë miech ne biaan stib nëz ro nis co, laa zho bdziñ zaatne nac ro nis ga, quiambëz zho gan zho me. Sac gon zho tibaque barcw zo ga, ni zeene wbii no ga, loxaque nose wbii. <sup>23</sup> Gax zaatne bguiaan me zho ga, ga bdziñ bla barcw ne ziaad nëz Tiberias; <sup>24</sup> dzigo gonse zho niicle me niicle no ne nac no xpëëdscuel me, choot guiend ga, nacne bzëëbaque zho len barcw ne bdziñ ga ziaad zho nëz Capernaum.

### *Jesús nac men ne rdeed guielmban*

<sup>25</sup> Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, ¿pa horzhe waa blanso luu nu?

<sup>26</sup> Dzigo rëbchaa me:

—¿Naa lëe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to. <sup>27</sup> ¡Golguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun miñe racladz Dios, zeena ygaa to tib guielmban ne ib gdziñd dze lozh. Ni naa ne

nac naa Mgui ne pxeel me, naa gneedz guielmban co lo to; sac ible min co pxeel me naa.

<sup>28</sup> Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaane dziuun no?

<sup>29</sup> Pquiab me rëb me:

—Mine racladz Dios gun to: gliladz to cho nac men ne pxeel me.

<sup>30</sup> —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu!

<sup>31</sup> Tel gre pxozgol ne, zeene wban zho gre dan bidz co padzeela, gzobse dze biet tiblo guietxtil zhan gbaa, dow zho; rnee lo Xtiidz Dios: “Moisés rdeed guietxtil co lo zho.”

<sup>32</sup> Pquiab me rëb me:

—Golganan ganle led Moisésd bdeed guietxtil co, sinque Pxoz naaw. Ni niina gon laa me quianeedz merpaa guietxtil gbaa lo to.

<sup>33</sup> Sac gon, me pxeel men ne biet gbaa ziaddeed guielmban lo gre miech rii; men co nac guietxtil gbaa co.

<sup>34</sup> —Been tib guielnzaac sca —rëb zho—, igzataa dze bneedz guietxtil co dioow no!

<sup>35</sup> Pquiab me rëb me:

—Naa gon nac guietxtil ne rdeed guielmban ga. Grëse zha ne gbig lo naa sëeb zho xnëz naa, gdziindraa dze ne ycaabedz zho; grëse zha ne gliladz cho nac naa, gdziindraa dze ne gnab zhis zho. <sup>36</sup> Laa

to gon, zigne bnelegaa naa lo to ga, jniicle ran to naa, per rliladzde to cho nac naa!

<sup>37</sup> Grëse zha ne rxeel Pxoz naa, rlanso lo naa; ni tib zho ctsireed naa. <sup>38</sup> Sac gon, laa naa bieet gbaa zialgun naa mine racladz Pxoz naa (men ne pxeel naa); bieete naa par gun naa mine gacladztaa naa.

<sup>39</sup> Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo. <sup>40</sup> Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdziind dze lozh, ni cueeban naa zho gal dze ne nitlo guidzliu.

<sup>41</sup> Dzigo psilo gre zha Israel rneenë zho me, loxaque ne rëb me, me nac guietxtil ne biet gbaa; <sup>42</sup> rnee zho:

—Men rii ga name rnee zho Jesús, me nac xingan José. Rdziuunbey ne xniaa me, rdziuunbey ne pxoz me. ¿Zha nac dzigo ne rnee me gbaa biet me?

<sup>43</sup> Dzigo rëbchaa me lo zho:

—Lëewga na, golsioog ro to. Nodne squitaa gzee zdoo to min co. <sup>44</sup> Laa Pxoz naa pxeel naa zial naa lo guidzliu, per ni tib miech gon grieelod gbig lo naa telne niaca mine cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo. <sup>45</sup> Znu rnee lo Xtiidz Dios, zaatne pquiaa gre zha ne biadteed xtiidz me padzeela, rneew: “Laa Dios cseed grëse miech.” Ni

lëe min co rac niina; gacxe nagon waa, grëse zha ne rquiaadiag mine rnee PxoZ naa ni rseed zhow, grëse zha co lo naa rlanso zho. <sup>46</sup> Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to. <sup>47</sup> Golliladz mine gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdzindraa dze lozh! <sup>48</sup> Ne nligaa naa nac quietxtil ne rdeed guielmban ga. <sup>49</sup> Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut. <sup>50</sup> Sangue quietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdzind dze lozh. <sup>51</sup> Xcuerp naa nac quietxtil ne biet gbaa, mine rdeed guielmban ga; grëse zha ne gow quietxtil co, zgaa zho tib guielmban ne gdzind dze lozh. Lëew gded naa zeena grieelo yгаа grëse miech lo guidzliu rii stib guielmban.

<sup>52</sup> Psilo grë zha Israel co stib, quianeelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

<sup>53</sup> —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co. <sup>54</sup> Sangue zha ne gow xcuerp naa,

ni guie zho xchen naa, ib zgaa zho guielmban ndzon ne gdzind dze lozh ga, ni naa cueeban zho gal dze ne laa guidzliu nitlo; <sup>55</sup> sac xcuerp naa nac mine mazdraa rquiin gow miech, ni xchen naa nac mine mazdraa rquiin guie zho. <sup>56</sup> Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho. <sup>57</sup> Men mban nac PxoZ naa, men ne pxeel naa, me nac men rneedz guielmban lo naa; ni scaquegaa zha ne gow xcuerp naa, naa gded guielmban lo zho. <sup>58</sup> Naa nac quietxtil ne nlipaa biet gbaa. Grëse zha ne gow quietxtil rii, zgaa zho guielmban; led yed zho guet zig gut grë pxozgol to, zha ne sca dow quietxtil co.

<sup>59</sup> Lëe grë min rii bnee Jesús zeene pseed me miech len yadoo win ne zob Capernaum.

### *Diidz ne rdeed guielmban*

<sup>60</sup> Nzian grë zha ne rzënie Jesús, zeene bin zho grë mine bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

<sup>61</sup> Bien Jesús sca nonee zho, dzigo rëbchaa me lo zho:

—¿Pe rlëe guic to bin to mine rne naa ga? <sup>62</sup> ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo? <sup>63</sup> Espiritu Sant rneedz guielmban lo to, telne guiend espiritu peet nond xcuerp to, sac bëelse

naca. Ni grë diidz ne bne naa lo to, lëew nac Espíritu, ni lëew gneedz tib guielmban ne gdzind dze lozh lo to; <sup>64</sup> sinque to, bii no zla to rliladzd cho nac naa.

Sca rëb me sac desde psilo bzënie zho me, rienle me cho nac zha ne ib rliladzd me, ni cho nac zha ne tsieto me.

<sup>65</sup> —Runbey naa to —rëb me—, gane ni naa lo to ni tib miech grielod gbig lo naa sëeb zho xnëz naa, telne niaca mine cuedzd PxoZ naa zho.

<sup>66</sup> Nzian zha ne rzënie me, hor co laa zho bzoZit lo me, bzënedraa zho me. <sup>67</sup> Dzigo bnee me lo no gza tsiipchop no ne nac no xpëëdsuel me, në me:

—To waa, ¿pe led yede to racladz gbiche lo naa?

<sup>68</sup> Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdzind dze lozh. <sup>69</sup> Laa no bliladzle cho nac luu, laa no gocndionle ne luu nac Men Ndzon ne pxeel Dios.

<sup>70</sup> —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

<sup>71</sup> Zeene sca rëb me, lëele Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

## 7

*Rliladzd menlidz Jesús cho nac me*

<sup>1</sup> Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëe lo me, racladz zho gut zho me. <sup>2</sup> Laa zeene bdziñ dze ne run zha Israel lni ne rzhixcuaa zho grë yu guizh, ni rbëz zho lena; <sup>3</sup> rëbchaa zha bets me lo me:

—¿Pe nacne ib rrieded luu nu? Brieë zho, güey dib xtan zha Judé, zeena ye grë zha ne racnie luu ga gan grëtaa ncuaane run luu. <sup>4</sup> Sac gon, zha ne racladz gunbeyraa miech zho, grë ncuaane rac zho, rund zhow ngeuets zhlian zigne run luu. Rac luu name run luu grë milagr nroob, beena zaatne gan nzian miecha.

<sup>5-6</sup> Sca rnee zho lo me, sac niicle zha rliladzd cho nac me; dzigo rëbchaa me:

—Griee lod ga naa niina, sac gard gdziñ dze co; zhaa nac to, zac tsie to zeene gacladztaa to. <sup>7</sup> Tel to, rlëenied miech to; sangue naa rlëenie zho naa, sac rne naa lo zho pe nac grë guielntseeb ne run zho. <sup>8</sup> Goltzie, tedse lni rii dzigo ga naa; sac gard gdziñ dze ne glu cho nac naa.

<sup>9</sup> Dzigo laa me biaan ga. <sup>10</sup> Per loxaque brieë zho zie zho, yeque me brieë zie me; lëeraasi ngeuetsse bdziñ me.

<sup>11</sup> Grë zha Israel ne rlëe lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

<sup>12</sup> Grë zha ne ndxie lo lni, loxaque me rzeet zho. No zho rnee: “Tib miech wen

nac me”; nogaa zho rnee: “Pe miech wen na zho gac me, loxaque noquidie me miech.”  
 13 Per zhlianse rzodiidz zho rzeet zho me, sac rdzieb zho grë zha Israel ne rlëe lo me.

14 Goc chop tson ngbidz ne noyac lni, tibaque zeene laa me bzëeb len yadoo nroob ne zob lad guiedz ga, psilo me pseed me grë zha Israel ne no len yadoo ga. 15 Zeene gon zho zha rseed me, rzee zdo zho rnee zho:

—¿Zha nac squitaa rac men qui, ni laa me pseeete me grë zhiwseed yadoo?

16 Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa. 17 Telne yquiabladz to gun to mine rnabey me, ga guien to dien pe nli xtiidz Dios rseed naa miech, te mine riab guic naaw ye. 18 Sac grë zha ne rnee grë mine riab guicse zho, laa zho runa zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech. 19 Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

20 Pquiab be grë miech co, rëb zho:

—jMendzable i gon noguitnie guic luu! ¿Chozhe racladz gut luu?

21 Rëbchaa me:

—Tib vuelte, loxaque gon to beenguiac naa tib men rzacnë

dze ne rdziiladz to lo dziin, na grëga to squitaa rac lo naa. 22 Ni to gon, no hor par gun to mine rnabey ley run to dziin dze co; zig nac zeene rio tib mëed bey (niicle ne riole pxozgol to bey co, zeene laa ley biaan). 23 ¡Gase na ganle golwi! Rquia to rgo to tib mëed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiac naa tib miech dze co? 24 Golguien ganle, nonguield ne lega gdziibdol to tib miech. Goltsoxco golt sienal mine nac diidzli.

*¿Cho nac Jesús?*

25 Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho?

26 Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Men ne zëëble diidz ga guiaad lo guidzliu?

27 Per gacda men qui. Tel men quiw, rdziuunbey ne me, ndion ne cho zha nac me; sangue Men ne zëëble diidz guiaad ga, zeene gal dze ne laa me guiaad, choot gacnand dien cho zha me.

28 Bin Jesús sca nonee zho. Squi ndxie grë zha ne no-quiiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, jnan to pa nëz zial naa! Per led zhaald naa gon zial naa, no tib men ne pxeel naa

per runbeyde to me; men co nac men ne rnee niapse diidzli. <sup>29</sup> Sangue naa runbey naa me, sac lo me brie naa, me pxeel naa zial naa lo to.

<sup>30</sup> Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

<sup>31</sup> Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. ¡Tsodraa zha ne gun grëtaa milagr ne run me!

<sup>32</sup> Bin zha farisé nozeet grë miech co Jesús, dzigo bnediidzaque zho grë zho pxoz ne rnabey, pxeel zho bla zhaguiib zie zienaaz me.

<sup>33</sup> Bdzin grë zhaguiib co, rëbchaa me lo zho:

—¡Golxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa. <sup>34</sup> Zguib to naa, per gdzieldraa to naa, ni grieelod gdziin to zaatne guia naa.

<sup>35</sup> Grë zha ne ndxie ga, zeene bin zho sca rëb me, rzee zdoo zho.

—¡Pa naczhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieseed me, grë zha ne no stib ladz ben. <sup>36</sup> ¿Zha nacne rnee me, zguib ne me per gdziel me lo ne, niicle grieelodgaa guio ne zaatne guey me?

*Nis ne rdeed guielmban*

<sup>37</sup> Zeene gol dze ne laa lni co lozh (dze co nac dze ne mazdraa nroob), miech guizhiu

ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho. <sup>38</sup> Sac grëse zha ne dib zdoo gliladz cho nac naa, rnee lo Xtiidz Dios, masaque rriequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

<sup>39</sup> Sca bzeet Jesús Espíritu Sant. Ga bzeet me, grëse zha ne gliladz cho nac me zacie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

<sup>40</sup> Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lëë men qui ga no guiaad antes ne glanso Men ne nacle diidz cxeel Dios ga.

<sup>41</sup> Rriequia zla zha ne rnee:

—¡Lëda! ¡Lëëgazh me i! Men qui nac Men ne zëëble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grë zha co grieequia Men ne cxeel Dios ga? <sup>42</sup> Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

<sup>43</sup> Zhaase zhaase rnee zho; lel psilo zho nodiidiidz zho dien cho nac me. <sup>44</sup> Briequia bla zho gocladz naaz me, per

ni tib zho wbigd nzhen zho me.

<sup>45</sup> Grë zhaguiib ne zien-aaz me ga, scase zho laa zho bdzin. Zeene gon grë pxoz rnabey co, grë zha farisé co choot bdzinnied zho, rëbchaa zho:

—¿Pe nac dzigo ne ziaad-niede to me?

<sup>46</sup> Pquiab zho rëb zho:

—¿Wlaltaa gard dzian no tib men ne scataa ndzon rnee!

<sup>47</sup> Rëbchaa zha farisé:

—¿Pe nlipaa rnee to! ¿Yelaque to dzigo beengüet me? <sup>48</sup> ¿Pe rwide to, niicle zhiwxtis new, niicle now, ni tib choot riladzd ne me nac Men ne zëëble diidz cxeel Dios ga? <sup>49</sup> Grë zha nxen ne riladz ne nli Dios pxeel me, ¡miech ndziibdeele nac zho, sac gon riend zho zha rnee lo ley!

<sup>50</sup> Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

<sup>51</sup> —Golguien ganle nonguielda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzigoraac gac guielwxtis.

<sup>52</sup> Pquiab zho rëb zho:

—¿Zootne ye luu lëe nacgza grë zha Galilé ne rleyne me? ¿Grë zha ne cxeel Dios, ni tib zho grieequiad Galilé! ¡Lu-uzhal bguiba lo grë guits ne ziaad Xtiidz Dios ganle, zeena gliladz luu!

<sup>53</sup> Blozh ga, grëse zho laa zho wbi, tib tib zho zeyse zho lidz zho.

## 8

*Tib wnaa ro nëz*

<sup>1</sup> Ga brieer Jesús güey me zatne rnee zho Gui Oliv.

<sup>2</sup> Zeene biini liu co, silgaw laa me bdzin len yadoo co stib. Nzian miech ne go-clo lo me ga, nacne bzob me psilo me pseed me zho.

<sup>3</sup> Laa me noseed grë miech co, zeene bdzin bla maistr ley, ni zla zha farisé, bdzinnie zho tib wnaa ne nole tsiel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

<sup>4</sup> —Maestro —rëb zho lo Jesús—, laa wnaa rii bgaa nonie me stib mgui. <sup>5</sup> ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

<sup>6</sup> Sca rëb zho, sac laa zho quiaguib dien zha cxin me tib diidz, zeena sca grieelo tsiezo zho me lo wxtis. Per zeene bin me sca rëb zho pquiit-srunge me liu, psilo me con mzhugnia me noquiaa me lo liu.

<sup>7</sup> Rañ zho rquiabd me, wbi-ire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

<sup>8</sup> Blozh ga biire pquiitsrun me, psilo me stib noquiaa me lo liu. <sup>9</sup> Zeene bin zho sca rëb me, mazd mine been zho



laa zho brieē ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo brieē zho grē zho; loxaque wnaa cose biaan ga.

<sup>10</sup> Dzigo bzoli me, rēb me lo wnaa cō:

—¿Yo grē zha ne scataa bиаad-zo luu nu? ¿Ni tib zho lēē beenquizhd luu xtol luu?

<sup>11</sup> —Ni tib zho —rēb wnaa co.

—Niicle naa —rēb Jesús—, gunquizhd naa luu xtol luu. Bzē, per bien gbiiredraa luu gun luu grē ncuaane guncal xtol luu.

*Jesús nac zig tib biini*

<sup>12</sup> Bded ga, tib dze nonee Jesús lo grē zha ne noquiaadiag zhiwseed me, rēb me lo zho:

—Nac naa zig nac tib biini ne rziini lo miech. Grēse zha ne gbig lo naa, led yed zho soriel ni lo ncow, sac naa gziini lo zho zeena yгаа zho tib guielmban ndzon.

<sup>13</sup> Zeēne bin zha farisé sca rēb me, psilo zho nguiedz roptsie zho rnee zho:

—¿Cho gliladz xtiidz luu! ¿Lēēque luu rnee cho nac luu!

<sup>14</sup> Pquiab me rēb me:

—Niicle ne naaque rne dien cho nac naa, per diidzli nac miņe rne naa. Rien naa pa nēz zial naa, pa nēzгаа za naa; sangue to gon peet riēde to, <sup>15</sup> gacxe waa, rcaadzdoł to naa ncuaane ni nacd naa; ncuaane rcaadzdoł to naa, niapse guic to riaba. Tel naa, zig nac niina noyund naa guielwxtis <sup>16</sup> per zeēne gdziņ dze co, tib tib miech

miņe been zho min co glu dien pe nac miņe tsieguial zho; sac Pxoz naa men ne nacie naa, me gnē zha gun naa guielwxtis. <sup>17</sup> ¿Pe nacne riladzde to mine rne naa? Led rnee lo xley to zeēne tipse rzē xtiidz chop miech, ga rlu ne diidzli rnee zho. <sup>18</sup> Zig nac niina, naa nac tib zha ne rne cho nac naa, laa stib zho nac Pxoz naa men ne pxeel naa; sac gon ye me rnee ganle cho nac naa.

<sup>19</sup> Pquiab zho rēb zho:

—¿Yo Pxoz luu na? ¿Pa no me?

—Runbeyde to me —rēb Jesús—, sac niicle naa runbeyde to naa. Telne niaca miņe runbey to naa, runbeyle to me na.

<sup>20</sup> Gax zaatne riesan miech gon len yadoo nroob ne zob lad guiedz Jerusalén, ga zob Jesús zeēne sca rēb me; per choot bnaazd me, sac gard gal dze co.

*Grieełod gdziņ to zaatne guia naa*

<sup>21</sup> Bded ga, biire Jesús rēb me:

—Laa naa guia nagon. Squiaguib to naa, per lēēque lo xtol to i nitlo to, sac zaatne guia naa grieełod gdziņ to ga.

<sup>22</sup> Grē zha Israel ne ndxie lo me ga, rneechaa zho:

—¿Pe goon lēēque me naye gut me? Zha nacne squi rnee me goon grieełod gdziņ ne zaatne guey me.

<sup>23</sup> —Tel to —rēb me—, zha nēz lo guidzliu nac to; laa naa gon zha nēz gbaa nac naa. Men guidzliu rii nac to, sangue naa nacd naa zha

guidzliu rii. <sup>24</sup> Gane ni naa lo to lëëque lo xtol to i nitlo to. Ne nligaa, telne gliladzde to ne naa nac men ne nac naa, ible lëëque lo xtol to nitlo to.

<sup>25</sup> —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin naa, laa naa rne lo to ganle cho nac naa. <sup>26</sup> Ndal grëncuaane zac glisqui naa lo to nu niina, ni ndal ncuaane racladz naa gne naa lo to, per laa naa noyun mine rnabeyse men ne pxeel naa; ni men co nac men ne rnee diidzli.

<sup>27</sup> Per ib riend zho ne Dios ga rzeet me lo zho. <sup>28</sup> Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiaayun naa; sinque mine pseed me naa, min co rne naa lo to. <sup>29</sup> Dios pxeel naa ni tibaque nacie me naa, ibrsaand me naa, sac tibaque noxco naa run naa mine rdziladz me.

*Zha ne nac xpëed Dios*

<sup>30</sup> Grë zha Israel ne ndxie ga, zeene bin zho sca rëb me, bliladz zho ne me nac men ne no cxeel Dios ga. <sup>31</sup> Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa. <sup>32</sup> Sac sca gunbey to mine nac-paa diidzli, ni lëew glu lo to zha laa to ne squi nac to zig tib ngundziin.

<sup>33</sup> Pquiab zho rëb zho:

—¿Ngundziin ye! ¿Tel no, zha xtiipaa Abraham nac no, waltaa gard gac no ngundziin lo miech! ¿Pe lo dzigo laa no, ne rnee luu laa xtiidz luu csilaa no?

<sup>34</sup> Dzigo rëbchaa me:

—Golquiaadiaga ganle: zha ne tibaque noyunctal xtol, rrieequiacxe waa tib ngundziin nac zho lo dolga, sac lëëlew rnabey zho.

<sup>35</sup> Ni zha ne nac ngundziin lëë, zig run miech nëz rii, grieelod xoon zho lo men ne rree zho; sangue zha ne nac mëed, choot lo ngadood zho. <sup>36</sup> Gacxe waa, tel csilaa Xpëed Dios to, dzigosi choot lo ngadoodraa to. <sup>37</sup> Nli lo xti Abraham ziaad to; per laa to quia gon quiaquib to dien zha gut to naa, sac racladzde to yquiaadiag to zhiwseed naa. <sup>38</sup> Laa naa rne grë mine blu Pxoz naa lo naa, zeene no naa lo me; sangue to gon, laa to zienal mine rnabey men ne nac pxoz to.

<sup>39</sup> Pquiab zho rëb zho:

—¿Ni Abraham gon nac pxoz no!

—¿Nlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me. <sup>40</sup> Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. ¿Tel Abraham led squid been Abraham! <sup>41</sup> Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—¡Led-xe mëed ro nëzd no waa! Tibaque men ne nac pxoz no, ni lëe men co nac Dios.

<sup>42</sup> Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne px-eel naa. <sup>43</sup> Ib rioguide to zha nac grë mine rne naa, ib riende tow, sacne ib nëde to yquiaadiag tow. <sup>44</sup> Golgacnan sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nan ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie. <sup>45</sup> ¡Min co nagon, niicle diidzli nac grë mine rne naa lo to, per ib rliladzde tow! <sup>46</sup> Ni tib to choot grielod gnë laa naa noquidie, sac niapse diidzli rne naa. ¿Pe nac dzigo rliladzde to mine rne naa? <sup>47</sup> Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

<sup>48</sup> Horco pquiab zho rëb zho lo me:

—¡Psioog ro luu men Samar ngoopdo! ¡Nlique mine rnee no ga nagon, ne mendox no-guitnie luu!

<sup>49</sup> —Choot mendzab no-guitnie naa —rëb Jesús—,

sinque laa naa noxco xoo-bnen ganle pa lotaa men nroob nac Pxoz naa; laa to gon lel rsanwin to naa. <sup>50</sup> Noguibd naa dien zha guiaannon naa, per Dios gon racladz me ne sca gaca; ni mesi nan me pe run me. <sup>51</sup> Gneli naa lo to ganle: ¡Grëse zha ne gzoob xtidz naa, gdzind dze ne guet zho!

<sup>52</sup> Pquiab zho rëb zho:

—¡Per nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. ¿Zha nac dzigo rnee luu, zha ne gzoob xtiidz luu, gdzind dze guet zho? <sup>53</sup> ¿Pe mazdraa dzigo nac luu lo pxozgol ne Abraham, lo grëga zha ne biadteed xtiidz Dios ga? ¿Chorzac luu nac luu?

<sup>54</sup> Rëbchaa me:

—Telne lëeque naa noyunnon naa, nlid mine rne naa dzigo. Per na gon, Pxoz naa, men ne nac Dios ne rnee to rliladz to, me rlu ganle ne nli men non nac naa. <sup>55</sup> Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to. <sup>56</sup> Pxozgol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

<sup>57</sup> Zeene bin zho sca rëb me, rëbchaa zho:

—¿Gon luu Abraham ye? ¡Ni chooptsii iz name rapd

luu! ;Zha dzigo gon luu Abraham!

<sup>58</sup> —Gneli naa lo to ganle —rëb me—, notaque naa; nole naa zeene gol Abraham.

<sup>59</sup> Horco ptop zho quie laa zho gdeedquie me, per znuse bded me lad zho brie me len yadoo, gondraa zho me.

## 9

### *Biac tib mgui ne rold lo*

<sup>1</sup> Zieded Jesús tib lugar co, gon me tib mgui ne rcow lo, scale nac lo men co zeene gol me. <sup>2</sup> Dzigo bnabdiidz xpëedscuel Jesús rëb zho:

—Maestro, ;bay zha nacne squi golnie men qui guieinë qui? ;Pe no pe xtol mew, te xtol xmengol mew ye?

<sup>3</sup> —Lëda —rëb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grë ncuaane run Dios.

<sup>4</sup> Zhile laa liu ycow. None dzioxco ne dziuun ne xtsiin men ne pxeel naa laga nas-raa bii zob ngbidz, sac deque ycow liu choot grielodraa gun dziin. <sup>5</sup> Laga bii no naa lo guidzliu rii, naa nac zig tib biini ne rziini lo grë miech rii.

<sup>6</sup> Blozhse sca bnee me, pt-suc me lo liu, bzhixcuaa me niip ben, dzigo bdëeb mew zhits guidlo mgui ne rcow lo ga; <sup>7</sup> blozh ga, rëbcha me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

<sup>8</sup> Grë zha ne no gax zatne no me, ni grë zha ne runbey me; zeene gon zho me, rneechaa zho:

—;Mgui rii ga lëe rzob gdib i rnab gon?

<sup>9</sup> No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhäl rëb lo zho:

—Naaw, naa nac mgui co.

<sup>10</sup> Dzigo bnabdiidz zho zha biac lo me. Rëbcha me:

<sup>11</sup> —Men ne rnee zho lë Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

<sup>12</sup> —;Yo men co niina na? —rëb zho.

—Dieenda —rëb me—, nand naa dien yo me.

<sup>13</sup> Dzigo güey zho güeynie zho me lo grë zha ne nac zha farisé; <sup>14</sup> sac lëetse dze ne rdziiladz zho lo dziin, lëetse dze co sca beenguiac Jesús lo me.

<sup>15</sup> Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbire laaw biacle.

<sup>16</sup> Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdoł nac me, ¿niacxe zrieelo guñ me grë milagr qui?

Zhaase zhaase rnee zho.

<sup>17</sup> Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiaac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

<sup>18</sup> Per ib rliladzd grë zha wxtis co ne biac lo me, sac rliladzd zho ne rold lo me glo; dzigo bnabey zho gocredz pxoz me, gocredz xnias me. <sup>19</sup> Bdziñ grop menğol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

<sup>20</sup> —Nli xpëed no nac me —rëb grop menğol co—. Ni nli rold lo me zeene gol me; <sup>21</sup> per ndiond no dien zha biaca ne laa me ran niina, nicle ndiondgaa no dien pe no cho beenguiaa. Benque zha gol-le nac me, mazd lo me golnabdiidz, mezhal gnë dien zha biac lo me.

<sup>22-23</sup> Sca rëb grop menğol co, sac rdzieb zho grieer zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëeb zho yadoo.

<sup>24</sup> Wbiire zho bredz zho men ne biac lo ga, rëb zho:

—Bieñ ganle Dios zobwi, bnë diidzli lo no; sac tel

no ndion no cholze miech ngoopdoł nac men co.

<sup>25</sup> —Dieenda —rëb me—. Nand naa dien pe miech ngoopdoł nac me, te men wena ye. Per me gon beenguiaac lo naa, sac rold lo naa glo.

<sup>26</sup> Dzigo biire zho bnabdiidz zho stib dien zha beenguiaac Jesús lo me.

<sup>27</sup> Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëeb xnëz me?

<sup>28</sup> Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, miñ co zional no. <sup>29</sup> Sac tel Moisés, ndion no nli Dios pxeel Moisés, per mgui co ni ndiond no dien pa brieer me.

<sup>30</sup> Pquiab me rëb me:

—iNcuane gzeegaa zdoe ne i runbeydaque to cho nac me, ni ron to me beenguiaac lo naa!

<sup>31</sup> Ndion ne ganle rquiaadiagd Dios xtiidz cholze miech ngoopdoł, sinque laa me rquiaadiag xtiidz zha ne rien ne nli men nroob nac me, ni run zho mine rnabey me.

<sup>32</sup> Stiba, waltaa gard dzion ne cho zha beenguiaac lo tib miech ne znu gol rold lo.

<sup>33</sup> Telne niaca mine nacdied Dios men co, nrieelod me niunguiac me lo naa.

<sup>34</sup> —iPsioog ro luu! —rëb zho lo me—. iib racladzd no guiaad tib ngoopdoł nu guiadseed no!

Horco wbig zho, blee zho me ga.

### *Zha ne rold lo*

<sup>35</sup> Bin Jesús sca blee zho me ga, dzigo zeene bdzieel Jesús me, rëbchaá Jesús lo me:

—¿Pe rlliladz luu men ne nac Xpëed Dios?

<sup>36</sup> Pquiab me rëb me:

—Bzhiguiel bnë lo naa dien cho nac men co, zeena gliladz naa me.

<sup>37</sup> —Gonle luu me —rëb Jesús—. Naa gon nac men co, lëë me nu nozodiidznie luu niina.

<sup>38</sup> Dzigo pquiitsgzhib me lo Jesús, ni rëb me:

—Dib zdoo naa rlliladz naa ne nli Xpëed Dios nac luu.

<sup>39</sup> Blozh ga rëbchaá Jesús:

—Laa naa zial lo guidzliu rii, zeena glu dien cho rap dol, dien chogaa rapd dol, sac zha ne rzac miech peet riend, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

<sup>40</sup> Blalaa zha farisé zo ga, zeene bin zho sca rëb me, rëbchaá zho lo me:

—¿Rzë diidz qui na lëë ye lo no rold?

<sup>41</sup> Dzigo pquiab me rëb me lo zho:

—Tel niaca mine nlipaa zha ne rold lo nac to, grieelod gni naa rap to dol. Per na, ne masaque rzac to rolraa lo to, gane grëse ncuaane quiayun to xtol to noyaca, to zëëba.

## 10

*Mëcwxiiil ni zha ne rquianap ma*

<sup>1</sup> Ni rëb Jesús:

—Golquiaadiaga ganle: grëse zha rded stib nëz zeene rzëëb zho len lidz mëcwxiiil, laa ne ted zho nëz ro puert, gase rlu ngbaan ga nac zho; <sup>2</sup> sac tel men ne noyan maw, nëz ro puert nëz co rzëëb me. <sup>3</sup> Zha ne rquianap ro lidz ma, ga rxal zho rded me; niicle ma-gaaw, zeene ron ma tsi me, grëse ma rdzin lo me; dzigo rbedz me ma, rneelë me ma tib tib ma, laa me rbee ma ga. <sup>4</sup> Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me. <sup>5</sup> Rienald ma zhits stib miech, zeene ran ma zho znuse rzhoon ma; sac runbeyd ma tsi zho.

<sup>6</sup> Grë zha ne ndxie lo me ga, ib biend zho zha nac godiidz co; <sup>7</sup> dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiiil ga. <sup>8</sup> Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psacsi zho par grieelo cuan zho; ni grëse mëcwxiiil ne nacpaa xpëcwxiiil naa, güeynaald ma zhits zho. <sup>9</sup> Sangue naa, laa naa nile lo to ganle: Naa nac zig ro Puert, zaatne rded mëcwxiiil ga. Grëse zha ne gbig lo naa, zlaa zho, peet lo tsoxtseeb-draa zho; pale grë mëcwxiiil ne zozëëb zoríee ro lidz, ni rdziel ma guizh nguia, guizh ndzon row ma. <sup>10</sup> Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena

ygaa to tib guielmban ne mazdraa ndzon, tib guielmban ne gdzind dze lozh.

<sup>11</sup> 'Naa nac Baxtor ne nquialadzpaa xpëcwxiil. Sac zha ne nquialadzpaa xpëcwxiil, rquiad zdoo zho xquielmban zho, rsilaa zho ma lo guielxtseeb ne notaa ma. <sup>12</sup> Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiil ga laa zho rzhoon; sac led chend zho ma, led zhad nac xbaxtor ma. Zeene rdzin coyot, nêzrii nêzrec rtsieets coyot ma, nogaa ma rgaa lo coyot. <sup>13</sup> Rzhoon zho, sac dimise nonie guic zho, peet liaadz nod zho ma. <sup>14-15</sup> Naa nac Baxtor ne nquialadz xpëcwxiil. Zigne runbey Pxoza naa naa ni runbey naa me, sca runbey naa grëse xpëcwxiil naa, niicle magaa runbey naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

<sup>16</sup> 'No spalal xpëcwxiil naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

<sup>17</sup> 'Men ne nac Pxoza naa, rleynie me naa sac laa naa rbeeladz xquielmban naa; per ible zriebaan naa. <sup>18</sup> Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire

gban naa stib. Dios bneedz diidzbey co lo naa.

<sup>19</sup> Grë zha Israel ne ndxie ga, zeene bin zho sca rnee me, laa zho goc chop dii stib. <sup>20</sup> No zho rnee:

—Yase mendox noguitnie guic men qui, o rzhinlegaa guic me. ¿Pe nacre rquiaadiag to xtiidz me?

<sup>21</sup> Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rold lo?

*Rnee Jesús Xpëed Dios nac me*

<sup>22</sup> Len mëe ne rac nala, len dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdzin Jerusalén len dze co. <sup>23</sup> Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón; <sup>24</sup> zeene wbig bla zha ne rnabey Israel, bnabdiidz zho lo me rëb zho:

—¿Poc dzigo gdzin dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

<sup>25</sup> Pquiab Jesús rëb me:

—Blactaale zine naaw lo to, per riladzde tow. Stiba, pe zhidaa milagr ne ziya to run naa, gase rlu ganle cho nac naa; sac Dios men ne nac Pxoza naa, men co racniën naa run naaw. <sup>26</sup> Ib riladzde tow, sacne led yede to ngab lo naa. <sup>27</sup> Tel zha ne ngab lo naaw, runbey zho naa; niicle naagaaw runbey naa zho, ni

zhits naa rzënal zho. <sup>28</sup> Grëse zho, rded naa tib guielmban ne gdziñd dze lozh lo zho, ni gdziñd dze nitlo zho. Choot grieelod ctiche zho lo naa, <sup>29</sup> sac men nroob nac Pxo:z naa men ne pxeel zho lo naa; choot grieelod cuee zho ladz-nia me. <sup>30</sup> Ni tibaque nac no grop no me.

<sup>31</sup> Zeene bin grë zha rnabey co sca rëb me, psilo zho ptop zho quie nan zho ngoquie zho me. <sup>32</sup> Dzigo rëbchaa me lo zho:

—Lo grëtaa milagr ne quiayacniën Pxo:z naa naa quiayun naa lo to. Golnë dien, ¿pa min rlisqui to ne laa to racladz gneedzquie to naa?

<sup>33</sup> Pquiab zho rëb zho:

—¿Coquiedaxe no luu waa por grë milagr ne run luu, sinque laa no coquie luu por grë diidz ne rnee luu i, quia-guitnie luu Dios! ¿Tib miech ben:se name nac luu, ni rnee luu laa luu nac Dios!

<sup>34</sup> Dzigo rëbchaa me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rëb me dios nac zho! <sup>35</sup> Ni ndion ne ganle, grëse mine rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga, <sup>36</sup> ¿niacxe rguitnie naa me ga, zeene rne naa Xpëed me nac naa, ni mezhäl bzooblo naa pxeel me naa lo guidzliu rii? <sup>37</sup> Telne rund naa milagr ne rlu Dios pxeel naa, ib gliladzde to naa. <sup>38</sup> Per telne ran to rlu ne me nacnie naa, maase gliladzde to naa totsaque golliladz ne me

nacnie naa; tsow guien to ganle ne tibaque nac no grop no me, zigtaa nacnie me naa, scaque nacnie naa me.

<sup>39</sup> Horco gocladz zho stib naaz zho me, per znuse brieë me nia zho. <sup>40</sup> Dzigo brieë me ga güey me ro guiubee Jordán, zaatne bio Juan pchoobnis Juan miech; ga blëz me palal dze. <sup>41</sup> Nzian miech ne güey lo me ga, rnee zho:

—Nli beend Juan ni tib milagr nroob, per grëse mine bnee me zeene bzeet me men rii, zigne bneese me laaw norieequia niina.

<sup>42</sup> Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

## 11

### *Gut Lazh*

<sup>1</sup> Leñ dze co blanguidz tib mgui ne no guiedz Betain, lë Lazh; no chop bzian Lazh tib zho lë Mart stib zho lë Marí. <sup>2</sup> (Lëë Marí rii pchoob tiblo nceit nex ni Jesús, ni pcuiidz mew con guitsguic me.) <sup>3</sup> Dzigo pxeel grop wnaa co diidz lo Jesús, gacnan me laa Lazh rzacnë, sac nan zho rleyniedox me Lazh.

<sup>4</sup> Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.



<sup>5</sup> Zigtaa Maríw, zigtaa Marta, zigtagaa Lazha, nqualadz Jesús zho gza zho, <sup>6</sup> per ib biobladz me; le<sub>l</sub> blēz me schop ngbidz zaatne no me ga. <sup>7</sup> Dzigoraa nē me lo no:

—Laa ne guio nēz xtan men Judé stib.

<sup>8</sup> Dzigo rdzieets no:

—Maestro, ¿racladz luu tsie luu nēz co stib ye? Pense name goc bla ngbidz ga go-cladz zho ngoquie zho luu ga.

<sup>9</sup> Nēchaa me:

—Tsiipchopraa hor name rziini ngbidz, ni laga niini rna zac tibiladz zia ne, noxtseebd ne lega pa griel ni ne; <sup>10</sup> loxaque pcow liu, noxtseeb pa griel ni ne; sac ncow rna.

<sup>11</sup> Blozh ga nē me:

—Laa xamigw ne Lazh nixguesle, per na laa ne guio zeena gabee naa zhimcaalo me.

<sup>12-13</sup> Tibaque ndion no nli nixgues Lazh, dzigo rdzieets no lo me:

—Telne raaguesle me, zacwen me sca.

Ib biend no ne gutle Lazh, gane sca rnee me. <sup>14</sup> Dzigoraa clar bnee me lo no, nē me:

—Laa Lazh gutle. <sup>15</sup> Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nēz lo me ga niina sca.

<sup>16</sup> Laa Mazh, zha ne rnee zho “Mēēdgrop”, zeene bin Mazh sca nē me, rneechaa Mazh lo no:

—Guiend rson, golgotsaa choob zdoo ne guional ne

zhits me dien. Tel gut zho me, maase gut zho ne.

*Jesús rbeeban ni me rdeed guielmban*

<sup>17-19</sup> Gax Jerusalén ri-aan Betain. Zha ne rrie Jerusalén, maase grol hor run zho nēz rdziñ zho Betain. Nzian grē zha Jerusalén rdziñ riequiaabdiuzh zho Marí grop Mart, riechoobladz zho zdoo me lo xquielnē me ga.

Dze ne rac tap ngbidz bioliu Lazh, dzigoraa laa Jesús bdziñ.

<sup>20</sup> Gon Mart pa lo ziaad Jesús, dzigo brie me biaad-xinēz me Jesús; laa Marí bi-aan ro yu.

<sup>21</sup> —Jesús —rēb Mart—, telne niaca miñe nu no luu segur niete bzian naa; <sup>22</sup> sac nan naa, grētaa ncuaane r nab luu lo Dios, run me miñe r nab luu.

<sup>23</sup> —Peet tsienied guic luu —rēb Jesús—, ible zrieeban bzian luu.

<sup>24</sup> Pquiab Mart, rēb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grēse mengut, laa zho grieeban.

<sup>25</sup> Dzigo rēb Jesús:

—Naa nac men ne rbeeban grē mengut, ni naa nac men ne rdeed guielmban lo grē miech. Grēse zha ne dib zdoo gliladz naa, niicle guet zho zig ret grēraa miech rii, zdziñ dze ne gban zho stib.

<sup>26</sup> Sac grēse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led

rliladz luu lëë Mart, ne sca gaca?

<sup>27</sup> —Rliladz naaw —rëb Mart—. Rliladz naa ne luu nac men ne bzooblo Dios ga, luu nac Xpëed Dios, Men ne zëëble diidz ga cxeel me guiaad lo guidzliu.

<sup>28</sup> Blozhse ga, wbire Mart zie Mart zietsedz Mart Marí. Bdzin Mart zhliaanse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Mae-stro, na laa me rbeedz luu.

<sup>29</sup> Zigne bin Marí sca rëb Mart, brieë nguzhoon Marí laa Marí zie nëz co. <sup>30</sup> (Bdzin Marí, laa Jesús bii zo zaatne güeydzieel Mart me ga; gase blëz me, bzëëbd me lad guiedz.) <sup>31</sup> Grë men Israel, zha ne ndxie lidz Marí ga ziechoobladz zdoo me, zeene gon zho sca lëëlëd brieë me, nalaque zho zhits me; sac nan zho bod ro xpaa bzian me ziegoon me.

<sup>32</sup> Zigne bdzin me zaatne zo Jesús ga, pquitsgzhib me lo Jesús.

—Jesús, luu ne nac luu men ne rnabey —rëb me—, telne niaca mine nu no luu zeene blanguidz bzian naa, niëte me.

<sup>33</sup> Psilo Marí roon Marí. Zeene gon Jesús, niicle Maríw, niicle grë zha Israel ne bdzin ga, mban rac zho, grëse zho roon, dzigo ye me biab guielnë me. <sup>34</sup> Bnabdiidz me rëb me:

—iPa lo pqueets to me?

—Dë ganle —rëb zho—, zeena gan luu pa lo bgueets me.

<sup>35</sup> Horco psilo Jesús biin me. <sup>36</sup> Grë zha Israel co, zeene gon zho roon me, rneechaa zho:

—iGolwi ganle, blactaa nquialadz me Lazh!

<sup>37</sup> Laa zla zho rnee:

—Led me name beenguiac lo mgui ne rold lo ga, ipe nrieelod zha niun me, zeena niëte Lazh?

### *Brieëban Lazh*

<sup>38</sup> Zeene laa Jesús bdzin ro baan Lazh, biire biab guielnë me.

Zig nac tib blieë niaa baa co; rna tib quie nroob ntse zaatne rsëëb zho ngutoo; <sup>39</sup> dzigo bnabey Jesús cob zho quie co.

Pquiab Mart, bzian ngutoo co rëb me:

—iMazd gdiobda! iNadze rac tap ngbidz gut me, mbanle na rlaa me!

<sup>40</sup> Dzigo rëbchaa Jesús:

—Led laa naa nile lo luu, telne dib zdoo luu rliladz luu naa, bii zan luu ganle zha nactaa grë ncuaane ndzon ne run Dios.

<sup>41</sup> Zeene blozh bdoob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoaz naa, xquizh xquielnzaac luu sac rquiaadiag luu mine rne naa. <sup>42</sup> Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

<sup>43</sup> Dzigo nguiedz bredz me, rëb me:

—iLazh, brieë i!

44 Zigne sca bnee me, laa ngutoo co brieë ga, scase nriël lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nriël me i, zeena guey me!

*Rguib zho dieñ zha yгаа Jesús*

(Mt. 26:1-5; Mr. 14:1-2; Lc. 22:1-2)

45 Grë meñ Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me. 46 Nogaa zho lel güey zho güeyzodiidz zho lo grë zha farisé zha bleeban me Lazh. 47 Horco lëäläd pcaalsa grë pxoz ne rnabey, ni grë zha farisé, rëb zho:

—¿Pe gnë to dieñ zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me? 48 Telne squise csaan ne me, mbe grëse miech sëëb xnëz me; lozh ga, zeene gacnañ meñ rnabey ne zob Romaw, laa me cxeel grë xmenguiib me guiaadnitlo zho xyadoo ne, guiaadnitlo zho ladz ne.

49 Dzigo pquiab Caifás, meñ ne nac pxoz nroob leñ iz co, rëb me lo zho:

—¡Ni lal nu lëë peet riende to! 50 ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

51 Zeene sca rëb Caifás meñ ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me.

Ga goquiet ne laa Jesús guet, par csilaa me grëse zha Israel, 52 ni grëragaa zha ne no dipse lo guidzliu, zeena tipse gac grëse zha ne nac xpëëd Dios.

53 Dzigo grëse zha ne nac wxtis ga, laa zho biaan diidz ne ible no yгаа Jesús gut zho me. 54 Nacne briedraa Jesús ne nenlo niañ zho me; dzigo mazd laa me brieenie no xtan zha Judé, güeynie me no zatne wzhi no miech, bdziñ no tib guiedz win lë Efraín, ga bliaaz no grë no me.

55 Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac an-sraa csilo Pascw nzian zho rie yadoo run zho grëse miñe rnabey ley par guiaañmbe zho lo xtol zho. 56 Grëse zha ne rdziñ, leñ yadoo no zho rnabdiidzlsa zho dieñ pe zdziñ Jesús lo lni; sac grëse zho racladz gañ me.

57 Laa grë pxoz ne rnabey, ni grë zha farisé, laa zho bnabeyle, zha ne gantaa Jesús, tsienie zho diidz parne tsie zha ne tsienaa zho me.

## 12

*Pchoob tib wnaa nceit nex guic Jesús*

(Mt. 26:6-13; Mr. 14:3-9)

1 Sxoop ngbidz gdziñ dze lni Pascwa, güey Jesús guiedz Betain, zaatne no Lazh, meñ ne bleeban me ga. 2 Sac grëse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib

ncuaane gowxtsee zho lo mezh, <sup>3</sup> tibaque zeene bzëeb Marí bzëebnie Marí tib lo nceit nex ne rriee guiee ne lë nard, tib lo nceit niazha, rgaaw maase groḷ boté. Zigne bdziḡ Marí bdëeb Marí nceit co ni Jesús, blozh ga con guitsguic Marí pcuuidz Marí ni me. Dipse len̄ yu zëbḡlaa nceit co.

<sup>4</sup> Laa Judas Iscariot, tib zha ne nacgza no (zha ne bded ga pto me) zeene gon̄ Judas sca bdëeb Marí nceit co ni Jesús, rneechaa Judas:

<sup>5</sup> —Mazd tebaa zha ndo nceit qui. Nguizhpaa zhow maase tson̄ gayoo pes plat, dzigo needz zho dimi co ngaaza lo grë zha mban ne guiend̄ pe yquiin.

<sup>6</sup> Sca rnee Judas, per nlid ne rquia zdoo Judas zha ne guiend̄ pe yquiin, sinque laa Judas rguib dien̄ zha cuan Judas dimi co, sac Judas ngot-sow bziuud ne no dimi; zigse raclo dimi len̄ bziuud co, zhlianse rbee Judas dimi co.

<sup>7</sup> Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal̄ dze ne laa naa ygueets.

<sup>8</sup> Tel̄ne racladz to gon̄ to xyudar zha ne guiend̄ pe yquiin, tibaque ran̄sa to grë to zho, zac tsow ygad to lo zho; san̄gue naa zdziḡ dze gand̄raa to naa.

<sup>9</sup> Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men̄ ne bleeban me ga.

<sup>10</sup> Zeene gon̄ grë pxoz rnabey cow, nacne bnedi-idzaque zho ye Lazh none gut zho; <sup>11</sup> sac por Lazh, nzian grë zha non, laa zho rbig nëz lo Jesús, laa zho rliladz ne nli me nac Men̄ ne zëeble diidz ga cxeel̄ Dios.

*Bzëeb Jesús Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Biini liu co, dipse lad guiedz Jerusalén zhoob diidz laa Jesús gdziḡ ga dze co. Grë miech guizhiu ne bdziḡ ga zie lni Pascw, <sup>13</sup> psilo zho briece zho ziaad-xinëz zho me; tib tib zho nzhen̄se zho tib lë zin. Lo guiel̄bley co, zeene gon̄ zho me, psilo zho nguiedz roptsie zho, rnee zho:

—¡Zha men̄ nroobtaa nac Dios! ¡Zha ndzontaa men̄ rii pxeel̄ Dios ziaad lo ne! ¡Lëe men̄ rii gnabey Israel!

<sup>14</sup> Laa Jesús, zobse me lad tib burr yeen̄, zigne raquiet lo Xtiidz Dios zaatne rnee:

<sup>15</sup> Grëse to men̄ Israel, gdziebde to.

¡Gol̄wi gan̄le, laa men̄ ne rnabey ladz to ziaad i, zobse me lad tib burr yeen̄!

<sup>16</sup> Grëse no ne nac no xpëëdscuel me, ni tib no bien̄ hor co ne grëse ncuaane noyac ga, raquietlew lo Xtiidz Dios; sinque haxta zeyle me gbaa, dzigora psoladz no nzian grë ncuaane raquiet lo Xtiidz Dios ga, gon̄lo no goca; ni bien̄ no Jesús raquiet ga.

<sup>17</sup> Lad grë miech guizhiu co no nzian zha ne gon̄ zha bleeban me Lazh, dzigo nguiedz rzodiidz zhow lo grë miech

co. <sup>18</sup> Ni nzian grē miech co, laa zho blanso ga ziaad-xinēz zho me, sac bin zho zha been me milagr nroob co. <sup>19</sup> Grē zha farisé, zeene gon zho grē miech guizhiu co, rneechaa zho:

—iPe zhidaa grē miech qui racnie men qui! iPeraa nadien dziuun ne!

### *Rguib bla zha Gres Jesús*

<sup>20</sup> Lad grē miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel, <sup>21</sup> dzigo bnee zho lo Lip (zha Betsaid nac Lip) rēb zho:

—Bzhiguiel bnē dien pa lo no Jesús, laa no racladz dzian no me.

<sup>22</sup> Dzigo güey Lip rēb Lipa lo Ndrés, blozh ga güey zho grop zho güeynie zho diidz lo Jesús.

<sup>23</sup> Dzigo rēbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib.

<sup>24</sup> Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnēz naa. <sup>25</sup> Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zгаа zho tib guielmban ndzon ne ib gdziind dze lozh.

<sup>26</sup> Zha ne racladz sēeb xnēz naa, none gun zho mine rnabey naa; ni zaatne gdzin naa yeque zho no gdzin ga. Ni grēse zha ne sēeb xnēz naa

ni gon zho xtidz naa, zunnon Pxoze naa zho. <sup>27</sup> Mban rac zdoo naa niina. Per lēda ga gun naa, telne guiep naa lo Pxoze naa csilaa me naa lo grētaa guielne ne no teed naa. iSac par mincopaa zial naa lo guidzliu rii!

<sup>28</sup> Dios, luu ne nac luu Pxoze naa —rēb me—. Blu lo grē miech rii ganle ne men nroob nac luu.

Dzigo bin zho zēeb tib tsi men co gbaa, rēb me:

—Laaw blule naa, ni niina laa naa gbire gluw stib.

<sup>29</sup> Nzian grē miech ne ndxie ga, zeene bin zho tsi men co, bzhaac zho nguziw; zha ne bien led nguzida, rnee zho:

—Xanjl Dios ga gon bnee lo me.

<sup>30</sup> Dzigo rēbchaa me lo zho:

—Laa to bin ganle laa Pxoze naa bnee, ni por to gon bnee me, zeena gon to tsi me ni gliladz to ne me pxeel naa.

<sup>31</sup> Laa dze nagon bdzin zeene laa Dios gunquish naa xtol grēse miech guidzliu rii; lēē dze bdzin zeene laa mendox piche gnabeydraa ma lo guidzliu rii zigne rnabey ma niina. <sup>32</sup> Sac zeene laa naa quia glaa lo cruz, ga cuedz naa grēse miech zeena sēeb zho xnēz naa.

<sup>33</sup> Ga bzeet me zha gut miech me. <sup>34</sup> Grē miech ne ndxie ga, zeene bin zho sca rēb me, rēbchaa zho:

—iGuet luu ye? Lo Xtidz Dios name rnee, ib guete Men ne cxeel Dios ga. iZha nac dzigo ne rnee luu laa luu guet? iChopaa dzigo nac luu?

<sup>35</sup> Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zatne riab biini zeena ygaade to guielcow; sac zha ne rzë lo ncow riend zho palo zie zho. <sup>36</sup> Niina ne rdeeda diidz goliladz cho nac naa, zeena gac to zha ne nlipaa no lo biini.

Blozhse sca rëb me laa me biche ga, blulodraa me lo zho. <sup>37</sup> Niicle gonlo zho nzian milagr ne been me, per ib riladz zho ne nli Dios pxeel me. <sup>38</sup> Ni ib scalegaa no gaca, sac ga brieequia mine bzeet Isá (tib men ne biadteed xtidz Dios) zeene znu rëb me:

Dios, bui ganle ni tib choot nëd gliladz xtiidz luu, niicle ran zho grëtaa milagr ne run luu.

<sup>39</sup> Ni nligaa ib brieelod nliiladz zho me; sac zeene pquiaa Isá, znu rëb me:

<sup>40</sup> Ncow psan Dios lo zho, ni beenndip me zdoo zho; zeena gan zho me, niicle guiengaa zho zha gbig zho lo me csilaa me zho lo xtol zho.

<sup>41</sup> Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús. <sup>42</sup> Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo.

<sup>43</sup> jNi stiba rdziladzraa zho

guiaannon zho lo miech, laa ne guiaannon zho lo Dios!

<sup>44</sup> Len dze co, tib vuelt nguedz bnee Jesús, rëb me:

—jGrëse zha ne riladz naa, yeke Pxoze naa ga riladz zho! <sup>45</sup> jNi zeene rwi zho lo naa, yeke men ne pxeel naa ga ran zho! <sup>46</sup> Naa nac zig tib biini ne rziini lo miech, ni grëse zha ne dib zdoo gliladz cho nac naa, zriee zho lo guielcow ne no zho. <sup>47</sup> Grëse zha ne gon Xtidz naa, ni gband zho zigne rnabeya, led naad gunquizeh zho dol co; sac ziald naa par gdziibdol naa miech, sinque laa naa zial par csilaa naa zho lo dol. <sup>48</sup> Xtidz naa gac ley ne gunquizeh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa.

<sup>49</sup> Sac grëse ncuaane pseed naa miech, led guicd naa biaba, sinque Pxoze naa men ne pxeel naa, men co rnabey naa pe nac mine cseed naa zho. <sup>50</sup> Ni nanpaa naa, grëse diidz ne rnabey Pxoze naa naa rne naa, lëew rlu zha yгаа miech tib guielmban ndzon ne gdzind dze lozh; gacxe waa, grëse mine rnabey me gne naa, zigne racladz me scase rne naaw lo to.

## 13

*Rguiib Jesús ni xpëëdsuel me*

<sup>1</sup> Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdiin, zeene laa me gbi lo

guidzliu rii gbire me lo Pxoꝝ me stib. Grēse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho. <sup>2-4</sup> Rien me grētaa ncuaane no, ladznia me psan Pxoꝝ mew; lo Pxoꝝ me briece me ziaad me lo guidzliu, ni lo Pxoꝝ me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziinlen me tib lē lar nool. Par hor co, laa mendox pquuil-le Judas, zhin Simón Iscariot, parne tsieto Judas me. <sup>5</sup> Dzigo blaas me nis tib len bandej laa me psilo noguuib me ni grē zha ne nacgza no, zigse rlozh rguuib me ni tib zho scase scase rcuidz mew con lar ne ndxie len me ga. <sup>6</sup> Zeene laa me zie quuib me ni Simón Pedr, rēbchaa Simón lo me:

—iLēda i gon! ¿Pe nacne lel luu quuib ni naa?

<sup>7</sup> Pquiab me rēb me:

—Grieelod guien luu niina, pe nacne quuib naa ni luu; haxta tedraa nu dzigo ganle guien luuw.

<sup>8</sup> —iNend scaw! —rēb Pedr—. iPer naasi gon gnedzd naa diidz quuib luu ni naa!

Dzigo rēbchaa me:

—Grieelod sca ygab luu xnēz naa, telne siguield luu quuib naa ni luu.

<sup>9</sup> Horco pquiab Simón, rēb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

<sup>10</sup> Dzigo rēbchaa me:

—Zha ne gozle, nise zho riar; sac mbele zho. Scaque to nagon, mbele to grē to. Grē to rne naa, niicle ne led gzad-paa to mbe.

<sup>11</sup> Sca rēb me, sac rienle me cho tsieto me.

<sup>12</sup> Blozhse bdiib me ni no, wbiire whix me xab co me, bzob me lo mezh; dzigo nē me lo no:

—¿Pe bien to na pe nacne znu bdiib naa ni to? <sup>13</sup> Golwi ganle: To lēē, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw. <sup>14</sup> Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to. <sup>15</sup> Laa naa blule lo to zha gun to, nana sca goltsienal min co. <sup>16</sup> Gneli naa lo to ganle, lo grē zha ne nac ngundziin, tsod zha ne nonraa lo zha ne rnabey zho; scaque grē zha ne rie mandad, tsod zha ne nonraa lo zha ne rxeel zho. <sup>17</sup> Laa to nanlew nasca. Gacxe waa, telne tsienal to wseed rii, zacace gac lo xquielmban to.

<sup>18</sup> Golquiaadiag ganle, grēse mine none naa nu, led par grēde tow. Naa bzooblo to, nanween naa zha nac to tib tib to, ni nanween naa zha rnee lo Xtiiidz Dios, rneew: “Lēēque tib zha ne rownie naa, griequia tsielo naa ladznia zha ne gut naa.” <sup>19</sup> Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa. <sup>20</sup> Ni golgona ganle, grēse

zha ne ycaania Espíritu Sant, men ne cxel naa, naale ga no caania zho; ni zha ne rcaania naa, yele men ne pxeel naa ga rcaania zho.

*Rëb Jesús ne Judas nac zha ne tsieto me*  
(Mt. 26:20-25; Mr. 14:17-21; Lc. 22:21-23)

<sup>21</sup> Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

<sup>22</sup> Zeene bdzion no sca rnee me, psilo no rwilolsa no, rienđ no dien cho nac zha ne rzeet me ga.

<sup>23</sup> Cuepaa me, ga zoob naa (rleynie me naa niicle ne raguiald naaw); <sup>24</sup> dzigo blunia Pedr lo naa, gnabdiidz naa lo me dien cho nac zha ne rzeet me ga. <sup>25</sup> Nacne wbig gax naa, bnabdiidz naa lo me.

<sup>26</sup> Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas. <sup>27</sup> Zigne bnaaz Judas guietxtil co, laa menđox bzëëb zdoo Judas. Dzigo rëbchaa Jesús lo Judas:

—Mïne no guic luu gun luu, na zeen nawdzegazh beëna.

<sup>28-30</sup> Zigne blozh dow Judas guietxtil co, lëëlëd brieë Judas ley; pcowle liuw.

Lo grë no ne zioobnie no me lo mezh ga, ni tib no biend

pe nacne sca rëb me lo Judas. No zho nan bod no pe ncuaane rquuin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquuin; sac Judas nac zha ne ngotsow bziuud win ne no dimi.

<sup>31</sup> Gonse Jesús laa Judas brieë ley, dzigo nëchaa me lo no:

—Niina nagon bdzin dze zeene glu ganle zha nroobtaa guiełndzon ne rap Mgui ne pxeel Dios, ni ga glu ganle pa lotaa nac guiełndzon ne rap Dios. <sup>32</sup> Ni scaque Dios, zlu me ganle pa lotaa nac guiełndzon ne rap Mgui ne pxeel me ga. <sup>33</sup> Xin yeëna, jzhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sënal to zaatne ga naa. <sup>34</sup> Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho. <sup>35</sup> Zeene gan miech, ne nligaa dib zdoo to rleynie to samiech to, dzigo zien zho xpëëdsuel naa nac to.

*Ible ziab Pedr runbeyd Pedr Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Dzigo bnabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:



—Zaatne ga naa, grieelod sēnal<sub>1</sub> luu niinagazh; per ib laa luu no guiaadnal<sub>1</sub>.

<sup>37</sup> Pquiab Pedr, rēb Pedr:

—¿Per pe nacne grieelod sēnal<sub>1</sub> naa zhits luu niina? ¡Sēnal<sub>1</sub> naa zhits luu gon<sub>1</sub>, ni-icxe maase gut zho naa waa!

<sup>38</sup> Dzigo rēbchaa me:

—¿Goon<sub>1</sub> csaand luu naa ye Pedr, niicle gut zho luu? Nlid ga gon<sub>1</sub>. Gneli naa lo luu ganle, zeene laa gall ycuedz tsonle vuel<sub>1</sub> rēb luu runbeyd luu naa.

## 14

*Niapse por Jesús gdzin miech lo Dios*

<sup>1</sup> 'Tso<sub>1</sub>de to zhgab, tso<sub>1</sub>de to guielnē. Tiblique golgun<sub>1</sub> guic to, zigne dib zdo<sub>1</sub> to rililadz to Dios, scaque dib zdo<sub>1</sub> to golliladz cho nac naa.

<sup>2</sup> Golgona ganle: Zaatne nac lidz Pxo<sub>1</sub>z naa, ndaldoo zaatne cuēz miech no ga, tel<sub>1</sub> niaca minē guien<sub>1</sub>d zaatne cuēz to, nile naaw lo to na. Gacxe waa, niina laa naa ga, gzhixcuaa naa zaatne cuēz to ga.

<sup>3</sup> Ni zeene lozh gzhixcuaa naa zaatne cuēz to, hor co laa naa gbire guial<sub>1</sub> stib, dzigosi laa to sēnal<sub>1</sub> zhits naa; zeena tibaque zaatne gbiaaz ne. <sup>4</sup> Laa to nanle nasca pa lo ga naa, ni nanlegaa to nēz ne.

<sup>5</sup> Pquiab Mazh rēb Mazh lo me:

—Maestro, pe<sub>1</sub>lel<sub>1</sub> nēz na gacndion<sub>1</sub> no, ni per ni zaatne tsie luu ndion<sub>1</sub>d no.

<sup>6</sup> Dzigo rēbchaa Jesús:

—Naa nac nēz co, naa rseed miech minē nac diidzli, ni naa rded tib guielmban ndzon

ne ib gdzind dze lozh. Lo grēse miech, zha ne gliladz cho nac naa, zha co gdzin lo Pxo<sub>1</sub>z naa; guien<sub>1</sub>draa stib mod ne gdzin zho lo me. <sup>7</sup> Tel<sub>1</sub>ne runbey to naa, dzigo runbeya<sub>1</sub>que to Pxo<sub>1</sub>z naa. Ni runbeylegaa to me, sac tibaque ran<sub>1</sub> to me.

<sup>8</sup> Dzigo rēbchaa Lip lo me:

—Bzhiguiel<sub>1</sub> mazd blu Pxo<sub>1</sub>z luu lo no. Totsaque dzian<sub>1</sub> no me, lēēlew ga dzigo.

<sup>9</sup> Pquiab Jesús, rēb me:

—Blactaale dze ga name Lip no naa lo to, ni gardaque ye gunbey luu naa. ¡Grēse zha ne ran<sub>1</sub> naa, lēēque Pxo<sub>1</sub>z naa ga ran<sub>1</sub> zho! ¿Zha nac dzigo ne racladz luu glu naa me lo to? <sup>10</sup> ¿Niacxe rililadz luu dzigo ne tibaque nac no grop no Pxo<sub>1</sub>z naa? Grēse minē rseed naa to, led guicd naa riaba; grēse ncuaane run<sub>1</sub> naa, me rnabeya, me runa sac tibaque nac no grop no me.

<sup>11</sup> Golliladz sca ne tibaque nac no grop no Pxo<sub>1</sub>z naa. Tel<sub>1</sub>ne goon<sub>1</sub> rililadzdgaa tow zigne rnee naa lo to nu, siquier lo grē dziin ne nodziun<sub>1</sub> no, ga golgan<sub>1</sub> ganle ne nli tibaque nac no grop no me.

<sup>12</sup> 'Ne nligaa, gneli naa lo to ganle: Grēse zha ne rililadz cho nac naa, ye zho zun<sub>1</sub> zho grē milagr ne run<sub>1</sub> naa, ni haxta nroobraa ncuaane gun<sub>1</sub> zho; sac tel<sub>1</sub> naa, laa naa no guia zaatne no Pxo<sub>1</sub>z naa. <sup>13</sup> Ncuaane gnabtaa to lo Pxo<sub>1</sub>z naa, totsaque glu to ne nli rililadz to naa, zun<sub>1</sub> naaw; zeena ga gan<sub>1</sub> miech ganle me nac men<sub>1</sub> ne mazdraa nroob,

me nac men ne mazdraa non.  
 14 Ne nligaa, telne rnalō to  
 naa, ncuane gnabtaa to zun  
 naaw.

### *Sxeel Jesús Espiritu Sant*

15 "Telne nli rleynie to naa,  
 golgun grē minē rnabey naa  
 to sca. 16 Scagaa naa, laa  
 naa gnab lo Pxoꝝ naa cxeel  
 me tib men ne tibaque gac-  
 nien to, tibaque cchoobladz  
 zdoo to; ib gdzind dze ne  
 csaan me to. ¡Lēē men co  
 ga nac Espiritu Sant, men ne  
 rlu pa miñ nac diidzli; ni ible  
 sxeel Pxoꝝ naa me! 17 Zha  
 ne ngabd xnēz naa, grieelod  
 ycaania zho me, sac rand  
 zho me niicle runbeyd zho  
 me; sangue to, runbey to me  
 sac me quianap to niina, ni  
 zbēzga me zdoo to.

18 'Ib csaanladzd naa to,  
 zbire naa guial naa lo to stib.  
 19 Nli zhilew, zeene gandraa  
 grē miech naa, sangue to gon  
 bii zañ to naa; sac zriebaan  
 naa, ni scaquegaa to zga  
 to tib guielmban ndzon ne  
 gdzind dze lozh. 20 Gal dze  
 co, zeene gan to laa naa grie-  
 ban, ga gliladz to ganle ne  
 nli tibaque nac no grop no  
 Pxoꝝ naa, zigne tibaque nac-  
 nie naa to ni naciegaa to  
 naa. 21 Zha ne runbey zha nac  
 grē minē rnabey naa, ni rban  
 zhow zigne naca, ga rlu ne  
 nli rleynie zho naa; ni zigne  
 rleynie zho naa, scaque Pxoꝝ  
 naa zleynie me zho; niicle  
 naagaaw zleynie naa zho, ni  
 zlu naa lo zho ganle cho nac  
 naa.

22 Dzigo pquiab Judas (zhaa  
 Judas Iscariot), rēb Judas lo  
 me:

—¿Pe nac waa lose no glu  
 luu cho nac luu? ¿Telzhe  
 grēraa miech waa?

23 Pquiab me rēb me:

—Zha ne run minē rnabey  
 naa, lo zha co glu naa cho nac  
 naa; sac rlu zho ne nli rleynie  
 zho naa. Ni haxta ziaad no  
 grop no Pxoꝝ naa gbannie no  
 zho; sac zigne rleynie zho  
 naa, scaque zleynie me zho.  
 24 Sangue zha ne rund minē  
 rnabey naa, ¿zha dien glu naa  
 lo zho cho nac naa? Sac rlu  
 rleynie zho naa. Golsoladz  
 ganle: grēse diidz ne ron to  
 rne naa, led guicd naa riaba,  
 xtiidz Pxoꝝ naaw. 25 Laa naa  
 rne grē miñ rii, laga bii zo naa  
 lo to nu, 26 per zeene laa Pxoꝝ  
 naa cxeel Espiritu Sant men  
 ne guiaad cchoobladz zdoo  
 to (men co guiaad xcuent  
 naa), men co lozh cseed to, ni  
 guncsoladz me to grēse minē  
 bne naa lo to.

27 'Laa naa guia, per laa  
 naa rsañ tib guielbley zdoo  
 to, zeena zigne tibliladz rac  
 zdoo naa, scaque tibliladz  
 gac zdoo to. Sac guielbley ne  
 rnedz naa lo to nu, nacda zig  
 nac guielbley ne runbey grēraa  
 miech guidzliu rii. Tsode to  
 zhgab sca, niicle gdziebde to.  
 28 Laa to binle ganle, laa naa  
 no guia lo Pxoꝝ naa per zbire  
 naa guial naa lo to stib. Telne  
 nli rleynie to naa ine nley  
 golgac, niina ne ron to laa naa  
 guia lo me, sac gon men nroo-  
 braa nac me lo naa. 29 Laa

naa rne grē min rii lo to niina, zeena zeene gaca, ga lozh guien to ganle cho nac naa.

<sup>30</sup> 'Led nroobdraa sodidznie naa to, sac ile ziaad mendox, men ne rnabey lo guidzliu rii. Peet grielod gun mendox naa, <sup>31</sup> per ible none gon naa xtiidz Pxoza naa men ne pxeel naa, zeena gan miech ganle ne nli rleynie naa me. ¡Goltsieso nasca, zeena zio ne!

## 15

### *Jesús nac zig tib lbë uv*

<sup>1</sup> 'Naa nac zig tib zhan lbë uv, laa to nac zhicwa, laa Pxoza naa nac zig tib zha ne quianapa. <sup>2</sup> Grëse zhicw lbë co mine rquiad nex lo, rchug mew; laa grë mine rquia nex lo, ine rsanmbe me low, rbe-laan me low zeena yquiaraa nex low.

<sup>3</sup> 'Zig nac to gon, laa Dios psanmbele to sacne zienal to grë xtidz naa mine pseed naa to. <sup>4</sup> Gbichede to lo naa sca, sinque tibaque golgacnie naa zigne nacie naa to. Golgan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grë ncuane rdziladz naa, telne nacie naa. <sup>5</sup> Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuane gun zho zdziladz Diosa; <sup>6</sup> sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw

tsec. <sup>7</sup> Telne tibaque gacnie to naa, ni tibaque tsoxco to grë mine pseed naa to, dzigosi ncuane gacladzttaa to golnaba, ni scagaa scaania tow.

<sup>8</sup> 'Gollu sca ne nli xpëedscuel naa nac to, golsannon Pxoza naa, niapse ncuane rdziladz me min co golgun.

<sup>9</sup> 'Ne nligaa rleyniedox naa to. Golwi ganle, zigne rleynie Pxoza naa naa, scaque rleynie naa to. Golguien sca tibaque golgun mine rnabey naa. <sup>10</sup> Sac gon, zha ne gun mine rnabey naa, gzataa dze zleynie naa zho; sac sca rleynie Pxoza naa naa ne run naa mine rnabey me. <sup>11</sup> Laa naa rzet min rii lo to, zeena guiaad tib guielbley zdo to. Ne nligaa, zeena guiaad tib guielbley nroob zdo to; ni naa gnedz guielbley co lo to.

<sup>12</sup> 'Laa naa rnabey to, laa naa rnab lo to: ¡Golleynie samiech to, zigne rleynie naa to! Tel naa, golguien ganle pa lotaa rleynie naa to, <sup>13</sup> sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rleynie zho zho.

<sup>14</sup> 'Ni to gon, telne gon to grë mine rne naa lo to, dzigosi nli rleynie to naa. <sup>15</sup> Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rleynie naa to, sac grëse mine rnabey Pxoza naa, grëse zigne rnee me, laaw bzodidzle naa lo to. <sup>16</sup> Golguien

ganle, led tod gon bzooblo naa, sinque, jnaa bzooblo to! Ni laa naa bzooblo to zeena gon to niapse ncuane rdziladz Dios; dzigosi ncuane gnabtaa to lo Pxo<sup>z</sup> naa, ne nac to zha ne no xn<sup>ez</sup> naa, zneedz mew. <sup>17</sup> Laa naa rso diidz lo to: Golleynie samiech to. <sup>18</sup> Niicle rl<sup>ee</sup> zho ran zho to, golsoladz ganle, desde naa squi rl<sup>ee</sup> zho ran zho. <sup>19</sup> Rl<sup>ee</sup> zho ran zho to, sac laa naa bleele to lad zho, zienaldr<sup>aa</sup> to ncuane rleyne zho; laa telne nagon bii nac to zigne nac zho, dzigosi z<sup>ee</sup>b gleyne zho to. <sup>20</sup> Golsoladz ganle, zeene znu ni naa lo to: iTsod ngundziin ne ndziibsr<sup>aa</sup> non lo zha ne rnabey zho! Telnaa, pquiana<sup>l</sup> miech naa, ipe lel to dzigo gandze zho? Nana, zigne brieequiagaa palal zha ne bliladz xtidz naa, scaque zrieequia zha ne yquiaadiag min<sup>e</sup> gnee to.

<sup>21</sup> Ible squiana<sup>l</sup> miech to ne nac to zha ne ngab xn<sup>ez</sup> naa, sac runbeyd zho Dios men ne pxeel naa. <sup>22</sup> Telniaca min<sup>e</sup> niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho. <sup>23</sup> Zha ne rl<sup>ee</sup> ran zho naa, yele Pxo<sup>z</sup> naa ga rl<sup>ee</sup>nie zho. <sup>24</sup> Ne nligaa telne niaca min<sup>e</sup> nian<sup>d</sup> zho gr<sup>ee</sup>taa milagr nroob ne run naa, zac guiep naa peet xtold zho; per na gon, blactaa milagr ne gon zho be<sup>n</sup> naa, ni laa zho bii rl<sup>ee</sup> ran zho no grop

no Pxo<sup>z</sup> naa. <sup>25</sup> I nagon norieequia min<sup>e</sup> raquiet lo Xtiidz Dios, zaatne znu rnee: "Peet guielntseeb quiaayund naa lo zho, per rl<sup>ee</sup>nie zho naa."

<sup>26</sup> 'Laa naa nile lo to ganle, ible sxel naa Esp<sup>iritu</sup> Sant gacnie to, niapse diidzli rnee me. Lo Pxo<sup>z</sup> naa grie<sup>e</sup> me guiaad me, me cchoobladz zdoo to, ni me gneedz guielbiini lo to lozh guien to cho nac naa. <sup>27</sup> Ni scagaa to, ye to laa to none sodiidz lo gr<sup>ee</sup>raa miech gacnan zho cho nac naa; sac gon tibaque bz<sup>ee</sup>nie to naa desde ne psilo naa xtsin naa.

## 16

<sup>1</sup> 'Laa naa rne gr<sup>ee</sup> min rii lo to zeena peet tsienied guic to, tibaque dib zdoo to gnalo to naa. <sup>2</sup> Sac gon zun<sup>c</sup>xoon zho to, zbee zho to yadoo; ni zdzin dze haxta zut zho to, sac masaque sac zho l<sup>ee</sup> min<sup>e</sup> racladz Dios ga noyun zho. <sup>3</sup> Laa zho gon gr<sup>ee</sup> min co, sac niicle Pxo<sup>z</sup> naaw, niiclegaa naaw, runbeyd zho no.

<sup>4</sup> 'Laa naa rzodiidz gr<sup>ee</sup> min rii niina, zeena zeene gal dze ne laaw noyac, csoladz to ganle gr<sup>ee</sup>sew bzodiidzle naaw lo to. Bzodiidz naaw lo to glo, sacne hor co laa naa bii zo lo to. <sup>5</sup> Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga. <sup>6</sup> L<sup>ee</sup> gdib min<sup>e</sup> run

to, riab guiel<sub>n</sub>ē to ron to grē  
mine rne naa nu.

7 'Gneli naa lo to gan<sub>l</sub>e:  
Mazd wen gon<sub>t</sub> tsie to zeene  
laa naa guia lo men<sub>n</sub> ne  
pxeel<sub>l</sub> naa, sac tel<sub>n</sub>e cuēz  
naa nu, grieelod guiaad men<sub>n</sub>  
ne guiadchoobladz zdoō to  
ga. Sangue tel<sub>n</sub>e guia naa,  
dzigo naazhal cxel<sub>l</sub> me. 8 Ni  
zeene laa me guiaad, me  
gun<sub>n</sub>quien<sub>n</sub> miech gan<sub>l</sub>e grēse  
zho zha ngoopdol<sub>l</sub> nac zho,  
me gun<sub>n</sub>quien<sub>n</sub> zho zha laa zho  
lo dol<sub>l</sub> co guiaan<sub>n</sub>wen zho lo  
Dios, ni guien<sub>n</sub> zho ne nli zdzi<sub>n</sub>  
tib dze zeene laa Dios gun<sub>n</sub>  
xquiel<sub>w</sub>x<sub>t</sub>is me. 9 ¿Pe nacne  
nac zho miech ngoopdol<sub>l</sub>?  
Miech ngoopdol<sub>l</sub> nac zho,  
sacne rliladz zho cho nac  
naa. 10 ¿Zha grieelo laa zho  
lo dol<sub>l</sub> co guiaan<sub>n</sub>wen zho lo  
Dios? Zrieelow, min<sub>n</sub>cocxe  
waa nacne bial<sub>l</sub> naa, ni na  
laa naa guia zaatne zob  
Pxoz naa, gand<sub>r</sub>aa to naa.  
11 ¿Zha rlu ne nli zun<sub>n</sub> Dios  
guiel<sub>w</sub>x<sub>t</sub>is? Nli zun<sub>n</sub> mew,  
sac gon<sub>t</sub> laa me bnabeyle zha  
nac grē guiel<sub>n</sub>ēdox ne yгаа  
mendox, men<sub>n</sub> ne quianabey  
lo guidzliu rii.

12 'iNzianraa ncuaa<sub>n</sub>e  
racladz naa sodiidz naa lo  
to! Per rien<sub>n</sub> naa grieelod  
tsogui<sub>c</sub> to zha naca niina.  
13 Zeene guiaad Espiritu Sant,  
me gneedz guiel<sub>b</sub>iini lo to  
guien<sub>n</sub> to grēraa ncuaa<sub>n</sub>e no  
gacnan<sub>n</sub> to, ni grēгаа ncuaa<sub>n</sub>e  
naraa gac. Niapse diidzli  
gnee me, sac led guicd me  
guiab grē mine gnee me,  
sinque mine nac xtiidz Pxoz  
naa, min<sub>n</sub> co gnee me. 14 Ga

glu me lo miech gan<sub>l</sub>e ne  
nli men<sub>n</sub> nroob, men<sub>n</sub> non  
nac naa. 15 Rne naa ga  
glu me, sac grētaa ncuaa<sub>n</sub>e  
rnabey Pxoz naa, yeque naa  
rnabeya. 16 Zhilew zeene  
laa naa gbiche lo to gand<sub>r</sub>aa  
to naa; per gacdaquew xtse  
zeene laa to gbiirelaque gan<sub>n</sub>  
naa stib.

17-18 Zeene bdzion no sca  
rnee me, blalaa no psilo no  
rnabdiidzlsa no rnee no:

—¿Bay zha nacne squi rnee  
me? ¿Zha nacne rnee me,  
zhilew dzian<sub>r</sub>draa ne me,  
per gacdaquew xtse laa ne  
dzian<sub>r</sub>laque lo me stib? Ni  
rneeque me laa me guey lo  
Pxoz me.

19 Bien<sub>n</sub> me racladz no gnab-  
diidz no lo me, dzigo nē me lo  
no:

—¿Racladz to lēē gacnan<sub>n</sub>  
to zha nacne znu rne naa?  
20 Gol<sub>q</sub>uiaadiaga sca gan<sub>l</sub>e:  
Zeene gdzi<sub>n</sub> dze co, laga  
noyoon to no to guiel<sub>n</sub>ē ne  
laa naa biche lo to, laa grēraa  
miech haxta zley zho ne  
laa naa wbiche lo zho. Nli  
nroob guiel<sub>n</sub>ē ne tso to, per  
zeene laa to gan<sub>n</sub> naa stib,  
guiel<sub>b</sub>ley nroob ne tso to.  
21 Nac cuent rii zig rzac tib  
men<sub>n</sub> wnaa ne ral xpēēd. Glo  
yoob ro, yoobdox ne rquia  
me, per deque laa mēēd co  
ralse, ni rsoladzdraa me yoob  
co; sac mazdraa nroob nac  
guiel<sub>b</sub>ley ne rio me ran<sub>n</sub> me laa  
xpēēd me blanso lo guidzliu.  
22 Scadaa nagon<sub>n</sub> rzac to, nli  
mban rac to niina, per zeene  
laa to gan<sub>n</sub> naa stib, dzigosi  
tib guiel<sub>b</sub>ley nroob ne tso

to, ni choot grieelod ctiche guielbley co lo to.

<sup>23</sup> Zeene gal dze co, yquiindraa to pe gnabdiidz to lo naa. Ncuuaane gnabtaa to, lo Pxoza naa gnab tow, ni zneedz mew, sac xnëz naa ngab to.

<sup>24</sup> Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuuaane rquiin to golnaba lo me, ni ible zneedz mew gon. Nroob guielbley ne tso to hor co.

<sup>25</sup> Nzian grë ncuuaane zine naa lo to, rned naaw clar; per laa dze bdziñ zeene grëse ncuuaane gne naa, clar gne naaw lo to, zig nac zeene gzet naa Pxoza naa. <sup>26</sup> Ni zig nile naa ga, hor cosi ncuuaane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuuaane gnab to lo me, <sup>27</sup> sac ye me rleynie me to. Rleynie me to, sac gon rleynie to naa ni rliladz to ne nli lo me brie naa bial naa lo guidzliu. <sup>28</sup> Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

<sup>29</sup> Dzigo rdzieets no lo me:

—iNasi nagon rien no zha rnee luu! Sac clar rnee luu, rneedraa luu zigne rnee luu glo. <sup>30</sup> Nasi rien no grëse ncuuaane nan luu, sac zig nac niina pquiindpaa nabdiidz no lo luu. Gacxe waa, nasi nagon rliladz no ne nli lo Dios brie luu.

<sup>31</sup> Pquiab me, në me:

—iWen ga telne rliladz to niina cho nac naa! <sup>32</sup> Per lëe hor co nagon bdziñ; ni niina,

grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacie Pxoza naa naa. <sup>33</sup> Grëse ncuuaane bne naa lo to nu, laaw bne naa zeena peet tsienied guic to, benque nanle to ganle tibaque nacie naa to. Parga nli, laga no to lo guidzliu rii, nzian grë guielnë ne ted to, per gdziebde to; sac gon naa rnabey, ladznia naa no grëtaa ncuuaane no lo guidzliu.

## 17

*Rnab Jesús gacniën Dios xpëedscuel me*

<sup>1</sup> Blozhse sca në me lo no, blis lo me bui me nëz gbaa.

—Dios, luu ne nac luu Pxoza naa —rëb me—, niina nagon laa dze co bdziñ. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu. <sup>2</sup> Zigne psan luu grëse miech ladznia naa, ni gdeed naa tib guielmban ndzon ne gdziind dze lozh lo grëse zha ne bneedz luu ngab xnëz naa; scaque niina blu ganle men nroob nac naa. <sup>3</sup> Lëe guielmban co ygaa grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii. <sup>4</sup> Grëse ncuuaane bnabey luu naa, laaw noyun naa; ni ga rlu naa lo grë miech rii ganle pa lotaa men nroob nac luu. <sup>5</sup> Scagaa luu ne nac luu Pxoza naa, niina

ne laa naa glanso lo luu, blu ganle men nroob nac naa; sac desde mazd glo zeene gard tsa grëtaa ncuane no, tibaque nac lo guielndzon ne bdzio ne haxta dze ne blanso naa lo guidzliu rii.

<sup>6</sup> Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa. <sup>7</sup> Zig nac niina, grëse ncuane bneedz luu lo naa, nanle zho ne luu bneedza, <sup>8</sup> sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni rliladz zho ne luu pxeel naa. <sup>9</sup> Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho, <sup>10</sup> ni zha glu ganle pa lotaa men nroob nac naa. Grëse zho chen luu zho; sac grëse ncuane nacchen naa, chen luuw; ni grësegaa ncuane nacchen luu, chen naaw. <sup>11</sup> Riën naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu PxoZ naa, luu ne nac luu tib men ne guiënd xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne. <sup>12</sup> Len dze ne blëz naa

lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

<sup>13</sup> Zhilew laa naa glanso zaatne no luu i; per len dze ne blëz naa lo zho nu, nzian grë ncuane bne naa lo zho, zeena ye zho tso guielbley nroob ne no naa. <sup>14</sup> Pseed naa zho mine nac xtiidz luu; per na rlëë grëraa miech ran zho zho, sacne zianaIdraa zho grë ncuane ndzinlid ne rac lo guidzliu rii. Nac zho zigne nac naa, rleyndied naa grë ncuane co. <sup>15</sup> Per rnabd naa cuee luu zho lo guidzliu rii, sinque laa naa rnab csaand luu gun zho ncuane racladz mendox. <sup>16</sup> Sac niicle zhaw, niicle naaw, choot zionaId grë ncuane ndzinlid ne rac lo guidzliu rii. <sup>17</sup> BzhiguieI sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdo zho tsoxco zho gban zho zigne rnabey luu. <sup>18</sup> Sac gon, niina laa naa rxel zho lo grëraa miech guidzliu rii, zigne ne pxeelaque luu naa. <sup>19</sup> Ni niina, dib zdo naa laa naa gun mine rnabey luu, zeena ye zho guien zho none dib zdo zho gun zho mine rnabey luu.

*Rnab Jesús por grë zha ne ygabraa xnëz me*

<sup>20</sup> Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho;

21 zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa. 22 Laa naa psannon zho zigne psannonaque luu naa, ni tipse gac zho zigne tibaque nac ne grop ne. 23 Zigne nacnie luu naa, scaque nacnie naa zho. Bzhiguiel gocnieñ zho, tibaque gac zho grëse zho, zeena gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa. 24 Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeena gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeene gard tsaaguidzliu.

25 'Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa. 26 Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeena scaque guien zho gleynie zho samiech zho, ni gacnie zho naa.

## 18

*Bnaaz zho Jesús*

(Mt. 26:47-58; Mr. 14:43-50, 53-54; Lc. 22:47-54)

1 Zeene blozh bnab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedron. Ga no tib zaatne zëeb niapse yag nex, dzigo ga bliaaz no gza no me.

2 Judas zha ne pto me ga, wen wen runbey Judas lugar co, sac nzian vuelt ziyenie me no ga. 3 Dzigo zeene laa Judas blanso ga, laa Judas blansoniele tib dzoon menguiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhengaa spad. (Lëe grë zha co pxeel grë pxoz rnabey, ni grë zha farisé.) 4 Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuaane ted me.

5 Pquiab zho, rëb zho:

—Men Nazaret ne lë Jesús, men co ziaadguib no.

Dzigo rëb me:

—Naa nac men co, tel me ziaadguib to.

6 Zeene bin zho rëb me: “Naa nac men co”, wbire rzhitsaque zho, grëse zho biab liu. Ye Judas no lad co. 7 Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

8 —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

9 Ga brieequia xtiidz me zeene rëb me: “Lo grë zha ne



bneedz luu lo naa, ni tib zho bnitlod.”

<sup>10</sup> Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëe mgui co quia xtsiin men ne nac pxoz nroob.) <sup>11</sup> Zeene gon Jesús, rëbchaa me:

—¡Blootsow spad qui Pedr! ¡Bien ganle Pxoz naa rnabey znu teed naa! ¿Niacxe gond naa mine rnabey me naa dzigo?

<sup>12</sup> Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

<sup>13</sup> Sca nzobdoo me, laa zho bdziinne me lidz men ne lë Anás, pxozdzoop Caifás. Caifás nac pxoz nroob len iz co, <sup>14</sup> ni me ga rëb lo grë men non lo zha Israel, ne mazd wena tibaque zha ne ygaa guet, quizh zho par dib guiedz.

*Rëb Pedr runbeyd Pedr Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Zhiits co, ga nal no grop no Pedr. Ni ne runbey naa Caifás men ne nac pxoz nroob ga, zeene bdziin no ro lidz Anás, loxaque naa brieelo bzëeb nëz ley. <sup>16</sup> Laa Pedr, zaatne nactaa ro yu par gdziin zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed

wnaa co diidz bzëeb Pedr. <sup>17</sup> Dzigo rëbchaa me lo Pedr:

—¿Bod ye luu dzigo lëe nac xpëedscuel men ne bdziinne zho i?

—Coo, led yed naa —rëb Pedr.

<sup>18</sup> Grë zha ne quia xtsiin men co ni grë menguiib ne ndxie ga, laa zho bzëegle gui. Grëse zho, laa zho ndxiedzëe lo gui ga, sac rac nal. Ye Pedr bdziin lo zho ga nodzëe Pedr.

*Rquiep Anás Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech. <sup>20</sup> Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngueets zhlian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu. <sup>21</sup> Nana bod riegualda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaane bne naa.

<sup>22</sup> Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

<sup>23</sup> Dzigo rëbchaa Jesús:

—Telne rzac luu beñ naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

<sup>24</sup> Blozh ga scaque nzobdoo Jesús pxeel Anás me lo Caifás, men ne nac pxoz nroob.

*Rnee Pedr stib runbeyd Pedr Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Horco laa Pedr bii zodzëëque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel men ne blansonie zho i lëë nac luu?

Laane neeli Pedr, lel pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

<sup>26</sup> Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

<sup>27</sup> Wbiire Pedr rëb Pedr runbeyd Pedr me, ni lëëtaque hor co laa tib gall pcuedz.

*Güeynie zho Jesús lo Pilat*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdzin zho, ni tib zho bzëëbd len yulow, sac racladzd zho quiits zho mine rnabey xley lay zho; parne grieelo yquiin zho guielwagw ne row zho lni

Pascw co. <sup>29</sup> Nacne brieë Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

<sup>30</sup> Pquiab zho, rëb zho:

—¡Por grëtaa guielntseeb ne noyun me, gane ziaadnie no me! ¡Telne niac me men ndzinli, niacxe lega guiaadzo no me lo luu!

<sup>31</sup> Dzigo rëbchaa Pilat:

—Golsënie me, tose golgunquish me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

<sup>32</sup> Ga brieëquia mine bnee Jesús, zeene bzeet me ible zut miech me. <sup>33</sup> Dzigo bzëëb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?

<sup>34</sup> —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

<sup>35</sup> Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

<sup>36</sup> Dzigo rëbchaa Jesús:

—Nli rey nac naa, per led lo guidzliu riida, telne niaca mine lo guidzliu riiw, dzigosi grëse zha ne nacnie naa niacntseeb zho, nsaand zho naaz

zha Israel naa. Per na, zhaa zaatne nac naa rey.

<sup>37</sup> Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey naa; zigne rnee luu i. Ible min co nacne bial naa gol naa lo guidzliu rii, ni bial naa bialseed naa miech gunbey zho mine nac diidzli. Ni zha ne zienal mine nac diidzli, zha co ngab lo naa.

<sup>38</sup> —¿Diidzli ye? —rëb Pilat.

*Bnabey Pilat tsiegut zho Jesús*

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brie Pilat ga güeynee Pilat lo grë zha ne bdzinnie me ga, rëb Pilat lo zho:

—Ni tib dol gon rapd men rii. <sup>39</sup> Per gzobse lni Pascw rii, rnab to rlaa cholze tib zha ne no ladzguiib. ¿Pe gnë to sca, mazd csilaa naa men ne nac zhirey to nu?

<sup>40</sup> Pquiabbe zho, rëb zho:

—¿Csilaad luu me! ¡Mazd psilaa Barrabás!

Ni laa Barrabás tib ngbaan nac Barrabás.

## 19

<sup>1</sup> Zeene gon Pilat sca rac zho, dzigo bnabey Pilat bla menGUIIB, bdeed dooguid zho Jesús. <sup>2</sup> Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan. <sup>3</sup> Dzigo psilo zho runnguzee zho me, nguiedz roptsie zho rnee zho:

—¡Bley na ganle, laa luu nacle zhirey zha Israel!

Ni rgap zho lo me.

<sup>4</sup> Wbiire Pilat briequia Pilat zaatne ndxie grë miech co, rëb Pilat lo zho:

—Golwi ganle laa naa cuee me, glu naa me lo to, per gacnan to ganle rieguald guet me; laa naa pquieple me rlu ni tib guieIntseeb beend me.

<sup>5</sup> Zeene laa Jesús briequia, nzobguicse me coron yag guiets co, ni nacw me lar nizhnie co.

—Golwi na ganle —rëb Pilat—, lëë me nu.

<sup>6</sup> Grë pxoz ne rnabey, ni grë menGUIIB ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëbchaa Pilat:

—¡Goltsienie me sca! ¡To golquiaa me lo cruz! Sangue naa, grieelod yquia naa me lo cruz; sac laa naa gonle peet guieIntseeb beend me.

<sup>7</sup> Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

<sup>8</sup> Zeene bin Pilat sca rëb zho, mazdraa bdzieb me.

<sup>9</sup> Dzigo bzëëbnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat. <sup>10</sup> Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

<sup>11</sup> Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grieelod ne luu gnabey zha gac naa. Mincoxe waa, zhi nac xtol luu, mazdraa nac xtol zha ne biaadlo naa nia luu.

<sup>12</sup> Dzigo gocladz Pilat nsilaa me Jesús, per bzhiguield grē zha ne güeyšan me ga.

—Telne laa luu csilaa mgui qui gon —rēb zho—, rrieequia dzigo ye luu rlēēnie César. Sac gon, grēse zha ne racladz gac rey, lo César ga racndaan zho.

<sup>13</sup> Zeene bin Pilat sca rēb grē miech co, bnabey Pilat brieē Jesús nēz ley stib. Dzigo güey sob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.) <sup>14</sup> Lēē dze vispr lni Pascw co ga nagon, zig grolle dzew noyac grē min co. Dzigo rēb Pilat lo zho:

—Laa zhirey to nu gon. jGolsēnie me!

<sup>15</sup> Psilo zho stib, nguiedz roptsie zho, rnee zho:

—jBeetgazh men qui! jBnabey yquia me lo cruz!

Rēbchaa Pilat:

—Zhirey to nac me, jni racladz to ye gnabey naa yquia me lo cruz?

Pquiabbe grē pxoz ne rnabey rēb zho:

—jTibaque men ne nac zhirey no, ni lēē men co nac César!

<sup>16</sup> Dzigotaa mazd laa Pilat bloo Jesús nia zha ne tsiequiaa me lo cruz.

*Pquia Jesús lo cruz*

(Mt. 27:32-44; Mr. 15:21-32; Lc. 23:26-43)

<sup>17</sup> Zeene laa Jesús brieē ga, rna tib cruz nroob ney me; laa zho zienie me. Bdzinnie zho me ro guiedz, zaatne rnee zho “Gui Beerguic Ngutoo”; <sup>18</sup> ga pquiaa zho me lo cruz. Ni pquiaa zho schop zha ntseeb, tibga zhicruz zho bzo cue zhicruz me.

<sup>19-20</sup> Bnabey Pilat pquia bla lan diidz guic zhicruz me, rneew: “LĒĒ JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga. <sup>21</sup> Nacne güey grē pxoz rnabey, güeylisqui zhow lo Pilat, rēb zho:

—jPe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

<sup>22</sup> Pquiab Pilat rēb Pilat:

—Mine pquia naa, laaw pquiale ga. Ni sca none guiaana.

<sup>23</sup> Laa grē menguiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lē, tib lēgaw biaanne zho tib tib zho. Laa lar ne rbix me, tiblagaque naca, ndiibda; <sup>24</sup> dzigo rēbchaa zho:

—Minritaa nagon dzi-uungrold ne. Mine naca gotsaa dzio new rif, dzigo

zha ne grieequia zha co guiaannew.

Ga brieequia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbiix naa, bio zhow rif.” Ni scadaa been gza menguiib co.

<sup>25</sup> Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsiel Cleof, ni Marí Magdal.

<sup>26</sup> Gaxaque ga zo naa. Zeene gon Jesús xniaa me, ni gon me naa, rëbcha me lo xniaa me: —Been cuent nagon lëe xpëed luu i zo i.

<sup>27</sup> Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

### *Gut Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

<sup>29</sup> Gax lo grë menguiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me. <sup>30</sup> Zeene bdzin nziu co ro me, pquiin me niipa, dzigo rëbcha me:

—Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

<sup>31</sup> Guini liu co nac tib dze ne mazdraa nda lo zha Israael. Nacne güey grë zha ne rnabey lo menguiiedz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena quietgazh zho lo cruz dze co; sac racladzd zho scaque quia zho lo cruz zeene laa dze nda co gdzin.

<sup>32</sup> Dzigo pxeel Pilat bla menguiib. Zeene bdzin zho, glose güeytiits zho ni tib zha ne quia gza Jesús lo cruz ga; blozh ga, güeytiitsaque zho ni stib zho. <sup>33</sup> Zeene bdzin zho zaatne zo zhicruz Jesús, gon zho laa me gutle; nacne bdiitsd zho ni me.

<sup>34</sup> Horco wbig tib menguiib co, bliz zho xlanz zho ro xcuxti me. Zeene bdoob zho lanz co, nis ne, ren ne brieega.

<sup>35</sup> Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw. <sup>36</sup> Ga brieequia mine raquiet lo Xtiidz Dios, zaatne rnee: “Ni tib dzit ne no me quiitsd zho.”

<sup>37</sup> Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

### *Bgueets Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par griee lo tselit me xcuerp Jesús lo cruz. Ye

me xpëedscuel Jesús nac me, per pxobnend me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

<sup>39</sup> Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne ríaa yaal ne lë mirr ni yaal ne lë áloe. <sup>40</sup> Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar nquits; sac sca rqueets grë men Israel zhingutoo zho.

<sup>41</sup> Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co; <sup>42</sup> dzigo nacne gase güeyqueets zho me, sac zhile runfalt sëeb dze nda co, ni baa cose nac mine ríaan gax ga.

## 20

### BRIEBAN JESUS

(Mt. 28:1-10; Mr. 16:1-8; Lc. 24:1-12)

<sup>1</sup> Gol dze ne rzobni zhmalá, silgaw, scase bii ncow rnaw, brieë Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nëz.

<sup>2</sup> Horco lëelëd wbiire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

<sup>3</sup> Dzigo lëelëd, brieë no grop no Pedr, zioso no ro baa. <sup>4-5</sup> Zeene bdziñ naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëebd naa. Laa naa blozhdze bdiixlo len baa, zeene laa Pedr blanso. <sup>6</sup> Zigne blanso Pedr bzëeb Pedr len baa, gon Pedr nligaa laa lar co zhoob ga, <sup>7</sup> niicle lar ne briel guic mew, laaw zhoobaque ga; ndibëdsew, zhooba tib lad.

<sup>8</sup> Nacne bzëebaque naa. Zeene gon naa zha zhoob lar co, dzigoraá bliladz naa ne nli brieëban me. <sup>9</sup> Sac hor co, bii gard tsoguic naa zha rnee lo Xtiidz Dios; sac ga raquiet ne ible zrieëban me!

### Gon Marí Magdal Jesús

(Mr. 16:9-11)

<sup>10</sup> Ye Marí biire blanso ro baa ga stib. Zeene whii no ga grop no Pedr, laa Marí bii zo ro baa ga.

<sup>11</sup> Ga name zo Marí roon me. Sca roon me, tibaque zeene bui me nëz len baa co, <sup>12</sup> gon me laa chop anjl zob leen co. Dib nquitsbiese rna xab grop anjl co, tib me zob nëz ne bzhoob guic Jesús, stib me zob nëz ne bio ni me; <sup>13</sup> dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen pa güeysan zho me.

<sup>14</sup> Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesúsá!

15 —¿Pe nacne roon luu?  
—rëb Jesús—. ¿Cho rguib luu?

Leļ güeynie guic Marí rëb  
me bod men ne rquianap  
gaw, dzigo rëbcha me:

—Bzhiguiel, telne luu biad-  
bee me nu, bnë dien pa lo  
güeyšan luu me; zeena ga naa  
gaxi naa me.

16 Horco bneelë Jesús Marí,  
bredz me me. Zeene bin Marí  
lë me, lëelëd biecw me; dzigo-  
raa beenbey me Jesús.

—¡Maestro! —rëb me—.  
¡Mod luu i!

Laa me zie gbig me lo Jesús.

17 Dzigo rëbcha me Jesús:

—¡Xeend luu naa! Sac gard  
guia naa lo Pxoze naa gbaa.  
Mine naca, güey güeynie diidz  
lo grë zha ne bzënal zhits naa;  
gudz lo zho: Laa naa nole  
nëz guia naa lo men ne nac  
Pxoze ne, men ne nac Dios ne  
rdziuunbey ne.

18 Horco lëelëd wbi Marí  
ga, ziaadnie me diidz lo no.  
Blanso me bzodiidz me zha  
gon me Jesús, ni në me lo no  
zigne rëbse Jesús lo me ga.

*Briequia Jesús lo  
xpëedscuel me*

(Mt. 28:16-20; Mr. 16:14-18;  
Lc. 24:36-49)

19 Pcow liu dze dmingw co,  
grëse no ne nac no xpëedscuel  
me laa no pcaalsa; loxaque  
Mazh runfalt. Dziits nquiaa  
no yag yu, sac rdzieeb no grë  
zha Israel ne rlëenie me. Laa  
no ndxie ga, tibaque zeene  
briequia me bzo me glowtaa  
lo no; pquiaabdiuzh me no.  
20 Blozhse pquiaabdiuzh me  
no, dzigo blu me len nia me  
lo no, zaatne biaaz clav zeene

pquia me lo cruz, ni blu me  
ro xcuxti me. ¡Grëse no per nli  
rley no zeene bdzion no ne nli  
mew! 21 Blozh ga, në me lo  
no:

—¡Laa naa rnedz tib  
guielbley zdoo to, zeena peet  
tsienied guic to! Zigne pxeel  
Pxoze naa naa bial naa, scagaa  
niina laa naa rxel to.

22 Dzigo blub me lo no grëse  
no.

—Golcaania Espíritu Sant  
—në me—. 23 Ni zeene gon  
gun to tib miech perdon,  
scaque Dios zun me zho  
perdon; laa telne siguield zho  
gun to zho perdon, laa zho  
biaanle lo xtol zho ga.

### *Gon Mazh Jesús*

24-25 Zeene bdzion no  
Mazh (Mazh ne rnee zho  
“Mëedgrop” ga), bzodiidz now  
lo Mazh, per bliladzd Mazha,  
rnee Mazh:

—Rliladzd naa mine rnee  
to i gon. Zliladz naaw, per  
haxta ganlo naa me, haxta  
gan naa len nia me zaatne  
biaaz clav, ni cteed-xug naa  
ga; ni csëebnia naa ro xcuxti  
me zaatne biaaz lanz ga.

26 Goc xon ngbidza, laa no  
pcaalsaque len yu co stib;  
hor cosi yele Mazh ndxiegrë  
no ga. Scaque dziits nsioog  
no ro yu, per tibaque zeene  
bdzion no laa Jesús bzëeb  
len yu ga stib, bzo me glow-  
taa lo no, pquiaabdiuzh me  
no. Blozhse pquiaabdiuzh  
me no, 27 rëbcha me lo Mazh:

—Wbig na Mazh, bui len  
nia naa, psëeb mzhugnia luu  
nu. Dien nia luu nu, psëebnia  
ro xcuxti naa. Gacchopdraa

guic luu, sinque bliladz ganle ne nli mban naa.

<sup>28</sup> Dzigoraa bliladz Mazh ne nli mban me.

—Nasi rililadz naa mban luu —rëb Mazh—. Luu nac men ne rnabey naa, luu nac xDios naa.

<sup>29</sup> Pquiab Jesús rëb me:

—Laa luu rililadz niina, lëëcxee laa luu gonle naa waa. jDichos zha ne gliladz ne nli mban naa, niicle ran d zho naa!

*¿Pe nacne pquia grë diidz rii?*

<sup>30</sup> Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii. <sup>31</sup> Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtol ne, Dios bzooblo me biaad me, ni Xpëed Dios nac me; sac zha ne dib zdoo gliladz cho nac me, zgaa zho tib guielmban ndzon ne gdzind dze lozh.

## 21

### *Gon zho Jesús Galilé*

<sup>1</sup> Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

<sup>2</sup> Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets naa Jacob ni schop zha ne nacgza no.

<sup>3</sup> Tibaque zeene në Pedr, laa Pedr tsie gooz mel. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzienie no barcw co lo nis, per ni tib mel bgaad. <sup>4</sup> Laa liu ziaadle lozh guini, zeene bdzion no laa tib men co zo ro nis, per ni tib no bdziunbeyd me. <sup>5</sup> Dzigo bnee men co lo no, në me:

—Yo to dien xin, ¿pe bгаа ma?

Pquiab no rdzieets no lo me:

—Choot ma bgaad.

<sup>6</sup> Dzigo nëchaa me:

—Golron guiee ne rgaa ma i nëz derech ganle, znaaz to ma.

Dzigo bron no guiee co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

<sup>7</sup> —jPedr! —rep naa—. jBina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis. <sup>8</sup> Laa no biaan len barcw ga; nole bdzinnew zaatne nac ro nis. Maase tapgaltsii metr sca bdioobniu no guiee co lo nis.

<sup>9</sup> Zeene briece no len barcw, bdzion no laa gui noycle, laa tib mel zhooble lo gui co, ye quietxtil ne. <sup>10</sup> Dzigo në Jesús lo no:

—Goltënie bla mel ne blozh bnaaz to i nu dien.

<sup>11</sup> Dzigo güey Pedr bieep me len barcw, güeyxadz me guiee ne no mel ga; dzigo bdoobniu mew bdzinnew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiiptson lo grë ma; niicle scataa nzian ma, per blëb guiee co, briedza.



<sup>12</sup> Blozh ga, bredz me no, nē me:

—¡Goltē na, zeena gowx-eren to!

Ni tib no bñabdiidzd lo me dien pe nli mew; sac, ¡rienpaa no ne nli mew!

<sup>13</sup> Dzigo wbig me bdiiz me guietxtil co lo no, bzhen me mel ne, bneedz me ma lo no.

<sup>14</sup> Ga bion vult briequia me lo no wlal ne brieaban me.

### *Bzodiidznie Jesús Pedr*

<sup>15</sup> Blozhse bdioowxeren no, bredz Jesús Pedr, psilo zho bzē zho grop zho; dzigo rēb me lo Pedr:

—Simón (xingan Jonás), ¿pe nli dzigo rleyneraa luu naa que grē zha qui?

—Nquialadz naa luu —rēb Pedr—, ni nanlegaa luuw ganle.

—Pteedlo grē xpēcwxiil win naa sca —rēb me.

<sup>16</sup> Wbiire me, rēb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rēb Pedr.

Dzigo rēb me:

—Pquianap xpēcwxiil naa sca.

<sup>17</sup> Wbiireque me stib rēb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rēb me, mban goc zdoo Pedr; sac gale rac tson vult zinabdiidz me lo Pedr, dzigo rēb Pedr:

—Luu nac men ne rnabey, luu nana grēsew, nan luu ganle nquialadz naa luu.

Dzigo rēb me:

—Telne nli nquialadz luu naa, yquiaanap luu xpēcwxiil naa sca.

<sup>18</sup> Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladz luu.

<sup>19</sup> Zeene znu rēb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rēbchaa me:

—¡Dēnal zhits naa!

<sup>20</sup> Dzigo nalaque naa zhits me grop me Pedr. Zeene ptsire lo Pedr, gon Pedr laa mēēdscuel ne scataa rleynie me ga, laa zho nal ga, zha ne zobpaa cue me ga lo xtsee co, zha ne wbigpaa bñabdiidz lo me dien cho nac zha ne tsielo me ladznia zha ne gut me; dzigo rēbchaa Pedr lo me:

<sup>21</sup> —Telzhe zha rii waa, ¿pe nac mine ted zho?

<sup>22</sup> Rēbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dēnal zhits naa!

<sup>23</sup> Zeene gocnan grēraa zha ne rililadz Jesús sca bnee me, grēse zho tibaque güeynie guic zho gdzindraa dze guet naa. Per led scada, sinque znu naca, rēb me: ¡Pe gun Pedr! Telne gacladz me, zrieelo gnabey me gban naa

haxta gal dze ne guiaad me  
stib.

<sup>24</sup> Grëse miñe pquia naa  
nu gon, grop lo naa gon  
naaw, grëse zha ne nacgrë no  
nanpaa zho ganle ne diidzli  
rne naa.

<sup>25</sup> Ndaldooraa grë ncuaane  
nroob ne been Jesús, tel ni-  
aca miñe yquiaw grësew, ni  
ygaad dib lo guidzliu tsotsow  
grë guits ne yquiaw ga.

## MINE BEEN ZHA NE PXEEL JESÚS BNEE XTIIDZ ME

¡Diuzh Tiofl!

<sup>1</sup> ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grëse mine been Jesús, grëse wseed ne blu me lo miech zeene psilo me xtsiin me <sup>2</sup>haxta gol dze ne psan me diidz pe nac ncuaane gun grë zha ne bzooblo me tsie-nee Xtiidz me. Espiritu Sant bdeed guielbiini lo zho bien zho zha racladz me; lëe dze co ga zey me gbaa.

<sup>3</sup> Nli psaci miech me, beet zho me, per brieaban me. Ni par glu ganle ne nli brieaban me, dipse len choo ngbidz brieequia me lo grë zha ne sca bzooblo me tsienee Xtiidz me. Gzataa zeene rrieequia me lo zho, rnee me lo zho zha rnabey Dios.

<sup>4</sup> Tib vuelt ndxie zho grë zho me, dzigo pso me diidz lo zho ible grieed zho lad guiedz Jerusalén, haxta guiet Espiritu Sant gdeed guielbiini lo zho zigne nacle xtiidz Pxoze me; ni biire rëb me lo zho:

<sup>5</sup> —Gol soladz ganle laa naa nile lo to: nli laa Juan pchoobnis, per niab nisa; sanque to zgaa to guielbiini ne gneedz Espiritu Sant, rrieequia Espiritu co chobnis to; ni zhile gdziñ dze ne laa min co gac.

<sup>6</sup> Len ngbidz ne sca nolulo me lo zho, tib vuelt bnabdiidz zho lo me, rëb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma? <sup>7</sup>Dzigo pquiab me rëb me lo zho:

—Dios, men ne nac Pxoze naa, ncuaane gun me rieguialde to gacan tow, mese nan dien pa dzew, dien pa horgaaw; sac mese nac men ne grieeo guna. <sup>8</sup>Sinque to, zeene laa Espiritu Sant gneedz guielbiini lo to, hor co laa to ygaa poder ne rap me, laa to csilo gnee lo grë zha Jerusalén cho nac naa; tsie to dib xtan zha Judé, dib xtan zha Samar, ni lo grëragaa miech, tsienee tow.

<sup>9</sup> Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me. <sup>10</sup> Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co; <sup>11</sup> rëb me lo zho:

—¿Pe nacte squitaa quiawi to zhan gbaa? Zigne gon to i nagon zey me gbaa niina, squique guiet me gbaa gal dze ne laa me guiaad stib.

<sup>12</sup> Blozh ga dzigo laa zho wbi guic gui co (lëe Gui Oliv ga). Zhisaque bzë zho laa zho bdziñle Jerusalén, lalse ne rzë zho dze ne rdziiladz

zho lo dziin. <sup>13</sup> Bdziin zho zaatne rběz zho, biep zho len yu ne riaan glaa; sac len yu glaa co ga no zho. Ga rběz Pedr, rběz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelos, ni Judas menlidz Jacob. <sup>14</sup> Grése zho tibaque rcaalsa zho rzodiidznie zho Dios gré zho zha bets Jesús, xniaa me Marí, ni gréaa men wnaa ne nacgré zho.

*Bzo zha ne gun dziin ne psaan Judas*

<sup>15</sup> Tib dze pcaalsa maase tib gayoo gal zho, dzigo guso Pedr bnee me lo zho, rēb me:

<sup>16</sup> —Grése to bets, grése to bzian, golgacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lēē min co pquiaa rey David zeene psiaab Espíritu Santa guic me. <sup>17</sup> Ye Judas gocgza no, ye me nac diidz niun dziin ne nodziun no niina.

<sup>18</sup> 'Ni nligaa laa ne niun me dziin co, lel been me guieintseeb pto me Jesús, ni blozh ga lēēque lo liu ne bziuu dimi ne bdiizh zho me ga, ga güeytobe me bzob guic me lo liu, wbilgash me, nēzrii nēzrec bliaal len me. <sup>19</sup> Min co nace zeene laa gré zha Jerusalén gocnaa, dzigo bleelē zho liu co "Liu Ren".

<sup>20</sup> 'Zigne rneque naa ga —rēb Pedr—, ible lo Xtiidz Dios sca zhobnee; ni lēē min co ga raquiet zaatne znū rnee: Ible ziaandets lidz zho,

ni stib choot gbandraa zaatne bio zho.

Ni rnequew:

Zhaale zha ne guiaa<sup>n</sup>nie dziin ne no niun zho.

<sup>21-22</sup> 'Min co nagon, ible nonguiela so tib zha ne guiaa<sup>n</sup> xlugar Judas, gacgza zho no guioxobne<sup>n</sup> no ne nli brieegan Jesús. Nana sca, lo gré zha ne nacgré no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

<sup>23</sup> Dzigo ble zho tib men ne lē José Barsabás (lēēque me ga rnee zho Just), ni stib men ne lē Matí.

<sup>24</sup> Blozh ga, bnaab zho lo Dios, rēb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha ri<sup>i</sup> racladz luu so <sup>25</sup> gun dziin ne psaan Judas; sac laa Judas zeyle zaatne rieguial Judas.

<sup>26</sup> Blozhse bnaab zho lo Dios, laa grop zha co bio rif. Nacne brieequia men ne lē Matí ga, dzigo dze cotaa laa me gocgza stsiiptib zha poxtl co.

## 2

### *Biaad Espíritu Sant*

<sup>1</sup> Zeene goc gadz zhmal gut Jesús, lēētaque dze co run gré zha Israel lni ne rnee zho Pentecostés. Dze co grése zha ne no xnēz Jesús, laa zho pcaalsa. <sup>2</sup> Laa zho ndxie gré zho, tibaque zeene bio

tib bi nroob zhan gbaa, zig nac zeene rriee tib medox, haxta len̄ yu ne ndxie zho ga pquiab; <sup>3</sup> ni brieequia nzian biini, rluw zig nac ludz miech, tibga tibga biini co bl̄ez guic zho gr̄ese zho. <sup>4</sup> Horco gr̄ese zho pcaania guiel̄biini ne bdeed Esp̄iritu Sant, psilo zho rnee zho gr̄e xtiidz stib miech mīne rsiaabtaa me guic zho.

<sup>5</sup> Len̄ dze co nziandoo gr̄e zha Israel ne no stib ladz bēn bdzīn Jerusalén, gr̄e zha ne bii zienal̄ xley Dios. <sup>6</sup> Laa zeene bio bi co, ye zho no lad gr̄e miech guizhiu ne bdopbe zaatne zob yu co; tib tib zho zeene bin zho laa gr̄e zha ne pcaania guiel̄biini co nonee xtiidz zho, per nli rzee zdoo zho. <sup>7-8</sup> Rlozhd gwi zho rnee zho:

—iPe nli diidz rii! iZha rrieelo rnee gr̄e zha qui xtiidz ne, ni led zha Galilé nac zho? iTib tib ne ndxie ne nu, zhaase zhaase diidz ne rnee ne! <sup>9-10</sup> Nu ndxie gr̄e mēn Part, mēn Media, mēn Elam, mēn Mesopotam, mēn Judé, mēn Capadós, mēn Pont, mēn Asia, mēn Frij, mēn Panfil, mēn Egipt, haxta gr̄e mēn ne ziaad n̄ez África, delant guiedz Ciren; gr̄e mēn Cret, mēn Arab, gr̄e zha Israel ne ziaad n̄ez Roma, gr̄e mēn Roma, zha ne zienal̄ zhiwseed zha Israel.

<sup>11</sup> 'Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui gr̄etaa milagr nroob ne rūn Dios.

<sup>12</sup> Gr̄ese zho per nli rzee zdoo zho, rdzieldraa zho zha gūn zho, rnabdiidzlsa zho rnee zho:

—iBay pe i? iNcuaane gard dzian ne!

<sup>13</sup> Laa nogaa zho rzhidznie, rnee zho:

—Rzudz gr̄e zha qui, gane squi rz̄e xtiidz zho.

### *Bdeed Pedr tib lban*

<sup>14</sup> Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo gr̄e miech ne ndxie ga, r̄eb me lo zho:

—Gr̄ese to, zigtaa zha Jerusaléna, zigtagaa zha ne blanso Jerusalén nuw, gol̄gona gan̄le. <sup>15</sup> No bla to quianee r̄eb to rzuudz no, per led rzuuzd no. Griīn̄paale name blan ngbidz, niicle niaca zha ne riepaa nziu, niacxe goon̄ nale laa zho gzudz. <sup>16</sup> Led rzuuzd no, sinque niina nagon̄ noyac gr̄e mīne bzeet Joel padzeela (tib mēn ne biadteed xtiidz Dios), zeene znu r̄eb me:

<sup>17</sup> Znu rnee Dios:

Zeene wzhile runfalt gal̄ dze co, laa naa cxel̄ zhiEsp̄iritu naa zdoo gr̄ese miech;

gr̄e xingan zhow, gr̄e xind-zoop zhow, laa zho cteed xtidz naa,

gr̄e zha nguieg, nzian gr̄e ncuaane glulo lo zho,

gr̄e mēngol, nzian gr̄e ncuaane glu mcaal̄ lo me.

<sup>18</sup> Len̄ dze co, gr̄ese zha ne nguzobdiidz lo naa,

niicle mguiw, niicle wnaaw  
laa naa cxel zhiEspíritu  
naa zdoo zho,

dzigo grëse zho cteed xtidz  
naa.

<sup>19</sup> Nzian grë ncuaane gzee  
zdoo to glu naa zhan  
gbaa,

scaque lo guidzliu, zan to ren,  
zan to bel, zan to grë  
goxdoo.

<sup>20</sup> Zeene zhile gdziñ dze ne  
guiaad men ne rnabey  
ne,

laa lo ngbidz ycow, laa mää  
gna nizhnie zig rna  
ren.

Dze ne guiaad me ga,  
dze co gac tib dze ne mazdraa  
nroob, tib dze ne maz-  
draa ndzon.

<sup>21</sup> Grëse zha ne dib zdoo gnab  
lo Dios yquia zdoo me  
zho,

grëse zha co scaania me zho.

<sup>22</sup> 'Grëse to, golquiaadiaga  
sca ganle! Led nanwen to  
ganle Dios pxeel Jesús, men  
Nazaret ne biaad lo guidzliu  
rii, Dios bnabey been me grë  
milagr nroob, been me grë  
ncuaane bzee zdoo to; ga blu  
ganle ne nli Dios nacie me.

<sup>23</sup> Laa zeene laa Dios bdeed  
diidz biab me ladznia to (sac  
ible xtiidzle Dios naca, nanle  
me zha nac ne sca ted Jesús),  
laa to bnaaz me, bzobdoo to  
me, bnabey to gut me. Led  
to gon bloo me ladznia grë  
zha ntseeb ne sca psacsi me  
pquaa zho me lo cruz. <sup>24</sup> Per  
bleeban Dios me, psilaa Dios  
me ladznia guielgut; sac lëbd  
guielgut ne lëew gnabey lo  
me.

<sup>25</sup> 'Zeene bzeet David Jesús,  
znu rëb me:

Men ne rnabey naa, ran naa  
tibaque quianap me  
naa;

tibaque zo me cue naa nëz  
derech, ¿pe nac nadien  
ne lega pe gac naa?

<sup>26</sup> Gacxe waa, nley no zdoo  
naa,

niicle ludz naaw, rleya  
roolnie naa me.

Ni gane tibliladz rac naa;

<sup>27</sup> sac nan naa niicle guet naa,  
ib csaand me guiaan naa len  
baa,

ib gdeete me diidz xiñ xpëel  
naa.

Naa nac tib ngundziin lo me,  
ni rleynie me naa.

<sup>28</sup> Me blu lo naa zha grieelo  
ygaa naa guielmban,

ni tib guielbley nroob ne  
ygaa naa zeene laa naa  
gdziñ lo me.

<sup>29</sup> 'Bets, bzian, to ne nac to  
menladz naa, golgona ganle:  
led mine bdete pxozgol ne  
David bnee me nu; sac  
gon, zeene gut me güey zho  
güeyqueets zho me, ni haxta  
lo nadze laa xpaam bii niaa.

<sup>30</sup> Sinque mine bded Jesús ga  
bzeet me, sac gon tib zha ne  
biadteed xtiidz Dios goc me.  
Gocnanle me ne lo xti me  
grieequia Men ne nacle diidz  
ga cxeel Dios, ni men co sob  
gnabey zigne bnabey me; sac  
scale rëb Dios lo me, ni haxta  
bzeet Dios lë Dios parne glu  
ne yquidied me. <sup>31</sup> Dzigo zig  
nac zeene ranle me grëtaa  
mine ted Jesús, nacie bzeet  
me ne ib zreeban Jesús, rëb  
me guiaand xcuerp Jesús  
zaatne rbëz grëraa men-  
gut, niicle xiñdgaaw.

<sup>32</sup> 'Jesús ga gon bzeet me, sac zig nac Jesús grop lo no bdion no bleeban Dios me, <sup>33</sup> ni niina gbaa zob me cue Dios nēz derech, sac me nac men rnabey. Ni zigne nacle xtiidz Dios men ne nac Pxoze me, laa me pxeel Espíritu Sant lo no; ni niina grēse ncuane noyan tow, grēse ncuane noyongaa tow, xtsiin Espíritu Santow. <sup>34</sup> Laa naa rbire rne lo to stib ganle, led mine bdetē David ga bzeet David; sac gon, zeene gut David güeysobd David gbaa. Davitaque goc zha ne znu rēb:

Rēb Dios lo men ndzon ne rnabey naa:

“Cue naa nēz derech, nu bzob,

<sup>35</sup> nieeda lozh gnaz naa grēse zha ne rlēē lo luu, csan naa zho ladznia luu.”

<sup>36</sup> 'Grēse to men wladz, golgona sca ganle: Jesús gon, men ne pquiaa to lo cruz ga, lēē men co nac men ne rnabey. Dios bzo me, ni Dios pxeel me biaad me lo guidzliu.

<sup>37</sup> Zeene bin grē miech ne ndxie ga sca bnee Pedr, biab guielnē zho, psilo zho rnabdiidz zho lo Pedr ni lo grēraa zha ne nacgza Pedr ga, rēb zho:

—Bets, nana, ŷpe nac ncuane dziuun no?

<sup>38</sup> Dzigo rēb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espíritu Sant gacnie to. <sup>39</sup> Sac psanle Jesús diidz ne ible sxeel me

Espíritu Sant gacnie grēse zha ne cuedz me sēēb xnēz me; zigtaa tow, zigtaa xpēēd tow, zigtagaa grēraa menzita.

<sup>40</sup> Nzianraa grē ncuane bzodiidz Pedr lo zho, ni pso me diidz lo zho csaan zho grētaa guielntseeb ne run miech lo guidzliu rii. <sup>41</sup> Lo grē zha ne bzoobdiag grē mine pseed me zho dze co, rgaa zho maase tson mil; blozh ga, grēse zho brobnis, laa zho gocgrē grē zha ne rliladzle Jesús ga.

### *Niowse mban zho*

<sup>42</sup> Grēse zha ne rliladz Jesús ga, dib zdoos zho zienal zho grē mine rseed grē zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gon zho. <sup>43</sup> Grēraa zha ne zo stib lad, rdzieb zho; laa grē zha poxtl co, nzian grē milagr nroob ne run zho.

<sup>44-45</sup> Tipse rnee zho, rdeedlsa zho ncuane rquiin zha ne nacgrē zho; zha ne quianie liu, tel pe grēragaa ncuane quianie zho, haxta rto zhow, dzigo rguiz zho dimi co lo grē zha ne guien pe yquiin.

<sup>46</sup> Gzataa dze rcaalsa zho len yadoo; rlozh ga, rcaalsaque zho lidz grē zha ne nacgrē zho row zho guietxtil zigne psan Jesús diidz ga; ine nley, ine ndooladz rbe zho grē zho rquiin zho guielwagw ne runlo zho, <sup>47</sup> ni rley zho roolnie zho Dios. Grēse miecha, rley zho ran zho sca niowse mban zho; ni zigse zie dzew, scase scase

laa Dios rbedzraa grë zha ne rzëëb xnëz Jesús, laa zho racnzianraa.

### 3

*Biac tib men ne në ni*

<sup>1</sup> Tib dze zig rbixwe ng-bidza, brieë Pedr grop Juan zie zho yadoo nroob ne zob Jerusalén, sac lëë hor co nac horne rie zho yadoo riezodi-idznie zho Dios.

<sup>2</sup> Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëëb yadoo. <sup>3</sup> Laa dze co, zeene gon me laa Pedr grop Juan zieded ga ne laa zho sëëb yadoo, zëëb nia me rnab me gon lo zho. <sup>4</sup> Dze rwi zho lo me, tibaque rëb Pedr:

—Lo no bui.

<sup>5</sup> Dzigo blis lo me bui me lo zho, nan me bod no pe dimi ne gdeed zho lo me. <sup>6</sup> Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaañe grieelese gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

<sup>7</sup> Dzigo bzhen Pedr nia derech me bliso Pedr me, hor cogazh laa grop ni me ga bdaan, <sup>8</sup> laa me psilo bzë. Rley me laa me bzëëb len yadoo gza me zho, lo guielbley co haxta rias me, ni roolnie me Dios.

<sup>9</sup> Grë miech ne no len yadoo, zeene gon zho laa me rzële, ni scataa rley me roolnie me Dios, <sup>10</sup> bzee

zdoo zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

<sup>11</sup> Zeene laa Pedr grop Juan brieë len yadoo nroob co, yeque me nal zhits zho ib rsaand me zho, laa zho bdzin stib nëz cho yadoo co za-atne quia tib nsaap nroob ne rnee zho zhiNsaap Salomón. Nalaque grë miech co, rlozhd gwï zho, rlozhd gzee zdoo zho. <sup>12</sup> Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psëë no me? <sup>13</sup> Golgacnañ ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëë Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz. <sup>14</sup> Bdeete to diidz nlaa men ne nac men ndzon, men ne peet xtold; lel bnaab to blaa tib zha ntseeb ne nzëëb ngutoo. <sup>15</sup> Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdzion no me.

<sup>16</sup> 'Ni niina men ne ran to biac nu, niapse por Jesús biac me; led runbeyle to me



nanle to ganle rzëd me glo. Ne dib zdoo no rliadz no Jesús, gane brieelo bnab no beenguiac Jesús me.

17 'Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to.

18 Laa Dios bneedz diidz been to grë guielntseeb co, sac sca goc grëse mine bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

19 'Doļ nroob ga gon been to, gacxe nana gon waa golsaan xquielntseeb to, golbig lo Dios; zeena csanmbe me to lo xtolto. Me gneedz guielbley lo to stib, 20 ni zbiire cxeel me Jesús lo to stib, guiaadsilaa me to. 21 Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaane none gac, zigne bzeetse grë zha ne pxeel me padzeela, biadteed xtiidz me. 22 Zig nac Moisés bzeet me laa Jesús guiaad, rëb me lo grë pxoz gol ne: "Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me; 23 sac zha ne gond xtiidz me, ib tedsod znitlo zho." 24 Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

25 'Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: "Niapse por tib men ne grieequia lo xtii luu, laa naa gunlay grëse miech ne ndxie gdibdoose lo guidzliu."

26 Ni niina ne laa Dios bleeaban Jesús, gloque lo to pxeel me me, gunlay me to, zeena csaan to xquielntseeb to.

## 4

### *Güeyzo zho zho lo wxtis*

1 Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé. 2-3 Zigne bdziñ zho bnaaz zho Pedr grop Juan, güeysëeb zho zho ladzguiib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeaban Dios Jesús; ni rnee zho grëse mengut, scaque grieeban zho.

4 Niicle ne scataa rlëe grë zha rnabey co, per nzian zha ne ndxie ga bliladz Jesús; zig gaay mil rgaa loxaque zha bgui.

5 Zeene biini liu co, grëse zha non, grëse zha ne rnabey lo menguedz, laa zho pcaalsa. 6 Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey

ga. <sup>7</sup> Dzigo bnabey zho go-credz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho pxeel to ne squi no to?

<sup>8</sup> Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz. <sup>9</sup> Telne mine rlisqui to nac ne dien zha bdziun no men rii ne laa ni me biac, <sup>10</sup> golsiguel golquiaadiaga ganle, zeena gacnan tow ni gacnan grëragaa menguedza.

Jesús gon, men Nazaret ne bnabey to gut lo cruz ga, men ne bleeban Dios ga, men co beenguiac men rii; ni laa to ranгаа me laa me zo lo ne nu. <sup>11</sup> Lëë Jesús ga raquiet lo Xtiidz Dios zaatne znu rnee: “Quie ne psëeb zha ne nozaa yu, ni nand zho lëëpaa quie co nac mine rnazdziits yu.” Ni scapaa nagon bzhaac to me.

<sup>12</sup> Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

<sup>13</sup> Zeene gon grë zha wx-tis co, scataa peet dzeb nod lo Pedr grop Juan, bzee zdoz zho; sac runbey zho Pedr, runbey zho Juan, nacd zho cho zha ne güey wseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

<sup>14</sup> Peet brielod nlisqui grë zha co, sac nligaa laa men ne biac ga zo lo zho ga. <sup>15</sup> Dzigo mazd bnabey zho brie Pedr

ley grop me Juan; laa zho biaan bzodiidz zho dien zha gon zho zho, <sup>16</sup> sac rien zho tib milagr nroob ga sca biac ni men co; niicle ne racladz zho yqueets zhow, per grële menguedz bina. <sup>17</sup> Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

<sup>18</sup> Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

<sup>19</sup> Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziun no mine rnabey Dios, lel mine rnee to i dziun no? <sup>20</sup> Grielod gon dziun no mine rnee to i, sac grëse ncuaane bdzion no, grëse ncuaane bdziongaa no ib none gnee now, zeena gacnan grëse miecha.

<sup>21</sup> Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdetew didz nsacsi zho zho, sac ndal miech ne rleynie Dios, rdeed zho xquizh lo me ne been me milagr <sup>22</sup> beenguiac me men co, ni choole iz rac sca gacd së me.

### *Bnab zho lo Dios*

<sup>23</sup> Zeene laa Pedr grop Juan bdzin lo grë zha ne nacgrë zho, bzodiidz zho grëse tel zha rëb grë zha rnabey co,

zha rëb pxoz non co. <sup>24</sup> Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëtaa ncuaane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaane no. <sup>25</sup> Padzeela zeene bdeed Espíritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacne squitaa rac grë miech ne nacd zha Israel rlëenie zho Dios? Racladz zho gun zho ncuaane ni grieelod lo zho.

<sup>26</sup> Grëse zha non ne rnabey grë guiedz,

tipse rac zho laa zho rantseeb lo Dios rlëenie zho me,

ni rlëenie zho men ne bzooblo me pxeel me lo guidzliu.

<sup>27</sup> Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnediidz zho psacsi zho Jesús, men ndzon ne bzooblo luu pxeel luu biaadgun xtsiin luu lo guidzliu nu. <sup>28</sup> Grëse zigne psanle luu diidz, scase been zho. <sup>29</sup> Ni scaque nina, bui ganle zha racladz zho ctseb zho no parne peet gneedraa no; luu nac men ne gocnieu no ne nac no zha ne rdziuuu xtsiin luu, zeena gdzieebd no cseed no miech xtiidz luu. <sup>30</sup> Laa no rnab lo luu, beenguiac grë men rzanë, been grë milagr nroob,

blu grë ncuaane gzee zdo miech; zeena gan zho ganle men nroob, men ndzon nac Xpëed luu Jesús.

<sup>31</sup> Zeene blozh bzodiidznie zho Dios, masaque bzhidz zatne ndxie zho ga; hor co grëse zho laa zho bgaaraa guielbiini ne bdeed Espíritu Sant lo zho; peet rdziebdraa zho laa zho zieseed miech Xtiidz Dios.

<sup>32</sup> Len dze co, grëse zha ne riladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuaane rap zho; sinque grëse ncuaane quianie zho chen grë zho naca. <sup>33</sup> Grë zha poxtl co, zeene rseed zho miech zha brieegan Jesús, nzian zha ne riladz me; rlupaa ne Dios nacie zho.

<sup>34-35</sup> Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow dzigo rdeed zho dimi co rguiz grë zha poxtla lo zha ne rquiina. <sup>36</sup> Sca been tib men ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdo miech.) <sup>37</sup> Pto me tib lë liun me, dzigo bdeed me dimi co lo zha poxtl, bdiiz zhow.

## 5

*Znu bzhaac Ananí grop Safir*

1-2 Tib mguí lë Ananí, laa tsiel me lë Safir; ye me pto tib lë liun me. Gonlo tsiel me, tel palal dimi ne bdo liu co, bzhenga me zhisa. Zeene laa me ziesan mine biaan ga, lo poxtl, rëb me lëë grë dimi ne bdo liun me ga. <sup>3</sup> Dzigo rëbcha Pedr lo me:

—Ananí, ¿pe nacne bdeed luu diidz bzëëb mendox zdo luu? Mendox i gon noquiil luu nan luu yquidiee luu Espiritu Sant, rnee luu lëë grë dimi ne bdo liun luu nu. <sup>4</sup> Bien ganle chen luu liu co. Dimi ne bdiizh zhow, chen luuw, niac niun luuw zigne niacldztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

<sup>5</sup> Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho. <sup>6</sup> Dzigo güey bla zha nguieg pchel zho ngutoo co lar, blis zho me ga laa zho ziequeets me.

<sup>7</sup> Wdzeelaaque goca zeene laa tsiel me bdzin, ni lalnu güeynied guic me ne laa tsiel me gutle. <sup>8</sup> Bnabdiidzaque Pedr lo me, rëb Pedr:

—Bnë dien, ¿pe nli lëë grë dimi ne bdo liun to nu?

Pquiab wnaa co, rëb me:

—Nliw, lalgui pto now.

<sup>9</sup> —¿Pa brieer pensar qui lo to grop tsiel to? —rëb Pedr—. Ne squi tipse bnee to nan to yquidie to Espiritu Sant; dol nroob i gon been to lo Dios. Laa zha ne güeyqueets tsiel luu blansole ro yu nu,

ni niina gon laa zho güeyaque luu.

<sup>10</sup> Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëëb len yu, laa me nixle ga; gon zho gutle me, dzigo blis zho me güey zho güeyqueets zho me cue xpa tsiel me. <sup>11</sup> Grëse zha ne gon sca goc men co grop me, zha ne bingaaw, zigtaa zha ne rliladz Jesús a zigtagaa grëraa miecha, per nli bdzieb zho.

<sup>12</sup> Grë zha poxtl co, tibaque rcaalsa zho tib lo nsaap ne quia cho yadoo ga rnee zho zhiNsaap Salomón; nzian grë milagr ne rdeed Dios diidz run zho. <sup>13</sup> Grëse miech ne rcaalsa ga, rleynie zho grë zha poxtl co, nzian zho rliladz mine rseed zho, per rbigd zho gagrë zho zho.

<sup>14</sup> Zigse zie dze, scase ractalraa miech ne rzëëb xnëz Jesús, mguisaque wnaasaque laa zho rliladz me dib zdo zho. <sup>15</sup> Zhoob diidz scataa milagr ne run grë zha poxtl co. Dzigo psilo miech rbee zho grë men rzacnë, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimlëse Pedr guiab lad grë men co zeene laa Pedr ted. <sup>16</sup> Haxta grë guiedz win ne ndxie gax Jerusalén ga, rrieer grë miech rdzinne zho grë men rzacnë, no grë men co noguitnie mendox; grëse zho runguiac zha poxtl co zho.

*Bio grë zha poxtl ladzguiib*

17 Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëë zho, 18 bnabey zho bgaa zho psëëb zho zho ladzguiib stib. 19 Pcow liu co, guieela bdziñ tib xanjl Dios pxal me ro ladzguiib, blee me zho ga; dzigo rëb me lo zho:

20 —Goltsie len yadoo, grëse miech ne ndxie ga golnee lo zho, zeena gacnan zho zha ygaa zho guielmban ndzon ne nodeed Dios niina.

21 Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo menquiedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib. 22 Bdziñ zho ro ladzguiib, ni tib choot guiend leen co; rzhitsaque wbire zho güeynie zho diidz, 23 rëb zho:

—iChoot guiend len ladzguiib! Dziits nioga bdziñ no, ga zo zha ne quianap; per zeene bzhial ro ladzguiib bziaab no, bdzion no choot guiend leen co.

24 Grë pxoz ne rnabey, ni men ne zo lo menquuib ne rquianap yadoo, zeene bin zhow, rdzieldraa zho zha gun zho. 25 Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

26 Lëëled brieen men ne zo lo grë menquuib ne rquianap yadoo, brieenie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho. 27 Zeene bdzinne zho zho lo grë zha wxtis co, dzigo rëb men ne nac pxoz nroob ga lo zho:

28 —iPe nacie ronde to didz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoj to no ne no bdziuut me.

29 Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no. 30 Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz. 31 Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo doj. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

32 Mine rnee no lo to nu didzliw, nozhal bdziona, ni led loxaque nodsegaa; sinque ye Espíritu Sant men ne rxeel Dios racnieñ grë zha ne ron xtiidz me, ye men co quianee ganle ne nliw.

<sup>33</sup> Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

<sup>34</sup> Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menquiedz; dzigo guso me bnabey me brieegre zha poxtl co nëz ley, <sup>35</sup> bnee me lo grëraa zha ne ndxie ga, rëb me:

—Grëse to menquiedz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho. <sup>36</sup> Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga. <sup>37</sup> Laa len iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me. <sup>38</sup> Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdziñ dze ne nitlow. <sup>39</sup> Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho. ¡Telne guiab to gnitlo tow, nande to nend Dios ga tilnie to!

<sup>40</sup> Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

<sup>41</sup> Zeene laa zho wbiga, rley zho por grëtaa mine pteed grë zha non co zho loxaque ne riladz zho Jesús. <sup>42</sup> Ib psand zho zhiwseed Jesús, gzobse dze rie zho yadoo ni rieuque zho stib yu stib yu, rnee zho lo miech ne nli lëe Men ne zëëble diidz cxeel Dios lo guidzliu ga nac Jesús.

## 6

*Bzo gadz zha ne gun xyudar poxtl*

<sup>1</sup> Ni ne len dze co quiayac nzianraa miech ne rzëëb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaane row zho, rgaad zho lal mine rgaagrë wnaa viud ne nac zha Israel.

<sup>2</sup> Dzigo nacne bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaane yquiin to, sac gon nonguielda csaan no mine nac xtsiin no, ib none guioseedraa no miech Xtiidz Dios. <sup>3</sup> Min co nagon, mazd golzo gadz zha bgui ne gun dziin co,

lëëraasi golguieñ cho gzo to; golguib zha ne ndzinli, zha ne nixbiini, zha ne nacie Espíritu Sant; <sup>4</sup> zeena sca guioob lo no gzodiidznie no Dios, gnab no lo me, ni cseed no grëraa miech Xtiidz me.

<sup>5</sup> Grëse zho rëb, wen sca gaca. Horcogazh psilo zho ble zho zha ne so guñ dziin co. Bzo zho tib meñ lë Lip, tib meñ lë Prócoro, tib meñ lë Nicanor, tib meñ lë Timon, tib meñ lë Parmen, tib meñ lë Xteb, rlpuaa dib zdo me riladz me Dios ni nacie Espíritu Sant me; ni tib meñ Antioquí lë Nic, mazd glo Nic goc tib zha ne bleyniedox grë zhiwseed zha Israel. <sup>6</sup> Dzigo güeynie zho gza zha co lo zha ne nac poxtl. Blozhse bnab poxtl lo Dios gacnieñ me zho, dzigo pxobnia poxtl guic zho, bnab zho lo Dios gdeed me guieñbiini lo zho.

<sup>7</sup> Zigse zie dze, laa Xtiidz Dios quiagaazraa dib Jerusalén. Nzian grë zha ne rzëeb xnëz Jesús, haxta grë meñ ne nac pxoz, nzian zho laa zho bliladz me dib zdo zho.

### *Bnaaz zho Xteb*

<sup>8</sup> Goc palal dzew, nzian grë milagr nroob ne run Xteb, sac tibaque sca dib zdo me riladz me Jesús, ni nacie Espíritu Sant me.

<sup>9</sup> Laa tib dze, brieequia bla zha ne rie tib xyadoo win zha Israel, lë “Esclavos Libértados” gocladz zho ndiidiidznie zho Xteb. Brieequie zla zha Israel ne ziaad nëz Ciren, nëz Alejandrí, nëz Cilis, ni nëz

Asia, ye zho gocgza zha co rlëe zho lo Xteb. <sup>10</sup> Gonse zho rlëbd xtiidz zho lo Xteb, sac niapse Espíritu Sant rdeed guieñbiini lo me, rien me pe rnee me lo zho; <sup>11</sup> dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

<sup>12</sup> Zeene bin menguedza, blëe zho; nacne bnabeyaue zha ne rnabey lo menguedz bgaa Xteb güeyzo zho me lo wxtis. <sup>13</sup> Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne.

<sup>14</sup> Bdzionpaa no gon quianee me laa Jesús meñ Nazaret ne quiazeet zho dib i ctsil yadoo rii, ni ctsëe me ley ne psan Moisés lo xmengol ne.

<sup>15</sup> Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjl Dios.

## 7

<sup>1</sup> Dzigo bnabdiidz meñ ne nac pxoz nroob ga lo Xteb, rëb me:

—¿Bnë dieñ pe nli quiayun luu grë ncuaane rnee zho i?

<sup>2</sup> —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios <sup>3</sup> griee me ga, csañ

me grē menlidz me, tsie me nēz ne glutaa Dios lo me.

4 'Nacne brieē me xtan zha Caldē ga, bey me nēz Harán, ga wban me zhis. Laa zeēne laa pxoz me gut, dzigo laa Dios biaadnie me nēz rii, zaatne mban ne nu niina. 5 Niicle ne laa me blanso lo liu rii, ni tib lē win zaatne so ni me bdeete Dios lo me; per rēb Dios ib grē zha xpēēd me guiaanniew. jNi laa me quianied mēēd len dze co! 6 Rēbgazh Dios lo me, ib zieban grē zha xpēēd me ga ladz beṇ dipse len tap gayoo iz, ga csacsi miech zho guṇcuṇ zho zho dziin. 7 "Per ib tedsod sacsi naa zha ne csacsi zho ga", rēb Dios, "ni ga greee zho glanso zho nu, nu goolnie zho naa."

8 'Ni parne glu ib zac miṇe bnee Dios lo Abraham ga, dzigo psan me diidz grēse mēēdbgui ne greeequia lo xtii Abraham none tso tib bey lad zho. Miṇ co nagon, zeēne laa xpēēd me Isaac goc xon ngbidz, laa me bloo Isaac bey co. Scaque been Isaac xpēēd me Jacob, ni scaque been Jacob gza tsiipchop zha ne goc xpēēd Jacob; lēē gza tsiipchop zha co nagon goc pxozgol ne.

9 'Ziese pxozgol ne ga, blēēnie zho bets zho zha ne lē José, pto zho José lo men ne zie wto nēz Egipt. Ni ne nacie Dios José, 10 psilaa me José lo grētaa guielnē ne bded José, ni gocien me José beenbey rey Egipt José. Ib psaaand me José, bdeed me guielbiini lo José. Zeēne gon

rey co scataa men nixbiini nac José, dzigo bnabey me bzo José goc me tib men non ne bnabey dipse Egipt; haxta grē ncuaan non ne no lidz rey, me bnabeya. 11 Lēētaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grē zha ne goc pxozgol ne ga, guiendraa pe gow zho. 12 Laa zeēne bin Jacob laa zhobxtil bii no Egipt, dzigo pxeel me zho güeyxi zho zhob ga.

13 'Zeēne goc chop vult ziexi zho zhob Egipt, dzig- oraa gocnan zho bets zho ga rnabey Egipt; niiclegaa rey cow, hor coraa beenbey me bets José. 14 Dzigo bnabey José güeyxi zho pxoz me Canaán, güeyxi zho tsiel zho, güeyxi zho xpēēd zho. Lo grē zho rgaa zho tsongal tsiin, laa zho bdzin Egipt.

15-16 'Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhi Abraham lo Hamor; scaque grē xpēēd me zha ne goc pxozgol ne ga, ga gut zho. 17 Grē zha ne brieequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeēne ziaadyob cuee Dios zho ga zigne rēble me lo Abraham glo, 18 laa men ne nac rey Egipt len dze co, psilo pt- sidil zho; sac rsoladzdraa me grētaa dziin ne been José lo menladz me. 19 Psacsi me zho, been me zho zigne gocladz- ta me, haxta bnabey me



grëse mēēdbgui ne ral gan<sub>dr</sub>aa zho win parne guet win.

20 'Le<sub>n</sub> dze copaa nagon gol Moisés, tib mēēd niow nac win. Tso<sub>n</sub> mēē bloodan xniaa win win, 21 laa ze<sub>n</sub>e brieelodraa ngolan me win, dzigo güeysa<sub>n</sub> me win tib ro guiubee Egipt, ga bdziel tib xindzoop rey win. Wnaa co go<sub>n</sub> win, biaan win lo me zig tib xpēēd me; 22 haxta bioxco me grëse wseed ne rac zha Egipt, pseed win. Ze<sub>n</sub>e laa win broob, tib me<sub>n</sub> nixbiini goc win, niicle ne gnee wina, niicle ncuaa<sub>n</sub>e gun<sub>g</sub>aa wina.

23 'Choo iz rap Moisés, ze<sub>n</sub>e biab guic me güeyted me lo men<sub>l</sub>adz me. 24 Dziggo go<sub>n</sub> me laa tib zha Egipt quiagu<sub>n</sub> tib zha Israel; nacle bzēēbaque me bla me zho, beet me zha Egipt co.

25 'Sca been Moisés, na<sub>n</sub> me niē<sub>n</sub> grē zha Israel ne Dios bzo me gacnie me zho, csilaa Dios zho ladznia zha Egipt; per biē<sub>n</sub>d zho ne scaw. 26 Biini liu co, go<sub>n</sub> me laa chop zha Israel nodi<sub>l</sub>, zie me nla me lo xti<sub>l</sub> zho, bnee me lo zho nonguiē<sub>l</sub>d ga ti<sub>l</sub> zho, guie<sub>n</sub> zho gan<sub>l</sub>e men<sub>l</sub>adzaque zho. 27 Dziggo biasaque tib zha ne noquiaaw ga pcheep zho me, ntseeb rac zho rēb zho lo me: "¿Cho bzo luu guiaadnabey luu no, guiaadlisquigaa luu dien pe nodziuu<sub>n</sub> no? 28 ¿Te racladz luu ye gutaque luu no zigne beet luu zha Egipt co nieeg?"

29 'Ze<sub>n</sub>e bin Moisés sca rēb zha co, hōr co bzhoon me bey me nēz xtan zha Madián. Nēz

co ptsieelnia me, ga gop tsieel me chop mēēdbgui.

30 'Choo iz goc no me nēz xtan zha Madián, tib dze no me cho gui Sinaí, tibaque ze<sub>n</sub>e go<sub>n</sub> me laa tib anj<sub>l</sub> zo gro<sub>l</sub>taa tib lo yag zarz, masaque rso bel lo yag co. 31 Bzee zdoo me, lēētaque laa me zie gbiggax me, ze<sub>n</sub>e bin me tsi Dios rēb Dios lo me: 32 "Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Ze<sub>n</sub>e bin Moisés tsi Dios, per nli bdieb me; lo dzeb co per ni blisdraa me lo me nwi me. 33 Dziggo bnee Dios stib, rēb me lo me: "Blit lab luu, sac gax lo naa i zo luu. 34 Laa dze nagon bdi<sub>n</sub> ne laa naa csilaa grē zha Israel ladznia zha Egipt; sac ra<sub>n</sub> naa zha nactaa grē guiē<sub>l</sub>nē ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

35 'Dziggo laa Dios pxeē<sub>l</sub> Moisés ziesilaa me zha Israel; niicle ne glo rēb zho lo me: "¿Cho bzo luu guiaadnabey luu no, guiaadlisquigaa luu dien pe nodziuu<sub>n</sub> no?" Per me bzo Dios bnabey lo zho, blee me zho Egipt.

36 'Nzian grē milagr, nzian grē ncuaa<sub>n</sub>e nroob ne gzee zdoo ne been Moisés blee me zho ga; zigtaa le<sub>n</sub> guiedz Egiptow, zigtaa lo Nisdoos Nizhniew, zigtagaa grē dan bidz ne bio zho dipse le<sub>n</sub> choo iz ne bzēnie me zho ga.

37 'Moisés ga bzeet lo pxozgol ne, ne laa Dios gnabey lo xtiique zho grieequia tib me<sub>n</sub>

ne cxeel me guiadteed xtiidz me, zigne pxeel me Moisés.

<sup>38</sup> Zeene nonie Moisés zho grē dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban. <sup>39</sup> Per ib bind zho xtiidz me, lel gocladz zho mbiire ney zho Egipt stib, <sup>40</sup> bnabey zho Aarón rēb zho: “Bzaa tib mdio tedner lo no gacniēn no laa no guioo Egipt stib; sac loxaque biadbee Moisés no ga, na choot nañ dien yo Moisés.”

<sup>41</sup> 'Dzigo bzaa zho tib ngon yeñ goc zhimdio zho, haxta beet zho grē ma ne bloogon zho lo mdio co; bleynie zho ncuaane bzaania zho. <sup>42</sup> Nacne wbinladz Dios, psaan me zho; psilo zho bleynie zho grē ncuaane ran zho zhan gbaa. Been zho zigne bzeetse zha ne biadteed xtiidz me padzeela, zeene rēb zho:

Golsoladz ganle,

laa ne nleynie to naa dipse  
len choo iz ne bio to grē  
dan bidz co,

laa ne niut ma ne ngogon to lo  
naa,

<sup>43</sup> lel grē mdio ne bzaa to,  
mdio co bleynie to, lo  
mdio co pquitsgzhib  
to.

Mdio ne rnee to Moloc,  
zaatne zieetaa to tibaque ney  
to lidza,

zhmel mdio ne rnee to  
Renfán, pa csaan to  
ma.

Mincoxe waa, laa naa cuee to  
ladz to,

gzonēz naa to guey to grē  
dan ne riaan zitraa lo  
guedz Babiloin.

<sup>44</sup> Len dze ne sca bio px-  
ozgol ne grē dan bidz co, tib  
yu larse goc xyadoo zho, ga  
biotsow quie ne quia xley  
Dios. Dioszhal blu lo Moisés  
zha tsaa yu co. <sup>45</sup> Goc bla  
iza, zeene blozh bnitlo Dios  
grē guiedz ne brin nu glo,  
laa Josué blansonieque yu co.  
Haxta len dze ne goc David  
rey, bii lēew nac xyadoo zho.

<sup>46</sup> 'David goc tib rey ne  
gocnziuu lo Dios, bleynie  
Dios me, dzigo gocladz me  
nzaa me tib yadoo nroob  
zaatne mbēzlo zho Dios.  
<sup>47</sup> Per brieelod nzaa mew, Sa-  
lomónraa goc rey ne bzaaw.  
<sup>48</sup> Nli laa yadoo co biaa, per  
tel Dios, men nroob nac me,  
led yed me cuēz len grē yu  
ne rzaa miech. <sup>49</sup> Zigne  
zhobneeque lo Xtiidz me,  
zeene znu rēb me:  
Gbaa nac zaatne zoob naa,  
laa lo guidzliu nac zaatne rzo  
ni naa.

¿Zha nadien nac yu ne nañ to  
gzaa to cuēz naa?

¿Pa nadien guiab to gzaa to  
zaatne gdziiladz naa?

<sup>50</sup> ¿Niacxe led naad bzaa  
gbaa?, ¿niacxe led naad  
bzaa guidzliu?

<sup>51</sup> 'Golgon sca ganle —rēb  
Xteb—, zigne beenaque grē  
pxozgol to ga padzeela,  
scadaaque gon quiaayun to  
niina. Miech nad, miech  
ntseeb zdoo nac to; ib ronde  
to mine rnee Espiritu Sant.  
<sup>52</sup> Tel pxozgol to, nēlte gonze  
zho grē zha ne pxeel Dios  
biadnee xtiidz me; haxta

beet zho grë zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil to me, bnabey to bgaa me beet to me. <sup>53</sup> Tibaque squi quia to quiaguuits to Xley Dios; xanjlpaa me biaadsana lo to, ni runde to mine rnabeya.

### *Beet zho Xteb*

<sup>54</sup> Zeene bin zho sca rëb Xteb, blëeye zho haxta rowye ro zho rwi zho lo me. <sup>55</sup> Laa me, ne nacie Espiritu Sant me, zeene blis lo me bui me nëz gbaa, gon me lo guielndzon ne no Dios, gonpaa me laa Jesús zo cue Dios nëz derech. <sup>56</sup> Dzigo bnee me, rëb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

<sup>57</sup> Mine been zho ptse zho diag zho, ni nguiedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz. <sup>58</sup> Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

<sup>59</sup> Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespíritu naa.

<sup>60</sup> Dzigo pquitsgzhib me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiayun

miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

## 8

<sup>1-2</sup> Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnë me.

Len dze co, psilo zha ne sca rlëenie zha ne rliladz Jesús, ptsidil zho grëse zha ne rliladz me; dipse len guiedz Jerusalén pquianał zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacle poxtl biaan Jerusalén. <sup>3</sup> Ntseeb rac Saul, rzac me tebaa zha gnitlogazh me grëse zha ne rliladz Jesús. Stib yu stib yu zie me, riebezho me zho lidz zho, mgui wnaasaque rey me riesëëb me zho ladzguiib.

### *Bdziin Xtiidz Jesús nëz Samar*

<sup>4</sup> Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech. <sup>5</sup> Zig nac Lip, zeene bdziin me tib guiedz nëz Samar, psilo me bnee me Xtiidz Jesús lo grë miech co.

<sup>6</sup> Ndal zho rquiaadiag mine rnee me, rzee zdoo zho ran zho grëtaa milagr ne run me.

<sup>7</sup> Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo,

grë zha ne nde ni, runguiac me zho. <sup>8</sup> Grëse miech ne no guiedz co, rley zho.

<sup>9-11</sup> Ga no tib men ne rool diidz dox, lë Simón. Ye me rzee zdoo miech grë ncuane run me. Nzianle iz sca noquidie me zho, grëse men guiedz runbey me, haxta niats rac me rnee me guiendraa cho zig me. Grëse zho, haxta grë zha non rbig lo me, rzac zho lëë poder ne rap Dios ga nacie me.

<sup>12</sup> Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis. <sup>13</sup> Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nał me zhits Lip, rzee zdoo me ran me grëtaa milagr nroob ne run Dios.

<sup>14</sup> Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co. <sup>15</sup> Laa zho zie gnab zho lo Dios ygaa grë zha ne bliladzle Jesús ga guielbiini chen Espíritu Sant; <sup>16</sup> sac zeene bliladz zho Jesús, loxaque brobnisse zho, gard ygaa zho guielbiini co. <sup>17</sup> Bdziñ zho pxobnia zho guic grë men co, bnaab zho lo Dios; dzigo grëse men co laa me bgaa guielbiini ne rdeed Espíritu Sant.

<sup>18</sup> Zeene gon men ne lë Simón ga, ne loxaque

rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi, <sup>19</sup> rëb me:

—Golneedz poder qui lo naa; zeena ye naa zha ne cxobniataa naa guic ygaa zho guielbiini ne rdeed Espíritu Sant.

<sup>20</sup> Pquiab Pedr rëb Pedr lo me:

—¡Bien ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i! <sup>21</sup> Ni lalnu rieguiald luu gun luu dziin rii, ni gdzindgaa dze gun luuw; sac mbed zdoo luu, zienied guic luu gun luu mine rnabey Dios. <sup>22</sup> Blee zhgab yozh qui guic luu, bnaab lo Dios zeena togo squia zdoo me luu, gunquizhd me luu dol ne squi bza zdoo luu i; <sup>23</sup> sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

<sup>24</sup> Pquiabse me rëb me:

—Golgun guielnzaac, golnab lo Dios yquia zdoo me naa, zeena ygaad naa grë guielnëdox ne rnee to i.

<sup>25</sup> Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

*Bzodiidznie Lip tib men Etiopí*

<sup>26</sup> Laa Lip no Samar ga, tib dze briequia tib xanjł Dios

lo Lip, rëb me tsie Lip nëz ne rriee Jerusalén zie nëz Gaza.

<sup>27</sup> Dzigo güey Lip nëz co. Tib dan ngana, lëëtaque laa tib men ne nac dziin lo rein ne lë Candás zie ga, dziin nroob nac me lo rein co, sac me ngotsow grëtaa dimi ne no Etiopí. <sup>28</sup> Zobse me tib len carret nroob zie me ga; znu wbirele me Jerusalén güeygan me Dios. Laa me zob leen co quialab me lo Xtiidz Dios mine pquiaa Isá, men ne biadteed xtiidz Dios padzeela.

<sup>29</sup> Dzigo bnabey Espíritu Sant Lip tsie Lip ygaa carret co lo Lip. <sup>30</sup> Zeene bgaa carret co lo Lip, bin Lip pa lo nolab men co; nacne rëbchaa Lip lo me:

—¿Pe rien luu cho raquiet zaatne nolab luu i?

<sup>31</sup> —Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip biep Lip len carret co, güeysob Lip cüe me.

<sup>32</sup> Znu rnee zaatne nolab me ga:

Zigne race mëcwxiiil yeen zeene rnaaz zho ma rut zho ma,

scadaa ndooladz goc me, peet beend me zeene laa zho zienie me.

Ni zigne roptsied ma zeene rtsiib zho ma,

scaque ni tib diidz ptsired me lo zho.

<sup>33</sup> Niicle ne gon zho scataa ndooladz me,

per psacsi zho me.

¡Pa lotaa bdziñ guie!ntseeb ne been grë menladz me!

Sac gon, ptiche zho xquielmban me lo guidzliu.

<sup>34</sup> Dzigo rëbchaa men co lo Lip:

—Bzhiguiel bnë lo naa dien, cho nu znu rzeet Isá lo rii. ¿Pe me bded min rii, te stib zhow ye?

<sup>35</sup> Dzigo rëb Lip lo me Jesús raquiet ga, ni bnee Lip grëraa mine nac zhiwseed Jesús.

<sup>36</sup> Laa zho no nëz, tibaque zeene bdziñ zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguiel pchoobnizgash naa.

<sup>37</sup> [—Zaca —rëb Lip—, totsaque dib zdoo luu rliladz luu Jesús.

—Rliladz naa me —rëb men co—, rliladz naa ne nli Xpëed Dios nac me.]

<sup>38</sup> Dzigo bnabey me blëz carret co ga. Biet me leen co grop me Lip bzëeb zho lo nis co, ga pchoobnis Lip me. <sup>39</sup> Blozhse ga, laa Espíritu Sant blis Lip gondraa me Lip; per rley me laa me bio nëz stib, laa me zie.

<sup>40</sup> Zeene laa Lip brieequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdziñ me guiedz Cesarea.

## 9

### *Gon Saul Jesús*

<sup>1</sup> Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rliladz Jesús.

Güey me lo meñ ne nac pxoz nroob, <sup>2</sup> bdeed pxoz co ti xtiidz me guey lo grē zha ne zo lo xyadoo zho nēz Damasc, parne gacnie zho Saul gnaaz zho grēse zha ne rliladz Jesús; zha ne ygaataa niicle mguiw niicle wnaaw, gzobdoo zho zho tsiesan zho ladzguiib Jerusalén.

<sup>3</sup> Laa Saul bio nēz, laa Saul zie. Zhile gdziñ me guiedz Damasc, tibaque zeene brieequia ti biinidoo zhan gbaa biab zaatne zie me ga. Grołtaa lo biinidoo co biaan me, biabgazh me liu. <sup>4</sup> Liu nix me, bin me zēēb ti tsi meñ co rnee lo me:

—Saul, Saul, ¿pe nacne quianał luu naa?

<sup>5</sup> —Been guielnzaac —rēb me—, bnē dien cho luu.

Dzigo pquiab meñ co, rēb me:

—Naa nac Jesús meñ ne squi quiatsidil luu. [Lēēque luu gon nosacsi luu i, rzac luu zigne rzac ngon ne rcaanni, ni lēēque lo guuib lots ne rtseb zho ma riecaanni ma.

<sup>6</sup> Rdzieb Saul, rzhidz me lo dzeb co rēb me:

—Bzhiguiel bnē dien, ¿pe racladz luu gun naa niina?]

Rēbchaa Jesús lo me:

—Guche i, güey Damasc, ga gnē zho ganle pe nac mine no gun luu.

<sup>7</sup> Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zēēb, per choot rand zho.

<sup>8</sup> Laa Saul guche ga. Zeene laa me pxal lo me gwi me randraa me, jlaa lo me pcowle!

Zha ne ziegzale me ga bzhen nia me bdziñ me Damasc. <sup>9</sup> Tson dze sca brieelod nian me, gzase dze co dowd me, niicle peet god me.

<sup>10</sup> Guiedz Damasc ga, ga no ti mgui ne rliladz Jesús lē Ananí; dzigo gon me Jesús, bredz Jesús me. Pquiab me, <sup>11</sup> dzigo rēbchaa Jesús lo me:

—Güey nēz ne lē Derech, zaatne nac lidz ti mgui lē Judas; ga bnabdiidz meñ Tars ne lē Saul. Zeene quiazodiidznie me naa, <sup>12</sup> blu naa lo me laa tib zha lē Ananí bdziñ rxobnia guic me, zeena gbiire gan me stib.

<sup>13</sup> Pquiab Ananí rēb Ananí:

—¿Saul ye? Ziyon naa name zha nac grētaa ncuaañe noyun me Jerusalén, notsidil me grē zha ne rliladz luu.

<sup>14</sup> Haxta pxoz nroob ne rnabey bdeed diidzbey gnaaz me grēse zha ne no nēz rii.

<sup>15</sup> —Güey —rēb Jesús lo Ananí—, sac laa naa bzooblole me, ib me tsie grē guiedz zit tsieseed me miech xtidz naa, me gneew lo grē zha rnabey, ni lo grēgaa zha Israel. <sup>16</sup> Na naa glu lo me ganle zha nac grē guielnē ne gan me, zeene laa me quiaayunle xtsiñ naa.

<sup>17</sup> Dzigoraa güey Ananí zaatne no Saul ga. Bdziñ me, pxobnia me guic Saul, rēb me lo Saul:

—Saul, bina ganle bets, laa Jesús gon, meñ ne rnabey, meñ ne brieequia lo luu zeene ziaad luu nēz ga, laa me pxeel naa zial naa nu; zeena gnab naa lo me gunguiac me

bziaalo luu, ni ycaania luu guielbiini ne rneedz Espiritu Sant.

<sup>18</sup> Zigne sca bnee Ananí, laa lo Saul biacgazh; lega zigne nac xmed mel nac grē ncuaañ co brieë lo me. Horcogazh laa me brobnis. <sup>19</sup> Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grē zha ne rliladz Jesús Damasc ga, dzigo brieë me <sup>20</sup> güey me grē yadoo win ne no ga, rnee me lo grē miech co cho nac Jesús, rnee me lo zho ne nli Xpēed Dios nac Jesús.

<sup>21</sup> Rzee zdoo grēse miech co rañ zho sca rnee me, rneechaa zho:

—¿Led lēë meñ qui ga name scataa ntseeb rac Jerusalén, notsidil me grē zha ne rliladz Jesús? Conque nac diidz miñ co ziaad me nu, ziadnaaz me zho tsiesañ me zho lo grē pxoz ne rnabey.

<sup>22</sup> Per zigse zie dze, mazdraa rac Saul tibaque ne rnee me lo grē miech co, lēë meñ ne zēëble diidz cxeel Dios lo guidzliu ga, nac Jesús. Grē zha Israel ne no ga, riendraa zho dieñ pe gililadz zho.

<sup>23</sup> Goc bla dze no me ga, laa grē zha Israel ne no ga blēë lo me; bnediudz zho rēb zho laa zho gut me. <sup>24</sup> Dze guieel riesobnap zho gzaase zaatne rap biedz nroob ne ndze igo guiedz co nēz, riequiambēz zho ted me, gut zho me. Per gocnañ mew, <sup>25</sup> nacne goł ti pcow liu pcaalsa grē zha ne bliladz miñe bnee me, bloo

zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brieë me ga.

### *Bdzin Saul Jerusalén*

<sup>26</sup> Zeene bdzin Saul Jerusalén gocladz me ndzin me lo grē zha ne rliladz Jesús ga, per leł bdzieb zho zeene gon zho me, sac rliladz zho ne nli yelee me bzēëb xnēz Jesús. <sup>27</sup> Dzigo güeynie Bernabé me lo grē zha ne nac poxtl, bzodiidz Bernabé lo zho zha gon me Jesús zeene no me nēz zie me Damasc, zha rēb Jesús lo me; ni zha bdziebd me bnee me lo grē miech cho nac Jesús, len dze ne blēz me Damasc.

<sup>28</sup> Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

<sup>29</sup> Brieequia bla zha Israel ne rnee xtiidz zha Gres bdildiidznie zho me. Zhisaque goca, laa zho gocladz niut zho me. <sup>30</sup> Zeene gocnañ grē zha ne rliladz Jesús gaw, dzigo güeysañ zho me guiedz Cesarea; ga brieë me laa me zie nēz Tars, zaatne nac ladz me.

<sup>31</sup> Len dze co, grēse miech ne no xnēz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guielxtseeb nodraa zho; zigse zie dze rigucraa zho zha nac Xtiidz Dios. Grēse zho rioxco zho mban zho zigne rnabey me, tibaque nacnie Espiritu Sant zho. Ni scagaa, zigse zie dze

ndal grë miech ne rzëëbraa rcaania Xtiidz Dios.

*Rieted Pedr lo grë zha ne rililadz Jesús*

<sup>32</sup> Len ngbidz coque, zie ziaad Pedr rieted me lo grëse zha ne rililadz Jesús. Nacne güeyted me lo grë zha ne no Lida. <sup>33</sup> Guiedz co, beenbey me ti mgui lë Ené, gocle xon iz nix mgui co, ib gacd së me sac dipse me gutoo. <sup>34</sup> Dzigo rëbchaa Pedr lo me:

—jEné, niinagazh gon laa Jesús gunguiac luu! Na zeen guche i blis xta luu.

Zigne sca bnee Pedr laa men co biac, laa me guche ga. <sup>35</sup> Grëse men Lida, grëse men Sarón zeene gon zho sca biac men co, grëse zho bliladz Jesús.

<sup>36</sup> Gaxaque Lida riaan ti guiedz lë Jop. Jop ga no ti wnaa ne rililadz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, run me xyudar zho.

<sup>37</sup> Lega nacle blanguidz me, laa me gut.

Zha ne rililadz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho, <sup>38</sup> zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

<sup>39</sup> Zigne bdzinie zha co diidz, zienalgazh Pedr zhits zho. Bdzin zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe

zho lo Pedr, roon zho rlu zho grë lar ne bdib me. <sup>40</sup> Dzigo bnabey Pedr brieë zho ley grëse zho, laa me biaan ga, pquitsgzhib me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhal, zeene gon me laa Pedr zo ga, laa me bzobli. <sup>41</sup> Bzhen Pedr nia me, bliso Pedr me, dzigo bredz Pedr grë zha ne rililadz Jesús ga, ni grë wnaa viud co; gon zho laa me brieëbanle.

<sup>42</sup> Dipse lad guiedz co bzhoob diidz sca brieëban wnaa co; grë zha ne bina, ndal zho bliladz Jesús dib zdoo zho.

<sup>43</sup> Nzianlaa dze biaan Pedr ga, blëz me lidz Simón ti men ne rcuudz grë guid ma.

## 10

*Güeyzodiidznie Pedr Cornel*

<sup>1</sup> Guiedz Cesarea, ga no ti men lë Cornel, rnabey me lo ti partid mennguiib lë partid Italian. <sup>2</sup> Zigtaa mew, zigtaa grë menlidz mew, dib zdoo zho rililadz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grë zha ne guiend pe yquiin.

<sup>3</sup> Tib dze, bdzele dzew tibaque zeene gon me laa ti xanjl Dios bdzin zaatne zo me, bredzlë anjl co me. <sup>4</sup> Dze rwi me lo anjl co, rdzieb me laa me pquiab. Dzigo rëbchaa anjl co lo me:



—Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin. <sup>5</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti men ne lë Simón Pedr. <sup>6</sup> Gax zatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.

<sup>7</sup> Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios. <sup>8</sup> Blozhse bzodiidz me lo gza zha co zha bzhaac me, dzigo laa me pxeel zho zixi zho Pedr Jop.

<sup>9-10</sup> Biini liu, zig rwe ngbidza gaxle Jop zie zho. Lëëtaaque hor co laa Pedr biepe nëz glaa guic yu ne rbëz me ga. Rcaabedz me, dzigo laga noyaclo ncuaane gow me laa me biepe guic yu co ziezodiidznie me Dios. <sup>11</sup> Dios nozodiidznie me, tibaque zeene gon me laa ti lar nroob ziad-zëëb zhan gbaa, nzhidoo gzatap nëza laaw bdzin lo me. <sup>12</sup> Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe. <sup>13</sup> Horco bin me ti tsi men co, rëb lo me:

—Pedr, ma ne racladztaa luu gow luu zac gut luu ma.

<sup>14</sup> Pquiab me rëb me:

—iMin cogaa nagon grieelod! Wlaltaa gard gow naa grë ma beed qui.

<sup>15</sup> Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

<sup>16</sup> Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

<sup>17</sup> Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdzin ro yu ne rbëz me ga, <sup>18</sup> rnabdiidz zho me.

<sup>19</sup> Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu. <sup>20</sup> Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

<sup>21</sup> Dzigo laa Pedr biet ga, bdzin me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

<sup>22</sup> Pquiab zho rëb zho:

—Laa no ziaad xmandad Cornel, ti men ne rnabey lo menquiib Cesarea. Laa me pxeel no ziaad-xi no luu, sac ti xanjl Dios rëb lo me cxeel me zha ne guiaad-xi luu tsie luu lidz me, tsienee luu lo me. Ti miech wen nac me, dib zdoo me rliladz me Dios, grëse zha Israel rleynie zho me.

<sup>23</sup> Dzigo bredz Pedr zho bded zho nëz len yu; ga binaan zho wdze co. Biiniraa liu zienie zho me, ye palal zha Jop, zha ne rliladz Jesús zienal zhits me.

<sup>24</sup> Dze ne rac chop ngbidz brie zho Jop, laa zho bdzin Cesarea. Laa Cornel bredzle grë menlidz me, grë zha ne ndzieeldiiz me; ndal

nac zha ne ndxienie me lidz me, quiambëz me Pedr. <sup>25</sup> Zeene laa Pedr bdziñ, brieë me güeydzieelo me Pedr, pquuitsgzhìb me lo Pedr nan me niun me Pedr zigne riegan me Dios. <sup>26</sup> Dzigo bliso Pedr me, rëb Pedr lo me:

—iGuso i, nodne yquuitsgzhìb luu lo naa! Bien ganle samiechaque luu nac naa.

<sup>27</sup> Dzigo laa menğuuiib co guso ga. Nozodiidz zho laa zho bzëëb len yu. Zeene bdziñ zho zaatne ndxie grë miech co, <sup>28</sup> psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieel-sad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gan naa zho. <sup>29</sup> Gacxe waa, zigne gocnan naa laa to rbedz naa, zialnalgazh naa zhits zha ne pxeel to. Nana sca, golenë dien pe nacne bredz to naa.

<sup>30</sup> Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me, <sup>31</sup> në me: “Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquuin. <sup>32</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsixi zho ti

men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.” <sup>33</sup> Sca nagon në men co lo naa, nacne bnabey naa biaad-xi zho luu; ni xquizh-gaa luu ne laa luu ziaad. Dios zobwi ganle, grëse no laa no ndxie nu par yquiaadiag no mine bnabey me luu gnë luu lo no.

<sup>34</sup> Dzigo rëbchaa Pedr:

—iNaraa rien naa, led yed Dios cue miech dien cho nac zha Israel, cho nacгаа zha zit! <sup>35</sup> Sinque grëse miech lo guidzliu, tel pa guiedztaa nac zho, rcaania me zho totsaque ron zho mine rnabey me, ni rioxco zho zaacse rban zho. <sup>36-37</sup> Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaane no). Zig nac dib Judé, desde ne psilo Juan pseed me miech Galilé, laa zho gocnana. <sup>38</sup> Ni nanaxe to ganle, bdeed Dios poder lo Jesús, pxeel me Espiritu Sant gocnie Jesús. Zaatne bdedtaa Jesús, pquia zdoo me miech, grë zha ne nosacsi mendox psilaa me zho ladznia ma; sacne nli Dios nacie me. <sup>39</sup> No ne nac no zha ne bzianie me, grop lo no bdzian no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho

me lo cruz, <sup>40</sup> per zeene goc tson ngbidza laa Dios bleeban me, ni bneedz Dios diidz biire bdzian no me. <sup>41</sup> Led grëdraa miech gon me, loxaque nose bdzian me; sac ib Dios bzooblo no dzian no grë dziin ne been me. Haxta bdiowonie no me, bdionie no me, <sup>42</sup> ni pxeel me no gnee no lo miech gacnan zho ganle laa Dios bzo me, me gon guielwxtis gal dze ne laa Dios cuedz grëse miech, zigtaa zha guta zigtagaa zha mbana. <sup>43</sup> Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

<sup>44</sup> Laa Pedr bii quianeeque, zeene laa grë zha ne no-quaadiag ga bgaa guielbiini ne bdeed Espiritu Sant lo zho. <sup>45-46</sup> Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espiritu Sant. <sup>47</sup> Dzigo rëbchaa Pedr:

—¿Peraa nadien gbiaaz ne, ne choobnisgazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, scaque bdeed me guielbiini lo zho.

<sup>48</sup> Dzigo bnabey Pedr brobnis zho, laa zho bzëeb xnëz Jesús.

Blozh ga bnee Cornel lo Pedr cuëz me ga ti bla dze.

## 11

*Bzodiidz Pedr zha güey me*

*lidz Cornel*

<sup>1</sup> Grë zha poxtl ne no Jerusalén, ni grëraa zha ne rililadzle Jesús zha ne no Judé, bin zho sca bliladz gza menzit co Xtiidz Dios. <sup>2</sup> Dzigo zeene laa Pedr bdzin Jerusalén güey bla zho güeytildiidznie zho Pedr, <sup>3</sup> blisqui zho lo Pedr pe nacne güey Pedr lidz menzit, pe nacne güeytownie Pedr zho.

<sup>4</sup> Dzigo psilo Pedr bzodiidz me lo zho zha nacne güey me lidz men co, rëb me:

<sup>5</sup> —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëeb zhan gbaa, nzhidoo gzatap squina laaw ziaad nëz lo naa.

<sup>6</sup> Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe. <sup>7</sup> Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”

<sup>8</sup> Dzigo pquiab naa rep naa: “Min cogaa nagon grieelod, wlaltaa gard gow naa grë ma beed qui.” <sup>9</sup> Nëchaa me lo naa: “Grë ncuaane beenlayle Dios, nodne gnee luuw ncuaan beed.”

<sup>10</sup> Tson vuelte sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

<sup>11</sup> Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa. <sup>12</sup> Ni

laa Espíritu Sant bneequé lo naa, no ganaḷ naa zhits zho, niicle ne zhazit nac zho; nacne bianaḷ naa. Ye gza xoop zha ne zialnie naa nu bzë bio no.

<sup>13</sup> 'Bdzin no lidz meḅ co, psilo me bzodiidz me lo no zha bzhaac me, në me len yu no me, zeene gon me ti xanjḷ Dios, rëb anjḷ co lo me cxeel me bla zha ne tsie Jop tsiexi zho naa <sup>14</sup> zeena gane naa lo me zha grieelo csilaa Dios me lo doḷ grë meḅlidz me.

<sup>15</sup> 'Laa naa psilo quiane lo me grë meḅlidz me, zeene grëse zho laa zho pcaania Espíritu Sant, ni bgaa zho grë guieḷbiini ne rdeed me zigne bgaaque new. <sup>16</sup> Ga nagon psoladz naa xtiidz Jesús meḅ ne rnabey ne, zeene znu në me lo ne: "Nli nisse pchoobnis Juan miech, saḅgue to zgaa to guieḷbiini ne rneedz Espíritu Sant." <sup>17</sup> Sca nagon pcaania zho Espíritu Sant, laa zho bgaa guieḷbiini ne rdeed me zigne bgaaque new. ¿Cho nac naa nadien ne glisqui naa mine run Dios?

<sup>18</sup> Zeene blozh bin zho grë mine bnee Pedr ga, peet rëbdraa zho. Psilo zho rleynie zho Dios, rdeed zho xquizh lo me; sac hor coraa bien zho ye grë meḅzit zrieelo gbig zho lo Dios, gdeed me ti guieḷmban ndzon ne gdziḅd dze lozh lo zho.

*Bliladz zha Antioquí Xtiidz Dios*

<sup>19</sup> Zeene sca pquianaḷ zho grë zha ne rliladz Jesús len dze ne beet zho Xteb ga,

nëzrii nëzrec bliaaḷ zho. No zho bdziḅ haxta Fenicia, no zho bdziḅ Chipr, nogaa zho bdziḅ nëz Antioquí. Zaatne bdziḅntaa zho bnee zho cho nac Jesús, per loxaque lo grë meḅladz zho bnee zhow.

<sup>20</sup> Niicle ne scaw, lëëque grë zha Israel ne no Chipr, zha ne no Ciren, zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús. <sup>21</sup> Ni ne nacie Dios zho, ndal grë miech co bzëëb xnëz Jesús.

<sup>22</sup> Grë zha ne no Jerusalén, zeene gocnaḅ zhow px-eelaque zho Bernabé güey Antioquí. <sup>23</sup> Zeene bdziḅ Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

<sup>24</sup> Ti meḅ dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziḅ ga nzianraa zha ne bliladz Jesús.

<sup>25</sup> Goc palal dzew, dzigo güey Bernabé guiedz Tars güeyxi me Saul, bdziḅnie me Saul Antioquí. <sup>26</sup> Dipse ti len iz blëz zho ga grop zho, blozh pseed zho grë zha ne bliladz Jesús. Ga glopaa psilo ne laa grë zha ne rliladz Jesús brieelë CRISTIAN.

<sup>27</sup> Len iz co blalaa zha ne notëed xtiidz Dios no Jerusalén. Dzigo brieë zho ga güey zho Antioquí. <sup>28</sup> Lad co no tib meḅ lë Agab, psiaab Espíritu Sant guic me bnee me laa ti gbin dox gaḅ miech nëz Israel. (Ni nligaa scase goca,

lëë gbin co biaad len iz ne zobnabey men ne lë Claud.)

<sup>29</sup> Grë zha ne riladz Jesús Antioquí, zeene bin zho sca rëb Agab, nacne bnediidz zho grë zho, tel palaltaa ncuane rgaa lo zho tib tib zho gdeed zhow gaclo ti gon cxeel zho lo zha Judé. <sup>30</sup> Dzigo ptop zho gon co, zeene laaw goclo, pxeel zho Bernabé grop Saul güeysana lo grë zha rnabey ne zo lo zha ne riladz Jesús nëz Judé.

## 12

### *Bio Pedr ladzguiib*

<sup>1</sup> Len dze co psilo rey Herod notsidil me grë zha ne riladz Jesús. <sup>2</sup> Bnabey me bgaa Jacob bets Juan, beet zho Jacob lo spad.

<sup>3</sup> Zeene gon Herod rley grë zha ne rnabey lo menguietz Israel ran zho zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac lni Pascw. <sup>4</sup> Laa Pedr no ladzguiib, bnabey me bzo xon nëz menguiib quianap Pedr. Quiambëz me tedse lni co, laa me cuee Pedr gan grë menguietz zha csacsi me Pedr.

<sup>5</sup> Grë zha ne riladz Jesús, zeene gocnan zho scataa ndxienap menguiib Pedr no Pedr ladzguiib, psilo zho tibaque quianab zho lo Dios gacniën me Pedr.

<sup>6</sup> Nacle diidz pa dze cuee Herod Pedr. Wdze ne guini liu co, laa Pedr nixguiesse len ladzguiib; tib ga caden zob

ti nia me, tibra menguiib tib nëz cue me, ni zhaaque zo zla zha ne quianap ro ladzguiib. <sup>7</sup> Tibaque zeene biab ti bi-inidoo len ladzguiib, laa ti xanjl Dios bdzin ga. Bdzin me, pcaannia me cue Pedr, pcuaan me Pedr, rëb me:

—iNa zeen guche i!

Zigne sca bnee anjl co, lega zhal caden ne zob nia Pedr ga bzhiata brieew nia Pedr; <sup>8</sup> dzigo rëbchaa anjl co lo Pedr: —iPxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—iWbix xab luu na, zeen dënal zhits naa!

<sup>9</sup> Nalse Pedr zhits anjl co laa Pedr brieew ga. Riend Pedr ne nli nosilaa anjl co Pedr, masaque rzac me nonixquieel mew. <sup>10</sup> Bded zho chop len yu zaatne ndxie menguiib ne quianap, laa zho bdzin zaatne quia puert guuib ne rrieew ro nëz. Zigne bdzin zho, zhal puert co bzhiata; laa zho brieew. Bzënie anjl co Pedr spalal, zeene gol zho zaatne rdedlsa nëz co, dzigo laa anjl co psan Pedr ga.

<sup>11</sup> Dzigoraa bien Pedr led nonixquieeld Pedr, nli Dios pxeel xanjl me güeysilaa Pedr ladznia Herod, zeena gleyd zha Israel nian zho grë guielnë ne nded Pedr.

<sup>12</sup> Dzigo laa Pedr zie nëz lidz Mari, xniaa Juan Marcw; lëëtaque hor co nzian zho ndxie ga quianab zho lo Dios. <sup>13</sup> Zeene bdzin Pedr pcaannia Pedr ro yu. Brieew ti ndzooop

ne quia dziin ga lë Rode, zieso ndzooop dien chow.

<sup>14</sup> Zeene beenbey ndzooop co tsi Pedr, rley ndzooop. Lo guielbley co niicle pxaldaque ndzooop ro yu, rias ndzooop zienie ndzooop diidz lo grë zha ne ndxie ga; rëb ndzooop laa Pedr bdzin ro yu ga. <sup>15</sup> Per bliladz d zhow.

—iDieen pe rool luu! —rëb zho—. iNcuane gliladz ne rnee luu!

—iCoo, nli lëe mew! —rnee ndzooop—, laa me zo ga.

—iLed meda, —rnee zho—, bod anjl ne quianap mew!

<sup>16</sup> Sca no zho, laa Pedr bii nocaanmia ro yu. Zeene güey zho pxal zho ro yu, bzee zdoo zho gon zho nli Pedra, laa Pedr zo ga. <sup>17</sup> Dzigo blunia Pedr lo zho gnee nguiedzd zho; laa zho bzëëbnie Pedr len yu. Ga psilo Pedr bzodiidz Pedr lo zho zha güeybee xanjl Dios Pedr len ladzguiib; ni pso Pedr diidz lo zho sodiidz zhow lo Jacob, ni lo grëraa zha ne nacgrë zho. Blozhse ga, laa Pedr brieë ga.

<sup>18</sup> Zeene biini liu, grë menquiib ne pquianap Pedr len ladzguiib ga, rdzieldraa zho zha gon zho; sac ib biend zho dien yo Pedr. <sup>19</sup> Zeene laa Herod pxeel zha ne ziebee Pedr ladzguiib, pa sële Pedr. Dzigo güey zho güeynie zho diidz lo Herod; nacte bnabey Herod gocredz grë zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brieë Judé zey me Cesarea.

### *Dow mziog Herod*

<sup>20</sup> Len dze co, pcaalsa menguietz Tir ni menguietz Sidón güeynee zho lo Herod; sacne rlëënie Herod zho. Lëëque ti men ne nac dziin lo Herod lë Blast güeynie zho bnee lo Herod, bnab zho tilniedraa me zho, niicle zhagaaw laa zho gbig lo me; sac grëse ncuane rquiin zho, grë guiedz ne rnabey me ga rrieew.

<sup>21</sup> Dzigo bzo Herod ti dze ne tsie zho tsiezodiidznie zho me. Zeene gol dze co, got me lar niazh ne racw rey; bdzin me bzob me lo zhixcan me, psilo me bnee me lo grë miech co. <sup>22</sup> Goc palo quianee me, psilo zho rleynie zho me, nguiedz roptsie zho rnee zho:

—iLed miechdraa i gon! iTi diosle i nac men qui quianee lo ne!

<sup>23</sup> Laa me bii quianeeque, zeene biet tib xanjl Dios bdin me, psilo dow mziog me, gagazh gut me. Sca gut me, sac beenbeyd me ne Dios nac men ne non, men ne rnabey. <sup>24</sup> Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xnëz me.

<sup>25</sup> Jerusalén ga no Bernabé grop Saul len dze co; zeene bialse xtiiin zho, laa zho brieëque ga laa zho zie nëz Antioquí zienie zho Juan Marcw.

## 13

<sup>1</sup> Lo grë zha ne rliladz Jesús Antioquí, nzian zha ne no-teed Xtiidz Dios, nzian zha ne rseed miech Xtiidz Dios no lo zho. Lad grë zha co no

Bernabé, no ti mguí lë Simón ne rnee zho “Men Yaas”, no ti men Ciren lë Lus, gague no Saul, ni ti men lë Manaén, bets pchoob Herod.

<sup>2</sup> Laa ti dze lëetaque ndxie zho noyoolnie zho Dios ni nocuan zho, zeene laa Espíritu Sant bnee lo zho, rëb me:

—Golcueextso Bernabé i grop Saul, zeena csilo zho lo dziin ne gded naa gun zho.

<sup>3</sup> Blozhse pcran zho, blozhse bzodiidznie zho Dios, dzigo pxobnia zho guic Bernabé grop Saul, bnaab zho lo Dios gacnieñ me zho; bnee zho lo zho, laa zho zie.

### *Güey Saul Chipr grop me Bernabé*

<sup>4</sup> Ga brie Bernabé grop Saul zienie Espíritu Sant zho bdziñ zho guiedz Seleucia, Seleucia bzëeb zho barcw laa zho zie nëz Chipr (ti guidzliu win ne no lo nisdo). <sup>5</sup> Ye Juan Marcw zienie zho gun xyudar zho.

Bdziñ zho ro guidzliu win co zaatne ndxie guiedz Salamin, biet zho barcw güey zho grë len xyadoo men Israel ne no ga, güeyseed zho miech Xtiidz Dios. <sup>6</sup> Ga brie zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

<sup>7</sup> Guiedz co ga no ti men lë Sergio Paul, men co zob

rnabey guidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz gacnan me zha nac Xtiidz Dios; dzigo rnabey me gocredz Bernabé grop Saul. <sup>8</sup> Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

<sup>9</sup> Dzigo buitipaque Pabl lo Barjesús (Pabl nac sti lë Saul), ni ne nacie Espíritu Sant Pabl <sup>10</sup> rëb Pabl lo me:

—¡Biche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios? <sup>11</sup> Gon ganle, ¡laa Dios csiaabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

<sup>12</sup> Zeene gon men rnabey co sca pcow lo Barjesús, hor co bliladz me Xtiidz Dios, bzee zdoo me gon me scataa poder ne ziaadnie zhiwseed Dios.

### *Bdziñ zho guiedz Antioquí*

<sup>13</sup> Bded ga, laa Pabl gza Bernabé ni Juan bzëeb barcw stib, laa zho zie nëz xtan zha Panfil. Bdziñ zho guiedz Perg laa zho brie len barcw, ga ptso Juan lo zho, laa Juan zey nëz Jerusalén; <sup>14</sup> laa zho bio nëz zie zho nëz xtan zha Pisid, bdziñ zho sti guiedz lë Antioquí.

Zeene goḷ dze ne rdziiladz miech lo dziin, güey zho xyadoo zha Israel. <sup>15</sup> Blozhse bded zha ne blab lo guits ne pquiaa Moisés, ni blab zho miṇe pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

<sup>16</sup> Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtāa tow ne nac to menladz naa, zigtāa togaaw ne nac to zha stib guiedz zha ne noxco gban zigne rnabey Dios; goḷquiaadiag chop lan xtidz naa ganle gne naa lo to:

<sup>17</sup> 'Dios ne rililadz no nac no men Israel, ib me bzooblo grë pxozgol no laa zho bgab lo me. Me gocniēn zho zeēne bio zho ladz men Egipt, ni me güeysilaa zho ga, blu me ganle ne nli men nroob nac me. <sup>18</sup> Dipse len choo iz ne bio zho grë dan bidz ne bded zho ga, pxcw me grëtaa xquieḷntseeb zho. <sup>19</sup> Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho. <sup>20</sup> Ni dipse len tap gayoo groḷ iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel. <sup>21</sup> Blozh ga, laa zho bnab so ti rey gnabey lo zho, nacne bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis,

men ne ziaad lo xtii pxozgol no Benjamín. <sup>22</sup> Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zatne znu rnee: “Rleynie naa xingan Isaí zha ne lë David, laa naa gonle ib zun David miṇe gnabey naa.” <sup>23</sup> Ni lo xtii David co nagon brieequia Jesús, men ne pxeel Dios lo guidzliu biaadsilaa miech lo doḷ, zigne psanle me diidz lo xmengol no padzeela.

<sup>24</sup> Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquieḷntseeb zho gnab zho perdon lo Dios, zeēna chobnis zho. <sup>25</sup> Laa zeēne zhile gdziṇ dze ne gut zho Juan, dzigo bnee me lo miech rëb me: “Golgacnan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguiald naa.”

<sup>26</sup> 'Golgacnan sca ganle bets: zigtāa tow ne ziaad to lo xtii Abraham, zigtāa tow ne nac to miech stib guiedz zha ne rililadzle Dios, ib laa Dios pxeel Jesús csilaa me ne lo xtoḷ ne grëse ne. <sup>27</sup> Grë zha Jerusalén ni grë zha ne rnabey lo zho, ib biēnd zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co. <sup>28</sup> Niicle ne gon zho peet xtoḷd me, niicle ne brie-



quiad dol ne pquiaqui zho me, per bguib zho bdeeda didz bnabey Pilat gut me.

<sup>29</sup> 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me. <sup>30</sup> Per bleeban Dios me. <sup>31</sup> Grë zha ne güeynal zhits me zeene brieë me Galilé bdziñ me Jerusalén, nzian zho gon me; ni niina grëse zho laa zho quanee lo miech ganle cho nac me.

<sup>32</sup> 'Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela. <sup>33</sup> Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu." <sup>34</sup> Ni bzeetle Dios ne laa me cueeban Jesús, bzeetle Dios xin dxuerp me len baa; min co ga raquiet lo Xtiidz me, zaatne rnee: "Zunlay naa luu, zigne bnese naa lo David gun naa." <sup>35</sup> Laa stib lo Salm ne pquiaa David rnee: "Gdeete luu diidz xin dxuerp naa len baa." <sup>36</sup> Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo dxuerp me. <sup>37</sup> Led meda, zhaa men ne raquiet ga; gacxe na rnew waa peet gacd dxuerp men co, zbeeban Dios me.

<sup>38-39</sup> 'iGrëse to bets, golgacnan sca ganle! iJesús nac men ne rsilaa miech lo

dol! Zha ne gliladztaa me dib zdoo zho, tel pe nactaa grë xtol zho, sanmbe me zho. Mine waltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

<sup>40</sup> 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

<sup>41</sup> Grëse to ne rzhidznie to mine nac diidzli, bii zan to ganle laa naa gun ti milagr nroob ne gzee zdoo to;

per znitlo to, sac gliladzde tow niicle guiaad zha ne gzodiidza lo to.

<sup>42</sup> Blozh bnee Pabl; laa zeene laa Pabl griee ga grop Pabl Bernabé bnab grë miech co lo zho, siguiel zho quiet sti zhmal co biire tsie zho tsieseed zho zho. <sup>43</sup> Zeene brieë zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nëz no zho bnee zho lo grë miech co tiblque tso guic zho tsienal zho zhiwseed Dios, guien zho ganle pa lotaa noxco me zho.

<sup>44</sup> Biet sti zhmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios. <sup>45</sup> Zha ne rnabey lo grë zha Israel ne no ga, zeene gon zho scataa ndal miech ne goclo ga, blëë zho lo Pabl, ndox zho lo me, rëb zho led diidzlid nac mine rseed me.

## 14

<sup>46</sup> Niicle Pabla, niicle Bernabéw bdziedb zho, dzigole bnee zho lo zho rëb zho:

—Nli to glo rieguaia<sub>l</sub>yquiaa<sub>l</sub>diag Xtiidz Dios ne nac to zha Israel. Per ne squi run to guie<sub>l</sub>ntseeb nêde to ycaania tow par yгаа to guie<sub>l</sub>mбан ndzon ne rneedz Dios; na laa no guioseed grë zhazit. <sup>47</sup> Ni scalegaa rnabey Dios gaca, sac znu rnee me:

Laa naa bzole luu tsienee luu Xtiidz naa lo grë men<sub>z</sub>it,

luu gac zig ti biini ne gziini lo grë miech ne ndxie lo guidzliu;

zeena guie<sub>n</sub> zho zha laa zho lo dol.

<sup>48</sup> Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guie<sub>l</sub>mбан ndzon ne gdeed Dios ga, grëse zho dze cogazh laa zho bliladz Jesús. <sup>49</sup> Dipse dan co, gocnan miech Xtiidz Dios.

<sup>50</sup> Grë zha Israel ne rlëe lo Pabl ga, psilo zho pquuil zho grë men<sub>n</sub> wnaa ne nac diidz noxco Xtiidz Dios, ni güey zho güeynee zho lo grë zha ne nac men<sub>n</sub> non lad guiedz co; zeena ctsidil<sub>l</sub> zho Pabl grop Bernabé, gun<sub>cxoo</sub>n zho zho dan co.

<sup>51</sup> Zeene bin Pabla grop Bernabé, par glu ne nonguie<sub>l</sub>d sca been<sub>n</sub> zha co zho, been<sub>n</sub>mbe zho grë yudie co ni zho laa zho brieeg ga, laa zho zie nëz Icon. <sup>52</sup> Grë zha ne bliladz Jesús ga, nguiee<sub>l</sub> rac zho, rdeed Espiritu Sant guie<sub>l</sub>biini lo zho.

*Bdzin Pabl Icon grop me Bernabé*

<sup>1</sup> Zeene bdzin Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza. <sup>2</sup> Laa grë zha Israel ne bliladzda, psilo zho bloo zho diidz lo grëraa miech guiedz co glëenie zho Pabl grop Bernabé. <sup>3</sup> Niicle sca been<sub>n</sub> grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; sca-gaa Dios, nzian grë milagr ne bdeed me diidz run zho par glu ne nli Xtiidz me nonee zho.

<sup>4</sup> Dzigo grë miech ne no lad guiedz co goc zho chop dii, grol<sub>l</sub> zho racnie grë zha Israel ne rlëe ga, zgro<sub>l</sub> zho racnie grop zha poxtl co. <sup>5</sup> Zha ne rlëe ga, zigtaa zha Israela zigtagaa zha guiedz cow, bnediidz zho grë zho wxtis laa zho tsie tsiedeedquie zho Pabl grop Bernabé. <sup>6-7</sup> Zeene bin Pabla grop Bernabé, mazd laa zho brieeg ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

<sup>8</sup> Guiedz Listr ga gon<sub>n</sub> zho ti mgui në ni, wlaltaa lo xquie<sub>l</sub>mбан me ib gard së me; sac scale në ni me zeene gol me. <sup>9</sup> Zeene gon<sub>n</sub> Pabl dze

zob me rquiaadiag me mine nonee Pabl lo grë miech co, dzigo dzeque bui Pabl lo me, gon Pabl dib zdoo me rliladz me nli zrieelo guṅguiac Dios me; <sup>10</sup> dzigo nguiedz bnee Pabl lo me, rëb Pabl:

—iBeeṅli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë. <sup>11</sup> Zeene gon grë miech co sca biac me, psilo zho con xtiidz zho nguiedz rnee zho:

—iDiosle i gon, nasi zig rlu miech rlu me laa me biet gbaa ziaadgaṅ me ne!

<sup>12</sup> iMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee. <sup>13</sup> Ro guiedz co ga zob xyadoo zhindio zho Júpiter, dzigo brieë pxoz ne no yadoo co grë me miech lad guiedz, zienie zho ngon, zienie zho guiee, naṅ zho gut zho ngon co cogon zho ma lo Pabl grop Bernabé. <sup>14</sup> Zeene bien Pabla grop Bernabé wbinladz guic zho. Ptsiez zho xab zho, bzëëb zho lad grë miech co, nguiedz rnee zho lo zho:

<sup>15</sup> —iNdzinli golgac! ¿Pe nacne squi rac to? iGolgaṅ gaṅle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guieṅ to csaan to grë ncuaane paat rquiind ne ruṅ to i, gbiire gbig to lo Dios meṅ ne nlipaa mban. Me bzaa gbaa, me psan guidzliu, me psan nisdoo,

grëse ncuaane no gbaaw, ncuaane no lo guidzliuw, ncuaane no lo nisdoo, me bzaaw grësew. <sup>16</sup> Niicle ne glo bdeed me diidz been miech grë ncuaane gocladztaa zho, <sup>17</sup> per psaanladz me zho. Gocnie me zho zigne racnieque me ne niina, rsiab me nisguie rac xcuaa ne, rneedz me ncuaane rdioow ne gzataa dze, rneedz me guieḅley lo ne.

<sup>18</sup> Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

<sup>19</sup> Leṅ dze co, blalaa zha Israel ne ziaad nëz Antioquí ni nëz Icon bdziṅ Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoṅniu zho me güeyron zho me tiblاد ro guiedz. <sup>20</sup> Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz leṅ guiedz. Biini liu, pcaa me nëz grop me Bernabé laa zho zie nëz Derb.

<sup>21</sup> Bdziṅ zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí, <sup>22</sup> güeynee zho lo grë zha ne rliladz Jesús ga, pchoobladz zho zdoo zho, pso zho diidz lo

## 15

zho, niicle nroob guielnē ne noded zho per none tibaque gac guic zho tsienal zho Xtiidz Dios; sac ible sca nzian ncuaane ted zho laga gdziñ dze ne gdziñ zho zaatne rnabey Dios.

<sup>23</sup> Tib tib guiedz co, bzose zho grē zha ne so gnabey lo grē zha ne rliladz Jesús ga; rlozhse rcuan zho grē zho zho ni rzodiidznie zho Dios, dzigo laa zho rsañ zha co ladznia me yquianap me zho.

*Bdziñ Pabl grop Bernabé nēz Siria stib*

<sup>24</sup> Nēz no Pabl grop Bernabé bded zho dib xtan zha Pisid, bzēēb zho xtan zha Panfil, bdziñ zho guiedz Perg.

<sup>25</sup> Blozhse bnee zho Xtiidz Dios lo grē miech co, dzigo laa zho brieē ga, bdziñ zho guiedz Atalia. <sup>26</sup> Atalia ga bzēēb zho barcw bdziñ zho sti guiedz ne lē Antioquí, gataa laa zho psiaal viaj co. Guiedz coque ga brieē zho grop zho güey zho grē guiedz co güeynee zho Xtiidz Dios lo miech; zeene sca bñab grē zha ne rliladzle Jesús ga lo Dios gacniē me zho tsiegun zho xtsiñ me.

<sup>27</sup> Zigne bdziñ zho Antioquí ga, bnabey zho pcaalsa grēse zha ne rliladz Jesús, bzodiidz zho lo grē miech co grēse zha gocniē Dios zho güeygun zho xtsiñ me, ni zha rquia zdoos Dios zha ne nacd zha Israel rbedz me zho ye zho rzēēb xnēz me.

<sup>28</sup> Xtselaa bio Pabl ga grop me Bernabé, blēz zho lo grē zha ne rliladz Jesús ga.

*Pcaalsa zho Jerusalén*

<sup>1</sup> Ga no Pabl grop Bernabé zeene bdziñ bla zha ne ziaad nēz Judé, psilo zho noseed zho grē zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

<sup>2</sup> Zeene gon Pabl sca noseed zha co miech, nacne bdildiidznieque Pabl zho grop Pabl Bernabé. Dzigo mazd bñediidz grē zha ne rliladz Jesús ga, bzo zho zla zha ne gacgza Pabl grop Bernabé tsie zho Jerusalén tsienabdiidz zho lo zha poxtl ni lo grē zha ne rnabey lo zha ne no ga, dien pe guiab zho.

<sup>3</sup> Nacne brieē zho zie zho. Nēz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grēse zha nobedz Dios grē zha ne nacdraa zha Israel, rsaan zho grē zhiwseed xmengol zho laa zho rliladz Jesús. Rley grē miech co ron zhow. Sca bio zho nēz, laa zho bdziñ Jerusalén.

<sup>4</sup> Zeene bdziñ zho Jerusalén, pcaalsa grē zha poxtl, grē zha ne rliladz Jesús ga, ni grē zha ne rnabey lo zho. Dzigo ga bzodiidz Pabl grop Bernabé grēse zha gocnie Dios zho, zeene güeyted zho grē dan co güeynee zho Xtiidz me lo miech. <sup>5</sup> Miñ co quianee zho zeene guso bla zha ne glo goc farisé rēb zho, grē zha ne

nacd zha Israel zeene laa zho rliiladz Jesús ib none tso zho bey, ni none gun zho grëse miñe rnabey Xley Moisés. <sup>6</sup> Dzigo nacne bnabey grë zha poxtl co ni grë zha rnabey co, ycaalsa zho stib dien zhapaa gaca, pe nonguiela tso grë zha zit bey co.

<sup>7</sup> Zeene pcaalsa zho, goc pa lo quianee zho zeene guso Pedr rëb Pedr lo zho:

—Grëse to bets, golquiaadiag miñe gne naa lo to nu ganle. Led rsoladz to, zeene griinpa psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grë zha ne nacdraa zha Israel gliladz zho me. <sup>8</sup> Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espiritu Sant nacie zho, zigne pxeelaque Espiritu Sant nacie ne. <sup>9</sup> Gotsaa gwi ne ganle, led yed Dios rbe dien cho nac zha Israel cho nacgaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me. <sup>10</sup> ¿Zha nac dzigo ne racladz to gnabey to grë zha co gun zho grë miñe nac xley ne? ¿Pe niacxe rienraa ne lo Dios dzigo? ¡Niicxe ne name, niicxe xmengol ne brieelod niuna zigne naca! <sup>11</sup> Golguien ganle, zigtaa zhaw zigtagaa new laa me csilaa ne lo dol grë ne, per nacda por ncuane rdziuun ne; sinque laa me csilaa ne porne nquialadz me ne.

<sup>12</sup> Zeene blozh sca bnee

Pedr, dzese biac zho grë zho; dzigo laa Pabl grop Bernabé psilo bzodiidz grëtaa milagr ne blu Dios lo grë menzit zatne güeynee zho Xtiidz me lo grë miech co. <sup>13</sup> Blozhse bnee grop zha co, laa Jacob gusoque rëb me:

—Grëse to bets, golquiaadiaggaa chop lan xtidz naa naganle gne naa lo to. <sup>14</sup> Laa Pedr bzodiidzle lo ne ganle zha psilo bredz Dios grë zha zit, bzooblo me zho ye zho gac zha ne sëeb xnëz me. <sup>15</sup> Ga nagon goca zigne zhobneese lo Xtiidz me, miñe pquiaa grë zha ne pxeel me padzeela, rneew:

<sup>16</sup> Tedse nu ganle, laa naa cuedz grëse miech ne ygab lo naa; grë zha xtii David zha ne bzozit, laa zho gbig stib.

<sup>17</sup> Horco grëse zha zit, laa zho gon ganle cho nac naa, zeena grieelo sëeb zho xnëz naa.

<sup>18</sup> Znu nac xtiidz Dios, ni padzeelale bzeet me ne laa me gun miñ co.

<sup>19</sup> 'Miñ co nagon grë zha zit ne rliiladzle Jesús, ib nonguielda ga gnabey ne zho gun zho miñe nac xley ne. <sup>20</sup> Sinque mazd yquia tib diidz cxeel ne lo zho gon zho, grë ma ne rut miech rgogon zho lo grë zhimdio zho, ib gowd zho bëel co; grë ma ne rxieed ren zeene ret ma, gowd zho ma; ni niicle grëragaa ma ne gut zho, ib gowd zho xchen ma. Grë zha bgui, nodne tsonie zho wnaa ne nacd tsieel zho; niicle

wnaagaaw, nodne tsonie zho mgui ne nacd tseel zho. <sup>21</sup> Niicle mazd padzeelaw, tibaque quiayon miech gund zho min co; sac desde hor co tib tib guiedz bzose Moisés tib zha ne gneew lo miech len xyadoo zho, dze ne rdziiladz zho lo dziin.

<sup>22</sup> Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rililadz Jesús ga. <sup>23</sup> Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rililadz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

<sup>24</sup> Niina ne gocndion no laa bla zha ne nacgrë no nu biaad lo to i, biaadcots zho guic to dien peraa no gun to. Gacnan to ganle led nod pxeel zho, <sup>25-27</sup> gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiayun zho xtsiin Jesús.

<sup>28</sup> 'Lo godiidz ne bdziun no, laa no bdzianle nonguielda ne dien peraa gnabey no to gun to, ni

niiclegaa Espíritu Sant scaque rnee me. Rquiind ne peraa gun to, lëlew ga totsaque tsoxco to <sup>29</sup> gowde to xpëel grë ma ne rgogon miech lo grë zhindio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tseel zho; niiclegaa wnaaw, nodne tsonie zho mgui ne nacd tseel zho. Min rii nagon nac mine no tsoxco to.

'Guiaannie Dios to sca.”

<sup>30</sup> Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne rililadz Jesús, dzigo bdeed zho guits co lo zho. <sup>31</sup> Zeene gocnan grë zha co zha rnee low, rley zho sacne pchooblada zdo zho. <sup>32</sup> Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

<sup>33</sup> Xtselaa blëz Silas ga grop Judas, laa zeene gol dze ne laa zho grie gbiire zho nëz Jerusalén stib, ine güeyzonëz grë zha co zho, rdeed zho xquizh lo zho. <sup>34</sup> [Laa zho nole nëz, tibaque zeene rëb Silas laa Silas guiaanaque ga spalal dze.] <sup>35</sup> Laa Pabl grop Bernabé ible laa zho biaan ga been zho xyudar grë zha ne noseedle miech ga.

*Ptso Pabl grop Bernabé*

<sup>36</sup> Goc palal dze no Pabl guiedz Antioquí ga grop me Bernabé, zeene rēb me lo Bernabé laa zho gbiire tsie grē guiedz ne güeynee zho Xtiidz Dios lo miech ga, par gacnan zho dien yo grē zha co. <sup>37</sup> Dzigo gocladz Bernabé ye Juan Marcw nienie zho; <sup>38</sup> per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynald Juan nlozh nsiaal zho lo dziin co.

<sup>39</sup> Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nēz grop Bernabé Juan bzēēb zho barcw zie zho nēz lo guidzliu win ne no lo nisdoo lē Chipr; <sup>40</sup> laa Pabl goc grop Silas. Blozhse bnaab grē zha co lo Dios gacnien me Pabl grop Silas, laa zho brie ga <sup>41</sup> güeyted zho grē guiedz ne ndxie nēz xtan zha Siria, grē guiedz ne ndxie nēz Cilis, güeynee zho lo grē miech ne rliladz Jesús nēz co, güeychoobladz zho zdoo zho.

## 16

### *Beenbey Pabl Timoté*

<sup>1</sup> Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne rliladzaque Jesús lē Timoté, ti men Israel ne rliladzle Jesús nac xniaa me, laa pxoz me nac men Gres.

<sup>2</sup> Grēse zha Listr, zha Icon, zha ne rliladz Jesús tibaque

rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl. <sup>3</sup> Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grē zha Israel ne no nēz co.

<sup>4</sup> Laa me zienal zhits Pabl. Guiedz ne rdedtaa zho rnee zho lo grē zha ne rliladz Jesús ga, tsoxco zho gun zho grē mine pso zha poxtl ga diidz, grē zho zha rnabey ne no Jerusalén. <sup>5</sup> Zeene ron grē zha cow, dib zdooraa zho rnalo zho Dios, zigse zie dze racnzianraa zha ne rliladz Jesús.

<sup>6</sup> Blozh ga, tibbdeed zho xtan zha Frij ni xtan zha Galás, sac bdeete Espiritu Sant diidz nienee zho Xtiidz Dios lo miech grē guiedz ne ndxie nēz Asia ga. <sup>7</sup> Zeene bdzin zho zaatne rsilo xtan zha Misia gocladz zho nie zho nēz xtan zha Bitin, scaque bdeete Espiritu Sant diidz nie zho nēz co. <sup>8</sup> Dzigo tibbdeed zho dib xtan Misia bdzin zho ti guiedz ne ndxie ro nisdoo lē Troas.

<sup>9</sup> Guiel co blulo ti mgui Macedon lo Pabl, rnab me gun Pabl guielnzaac tsie Pabl nēz co, tsiegun Pabl xyudar grē miech co.

<sup>10</sup> Nacne hor cogazh bzhixcuaa no, sac bien no ible Dios racladz guio no nēz co guionee no Xtiidz me lo miech.

<sup>11</sup> Dzigo brie ga no ti len barcw bdzin no ti lo guidzliu win ne no lo nisdoo lē Samotras. Biini liu brie ga no ga bdzin no Neápolis, ga

bliaaz no wdze co. <sup>12</sup> Biini sti liu co brie no Neápolis bziani no bdziñ no Filip. Lëë guiedz co riaan zaatne rsilo xtan zha Macedon, niapse meñ Roma no ga; nzianlaa ngbidz bliaaz no ga.

<sup>13</sup> Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdziñ no nzianlaa meñ wnaa ndxië ga, dzigo psilo no bnee no lo zho cho nac Jesús. <sup>14</sup> Lad co no ti wnaa Tiatir lë Lidia, rto me grë lar nizhnie nlaan miñe nac lar niazh; ye me dib zdoo me riladz me Dios. Laa me noquiaadiag miñe nonee Pabl ga, zeñe psiaab Dios guic me bliladz mew.

<sup>15</sup> Dzigo hor cogazh brobnis me grë meñlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobiaaaze no lidz me.

*Bio Pabl ladzguiib grop Silas*

<sup>16</sup> Tib dze, lëëtaque zio no zaatne riozodiidznie no Dios, bdzieelo no ti ndzooop nguieg noguitnie mendox. Zëëb diidz grëse tel pe rnabdiidz miech lo ndzooop, rnee mendox cow; nroob dimi ne riab nia zha ne rnabey ndzooop. <sup>17</sup> Nañ ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyun gza mgui rii! jLaa zho ziadseed to zeña

gacnañ to zha csilaa Dios to lo xtol to!

<sup>18</sup> Nzian dze zaatne rdzieeltaa no ndzooop tibaque sca rnee ndzooop. Zeñe bieedtaa guic Pabl, biireque me bnee me lo mendox ne noguitnie ndzooop ga, rëb me:

—Jesús nacnie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa mendox co bzhoon.

<sup>19</sup> Gza zha ne rnabey ndzooop ga, zeñe gon zho rundraa ndzooop guieñsin co gdziniaa ndzooop dimi, bnaaaze zho Pabl grop Silas güeyzo zho zho lo wxtis, rëb zho:

<sup>20-21</sup> —jGolwi ganle pe nac ncuane noyun grop zha Israel rii lad guiedz nu! jNogodil zho miech, laa zho quiasseed miech ncuane nonguieldraa dziuun ne nac ne zha Roma!

<sup>22</sup> Pcaalsa grëse miech co, grëse zho ntseeb rac zho lo Pabl grop Silas. Dzigo bnabey wxtis co brie xab zho grop zho bdeed bar zho zho, nroob bdiñ zho zho. <sup>23</sup> Blozhse bdiñ zho zho laa zho psëëb zho ladzguiib, bnabey zho meñ ne quianap ladzguiib ga tibaque yquianap me zho, sac tel laa zho xoon me tsi-etizha. <sup>24</sup> Zeñe bin meñ co sca rëb zho, güeyaque me güeyseëb me zho stib lena miñe riaan caanraa, ga psëëb me ni zho lad chop lë yag nroob.

<sup>25</sup> Wdze co, zig grol guieela laa Pabl grop Silas bii noyoolnie Dios, ni rnab zho lo me gacniñ me zho. Grëse zha ne



no ladzguiib ga, ron zho sca no Pabl grop Silas. <sup>26</sup> Tibaque zeene bni ti zhodox, psiniw dib nacse ladzguiib co, grëse ro ladzguiib co bzhial, guiib ne no nia grë zha ne no ga, wbila.

<sup>27</sup> Lëëlëd brie mcaallo men ne quianap ga, zeene gon me grëse ro ladzguiib co zonial, masaque güeynie guic me bzhoonle grë zha ne no ga, bdobaque me spad ne ney me laa me zie gut me me. <sup>28</sup> Horco broptsie Pabl lo me, rëb Pabl:

—¡Gute luu luu! ¡Grë no ndxie no, choot bzhioond!

<sup>29</sup> Lëëlëd bnaab me biini, bzëeb nguzhoon me len ladzguiib, masaque rzhidz me dzeb pquitsgzhib me lo Pabl grop Silas. <sup>30</sup> Blee me zho ga, rëb me lo zho:

—Golnë lo naa, ¿pe nac mine gun naa zeena csilaa Dios naa lo grëtaa xtol naa?

<sup>31</sup> —Dib zdo luu bliladz Jesús, men r nabey ne pxeel Dios lo guidzliu —rëb zho—, dzigo silaa me luu lo dol, silaa me menlidz luu ne.

<sup>32</sup> Dzigo güeynie me zho lidz me, bnee zho Xtiidz Dios lo me grë menlidz me.

<sup>33</sup> Guieel co no me bdiib me zhits zho, zaatne brëe bar ne bloobar zho zho; blozhse ga, laa me brobnis grë menlidz me. <sup>34</sup> Bnabey me goclo ti guielwagw downie me zho, rley me, niicle grëгаа menlidz mew rley zho ne laa zho bliladz Jesús.

<sup>35</sup> Biini liu, pxeel wxtis zha ne güeynie diidz lo me cuee me Pabl ladzguiib grop

Pabl Silas. <sup>36</sup> Dzigo güey me güeynee me lo Pabl rëb me:

—Laa wxtis pxeel diidz cuee naa to ladzguiib; zacle nasca gree to, peet tsieniedraa guic to.

<sup>37</sup> Dzigo rëbchaa Pabl lo zha ne bdziinnie diidz ga:

—¡Zha ndzielguictaa zhi-wxtis to gon! Squi ndxie menguietz bdiñ zho no, ni gardle gacnan zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhliaanse gree no. ¡Lëda ga gon! ¡Goltsie golguiab lo zho, lëezhal zho guiaad guiadbee zho no nu!

<sup>38</sup> Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdzieb zho; <sup>39</sup> lëëlëd güey zho ro ladzguiib güey nab zho dispensar lo Pabl grop Silas. Blee zho zho ladzguiib, ni bnaab zho lo zho siguiel zho mazd gbi zho guiedz co.

<sup>40</sup> Ga brie zho güey zho lidz wnaa ne lë Lidia ga, bnee zho lo grë zha ne pcaalsa ga, zha ne rliladz Jesús, pso zho diidz lo zho tiblique gac zho tsienal zho xtiidz me. Blozhse ga, dzigo laa zho brie guiedz co.

## 17

*Güey Pabl Tesalónica grop me Silas*

<sup>1</sup> Brie Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziñ zho guiedz Tesalónica. Lad guiedz co zob ti xyadoo

zha Israel, <sup>2</sup> dzigo güey Pabl güeynee me Xtuidz Dios lo grë zha ne rcaalsa ga, zigne runaque me grëraa guiedz ne zieded me.

Blëz zho ga tson zhal, gzobse dze ne rdziiladz miech lo dziin güey Pabl güeyzodiidznie Pabl grë zha co, <sup>3</sup> bzeet me lo zho grë zaatne raquiet grëtaa ncuaane ted men ne cxeel Dios lo guidzliu ga, ni zha grieeban me; ni blu me lo zho gacnan zho ganle lëe men co ga nac Jesús.

<sup>4-5</sup> Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole mine rnabey Dios, ye blalaa men wnaa ne nac men non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëe zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëeb zho lidz Jasón nan zho niebee zho Pabl ga grop Silas, ngo zho zho ladznia grë miech co.

<sup>6</sup> Zeene gon zho bgaad grop zha co lo zho, bnaazaque zho Jasón ni zla zha ne rililadz Jesús, bdozni zho zho bdziin zho zho lo wxtis, roptsie zho rnee zho:

—iGolgan ganle laa zha ne sca quianzë nocots guic grë miech, laa zho blansole nu!  
<sup>7</sup> Ni Jasónpaa rdeed zaatne rbëz zho. Racladzdraa zho gun zho mine rnabey rey

César, sac rnee zho no sti zhirey zho lë Jesús.

<sup>8</sup> Grë zha wxtis co ni grë menguiedz ne pcaalsa ga, zeene bin zho sca rnee grë zha co, riendraa zho zha gun zho. <sup>9</sup> Mine been zho beenquizh zho Jasón ti mult gza Jasón zla zha co, dzigo laa zho wbi ga.

<sup>10</sup> Pcow liu co, wxina laa grë zha ne rililadz Jesús ga bleese Pabl ga grop me Silas, pxeel zho zho nëz Beré. Zigne bdzin zho Beré, gloque ti xyadoo zha Israel güey zho.

<sup>11-12</sup> Grë zha Israel ne no Beré ga, rley zho rquiaadiag zho mine rnee Pabl grop Silas, gzobse dze rlab zho lo Xtuidz Dios rwi zho dien pe nli mine rnee zho ga. Ndal zha Israel co bliladz Jesús, ndal zha Gres ne, zigtaa mguiw zigtaa wnaaw; blalaa men wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

<sup>13</sup> Laa zeene gocnan zha Israel ne no Tesalónica laa Pabl nolaque guiedz Beré, güeyaque zho güeyquuil zho grë miech co glëenie zho Pabl.  
<sup>14-15</sup> Dzigo lëelëd brieë bla zha ne rililadz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

*Len dze ne no Pabl Aten*

<sup>16</sup> Laga quiambëz Pabl gdzin Silas grop Timoté güey

me güeyted me lad guiedz co, wbiñladz guic me gon me led zhid grē mdio ne riegan grē miech co. <sup>17</sup> Nacne bioxco me bnee me Xtiidz Dios lo zho, güey me xyadoo grē zha Israel ne no ga, bzodiidznie me zho grē zho zha guiedz co zha ne rliladzle Dios. Gzobse dze rie me len guiedz rienee me lo grē miech ne rdziñ ga. <sup>18</sup> Tib dze bdzieelo me bla zha rac ne zienal zhiwseed ti men lē Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieegan Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic men qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl; <sup>19</sup> dzigo rēb zho lo Pabl:

—Bzhiguiel mazd, sē luu guio ne lozh sodiidz luu lo no dien zha nac wseed ne ziaadnie luu, <sup>20</sup> sac waltaa gard dzion no grē ncuaañe rnee luu i.

<sup>21</sup> No zho liaadz gacnan zho pe rnee Pabl, sac sca nac grē zha Aten, niiclegaa grē zha ne quiadzñ ga, rdziladz zho rded-dze zho rzodiidz zho dien zha nac grē diidz cub ne griiñ ron zho.

<sup>22</sup> Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rēb me:

—Grēse to ne nac to men Aten, ran naa ne nligaa rīoxco to rleynie to grē men ne rzac to nac Dios; <sup>23</sup> sac len dze rii biateed naa zaatne zob grē xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnan sca ganle, Dios ne runbeyde to ga, runbey naa me ni lēē zhiwseed me none naa lo miech len dze rii.

<sup>24</sup> 'Dios co bzaa guidzliu, me bzaa grētaa ncuaañe no lo guidzliu; gacd ne guiab miech zha gzaa ti zaatne cuēz me, sac men nroob men rnabey nac me, me rnabey gbaa, me rnabey guidzliu. <sup>25</sup> Niicle rquiindgaa me dien zha yquianap zho me, sac grēse ne ne nac ne miech, me rneedz guielmban lo ne, me rneedz grētaa ncuaañe rquin ne. <sup>26</sup> Lo tib nēzaque miech ne bzaa me ga, bnabey me brieequia grēse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho. <sup>27</sup> Laa me psan zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grē ne, <sup>28</sup> sac gon, niapse por xpoder me laa xcuerp ne niaa zigne naca, laa ne mban, laa ne rriel. Lēew ga bnee bla menladz to, zha rac ne znu rēb: “Xtii Dios nac ne.”

<sup>29</sup> Gase na ganle gotsaa gwi ne, conque xtii Dios name nac ne, pe nac dzigo gliladz ne lēē Dios ga nac grē cho

mdio or, cho mdio plat, cho mdio quie ne riab guic miech rzaa zho; <sup>30</sup> ni ib sca rliladz miech. Laa Dios gop zho paciens hor co sac runbeyd zho me; sangue niina laa me quiabedz zho, laa me rnab lo zho csaan zho grë ncuane bliladz zho ga gbig zho lo me, mese gleyne zho; <sup>31</sup> sac laa me bzole tib dze ne gacredz grëse miech lo me ygaa zho mine tsieguial zho tib tib zho, tel zha wban zho. Ni laa me blule ganle cho nac men ne gun guielwxtis co, lëe men co ga gon bleeban me.

<sup>32</sup> Zeene bin zho bzeet Pabl no ti men ne brieegan, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

<sup>33</sup> Gataa pcuëez zho lo xcodiadz Pabl, laa Pabl wbi lo zho ga. <sup>34</sup> Brieequia blalaa zha Aten bliladz Jesús, lëe tib zho ga nac mgui ne lë Nich (men ne nacgrë zha ne nac wxtis) ni ti wnaa lë Dámaris.

## 18

### *Güey Pabl guiedz Corint*

<sup>1</sup> Brie Pabl Aten bdzin me guiedz Corint. <sup>2</sup> Ga beenbey me ti men Pont lë Aquil, ti zha xtii zha Israel nac Aquil. Roma no me glo, wriin bdzin me Corint ga grop tseeel me; sac bnabey rey Claud brie grëse zha Israel ne no Roma. <sup>3</sup> Dzigo güey Pabl blëz Pabl lo zho ga, sac ye zho rzhixcuua grë lar nroob ne rquia ncal,

tipse pquia zho dziin ga gza zho.

<sup>4</sup> Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús. <sup>5</sup> Zeene laa Silas grop Timoté bdzin Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús. <sup>6</sup> Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—¡Laa naa bial bialne naa lo to per pquiaadiagdë to mine rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

<sup>7</sup> Dzigo laa Pabl psilo güey lidz ti men ne no gaxaque zaatne zob yadoo co lë me Just, dib zdoo me rliladz me Dios. <sup>8</sup> Len dze co ndal zha Corint bliladz Jesús zeene bin zho mine rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

<sup>9</sup> Ti wdze blulo Dios lo Pabl, rëb me lo Pabl:

—¡Gdziebd luu! ¡ib ycuëezd luu lo dziin ne noyun luu i, bnée xtiaz naa lo grë miech qui! Ndal grë miech rii no sëeb xnëz naa. <sup>10</sup> Peet tsienied guic luu, choot

griee lod lega pe guṅ luu sac naa quianaap luu.

<sup>11</sup> Nacne blēz Pabl ga stib iz groḷ, pseed me grē miech co Xtiidz Dios.

<sup>12</sup> Laa zeene bzob meṅ ne lē Galión zobnabey me xtan Acay, grē zha Israel ne no Corint ga bnediidz zho grē zho bnaaz zho Pabl güeyzo zho me lo Galión <sup>13</sup> rēb zho:

—Laa no ziaadnie mgui rii lo luu, sac laa me quiagui-its xley no, quiago me guic miech tsiegan zho Dios sti mod miṅe ni nacdraa ley.

<sup>14</sup> Laa Pabl zie gnee, zeene pquiab Galión rēb me lo grē zha co:

—Telne niaca miṅe no pe ti falt, pe ti guieḷntseeb ne quiayun me, dzigosi naa raguial guṅ guieḷwxtis. <sup>15</sup> Per telne laa to ziaadnie me nu porne rdziladzde to miṅe quiaseed me miech, rdziladzde to tel cho rzeet me, sac led scad nac xley to, tsow goḷgan dien pe guṅ to. Nodaque xtil to guic naa.

<sup>16</sup> Bleega Galión zho nēz ley.

<sup>17</sup> Dzigo bnaaz zha guiedz co ti meṅ lē Sóstenes, meṅ ne rnabey xyadoo zha Israel ga; goṅlo Galión bdiṅ zho me, per peet rēbd Galión.

*Biire bdziṅ Pabl guiedz Antioquí*

<sup>18</sup> Goc spalal dze no Pabl Corint ga, dzigo bnee me lo grē zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieē, ye zho bzēēbgza me barcw, laa zho zie nēz Cencré. Lēētaaque leṅ dze co noxco Pabl guṅ me tel pe nac ncuaane rēb me lo Dios guṅ me, dzigo zeene bdziṅ zho Cencré bnabey me liu liu ptiib guic me.

<sup>19</sup> Cencré bzēēb zho barcw stib, zie zho nēz Efés. Bdziṅ zho Efés, güey Pabl xyadoo grē zha Israel ne no ga güeynee me Xtiidz Dios lo zho. <sup>20</sup> Dzigo bnab zho mbēz me lo zho ga ti blalaa dze, per brieelod mbēz me <sup>21</sup> sac laa guic me no gdziṅniob me Jerusalén ygaa me lni ne ziaadyob leṅ dze co, rēb me:

—Na telne zneedz Dios didz, bii zialteadaque naa dien yo to.

Gataa biaan Aquil grop Priscil, laa me bzēēb barcw stib zie me nēz Cesarea. <sup>22</sup> Cesarea brieē me barcw, laa me zie nēz Jerusalén. Bdziṅ me güeyquiaabdiuzh me grē zha ne rliladz Jesús ga; biireraa me ga bdziṅ me Antioquí.

<sup>23</sup> Goc palal dze no me Antioquí, laa me brieēque ga güeyted me grē guiedz ne ndxie dib xtan zha Frij, dib xtan zha Galás, güeynee me lo grē zha ne rliladz Jesús ga dib zdoo zho gleyne zho Dios.

<sup>24</sup> Leṅ dze co bdziṅ ti meṅ xtiḷ zha Israel guiedz Efés, ti meṅ Alejandriw lē me Apol. Ti zha rac nac me, rien me zha gnee me Xtiidz Dios lo miech. <sup>25-26</sup> Güey me xyadoo zha Israel ne no ga, nguieel rac me, peet dzeb guieṅd lo

me psilo me nonee me lo zho grëse miñe bnee Juan Bautist zeene bzeet Juan Jesús; sac loxaque min co bin me zeene gocnañ me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

<sup>27</sup> Grë zha ne riladz Jesús ga, zeene gocnañ zho laa guic me no tsie me nöz Gres, dzigo ye zho rëb wen tsie me, pquiaa zho ti cart pxeel zho lo zha ne no nöz co zaacse ycaania zho me. Zeene bdziñ me nöz co, pseed me grë zha co. Rley zho blozh gocnañ zho cho nac Jesús; <sup>28</sup> sac squi ndxie miech rsioog me ro grë zha Israel, rnee me lo zho lëele men ne quiamböz zho cxeel Dios ga nac Jesús, ni rlu me lo zho pa lo zho bneew lo Xtiidz Dios.

## 19

### *Biire güey Pabl Efés*

<sup>1</sup> Len dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nöz xtan zha Galás, laa me bdziñ ga. Ga bdzieel me blalaa zha ne riladz Jesús, <sup>2</sup> dzigo bnabdiidz me lo zho, rëb me:

—¿Pe bgaa to guielbiini ne rneedz Espíritu Sant, zeene biladz to Jesús?

Pquiab zho rëb zho:

—¿Guelbiini ye? Gard gon dzion no rdeed Espíritu Sant guielbiini.

Dzigo rëbchaa Pabl:

<sup>3</sup> —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

<sup>4</sup> Dzigo bnee Pabl lo zho zha nac wrobnis ne biaadnie Juan. Rëb me lo zho nacse wrobnis co par glu miech ne laa zho csaan guielntseeb, laa zho sëeb xnöz Dios; per grëse zha ne bgaa wrobnis co ib none gliladz zho Jesús, men ne bzeet Juan ga zeene rëb Juan ile ziaad me.

<sup>5</sup> Min co bin zho nacne brobnis zho stib zigne psan Jesús diidz. <sup>6</sup> Zeene laa Pabl pxobnia guic zho bnab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac miñe racladz Dios gacnañ miech. <sup>7</sup> Lo gza zho rgaa zho tsiipchop, niapse zha bguiw.

<sup>8</sup> Tson mëe blöz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús. <sup>9</sup> Per zeene gon me no palal zho ib rond diidz, lel psilo zho squi ndxie miech rneenë zho Jesús, nacne bleextsoque me grë zha ne riladzle Jesús, güeynie me zho zaatne nac xyuscuel ti men lë Tiran; ga rcaalsa zho gzobse dze rieseed me zho.

<sup>10</sup> Dipse len chop iz blöz me ga pseed me grë zha co; nacne grëse miech ne no dib nöz Asia ga, zigtaa zha Israela zigtagaa grëraa miech

cow, bin zho zha nac Xtiidz Dios. <sup>11</sup> Bdeed Dios diidz been me grē milagr nroob ne rzee zdoo miech; <sup>12</sup> sac haxta lar ne rzēse nia me, lar ne rbixse me rzhooob lad meṇ ne rzacnē laa zho riac, niicle grēgaa meṇdox ne noguitnie miecha, rzhooṇ ma.

<sup>13-14</sup> Ga quianzē gadz xpēēd ti zhipxoz zha Israel lē Escev, stib guiedz stib guiedz rie zho riegūcxooṇ zho meṇdox ne noguitnie miech. Ti vuelt, naṇ zho na ye zho cuedz lē Jesús gacniēṇ me zho guṇcxooṇ zho meṇdox; bdziṇ zho zaatne guṇcxooṇ zho ma, rēb zho:

—iZig zobwi Jesús ne rzeet Pabl, laa no rnabey to golrieegazh i niina!

<sup>15</sup> Pquiabaque ma rēb ma lo zho:

—Wen wen ruṇbey naa Jesús ni naṅgaa naa cho nac Pabl, saṅgue to goṇ ni lalnu ruṇbeyd naa to.

<sup>16</sup> Znuse bias meṇ ne noguitnie meṇdox co, bnaaz me gza zha co bdiṇ me zho. Ib blēbd zho lo me, masaque dib brēē rna zho, ni xab zho nacw-draa, laa zho bzhoon.

<sup>17</sup> Grē miech ne no Efés, zigtaa zha Israela, zigtagaa grē zha guiedz cow, zeene bin zhow per nli bdzieb zho; grēse zho bien zho ne nli meṇ non, meṇ rnabey nac Jesús.

<sup>18</sup> Haxta ye grē zha ne riladzle Jesús, hor co laa zho bleero pe nac grē ncuaaṇe ndzinlid ne bliladz zho glo. <sup>19</sup> Nzian zha ne biil diidz dox güeyxi zho grē xquits zho, squi ndxie miech laa

zho bzēēga grēsew. Zeene biobey palal gocnon grētaa guits co, biirew zig chooptsii mil pes plat. <sup>20</sup> Ga blu poder ne nacie Xtiidz Dios, sac grē zha ne bina bdzēē lo xquielmban zho.

<sup>21</sup> Bded ga, biab guic Pabl tsieted me nēz xtan zha Macedon, xtan zha Gres, gbiire me ga laa me tsie Jerusalēn stib; haxta rnee me Jerusalēn grieē me tsie me Roma. <sup>22</sup> Nacne ptedner me Timotē grop Rast (zha ne noyūṇ xyudar me leṇ dze co) zie zho nēz Macedon, laa me bii biaan nēz Asia ga.

### *Gocntseeb zha Efés*

<sup>23</sup> Leṇ dze co brieequia palal zha Efés ptsidil zho zha ne riladz Xtiidz Dios. <sup>24</sup> Guiedz co no ti meṇ ne ruṇdziin guiib plat lē Demetr, rzaa me grē yadoo yeeṇ zig niaada xyadoo xnaxnazh zho Dian; nroob dimi ne rial me grē me zha ne ruṇnie me dziin co; <sup>25</sup> bnabey me pcaalsa grē zha ne quia dziin lo me, ni grēragaa zha ne ruṇaque dziin co, rēb me lo zho:

<sup>26</sup> —Rieṇ naa ziyonle to, ziyangaa to ganle laa mgui ne rnee zho Pabl quianzē lad guiedz nu, rnee me nlid Dios ga nac grē mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnē to zha dziuṇ ne? <sup>27</sup> Golguiēṇ ganle noxtseeb guiabdraa xtsiṇ ne, ni naṇwen to ganle lēē xtimi ne

nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnazh Dian, nend grëse miech ne rleynie me dib Asia, diibgaa lo guidzliuw con guiaanladz zho me.

<sup>28</sup> Zeene gon grë zha co sca rëb Demetr, rlëë zho, roptsie zho rgo zho xviv Dian. <sup>29</sup> Wdzeepaaw grëse menguedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdozni zho zho bdiinne zho zho ro yulow.

<sup>30</sup> Nacne gocladz Pabl nie me nienee me lo grë miech co, per psaand grë zha ne riladz Jesús ga. <sup>31</sup> Haxta bla zha wxtis ne ndzieeldidz Pabl, pxeel zho diidz lo me tsied me.

<sup>32</sup> Zhaase zhaase rnee grë miech co ndxie zho ro yulow ga, no zho haxta ni riend pe nacne zie zho ga. <sup>33</sup> Blalaa zha Israel, zeene gon zho scataa rac grë miech co, bdoz zho zhiw ti men lë Lejandr gocladz zho nee me chop lan xtiidz zho. Laa men co blis nia me parne cuedze zho gnee me; <sup>34</sup> zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—iMen ndzondoo nac Dian! iMen ndzon nac xnaxnazh ne!

Zig chop hor bre zho ga sca roptsie zho.

<sup>35</sup> Dzigo brie me men ne zobnabey ga, blunia me lo zho cuedze zho; zeene laa zho

bredze, psilo me bnee me lo zho rëb me:

—Gol gona ganle, grëse miech lo guidzliu nan zho guiedz rii zob nazhnazh Dian, nan wen zho gbaa biet me zob me nu; <sup>36</sup> tsod zha ne guiab led scada. iPe nac nadien ne squitaa rac to? Gol guien ganle nonguielda i squi lëelëd dieen pe rzhixcuaa to. <sup>37</sup> Gol wi ganle, laa to ziaad-zo grop zha rii nu, ipe nadien been zho? Nacd zho cho zha ne quiaguitnie yadoo, cho zha ne nozhidzniegaa xnaxnazh ne. <sup>38</sup> Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. iGa glisqui zho pe run tib, pe run gaa stib! <sup>39</sup> Laa telne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien zha niaca. <sup>40</sup> Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

<sup>41</sup> Blozhse sca bnee me laa me wbi lo zho ga, niicle zha-gaaw laa zho zey.

## 20

*Güey Pabl nëz Macedon ni nëz Gres*

<sup>1</sup> Zeene laa ruid co blëz, dzigo bredz Pabl grëse zha ne riladz Jesús, bnee me lo zho zaacse gac zho. Blozhse bnee me lo zho, laa me brie ga zie



me nēz xtan zha Macedon; <sup>2</sup> güeynee me lo grē zha ne rlıladz Jesús nēz co, pso me diidz lo zho zaacse gac zho. Nēz co brieē me bdziñ me nēz Gres. Ga blēz me tson mēē.

<sup>3</sup> Laa zeēne laa me gbi ga tsie me nēz Siria, laa me ziele sēēb me barcw zeēne gocnan me laa zha Israel ne no ga bnediiz pa tsietin zho me, nacne güeydaque me barcw, mazd bio me nēz güeyted me nēz Macedon.

<sup>4</sup> Blalaa zha ne bzēnal biogza no me, bzē ti men Berē lē Sópater xingan ti men lē Pirr; bzē chop zha Tesalónica, Aristarco ni Segund; ti zha Derb lē Gay, Timoté, ni schop zha nēz Asia, Tíquico ni Trófimo. <sup>5</sup> Goļ no Filip laa zho bner, per biaan no diidz Troas cuēz zho no; <sup>6</sup> laa no bliaaz ga, ga bdieed no lni Pascw. Zeēne bded lni co laa no bziaab barcw, laa no brieē ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

<sup>7</sup> Zeēne goļ dze dmingw, bio no yu ne rcaalsa zha ne rlıladz Jesús ga. Ti yu tson xcuaaw, laa no pcaalsa par dziuun no xtsee ne psan Jesús diidz ga guñ grē zha ne rlıladz me. Laa no ndxie grē no, dzigo psilo Pabl pseed me no; nzian ncuane nonee me lo zho sac guini liu co laa me grieē ga; goļ groļ guieela rsi-aaldaqe me. <sup>8-9</sup> Nzian nac biini ne noquia len yu co; zatne nac ro ventan ga zob ti niib lē Tic. Wdzeelaaw rsi-aaldaqe Pabl, tibaque bzhen

mcaal niib co, wbix niib ga biab niib nēz ley; ni glaaw, len yu ne riaan glaaraa ga ndxie no. Zeēne güeylis zho niib laa niib gutle.

<sup>10</sup> Biet Pabl, bdziñ me lo niib bdeedz me niib.

—jGdziebde to! —rēb me—.  
jZrieeban niib!

jNi nligaaw brieēban niib!  
<sup>11-12</sup> Grēse zho per nli rley zho. Blozh ga bdzieep no glaa stib bdziñ no len yu co, dzigoraa bdiiz Pabl guietxtil pquiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

#### *Bdziñ Pabl Milet*

<sup>13</sup> Lban co psiaal Pabl, laa me wbi ga laa me zie nēz Ason nzēni me; laa no bziaab barcw bdiednieer no lo me. Bdziñ no Ason ga bli-aaz no me zigne biaan no diidz. <sup>14</sup> Zeēne blanso me lo no, laa no bziaab barcw gza no me bdziñ no guiedz Mitilen. <sup>15</sup> Biini liu brieē no Mitilen, bdieed no gax Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigoraa bdziñ no Milet.

<sup>16</sup> Biotieete no Efés, sac laa guic Pabl no gdziñniob me Jerusalén, zeena yгаа me lni Pentecostés. <sup>17</sup> Nacne zigne bdziñ no Milet pxeel me diidz Efés bredz me grē zha ne zo lo zha ne rlıladz Jesús ga. <sup>18</sup> Zeēne blanso zho, bnee me lo zho rēb me:

—Wen wen runbey to naa, nanle to ganle zha noxco naa noyun naa xtsiin Jesús men ne rnabey ne. Wlal

ne psilo ziyal naa nēz Asia nu, <sup>19</sup> blactaa biin naa lo grē minē bdeed naa, blactaa lo guielxtseeb ne ziyo naa, tibaque quianaḷ grē zha Israel quin zho naa. <sup>20</sup> Per gon to ganle, tibaque bioxco naa bialseed naa to minē nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu. <sup>21</sup> Grēse miecha, tibaque minē pseed naa zho, minē bne naa lo zha Israel mincoque bne naa lo miech stib guiedz; grēse zho bnee naa lo zho none csaan zho xquielntseeb zho dib zdoo zho gnalo zho Jesús, zeena gbig zho lo Dios.

<sup>22</sup> 'Scaque niina ne laa Espíritu Sant rnabey ga naa Jerusalén, nanḍ naa dien peraa nac ncuaane gdzieelo naa ga; <sup>23</sup> per nanpaa naa ible zgo zho naa ladzguiib, ible sacsi zho naa, sac guiedz ne gdziintaa naa min co rnee Espíritu Sant teed naa. <sup>24</sup> Lo guielxtseeb co no naa per rquiad zdoo naa xquielmban naa; minē nziuuraa lo naa laga gdeeda diidz ib laa naa no gne lo miech pa lotaa rleynie Dios zho, zeena inegley naa csiaal naa dziin ne bzo Jesús naa nu quiayun naa. <sup>25</sup> Rien naa lo grē to ne nac to zha ne bialseed naa gocnan to zha nac xnēz Dios, gandraa to lo naa lo guidzliu rii. <sup>26-27</sup> Laa naa pseedle to grēse minē nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga.

<sup>28</sup> Golguien sca, igolquianap to, ni scagaa golquianap grē zha ne zo to lo! iGolwi ganle xnēz Dios no zho, haxta lo cruz gut Xpēed me bdiizh me xtolzho! Ni stiba, jib Espíritu Sant bzo to yquianap to zho zigne rquianap baxtor xpēcwxiil zho!

<sup>29</sup> 'iNsin golso! Sac rienle naa zeene laa naa gbiche lo to, ib zrieequia grē zha ne guiaad guiaadquidie to, zguib zho zha gnitlo zho to zigne run grē coyot mēcwxiil. <sup>30</sup> Haxta lad to, zrieequia bla zha ntseeb ne ctsēē Xtiidz Dios, squiil zho to tsienal to zhiwseed zho. <sup>31</sup> Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to. <sup>32</sup> Dios nac men ne gacniē to, laa naa rsan to ladznia me grēse to; Xtiidz Ndzon me minē rnee ganle zha nquialadztaa me to, lēew lozh quix biini to dib zdoo to gnalo to me, zeena ygaa to zaatne gneedz me cuēz to grē to zha ne noraa xnēz me.

<sup>33</sup> 'Waltaa ib rzobladd naa dimi, ib rzobladd naa lar, guiep naa tebaa zha yquianie naa grē ncuaan co. <sup>34</sup> Len dze ne blēz naa lo to, gon to ganle niapse nia naa bdziniaa naa ncuaane pquiin naa, ncuaane pquiingaa grē zha ne bzēnie naa. <sup>35</sup> Ga blu naa lo to ganle, ib none dziuun ne dziin zeena grieelo dziuun ne xyudar zha ne guiēnd pe yquiin. Ib riaanladzd naa xtiidz Jesús

men ne rnabey ne, zeene znu bnee me: “Mazdraa nroob guielbley ne rgaa zha ne rgad, lëdle zha ne rad.”

<sup>36</sup> Zeene blozh bnee Pabl lo zho, laa me pquitsgzhib ga grë me zho bzodiidznie zho Dios. <sup>37</sup> Blozhse ga, tibga tibga zho wbig bnee zho lo me, bnaaz zho nia me, bdeedz zho me. <sup>38</sup> Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonëz zho me zaatne sëëb me barcw.

## 21

### *Biire güey Pabl Jerusalén*

<sup>1</sup> Blozhse bzhiene no nia grë zha Efés co, laa no bziaab barcw, laa no zio bdziñ no ti lo guidzliu win ne no lo nis-doo co lë Cos. Biini liu briece no ga bdziñ no lo sti guidzliu win co lë Rodas. Rodas briece no bdziñ no guiedz Pátara.

<sup>2</sup> Guiedz Pátara, ga bziaab no ti barcw ne zie nëz xtan zha Fenicia. <sup>3</sup> Zeene zieded barcw co ngali zaatne riaan guidzliu win ne lë Chipr, bui no nëz revés rlupaa guidzliu co. Laa no zio haxta bdziñ no guiedz Tir, xtan zha Siria, ga blëz barcw co biet grë yo ne neya.

<sup>4</sup> Zigne bdziñ no ga bdzieet no barcw bziaab no lad guiedz co, biodziel no grë zha ne rliladz Jesús ga; bliazaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

<sup>5</sup> Zeene laa no briece ga, grëse zha ne rliladz Jesús

grë tsieel zho grë xpëed zho biaad-zonëz zho no ro nis co; dzigo lo yuzh co ga pquitsgzhib no grë no, bziodiidznie no Dios. <sup>6</sup> Blozhse bzhiene no nia zho, laa zho wbi ga.

<sup>7</sup> Briece no Tir bdziñ no guiedz Tolemaid, ga bió no bioquiaabdiuzh no grë zha ne rliladz Jesús ga, bliaz no lo zho tib dze. <sup>8</sup> Biini liu briece no ga bdziñ no guiedz Cesarea, ga biobiaaz no lidz ti men ne noneeque Xtiidz Dios lo miech, lë Lip. Lë Lip co ga gogza sxoops zha ne bzo been xyudar zha poxtl. <sup>9</sup> Quianie me tap ndzooop ne gard ctsieelnia, gzase zho bdeed Dios guielbiini lo zho rnee zho tel pe nac mine racladz Dios gacnan miech.

<sup>10</sup> Nzianle dze goc no no lidz Lip, zeene blanso ti men ne ziaad nëz Judé lë Agab, biadquiaabdiuzh me no. (Ye me rnee tel pe nac mine racladz Dios gacnan miech.) <sup>11</sup> Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, në me:

—Znu gon rnee Espíritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

<sup>12</sup> Grë zha ne rliladz Jesús ga, zeene bin zho sca rëb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no. <sup>13</sup> Pquiaabaque me në me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa

Jerusalén, niicxe haxta gut zho naa waa porne rleynie naa Jesús. ¡Loxaque rsiaab guielnë to naa i gon squi rac to!

<sup>14</sup> Bdzianse no nlid yquiaa-diag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

<sup>15</sup> Bdedse ga bzhixcuaa no laa no brieeg ga, laa no zio nëz Jerusalén; <sup>16</sup> blalaa zha ne rliladz Jesús Cesarea ga bzënal zhits no, bzënie zho ti men Chipr lë Mnasón. Izle rliladz me Jesús, lidz me biobiaaz no zeene bdziñ no Jerusalén.

<sup>17</sup> Grë zha ne rliladz Jesús Jerusalén, rley zho zeene gon zho laa no bdziñ, blëzlo zho no.

<sup>18</sup> Biini liu co güeynie Pabl no lidz Jacob bioquiaabdiuzh no me, lëëtaque laa grë zha rnabey ne zo lo grë zha ne rliladz Jesús Jerusalén ga, ndxie ga. <sup>19</sup> Blozhse pquiaabdiuzh Pabl grë zha co, dzigo psilo me bzodiidz me lo zho grëse zha gocniën Dios me güeyseed me grë miech stib guiedz. <sup>20</sup> Zeene bin zhow per nli rley zho, rdeed zho xquizh lo Dios; dzigo rëbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho miñe rnabey Xley Moisés. <sup>21</sup> Grë zha ne no nu bin zho laa luu güeyseed grë men wladz ne no guiedz zit, nac diidz blu luu lo zho tsienal draa zho Xley Moisés, codraa zho xpëed zho bey,

niicle tsienal draa zho grë zhiwseed xmengol ne. <sup>22</sup> ¿Zha ganle dziuun ne? Sac zeene gon zho laa luu blanso, ible ziaadguib zho luu. <sup>23</sup> No tap bets ne nu ziaadyoble gun zho miñe bnee zho lo Dios; miñe gaca güey <sup>24</sup> güeynie zho yadoo, golgun grë miñe rnabey ley, bdiizh ctsiib guic to gza to; zeena ga gan grë zha rii ganle nlid grë miñe rnee miech luu ga.

<sup>25</sup> 'Sangue grë miech stib guiedz zha ne rliladz Jesús, laa no pxeelle diidz lo zho zigne bzodiidz ne nu: grë ma ne rut miech rgogon zho lo zhindio zho, gowd zho bëel co; grë ma ne rxieed ren zeene ret ma, gowd zho ma; ni niicle grëgaa ma ne gut zho, ib gowd zho xchen ma; grë zha bgui, nodne tsonie zho wnaa ne nacd tsieel zho; niicle wnaagaaw, nodne tsonie zho mgui ne nacd tsieel zho.

### *Bnaaz zho Pabl*

<sup>26</sup> Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho. <sup>27</sup> Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nëz Asia laa me no leñ yadoo. Nacne wbig zho <sup>28</sup> bzheñ zho zhicw me, roptsie zho rnee zho:

—¡Grëse to menguiedz!  
 ¡Golgun xyudar no gnaaz  
 ne men rii! Sac lëe me ga  
 quianzë quiaseed me zha  
 wladz glëenie zho ladz zho,  
 rnee me lo zho gundraa zho  
 grë mine rnabey ley, gapdraa  
 zho respet yadoo rii; haxta  
 grë zha zit zizëebnie me nu.  
 ¡Noguitniele me lugar nda rii!

<sup>29</sup> Sca rnee zho, sac gon  
 zho Pabl len guiedz Jerusalén  
 ga ziegrop me ti zha Efés  
 lë Tróximo, dzigo rzac zho  
 güeynie me zha co len yadoo.

<sup>30</sup> Pe ga bin grë menguiedz,  
 grëse zho bdzin wbigbe zho  
 lo Pabl bdoobniu zho me blee  
 zho me len yadoo, zigne blee  
 zho me ga lëelëd psioog zho  
 ro yadoo; psilo zho noguin  
 zho me, nan zho gut zho me.

<sup>31</sup> Zeene gocnan men ne rn-  
 abey lo menguiib ne ndxie ga  
 laa ruid co noyac, <sup>32</sup> lëelëd  
 brieenie me grë xmenguiib  
 me ni grëraa zha ne rnabey  
 lo zho. Zeene gon grë zha  
 ne noguin Pabl ga, laa grë  
 menguiib co bdzin, dzigora  
 blëz bdiñ zho me.

<sup>33</sup> Dzigo wbig men rnabey  
 co, bnabey me grë zhaguiib  
 co bzoob zho Pabl chop  
 caden. Bnabdiidz me lo grë  
 miech co dien cho nac Pabl,  
 pe quiayun me ne scataa  
 rlëenie zho me. <sup>34</sup> Psilo zho  
 nguiedz roptsie zho, zhaase  
 zhaase ncuane rcaadzdoj  
 zho me. Gonse men rnabey  
 co rlud dien pepaa rlisqui  
 zho, nacne bnabey me grë  
 menguiib co ziesan zho Pabl  
 yu ne rbëzpaa zho.

<sup>35</sup> Laa grë menguiib co csilo  
 soquianie Pabl lo scaler ne  
 rdzin ro yu co, gataa mazd  
 bzoobyan zho me, sac ntseeb  
 rac grë miech co; <sup>36</sup> nalbe zho,  
 roptsie zho rnee zho:

—¡Golnitlogazh men qui!  
 ¡Niinagazh golgut me!

<sup>37</sup> Laa grë menguiib co  
 csëeble me len yu co, zeene  
 bnee me lo men rnabey co,  
 rëb me:

—¿Pe zrieelo gne naa ti  
 xtidz naa lo luu?

Dzigo rëb men rnabey co:

—¿Mod rac luu rnee luu xti-  
 idz zha Gres? <sup>38</sup> ¿Led luud ga  
 dzigo nac ti zha Egipt ne psilo  
 racntseeb lo gobiern len dze  
 rii? Nac diidz, tap mil zha  
 ntseeb nacie zho, laa zho  
 ziese nëz dan.

<sup>39</sup> —Led naada —rëb Pabl—  
 men Israel nac naa. Guiedz  
 Tars gol naa, lëe guiedz co  
 nac mine nroobraa lo grë  
 guiedz ne ngab Cilis. Na  
 laa naa rnab lo luu, been  
 guielnzaac bneedz diidz gne  
 naa chop lan xtidz naa lo grë  
 miech qui.

<sup>40</sup> —Zaca —rëb men co.

Lo scaler co zo Pabl blunia  
 me lo grë miech co cuedze  
 zho. Zeene laa zho biacdze,  
 dzigo psilo me bnee me xti-  
 itsë me grë me zho, rëb me:

## 22

<sup>1</sup> —Grëse to men wladz, laa  
 naa rzaac to zig ti bets naa  
 zig pxozgaa naa, golquiaadiag  
 mine gne naa nu ganle zeena  
 gacnan to quiayund naa mine  
 rquiaqui to naa.

<sup>2</sup> Zeene gon zho xtiidz zho rnee me, grëse zho dzese bre zho; dzigo rëb me:

<sup>3</sup> —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow.

<sup>4</sup> Miñe been to nu nadze, ye naa blactaa squi ben naa ptsidil naa grë zha ne riladz Jesús, pquianañ naa ygaa zho guet zho; mgui wnaasaque razobdoo naa zho lidz zho rasan naa zho ladzguiib.

<sup>5</sup> Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndzinnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga riladz Jesús, nialnie naa zho Jerusalén nu nded zho caxtigw.

<sup>6</sup> 'Min copaa nagon brie naa nu za naa nëz co. Zhile gdziñ naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa. <sup>7</sup> Biabgazh naa liu, ga nix naa bin naa ti tsi men co rnee me lo naa: "Saul, Saul, ¿pe nacne quianañ luu naa?" <sup>8</sup> "¡Been guieñzaac bnë dien cho luu!", rep naa. Dzigo në men co lo naa: "Naa nac Jesús men Nazaret ne squi

quiatsidil luu."

<sup>9</sup> 'Grë zha ne zanie naa ga, bdzieb zho gon zho biini co, per biend zho pe rnee men co lo naa. <sup>10</sup> Dzigo rep naa lo me: "Bzhiguiel bnë dien, ¿pe racladz luu gon naa niina?" Nëchaa me: "Guche i, güey Damasc ga gnë zho ganle pe nac miñe no gon luu."

<sup>11</sup> 'Dzigo bzhen zha ne zanie naa ga nia naa, bdzinnie zho naa Damasc; sac lo biinidoo co pcow lo naa. <sup>12</sup> Ga no ti mgui lë Ananí, zëeb diidz rioxco me grë miñe rnabey ley, grëse men wladz ne no ga nanpaa zho ti men wen nac me; <sup>13</sup> dzigo biaad me zaatne blëz naa ga, në me lo naa: "Saul, niinagazh gon bets laa luu gbiire gwi stib." Zigne sca bnee me laa lo naa biac, gongazh naa me. <sup>14</sup> Dzigo nëchaa me lo naa: "Dios men ne bliladz grë pxozgol ne, ib men co bzooblo luu gacnañ luu pe nac miñe racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co. <sup>15</sup> Ib laa me bzo luu tsienee luu lo miech miñe bzhaac luu ga, miñe bin luu ga. <sup>16</sup> Guso i sca, zeena chobnizgazh luu. Dib zdoos luu bredz Jesús, bnab lo me csañmbe me luu lo xtol luu."

<sup>17</sup> 'Zeene laa naa blanso Jerusalén nu, tib dze lëëtaque no naa yadoo nozodiidznie naa Dios, <sup>18</sup> tibaque blulo me lo naa në me: "Na zeena biobladz brie Jerusalem nu, sac ib gliladz grë miech rii

mine gnee luu zeene gnee luu xtidz naa lo zho.”<sup>19</sup> “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rliladz luu, rnabey naa rguin zho zho ni rio zho ladzguib,<sup>20</sup> niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.”<sup>21</sup> Dzigo në me lo naa: “Na zeena pcaaniob nëz brie nu, sac gon laa naa cxel luu stib dan tsienee luu xtidz naa lo grë menzit.”

<sup>22</sup> Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡Ib rieguialdraa gban men qui! ¡Golnitlogazh me!

<sup>23</sup> Nguiedz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

<sup>24</sup> Dzigo psëeb men rnabey co Pabl len yu co, ni bnabey me grë menqui co quin zho Pabl, zeena cueero Pabl dien pe nac ncuaane been Pabl, zha nac ne scataa rac grë miech co lo Pabl.<sup>25</sup> Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guielwxtis dien pe nliipaa no xfalt zho?

<sup>26</sup> Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

<sup>27</sup> Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

<sup>28</sup> Rzedz yan men rnabey co rëb me:

—¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangue naa, desde gol naa bgab naa lo zha Roma.

<sup>29</sup> Grë zhaguiib ne bzo nguin Pabl ga parne cueero me, lëëlëd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguin zho ti zha Roma.

*Bnee Pabl lo wxtis Israel*

<sup>30</sup> Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuaane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

## 23

1 Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanaid naa ncuaane rdziguiend me.

<sup>2</sup> Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—iGolcap ro zha qui!

<sup>3</sup> Dzigo rëbchaa Pabl lo me:

—iTebaa squique cap Dios ro luu! iNac luu gon zig ti lidz nguts loxaque nëz zhitssew stib rna! iPa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

<sup>4-5</sup> Pquiabbe zha ne ndxie ga rëb zho:

—iBien ganle lo pxoz nroob i, lo men ne quiayun xtsiin Dios i noquiabro luu!

—Golgun dispensar —rëb Pabl—. Nand naa lëe pxoz nroob i, tel niaca mine nan naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

<sup>6</sup> Zeene bien Pabl grol zha wxtis co zienal zhiwseed zha saducé, zgrol zho zienal zhiwseed zha farisé, dzigo psilo me nguiedz bnee me rëb me lo zho:

—iGrëse to bets, golgona ganle, zha farisé nac naa, niiclegaa pxoz naaw farisé goc me! iNi porne rliladzpa naa gon zrieeban zha ne ret, min co gane znu zo naa lo to nu!

<sup>7</sup> Zeene sca rëb Pabl, psilo zho bdildiidz zho. Goc zho chop dii, <sup>8</sup> rree zha saducé rnee nlid grieeban zha ne ret, nlid no anjl, nlid no espíritu; laa zha fariséga na rnee zrieeban miech, no anjl ni no espíritu. <sup>9</sup> Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ini ti falt rapd mgui qui! iPe nadien dziuun ne? Nend ti espíritu ga, ti xanjlgaa Dios ga sca bnee lo me.

<sup>10</sup> Zeene gon men ne rnabey lo menguiib ga, laa lo xtil zho noyac nroobraa, bdzieb me rëb me nend znuse gzhi-izh zho Pabl; bnabeya que me gocredz menguiib güeyxi zho Pabl biire güeysan zho me len yu ne rbëz zho ga.

<sup>11</sup> Gol guieel co, blulo Dios lo Pabl rëb me:

—Gdziebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

*Gocladz zho niut zho Pabl*

<sup>12-13</sup> Zeene biini liu, ndziibsraa choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho mine rnee zho maase csiaabzi Dios zho. <sup>14</sup> Dzigo güey zho lo pxoz ne rnabey, lo grë zha ne nac zha non lo menguiidz, bzodiidz zho mine no guic zho ga, ni rëb zho:

<sup>15</sup> —Nana gon, golnab lo men ne rnabey lo menguiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle zioambiaaz. Zeene laa zho tednie Pabl, ga dziuut no Pabl.

<sup>16</sup> Dieen zha bin ti xingan bzian Pabla, nacne lëëlëd güey win yu ne rbëz menguiib ga güeynie win diidz lo Pabl. <sup>17</sup> Dzigo bredz Pabl ti zha ne rnabey lo menguiib co, rëb Pabl lo zho:



—Bzhiguiel güeynie mëed rii lo men ne rnabey to, sac laa win no tsienie ti diidz lo me.

<sup>18</sup> Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguiib ga bnaab lo naa guialnie naa win.

<sup>19</sup> Dzigo bzhen men rnabey co nia win, güeynie me win stib nëz, bnabdiidz me lo win dien pe nac diidz ne zienie win lo me. <sup>20</sup> Dzigo rëbchaa win:

—Laa zha Israel gon bnediidz gnab zho cxeel luu pxey naa Pabl lo zhiwxtis zho gzhe, yquiaalo zho gnë zho noraa pe yquiep zho me. <sup>21</sup> Bzhiguiel gliladzd luu xtiidz zho, sac ndziibsrac choo zha ne nacgrë zho rëb zho laa zho tsiesoblan nëz gutgazh zho me zeene laa me ted. Biaan zho diidz grë zho, gowd zho, ni tib ro peet guied zho haxta gut zho me; haxta rëb zho tel laa zho gund min co maase gdzibdee Dios zho. Ible zun zhow, loxaque quiambëzse zho dien pe guiab luu.

<sup>22</sup> Blozhse ga dzigo bzonëz me win, ni pso me diidz lo win choot lo gneed win ne laa win güeynie diidz lo me.

*Güey Pabl lo gobernador Wech*

<sup>23</sup> Lëälëd bredz men rnabey co chop zha ne zo lo menguiib, rëb me:

—Laa zhaguiib gon none griee naguieel tsie zho Cesarea, na zeen golzo zha ne tsie; none tsie chop gayoo zha ne sëni, tsongal tsii zha ne sob guay, schop gayoo zha ne güey lanz. Naguieelgazh, zig rlozh xtsee none griee zho nu; <sup>24</sup> sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinnie to me lo gobernador Wech Cesarea.

<sup>25-26</sup> Dzigo pquiaa me ti guits ne güey zho gdziinnie zho lo gobernador, rneew:

“iDiuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

<sup>27</sup> ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho. <sup>28</sup> Gocladz naa niacnan naa dien zha nacne rlëënie zho me, dzigo bianie naa me lo zhiwxtis zho. <sup>29</sup> Ga gon naa led ncuaane rnad rlëënie zho me; tel zha nac xley zho ncuaan co rlisqui zho; nacda ncuaane guiab ne rieguial guet me, tsogyugaa me ladzguiib. <sup>30</sup> Zeene

gocnan naa laa palal zho bnediidz gut zho me, nacne bnabeyaque naa ziaadsan grë menguiib qui me lo luu i. Niiclegaa zha ne rlëënie mew, laa naa rep lo zho guiaad zho lo luu i, zeena i gnë zho dien zha nacne rlëënie zho me.

“Lëed bii g dzieel ne sca dien.”

<sup>31</sup> Zeene laa liu pcow, zig rlozh xtseew laa grë menġuuiib co pcaanie Pabl nëz; dib guieel bio zho nëz bdziñnie zho me guiedz Antípatris. <sup>32</sup> Biini liu, loxaque zha ne zob guay ga pcaa nëz zienie zho me Cesarea, laa grëraa menġuuiib co w bire bdziñ Jerusalén stib.

<sup>33</sup> Zeene bdziñ zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

<sup>34</sup> Blozhse blab me lo guits co, dzigo b nabdiidz me lo Pabl dien pa guiedz gol Pabl. Dzigo rëbchaa Pabl lo me, zha Cilis nac Pabl.

<sup>35</sup> —Nasca —rëb me—, zeene laa zha ne rlëenie luu glanso nu, dzigo yquiaadiag naa dien zhapaa nac xtił to.

Dzigo b nabey me, pquianap menġuuiib Pabl zaatne nac len xyulow Herod.

## 24

*Gocredz Pabl lo gobernador Wech*

<sup>1</sup> Zeene goc gaay ngbidza, laa Ananí men ne rnabey lo pxoz bdziñ ga, gza me blalaa zha ne nac zha non lo menġuiedz Israel, zienie zho ti licenciad lë Tértulo; grë zho laa zho zie zienie zho diidz lo gobernador pe nacne rdilnie zho Pabl.

<sup>2</sup> Dzigo b nabey gobernador gocredz Pabl. Zeene laa Pabl bdziñ, psilo licenciad co bzeet me grë ncuaane rquiaqui zho Pabl, rëb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban menladz no niina, blactaa ncuaane yquiin lo no noyun luu. <sup>3</sup> Rzac zdoo now, tel pa lotaa zo no rsoladz no luu nac luu men ne rnabey no. <sup>4</sup> Nli nonguielda dziunneed no luu, per been ti guielnzaac pquiaadiag ganle pe nac ncuaane rlisqui no quiayun mgui ne zo lo ne nu.

<sup>5</sup> 'Masaque nac me lo no zig nac ti guielguidz dox ne rded, grëse guiedz quianzë me noyungüet me menladz no gacndaan zho lo men ne rnabey no. Lëe me ga zo lo grë zha ne rnee zho nazaren. <sup>6</sup> Zeene bgaa me, lëetaque laa me no len yadoo ro ne zob Jerusalén quiayunnguzee me xyadoo no. Nacne gocladz no gagazh nguizh me falt co zigne rnabey xley no; <sup>7</sup> per bi-aad Lisias grë xmenġuuiib me ntseeb rac zho biaadla zho me lo no. <sup>8</sup> Na nagon zac luuzhal yquiep me, zeena gan luu ganle nli quiayun me grë miñe rnee no nu.

<sup>9</sup> Grë zha Israel ne zienal ga, pquiabbe zho rëb zho nli quiayun me grë miñ co.

<sup>10</sup> Dzigo blunia men ne nac gobernador ga lo Pabl gnee Pabl; nacne psilo Pabl bnee me rëb me:

—Nanle naa ziele iz zob luu nu rquiaadiag luu grë ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

<sup>11</sup> 'Na rac tsiipchop ngbidz ga bdziñ naa Jerusalén, biagan naa Dios len yadoo nroob ne zob ga (niicle tel niaca mine griece diidz ganle). <sup>12</sup> Laa naa bia Jerusalén biagan naa Dios, choot biatilnied naa ga; niicle len grêragaa yadoo wina, ro nêzgaaw, wlaltaa noquild naa miech cho lo gacntseeb zho. <sup>13</sup> Grêse mine rquiaqui grê zha qui naa grieelod glu zho nliw, sac led ncuaañe godca.

<sup>14</sup> 'Mine nac diidzli, niina wriin psañ Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanañ naaw, dib zdoo naa quiayun naa dziin lo Dios men ne bliladz pxozgol no; ni scaquegaa, noxco naa grêse mine nac ley. Rliladz naa grêse mine bnee grê zha ne biadteed xtiidz me. <sup>15</sup> Rliladz naa zdziñ dze ne cueeban Dios grêse miech, zigtaa zha wena zigtagaa zha ntseeba, ni haxta zha ye zho rliladz min co. <sup>16</sup> Ni min copaa nagon gane tibaque noxco naa guiaanmbe zdoo naa, gunaldraa naa xtol naa zigtaa lo Diosa zigtagaa lo samiech naaw.

<sup>17</sup> 'Nod naa Jerusalén tibaque, blale iz goc no naa ladz menzit; dze ne bdziñ naa Jerusalén ga, laa naa bia porne zasañ ti gon lo menladz naa ni zanie naa ti gon ne gded naa lo Dios. <sup>18</sup> Min co nagon nacne no naa len yadoo zeene gon grê zha qui naa. Blozhle ben naa grê mine rnabey xley no

rdziuun no zeene sca riosan no gon, zeene laa bla zha Israel ne no nêz Asia blanso lo naa ga; per choot miech taf ndxienied naa ga, niicle choot noquildgaa naa. <sup>19</sup> Zha co nagon rieguañ niaad nu, nlisqui zho tel pe ncuaañe rzac zho nonguield noyun naa ga. <sup>20</sup> Zha ne ndxieggaa nu niina, zac gnê zho telne brieequia falt ne rquiaqui zho naa zeene gocredz naa lo wxtis Jerusalén. <sup>21</sup> Te goon falt ga naye ben naa, lëë gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa zdziñ dze ne grieeban miech." Scase nagon naca.

<sup>22</sup> Nanle gobernador co led ncuaañe gund zha ne rliladz Jesús ga rquiaqui zho Pabl, dzigo bnee me lo zho cuëz zho nieeda gdziñ Lisias, dzigo dien zhapaa guiaan xtil zho. <sup>23</sup> Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted grê zha ne ndzieeldiidz Pabl tsiegan zho Pabl.

<sup>24</sup> Goc blalaa ngbidza, bnabey gobernador co gocredz Pabl lo me grop tsieel me Drusil, ti wnaa Israel. Laa me bredz Pabl, sac racladz me yquiaadiag me dien zha nac zhiwseed Jesús. <sup>25</sup> Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me

bdzieb, rëbchaa me lo Pabl:

—iLëëlewgā na nadien! Na zeene guioaba, dzigo naazhal cuedz luu guiaad luu ziodiidz ne stib.

<sup>26</sup> Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

<sup>27</sup> Zeene goc chop iz sca no Pabl ladzguiib ga, laa Wech brieë guielgobnador, bzëëb ti men lë Pons Fest. Niicle brieë Wech per psilaad me Pabl, sac racladz me dien zha guianenziuuraa me lo grë zha Israel.

## 25

*Güeyzo zho Pabl lo gobnador Fest*

<sup>1</sup> Zeene goc tson ngbidz bdzin Fest Cesarea pcaania me guielgobnador, laa me brieë güey me Jerusalén.

<sup>2</sup> Grë zha pxoz non ni grë zha ne rnabey lo mengüedz Israel, zeene bin zho laa Fest bdzin Jerusalén lëëled güey zho lo me güeyxob zho xdemand Pabl; ni <sup>3</sup> bnab zho lo me cxeel me Pabl Jerusalén. Laa zho rnab min co sac laa zho bnediidzle, nëz tsiesoblan zho, yquiambëz zho ted Pabl gut zho Pabl. <sup>4-5</sup> Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me gbiire guey nëz co dzigo zac tsienal zho zhits me.

<sup>6</sup> Ndziibsrāa ti zhmal blëz me Jerusalén ga, dzigo laa me biire zey Cesarea. Zna

dze bdzin me biinigazh liu co güey me yulow, bnabey me gocredz Pabl. <sup>7</sup> Laa grë zha Israel ndxiele ga, wbig zho lo Pabl ndal grë falt nroob ne rcaadzdoj zho me, per loxaque diidzsew, guiend zha glu zho ne nlipaa goca. <sup>8</sup> Dzigo pquiab Pabl rëb Pabl:

—Grëtaa mine rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

<sup>9</sup> —iPe racladzdga luu tsie luu Jerusalén? —rëb Fest—. Ga gbiire yquiaadiag naa xtil to i zeena glu dien chopaa rap doj.

Sca rëb me, sac racladz me dien zha guianenziuu me lo grë zha Israel. <sup>10</sup> Dzigo rëbchaa Pabl:

—iGad naa! iNod pe nac ga naa ga, to rieguial gun guielwxtis rii! Benque nan wen luu ganle peet falt nzëëbd naa lo zha Israel. <sup>11</sup> Tel niaca mine nli ziyun naa pe guientseeb ne raguial naa guet naa, maase guet naa. Per na nānpaa naa ni ti ncuaane rquiaqui zho naa i nlid, ipe nac dzigo cho co naa ladznia zho gut zho naa? Laa naa racladz, mazd golneedz diidz tibaque ga naa lo zhiwxtis nroob ne, men ne zob Roma.

<sup>12</sup> Dzigo bzodiidz Fest grë me men rac ne nacie me dziin; blozhse ga rëbchaa me lo Pabl:

—Guiend rson sca. iTel lo César racladz luu tsie luu, na maase tsie luu!

*Gocredz Pabl lo Agrip*

13 Zeene goc bla zhmala, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest. 14 Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu, 15 laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me. 16 Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nlidgaaw; 17 nacne biaad zho nu. Zna dze blanso zho, biinigazh liu co bnabey naa gocredz me. 18 Tibaque ni naa bod no pe ti falt nroob ne rquiaqui zho me, per zeene biaad zho yulow gon naa 19 lëe gdib tel zha nac grë ncuaane riladz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

20 'Zeene gon naa grë ncuaan co rquiaqui zho me nli riend naa zha gun naa, dzigo rep naa lo me, telne racladzga me zac tsie me Jerusalén ga dien zha guiaan lo xtil zho. 21 Per bnëd me, lel bnaab me tsie me lo César; gane niina laa me bii no i, nieda gne naa lo César dien

pa hor grieelo cxel naa me nëz co.

22 Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

23 Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rnabey lo mennguiib, grë zha non lo mennguedz, nal zho zhits me. Dzigo bnabey Fest gocredz Pabl, zeene laa Pabl bdziñ 24 laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe men rii nagon rlëenedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me. 25 Sangue naa gonle naa rapd me falt, par guiab ne rieguial guet me; per laa me bnaab tsie me lo César, na laa naa no cxel me nëz co.

26 'Nli riend naa dien pe nac diidz ne cxel naa lo César, ne squi lega ncuaane nlid rquiaqui zho me. Min co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzë xtiidz me; zeena togo zdziel naa pe nac diidz ne cxel naa gal dze ne laa me tsie nëz co. 27 ;Sac nonguield ga gun naa telne sobdoo me cxel naa me,

ni tel̄ cxel̄d naa diidz dien̄ pe  
nac xfalt me!

## 26

### *Bnee Pabl lo Agrip*

<sup>1</sup> Dzigo rēb rey Agrip lo  
Pabl, mezhāl gnee dien̄ zha  
naca. Nacne blis nia Pabl  
psilo Pabl bnee Pabl rēb Pabl:

<sup>2</sup> —Rley naa gon̄ rey  
Agrip ne laa naa zial̄ lo luu  
nadze, zeēna gzodiidz naa  
lo luu gacnaṅ luu gan̄le nlid  
grē ncuane rquiaqui grē  
men̄ladz naa naa. <sup>3</sup> Rley naa  
sac naṅ naa naṅpaa luu zha  
nac grē xcostumbr no, grē  
ncuane rliladz no. ¡Rnab  
naa lo luu sca, guieete luu  
yquiaadiag luu grē miṅe gne  
naa!

<sup>4</sup> 'Grēse zha Israel naṅ  
wen zho gan̄le zha mbaṅ  
naa, sac mēēdlas naa bdziṅ  
naa Jerusalén, ga broob naa.

<sup>5</sup> Naṅpaa zho zha farisé goc  
naa, ni zha farisé nac zha  
ne rioxcoraa ruṅ grēse miṅe  
rliladz zha Israel. <sup>6</sup> Per mazd  
gon̄, laa zho rlēē lo naa porne  
dib zdoo naa rliladz naa  
laa Dios been̄le miṅe psan̄  
me diidz lo grē pxozgol no.

<sup>7</sup> Grēse zha Israel, zigne ziaad  
zho lo gza tsiipchop dii ne  
psan̄ xmengol no, grēse zho  
dze guieel bii quiambēz zho  
gac miṅ co. ¡Masaque rzac zho  
dol̄ ga quiayun̄ naa rliladz  
naa laaw gocle! <sup>8</sup> Haxta  
to, zeēne rzet naa zrieeban  
miech, rzhidz to ron tow, ¿pe  
rzac to naa grieelod Dios guṅ  
me miṅ co?

<sup>9</sup> Glo nli ptsidil̄ naa grē zha  
ne rliladz Jesús men̄ Nazaret,  
masaque rzaac naa lēēw ga

quiayun̄ naa. <sup>10</sup> Pe zhidaa  
zha ne blo naa ladzguiib  
Jerusalén, haxta grē pxoz non  
bneedz diidz ben̄ naa grē miṅ  
co; ni zeēne rnabey zho ret  
grē zha co, ye naa rded diidz  
ret zho. <sup>11</sup> Nzian grē yadoo  
win bia naa, biasacsi naa  
zho haxta gneenē zho Jesús.  
Blēēniedox naa zho, haxta grē  
guiedz zit bia naa biaguib  
naa zho.

<sup>12</sup> 'Miṅ copaa nagon̄ brie  
naa za naa guiedz Damasc,  
masaque grē pxoz rnabey  
bneedz ti xtiidz zho bi naa laa  
naa za. <sup>13</sup> Tel̄ gan̄ luu gan̄le  
rey Agrip zha bzhaac naa:  
Zig rwe ngbidza, tibaque  
zeēne ziaad ti biinidoo nēz  
zhaṅ gbaa biab lo naa, ni  
lo grē zha ne zanie naa ga,  
nroobraa nac biini co lo  
xbiini ngbidz. <sup>14</sup> Grēse no  
biab liu, dzigo bin naa ti tsi  
men̄ co rnee me xtiidz no,  
bredz me naa nē me: "Saul,  
Saul, ¿pe nacne quianaṅ luu  
naa? Lēēque luu gon̄ nosacsi  
luu i, rzac luu zigne rzac  
ngon ne rcaanni, ni lēēque  
lo guiib lots ne rtseb zho ma  
riecaanni ma." <sup>15</sup> Dzigo rep  
naa: "Been̄ guiel̄nzaac bnē  
dien̄ cho luu." Nēchaa men̄  
co: "Naa nac Jesús, men̄ ne  
squi quiatsidil̄ luu. <sup>16</sup> ¡Na  
zeēna guche i, bzoli! Laa naa  
bredz luu zeēna guṅ luu xtsin̄  
naa, tsiezodiidz luu lo miech  
miṅe blozh bzhaac luu nu,  
ni grēragaa miṅe naraa gan̄  
luu. <sup>17</sup> Peet tsienied guic luu,  
naa yquianaap luu, niicle  
zhaladz luuw niiclegaa zha  
zita peet grieelod guṅ zho  
luu. Sac laa naa cxel̄ luu

grë guiedz zit <sup>18</sup> tsienee luu lo miech gacnan zho minë nacpaa diidzli, zeena greee zho lo ncow gbig zho nëz lo biini, greee zho ladznia mendox ygab zho lo Dios. Dib zdoo zho gliladz zho naa zeena gun Dios zho perdon, ni ygaa zho zaatne gdziñ grëse zha ne mbe zdoo.”

<sup>19</sup> Min co nagon rey Agrip nacne bioxco naa ben naa minë në men co lo naa ga. <sup>20</sup> Glose Damasc psilo naa bne naa lo miech, ga brie naa bdziñ naa Jerusalén, bia naa dib Judé ni grë guiedz zit, bne naa lo miech csaan zho grë xquielntseeb zho gbig zho lo Dios.

<sup>21</sup> Min co nagon nacne rlëenie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa. <sup>22</sup> Gocniën Dios naa, gane laa naa bii zo nu quiane naa Xtiidz me zigtaa lo grë zha wina zigtagaa lo grë zha nona. Noseete naa miech stib wseed, sinque laa naa rne minë bzeetaque Moisés ni grëragaa zha ne biadteed xtiidz Dios padzeela. <sup>23</sup> Tel zha, bzeetle zho ib sacsi miech men ne cxeel Dios ga, ni me gac men ne glopaa grieegan, me gac zig ti biini ne gziini lo grëse miech, zigtaa zha Israela zigtagaa grë menzita.

<sup>24</sup> Tibaque nguiedz bnee Fest rëb me lo Pabl:

—jBod rzhinle guic luu gon Pabl! jNe tibaque nagon rio

luu wseed gane squi riots xtiidz luu!

<sup>25</sup> —Coo, gobernador Fest —rëb Pabl—, led rzhind guic naa. Niapse minë nac diidzli min co none naa, <sup>26</sup> laa rey Agrip zob i, me nan ganle nli grë minë rne naa nu. Tibliladz naa none naaw lo me, sac nanpaa naa nan me nli minë rnee naa, nacda ncuaane goc ngueets zhlian. <sup>27</sup> jLed nli lëe rey Agrip rliladz luu minë bzeet grë zha ne biadteed xtiidz Dios padzeela? Nanpaa naa rliladz luuw.

<sup>28</sup> Pquiab rey Agrip, rëb me lo Pabl:

—jZlalaque nu gon laa luu cole guic naa ye naa sëeb xnëz Jesús!

<sup>29</sup> Dzigo rëbchaa Pabl:

—jNend zhilew o nroobra-gaaw, per rnab naa lo Dios led loxaque luudse sëeb xnëz me, sinque ye grëraa zha ne noquiaadiag minë none naa nu niina; zeena ygaa to minë bgaa naa nu, per led znud sob caden rii nia to!

<sup>30</sup> Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brie ga. <sup>31</sup> Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

<sup>32</sup> —Niapaa nsilaa ne me —rnee Agrip lo Fest—, telne nabd me tsiepaa me lo César.

## 27

*Pxeel zho Pabl nëz Roma*

<sup>1</sup> Bdziñ dzew, laa Fest bnabey tsie Pabl nëz Roma,

dzigo laa zho psan Pabl ladznia ti men ne rnabey lo men<sup>g</sup>uiib lē Jul, gza Pabl zlalaa zha ne no ladz<sup>g</sup>uiib ga. Lēē Jul co rnabey lo tib dii men<sup>g</sup>uiib ne rnee zho “Augusto César”.

<sup>2</sup> Ye no zional zhits Pabl grop no Aristarcō, laa no bzi-aab ti xbarcw zha Adramit zie grē guiedz ne ndxie ro nis nēz Asia, laa no pcaa nēz laa no zio.

<sup>3</sup> Biini liu co laa no bdzi<sup>n</sup> guiedz Sidón. Zeēne bdzi<sup>n</sup> no ga, wen goc Jul lo Pabl bdeed me diidz güey Pabl güeyquiaabdiuzh Pabl grē zha ne runbey Pabl ga, grēse zho rleynie zho me blēzlo zho me.

<sup>4</sup> Ga brieē no bdieed no tib ro guidzliu win ne lē Chipr, psaac guidzliu co palal, sac psilo rrieē me rtsire me barcw ne zio no ga. <sup>5</sup> Laa no zio, bdieed no gax ro guidzliu ne nac xtan zha Cilis ni xtan zha Panfil, bdzi<sup>n</sup> no ti guiedz ne ndxie xtan Licia lē Mira; <sup>6</sup> ga bdzieet no barcw ne zio no ga. Lēētaaque noguib Jul sti barcw ne guio no, laa ti xbarcw zha Alejandrí no grieē ga tsie nēz Italia, dzigo bziaab no barcw co laa no zio stib.

<sup>7</sup> Tsow ga zie barcw co, nzian dze goca, nen dzigo-raa bdzi<sup>n</sup> no gax guiedz Gnid; ib rbēzdaque me, nacne bguib zho dien pa nēz zhi rcaan me, dzigo güeynie zho barcw co nēz Cret. Tib ro guidzliu win co zio no bdieed no Salmon; <sup>8</sup> nen bdzi<sup>n</sup> no za-atne rnee zho Buenos Puer-tos, gaxle ga riaan ti guiedz

lē Lasé. <sup>9</sup> Nrooble dze goc no no lo nis, len dze co laa mēē nal psilole ni zēēb diidz gacd sē barcw len mēē co, nacne bnee Pabl lo grē zha ne zienie no ga, <sup>10</sup> rēb me lo zho:

—Gol<sup>g</sup>ona ganle, telne laa ne grieē nu len dze rii, rgobey naa ib znitlonie ne barcw rii lo nis.

<sup>11</sup> Laa ne niacnie Jul Pabl niac mi<sup>n</sup>e rēb Pabl ga, lel mazdraa bliladz me xtiidz zha ne rsēē barcw ni men ne nac bizhuana. <sup>12</sup> Stiba, zaatne nac Buenos Puertos ga rapda zaatne zaacse cuēz miech len mēē nal, nacne nzian zho rēb mazd gdzi<sup>n</sup> guiedz Fenice, ga zac gbiaaz no gdipse len mēē nal. Ro guidzliu win co riaan Fenice, nligaa zhi rcaan me ga.

<sup>13</sup> Zeēne laa ti me win ne znu ziaadquia psilo brieē lo nis co, zootle na nli grieedraa me. Nacne lēēlēd bnabey zho bziaab no barcw, blis-glaa zho lar nroob ne rcaan me rzēw, laa no zio, gax gax ro guidzliu co zienie zhow. <sup>14</sup> Zhisaque goca zeēne laa ti me dox ne rnee zho Nordest psilo brieē, laa me co psilo rtsire barcw. <sup>15</sup> Niicle racladz zho tsienie zhow nēz ne no guio no ga, per rsaand me; gonse zho led ncuaa<sup>n</sup>e gacda, mazd psaan zho zienie mew nēz ne racladztaa me.

<sup>16</sup> Scale zienie me barcw ne no no ga, biotieed no gax ro guidzliu win ne lē Clauda, ga nē nē brieelo blis zho grē canó win ne nal zhits barcw ga bzēēba nēz len barcw; <sup>17</sup> dzigo blibdoo zho barcw co zeēna gbīlda, ni



blit zho lar nroob ne rcaan me rzew, sac rdzieb zho rēb zho telne scaquia lar co nend tsieniezho mew nēz ro nis, pa tsiesobnagwa lo yuzh.

<sup>18</sup> Zeene biini sti liu co mazdraa rriēe me, ni guixoo ne ziaadnie me, nacne blee zho grē yo ne no len barcw blaal zhow lo nis. <sup>19</sup> Goc bion ngbidz scataa zo guie dox co, bnabeyaque zho blee no grēse ncuane runxtsiin zho len barcw blaal now lo nis.

<sup>20</sup> Goc bla ngbidza rbēzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no. <sup>21</sup> Niicle wagw choot rsoladzdraa, dzigo bnee Pabl lo grē zha ne ziogrē no ga, rēb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grē ncuane nodzian ne nu, niicle nlaaldgaa ne grē yo co lo nis. <sup>22</sup> Per laa ne znule bzhiac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd. <sup>23</sup> Led nanle to ganle, xnēz Dios no naa ni xtsiin me noyun naa, nieewdze pxeel me ti xanjl me <sup>24</sup> nē lo naa: “Gdziebd luu gon Pabl, peet gacd luu, sac ib none laa luu gdziñ lo rey ne zob Roma. Niicle grē zha ne ziadgrēe luu len barcw i peet gacd zho, sac bin me miñe rnab luu.” <sup>25</sup> Gane rne naa lo to peet tsienied guic to, nanle naa csaand Dios ne, ible zac miñe nē anjl co lo naa. <sup>26</sup> Ib tedsod, no pa ti lo guidzliu

win ne no lo nis rii tsiezo me rii ne.

<sup>27</sup> Zeene goc tsiida ngbidz sca nēzrii nēzrec zienie me no, laa no no lo Nisdoo Adriático. Wdze co, zig grol guieela, bien grē zha ne rsēe barcw ga gaxle ti ro guidzliu ga nonie barcw no; <sup>28</sup> dzigo ptiix zho dien palal quiet nis ga, gon zho loxaque gal yas guieta. Bzē zho spalal biire ptiix zhow stib, gale guieta loxaque tsiiptib yas. <sup>29</sup> Gataa laa zho bdzieb rēb zho nend pa tsiecaan barcw lo quie, dzigo psilēe zho lo doo ne zob gza tap guiib cruz nroob ne quia nēz zhits barcw, bron zho gza guiib co lo nis, zeena tsowga sē barcw; rzac zho tebaa laa liu biinile.

<sup>30</sup> Grē zha ne run dziin len barcw, gocladz zho nzhoon zho, psilo zho noxadz zho grē canó win ne ney barcw, rquiaalo zho zig nac zeene guiib cruz nroob ne ney barcw nēz quiaw quialit zho csēeb zho len nis. <sup>31</sup> Zeene gon Pabla, rēbchaa me lo Jul ni lo grē xmenguiib Jul:

—¡Laa grē zha rii gon racladz xoon! Csaande to, sac telne laa zho xoon nlidraa griequia to lo nis rii.

<sup>32</sup> Dzigo pchug grē menguiib co doo ne zob grē canó win co, bron zhow lo nis.

<sup>33-34</sup> Silgaw, bii ncow rnaw laa Pabl bnee lo zho gow zho, rēb Pabl:

—¡None gow to! Golwi ganle nale gac tsiin ngbidz ga ni ti lē peet gard gow to, ni squique

raguiesde to zaacse. Peet tsienied guic to, ni tib to peet gacd.

<sup>35</sup> Blozhse sca bnee Pabl lo zho, bzhen Pabl ti guietxtil, squi ndxie zho grē zho bdeed me xquizh lo Dios, dzigo beengroļ me guietxtil co laa me psilo wagw. <sup>36</sup> Dzigoraa peet güeyniedraa guic zho, ye zho laa zho psilo dow. <sup>37</sup> Lo grē no zig zio no len barcw co rgaa no chop gayoo tsongaltsiimtib.

<sup>38</sup> Blozhse bdioow no, dzigo laa zho blee grē zhobxtil ne zie len barcw ga blaal zhow lo nis, zeena gnitnē barcw spalal. <sup>39</sup> Zeene laa liu blozh biini, gon grē zha ne rsēē barcw ga laa ti lē ro guidzliu rlu gax ga, per riend zho dien paw. Natlaa nac ro guidzliu co, rlu zac gdziñ barcwa, nacne rēb zho dien pe grieelod gdzinnie zho barcw ga. <sup>40</sup> Dzigo pchug zho doo ne zob guiib cruz nroob ne no len nis ga, biaanse guiib co ga. Psilēē zho doo ne naaz yag nlag ne rchug nis rzē barcw, ni blisglaa zho lar nroob ne rcaan me rzēw; zeena csēē mew gdziña gax ro guidzliu co.

<sup>41</sup> Per ziese zho, lētse lo yuzh ne zobli len nis co güeysiba, loxaque güeysēēbguica ga laa nēz zhitsa psilo nobilaque, sac grēse nis ne rias riecaan choo co. <sup>42</sup> Dzigotaa laa grē menGUIIB co gocladz niut grē zha ne zie ga guey ladzguiib, rēb zho nend znuse xoobnis zho xoon zho. <sup>43</sup> Per bdeete

men ne rnabey lo zho diidz, sac racladzd me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co; <sup>44</sup> laa grē zha ne gacd xoobnis, zac maase grē yag biats ne nobil barcw xoobnisnie zho. Sca bdeeda diidz briequia no ro nis grēse no.

## 28

### *Blēz zho Malt*

<sup>1</sup> Zeene bdziñ no ga, dzigoraa gocndion no lēē guidzliu win ne lē Malt ga. <sup>2</sup> Grē miech ne no ga pquiadox zdoo zho no, bzēēg zho gui bredz zho no bdzēē no, sac lala rac nal ni scataque bgaa no guie.

<sup>3</sup> Ye Pabl güey güeytop chop lē yag ne cuib lo gui. Lēētaaque laa me nodziiba lo gui, tibaque bias ti meel ne zizhoon lo zhindzēē gui co, pquiaalay ma nia me, quiataque ma ga. <sup>4</sup> Grē miech ne no ga, zeene gon zhow rneechaa zho:

—iIse nagon rlu, nzēēb men qui ngutoo! Niicle blaa me lo nisdoo, per no guielwxtis ne quianab guet me.

<sup>5</sup> Znuse bdzib Pabl nia me bron me meel co lo gui.

<sup>6</sup> Grēse zho rwi quiambēz zho dien pa hor sigui me, te tibaque tsoibe me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

<sup>7</sup> Gaxaque ga quia tib lē liun men ne rnabey lo guidzliu win co lē Publ, dzigo

bneedz me zaatne bliiaz no ga tson ngbidz ni bneedz me ncuaane bdioow no.

<sup>8</sup> Lëëtaaque len dze co laa pxoz me nix rlan xlëe ni yoobchen. Dzigo güeynee Pabl lo me, bnaab Pabl lo Dios guiac me; blozhse bnaab Pabl lo Dios, pxobnia Pabl guic me, laa me biac. <sup>9</sup> Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho. <sup>10</sup> Dzigo rleynie zho no, nroob grë ncuaane bgad zho lo no. Zeene gol dze ne laa no wbii ga, scasaque nroob ncuaane yquuin no nëz bneedz zho.

<sup>11</sup> Tson mëe bliiaz no lo guidzliu co, dzigo laa no brieë ga bziaab no ti len xbarcw zha Alejandri, ti barcw ne blëz ga dipse len mëe nal co. Guic barcw co quia chop mdio, mdio ne rnee zho Cástor ni mdio ne rnee zho Pólux. <sup>12</sup> Bdzin no guiedz Siracús, ga bliiaz no tson ngbidz. <sup>13</sup> Siracús brieë no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdzin no guiedz Puteoli, <sup>14</sup> ga bdzin no lo blalaa zha ne rliladz Jesús. Bnaab zho lo no gbiaaz no, nacne bliiazaque no lo zho ga ti zhmal. Garaa brieë no bdzin no Roma.

<sup>15</sup> Grë zha ne rliladzle Jesús Roma, zeene bin zho laa no gdzin ga, brieë zho biaad-xinëz zho no. Zhis zho biadz-  
dieel no zaatne lë Foro de Apio, szhis zho biaad zaatne

lë Tres Tabernas. Zeene gon Pabl scataa biaad-xinëz zho no, rley me rdeed me xquizh lo Dios.

### *Bdzin Pabl Roma*

<sup>16</sup> Zeene bdzin no lad guiedz Rôma, bdeed zho diidz Pablzhal bguib ti yu ne blëz me grop me menguüib ne quianap me, blood zho me ladzguüib.

<sup>17</sup> Goc tson ngbidz bdzin no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmengol ne bditd naa. <sup>18</sup> Niicle wxtisgaaw, blozhse pquiep zho naa gon zho raapd naa falt, nacd naa zha ne rieguaü guet; dzigo gocladz zho nsilaa zho naa.

<sup>19</sup> 'Per zeene gon naa nëd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho. <sup>20</sup> Wen ne laa naa beenbey to nagon, ni beenbeygaa to naa; gacnan to sca ganle laa caden riü zob nia naa, per nacda por pe falt ne rap naa, sinque laaw zob nia naa porne rliladz naa laa Dios pxeelle men ne quiambëz menladz ne ga.

<sup>21</sup> Dzigo pquiab zho rëb zho lo Pabl:

—iWlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyūn pe guieIntseeb. <sup>22</sup> Per na laga laa luu ziaad nu, siguiel luu sodiidz luu lo no dien zhapaa nac wseed ne rliładz luu i, sac blactaa zidzion no, zaatne notaa zha ne rliładza rleënie miech zho.

<sup>23</sup> Dzigo pso zho ti dze ne tsie zho.

Zeene goI dze co, nzian zho pcaalsa zaatne rbëz Pabl ga. Dzigo psilo Pabl bzodiidz me lo zho zhapaa racladz Dios gban miech, ni rnee me lo zho gliladz zho lëele men ne nac diidz cxeel Dios ga nac Jesús; blu me lo zho grëse zaatne zhobneew, zigtaa lo grë mine pquiaa Moisésa, zigtagaa lo grë mine pquiaa grëraa zha ne biadteed xtiidz Diosa. Dipse dze sca bzodiidznie me zho grë min co.

<sup>24</sup> Brieequia bla zha ne bliladz grë mine bnee me ga, ni scaquegaa brieequia zha ne bliladzda. <sup>25</sup> Grë zha ne riod zdoō mine rnee me ga, laa zho psilo noriee, nacne rëb me:

—Ib lëepaa mine nac to i ga nagon bzeet Espíritu Sant, zeene psiaab me guic profet Isá znu rëb Isá <sup>26</sup> lo grë xmengol to:

Niicle peraa gon to, niicle peraa gan to,  
per peet guiende to;

<sup>27</sup> sac gocntseeb zdoō to.

Zob diag to, ni peet ronde to;

zob lo to, ni peet rande to.

Ncow nac guic to,  
gane peet ronde to, peet rande to;

niicle rioxcodgaa to gbig to lo naa zeena csilaa naa to lo xtoI to.

<sup>28</sup> Golgacnan sca ganle, min co gane laa Xtiidz Dios quiagaaz lo grë miech stib guiedz, ni zhasi gon noliladz zhow.

<sup>29</sup> [Zeene gon zho sca rëb Pabl mazdraa blëe zho, nodiidiidzIsa zho laa zho zey.]

<sup>30</sup> Dipse len chop iz blëz Pabl ga, ga bree me ti len yu ne bio me. Ga rdzin grë miech ne zienee lo me, <sup>31</sup> zha ne zietaa, rnee me lo zho zhapaa racladz Dios gban miech, ni rnee me lo zho gliladz zho cho nac Jesús. Dipse len dze co, ib biod zha ne ntsidil pe nacne sca noseed me miech.

## GUITS NE PXEEL PABL LO ZHA ROMA

¡Diuzh to grëse to!

<sup>1</sup> Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

<sup>2</sup> Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me. <sup>3</sup> Lëew ga rnee ganle cho nac Jesús (men ne briequia lo xtii rey David ne laa me goc miech lo guidzliu; <sup>4</sup> sangue Espíritu Sant, pxobnen me ganle Xpëed Dios nac me; min co gane brieaban me).

<sup>5</sup> Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me. <sup>6</sup> Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

<sup>7</sup> Laa naa rxel guits rii lo to, grëse to ne no to guiedz Roma i. Golgacnan ganle rleynie Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne

gacnien to zeena peet zhgab ctsebde to.

<sup>8-9</sup> Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacnien me to; <sup>10</sup> ni tibaque rnab naa telne zneedz me diidz gdzin tib dze ne grieelo guial naa i guialgan naa to. <sup>11</sup> Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tibilique gac guic to dziitsraa so to. <sup>12</sup> Ni scagaa tipse gac ne zidiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

<sup>13</sup> Bets, bzian, tel gan to ganle blactaa vuelz ziyacldz naa guial naa i guialgan naa to, per haxta lo nadze gon rrieelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa. <sup>14</sup> Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienda.

<sup>15</sup> Min cocxe waa, tibaque laa naa racladz ye nēz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

### *Poder ne rap Xtiidz Ndzon Dios*

<sup>16</sup> Tel naa, ib rtoładzd naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. iGrēse miech ne gliladza, ib zlaa zho lo xtol zho! Laa guielnzaac co no niina par grēse miech. Glose lo zha Israel bdzina, laa niina laaw quiadzin lo grēraa miech, zeena grēse zho gbig sēeb xnēz Dios. <sup>17</sup> Sac gon, lēē Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: fotsaque nli dib zdoo zho gliladz zho mine nac Xtiidz me. Sca zhubnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rililadz zho mine nac Xtiidz me.”

### *Xtol miech*

<sup>18</sup> Ndionle ne ganle no guielnē ro ne csiaab Dios ygaa grēse miech ntseeb, miech ne nēd gac-wen, ni desde gbaa cxeel me guielnē ne ygaa zho; sac por xquielntseeb zho rsaand zho gacna grēraa miech mine nac diidzli.

<sup>19</sup> Grē zha ntseeb, nanle zho zha nac Dios, sac mezhal blu lo miech zha grieelo gunbey zho me. <sup>20</sup> Niicle ne grielod ganlo ne Dios, per de lo grētaa ncuaane bzaa me, grētaa ncuaane run me, gase rlu

ganle cho nac me. iGase rlu ne nli me nac Dios, ni gdzind dze ne lozh xpoder me!

Gacxe waa grē zha ntseeb, ib tedlaad zho lo guielnē ne csiaab me ga; <sup>21</sup> sac gon niicle nanpaa zho me nac Dios, ni ib rond zho xtiidz me. Nēd zho gunbey zho me zigne rieguiala, niicle xquizh nand zho gdeed zho lo me. Laa ne rzac zho na rien zho pe run zho, lel pcow xquielrien zho; rzac zho na lēew ga, gun zho ncuaane guiaabtaa guic zho. <sup>22</sup> Niicle ne rzac zho zharien zharac nac zho, per zha nac miech ne quialoozhraa lo xquieln xen; <sup>23</sup> sac gon laa ne gunbey zho guielndzon ne rap men ne nacpaa Dios nguiamban, lel rsilo zho rzaa zho grē mdio ne niaa zigne rlu samiech guidzliu zho, grē mdio ne niaa zigne rlu grē ma ne rsiibe, grē ma ne rzē tap ni, grē ma ne rzēlen lo liu; lel grē ncuaan co ziegan zho laa ne gleynie zho men ne nacpaa Dios.

<sup>24</sup> Min cocxe nagon waa, rsaanladz Dios zho laa zho zienal grē ncuaane ndzinlid ne rzoobladztaa zho. Grē ncuaane ntoladzdox ne run zho, lēēque zha runnguzee zho rguitnie zho xcuerp zho. <sup>25</sup> Sac laa ne gleynie zho diidzli mine rnabey Dios, lel mine rnee zha ne rquidie rleynie zho; lel grē ncuaane bzaale Dios, ncuaane psanle me, ncuaan co ziegan zho, lo grē ncuaan co ziequitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan

grëtaa ncuane no. ¡Diosse  
riegual gunnon miech, men  
co riegual tibaque goolnie  
zho! Sca rieguala.

<sup>26</sup> Ne sca nagon nac  
zho, gane psaan Dios zho  
laa zho run grë guielyozh,  
ncuaane ngubeeguielto ne  
riegualdraa gun miech. Grë  
wnaa laa ne gdeed zho diidz  
gnee tsieel zho lo zho, lel  
lëëque sawnaa zho rquiangob  
zho, laa zho zienal grëraa  
guielyozh; <sup>27</sup> grëgaa mgui,  
laa ne gnee zho lo wnaa ne  
nac tsieel zho zigne biaan  
no gaca, lel lëëque sabgui  
zho rzoobladz zho. Ncuane  
mbixladz run zho, rquiangob  
zho lëëque sabgui zho; ni ne  
sca run zho grë ncuane co,  
lëë mine rdziniaa zho nac grë  
guielguidz yozh ne riaan lad  
zho; ndzinlidraa rac zho.

<sup>28</sup> Scataale nac zho, ni bii  
rzoliaadz zho gbig zho lo  
Dios, gane niicle megaa rlozh  
rsaanzadz me zho, laa zho  
biaan lo grë zhgab yozh ne  
no guic zho, no zdoo zho,  
min co ne scataa nac zho.  
<sup>29</sup> Nroobdoo nac xtol zho, sac:  
rsacsixuu zho samiech zho,  
rzoobladz zho ncuane  
quianied zho,  
racntseeb zho lo samiech  
zho,  
në rac zdoo zho ran zho stib  
noded samiech zho,  
rut zho samiech zho,  
rtsidil zho samiech zho,  
rquidie zho samiech zho,  
rquiadiidzguizh zho samiech  
zho,  
miech yozh nac zho,  
<sup>30</sup> rneenë zho samiech zho,  
rquiabro zho lo samiech zho,

racniats zho lo samiech zho,  
rlu zho ncuane rapd zho,  
ncuaane nacd zho;  
rlëënie zho Dios,  
rio zho rbeebeey zho grë  
guielntseeb,  
rond zho xtiidz pxoz zho,  
rond zho xtiidz xniaa zho,  
<sup>31</sup> racladzd zho gon zho diidz,  
rund zho mine rnee zho,  
rleynied zho samiech zho,  
rund zho samiech zho per-  
don,  
rquiad zdoo zho samiech  
zho.

<sup>32</sup> Niicle ne nanpaa zho zha  
rnabey Dios none gban  
miech, niicle ne nanpaa zho  
grëse zha ne run guielntseeb,  
ib tedsod znitlo zho; ni laa  
zho bii quiayuna, ni haxta  
rley zho ran zho cho grëraa  
zha ne run grë mine run zho.

## 2

### *Xquielwxtis Dios*

<sup>1</sup> Ib tedsod no to gnë: “¡Zha  
ntseebtaa miech ne sca run!”  
¡Per gni naa lo to ganle, zig-  
taa zhaw, zigtaa tow, lalga  
ntseeb to grë to! Sac ye to gon  
run grë guielntseeb co, gacxe  
waa, zha ne rzac riegual zha  
co ygaa zho guielnë ne csiaab  
Dios, ye zho riegual min co.  
<sup>2</sup> Ndioñ ne ganle Diossi zeene  
laa me gun guielwxtis, grëse  
zha ne sca zienal guielntseeb,  
ib tedsod zunquizh me zhow.

<sup>3</sup> Zha ne sca rlozhd gzee  
zdoo pe quiayun stib zho,  
haxta rlisqui zho mine  
quiayun zha co, ni yeque  
zho quiayuna; masaque  
nan zho nagon zdedlaa zho  
zeene laa Dios guiaadgun

xquielwxtis me, masaque nan zho zha cose nitlo, laa zho tedlaa. <sup>4</sup> None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdo zho gban zho zigne rnabey me. <sup>5</sup> Telne tibaque squi ndip gac zdo zho, gond zho mine rnabey me; gacnan zho ganle, quiayunloraa zho grë guielndëdox ne yгаа zho gal dze ne laa me gun guielwxtis. Ni xquielwxtissi me, zigne riegual gaca sca gun mew.

<sup>6</sup> Gal dze co, laa me gdeed mine riegual yгаа tib tib miech tel zha wban zho. <sup>7</sup> Grëse zha ne güeynal beennon zho lë me, pxobnen zho xquielndzon me, güeynal zho grë ncuaane rnitlo, lo zha co gdeed me tib guielmban ne gdzind dze lozh. <sup>8</sup> Saingue grë zha ne güeynal loxaque grë zhixco zho, güeynal zho grë guielntseeb, laa ne nienal zho mine nac diidzli; zha co yгаа grëse zhian ne csiab me.

<sup>9</sup> Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zgaa zho tib guielndëdox; <sup>10</sup> saingue grë zha ne rban zaacse, zigtaa zha Israela, zigtagaa zha stib guiedza, ible zgaa zho lo xquielndzon me, zunnon me zho. Ni led yedraa ga pe zhgab ctseb zho.

<sup>11-15</sup> Grëse zha ne gunctal xtol, tel chotaa nac zho

zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdo zho, guic zho, nanpaa zho pa min nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

<sup>16</sup> Dzidz tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngeets zhli-aan been zho; sac sca rnabey Dios gaca, ni min co noseed naa miech.

### *Zha Israel ni xley Moisés*

<sup>17</sup> To ne nac to zha Israel, rzac to zienalpaa to xley Moisés, niats rac to, rzac to tose non lo Dios. <sup>18</sup> Nanwen to zha racladz Dios gban to, nanpaa to pa min wen sac pseed to xley me. <sup>19</sup> Min co masaque rzac to to cseed zha ne no lo ncow, grë zha ngoopdol. <sup>20</sup> Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne



ndziibraa nixbiini, tose nan minē nacpaa diidzli.

<sup>21</sup> Nana, tel scataa rien to zha cseed to stib miech, ¿pe nac dzigo rwide to minē run to?

Conque to name rnee lo miech cuand zho, ni rlozh ga toque quiaban. <sup>22</sup> Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga toque noyun min co. Rnee to, rdziguiende to grē mdio, ni rio to rieban to yadoo ne zob grē mdio co.

<sup>23</sup> Rlozhd gacniats to rzac to quiayunnon to lē Dios ne nan to ley, ni nande to gon, lel quiaguitnie to lē me ga, sac mbande to zigne nac ley. <sup>24</sup> Minē noyunpaa to i ga gon raquiet lo Xtiidz Dios, zaatne rnee: “Por xtol to, grē zha zit laa zho rneenē Dios.”

<sup>25</sup> Tel to, rzac to porne nacle to zha Israel non to lo Dios, per ne squi mbande to zigne nac xley me, nacaque to zigne nac grē zha zit ne runbeyda. <sup>26</sup> Nana, zha zit ne rioxco rban zigne nac xley me, ¿niacxe rieguald dzigo guiannziiu zho lo Dios? Sannziiu me zho gon. <sup>27</sup> Golgacnan sca ganle, glole zha zit co gon guiannziiu lo Dios, lēdle to ne nanpaa to zha racladz Dios gban to, nanpaa to minē psan Dios diidz yгаа to, ni rbande to zigne rnabey me.

<sup>28</sup> Golgacnan sca ganle, led porne nacdse to zhin zha Israel, porne bio to xbey zho, laa to nziuu lo Dios. <sup>29</sup> Led scada gon, sinque zha ne nli

dib zdoos rioxco minē rnabey Dios, zha co nziuu lo me. Sac tel Dios, rwidaxe me waa dien cho pe bey ne no, sinque laa me rcaania zha ne nlipaa dib zdoos, dib guic, rban zigne racladz me. Grēse zha ne znu nac, nziuu zho lo Dios, niicle telne rzac to peet nond zho.

### 3

<sup>1</sup> Nana, ¿pa lugar nadien ne riaannon zha Israel lo grēraa zha stib guiedz? ¿Pa rquiin ne scataa rio zho bey? Zootle lēē lalaquew tel niaca minē niacd zho zha Israel. <sup>2</sup> Per led scada, no pe nacle non zho. Sac gon, ible lo zho psan Dios xtiidz me mazd padzeela.

<sup>3</sup> Nli ndal zho rond xtiidz me, per led mincod ctsēē me xtiidz me, minē bneele me lo zho. <sup>4</sup> Niicxe tel zharaa quiayunctal miech xtol zho, sangue Dios ctsēēd me xtiidz me. Zigne zhobneeque lo Xtiidz me, zaatne rnee: “Minē rnee Dios, diidzli naca; niicle zha ne gacladz, guiend pe ncuane glisqui zho lo me.”

<sup>5</sup> Sca nac Dios, gacxe waa rnee me grēse zha ne runctal xtol, riegual yгаа zho guielnē ne cxeel me. Ga nagon, rlu ne minē nac diidzli, min co run me. Nana, ¿pe ziab ne nonguiel minē run me ga? <sup>6</sup> Minē nonguiel ga gon run me, sac tel gdziguien me grē zha ne runctal xtol, ¿zha naczhe guielwxtis ne dzigo gun me?

<sup>7</sup> Nana, nogaa zho gnē, ¿per pe nacle glisqui Dios dol ne rdziun ne, ni tel por lēew rlu ne diidzli nac minē run me?

<sup>8</sup> Per telne sca naca, rrieequia dzigo ib none gunctal ne xtol ne parne yquiaraa zdoo me ne. Ni nzian zha ne nobee xquielto naa, rnee zho ib min co noseed naa miech. Ni zha ne sca rnee, ib tedlaad zho lo guielnëdox ne rieguial zho.

*Grëse miech, ngoopdol nac zho*

<sup>9</sup> Nana, ðpe zdzieets ne dzigo ne nac ne zha Israel, nziuuraa ne lo grëraa miech stib guiedz? ;Led scada gon! Niina blozh bzeet naa lo to, grëse ne ngoopdol nac ne, zigtaa zha Israela, zigtagaa zha stib guiedza. <sup>10</sup> Zigne zhobneeqe lo Xtiidz Dios, zaatne rnee:

;Guiend miech ne zienalpa  
mine racladz Dios!

;Ni tib zho guiend!

<sup>11</sup> Guiend zha ne niini guic;  
guiend zha ne tsoxco yguib  
xnëz Dios.

<sup>12</sup> Grëse zho laa zho zie nëz ne  
nitlo zho;  
niapse guielntseeb zienal zho.  
;Guiend zha ne zienal mine  
racladz Dios!

;Ni tib zho guiend!

<sup>13</sup> Ro zhow,  
masaque been cuent naca zig  
nac len grë baa ne noy-  
odz ngutoo;

niapse diidz ne rquidie zho  
zhoob lo ludz zho.

Grë diidz ne rnee zho,  
masaque naca zig nac xve-  
nen grë meel dox;

<sup>14</sup> niapse grë diidz dox,  
niapse grë diidznë  
rrieeche ro zho.

<sup>15</sup> Ni zhow,  
masaque zombëzlew dien pa  
tsiegot zho samiech  
zho;

<sup>16</sup> loxaque guielnë, loxaque  
guielzi rsan zho zaatne  
rded zho.

<sup>17</sup> Ib nanð zho ne zaacse  
gbannie zho samiech  
zho;

<sup>18</sup> per ni Dios rdziebdraa zho.

<sup>19</sup> Gacxe waa nroob nac  
guielnëdox ne yгаа grë zha  
ne runbey ley ni mband zho  
zigne naca, lel run zho grëtaa  
guielntseeb zig nac grë mine  
goquiet nu. Ni niicle grëraa  
miech ne runbeyd ley, scaque  
ngoopdol nac zho, ni ro zho  
guiend pe guiab zho lo Dios.

<sup>20</sup> Golgan sca ganle, grieelod  
guiaanmbe ne lo Dios, niicle  
paraa yquia ne gun ne mine  
rnee ley; sinque par guiend  
ne ganle ne ngoopdol nac ne,  
gane biaan ley.

*Silaa Dios miech zeene  
gnalo zho me*

<sup>21</sup> Sangue niina, tib ladle  
biaan ley, laa Dios bneedz  
stib mod ne guiaanwen ne  
lo me. Ni lo grëque guits  
ne ziaad ley, lo grë guits ne  
pquiaa zha ne biadteed Xti-  
idz Dios padzeela, ga raqui-  
eta. <sup>22</sup> Grëse miech tel chotaa  
nac zho, tel petaa been zho, ib  
ziaanwen zho lo Dios totsaque  
dib zdoo zho gnalo zho Jesús,  
dib zdoo zho gliladz zho me.  
Zha ne gliladztaa me, sac led  
yed Dios rbe.

<sup>23</sup> Zigne rne naa ga, grëse  
ne miech ngoopdol nac ne lo  
Dios, ni palal rdzieeld gdzin  
ne lo xquielndzon me. <sup>24</sup> Per  
niina laa me blu ganle pa  
lotaa noxco me ne, gola zdoo  
me pxeel me Jesús bdiizh  
grëse xtol ne, laa ne biaanwen

lo me. <sup>25</sup> Laa me been min co parne glu run me guielwxtis, sac niicle bdizhd ne xtol ne, per pxeel me tib men ne bzhiee xchen bdiizha xcuent ne, lee men co nac Jesús; gane niina grëse zha ne gnalo men co, zun me zho perdon grëtaa dol ne pxcw me been zho. <sup>26</sup> Ni tib dol rapd me, ni scaque grë zha ne dib zdoog nalo Jesús, sanmbe me zho lo xtol zho.

<sup>27</sup> Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziuund new, sinque por grëtaa mine bded Jesús. <sup>28</sup> Gocndion ne sca ganle: Niapse por dib zdoog miech gliladz zho Jesús, laa Dios ycaania zho; nacda por tso zho gun zho mine rnabey ley.

<sup>29</sup> Nana, ¿pe zha Israelse sca ycaania me? ¡Lëda gon! Grëse miech, sca ycaania me zho. <sup>30</sup> Sac gon tibeyse ran Dios ne grëse ne; zigtaa zha Israela, zigtagaa zha stib guiedza, sanmbe me ne lo grë xtol ne, totsaque dib zdoog ne gnalo ne Jesús.

<sup>31</sup> Nana, ne znu rcaania Dios ne, no zho sac rquiindraa ley. ¿Zha yquiind-zhew? Niinale ne znu dib zdoog ne rliladz ne Jesús, rienraa ne pa rquiina.

## 4

*Dib zdoog Abraham bnalo me Dios*

<sup>1</sup> Zig nac pxozgoldoo ne Abraham, ¿pe been me ne laa Dios pcaania me? <sup>2</sup> ¿Pe por

guielwen ne been mew? ¡Lëda! Telne scaw, nrieelo niacniats me (niicle ne nëz lo Dios ni palal rieguiald niacniats me). <sup>3</sup> Sac gon rnee lo Xtiidz Dios, ne dib zdoog me bliladz me Dios gane pcaania Dios me zig tib zha ne peet xtold.

<sup>4</sup> Zig nac tib zha ne run dziin, dimi ne razh zho ible rieguial zhow, rate zhow ga.

<sup>5</sup> Sangue Dios zdoog me ral rcaania me miech, zha ne dib zdoog rnalo me, nacda por pe guielwen ne gun zho par guiab ne laa zho rieguiala. <sup>6</sup> Ye rey David bzeet guielbley ro ne rgaa zha ne sca rcaania Dios, <sup>7</sup> rëb David:

¡Wen zie zha ne run Dios perdon!

Niicle nroob guielntseeb ne been zho;

tel pe nactaa xtol zho, glisquidraa mew.

<sup>8</sup> ¡Wen zie zho sac gunquizhdraa me zho grë xtol zho!

<sup>9</sup> Nana, ¿pe loxaque grë zha ne nose bey zrieelo yгаа guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdoog Abraham bnalo me Dios, min co ne pcaania Dios me zig tib zha ne peet xtold; <sup>10</sup> sac gon gard pe bey ne tso me zeene pcaania Dios me. <sup>11</sup> Pcaaniale Dios me dzigoraa bio me bey. Lega laa me biose bey co, zeena glu ne laa Dios pcaaniale me porne dib zdoog me bnalo me Dios. Mincoxe waa, Abraham nac dad lo grëse zha ne nod bey, ni dib zdoog zho rnalo zho Dios; ni scagaa Dios, rcaania me zho zig tib zha ne

peet xtold. <sup>12</sup> Ni meque nac dad lo grë zha ne no bey ni dib zdoo zho rnalo zho Dios, zigne bnalo me Dios zeene gard tso me bey co.

*Zha goc mine bnee Dios lo Abraham*

<sup>13</sup> Psañle Dios diidz lo Abraham ne me guiaanne guidzliu, grë me zha ne grieequiaraa lo xtii me; guiabd ne togo porne been me mine nac xley zha Israela, sinque ne dib zdoo me bnalo me Diosa. <sup>14</sup> Nana, tel niaca zha ne gunse mine nac ley, zha cose ygaa min co, rrieequia dzigo zhlëse ga bnalo Abraham Dios, niicle diidz ne psan Dios lo me ga, nondaqew. <sup>15</sup> Sac nac ley gon, zha ne gunda zigne naca, laa Dios csiaabzi zho; laa zaatne guiendga ley, gacd guiab zho cho noguitsa.

<sup>16</sup> Ne scacxe waa nac ley, gane niina lëese mine no gun ne nac dib zdoo ne gnalo ne Dios par ygaa ne mine psanle me diidz ga. Grëse ne ygaa min co, per nacdraaw dien cho zienal ley, cho zienaldgaaw, sac mine nonraa, dib zdoo ne gnalo ne Dios zigne bnalo Abraham me. Min cocxe waa, rrieequia Abraham nac pxoz ne grëse ne, <sup>17</sup> zigne rëb Dios lo Abraham: "Laa naa bzo luu, luu gac dad lo nzian dii miech." ¡Lëe Dios co nagon bliladz Abraham, me rbeeban grë mengut, ni niicle haxta grë ncuane guiend, saa mew!

<sup>18</sup> Ndaldox rëb Dios gac lo xtii Abraham, ni bliladz

Abraham mine rëb Dios ga. Niicle ne zootle led ncuane gacda, per me dib zdoo me bliladz me ne zaca, ni scagaa bdziñ dze ne laaw goc. <sup>19</sup> Tibaque bnalo me Dios, niicle ne lala ziele xtse me (zig tib gayoole iz me), ni lala tsiel me Sar, nacd me wnaa ne gap mëed. <sup>20</sup> Ib goc chopd guic me niab me bod nliid niac mine bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios, <sup>21</sup> sac nanpaa me men nroob nac Dios zun me mine psan me diidz ga. <sup>22</sup> Ne sca nagon dib zdoo me rnalo me Dios, gane pcaania Dios me zig tib zha ne peet xtold.

<sup>23</sup> Zhobnee lo Xtiidz Dios sca pcaania me Abraham, ni laaw zhobnee zeena gacdion ne <sup>24</sup> ye ne scaania me ne zig tib zha ne peet xtold, totsaque dib zdoo ne gnalo ne Jesús, men ndzon ne rnabey ne; <sup>25</sup> men ne gut ga bdiizh me xtol ne, men ne brieeban ga, par glu me nli psanmbe me ne nëz lo Dios.

## 5

*Jesús rsanmbe miech lo dol*

<sup>1</sup> Nasi laa ne nacle zig zha ne peet xtold, laa ne biaanwenle lo Dios porne dib zdoo ne rnalo ne Jesús, men ndzon ne rnabey ne. <sup>2</sup> Sac por grëtaa mine bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

<sup>3</sup> Ni scaquegaa nagon none gley ne zeene pe guielnē ne nodziañ ne; sac ndion ne ganle, ga cseed ne lēb ne dziits so ne lo miñe rliladz ne. <sup>4</sup> Ni zeene sca dziits so ne, zliladzraa ne dib zdoonē; ni zeene dib zdoonē ne rliladz ne, zacnañpaa ne ib zgaa ne miñe rliladz ne. <sup>5</sup> Ni ndionpaa ne zgaa new, sac blu Dios rleyne me ne, pxeel me Espiritu Sant nacnie ne.

<sup>6</sup> Lēētaaque zeene rdziieldraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtol ne nac ne miech ngoopdol.

<sup>7</sup> Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha. <sup>8</sup> Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpēed me Jesús, men co bleeladz xquielmban gut me xcuent ne.

<sup>9-10</sup> Gotsaa gwi ne ganle, zha nactaa guielnē ne bded Jesús psanmbe me ne lo xtol ne, psanwen me ne lo Dios; ni scaque nagon, ible me csilaa ne lo grētaa guielnēdox ne csiaab Dios ygaa grē miech ntseeb. Ne nligaa, csaand me dziañ ne guielnē co; sac gon, tel scataa miñe been me por ne zeene nac ne tib miech ngoopdol, zeene scataa ntseeb goc ne blēenie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet

xtold? <sup>11</sup> Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

### *Zha nacne biaan dol*

<sup>12</sup> Znu gon nacne laa dol biaan: por miñe been Adán bind me xtiidz Dios, min co nac ne biaan. Ni por lēew pquiaqui laa guielgut biaanaque, blozh ga grēse miech laa zho ret, sac grēse zho, tsod zha ne gunctald xtol. <sup>13</sup> Desde hor co biaan runcntal miech xtol zho. Grēse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guienpaa tib ley hor co nlu ne dola. <sup>14</sup> Gacxe waa ye zho, grēse zho gut; niicle ne bdiitsd zho merpaa xtiidz Dios zigne been Adán.

<sup>15</sup> Nli tib guielnē ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grēse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoonē ne grēse ne, laa me rneedz tib guielmban ndzon lo ne; lēē men co nac Jesús. <sup>16</sup> Tibaque nac dol co been Adán, per grēse miech biabzi; sangue Jesús zeene laa me biaad, grēse ne ne nac ne miech psilaa me ne lo grētaa xtol ne, psanwen me ne lo Dios. <sup>17</sup> Dol ne beense Adán ga, min co pquiaqui grēse ne ne nac ne miech, laa ne biaan ladznia guielgut; sangue niina ne biaad Jesús,

zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon. <sup>18</sup> Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús bиаad, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmban ndzon. <sup>19</sup> Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

<sup>20</sup> Ible laa ley biaan, par glu ganle pa lotaa nac grë falt ne noyun miech lo Dios. Per nicle scataa nac grë dol co, per blu Dios ganle mazdraa rquia zdoo me miech. <sup>21</sup> Masaque bnabey dol miech, pxeela zho nëz ne nitlo zho; sangue zeene laa Jesús bиаad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

## 6

### *Zha ne mbanniele Jesús*

<sup>1</sup> Laa ne bdzianle ganle zha noxcotaa Dios ne. Nana, ÷pe zdzieets ne dziuunctalraa ne xtol ne zeena tsoxcoraa me ne? <sup>2</sup> ¡Lëdraaw ga gon! Nodraa ne dziuun ne dol, sac gon, laa ne nacle niina zig tib zha ne gutle nëz lo dol.

<sup>3</sup> Golgan ganle, zeene laa ne bziaab xnëz Jesús ni brobnis ne, rrieequia gut ne ga

zigne gut me. <sup>4</sup> Zeene brobnis ne rrieequia bioliu ne ga, zigne bioliu Jesús. Ni zigne brieegan Jesús (por poder ndzon ne rap Dios), scaque ne rrieequia brieegan ne, stible guielmban ne rdziaap ne.

<sup>5</sup> Ni zigne sca rrieequia gut ne zeene gut Jesús, scaquegaa ndionpaa ne zbeegan me ne zigne brieegan me. <sup>6</sup> Ndion ne ganle, miech ne goc ne glo zeene scataa bional ne guelntseeb, rrieequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol; <sup>7</sup> sac gon, deque bnitlo grë mine goc ne glo, grieelodraa gnabey dol ne.

<sup>8</sup> Nana, telne scale gutnie ne Jesús, ndionpaa ne ib zbannie ne me.

<sup>9</sup> Ndion ne ganle brieegan Jesús, ni gdzindraa dze guet me. Grieelodraa pe gun guielgut me.

<sup>10</sup> Tibaque vuelt gut me bdiizh me xtol grëse miech, sangue niina mban me ni Dios mbannie me. <sup>11</sup> Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

<sup>12</sup> Nana sca, gdeetraa to diidz gnabey dol xcuerp ben to i, tso to gun to grë ncuaane ndzinlid ne racladz xcuerp to. <sup>13</sup> Ib gdeete to diidz guiab to lo dol stib, gun to grë guelntseeb; sinque golgan to ladznia Dios, ine golgun grë

mine racladz me. Golguien ganle, laa to gutle lo grē dol, Diosle mbannie to niina; <sup>14</sup> zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne. <sup>15</sup> Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grētaa ncuane gunctal xtol ne? ¡Lēda ga gon! <sup>16</sup> Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtold. <sup>17</sup> Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina. <sup>18</sup> Ni zeene laa to brieeladznia dol, laa to bgab lo Dios; zeena mine rnabeyle me mincole gun to. <sup>19</sup> Znu bzet naa grē min rii lo to, zeena guien to zha naca.

Nana sca, zigne scataa bio to ladznia dol been to grētaa guielyozh, grētaa guientseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me. <sup>20</sup> Zeene scataa ngadoo to lo dol, ib wbande to zigne rnabey me.

<sup>21</sup> ¿Pe nadien needz dol lo to? Lēē gdib mine ngaa to laa to nitlo. Zig nac niina, haxta rtoladz to zeene rso-ladz to grē ncuane been to hor co. <sup>22</sup> Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zгаа to tib guielmban ne gdzind dze lozh.

<sup>23</sup> Sac gon, zha ne runctal xtol, lēē gdib mine tsieguial zho laa zho nitlo; sangue zha ne gbig lo Jesús, mine ral zdoos Dios ygad me lo zho nac tib guielmban ne gdzindraa dze lozh.

## 7

<sup>1</sup> Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

<sup>2</sup> Zig nac tib mgui ne rtsieelnia, rnabey ley ne mguise gbannie wnaa ne nac tsieel mgui. Per tel gzoob ne glo mgui guet, dzigo gacdraa gnabey ley ne mguipaa gbannie wnaa co; telne gacladz zho ctsieelnia zho stib mgui, zaca. <sup>3</sup> Nli nonguielda ga gun wnaa ctsieelnia zho stib mgui laga bii zomban tsieel zho; laa zeene gutle tsieel zho, led doldraaw yguib zho stib zha ne ctsieelnia zho.

<sup>4</sup> Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lēēgaaw grieelod gnabeya to. Jesús, men ne brieeban ga, mele

nac tsieel cub to niina. Niinasi, zrieelele gban to zigne racladz Dios; <sup>5</sup> sac glo (zeene scataa bdziuunctal ne xtol ne, bdziuun ne grëtaa ncuaane nonguiel draa niicle ne ndionpaa ne pe nac mine zhobnee lo ley no dziuun ne), niapse grë ncuaane nxeel ne zaatne nitlo ne, ncuaan co bdziuun ne. <sup>6</sup> Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

*Rca dol gac mine rnabey ley*

<sup>7</sup> Nana, ðpe zdieets ne dzigo por leypaa rdziuunctal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: "Gzoobladz luu chen ben." <sup>8</sup> Zeene gocnan naa zha nac ley, dzigora a bien naa niapse dol nac mine noyun naa; sac zeene guiend ley, rlud pe nac dol.

<sup>9</sup> Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa. <sup>10</sup> Nli laa ley biaan zeena guien ne zha grieelo yгаа ne guielmban, per lel bluw ne raguial naa nitlo naa sac ngoopdol nac naa. <sup>11</sup> Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëëque ley

blu ne ib raguial naa nitlo naa. <sup>12</sup> Niicle ne scaw, per Dios psana ni rquiin grë mine zhobnee low.

<sup>13</sup> Nana dzieets ne: conque telne wen nac ley, ðzha nac dzigo ne lëëpaaw rlu ne rioguial ne guet ne? ¡Coo, led scada! Sinque znu naca: dol pteedquie ne lадznia guielgut. Ga rlu ganle zha nactaa dol, sac gon lëëque ley pquiin dol pteedquiew ne lo guielgut. Ga blu ley ganle zha ntseebtaa nac dol. <sup>14</sup> Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

<sup>15</sup> Tel naa, riend naa pe nacne znu rac naa, niicle ne racladzpaa naa gun naa ncuaane nonguiel per nëda, lel ncuaane rzoobladz naa min co run naa. <sup>16</sup> Grë ncuaane run naa, now rienpaa naa nonguiel da; haxta guic naa, zdoo naa, rien naa wen ley sinque naa quiaguits mine rnabeya. <sup>17</sup> Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaane ndzinlid. <sup>18</sup> Rien naa miech ngoopdol nac naa, ni palal ncuaane ndzinli gacd gun naa; niicle ne racladz naa gac-wen naa, per rrieeleoda. <sup>19</sup> Zeene racladz naa gun naa ncuaane rquiin, per rrieeleod gun naaw; laa zeene ni naa gundraa naa ncuaane ndzinlid, lel mincole run naa. <sup>20</sup> Ni ne znu lel grë ncuaane racladz naa, min co run naa, gase rlu ne led



naadse quiayun grë ncuaan co; sinque dol quianabey xcuerp naa run naaw. <sup>21</sup> Rien naa niicle ne racladz paa naa gun naa ncuaane wen, per lel guielntseeb run naa. <sup>22</sup> Zdoo naa, guic naa, rleynie naa Xley Dios, racladz naa gban naa zigne rnabey me; <sup>23</sup> per dzigo rtse dol lo naa, rriyelod gun naa ncuaane nonguiel. Maaque dol rnabey xcuerp naa, racladzda gun naa ncuaane rnabey Dios; sac ngadoo xcuerp naa lo dol.

<sup>24</sup> ¡Probsaxe naa, znutaa nac xcuerp ngoopdol naa nu! ¿Cho samiech ne dien grieelo csilaa naa low; sac ncuaane gnitlo naa min co mazdraa rdziladza?

<sup>25</sup> ¡Xquizh Dios pxeel me Jesús biaadsilaa me ne lo dol! ¡Jesús nac men ne psilaa naa!

(Znu nagon rzac naa: rien naa nonguiel gun naa mine nac Xley Dios, per xcuerp naa lel laaw zienal mine rnabey dol.)

## 8

*None gban miech zigne racladz Espíritu Sant*

<sup>1</sup> Laa ne gocndion nasca ganle, zha ne ngab lo Jesús ndziibdoldraa zho, <sup>2</sup> sac zha ne ngab xnëz me, laa Espíritu Sant psilaale zho lo dol, laa me psilaale zho ladznia guielgut, laa me bdeedle tib guielmban cub lo zho.

<sup>3</sup> Wlaltaa ib brielod ley nsilaaw ne lo dol, gane mazd laa Dios pxeel Xpëed me biaadsilaa ne. Brielod ley, sac

grëse miech laa ne tsienal zho mine rnabey ley, mazdraa zienal zho ncuaane runctal xtol zho. Gane zeene pxeel Dios Xpëed me, goc me miech (lëëraasi ni tib dol beend me), men co gut bdiizh grëse xtol ne, dzigo ga laa me psilaa ne ladznia dol.

<sup>4</sup> Gacxe waa, niinasi zrieelo dziuun ne grë mine rnabey ley, per none gdeed ne didz guional ne mine rnabey Espíritu Sant, ni lalnu gdeete ne diidz gac mine racladz xcuerp ne nu.

<sup>5</sup> Grëse zha ne mban zigne racladz xcuerp ngoopdol zho, loxaque grë min co rioxco zho; laa zha ne mban zigne racladz Espíritu Sant, mine rnabey Espíritu Sant rioxco zho.

<sup>6</sup> Zha ne sca rioxco loxaque mine racladz xcuerp ngoopdol zho, nëz ne nitlo zho ga zie zho; sangue zha ne rioxco mine racladz Espíritu Sant, laa zho zie nëz ne ygaa zho tib guielmban; peet dzeb, peet zhgab ctsebdraa zho. <sup>7</sup> Ni stiba, zha ne rioxco loxaque mine racladz xcuerp ngoopdol zho, rlëenie zho Dios ga, sac nëd zho gban zho zigne rnabey xley me; ni niicle gacladzgaa zho, grieelod zho. <sup>8</sup> Mincocxe waa, ib rzacd zdoo Dios grë ncuaane run zho.

<sup>9</sup> Sangue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nanle to ganle zha ne nacie Espíritu Sant, nliid

xnëz Jesús no zho. <sup>10</sup> Ni to ne nac to zha ne nole xnëz Jesús, ible zgaa to tib guielmban ndzon, sac laa Dios psilaale to lo dol. Nli zig nac xcuerp to, ncuaane nitlo naca, sac por dol biaan sca no gaca; sangue zhiespírituw, nitloda. <sup>11</sup> Dios bleeban Jesús, ni scagaa telne nli nacie to zhiEspíritu me, meque cueeban to.

<sup>12</sup> Bets, bzian, nodne dziuun ne ncuaane racladz xcuerp ngoopdol ne, zig nac zeene pe nzëeb ne low. <sup>13</sup> Sac telne grë ncuaan co tsienal to, ible znitlo to; sangue telne gnab to gacniën Espíritu Sant to csaan tow, dzigo ible zgaa to tib guielmban. <sup>14</sup> Sac grëse zha ne zienal zigne racladz zhiEspíritu Dios, ga rlu ne nlipaa xpëed Dios nac zho.

<sup>15</sup> Golguien ganle, laa Dios bneedz zhiEspíritu me lo to, sac xpëedle me nac to niina. Tsoode to sca gdziebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: "¡Papá yeen!" <sup>16</sup> Ni Espíritu coque runquien ne ne nli xpëed me nac ne.

<sup>17</sup> Nana ne laa ne nacle xpëed Dios, scagaa dzigo ye ne ible zgaa ne grëtaa ncuaane bdeed me lo Jesús.

Nli zgaa ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

*Guielndzon ne naraa guiaad*

<sup>18</sup> Guielnë ne dzian ne lo guidzliu rii, loxaque ne

ngab ne lo Jesús, led ncuaane rnad ga; mazdraa nroobdoo nac lo guielndzon ne naraa dzian ne. <sup>19</sup> Zig nac grëtaa ncuaane bzaa Dios, masaque quiambëznëw gdziñ dze zeene laa grë zha ne nac xpëed Dios ygaa lo guielndzon co; <sup>20-21</sup> sac gon, gal dze co laa guidzliu guiaanmbe lo grëtaa ncuaan paat rquiind, lo grëtaa guielntseeb ne no low niina. Dios bdeed diidz biaan grë ncuaan co low, per zeene gal dze co, zeene laa grë zha ne nac xpëed Dios laa lo grëtaa guielntseeb, yew laaw laa.

<sup>22</sup> Laga quiambëz grë ncuaan co gdziñ dze co, masaque mban raca, rzaca zig rzac tib men wnaa ne quiayal xpëed. <sup>23</sup> Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zgaa ne grëtaa ncuaane gneedz me), mban rac ne quiambiaaz ne gdziñ dze co, zeene laa Dios ctsëe xcuerp rii ne ni ycaania me ne zig xpëedpaa me.

<sup>24</sup> Ndion ne ible zbee Dios ne lo grëtaa ncuaane rac lo guidzliu rii, per nana laa ne quiambiaaz dzianpaa ne gaca. Tib ncuaane lëe ranle ne noyac, nod pe nacne yquiambëzraa new, <sup>25</sup> per zeene quiambëz ne tib ncuaane naraa gac, dzigo nodne guieed ne, sinque ine tiblrique gac ne yquiambëz new.

<sup>26</sup> Ni scagaa zeene lëbdraa ne, riendraa ne zha gun ne, Espíritu Sant nac men

ne gacniē ne. Zig nac zeēne gzodiidznie ne Dios, tel nesew nanđ ne zhapaa nonguiel gnee ne lo Dios, dzigo Espiritu Sant ruñcnee ne grē diidz ne rienđ ne zha nac. <sup>27</sup> Ni Dios ne nac me men ne nanpaa pe rza zdoo miech, rien me pe rnee Espiritu Sant, sac miñe racladz Dios gac miñ co rnab me.

*Tsod ncuaane yquiaaqui csaanladz Jesús ne*

<sup>28</sup> Ndiōn ne ganle, zha ne nli dib zdoo rleynie Dios, zha ne rioxco gac grē miñe racladz me, grēse ncuaane rded zho, led lega rdete zhow, sinque no zaatne rquiina lo zho. <sup>29</sup> Ni ndiōn ne ganle, zha ne nanle me ygab xnēz me, desde mazd glow, pso me zho gac zho zig nac Xpēēd me Jesús. Lo grē zha ne nac xpēēd me, Jesús nac men nroob. <sup>30</sup> Ni grē zha co, laa me quiabedz zho, quiasilaa me zho lo dol, laa zho noyaanwen lo me; zeena ygaa zho lo guielndzon ne no me.

<sup>31</sup> ¡Zha nactaa ncuaane lēē run Dios! Nana, tel scataa racnie Dios ne, ¿cho nadien grieelo lega pe gun ne? <sup>32</sup> Golgotsaa gwi ne ganle, haxta xpēēd me bdeed me gut xcuent ne, grēse ne ne nac ne miech. Nana, ¿pe lel grē pe stib cos dzigo yquia zdoo me gneedz me lo ne?

<sup>33</sup> Ible Dios bzooblo ne, gacxe waa, ¡choot rieguiald glisqui gnē lēda nodziun ne! Sac gon, Dioszhal psanmbe ne lo dol. <sup>34</sup> ¡Choot rieguiald

ycaadzol ne! Sac gon laa Jesús gutle bdiizh me xtol ne; per brieeban me, ni na laa me zob cue Dios zaatne rieguiald me nac me men non. Ga no me quianab me lo Dios por ne. <sup>35</sup> ¡Tibaque rleynie Jesús ne! Zeēne nodzian ne guielnē, zeēne mban rac ne, zeēne rtsidil miech ne, ib guiabd ne togo bod rleynied me ne. Niicle zeēne guielndgaa pe gow ne, guielnd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne! <sup>36</sup> Ni zig nac xcuent guielgut, laaw raquietaque lo Xtiidz Dios, zaatne rnee:

Grēse no ne nac no zha ne ngab lo luu,

tibaque noxtseeb no lo guielgut;

masaque rzac miech no zig rzac zho grē mēcwxil ne golle guet.

<sup>37</sup> Niicxe peraa waa dieed ne, zdziun ne gan low ni palal csañwinda ne, sac Jesús nacie ne; ni rleyniedox Jesús ne.

<sup>38</sup> Nanween naa tsod ncuaane yquiaaqui csaanladz Dios ne:

per ni guielgut,

per ni guielmban,

per ni anjl,

per ni mendox,

per ni grē ncuaane noyac niina, grēgaa ncuaane naraa gaca.

<sup>39</sup> Niicle grē ncuaane no glaa zhan gbaaw,

niicle grē ncuaane no guietraa zhan guidzliuw,

niicle grëragaa ncuaane bzaa Diosa. ĩNi tiba ycada, sac tibaque rleyne Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtol ne.

## 9

*Ible Dios bzooblo zha Israel*

<sup>1-3</sup> Bets, bzian, ĩblactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espiritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por min co laa zho guien zha gbig zho lo Dios.

<sup>4</sup> Blactaa quiayacnien Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleyne zho me. Nzian grë ncuaane bnee me gdeed me lo zho. <sup>5</sup> Lëe px-ozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaane no, ni me rieguial gacnon gzataa dze. Ible sca rieguiala.

<sup>6</sup> Nana, no zho guiab gocdaque grë mine bnee Dios ga ygaa zha Israel. Per led scada. Sinque lëe min co rgaa zha ne nlipaa rnalo Dios, sac zha co nac zha ne nlipaa nac zha Israel. <sup>7</sup> Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham. <sup>8</sup> Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblome me zigne bzooblo me Isaac, zha co ngab lo me. <sup>9</sup> Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

<sup>10-11</sup> Ni scasaque xpëed Isaac. Bdzin dze, zeene laa Isaac ptsieelnia wnaa ne lë Rebec, dzigo gop Rebec tibnëz mëedbgui. <sup>12</sup> Bii zoney Rebec grop mëdeeyen co, laa Dios bzooblome win ne brieelë Jacob rëb me, ne ible Jacob gac zha non lo Esaú, win ne glo gal. <sup>13-15</sup> Laaw zhubneeque lo Xtiidz Dios, zaatne znu rëb me: "Ible Jacob bzooblo naa beenlay naa, bzoblod naa Esaú." Gard gal grop mëed co, per ni gard gacnan win zha nac guielntseeb, zha nacгаа guielwen, laa me bzooblome tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaane noyun zho.

Nana, ¿pe zdieets ne guie<sub>l</sub>ntseeb ga sca run Dios? ¡Led guie<sub>l</sub>ntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.” <sup>16</sup> Ga nagon, zha ne runlay me, nacda porne zha rquiaguiba, o rioxcogaa zho yгаа zhow; sinque laa zho rgaaw, porne me rquia zdoo zho. <sup>17</sup> Gotsaa gwi ne ganle zha been<sub>l</sub>dip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien<sub>l</sub> miech ganle naa nac Dios.”

<sup>18</sup> Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gun<sub>l</sub>dip me zdoo, run<sub>l</sub>dip me zdoo zho. <sup>19</sup> Nana, no zho gnë: “Telne scaw, ¿pe nac dzigo rlisqui Dios mine run miech, tel mezh<sub>l</sub>al rnabey zha nac zho tib tib zho?” <sup>20</sup> Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men<sub>l</sub> ne bzaaw, guiaba: “¿Pe nacne znu bzaa luu naa?”

<sup>21</sup> Led zha ne run dziin co, zrieelo gzaa zho tib guies zigne gacladztaa zho; tib lë ben ne xen<sub>l</sub> zho, zac gzaa zhow tib guies niow, o gzaa-gaa zhow tib guies beel<sub>z</sub>e.

<sup>22</sup> Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quiayap zho paciens nieeda gdzi<sub>l</sub>n dze co.

<sup>23-24</sup> Grëgaa zha ne bzooblo me yгаа lo guie<sub>l</sub>ndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne. <sup>25</sup> Golsoladz ganle zha bzeet Osé, men<sub>l</sub> ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rley<sub>l</sub>nied me zho glo. <sup>26</sup> Laa stib lugar bzeet Osé, zha bnee Dios lo zho, rëb me: “Ngabde to lo naa, per zdzi<sub>l</sub>n dze ne laa to gac xpëed naa, ne nac naa Dios nguiamban.”

<sup>27</sup> Laa Isá stib men<sub>l</sub> ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios; <sup>28</sup> sac ziaadyoble gun<sub>l</sub> Dios xquie<sub>l</sub>wxtis me lo guidzliu, zigne bnee<sub>l</sub>e me.” <sup>29</sup> Min co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

*Zha ne nacd zha Israel laa zho wbig lo Dios*

<sup>30</sup> Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne wla<sub>l</sub>taa ib bioxcod zho dien<sub>l</sub> zha nsilaa me zho lo dol. <sup>31</sup> Laa zha Israel, niicle ne rioxc<sub>l</sub>o zho run<sub>l</sub> zho grë mine rnabey ley parne csilaa me zho, per ib laad

zho lo dol sca. <sup>32</sup> Laad zho, sac zienied guic zho gnalo zho Dios, rzac zho por grē ncuaañe gunse zho laa zho laa lo dol. Min cocxe waa, zeene laa Jesús biaad, bzhaac zho me zig tib quie ne rriel ni ne riab ne liu. <sup>33</sup> Lëe min co ga zhobnee lo Xtiidz Dios, zaatne rnee:

Sxel naa tib men lo zha Israel, me gac zig tib quie ne griel ni zho;

sangue zha ne dib zdoo gnalo me,

tsod dze ne tso zho guielnë, guiab zho pe nacne bnalo zho me.

## 10

<sup>1</sup> Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

<sup>2</sup> Parga nli ran naa noxco zho gbig zho lo me; per rund zho mine no gun zho. <sup>3</sup> Ib rien d zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios. <sup>4</sup> Sac gon, laa Dios racladz Jesús gnalo zho zeena guiaanmbe zho lo grëse xtol zho; sac Jesússe nac men ne brieelo been grëse mine rnabey ley.

<sup>5</sup> Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya; <sup>6</sup> sangue zha ne gnalo Jesús ne me csilaa zho, nacda dien peraa gun zho. Nacda ncuaañe tso zho guiab zho, tebaa zha tsie zho lo

me gbaa, gnab zho csilaa me zho (ncuaañe gacda ga, dzigo rriequia racladz zho guiet me ga stib); <sup>7</sup> o guiaabgaa zho tsie zho zaatne noliu grë ngutoo, tsienab zho lo me csilaa me zho (ncuaañe gacdaque ga, ni stiba led gad no me, laa me brieebanle). <sup>8</sup> Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Min co nac mine noseed no miech, rnee no lo zho: <sup>9</sup> Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol zho. <sup>10</sup> Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine rliladz ne, dzigo scaania me ne. <sup>11</sup> Rnee lo Xtiidz me: “Zha ne dib zdoo gliladz Jesús, quitnied me zho.”

<sup>12</sup> Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaañe rap me, zdeed mew lo zha ne gnaba lo me. <sup>13</sup> Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

14-15 Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¡Zha

wentaa ziaad zha ne ziaadnie Xtiidz Ndzon Dios!”

<sup>16</sup> Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, mine rne naa.” <sup>17</sup> Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

<sup>18</sup> Zig nac zha Israel, ¿ni-acxe gard gon zho Xtiidz Dios? ¡Binle zhow! Blactaa zha ne ziyadnee Xtiidz me, haxta za-atne mazdraa zita, laa miech quiyacnañ Xtiidz me. <sup>19</sup> No hor rne naa: ¿Pe ib rienñd zha Israel, telne gbigd zho lo me csilaa me zho, laa me csilaa miech stib guiedz? ¡Per rienle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet rienñd; zeena tednë zdoo zha Israel, togo ziaa zho biini. <sup>20</sup> Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

<sup>21</sup> Laa zha Israel, blactaa bzëeb nia naa lo zho ni naa niacnie naa zho, per pa nion zho xtidz naa, lel gocntseeb zho lo naa.

## 11

### *Zha Israel ne wbig lo Dios*

<sup>1</sup> Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa; <sup>2</sup> dzigo led psaanladzd Dios zho

(nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios <sup>3</sup> grëtaa ncuaane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quianañaque gut zho Lí. Rzac Lí guiendraa zha ne ron xtiidz me, <sup>4</sup> dzigo hor co rëb me lo Lí: “Led tibd luu riaan, no zgadz mil zha ne gard yquitsgzhil lo Baal, naa bzooblo zho ygab zho lo naa.”

<sup>5</sup> Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me. <sup>6</sup> Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

<sup>7</sup> Znu nagon naca: Zha Israel ne bzooblolle me, zha cose guiaanwen lo me. Laa los demas zho, lel lozh gandip zdoo zho, <sup>8</sup> zigne zhobneeque lo Xtiidz me, zaatne rnee: “Beenñdip Dios zdoo zho, rienñd zho zha gbig zho lo me; niicle ne zob lo zho, per rac zho zig rac zha ne ranñd; niicle zob diag zho, per rac zho zig rac zha ne peet rond. Ni scataque nac zho haxta lo nadze.” <sup>9</sup> Mincoque bzeet rey David, zeene rëb me:

Lëëque grë zhilni zho, lëëque grë ncuaane row zho,

gac zig len doo ne, len  
guiex ne tsietsobe zho;  
zeena ygaa zho guielnē ne  
rieguiaḷ zho.

<sup>10</sup> Guiaan zho zig tib zha ne  
rold lo,  
guiaan zho zig tib zha ne  
blozh blengw zhits.

*Psilaa Dios zha ne nacd  
zha Israel*

<sup>11</sup> Grē zha Israel ne sca  
gocndip zdoo, guiabde to  
togo laa zho bnitole ga.  
jLēda! Sinque laa me bdeed  
diidz sca goc zho, zeena gbig  
grē zha stib guiedz lo me  
csilaa me zho lo xtol zho;  
ni tednēgaa zdoo zho gan  
zho laa me rcaania zha stib  
guiedz. <sup>12</sup> Nana, telne scataa  
guielnzaac ne bgaa miech  
stib guiedz ne znu racndip  
zdoo zha Israel, ꝑe lelgue  
dzigo zeene laa zho gbiire  
guiaanwen lo Dios stib? jZha  
nac zhe grēraa guielnzaac ne  
ygaa miech!

<sup>13</sup> To ne nac to miech stib  
guiedz, led nanle to ganle, ible  
Dios bzo naa none naa Xtiidz  
me lo to. Scagaa naa, dib zdoo  
naa rioxco naa run naaw,  
<sup>14</sup> zeena togo soobladz palal  
zha ladz naa ye zho squi gbig  
lo Dios csilaa me zho lo xtol  
zho. <sup>15</sup> jQue talzhe ndzona  
zeene laa zho gbiire gbig lo  
Dios stib! Nli laa Dios psaan  
zho, laa grēgaa miech stib  
guiedz laa zho biaanwen lo  
me. Gacxe waa, jtib guielbley  
nrooba zeene laa me ycaania  
zha Israel stib! Sac gon, rriee-  
quia grieeban zho ga.

<sup>16</sup> Zigne pcaania Dios  
xmengol zha Israel bgab zho

lo me, scaquegaa scaania me  
xpēed zho; sac gon, zig nac  
tib zhan yag, zeene ndaan  
low mine naaza len liu,  
ndaanaque zhicwa. Scaque  
nagon, zeene bzooblo Dios  
xmengol zha Israel, yele zho  
ga bzooblo me.

Nana, gzoob ne nac zha  
Israel zig tib zhan yag oliv:  
low nac xmengol zho, laa zho  
nac zhicwa. <sup>17</sup> Bdzin dze  
brug palal zhicwa, dzigo ga  
bguiid zhicw yag oliv dan;  
lēē yag oliv dan co nac to  
ne nac to miech stib guiedz.  
Sca nac ne laa Dios pcaania  
to zigne pcaania me xmengol  
zha Israel; ye to laa to no-  
gaa guielnzaac co. <sup>18</sup> Lēēraasi,  
guiabde to togo nonraa to lo  
zha ne nac zhicwa mine brug  
ga. Golguien ganle, por lo yag  
ndaan zhicwa.

<sup>19</sup> Nana, nend guiab to:  
“Per rioguiaḷ now, gacxe waa  
no biaan xlugar zhicwa, mine  
brug ga.”

<sup>20</sup> jGolgap cuidad gon! Nli  
lēē biche zho, laa to biaan  
xlugar zho, porne bnēd zho  
nalo zho Dios zigne bien to  
rnalo to me; per golguien gac-  
niatsde to. <sup>21</sup> Golgan ganle, ni-  
icxe zha name zhicwpaa yag  
co nac zho ni ptiche me zho,  
ipeleḷ to dzigo!

<sup>22</sup> Golwi ganle zha wentaa  
Dios, per scagaa rdziladz  
me gats xtiidz me. Mincoxe  
waa gondzed me grē zha co,  
laa to gon wen goc me lo to.  
Lēēraasi none gon to mine rn-  
abey me, sac gon telne gonde  
tow, scaque gandzed me to.



<sup>23</sup> Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios! <sup>24</sup> Niicxe to na, nac to zig yag oliv dan, pquia zdoo me to pquiid me to zhicw yag oliv wen co, ¡pelel zha Israel dzigo yquiad zdoo me, gbiire yquiid me zho lo yag ne nacpaa zho!

*Scaania Dios zha Israel ne bzozit lo me ga*

<sup>25</sup> Bets, bzian, laa naa gni lo to ganle zha nac mine no guic Dios gun me. Niicle ne riend miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdoo zozit zho lo me niina, per zeene laa gre miech stib guiedz blozh wbig lo me, <sup>26</sup> hor co grese zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene reb zho:

Guiedz Sión, ga griee men ne cuee zha Israel lo xquielntseeb zho.

<sup>27</sup> Dzigo laa Dios csilaa zho lo gretaa xtol zho, zigne psanle me diidz lo zho.

<sup>28</sup> Len dze rii rlëe zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sanque Dios rleyne me zho, sac scale reb me lo gre pxozgol zho. <sup>29</sup> Me bzooblo zho, dzigo ible scaania me zho; sac gon, led yed me ctsëe xtiidz. <sup>30-31</sup> Glo to nac zha ne ib bind xtiidz Dios, laa niinagaa

na zha Israel nëd gon xtiidz me. Per zigne rquia zdoo me to niina, scaquegaa zdzin dze ne yquia zdoo me zho. <sup>32</sup> Grese miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena griee lo glu me ganle ne lalga rquia zdoo me ne.

<sup>33</sup> ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho griee lo guien pe nac mine no guic me gun me, pe nacgaa gun mew? <sup>34</sup> Zigne zhobneeque lo Xtiidz me, zaatne rnee: “¡Choot nand pe no guic Dios gun me! ¡Choot grieelod guiab lo me, znu znu been! <sup>35</sup> Wlaltaa choot gard pe gdeed lo Dios, par guiab ne laa Dios zëeb.” <sup>36</sup> ¡Peet gon nzëebd Dios lo miech! Sac gretaa ncuaane no, me psana, me naaza, ni me rnabeya.

¡Mese nac men ndzon, tibaque gotsaa dziuunnon ne me! Sca rieguiala.

## 12

*Golban zigne rdziladz Dios*

<sup>1</sup> Bets, bzian, laa to gacnanle ganle pa lotaa nquialadz Dios to. Nana sca, dib nase to golsan to ladznia me, gac to zig tib gon mbe, tib gon ne gley me ycaania me. Sca glu to ne nli rleyne to me.

<sup>2</sup> Ib tsienaldraa to gre ncuaane ndzinlid ne noyac lo guidzliu rii, grese zhgab ne paat rquiind, golcueew guic to; zeena gban to zigne

racladz me, ni guien to ganle zha wentaaw zeene zienal ne mine rnabey me.

<sup>3</sup> Ne znu nac naa zha ne pquia zdoo Dios noyuu naa dziin rii, nligaa laa naa rso diidz lo to, ndzinli golgac, ib glude to ncuaane ni nacde to, sinque golguien cho nac to, zha rnalo to Dios. <sup>4-5</sup> Golgan ganle zha niaa xcuerp ne: nzian lë niaaw, ni tib tiba nose zaatne rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

<sup>6</sup> Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa, zha ne pso me cteed xtiidz me, none gnee zhow zigne csiaab mew guic zho;

<sup>7</sup> zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none min co gun zho;

<sup>8</sup> zha ne pso me gdeedban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

<sup>9</sup> Dib zdoo to golleynie samiech to. Ganzede to

grë ncuaane ntseeb, niapse ncuaane rquiin goltsienal. <sup>10</sup> Ine niowse golleynie grë zha ne nacgrë to, gacnguizhde to, quitniede to zho.

<sup>11</sup> Nguieel golgac, gacm-bechde to, dib zdoo to goltsoxco golgun mine nac xtsiin Dios.

<sup>12</sup> Nley golgac lo guielmban rii, golsoladz ganle zha nactaa grë ncuaane no gneedz Dios lo to; golxecw lo grë guielne ne gan to; tibaque golzodiidznie Dios.

<sup>13</sup> Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

<sup>14</sup> Grë zha ne rtsidil to, laa ne gdzibdee to zho, golnab gunlay Dios zho.

<sup>15</sup> Zha ne no guielbley, golgacnie zho lo xquielbley zho; zha ne nogaa guielne, golgacnie zho lo xquielne zho.

<sup>16</sup> Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrë to.

<sup>17</sup> Zha ne csacsi to, gunde to ne yeque to csacsi zho. Goltsoxco wen golgac lo grëse miech. <sup>18</sup> Tilniede to samiech to, goltsoxco tibaque wen golbannie zho. <sup>19</sup> Golguien, zha ne csacsi to, ib guiabde to ne tozhal ctsire guielne co, sinque golsana lадznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëeb zho. <sup>20</sup> Gacxe waa, zha ne rlëe lo luu, zeene gan

luu mban rac zho rcaabedz zho, mazd bdeed ncuaane gow zho; gangaa luu mban rac zho r nab zhis zho, bdeed ncuaane guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho.”<sup>21</sup> Golguien sca, niapse guielwen goltsienal, zeena sca ycuëz to lo guielntseeb. Gdeete to diidz ne ye to gun guielntseeb.

## 13

### *Golgon mine rnabey wxtis*

<sup>1</sup> Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co. <sup>2</sup> Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëëque zha rguib ted zho caxtigw ga. <sup>3</sup> Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to. <sup>4</sup> Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yгаа to; sac gon, ible laa Dios bzo zho gun zho guielwxtis. <sup>5</sup> Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosane tiblise no guic to.

<sup>6</sup> Scaque dimi ne no gdeed to lo zho, goldeeda; sac rquiin dimi co parne grieelo gun zho

tel pe nac dziin ne no gun zho. <sup>7</sup> Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

### *Golleynie samiech to*

<sup>8</sup> Grë ncuaane rieguial to gun to, golgungazha zeena bdedgaw; sangue samiech to, none tibaque gleynie to zho. Zha ne rleynie samiech, grële mine zhobnee lo Xley Dios ga quiayun zho. <sup>9</sup> Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,  
laa to gut zho,  
laa to cuan zho,  
laa to tsonie tsiel zho,  
gzoobladzgaa to grë ncuaane quianie zho.

Gacxe waa, zha ne rleynie samiech zigne rleynie zho zho, grële mine zhobnee lo Xley Dios ga quiayun zho. <sup>10</sup> Zha ne rleynie samiech, rsacsidraa zho zho; ni min co rnabey Dios. Gacxe waa, grëse ne none gleynie ne samiech ne.

<sup>11</sup> Ib none gban ne zigne racladz Dios, golle na tsaane biini; sac gon, laa dze ne ycaania Dios ne bii ziaadgaxraa, lëdle zeene psilornalo ne me. <sup>12</sup> Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa

dziuun ne. <sup>13</sup> None ndzinli gban ne:

dziuund ne guielgonziu,

dziuund ne grē lni yozh,

yquianguobd ne zha ne led tsieeld ne,

dziuund ne grē guielyozh ne racladz xcuerp ne,

dilnied ne samiech,

glēēnied ne zho zeene stib noded zho.

<sup>14</sup> Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grē ncuaane ndzinlid ne racladz xcuerp ne.

## 14

*Gzeed zdoo to mine run zha ne nacgrē to*

<sup>1</sup> Golcaania zha ne gard tsoguicpaa zha nac Xtiidz Dios. Telne no palal mine rililadz to zhaa rzac zho, glisquide tow lo zho. <sup>2</sup> Gzoob ne, no to rzac peet nacda gow to grē lose guielwagw, laa zha ne na gard tsoguicpaa Xtiidz Dios, rzacgaa wena telne scuaan guizhyese gow zho; <sup>3</sup> ga nagon, ni stib ni stib nod pe nace glisqui din cho pe row, din cho pe rowdgaa; sac gon grēse to, Dios bzooblo to ngab to lo me. <sup>4</sup> Nana zig nac zho, lo Dios ngab zho, led lode tow; ¿cho nac to dzigo tso to glisqui to din pe run zho? Dios nac men ne nan telne lēew o lēdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

<sup>5</sup> Scaque, no zho zianal din pa dzepaa none gleynie zho Dios, nogaa zho rnee zac tell pa dzetaa gleynie zho me. Per peet nacd ga, zac tib tib zho gunse zho mine rzac zho rdziladz me. <sup>6</sup> Tell pa dzetaa wena, totsaque run zhow par gunnon zho me. Scaquegaa guielwagw, wena zha ne gow grēlosew; niicle zha ne ncuuegaa ncuaane gow, wenaquew, totsaque run zhow par glu zho ne rleynie zho me, ni rdeed zho xquizh lo me.

<sup>7-8</sup> Sca nagon naca, per led min cod dzieets ne dziuun ne mine gacladztaa ne. Grēse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdzin ne. Gacxe waa, niicle niina ne zomban new, niicle zeene gutlegaa new, ladznia me no ne. <sup>9</sup> Sac gon, tell Jesús gut me ni brieeban me; gacxe waa, me rnabey ne grēse ne, zigtaa zha mbana zigtagaa zha guta.

<sup>10</sup> Jesús rnabey ne tib tib ne. Gacxe waa, nonguiellda glisqui to lo zha ne rund mine run to; nonguiellda por mincose sac to zho zig zha ne peet nond, tso to gnedraa to lo zho. Ni stiba, gall dze ne laa Dios gunl guielwxtis, grēse ne laa ne none gacredz lo me. <sup>11</sup> Zigne raquetaque lo Xtiidz me, zaatne rnee me:

Naa nac Dios mban, gneli naa lo to ganle:  
grēse miech, ible squiitsgzhib zho lo naa,  
cueero zho ne nli naa nac Dios.

<sup>12</sup> Sca nagon gaca, tib tib ne ib laa ne no cueero lo me tel zha wban ne.

*Csande to zdoo zha ne nacgrë to*

<sup>13</sup> Nana sca, zha ne sca rund grë mine run to, ible glisquidraa tow lo zho. Golguien, gunde to ncuane rgobey to yquiaaqui gunctal zho xtol zho, o csaangaa zho Xtiidz Dios. <sup>14</sup> Tel naa, nanpaa naa led dolda gow ne grë lose guielwagw; sac niicle Jesúsa scaque nac xtiidz me. Saŋgue zha ne rzac doła, mazd gowd zhow; sac tel laa zho gowa, xtol zho ga gunctal zho. <sup>15</sup> Zig rne naa ga led dolda, per telne xtsiinpaa row to tib ncuane rquiaaqui rsan to zdoo stib zho, ga rlu to ne rleyniede to zho. ¡Golguien sca, gowde to ncuane yquiaaqui sozit zho lo Dios! Sac gon, blactaa guielnë ne bded Jesús psilaa me zho.

<sup>16</sup> Ib gunde to grë ncuane yquiaaqui gneenë miech to, niicle ne nanpaa to led dolda. <sup>17</sup> Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda. <sup>18</sup> Sca rdziladz Jesús, ni zha ne sca gban, zleynie Dios zho, niicle-gaa grë miecha zleynie zho zho.

<sup>19</sup> Goltsoxco sca, gunde to ncuane codil to grë zha ne nacgrë to; zeena tipse gac to lozh tsoquic to zha

racladz Dios gban to. <sup>20</sup> Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csan ne zdoo stib zho. <sup>21</sup> Mincocxe waa, mazd gowde to pe scuaan bëel, guiede to nziu, telne min co yquiaaqui gunctal to xtol zho; ni tel pe grëraa ncuane nan to tsod zdoo zho, gunde tow.

<sup>22</sup> Niicle ncuane nanpaa to dolda gun tow, niiclegaa nëz lo Diosa led dolda; per mazd gunde tow zeene zo zha ne rzac doła. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

<sup>23</sup> Saŋgue zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuane rzactaa zho wend ni gun zhow, xtol zho ga gunctal zho.

## 15

*Golgacnie zha ne nacgrë to*

<sup>1-2</sup> Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuane tso zdoo zho, ncuane yquiin lo zho, zeena lozh guien zho zha gnalo zho Dios; led tsode to gun to ncuane yquiinse lo to.

<sup>3</sup> Golgan ganle, niicle Jesúsa bguibd me niac ncuane

nquiin lo me. Zigne raquiet etaque lo Xtiidz Dios, zaatne rnee: “Grëtaa diidznë ne rnee zha ne rlëe lo Dios, grësew pcon zho me.”

4 Grëse minë raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne ygaa ne grë minë bzeetle Dios. 5 Dios men ne rneedz guielbley co, men ne racniën ne guieete ne, me gacniën to niowse gbannie to grë zha ne nacgrë to. Golleynie zho zigne rleynie Jesús to, 6 zeena grëse ne tipse gac ne dzioolnie ne Dios, Pxoz Jesús, men ndzon ne rnabey ne.

### *Grëse miech noyon Xtiidz Ndzon Jesús*

7 Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

8 Golsoladz ganle, zeene biaad Jesús nroob ncuaane been me lo zha Israel, me biaadgun grëtaa minë bzeetle Dios padzeela. Ga blu Jesús grëse minë rnee Dios, ib run mew. 9 Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoo me zho. Min co raquiet lo Xtiidz me, zaatne rnee:

Zoolnie naa luu,  
ni zlu naa lo grë zha stib  
guiedz ne men non nac  
luu.

10 Stib lugar rnee:

To ne nac to miech stib  
guiedz,

inë nley golgac grë to zha Is-  
rael!

11 Ni no stib zaatne rnee:

Grëse to ne nac to miech stib  
guiedz,

igolleynie Dios! iGolsanziuu lë  
me!

12 Mincoque ga bzeet Isá,  
zeene znu pquiaa me:

Zriequia tib men lo xtii Isaí;  
men co gnabey lo grëse miech  
stib guiedz,

ni me gnalo zho grëse zho.

13 Mincoxe waa, to ne nac  
to miech stib guiedz, rnab  
naa lo Dios (men ne psanle di-  
idz pe nac grë ncuaane ygaa  
ne ga) gneedz me guielbley  
lo to, gacnie me to peet zh-  
gab ctsebde to niina ne laa  
to riladzle me. Rnab naa lo  
me, gacniën Espíritu Sant to  
inë gley to yquiambëz to gac  
grë minë psanle me diidz ga.

14 Bets, bzian, nanle naa  
zha wen nac to, nacde to  
zha ne csañ zdoo stib zho;  
rienle to zha racladz Dios  
gban to, rienle to zha cso to  
diidz lo grë zha ne nacgrë to;  
15 per lo guits rii gon nzian  
ncuaane rso naa diidz lo to.  
Guiabde to togo ndox naa  
lo to, sinque laaw ben naa  
zeena guiaanladzde tow. 16 Ne  
nquialadz Dios naa, laa me  
bzooblo naa noyun naa xtsiin  
Jesús, none naa Xtiidz Ndzon  
me lo grë miech stib guiedz,  
zeena csañmbe Espíritu Sant  
zho; lozh ga gded naa zho lo  
Dios zig tib gon ne gley me  
ycaania me.

17 Gacxe waa, tel niina rley  
naa sac noyacniën Jesús naa

noyūn naa dziin ne pso Dios naa. <sup>18</sup> Me noyacniēn naa none naa Xtiidz me lo grē zha stib guiedz, zeēna gban zho zigne racladz me. Ni laa zho nobig lo me, sac ran zho grēse miñe rne naa mban naaw zigne naca, <sup>19</sup> ni ran zho zha racniēn Espíritu Sant naa run naa grē milagr, grē ncuaañe rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nēz xtan zha Ilir. Guiabde to togo rtix naa diidz. <sup>20</sup> Ni laa naa noxco za naa zaatne wlal-taa gard gon zho cho nac Jesús, zeēna gasēēbd naa za-atne ziyele zha ne güeynee Xtiidz me. <sup>21</sup> Laa naa zanaļ zigne zhobnee lo Xtiidz Dios, zaatne rnee: “Grē zha ne wlal-taa gard gon cho nac me, zeēne gan zho grētaa ncuaañe run me, laa zho gunbey me.”

### *Racladz Pabl tsie Pabl Roma*

<sup>22</sup> Nzian vuelt gocladz naa nialgan naa to, per ib bdeetew diidz, sac laa naa bia grē dan co biaseed naa miech. <sup>23</sup> Izle ga na tibaque sca no guic naa, laa niina ne laa naa psiaaļ lo xtsin naa, nataa nagon ible ziaļ naa. <sup>24</sup> Laa naa no ga Spañ, dzigo lēē nēzle ga teed naa Roma i gualgan naa to. Tib guielbleya lo naa gualquiabdiuuzh naa to, dzigo lozh ga siguiel to gun to xyudar naa grieelo ga naa nēz Spañ.

<sup>25</sup> Laa niina, laa naa no ga Jerusalén gasaņ naa tib gon

lo grē zha bets, zha bzian ne no ga; <sup>26</sup> sac grē zha bets, zha bzian, ne no nēz Macedon, ni nēz Acay, laa zho bnediidz beenlo zho palal dimi cxeel zho yquiin grē zha prob ne no nēz co. <sup>27</sup> Niapse zdoo zho gol ptop zho gon co, sac rzac zdoo zho grētaa miñe been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxeel palal ncuaañe rgaa lo zho yquiin zha Jerusalén.

<sup>28</sup> Zigne lozh nagon gasaņ naa gon co Jerusalén, dzigo laa naa teed gualgan naa to i zigne nile naa ga. <sup>29</sup> Rien naa nroob guielnzaac ne gneedz Dios lo to zeēne laa naa gual.

<sup>30</sup> Bets, bzian, golguien ganle Jesús rnabey ne grē ne; ni rleynie ne zha ne nacgrē ne, sac Espíritu Sant nacie ne. Gane niina, laa naa rnab lo to, golgotsaa gnab ne lo Dios gacniēn me naa; <sup>31</sup> golnab lo me, csilaa me naa ladznia grē zha Israel ne gard guien cho nac Jesús. Golinab lo me, ine gley grē zha bets ne, zha bzian ne, ycaania zho gon ne gasaņ naa lo zho nu; <sup>32</sup> zeēna ine nley no zdoo naa glanso naa lo to, ine gdziiladz naa len dze ne cuēz naa lo to i. Sca nagon no guic naa, totsaque gneedz Dios diidz gaca. <sup>33</sup> Ni me ne nac me men ne rbee miech lo grēse zhgab, lo grēse guielxtseeb, me gacniēn to. Sca gaca.

## 16

*Bdiuzh*

<sup>1</sup> Bets, bzian, leṇ dze rii laa Feb, tib wnaa ne run xtsiin Dios guiedz Cencré, laa me guiaad nēz lo to i. <sup>2</sup> Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grē ncuane yquuin me; sac gon, tel me ndal grē zha ne ziyacnie me lo xliaadz zho, haxta naa blactaa ziyacnie me naa.

<sup>3</sup> Ni rnab naa lo to, golsiguiel goldeed zhibdiuzh naa lo grē zha qui.

Goldeed tib zhibdiuzh naa lo Aquil i, grop tsiel me Priscil. Blactaa ziyacnie zho naa zidziun no xtsiin Jesús, <sup>4</sup> haxta bdedlaa zho niet zho psilaa zho naa lo guielgut. Rzadox zdoo naa mine been zho ga, niicle grēragaa zhā zit ne nacgrē new, rzac zdoo zhow.

<sup>5</sup> Ni scagaa, grē zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lēē me nac zha Asia ne glopaa bzēēb xnēz Jesús.

<sup>6</sup> Goldeed zhibdiuzh naa lo Marí, blactaa noyun me xtsiin Jesús lo to.

<sup>7</sup> Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzio ladzguiib. Glo zho bliladz Jesús lo naa, zha nziuu nac zho lo grē zha ne pxeel Dios nonee Xtiidz me.

<sup>8</sup> Goldeed zhibdiuzh naa lo Ampliat, lēē stib zha ne

rdzieel xtidz naa ga; <sup>9</sup> lo Urban, rsoladz naa me, tipse bdziun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho; <sup>10</sup> lo Apel, ye me blactaa ncuane bded me blu me ganle ne nli dib zdoo me rnalo me Jesús; lo grē zha ne no lidz Ristob ne.

<sup>11</sup> Goldeed zhibdiuzh naa lo Herodiōn, ye me menladz naa nac me; lo grē zha ne no lidz Narcis, zha ne rliladzle Jesús; <sup>12</sup> lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

<sup>13</sup> Goldeed zhibdiuzh naa lo Ruf, zēēb xtiidz me lo grē zha ne nacgrē ne; goldeed zhibdiuzh naa lo xniaa me ne, run naa cuent lēē stib xnia naa ga, blactaa pteedlo me naa.

<sup>14</sup> Goldeed zhibdiuzh naa lo Asíntric, lo Flegon, lo Hermes, lo Patrob, lo Hermas ni lo grēragaa zha bets ne nacgrē zho.

<sup>15</sup> Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grēraa zha bets ne nacgrē zho.

<sup>16</sup> Grēse to bets, grēse to bzian, golcaania zhibdiuzh naa. Grēse zha ne rliladz Jesús nēz rii, laa zho rxeel bdiuzh lo to.

<sup>17</sup> Nu ne laa naa csiaalle lo guits rii, laa naa rso diidz lo to, nsin golso lo grē zha ne ziaad loxaque dien zha codil zho to, dien zha gungüet zho to, rlu zho mine ni nacdraa Xtiidz Jesús; yquiaadiagde to zhiwseed zho.



18 Grē zha co, led xtsiin draa Jesús ga run zho, sinque laa zho noxco ncuaane gdeed guxt xcuerp zho. Diidz nex, diidz ndooladz rnee zho; grē miech ne beelze pe rililadz, znuse rquidie zho zho. 19 Saṅgue to, zēēb diidz ne ib rsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squi niini gac to, zeena guien to niapse ncuaane yquiin gun to, ni lalnu tsoode to lo guieintseeb. 20 Scagaa Dios men ne rtiche grēse zhgab, grēse dzeb, merle quixdze me Satanás, zeena peet grieelodraa gun ma. Jesús, men ndzon ne rnabey ne, me gacniē to.

21 Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

22 (Naa nac Ters, naa noquia guits rii, ye naa laa naa rxel zhibdiuzh naa lo to i. Rleynie naa to, sac ye to ngab lo Jesús. 23 Golcaania zhibdiuzh Gay, men ne rbēz naa lidz, laa me rxeel bdiuzh lo to. Lidz me nu rcaalsa grē zha ne rililadz Jesús nēz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to. 24 Jesús men ne rnabey ne, me gacniē to grēse to. Sca gaca.)

25 Laa naa rsan to ladznia Dios, me gacniē to lozh

sodziits to lo Xtiidz me, mine none naa lo miech. Haxta zeene gard tsaa guidzliu, znu no guic Dios csilaa me grē miech lo xtol zho, per choot gocnanda, naraa laaw bzhoobnen. 26 Laa niina, nzian zaatne nogaaz Xtiidz me, zeena grēse zho guien Jesús none gnalo zho, ni mine rnabey me min co no gun zho. Grē zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca. 27 ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grēse ne ne nac ne zha ne ngab lo Jesús! Sca rieguiala.

Pabl

# GUILTS NE GLO PXEEL PABL LO ZHA CORINT

¡Diuzh to grëse to! <sup>1</sup> Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

<sup>2</sup> Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

<sup>3</sup> Dios men ne nac Pxoze ne, ni Jesús men ne rnabey ne, me gacniën to, me glu lo to ganle pa lotaa noxco me to; zeena peet tsienied guic to.

<sup>4</sup> Gzataa zeene rzodiidznie naa Dios, rded naa xquizh lo me por grëtaa ncuaane zi-needz me lo to, niina ne laa to rliladz Jesús. <sup>5</sup> Sac gon porne rliladz to Jesús, blac-taa ziyunlay me lo xquielmban to, noyacniën me to quiayo-guicraa to zha nac zhiwseed me, rien to zha gnee tow lo miech. <sup>6</sup> Rlu zienal to mine nac Xtiidz Jesús, zigne binse tow, <sup>7</sup> gacxe waa bneedz Dios grëtaa guielbiini lo to, zeena guien to zha gban to, laga quiambëz to gdziin dze ne guiaad Jesús men ne rnabey ne. <sup>8</sup> Ni Dios nac men ne gacniën to tiblque gac to lo

Xtiidz Jesús, zeena ni tib falt rapde to gal dze co. <sup>9</sup> Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

<sup>10</sup> Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesússhal noso diidz rii lo to. <sup>11</sup> Sac gon në tib zhalidz Cloé lo naa nodilla to i; <sup>12</sup> no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequigaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús. <sup>13</sup> Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

<sup>14</sup> ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay! <sup>15</sup> Zeena tsod pe nacne guiab to xnëz naa ngab to, sac naa pchoobnis to. <sup>16</sup> Ah, ni naaque gon pchoobnis grë menlidz Stef. Bod lëese zha ne pchoobnis naa ga, <sup>17</sup> sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaid naa pe

guielrac, pe diidz ngañ ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

*Diosse nac men ne rien*

<sup>18</sup> Miñ co nagon noxco naa, maase niicle no grë zha ne rzac ncuaane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios. <sup>19</sup> Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho, niicle rzac zho mazdraa zhooba guic zho, ni lalnu yquiinda.

<sup>20</sup> Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac Dios. Ga blu Dios ganle lega nacse grë guielrac ne no lo guidzliu rii. <sup>21</sup> ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuaane paat rquiinda.

<sup>22</sup> Zig nac grë zha Israel, grë zha Gres ncuaane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalгаа gaca zigne nac zhiwseed zho, sac laa

zho zienal guielrac ne no lo guidzliu rii. <sup>23</sup> Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie. <sup>24</sup> Sangue ne, ne nac ne zha ne bredzle Dios bzëeb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios. <sup>25</sup> Miñe rzac miech paat rquiind ga been Dios, ni nanđ zho ndziibguicraa nac miñ co lo grë xquielrac zho; zha ne rzacгаа cholze cho men nsis ga sca gut lo cruz, ni nanđ zho lëe men co mazdraa ndip lo grëse miech guidzliu.

<sup>26</sup> Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadгаа lo grë dii ne nziuu lo zho. <sup>27</sup> Per ib laa Dios nobedz grë zha ne rzac miech peet rienđ, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non. <sup>28</sup> Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu. <sup>29</sup> Ga rlu me ganle ni tib choot grieelod gacniats lo me. <sup>30</sup> Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús

bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca. <sup>31</sup> Gacxe waa choot grielod gacniats, zigne ziaadaque lo Xtiidz me zaatne rnee: "Zha ne racladz gacniats, mazd gunnon zho Dios por grëtaa ncuaane run me."

## 2

### *Xtiidz Jesús bnee Pabl*

<sup>1</sup> Gacxe waa tel naa, gołsoladz ganle bets, bzian, len dze ne bialseed naa to Xtiidz Dios, bnëd naa dien pe diidz nroob, dien pe diidz ndzielguic lo to. <sup>2</sup> Bënd naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz. <sup>3</sup> Lega gzhe gzhe rac naa, haxta rzhidz naa, rdzieeb naa no naa lo to. <sup>4</sup> Zeene laa naa psilo bne Xtiidz Dios lo to i, gon to ganle ib bnëd naa zigne rnee grë zha ne nac zha rac lo guidzliu rii; per blu Espíritu Sant ganle nacda beelze pe wseed, ni blu ganle pa lotaa poder ne rap Dios. <sup>5</sup> Sca bne naa lo to, sac laa naa racladz zha ne gbig sëëb xnëz Dios, me gnalo zho, gnalod zho grë mine nac xquielrac miech.

<sup>6</sup> Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa

miech, grë diidz ne rleynie grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuaane tibrded naca. <sup>7</sup> Grë diidz ne rnee no, ndzielguic naca, sac zhiwseed Diosa, lëë xquielrac me ga. Ndzielguica, sac ga rlu me zha no guic me csilaa me miech gdzin zho lo guielndzon ne no me; gocnand miecha padzeela, per nolew zeene bzaa me guidzliu. <sup>8</sup> Grë miech ne no len dze rii, rioguicd zho zha nac xquielrac Dios; sac telne nioguic zhow nabeyd zho nquia men ndzon ne nac Jesús ga lo cruz. <sup>9</sup> Zigne zhubneeque lo Xtiidz Dios, zaatne rnee:

Ncuaane waltaa gard guien

miech,

nac grë mine quianiele Dios gdeed me lo grë zha ne nlipaa gbig lo me gleynie zho me.

Ncuaane choot gard gana, ncuaane choot gard gona.

<sup>10</sup> Sangue no laa no ndionlew, sac pxeel me zhiEspíritu me blu lo no zha naca, men co nan grëse mine no guic me.

<sup>11</sup> Zig nace tib miech, grielod gacnanpaa ne dien pe nac mine no guic zho, pe nacgaa mine rza zdo zho, loxaque zhiespírituse zho nana; scaque Dios, loxaque zhiEspíritu me nan grëse mine no guic me gun me. <sup>12</sup> Ni tel no, Espíritu co nacie no (nacie no espíritu ne quianzë lo guidzliu rii), ni

ible laa Dios pxeel me lo no zeena gacndion no zha nactaa grē ncuane nole guic Dios gneedz me lo ne. <sup>13</sup> Zeene rzeet no grē guielnzaac co, laa no rneew zigne rneedz zhiEspíritu me guielbiini lo no, rneed now zigne riab guic grē zha rac ne no lo guidzliu rii. Laa no rnee grē miñ co zigne rlu zhiEspíritu mew, ni ible laaw nac par grē zha ne rioguicle zha racladz Espíritu co.

<sup>14</sup> Grē zha ne nacdied zhiEspíritu Dios, cholze miech nac zho, grielod tsoguic zho zha nac grē miñe rlu Espíritu co lo no. Rzac zho ncuane paat rquiind naca, sac grielod guien zhow ne zhase. <sup>15</sup> Sañgue zha ne rioguicle zha racladz Espíritu co, rien zho pe nac miñe rlu me.

<sup>16</sup> Ni nligaa zha guien zhow, zigne zhobneeque lo Xtiidz Dios, zaatne rnee: "Choot grielod gacnan pe nac miñe no guic Dios gun me, choot grielod glu lo me pe nac miñe no gun me." Per no, ndion now, sac grē ncuane nan Jesús, bneedz me diidz lo no ye no gocndiona.

### 3

#### *Gnalod zho samiech zho*

<sup>1</sup> Bets, bzian, ne nligaa gard grielo gne naa lo to zigne rne naa lo grē zha ne rioguicle zha nac miñe racladz zhiEspíritu Dios, sinque tibaque laa naa rne lo to zigne rne naa lo

grēraa miech guidzliu, sac rrieequia bii mëdyeen nac to lo zhiwseed Jesús. <sup>2</sup> Niapse ncuane ligase ziseed naa to, laa ne cseed naa to ncuane ndzielguic. Rrieequia nidzse nonedz naa quiaye to, laa ne gow to grē ncuane row zha gol. Haxta niinagaa gard tsoguic to zha nac grē miñe ndzielguic, <sup>3</sup> sacne laa to bii zienal miñe run miech guidzliu, laa ne gun to miñe racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios! <sup>4</sup> Pe i na rriee bla to rnee: "Tel no xnëz Pabl no no", rrieequegaa zla zha ne rnee: "Tel no xnëz Apol no no." Gase rlu ganle zienalde to miñe racladz Dios, sinque laa to zienal miñe no guic to.

<sup>5</sup> Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdziuuñ no miñe rnabey me no. <sup>6</sup> Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba. <sup>7</sup> Golwi sca ganle Diosse nac men non, sac me pchoob bni co, tel no peet ncuane nroob bdziuuñ no, lëë gdib tib bloo bni liu, stib bgaala. <sup>8</sup> Zigtaa zha ne bloo bni liuw, zigtagaa zha ne bgaala, lal nac zho grop zho; ni Diosse nac men ne gdeed miñe rieguial zho tib tib zho por dziin ne been zho. <sup>9</sup> Tib ngundziin winse nac no lo

Dios grop no Apol; laa to nac zig tib lē liu ne quiayan Dios, zig tib yu ne quiazaagaa me.

<sup>10</sup> Pa lotaa wen Dios, sac bzooblo me naa naa psilo yu co, ni blu me lo naa zha-paa none tsaaw. Nli naa bgaā blee xcimienta, per ni-ina zhaale zha ne nosoquiaw. Tib tib zha ne nosoquia yu co, none guien zho zaacse gzhix-cuaa zhow, tsienal zho zigne nacse xcimienta ga, <sup>11</sup> sac gon nod pe nacne csēēb zho stib cimient, tibaque cimient no, lēē cimient co nac Jesús.

<sup>12</sup> ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grē quie niazh, no zho gzaaw yag, nogaa zho gzaaw grē pe guizh, pe yag xiidgaa. <sup>13</sup> Zeene gdzin dze ne laa Jesús gun guielwxtis, ga glu dien zha nac xtsiin zho; sac gal dze co grēsew laaw none ted lo gui, ga glu dien pa min lēbraa. <sup>14</sup> Zha ne pquiin ncuaane rlēb lo gui, ib tedsod zgaa zho mine rieguial zho gdeed Dios lo zho; <sup>15</sup> laa zha ne pquingaa grē ncuaane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

<sup>16</sup> Golgacnan ganle xyadoo Dios gon nac to, sacne zdoos to rbēz zhiEspíritu me. <sup>17</sup> Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho. <sup>18</sup> Golguien sca zaacse golgac, tel no zha

ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nacpaa guielrac, guielrac ne rneedz Dios. <sup>19</sup> Sac gon grē guielrac ne no lo guidzliu rii, ncuaane beelze naca nēz lo Dios. Zigne raquietaque lo Xtiidz me zatne rnee: “Grē zha rac ne no lo guidzliu rii, lēēque lo grē guielrac ne zienal zho, ga rlu Dios ganle paat rquiinda.”

<sup>20</sup> No stib zaatne rnee: “Nanle Dios grē zhgab ne nonie guic grē zha rac, ncuaane paat rquiinda.” <sup>21</sup> Tsoode to sca lozhd gacniats to dien cho xnēz miech guidzliu rii no to, golguien ganle grētaa ncuaane no, laa Dios psana par yquina lo to. <sup>22</sup> Zig nac guidzliu, guielmban, guielgut, ladz-  
nia to now, niicle ncuaane no niinaw, ncuaane naragaa ziaada, chen tow; haxta Pabl, Apol, Pedr, ib laa no zo nu par dziuun no xyudar to. <sup>23</sup> Grēse to tibaque xnēz men ne no to, lēē men co nac Jesús, men ne pxeel Dios.

## 4

*Zha rzac zha ne rienee xtiidz Dios*

<sup>1</sup> Golguien sca tib moz winse nac no lo Jesús, laa me bzoos no noseed no miech xtiidz me mine gocnand miech padzeela. <sup>2</sup> Ni zha ne gon znu run tib dziin, ible none nguzobdiidz gac zho lo men ne rnabey zho. <sup>3</sup> Gacxe waa tel zha rzac to naa, tel zha rzacgaa grēraa miech naa, peet zienied guic naa. Haxta ni mine rzaac naa nac

naa, peet nonda, rieguaiald guiep naa znutaa znutaa nac mine noyūn naa. <sup>4</sup> Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguaial naa. <sup>5</sup> Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grē mine rza guic ne, mine no zdoo ne, laaw glu me; grē no ne nodziūn no xtsiin me, dze co laa me gneedz mine rioguaialpaa no tib tib no.

<sup>6</sup> Bets, bzian, niina ne nozet naa no lo to nu grop no Apol, quiaayūn nond naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tsoe to lozhd dien cho non, chogaa nond. <sup>7</sup> Siba, ¿cho nadien nē lo to ne gunnon to to? Grē ncuaane rap to, grē ncuaane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow? <sup>8</sup> Niats rac to, masaque rzac to grēle zhiwseed Dios nan to, gaxle zo to lo me, haxta rzac to tole nac zha rnabey, paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

<sup>9</sup> No hor rzaac naa, diu navez win psan Dios no ne

nac no zha ne nonee xtiidz me, loxaque lo no rwi miech, rwi grē anjl dien zha rac no; zig run miech rieso zho lo zha ne rnabey zho ret. <sup>10</sup> Ne znu quiadziūn no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zhā zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no. <sup>11</sup> Haxta lo nadze blactaa zatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziūn no dziin rdziniaa no ncuaane rquiin no. <sup>12</sup> Ni rlozh ga rrieque miech rsacsi zho no. Rriequia zha ne rdzibdee no, per rdziūnd no gdzibdeequa no zho, sinque mazd rnab no lo Dios gunlay me zho; zha ne rt-sidil no, rdziūncasd no zho. <sup>13</sup> Rriequia zha ne nē rnee lo no, per no, diidz wen rt-sire no lo zho. Masaque rzac miech no, zig rzac zho grē ncuaane paat rquiindraa, zig rzac zho grē ncuaane nole lo guizh.

<sup>14</sup> Laa naa rzet grē min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleyne naa to, rzaac naa to zig tib xpēed naa. <sup>15</sup> Niicle niaca mine ndal zha ne guidaeed to i, niicxe guiaad nzian mil zho waa, per led grēd zho tsoxcopaa to zig rioxco tib dad xpēed zho. Zigne rne naa ga, xpēed naa nac to, rriequia pxoz to nac

naa, sac gon naa glo bialne xtiidz Dios lo to, laa to bzëeb xnëz Jesús. <sup>16</sup> Gol<sub>tsoxco</sub> sca, gol<sub>ban</sub> zigne mban naa. <sup>17</sup> Ni ible min<sub>copaa</sub> gon laa naa rxel Timoté ziaad lo to i, lëe stib xpëed naa i, ne nligaa rleynie naa me, tib zha nguzobdiidz nac me lo men ne rnabey me. Laa me ziaad i, me gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

<sup>18</sup> Rien naa no bla niats ne nac to i, rzac nlidraa guaial naa lo to i stib. <sup>19</sup> Gacnan zho ganle, gneedzse Dios diidz, ible laa naa none guaialniob, dzigo bii zdzian ne dien pe nli na nacie zho xpodder Dios, te loxaque rnee zho ye. <sup>20</sup> Sac gon zha ne ngab xnëz Dios, grë mine rnee zho none glu nacie zho xpodder me, nacda loxaque diidzse. <sup>21</sup> ¿To nadien zha racladz to? ¿Pe rdziladz to guaial naa guaialgactox naa lo to i, te mazd wen ye niapse diidz ndooladz, diidz nex guaialne naa lo to?

## 5

### *Zha ne runctal xtol*

<sup>1</sup> Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios rund min co. Bin naa lëëque xniaa pchoob zho quiangob zho. <sup>2</sup> ¿Yo na ne rzac to grële zhiwseed Dios nan to, gaxle zo to lo me! ¿Laa ne ctoladz to, laa ne tso to guielnë, cuee to zha qui lad to, le! no to rlozhd gacniats to!

<sup>3</sup> Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha rieguaial gac zha co: <sup>4</sup> Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndiönle ne ganle zeene laa to ycaalsa, ga zo Jesús lo to, scagaa naa, gol<sub>gun</sub> cuent lo to i zo naa. <sup>5</sup> Squi ndxie to grë to, gol<sub>zonëz</sub> zha co, gol<sub>cueegazh</sub> zho lo to i, tsie zho tsiet-sobe zho ladznia mendox, ga tednë xcuerp zho guien zho ganle pe noyun zho; nand new togo zzhixcuuaa zho stib, zeena ycaania Jesús zho gal dze ne laa me gbiire guiaad.

<sup>6</sup> ¿Xlëse gon squitaa racniats to rzac to zha mbe nac to, ni randze to zha ne quiayun dol<sub>dox</sub> qui! ¿Pe riende to telne glisquide to mine quiayun zho, ib tedsod zrieequiaraa zha ne squi gunctal xtol! <sup>7</sup> Zha ne squi nac, masaque nac zho zig nac grë guielguidzdox ne znuse rded; gol<sub>cueegazh</sub> zho sca, zeena ine mbe gac to nëz lo Dios, tete to guielguidz qui. Gol<sub>guien</sub> ganle laa Jesús psanmbele ne, min<sub>copaa</sub> gut me, goc me gon nëz lo Dios zig carner yeen ne rgogon zho lo me lni Pascw. <sup>8</sup> Gol<sub>gotsaa</sub> gban ne zigne racladz Dios, grëse tel zha wban ne glo, grëse guiel<sub>yozh</sub>, grëse guiel<sub>ntseeb</sub> ne bdziuun ne, none csaan new grësew. Ndzinli sca gol<sub>gac</sub>, gol<sub>tsienal</sub> mine nac diidzli; none mbe gac to nëz lo Dios, zig guietxtil ne notsd ncobi.



<sup>9</sup> Lo stib guits ne pxel naa lo to ga, laa naa psole diidz lo to ganle ctsieelsade to grë miech yozh ne ndzinlid mban. <sup>10</sup> Zeene sca pso naa diidz lo to, guiabde to togo naca parne ctsieelsadraa to grë zha ne gard gliladz Xtiidz Dios, zha ne rquiangob zha ne led tsieeld, grë zha ne zienal loxaque gunlo dimi, grë zha ne run guielgbaan, grëgaa zha ne rnalo grë mdio. Led zha coda, sac laga mban ne lo guidzliu rii, ible zanlsa ne grë ne zho. <sup>11</sup> Sinque zha ne bzet naa ga ctsieelsade to, nac zha ne nacle diidz xnëz Dios no zho, ni noque zho quiayunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleynie zho Dios lel zhaa ncuane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gowniede to zho. <sup>12</sup> Tel grëraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow. <sup>13</sup> Sangue zha ne nacgrë ne, zeene noyun zho tib ncuane ndzinlid, ib rieguial glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

## 6

*Zha none gac guielwxtis*

<sup>1</sup> Laa to gocnanle ganle, to rieguial glisqui tel pe nac ncuane nonguield run zha ne nacgrë to. Lëda i gon run to, zeene pe tib dil rap to, lëëlëd zie to lo wxtis laa ne gbig to lo zha ne nacgrë to, zha csiooglo lo xtil to. <sup>2</sup> Niacxe nande to zha ne ngab xnëz Dios, zha co cobey zha nac xtol grëraa miech zeene gal dze ne laa Dios gnabeya? Pe nac dzigo grieelod tose csiooglo lo tel pe dil win ne rap to? <sup>3</sup> Haxta grë anjl name, ne gon cobey pe nac grë mine quiayun zho. Gacxe waa, grë dil ne rac lo guielmban rii, ne riogual cobey zha guiooglo low. <sup>4</sup> Sca gon gun to, led node to, rnadse pew laa to ziele lo wxtis. <sup>5</sup> Pe ni tib lë guielto guieud lo to? Lo grë to, niacxe goon guieud zha ne grieelo gnee lo to, cuëz lo xtil to? <sup>6</sup> Nazdpaa rdziladz to dil, pe i na lëëque zha ne nacgrë to quiadilnie to, ni rlozh ga zieque to zienie to xtil to lo zha ne riladzd Dios? <sup>7</sup> Pe riende to tib guieltodoxle i squi no to lëëque to quiadilisa. Mazd golxecw tel cho pe run to.

<sup>8</sup> Mazdraa gon mbana squi no to rsaci to miech, ni haxta zha ne nacgrë to rsaci to. <sup>9</sup> Nanle to ganle zha ne squi run guielntseeb, grieelod gdziñ zho zaatne rnabey Dios. Tsieniewguite guic to sca. Golsoladz ganle grëse zha ne run guielyozh:

zig nac zha ne rquiangob zha  
ne led tsieeld zho,

zig nac zha ne rquiangob zha

ne nole tsieel,  
 zig nac zha ne nac mrazh,  
 zig nac zha ne rnalo grē mdio  
 laa ne gnalo zho Dios,  
 ni tib zho grieelod gdziñ za-  
 atne rnabey Dios. <sup>10</sup> Scaque:  
 zha ne nac ngbaan,  
 zha ne zienie guic loxaque  
 dieñ zha gunlo dimi,  
 zha ne nac ngonziu,  
 zha ne rzhixcuaa diidzguizh,  
 zha ne rungüet miech par  
 cuan zho zho;  
 ni tib zho ygaad guieñzaac  
 co. <sup>11</sup> Blalaa to bio lo grē  
 dol co glo, sañgue niina miech  
 mbele nac to nēz lo Dios, laa  
 Jesús ni Espíritu Sant psañle to  
 zig tib zha ne peet xtold, laa  
 me psañwenle to nēz lo Dios.

### *Gunctald zho xtol zho*

<sup>12</sup> Nli ndal ncuaane zac  
 gun ne, gunctalda xtol ne,  
 niicle choot rcadgaaw, per  
 led grēda rquiin. Tel naa,  
 niicle no ncuaane zrieelo  
 gun naa, per rund naaw; sac  
 racladz naa guien naaw,  
 lozh ga lēew gnabey naa.  
<sup>13</sup> Zēeb diidz rnee zho: “Laa  
 guieñwagw biaan par gow  
 miecha, scagaa zdo zho  
 laaw biaan par tsodzēw  
 guieñwagw.” Nli scaw, per  
 guiabd ne togo por min co  
 lega gowcho ne. Pa rquiin  
 ne lega tedso gow ne, sac gon  
 zigtaa zdo new, zigtagaa  
 guieñwagwa, zdziñ dze ne  
 gnitlo Diosa. Guieñwagw  
 ga na, sañgue grē guieñyozh  
 nerun miech rquiangob zho  
 zha ne led tsieeld zho, biaan  
 ne par dziuun ne min co,  
 sinque laa ne biaan par gban  
 ne zigne rdziladz Dios, sac

me rnabey ne. <sup>14</sup> Tel new  
 nitlod ne, sac gon zigne  
 bleeban Dios Jesús con poder  
 ne rap me, scaque zbeeban  
 me ne zeene laa dze co gdziñ.

<sup>15</sup> Golgacnañ ganle, rrie-  
 quia lēē tiblē xcuerp Jesús  
 nu gon nac ne tib tib ne.  
 Nana, ¿pe nonguiela ga dzigo  
 gdzieel tib lē xcuerp me ga  
 xcuerp tib wnaa ro nēz?  
 ¡Nonguielda gon! <sup>16</sup> Sac gon  
 zha ne raanie tib wnaa ro nēz,  
 rriequia tibaque rac zho ga  
 grop zho wnaa co. Rnee lo  
 Xtiidz Dios, par me: “Zeene  
 laa mgui racgrop tib wnaa,  
 tibaque miech rac zho ga  
 grop zho.” <sup>17</sup> Scagaa zha ne  
 rzēeb xnēz Jesús, tibaque rac  
 zho grop zho me, zhiEspíritu  
 me racnie zho.

<sup>18</sup> Gacxe waa, gunde to  
 guieñyozh yquiangob to zha  
 ne led tsieelde to. Lo  
 grē dol ne no, min riise  
 nac mine xcuerppaa miech  
 rguitnie zho. Sac gon  
 zha ne run guieñyozh co,  
 masaque rsanbeed zho zho  
 ga. <sup>19</sup> Golguien ganle, zha  
 ne nole xnēz Dios, masaque  
 zha nac zig tib yadoo zaatne  
 rbēz Espíritu Sant, Espíritu  
 ne rdeed Dios rbannie zho.  
 Led nedraa rnabey xcuerp  
 ne, <sup>20</sup> Diosle rnabeya, sac  
 gon bzhiile me ne ni nroob  
 gocnon ne lo me. Gacxe waa,  
 zigtaa xcuerp new, zigtaa  
 xpensar new, gotsaa yquiin  
 new par cxobnen ne ganle pa  
 lotaa men nroob nac me.

*Rtsire Pabl lo zhiwnabdiidz zho*

<sup>1</sup> Lo guits ne pxeel to lo naa, nzian ncuane nrabdiidz to, nu ganle laa naa ctsire lo wnabdiidz co: nli wena, telne niaca mine grieelow ctsieelniad ne. <sup>2</sup> Per parne tsod pe yquiaaqui cho gun guilyozh, tsonie zho zha ne led tsieeld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsiel zho zigne rieguiala.

<sup>3</sup> Zha ne ptsieelniale, zig nac mgui none gnee zho lo tsiel zho zeene racladz me, scaquegaa wnaa zeene racladz tsiel zho gnee lo zho none siguiel zho. <sup>4</sup> Sac gon wnaa ne rtsieelnia, led zhadraa rnabey xcuerp zho, sinque tsiel-le zho rnabeya; scaquegaa mgui zeene laa zho rtsieelnia, tsiel-le zho rnabey xcuerp zho. <sup>5</sup> Golguien sca, niicle mguiw niicle wnaaw nodne yca zho xcuerp zho lo tsiel zho. Laa telne rzacgaa zho none yquiind zho tsiel zho tib blalaa dze, sac rquiabladz zho gzodiidznie zho Dios, wena totsaque guiaan zhow diidz grop zho. Per zigne ted ga, gbiireque gnee zho lo tsiel zho, sac gon zha ne grieelod cxecw, nend ccheep mendox zho gun zho guilyozh.

<sup>6</sup> Ne znu rne naa lo to, guiabde to nagon togo rne naa nopaa ctsieelnia to. <sup>7</sup> Tel naa, rzac naa wena tebaa grese to znu ctsieelniad, zigne nac naa; per na ncuane gacd

ga, sacne zhaase zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho.

<sup>8</sup> Zig nac gre zha ne bii tib, gregeaa zha ne gutle tsiel, wena tebaa grieelo scase guiaan zho, <sup>9</sup> per telne rien zho lebd xcuerp zho, dzigo mazd ctsieelnia zho. Mazd wena ctsieelnia zho, ledle so zho tib zho ni tel rec rdzu zho.

<sup>10</sup> Sangué zha ne ptsieelniale, laa naa rso diidz lo zho csaand zho tsiel zho, ni nacda xtidz naa, sinque ible sca rnabey Dios. <sup>11</sup> Laa tel zha ne guiaabgaa csaan zho tsiel zho, zaca, per leeraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

<sup>12</sup> Nu na ganle laa naa gnegaa chop lan xtidz naa lo zha ne led yed tsiel rliladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa. <sup>13</sup> Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho.

<sup>14</sup> Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu

sozit mēed. <sup>15</sup> Nana, telne zhalgaa zha ne rliladz Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuēz zho. Sac gon zha ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho; <sup>16</sup> stiba, nand zho dien pe zdzin dze ne gliladz tsieel zho Xtiidz Dios.

<sup>17</sup> Mine naca tib tib to goitsoxcō gun to mine rdziladz Dios. Zigtaa zha ne pso me ctsieelnia, zigtagaa zha ne pso me scase guiaan, sca none gac to; scagaa zha ne ncaatsieel-le zeene rliladz zho xtiidz me, none sca guiaan zho niicle telne rliladz tsieel zho xtiidz me. Grēse zha ne ngab lo me, diidz rii rso naa lo zho. <sup>18</sup> Zig nac grē zha ne nole bey xcuerp zeene laa zho rzēeb xnēz me, sca no zho bey co gund zho ne yqueets zhow. Zha ne na nodgaa bey co zeene rzēeb zho xnēz me, scaque nod pe nacne tsopaa zho bey co. <sup>19</sup> Mine mazdraa non lo me, gban zho zigne rdziladz me, guiendraa ne dien cho no bey, chogaa nod.

<sup>20</sup> Zigne rneque naa ga, grēse zha ne rzēeb xnēz Dios, tel zha nac zho zeene laa me bredz zho, scase none guiaan zho. <sup>21</sup> Zig nac zha ne nac ngundziin lo ben, peet tsienied guic zho guiab zho dien zha gree zho ladznia zha ne rnabey zho; per telne gdeeda diidz, zac tsoxcō

zho dien zha gree zho lo zha co. <sup>22</sup> Zha ne sca nac ngundziin lo ben zeene bzēeb zho xnēz Dios, guien zho ganle rriequia zonlaale zho, sac gon laa Jesús psilaale zho lo grētaa dol ne bio zho. Zha ne nacdgaa ngundziin lo ben zeene bzēeb zho xnēz Dios, guien zho ganle tib ngundziinle nac zho lo Jesús niina, me rnabey zho. <sup>23</sup> Golguien ganle, grēse to laa Dios bzhiile to ni nroob gocnon to, gacxe waa mele rnabey to; ni togaa, lo me none gun to dziin, gdeete to diidz lega gnabey miech to. <sup>24</sup> Sca nasca gon bets gaca, tib tib to zigne nacse to zeene bzēeb to xnēz Dios scase no gban to, ine gleynie to me.

<sup>25</sup> Stib wnabdiidz ne run to ga dien zha gac zha ne gard ctsieelnia, gneli naa lo to ganle, guiend tib xley Dios mine gnabeypaa dien zha gac zho. Per golquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho. <sup>26</sup> Grē ne ne nac ne zha ne rliladz Xtiidz Dios len dze rii, nligaa ngan nac lo xquielmban ne, gane zoot naa wena zha ne sca gard ctsieelnia, maase guiaantib zho. <sup>27</sup> Zha bgui ne na ptsieelniale gaa, grieelod gni naa guiaantib zho; sca mbannie zho tsieel zho; per tel zha ne gard ctsieelniaaw, mazd sobd guic zho ctsieelnia zho. <sup>28</sup> Zha ne racladzpagaa ctsieelnia, zigtaa mguiw zigtaa wnaaw, led dol d ga gun zho telne laa

zho ctsieelnia; per gacnan zho ganle, zeene laa zho pcatsieel-le, ib tedsod nroob guielnē ne gan zho por grē mine noyac len dze rii.

<sup>29</sup> Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsieel, mazd sac zho zho zig tib zha ne guien d tsieel. <sup>30</sup> Zha ne quianie dimiw, zha ne no guielbleya, zha ne nogaa guielnēw, gdeete zho diidz yca grē ncuuan co lo zho par gun zho xtsiin me. <sup>31</sup> Zha ne bienle runfalte grētaa ncuuane rquiin zho, gdeete zho diidz ctse grē ncuuan co lo zho, sac zigtaa guidzliuw, zigtaa grē ncuuane no low, dzdiz dze ne nitlow.

<sup>32</sup> Mine racladz naa peet zh-gab ctсед lo to. Golwi ganle, zha bgui ne tib, tiblique zienie guic zho run zho mine rdziladz Dios, mine nac xtsiin me. <sup>33</sup> Laa zha ne no tsieel, grieelodraa sca gac zho, sac laa guic zho zienie zha gbannie zho tsieel zho, zha grieelo gun zho mine rdziladz me, min co rionieraa guic zho. <sup>34</sup> Scaque grē men wnaa, zha ne tib, rioxcoraa zho run zho mine rdziladz Dios, dib nacse zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsieel zho, dien zha grieelo gun zho mine rdziladz tsieel zho, xco co rioraa zho.

<sup>35</sup> Laa naa rne min rii lo to, per guiabde to tōgo rca naa ctsieelnia to, sinque

laaw rne naa parne guien to zha gun to, zeena grieelo zaacse gac to gun to mine rnabey Dios. <sup>36</sup> Zha ne quianie wnaa nguieg, telne rzac zho nonguielda ga scase ted lo xquielnguieg xpēed zho, sinque none ctsieelnia zho, peet nacda, led dōld ga ctsieelnia zho. <sup>37</sup> Laa telne rzacgaa zho, wenraaw ctsieelnia xpēdwanaa zho, ible scale pquiabladz zho guiaan mēed, wenaque ga telne sca rzac zho. <sup>38</sup> Wen ga gun zha ne sca gdeed diidz ctsieelnia xpēdwanaa, per mazdraa wen ga gun zha ne rzac mazd ctsieelnia xpēed.

<sup>39</sup> Nana, wnaa ne retgaa tsieel, nli zeene mban tsieel zho rnabey ley ne tsieelse zho gbannie zho; per zeene laa tsieel zho ret, zac ctsieelnia zho tel cho stib mgui ne racladz zho, totsaque zha ne noque xnēz Diosa. <sup>40</sup> Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidz dse naaw sac rien naa led tibd naa, Espiritu Sant nacie naa.

## 8

### *Bēel ne rgogon zho lo mdio*

<sup>1</sup> Stib wnabdiidz ne run to ga, dien zha nac guielwagw ne rgogon zho lo grē mdio, pe zrieelo gdioowa, te grieeloda ye. Zootle na grēle to nan min co; per no hor zeene squi rzac ne grēlew nan ne, lel racniats ne, laa ne gacndooladz ne gnee ne lo grē zha

ne nacgrë ne dien zha gun zho parne tsoguicraa zho Xti-idz Dios. <sup>2</sup> Zha ne rzac grëlew rac zho, ga rlu zho ganle peet riend zho. <sup>3</sup> Tel Dios runbey me tib tib miech, nanpaa me cho nac zha ne rleynie me.

<sup>4</sup> Zhapaa dzigo gaca, ðpe wena dioow ne xpëel grë ma ne rgogon zho lo mdio ga, te wenda ye? Ndionle ne ganle grë mdio ne riegan miech led Diosd ga, tibaque men ne nac Dios no. <sup>5</sup> No zho rzac nziandox Dios, nziandox men rnabey no, no me no gbaa, nogaa me no lo guidzliu, <sup>6</sup> sangue ne ndion ne ganle tibaque Dios no, lëe men co nac Pxoze ne, me psan grëtaa ncuaane no, me psan ne parne dziuunbey ne me. Ni scaquegaa, tibaque men ne rnabey ne, lëe me ga nac Jesús, me bzaa grëtaa ncuaane no, me nac men ne nreedz xquielmban ne. <sup>7</sup> Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquiin zho bëel ne rgogon zho lo mdio racchop guic zho, lëeque zha runctal xtol zho ga sca run zho. <sup>8</sup> Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guiannziiu lo me.

<sup>9</sup> Laa to nanle nasca, peet nacda yquiin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic. <sup>10</sup> Sac gon,

nenda tibliladz to zob to zaatne riegan grë miech mdio noquiin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho. <sup>11</sup> Zha ne sca gun, niicle ne nli rien zho peet nacd ncuaane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz; <sup>12</sup> gacxe waa, telne sca gun to por to yquiaaqui gun zho tib ncuaane rzac zho nonguield, lole Jesús ga quiayun to falt. <sup>13</sup> Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

## 9

*Mine rieguial zha ne run xtsiin Dios*

<sup>1</sup> Zigne nagon zac gun to grë ncuaane wen ne racladz to, scaquegaa naa, zac gnab naa ncuaane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to zeene bialseed naa to, i rlu ganle me nancnie naa.

<sup>2</sup> No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo

xquielmban to i rlu ganle ne nli xtsiin me quiayun naa. <sup>3</sup> Grë zha ne sca rzac nlid Dios pxeel naa, rzac zho peet raguiald naa, gacnan zho ganle: <sup>4</sup> jRaguial naaw gon! Ni grëragaa zha ne rdziuungza no xtsiin Dios, rioguial no gneedz to ncuane yquiin no, gneedz to zaatne gbiaaz no. <sup>5</sup> Tel naa, haxta raguial yquianie naa tib men wnaa ne gac tseel naa, ine sënie naa me zigne run grëraa zha ne rdziuungza no dziin rii, zig nac Pedr, zig nacgaa grë zha bets men ne rnabey ne. <sup>6</sup> ¿Te loxaque grop no Bernabé naye znu zhaaque no dziun no stib dziin, par gdziniaa no ncuane dioow no? <sup>7</sup> Golgan ganle, zig nac zha ne rzëeb lo xtsiin menguiib, ¿niacxe zhaa lo dziin ne rdziniaa zho ncuane row zho rio zho lo xtsiin menguiib? ¿Zha ne rangaa, niacxe rieguiald zho yquiin zho ncuane rac zaatne ran zho? ¿Zha ne na rangaa ma, niacxe rieguiald zho yquiin zho ma zigne racladz zho?

<sup>8</sup> Guiabde to togo bod guicse naa riab mine rne naa nu, golgan ganle haxta lo ley ne psan Moisés <sup>9</sup> no tib zaatne rnee: “Zee ne gun cun to xcon to dziin gzëeni ma mzion zhobxtil gacmbew, code to guix ro ma, golsaan gow ma mine ygaa ro ma.” Golwi ganle zha rnee Dios, nana pe nan to ngonse rquia zdoo me. <sup>10</sup> Lëda gon, grëse ne rquia zdoo me ne. Ga rlu me ganle, zha ne run xtsiin me, ible

rieguial zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible rieguial zho yquiin zhow. <sup>11</sup> Tel no, rriequia nazho tib gon i bdziun no biadseed no to Xtiidz Dios, ¿niacxe rioguiald no dzigo gneedz to ncuane yquiin no?

<sup>12</sup> Blalaa zha ne nale griin riaadted lo to i, rnabey zho to rdeed to ncuane rquiin zho, ¿pe lel no dzigo rioguald gnaba lo to? Mazdraa gon rioguial no gnab now, per haxta lo nadze gard dziun no min co, notaa nan zha rdziniaa no ncuane rdioow no; zeena guiaand zdoo to, lozh ga laa to csaan mine nac Xtiidz Dios. <sup>13</sup> Led nanle to ganle, grë zha ne run dziin len xyadoo Dios, psan me didz grë ncuane nac gon, ga xen zho pe yquiin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho. <sup>14</sup> Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquiin zho. <sup>15</sup> Per tel naa gon, wlaltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaald naa min co, sac rley naa znu quiayazhd naa quiayun naa xtsiin Jesús, mazd maase guetgbin naa, lëdle ctiche zho guielbley rii lo naa. <sup>16</sup> Niicle ne znu quiayazhd

naa quiayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw! <sup>17</sup> Noyund naaw par dien pe premio yгаа naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin. <sup>18</sup> Par naa, lëele premio nu nac guielbley rii ne znu liga quiaseed naa miech Xtiidz Dios, rnabd naa gneedzpaа zho ncuaane yquiin naa niicle ne raguial naa gnab naaw.

*Tsoxco zho yгаа zho premio*

<sup>19</sup> Stiba mazdragaa wena, znu choot noneedzd ncuaane yquiin naa, sac sca grielod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo grëse miech, parne gdeeda diidz tso guic zho sëeb zho xnëz Jesús. <sup>20</sup> Gacxe waa zeene no naa lo grë zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grë zha ne zienal xley zha Israel, niicle ne rnalodraа naa ley, per run naa grë ley ne zienal zho, zeena sca grielo yquiabladz zho sëeb zho xnëz Jesús. <sup>21</sup> Scaquegaa zeene no naa lo grë zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grë ncuaane rleyniedraа Dios run naa. Laa naa run min co, zeena ye zho sëeb xnëz Jesús. <sup>22</sup> Grë

zha ne pense quiayacnaа zha nac Xtiidz Dios, zeene no naa lo zho, rund naa gne naa grë ncuaane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grielo gzodiidz naa lo zho cho nac Jesús, zeena gacnaа zho zha sëeb zho xnëz Dios. <sup>23</sup> Laa naa run min co, parne gdeeda diidz gnee naa Xtiidz Dios grëse lo miech, ni scagaa, gley naa gan naa ye zho yгаа lo guielndzon ne zhobnee lo Xtiidz Dios.

<sup>24</sup> Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grëse to goltsoxco xoon to zeena grëse to yгаа tib premio. <sup>25</sup> Grë zha ne sca rio tib lo wguir, par grielo gun zho gan rioxco zho ran zho xcuerp zho, rund zho ncuaane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdzin dze nitlo. <sup>26</sup> Gacxe waa, tel naa tibaque noxco naa dien zha xoonraа naa. Nanpaa naa pa gdzin naa, nacd naa zig zha ne riend dien pa gdzin, zha ne lega rquiaagaa puñet, rdeete zhow zaatne no ygaaw. <sup>27</sup> Ni lalnu rdete naa diidz gac mine racladztaa xcuerp naa,



tibaque rnabey naaw parne guieṅa ncuaane nonguiel min co none guṅa, led guṅda ncuaane racladztaaw. Laa naa ruṅ min co zeṅa guṅ naa gan, sac goṅ, guieltoḁox ga grieequia naa znu no naa none naa lo miech zha guṅ zho, ni tel lozh ga naapaze biaan bend naa gan.

## 10

### *Nodne gleynie miech mdio*

<sup>1</sup> Bets, bzian, goṅsoladz ganle zha bzhaac grē pxozgol ne zha ne sca bzēnie Moisés ga. Pxeel Dios tib xcow been ncal zaatne zieetaa zho, ni pteed me zho lo Nisdoo Nizhnie. <sup>2</sup> Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

<sup>3</sup> Grēse zho goṅ milagr nroob ne been Dios, bnabey me bliaal guietxtil zhan gbaa bdeed me dow zho, <sup>4</sup> beencta me nis tib cho quie bdeed me go zho no zho dan bidz co. Lēele Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grētaa xliaadz miech. <sup>5</sup> Niicle scataa goṅ Dios zho, per led grēd zho bioxco nion xtiidz me, nacne ndal zho bnitlo bioliuse zho dan co. <sup>6</sup> Gase na ganle gotsaa gwi ne zha bzhaac zho, zeṅa gzoobladz ne dziuun ne grē ncuaane ndzinlid ne been zho. <sup>7</sup> Golguieṅ gleyniede to mdio, zigne been zho. Rnee lo Xtiidz Dios: “Blozhse dow

zho, go zho, laa zho psilo biee lo zhimdio zho.”

<sup>8</sup> Gotsaa gwi ne ganle, pe guielnē ne bgaa zho zeṅe brieequia bla zho lega bionie wnaa, tib dzeque bnabey Dios gut galptson mil zho. iNi lalnu tsod guic to guṅ to min co! <sup>9</sup> Ib guṅglēēde to Dios, sac zha, zeṅe benṅgulēē zho me, bnabey me brieequia grē meel pquiaa maw zho, ndal zho gut. <sup>10</sup> Niicle glisquidгаа to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co. <sup>11</sup> Sca nagon bzhaac grē pxoz gol ne ga, gotsaa guieṅ ne sca dziuunḁ ne mine been zho, mine been zho ga laaw zhobnee lo Xtiidz Dios parne gacndion new, guieṅ ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

<sup>12</sup> Gacxe waa, zha ne rzac mbanpaa zho zigne racladz Dios, none nsin so zho zeṅa guṅd zho ncuaane guṅctal xtol zho. <sup>13</sup> Nli no ncuaane rcheep ne guṅctal ne xtol ne, per nacda ncuaane griiṅ rien. Pe zhidaa miech ne zieded lo min co. Tsod mine guiab ne ib lēbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glēbd ne griee ne; sca nac xtiidz me, ni mesi goṅ ctsēēd me mine rnee me. Me nac men ne gacnieṅ ne griee lo griee ne low.

<sup>14</sup> Bets, bzian, golguieṅ sca ib none csaan to grē mdio, gnalodraa tow. <sup>15</sup> Miech

nixbiini nac to, grē minē rne naa lo to nu, nan to ganle ncuaane rquiina. <sup>16</sup> Golwi ganle, zeene rdioow ne quietxtil, rdio ne vin, rdziuun ne xtsee ne been Jesús ga, ga rlu tipse nac ne grē ne nacie ne me. <sup>17</sup> Niicle ne ndal nac ne, per ne tibaque quietxtil ne rdioow ne, min co gane tibaque cuerp nac ne grē ne, ni lēē xcuerp Jesús ga. <sup>18</sup> Scaque zha Israel, zeene row zho xpēel ma ne riogon lo Dios, ga rlu zho ne nacie zho me.

<sup>19</sup> Zha ne rnalogaa mdio, zeene row zho grē ncuaane riogon lo mdio, scaque tibaque rac zho grē zho mdio. Per guiabde to togo mban mdio, togo mazdragaa nac bēel ne rgogon zho lo mdio. <sup>20</sup> Minē racladz naa guien to, zeene sca run grē miech pe rgogon zho lo grē mdio, lo mendox ga rgogon zhow, led lo Diosda. Golguien sca, ib tsiesēēbde to lo grē zha ne quiyownie mdio, zeena gacniede to mendox. <sup>21</sup> Lēdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox. <sup>22</sup> iGunscade to, gunglēēde to Dios! iGolguien ganle, lēbd ne dzian ne xquielblēē me!

*Zha gun zha ne riladzle Jesús*

<sup>23</sup> Zig rne naa ga: “Nli zac gun ne ncuaane gacladztaa ne, per led grēda nonguiel.” Tel naa, zrieelo gun naa

ncuaane gacladztaa naa, per led grēda yquiin par gun naa xyudar grēraa zha bets ne, lozh tsoquic zho Xtiedz Dios; <sup>24</sup> sac gon, ib none dzioxco ne grēraa zha ne nacgrē ne. <sup>25</sup> Zig nac grē bēel ne rdo lo lgui, zac gow tow, ib gunde to gnabdiidz to dien zha naca, sac gon nend bēel ne biogon lo mdiow, dzigo laa dzeb co tsonie guic to. <sup>26</sup> Golguien ganle, Dios psan guidzliu, scagaa grēta ncuaane no low cheñ me naca.

<sup>27</sup> Zeene tel zha tsiegaa to tib wagw lidz tib zha ne gard gliladz Jesús, bēel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdo to. <sup>28</sup> Per telne griequia tib zha ne gnē bēel ne biogon lo mdiow, gowde tow; zeena csande to zdo zho. <sup>29</sup> Niicle ne ndionpaa ne led dolđ ga gun to gow tow, per zha ne gana ga sadol zdo zho.

Nana gnē to: “iPe nac dzigo por stib zho grielod gun naa minē racladz naa? <sup>30</sup> Tel rded naa xquizh lo Dios zeene pe tib guielwagw ne rquiin naa, ipe nac dzigo por minē rzacse stib zho, grielod gow naaw?” <sup>31</sup> Golguien ganle, racda por zha cose; sac grēse ncuaane dziuun ne, haxta ncuaane dioow new, ncuaane dio new, none zeene nodziuun new cxobneñ ne ganle pa lotaa men nroob nac Dios. <sup>32</sup> Gotsaa guien ne sca ganle dziuund ne ncuaane yquiaaqui csan ne zdo stib

miech, zigtaa zha Israela, zha stib guiedza, zha ne nolegaa xnēz Diosa. <sup>33</sup> Tel naa, zanałd naa ncuaane gdziladz naa naase, sinque rioxco naa grētaa ncuaane run naa, run naaw par gacnie naa grēse miech, zeena grieelo tso guic zho gnab zho lo Dios csilaa me zho lo xtol zho.

## 11

<sup>1</sup> Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

<sup>2</sup> Bets, bzian, rleynie naa to gon sac tibaque rsoladz to naa, ni rioxco to zienal to grē mine pseed naa to.

<sup>3</sup> Per golsoladz ganle: grēse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me. <sup>4</sup> Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho. <sup>5</sup> Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui.

<sup>6</sup> Telne racladzdga zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpays zho.

<sup>7</sup> Grē zha bgui, nod pe nacne gdze lad guic zho, sac choot samiech guidzliu

zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui. <sup>8</sup> Gotsaa gwi ne ganle, letxe xcuxtid wnaa waa biaan mgui, sinque xcuxti mgui brie biaan wnaa. <sup>9</sup> Stiba, zeene psan Dios wnaa, ib laa me psan zho par gacnie zho mgui. <sup>10</sup> Gacxe nagon waa ib none gdze lad guic wnaa, zeena glu ganle nguzobdiidz zho lo zha ne rnabey zho; haxta grē anjl ne no gbaa zley zho gan zho min co.

<sup>11</sup> Per guiabde to togo peet nond wnaa, golsoladz ganle psanle Dios diidz zigtaa mguiw, zigtaa wnaaw rquiinsa zho; sac telne guiend wnaa guiend mgui, telne guiendgaa mgui guiend wnaa.

<sup>12</sup> Gotsaa gwi ne ganle, zeene biaan wnaa cho mgui brie dzit ne biaan wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho. <sup>13</sup> ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye? <sup>14</sup> Golwi ganle ib no gdze guic wnaa, biaanle zho rroob guits guic zho parne ctsew lad guic zho; <sup>15</sup> tel zha, haxta rleynie zhow zeene scataa noola, sangue ne nac ne zha bgui, guielto w ga guiool guitsguic ne. <sup>16</sup> Tel nogaa zha ne rzac led scada, maase gnee zho. Per ible znu gon noseed no miech,

ni grëragaa zha ne rliadzle Xtiidz Dios, rien zho ne nli scaw.

*Zha none gac xtsee ne psan Jesús*

17 Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, le<sub>l</sub> quia<sub>y</sub>unctal to xto<sub>l</sub> to. Min<sub>c</sub>osi nagon ni lalnu ri<sub>o</sub>d zdo<sub>o</sub> naaw. 18 Ziyon naa gzobtaa zeene rcaalsa to, pe na tsiegald til<sub>d</sub>iidz to, laa ne tipse gac to le<sub>l</sub> rlë<sub>l</sub>sa to. Ni rgobey naa nli scaw. 19 Rien naa masaque rzac to ib<sub>l</sub>e sca none gac to, parne glupaa cho nac zha ne non xtiidz, zeena gua<sub>n</sub>nziiu zho lo miech.

20 Led zhixtseedraa Jesús i gon<sub>n</sub> ru<sub>n</sub> to. 21 Sac ron naa zeene laa to row, masaque lë<sub>l</sub>ë<sub>l</sub>d rac to row to ncuaane zienie to, ib rwide to no zha ne rdzi<sub>n</sub> ga quianied zho nroob ncuaane gow zho. Squi rzob to rowcho to, haxta rzudz to; laa zha mbanse rac zho grieelod gow zho ncuaane row to. 22 ¿Mod guiend lidz to, ga sob to gow to, guie to haxta zaatne guieltaa to, led node to run<sub>c</sub>toladz to zha ne squi guiend pe yquiin? I gon<sub>n</sub> rlu to rley<sub>n</sub>iede to grë zha ne no xnëz Dios. ¿Ni palal gon<sub>n</sub> rdziguiend naa ncuaane noy<sub>u</sub>n to i!

23 Golsoladz gan<sub>l</sub>e zha nac ne laa xtsee rii biaan, Jesús psan<sub>n</sub> diidz gaca, sca gocnan<sub>n</sub> naaw ni scagaa biallu

naaw lo to. Wdze ne bnaaz zho Jesús ga, zeene blozh dowxtseenie me xpë<sub>l</sub>dscuel me, bzhen me tib guietxtil, bdeed me xquizh lo Dios; 24 blozhse bdeed me xquizh, nzian lë been me guietxtil co, bdeed mew lo zho rëb me: “Gol<sub>l</sub>quina, rrieequia lë<sub>l</sub>e xcuerp naa nu, sac gon<sub>n</sub> znu gun<sub>n</sub> zho xcuerp naa parne csilaa naa to grë to. Gol<sub>l</sub>gun xtsee rii, parne glu to gan<sub>l</sub>e tibaque rsoladz to naa.”

25 Blozh ga, scaque bzhen me tib cop no vin, rëb me lo zho: “Lë<sub>l</sub>e stib trat cub nu gon<sub>n</sub> riaan Dios grë me miech, rrieequia xchen naa nu nac vin rii, ren ne tso sell trat co par glu nona. Gzataa zeene znu guie to vin, gol<sub>l</sub>soladz gan<sub>l</sub>e zha naca.”

26 Gol<sub>l</sub>guien<sub>n</sub> sca, zeene gun<sub>n</sub>taa to xtsee co zaacse gol<sub>l</sub>guna, sac gon<sub>n</sub>, ga quiaxobnen<sub>n</sub> to lo miech Jesús nac men<sub>n</sub> ne gut xcuent to, psilaa me to. Tibaque none gun<sub>n</sub> to xtsee co, haxta gdzi<sub>n</sub> dze ne laa me guiaad stib.

27 Gacxe waa, zha ne rieniewguit guic rquiind zho xtsee co zigne no yquiin zhow, dol<sub>n</sub> nroob ga ru<sub>n</sub> zho, xcuerp Jesús ga, xchen me ga noguitnie zho. 28 Zeene gun<sub>n</sub> to xtsee co, none wen wen sob to gan<sub>l</sub>e zha naca, pe nacne laaw rac, dzigo lozh ga zac yquiin tow. 29 Sac gon<sub>n</sub> zha ne lega gow guietxtil co, lega guie zho vin co, sac zhow zig beelze pe xtsee; rrieequia guielnë ne ygaa zho ga gow zho, guielnë co ga guie zho.

<sup>30</sup> Min cocxe waa, blactaa zha ne nacgrë to i quiayaan nsis, nogaa zho rzacnële, haxta nzian zho gutle. <sup>31</sup> Telne niaca mine wen wen gwi ne ganle zha nac xtsee co, tsod pe nacre pe guielnë ne cxeel Dios dzian ne. <sup>32</sup> Ni zeene scagaa rteed me ne tib caxtigw, laaw run me parne tsaane biini gbiire gbig ne lo me, zeena led yed ne nitlo gal dze ne nitlo grëraa miech ne ziana ncuane lo guidzliu rii. <sup>33</sup> Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquiina. <sup>34</sup> Tel zha ne riengaa lëbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho ygaa zho guielnë co.

No spalal mine racladz naa gacnañ to, per naa zeene guial naa nëz qui dzigo gne naaw lo to.

## 12

*Guiełbiini ne rdeed Espiritu Sant*

<sup>1</sup> Bets, bzian, nugaa na ganle laa naa gzet zha nac guiełbiini ne rneedz Espiritu Sant, sac racladz naa wen wen guien to zha naca. <sup>2</sup> Rsoladz to ganle zeene gard gliladz to Xtiidz Dios, nëzrii nëzrec bio to güeygan to stib stib grë mdio, ncuane ni tib lan diidz rneed; sangue Dios ne riladz to niina, led scad nac me. <sup>3</sup> Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant

noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

<sup>4</sup> Tib tib zha ne riladz Jesús, zhaase zhaase nac guiełbiini ne rgaa zho, per tibaque men ne rdeeda, lëe men co nac Espiritu Sant.

<sup>5</sup> Nzian mod zrielo dziuun ne dziin lo Jesús, per grëse ne me rnabey ne. <sup>6</sup> Tib tib ne zhaase zhaase mod ne rlu Dios nacie me ne, per grëse ne me nac men ne rlu zha dziuun ne xtsiin me.

<sup>7</sup> Guiełbiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

<sup>8</sup> No lo zho rdeed me guiełbiini rien zho zha cso zho diidz lo miech,

no lo zho rdeed me guiełbiini rseed zho grë ncuane ngañ ni rlu zhow lo miech.

<sup>9</sup> No lo zho rdeed me guiełbiini dib zdoo zho rnalo zho Dios, niicle ncuane mazdraa ngañ rnab zho lo me, raca.

No lo zho rdeed me guiełbiini zeene rnab zho lo Dios, riac grë men rzacnë.

<sup>10</sup> No lo zho rdeed me guiełbiini rnab zho lo Dios rac grë milagr,

no lo zho rdeed me guiełbiini rteed zho xtiidz Dios lo miech,

no lo zho rdeed me guiełbiini rien zho cho nac

zha ne nlipaa nacie me, cho zhagaa nacie men<sub>d</sub>ox.

No lo zho rdeed me guiel<sub>b</sub>iini rnee zho stib diidz ne gard cseed zho,

no lo zho rdeed me guiel<sub>b</sub>iini rien<sub>n</sub> zho pe rnee zha ne rnee diidz co, dzigo rnee zhow.

<sup>11</sup> Grëse guiel<sub>b</sub>iini, Espíritu Sant rdeeda, ni me nan<sub>n</sub> pa min<sub>e</sub> rneedz me lo ne tib tib ne. <sup>12</sup> Lo grëse ne ne nac ne zha ne no xnëz Jesús, rrieequia xcuerp me nac ne. Tel<sub>l</sub> cuerp, niicle ne nzian part niaaw, per tibaque naca. <sup>13</sup> Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben<sub>n</sub>, no-gaa zho zonlaa, per grëse ne tibaque Espíritu ne nacie ne, sac tibaque Espíritu bgaa ne zeene brobnis ne.

<sup>14</sup> Gotsaa gwi ne gan<sub>le</sub>, no ni ne, no nia ne, no diag ne, nzian lë niaa xcuerp ne, per tibaque naca. <sup>15</sup> Gacxe waa tel<sub>ne</sub> niaca min<sub>e</sub> rnee ni ne, grieelod guiabā porne nacda nia ne, nacda xcuerp ne. <sup>16</sup> Scaque diag ne, grieelod guiaba porne nacda bziaalo ne led yedraaw nac xcuerp ne. <sup>17</sup> Sac tel<sub>ne</sub> niaca min<sub>e</sub> gdipse xcuerp ne niaa bziaalo ne, ¿zha nadien gon ne? Tel<sub>ne</sub> gdipsegaa xcuerp ne niaa diag ne, ¿zha gzoobzhi ne? <sup>18</sup> Lëëzhe wen led scad psan<sub>n</sub> Dios xcuerp ne, sinque grëse part ne niaaw bzaa mew zigne gocladz me, psan<sub>e</sub> mew zaatne rquiina tib tiba. <sup>19</sup> Sac tel<sub>ne</sub> tipse

niaa grëse part ne nac xcuerp ne, ¿zhazhe rlu ncuaan<sub>n</sub> co! <sup>20</sup> Gocda sca, sinque zhaase zhaase nac tib tib part co, per grësew tibaque cuerp naca. <sup>21</sup> Gacxe waa grieelod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.” <sup>22</sup> Grëse part ne niaa xcuerp ne nose zaatne rquiina, haxta min<sub>e</sub> mazdraa nda lëë min<sub>n</sub> co rquiinraa.

<sup>23</sup> Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne gan<sub>le</sub> part co nac zaatne ran<sub>raa</sub> ne, rioxcora ne rdze; <sup>24</sup> san<sub>g</sub>ue part ne nziuu lo ne, zienied guic ne dien<sub>n</sub> zha gdzew. Ible sca psan<sub>n</sub> Dios xcuerp ne, zeena sca gacnon part ne rzac ne zhi non. <sup>25</sup> Sca niaa xcuerp ne, grëse part ne niaaw rquiinlsaw xcompañera; led yeda rtsolsa. <sup>26</sup> Gol<sub>wi</sub> gan<sub>le</sub>, zeene në tib part xcuerp ne, grëse part ne niaaraaw zienie në co; scaquegaa zeene rdioon<sub>n</sub> tib part co grësew zienie guiel<sub>b</sub>ley co.

<sup>27</sup> Laa naa rne min<sub>n</sub> rii lo to, sac racladz naa guien<sub>n</sub> to sca none tipse gac to. Gol<sub>guien</sub> gan<sub>le</sub> xcuerp Jesús i nac to grë to, tib tib part ne niaa cuerp co i nac to, rquiinlsa to zha ne nacgrë to. <sup>28</sup> Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzose Dios zho pe nac dziin ne gun<sub>n</sub> zho:

no zho rienee xtiidz me lo  
miech,  
no zho rteed xtiidz me lo  
miech,  
no zho rseed miech xtiidz me,  
no zho rnab lo me rac grë  
milagr nroob,  
no zho rnab lo me riac men  
rzacnë,  
no zho rioxco run xyudar grë  
miech,  
no zho rzo rac zho zha rn-  
abey,  
nogaa zho rnee grë diidz ne  
gard cseed zho.

<sup>29</sup> Golgan ganle, psod me zho  
grëse zho tsienee xtiidz me  
lo miech, grëse zho cteed  
xtiidz me, grëse zho cseed  
miech xtiidz me, grësegaa zho  
gnab gac milagr. <sup>30</sup> Niicle  
psodgaa me zho grëse zho  
gnab guiac men rzacnë, grëse  
zho gnee stib diidz, grësegaa  
zho gnee zha nac grë diidz  
co. <sup>31</sup> Zhaase zhaase nac  
guielbiini ne rgaa tib tib zha  
ne no xnëz me, per goltsoxco  
ygaa to guielbiini ne mazdraa  
rquiin.

Sca nagon naca, per  
golquiaadiaga ganle, nu laa naa  
gzet lo to stib miñe mazdraa  
non lo grë guielbiini rii.

## 13

### *Guielwleynie*

<sup>1</sup> Miñe mazdraa rquiin gon  
nac ne gleynie ne samiech  
ne. Tel niaca miñe bgaa  
naa guielbiini rne naa grë  
lose diidz ne rnee miech,  
haxta grë diidz ne rnee xanj  
Dios rne naa, ni tel rley-  
nied naa samiech naa, çpa dien  
rquiin rac naa grëtaa diidz

co? Rrieequia nac naa ga zig  
tib lë guiib ne loxaque rzedz.

<sup>2</sup> Tel niaca miñe rteed naa  
xtiidz Dios lo miëch, rien naa  
pe nac miñe naraa cxobnen  
me, grëse wseed ne no rien  
naa, ni rleynied naa samiech  
naa, jpaat rquiinda! Tel dib  
zdoogaa naa rnalo naa Dios,  
haxta ncuaane mazdraa  
ngan rnab naa run mew, ni  
rleynied naa samiech naa,  
jpeet nonda!

<sup>3</sup> Tel quiizgaa naa grë  
ncuaane quianie naa lo grë  
zha ne guiend pe yquiin,  
haxta gded naa naa tsec naa,  
per tel rleynied naa samiech  
naa, jzhlëse ga gun naa min  
co!

<sup>4</sup> Sac gon zha ne nli mban  
zigne nac guielwleynie co:  
riednied zho samiech zho,  
wen rac zho lo samiech zho,  
racnëd zdoos zho, niicle ran  
zho wenraa noded stib  
miech lo zho,  
rund zho ne lëëque zha  
gunnon zho,  
racniatsd zho lo samiech zho,  
<sup>5</sup> rund zho ncuaane coguielnë  
zho, gunglëëgaa zho  
samiech zho,  
zienaId zho ne tebaa lose zho  
yquiin grë pe cos,  
nacd zho zha ne lega zolëë,  
rapguielnëd zho samiech zho,  
<sup>6</sup> ni lalnu riod zdoos zho  
miñe run zha ne rsacsi  
samiech,  
miñe rleynie zho nac diidzli.

<sup>7</sup> Zha ne nli rleynie  
samiech, ni lalnu peet  
grieelod yca gleynie zho zho;  
rquiaadiag zho miñe rnee  
zha co, rzhidznied zho zho;  
tibaque rquiabladz zho wen

grieequia zho, rsaand zho zho, tibaque racnie zho zho.

<sup>8</sup> Zdziņ dze yquiindraa cho cteed xtiidz Dios lo miech, yquiindraa gnee zho stib diidz, yquiindraa grē guielrac, sangue guielwleynie gdziņd dze ne nitlow. <sup>9</sup> Niicle ne nogaa ne guielbiini ne rneedz Espiritu Sant, niicle no zha ne rien zha gnee zho Xtiidz Dios lo miech, per palalse nac ncuaane rien ne niina. <sup>10</sup> Sangue gal dze ne laa Dios lozh gzhixcuaa ne zigne no gac ne, grēse guielbiini ne rdziaap ne niina, paat yquiindraaw.

<sup>11</sup> Masaque nac ne niina zig tib mēēdlas. Tel naa, zeene goc naa mēēdlas grēse ncuaane bne naa, grēse ncuaane bien naa, grēse ncuaane pseed naa, grēse ncuaan co beņ naaw zigne ruņ grēraa mēēdlas. Per zeene laa naa broob, laa naa biala biini, grēse ncuaan co laa naa bienpaa zha naca; laa guielmēēdlas co bded. <sup>12</sup> Scadaa nagon rziaac ne niina, palalse rien ne zha nac Dios, rrieequia rdzianse ne me niina zigne ran ne zhimlē ne lo beelze pe tib lē vidr; per zdziņ dze laa ne dzianlo me zigne nacpaa me. Palalse ndion ne niina zha nac me, palalse rsilo rdzian ne me, per gal dze co laa ne dziuunbeypaa me zigne ruņbey me ne niina, nanpaa me zha nac zdoo ne tib tib ne.

<sup>13</sup> Golgacnaņ sca ganle, grē guielbiini co zdziņ dze ne yquiindraaw, sangue ne

znu: dib zdoo ne rnalo ne Dios, noniepaa guic ne zac miņe rnee me, ni rleynie ne samiech ne, lozhda. Per lo gza tsona nagon, guielwleynie co nac miņe gdziņd dze ne gdzēē.

## 14

### *Zha ne rnee stib diidz*

<sup>1</sup> Laa to nanle pa miņ nac miņe mazdraa non, įgolleynie samiech to sca! Per scagaa golnab ygaa to guielbiini ne rneedz Espiritu Sant. Zig nac guielbiini ne rgaa zha ne rteed xtiidz Dios lo miech, golnab ygaa to miņ co zeena sca grielo cseed to miech xtiidz me.

<sup>2</sup> Sac tel zha ne rgaa guielbiini rnee zho stib diidz, zeene rnee zho diidz co choot rienđ dien pew, sac lo Dios ga rnee zho. Tel pe nac miņe rnee zho ga, Espiritu Sant rsiaaba guic zho, per choot racnaņđ dien zha naca. <sup>3</sup> Sangue zha ne rgaa guielbiini rteed zho xtiidz Dios lo miech, miņe rnee zho ga rquiina par tsogucraa miech zha racladz me, par guien zho pe nonguiel guņ zho, ni rchooblada zdoo zho.

<sup>4</sup> Tib zha ne sca rnee stib diidz, lose zho rquiin guielbiini co, sac zhase riogucraa zha racladz Dios; sangue zha ne rteed xtiidz me, diidz ne rnee zho rquiina lo grēraa zha ne no xnēz me, grēse zho riogucraa zha racladz me. <sup>5</sup> Wena tebaa grēse to ygaa guielbiini co gnee to stib diidz, per mazdraa gon wena cteed to xtiidz Dios lo



miech, cseed to miech xtiidz me; sac min co mazdraa rquiin, lëdle gnee to stib diidz. Zacaquegaa gnee to stib diidz co, totsaque lozhse gnee tow, gneegazhaque to dien zha naca; zeena sca yquiina lo grëraa zha ne no xnëz Dios. <sup>6</sup> Bets, bzian, to gase nadien, tel niaca mine glanso naa lo to i csilo naa gne naa stib diidz, ¿pa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac grë mine rien naa, pe nac mine ziaadyob gac, zha nac grë mine zhobnee lo Xtiidz Dios, led grëse min co zien to zha naca, ni squiina lo to grëse to.

<sup>7</sup> Haxta grë ncuaañe rool miech, zig nac bzie zig nacgaa vihuel, tel csilo zha ne noyoola tel zhataa goal zhow, ¿zha dien guien miech pa di noyool zho? <sup>8</sup> Zig nacgaa zha ne rcuedz cornet lo menguiib, telne tel zhataa ycuedz zhow, ¿zha dien gacnan menguiib pe nac vis ne quiayun zho? <sup>9</sup> Scadaa nagon run to zeene rnee to stib diidz lo miech, ¿zha nadien guien zho pe nonee to? Rrieequia lo mese ga rnee to. <sup>10</sup> Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena. <sup>11</sup> Telne guiaad tib zho lo naa csilo zho gnee zho, ni rien naa pe quianee zho, grieelod guien naa pe racladz zho, guien gaa zho zha rzaac naa.

<sup>12</sup> Nana sca, zha ne

rquiabladz yгаа guielbiini ne rneedz Espiritu Sant, gnab zho yгаа zho mine grieelo yquiin lo grëraa zha ne nacgrë zho, zeena grë zho tsoguic zha racladz Dios gban zho. <sup>13</sup> Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac grë diidz co, parne gnee zhow lo miech; <sup>14</sup> sac zha ne sca rnee stib diidz, tel so zho gnab zho lo Dios, rien zho pe nonab zho, loxaque zhiespirituse zho quianee ga. <sup>15</sup> Gacxe waa zeene gnab ne lo Dios, zeene goalniegaa ne me, zac gnee ne stib diidz, per scagaa none gnee ne diidz ne rien ne, mine rien gaa grëraa miech. <sup>16</sup> Sac gon tel stib diidz nonee ne noyoolnie ne Dios, nodeed ne xquizh lo me, ¿zha dien yquiab grëraa zha ne ndxie ni rien zho pe rnee ne? <sup>17</sup> Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

<sup>18</sup> Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i, <sup>19</sup> per zeene zo naa zaatne ndxie grë zha ne noquiaadiag Xtiidz Dios run naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, lëdle so naa gne naa tsii mil diidz, ncuaañe ni tib choot guien.

<sup>20</sup> Bets, bzian, golguien sca golsaan guielmëedlas qui. Za-

cgaa gac to mēēdlas per nēz lo guieḽntseeba, sangue xpen-sar to golgac zig zha ne biaa biinile.

<sup>21</sup> Gotsaa gwi ne ganle zha nac stib diidz. Zhobnee lo Xtiidz Dios rēb me, laa me cxeel miech stib dan miech ne rnee stib diidz, par gnee zho lo zha Israel; per nicle tsienee zha co, ib guieḽnd zhow. <sup>22</sup> Gase naganle rlu rquiind stib diidz co par grē zha ne rnalole Dios, sinque laaw rquiin parne grē zha ne nod xnēz me gan zho ganle nli no me. Zha ne nole xnēz me, zha co rquiin gon zho pe nac miḽe racladz me gacnan zho, pe nac miḽe zhobnee lo Xtiidz me. <sup>23</sup> Per niicle scaw, telne zob bla zha ne sca gard gliladz Xtiidz me, zobgaa bla zha ne pense rsilo rquiaadiaga, ni csilo to gnee to stib diidz, zeene gan zhow lēētaa miḽe guiab zho rzhinle guic to sca rac to. <sup>24</sup> Laa telne grēse to no noteed to xtiidz me, nonee to miḽe racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho grētaa miḽe nonee to, haxta ziaa zho biini zien zho ne nli tib miech ngoopdoḽ nac zho. <sup>25</sup> Zigse quianee to laa zdoō zho lozh yguudz, laa zho ted yquiits-gzhib zho gnab zho perdon lo Dios; ga guieḽ zho ganle ne nli nacie me to.

<sup>26</sup> Bets, bzian, golguieḽ sca zeene ycaalsa to cseed to Xtiidz Dios, zigtaa zha ne goola, zha ne cteed xtiidz Diosa, zha ne gnee stib

diidza, zha ne gneegaa zha nac diidz co, none tsienie guic zho miḽe gun zho ga laaw yquiin parne tsogucraa los demas zho zha racladz Dios gban zho. <sup>27</sup> Zeene gnee zho stib diidz, none choptaa zho, tsonḽtagaa zho gneew. None tibga zho gnee, ni rquiin zole zha ne gnee pe nac diidz co. <sup>28</sup> Laa telne guieḽnd zha ne grieelo gnee dieḽ pe naca, nodne gnee zhow; mazd leḽ zdoose zho gnee zhow, Diosse gon pe nonee zho.

<sup>29-30</sup> Scaque zha ne cteed xtiidz Dios, choptaa zho, tsonḽtagaa zho gneew, laa grēraa zha ne ndxie none yquiaadiag zho miḽe nonee zho. Telne lēētaque nonee tib zho, ni csiaab Dios guic stib zho gnee, dzigo none cuēz zha ne quianeele ga zeena grieelo gnee zha co. <sup>31</sup> Sca none gaca, none tibga tibga zho gnee, zeena grēse zha ne ndxie grieelo gon zho dieḽ pew, parne cseed zho, ni gacnguieelraa zho lo Xtiidz Dios.

<sup>32</sup> Zha ne sca rteed xtiidz Dios, none cseed zho gnabey zho zho, cuēz zho nieeda gdziḽ hor ne gnee zho. <sup>33</sup> Sac tel Dios, rdziladz me guiots gnaaz pe cos, rdziladz me ncuaane nzhiitni. Miḽe rdziladz me zaacse gac tib cos, ni scagaa run grēraa zha ne no xnēz me.

<sup>34</sup> Ni stiba, zeene sca rcaalsa to, racladz naa guieḽ grē meḽ wnaa dzese sob zho. Nodne so zho ye zho gnee, sac gon mgui rnabey

zigne zhubneequ lo Xtiidz Dios. <sup>35</sup> Ncuuañe racladz zho gacnañ zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios. <sup>36</sup> Zaacse sca golgac, golguien ganle grielod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

<sup>37</sup> Mine rne naa lo to nu xtiidz Dios naca, zha ne rteed xtiidz me lo to i, zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew. <sup>38</sup> Zha ne gliladzdgaaw, maase gliladzd zhow.

<sup>39</sup> Sca nagon naca. Goltsoxco sca yгаа to guielbiini cteed to xtiidz Dios lo miech, zeena gacnañ zho zha racladz Dios gban zho; per scagaa, ib ycade to tel cho zha ne rnee stib diidz. <sup>40</sup> Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

## 15

### *Brieaban Jesús*

<sup>1</sup> Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa riladz tow. <sup>2</sup> Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

<sup>3</sup> Zeene bial naa lo to i, pseed naa tow zigne pcaaniase naaw. Gocnañ to cho nac Jesús, gocnañ to por xtol ne gut me lo cruz, zigne zhubneesew lo Xtiidz Dios. <sup>4</sup> Gocnañ to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios. <sup>5</sup> Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho. <sup>6</sup> Güey me güeyted me zaatne ndxie ndziibsráa gaay gayoo zha ne nole xnëz me, grëse zho gon me; ndal zha co bii mban niina. <sup>7</sup> Bded ga gonaque Santiagw me, ni biire güey me lo zha ne bzënie me ga stib; <sup>8</sup> goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed, <sup>9</sup> lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil naa grë zha ne glopaa bzëëb xnëz Dios. <sup>10</sup> Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyun naa lo mine noyun grëraa poxtl; per rned naa togo naase quiayuna, sinque me noyacnie naa rrieelo noyun naaw.

<sup>11</sup> Laa naa rzet min rii, per nacda par glu dien cho nroobraa noyun xtsiin me,

sac mine mazdraa non nac ne noseed no miech Xtiidz me; lëew biadseed no to, ni bliladzdgaa tow.

12 Nana sca, racladz naa gnë to dien zha nacne no bla to i rnee nlid grieewan mengut; led wen wen name gocnan to brieewan Jesús.

13 Telne rnee to nlid grieelo grieewan mengut, rrieequia gon rnee to ga nlid brieewan Jesús.

14 Nana telne brieewand me, paat rquiind mine dzigo noseed no miech nu, zhlëse znu noteed-xtse ne rnalo ne Dios. 15-16 Rrieequia noquidiee no miech, sac gon tibaque rnee no lo zho bleewan Dios Jesús; ni telne nli rrieewand mengut, ye Jesús dzigo bii noliu me niina.

17 Stiba, telne nlid brieewan me, zhlëse dzigo rnalo to me ycaania me to; telne nlid brieewan me, scase bii zëeb to grë xtol to.

18 Grë zha ne bliladz me, zha ne nacle mengut niina, lëe bnitole zho ga dzigo. 19 Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

20 Per gacnan to sca ganle, ¡brieewan Jesús! Me nac men ne glopaa brieewan lo grëraa miech guizhiu ne grieewan.

21 Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús bиаad, por mine been me grëse mengut laa zho none grieewan. 22 Zigne grëse miech ret porne ziaad zho lo xtii Adán, scaquegaa grëse

zha ne gbig lo Jesús, zгаа zho tib guielmban ndzon. 23 Ible sca none gaca, ndion ne ganle laa Jesús brieewanle, ni zeene laa me guiaad, grë zha ne no xnëz me laa zho grieewan.

24 Gal dze co laa me lozh gnitlo mendox ni grëraa ma ne nacie ma, dzigo laa me csañ grëse miech ne no xnëz me lадznia Dios men ne nac Pxoз me; dze cotaa nagon laa Dios gun guielwxtis. 25-26 Sac ible Jesús nonabey haxta gdziñ dze co, zeene laa me gnitlo grëse meyozh ne rlëe lo me; zig nac guielgut, lëew nac mine lultm gnitlo me.

27 Zigne zhobneeque lo Xtiidz Dios, lадznia me biaan grëtaa ncuaane no; per guiabd ne togo ye Dios no lадznia me, sac gon Dios nac men ne bdeeda lo me. 28 Gacxe waa, zeene gal dze ne laa me sca lozh gnitlo grë zha ne rlëe lo me, Pxoз me nac men ne gnabey lo me; sac gon men co gocnie me been me gan, ni men co nac men ne rnabey.

29 Nana, ne rnee to i nlid rrieewan mengut, ¿pe nac dzigo no zha ne rrobnis xcuent zha ne gutle? 30 Telne niaca mine nlid grieewan mengut, ¿pe nac nadien znu gzataa dze quiabeeladz no no lo grë guielxtseeb? 31 Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw. 32 Ne nligaa zeene glo bial naa guiedz Efés nu,

ntseeb goc miech rii lo naa, pale grē ma ntseeb. Telne nlid grieeban menḡut, zhlēse dzigo nodeed naa grē min co; mazd tel zhataa dzigo gban ne, zigne rēbaque diidz ne rēb: “iGolḡotsaa dioow ne, golḡotsaa dio ne, beḡque guielḡutse quiambiaaz ne!”

<sup>33</sup> Per lēda ga ḡoḡ. Zha ne zienal min co, ib yquiaa-diagde to xtiidz zho, zeena gacde to zigne nac zho; zigne zēēbaque diidz: “Telne ndzinlid miech ne ctsieelsa luu, zdziḡ dze ne gac luu zigne nac zho.” <sup>34</sup> Golquix biini sca, ḡunctaldraa to xtoḡ to; pe rtoladzde to, ḡolwi ḡaḡle no bla to i gard sēēb xnēz Jesús, haxta ni rienḡ zho zhapaa nac Dios.

### *Zha grieeban menḡut*

<sup>35</sup> Nana, no to ḡnē: “iPer zha grieeban menḡut? iZhazhe nac cuerp ne grieebannie zho?” <sup>36</sup> iAque n xen w nabdiidz co! iPe ranḡe to zig nac grē midz ne rio liu rac bni, rlozhse rnitlo midz co dzigo laa guizh ne naca ḡa rlan? <sup>37</sup> Tel rnee to zha nac cuerp ne grieebannie zho, ḡolwi ḡaḡle zig nac zhobxtil, zig nac grēragaa midz, ipe niacxe zigne nacsew riow liu, scasaque naca rlan? Led zeene laaw rlan, guizhle naca. <sup>38</sup> Tib midzse naca riow liu, Diosle nac meḡ ne rdeed zhiblaga zigne racladz me. Tib tib midz, psanle me dien zha gluw zeene laaw glan. <sup>39</sup> Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe. <sup>40</sup> Grē anḡl ne no ḡbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu. <sup>41</sup> Gotsaa ḡwi ne ḡaḡle, zig nac xbiini ngbidz zhaa naca lo xbiini mēē, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma roḡ rna. <sup>42</sup> Scadaa nagon, zhaa rlu cuerp ne rap miech niina, ni zhaagaa glu miḡe yḡaa zho zeene laa zho grieeban. Cuerp ne rdziaap ne niina, ncuaane tib rded naca, sanḡue cuerp ne grieebannie ne ḡal dze co, led yedraa min co nitlo. <sup>43</sup> Mban nac cuerp rii, sac rzacnēw, reta; sanḡue cuerp ne grieebannie ne, tib cuerp ne ḡdzind dze nitlo gaca. Lega zozhidz cuerp rii, sanḡue cuerp co tib cuerp ndip ndaan gaca. <sup>44</sup> Cuerp ne rdziaap ne niina, tib cuerp ngoopdoḡ naca, sanḡue cuerp ne grieebannie ne, min co gac tib cuerp ne gban zigne racladzpaa Dios. Sac zigne znu no cuerp ne rquiin lo guielmban rii, scaqueḡaa no miḡe yquiin stib lo guielmban ne gneedz Dios.

<sup>45</sup> Golḡsoladz ḡaḡle, rnee lo Xtiidz Dios Adán goc miech ne ḡlopaa biaan ni Dios nac meḡ ne bdeed guielmban

lo Adán; sangue Jesús, me rap guielmban, ni zrieelo gdeed me guielmban co lo miech. <sup>46</sup> Scaque nagon, glo rga ne cuerp ngoopdol ne rdziaap ne niina, dzigoraa ygaa ne cuerp ne gban zigne racladzpa Dios. <sup>47</sup> Gotsaa gwi ne ganle, zeene biaan Adán yudiese bzaa Dios me; sangue Jesús, men gbaa nac me. <sup>48</sup> Grëse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieegan laa zho gaple tib cuerp zigne nac xcuerp me. <sup>49</sup> Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús. <sup>50</sup> Gulgacnan sca ganle, cuerp ne rdziaap ne lo guidzliu rii, grielod gdziña zaatne rnabey Dios; sac rdziñ dze ne rnitlow, grielod gaca tib cuerp ne guete.

<sup>51</sup> Wen wen golzoobdiag mine gne naa lo to nu ganle, waltaa choot gard gacnaña: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsëe Dios xcuerp ne. <sup>52</sup> Znuse gac min co zig nacse zeene riab tib belye; læe min co gac lultm vuelte ne ycuedz xanjl Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdziñdraa dze nitlo; scagaa grë zha ne bii zomban, hor co laa xcuerp zho gdzëe. ¡Grëse ne dziaap tib cuerp cub! <sup>53</sup> Ible sca none

gaca, ib none gdzëe xcuerp ne gaca tib cuerp ne xiñd, tib cuerp ne gdziñdraa dze nitlo. <sup>54</sup> Zeene gac min co, ga grieequia mine raquiet lo Xtiidz Dios zaatne rnee: “Nasi laa guielgut bnitlo, guielmbanle nac mine rnabey. <sup>55</sup> Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?” <sup>56</sup> Grielodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne. <sup>57</sup> ¡Xquizh xquielnzaac Dios pxeel me Jesús, sac gon por Jesús zrieelo griee ne ladznia guielgut!

<sup>58</sup> Bets, bzian, ne nac to zha ne rleyne naa, golguien sca tibaque dziits golso lo Xtiidz Dios; zig zie dze goltsocora gogun xtsiin me, benque nanle to ganle, grëse xtsiin me mine rdziun ne nacda ncuaane zhlëse.

## 16

### *Gon ne guey Jerusalén*

<sup>1</sup> Laa zig nac gon ne noyaclo guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

<sup>2</sup> Tel palal run to gan tib len zhmal, lo co golcob mine ral zdoo to gdeed to gac gon co; gzobse dze goltsiesana lo zha ne noyunlow. Adel na ganle haxta glansoraa naa i, dzigora na to dien zha topa. <sup>3</sup> Ni

golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow; <sup>4</sup> ni tel rquiinpagaa ye naa ga, dzigo na maase ga naa ganie naa zho.

<sup>5</sup> Len dze rii no guic naa gateed naa nëz Macedon, dzigo gale grie naa glanso naa lo to i. <sup>6</sup> Nend zbëz naa lo to i palal dze, togo iquegaa teed naa len mëë nal ne ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co. <sup>7</sup> Telne zneedz Dios diidz cuëz naa lo to grë len dze co, zbëz naa, sac racladzd naa tib guialteed naa lo to i. <sup>8-9</sup> Niina ne no naa Efës nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndalaque zha ne rtsidila.

<sup>10</sup> Nacle diidz laa Timoté guiaad i; tel nand new naraa guiaad me, golsiguiel zeene glanso me zaacse golcaania me, zaacse golcuëzlo me, zeena tsonley zdoo me; golgan ganle, ye me quiayun xtsiin men ne rnabey ne. <sup>11</sup> Golguien csanwinde to me, sinque golgap me respet; zeena zeene glanso me lo naa nëz rii ine nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

<sup>12</sup> Saugue bets ne Apol, blac-taa bnaab naa lo me niaadgza me zha ne ziaad i niaadgan

me to, per rzac me grieeloda niina. Rien naa zeene gdeed-taaw diidz, ible ziaad me ziaadgan me to.

<sup>13</sup> Bets, bzian, nsin golso, tibaque golnalo Dios. Ib ct-sëede to xtiidz to, tibaque goltsoxco tsienal to mine rnabey me. <sup>14</sup> Ncuaañe guntaa to, golconie guic to gun tow porne rleynie to Dios, porne rleyniegaa to samiech to.

<sup>15-16</sup> Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús. <sup>17</sup> Rley naa gon zeene gon naa laa me blanso nu gza me Fortunat ni Acaic, haxta stib goc zdoo naa gocnan naa zha no to, masaque gun naa cuent grële lo to ga gon naa. <sup>18</sup> Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiayun zho.

<sup>19</sup> Grëse zha ne no xnëz Jesús nëz Asia nu, laa zho rxeel bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeel bdiuzh lo to. <sup>20</sup> Scagaa grë zha ne no nu, ye zho laa zho rquiaabdiuzh to. Zeene

ycaalsa to i, ine golnaaznialsa,  
golqueedzlsa, golcaania zhibdi-  
uzh no.

<sup>21</sup> Nu laa naa cso schop lan  
xtidz naa lo to, ni golwi ganle  
naazhal yquiaw: <sup>22</sup> Grëse zha  
ne gon nëd gleyniepaa Jesús,  
miech ndziibdeele ga nac  
zho. ¡Ni ile gon ziaad me!  
<sup>23</sup> Mese nac men ne gacniën  
to, me nac men ne no zhixco  
to, sac ne nligaa rleynie me  
to.

<sup>24</sup> Niicle naaw rleynie naa  
to, sac gon tibaque nac ne  
ngab ne lo me. ¡Lëed bii  
gdzieel ne sca!

Pabl



## BROP GUITS NE PXEEL PABL LO ZHA CORINT

¡Diuzh to grëse to!

<sup>1</sup> Naa nac Pabl, grop no bets ne Timoté, laa no rquia stib guits rii rxeel no guiedz Corinth i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnéz Dios; zigtaa tow, zigtaa grëragaa zha ne no dib néz Gres iw.

<sup>2</sup> Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

<sup>3</sup> Bets, bzian, golgotsaa gwi ne ganle, ¡zha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne <sup>4</sup> lo grëtaa guielné ne rdieed ne. Ni laa me rchoobladz zdoo ne gon, zeena scagaa grëraa zha ne rdian ne no guielné, mban rac zho, guio ne guiochoobladz ne zdoo zho zigne rchoobladzaque me zdoo ne.

<sup>5</sup> Zig nac niina, nroob guielné ne nodieed no lox- aque ne riladz no Jesús, per scaquegaa ib rsaand me no tibaque nochoobladz me zdoo no. <sup>6-7</sup> Laa no nodzian grë guielné rii, sacne noxco no nonee no lo miech zha

laa zho lo dol, parne scagaa grielo cchoobladz no zdoo to. Lo grë guielné rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdzin dze ne laa to gan grë guielné ne nodzian no nu niina. Ni me gon nac men ne gacnien to glëb to gan tow.

<sup>8</sup> Bets, bzian, tel niaca mine nian to ganle zha nactaa grë guielné nroob ne bdieed no zeene no no néz Asia. Ne nligaa nroob psacsi zho no, ncuaane lëbdraa no lo grë guielné co, tibaque rdzieets no bod gataa niet no. <sup>9</sup> Masaque bzhiac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grielod dziuun no ne nose, sinque Dios none gnalo no, mese zac csilaa no lo grëtaa guielné; sac tel me, haxta men gut rbeeban me.

<sup>10</sup> Ni nligaa blee me no lo guielné co, bla me no lo guielgut co; ni ndion no scaque zla me no lo grëraa guielxtseeb ne dzian no, <sup>11</sup> totsaque gacnie to no tibaque gnab to lo me gacnien me no. Zeena, tibaque gac ne grëse ne gdeed ne xquizh lo me.

<sup>12</sup> Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque

ne nquialadz Dios no gane quia yacnien me no znu mban no. <sup>13</sup> Grë mine rnee no lo guits ne zixeeḽ no lo to, niapse diidzliw, ni mine rgobey no grieelo guien to min co rquiaa no; gane racladz naa gdzin dze ne guien tow. <sup>14</sup> Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

<sup>15-16</sup> Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialteedaque naa lo to i stib; zeena niac chop vult ne nionley zdoo to. Lozh ga, ine niowse nzonëz to naa nia naa nëz Judé. <sup>17</sup> Ni pasëe naa nial. Per guiabde to togo bod notiblid guic naa zeene sca bne naa, o nacгаа naa zig nac grë zha ne laglaase rnee tib diidz, laa len zdoo zho nanpaa zho gund zhow. <sup>18</sup> Dios zobwi ganle rdziuuḽscad no. Mine rnee no, rdziuuḽ now.

<sup>19</sup> Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac Xpëed Dios; ni zig nac Jesús, rquidied me. Grëse mine rnee me run mew, <sup>20</sup> ni grëse mine psan Dios diidz gun me, grësew noyun mew; gane niicle nogaaw rnee no lo miech ganle ible run me mine rnee me, ga rlu ganle pa lotaa men nroob nac me. <sup>21</sup> Ni lëe Dios co gon

nozhixcuaa lo xquielmban ne, laa ne ngab xnëz Jesús niina; me bzooblo no nonee no Xtiidz me. <sup>22</sup> Haxta pxeel me Espiritu Sant zdoo ne, rriequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneele me gneedz me lo ne.

<sup>23</sup> Me zobwi, me nan ganle pe nacne gard guial naa. Gard gon guial naa, per por tow; sac rquia zdoo naa to, racladz naa loxaque guialquiago naa to i, lozh ga mban gac to. <sup>24</sup> Guiabde to sca togo bod racladz no guiaad no. Nli rquiindraa to guiadnee no lo to zha gliladz to Dios, sac dib zdoole to riladz to me; per laa no racladz ine guiaadlonley no zdoo to i. Golguien sca, min co racladz no, racladz no guiaadloguielnë no to.

## 2

<sup>1</sup> Min co nagon bend naa ne nial naa, <sup>2</sup> sac nonguielda ga coguielnë naa to, ni to nac zha ne rgonley zdoo naa. <sup>3</sup> Ne raclazdxax naa min co waa, gane pxel naa tib guits co lo to glo, zeena nzhixcuaale lo guielto ne nobee to i, zeene laa naa nlanso. Sac tel lega nlanse naa, laa ne ndzio ne guielbley, lel guielnë ndzio ne. Ni nan to ganle, tipse nac guielbley ne rdziaap ne; ¿ni-acxe zrieelo nley gac to telne ran to mban rac naa?

<sup>4</sup> Tel gan to ganle zeene pxel naa guits co, ine nlipaa mban rac naa no naa zhizhgab

to! Haxta roon naa zeene noquiaa naaw. Laa naa pxel̄ guits co lo to, per pxel̄d naaw par ngoguiel̄nē naa to; sinque laaw pxel̄ naa, zeena xixcuaaniob lo ncuane ndzinlid ne noyac i; nilaa naa beñ miñ co sacne rquia zdoonaa to. <sup>5</sup> Zeene bin naa zha nac dol̄ ne noyūñ zha co i, zig rne naa ga: bio naa guiel̄nē; per rien̄ naa mazdraa nroob bio to guiel̄nē. <sup>6</sup> Nana gon̄, ne squi laa to pteedle zho tib caxtigw, j̄l̄ēlew ga na! <sup>7</sup> Gol̄guiaanladz mine been zho ga, gol̄neewen lo zho stib, gol̄choobladz zdoonaa zho zeena gacmband zho. Sac tel̄ne csaanladz to zho, nend scase lozh guiuu zho lo xquiel̄nē zho. <sup>8</sup> Rnab naa lo to, gol̄leynie zho stib, zigne rleynieque to zho glo.

<sup>9</sup> Ni stiba, laa naa pxel̄ guits co lo to, zeena dien̄ pe zon to diidz gun̄ to mine rne naa lo to ga. <sup>10</sup> Gol̄guiaanladz mine been zha co sca, tel̄ naa laa naa biaanladzlew. Jesús zobwi ganle laa naa beñle zho pardon, zeena gbiire zaacse gac to; <sup>11</sup> ni scagaa gleyd mendox gun̄güet ma ne. Led nanle to ganle, zombēzle ma dien̄ zha gnitnēz ma ne.

*Tibaque noxco Pabl cseed miech Xtiidz Dios*

<sup>12</sup> Bded ga nagon dzigo bia naa guiedz Troas. Zeene bdziñ naa ga, ne nligaa bneedz Dios diidz niun̄ naa xtsiñ me ga. <sup>13</sup> Nac diidz ga ndzieelo naa bets ne Tit, per zeene gon̄ naa bdziñd me, biotiblindraa guic naa. Nacne

brieque naa ga bia naa nēz xtan zha Macedon, biaguib naa me.

<sup>14</sup> Per, j̄xquizh xquiel̄nzaac Dios! Sac zaatne ziotaa no, Jesús ner lo no, me rlu ganle rdziuuñ no gan lo grētaa ncuane rca. Tibaque rnee no lo miech gacnan̄ zho ganle cho nac me, sca quiaxobnen no Xtiidz me, zig rzēb̄xlaa tib ncuane nex rlaa. <sup>15</sup> Haxta no, masaque nac no lo Dios zig tib ncuane sca nex rlaa; sca nac no lo me sacne laa no ngable lo Jesús. Nēzrii nēzrec nex zēb̄xlaa gox co, zigtaa lo grē zha ne ngable xnēz Dios, zigtagaa lo grē zha ne zie nēz ne nitlow. <sup>16</sup> Par grē zha ne nole nēz ne nitlo, masaque rzac zho no zig tib gox ne nguid rlaa, haxta rsoladz zho pe nac guiel̄gut ne quiambēz zho; sangue grē zha ne nole xnēz Dios, rzac zho no zig tib gox nex ne run̄csoladz zho guiel̄mban ndzon ne no ygaa zho. j̄Ni led chold zha ne gon̄ grielo gun̄ dziin ri! <sup>17</sup> Nu rquiin zha ne dib zdoonaa rquiabladz gun̄ dziin lo Dios, glu zho ne nli Dios pxeel̄ zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho run̄a par cuee zho dimi.

### 3

<sup>1</sup> Nana ne znu rne naa, guiab to bod yeque no rdziuuñ zig run̄ zha ne sca rquidie ga, lēēque zha run̄non zho, rio zho dieen̄ pe diidz ne rquia rey zho par glupaa dien̄ cho nac zho. Ni

lalnu rdziun nond no no, ni-  
 icle peet diidz rquiindгаа no.  
 2 Led yed no rquiin pe di-  
 idz ne dzeey no, to rlu cho  
 nac no. Grëse miech ne gan  
 zha notsëe Dios lo xquielmban  
 to, gase gunbey zho no, ga  
 glu pe nac dziin ne rdziun  
 no. 3 Gane rreequia nac to  
 zig tib diidz ne quialu ganle  
 cho nac no. Jesús zhal pquiaa  
 diidz co, ni pquiind me pe  
 tint ne nquiaa mew, sinque  
 laa me pquiaaw con guielbiini  
 chen zhiEspíritu Dios, men ne  
 nguiamban. Ni pquiindгаа  
 me pe lo guits ne nquiaa  
 mew, sinque laa me pquiaaw  
 zdoo to.

4 Ni ndionpaa no nli scaw,  
 sac Dios zhal rluw, ne nac no  
 zha ne ngab lo Jesús. 5 Per  
 guiabd ne togo nose rrieelo  
 rdziun grë mine rdziun  
 no, led scada, Dios nac men  
 ne racnien no rdziun now;  
 6 sac me bdixbiini no zha  
 cseed no miech diidz cub ne  
 psan me. Gane laa no noseed  
 miech niina, per rseete no  
 zho tsienal zho mine rnabey  
 ley, sinque laa no noseed zho  
 guien zho tsienal zho mine  
 rnabey Espíritu Sant. Sac tel  
 leya, lëe gdib rnabeya guet  
 grëse miech ngoopdol; sangue  
 Espíritu Sant, laa me rlu  
 zha ygaa zho tib guielmban  
 ndzon.

7 Golsoladz ganle, zha blu  
 Dios biini ne nac xquielndzon  
 me zeene pcaania Moisés  
 ley ne rnabey guet grë zha  
 ngoopdol. Biinidoo ne biaan  
 lo Moisés dze co, haxta lëbd  
 lo zha Israel gwi zho lo me,  
 per dzega dzega biuu biini

co. 8 Scaque nagon nolu  
 Dios xquielndzon me, niina  
 ne laa Espíritu Sant nolu  
 zha ygaa miech guielmban;  
 per, mazdraa gon nroob nac  
 guielndzon rii! 9 Sac gon, tel  
 scataa blu xquielndzon Dios  
 zeene biaan guet grë zha  
 ngoopdol; mazdraa dzigo  
 nroob nac guielndzon ne rlu  
 niina. 10 Ne nligaa, palalse  
 ga nac biini ne blu lo Moisés  
 zeene pcaania Moisés ley  
 co, mazdraa nroob biini  
 ne ziaadnie xtiidz cub Dios  
 niina. 11 Ni stiba, bza dze  
 ne been ley co dziin; sangue  
 xtiidz cub me, gdziind dze ne  
 gdzëew. Gacxe waa, mazdraa  
 nac biini ne ziaadniew.

12 Ni ne ndionaxe no waa  
 gdziind dze ne gdzëew, gane  
 tiblrique laa no noneew lo  
 miech; 13 rdziunnd no zig  
 been Moisés. Sac tel Moisés,  
 pquia tib lë lar lo me dzigo  
 gond zha Israel zha bnitlo bi-  
 ini ne biaan lo me ga. 14 Ni  
 rreequia ye lo grë zha Israel  
 ga sca bdze, gacxe waa, haxta  
 lo nadze riend zho zha zhob-  
 nee lo Xtiidz Dios, mine psan  
 me padzeela. Ible riend zho  
 ne bdedle dze ne pquiin di-  
 idz gol co, Jesúsle none gliladz  
 zho niina. Me nac men ne  
 cخال lo zho. 15 Ne nligaa sca  
 nac zho, haxta lo nadze niicle  
 rlabraa zho lo guits ne pquiaa  
 Moisés ga, tibaque ndip nac  
 zdoo zho.

16 Per tel zha ne csaan  
 grë guielntseeb, dib zdoo zho  
 guien zho cho nac Jesús,  
 ible zlit me lar co lo zho;  
 17 sac gon, miech ne naciele  
 zhiEspíritu me, led yedraa

zho ngadoo lo ley gol co. Ni ndion ne ganle, meque ga nac Espíritu. <sup>18</sup> Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhixcuaa zhiEspíritu me lo xquielmban ne, zigse zie dze noluraa me zha nactaa guielndzon ne rap me.

#### 4

<sup>1</sup> Ne nligaa noxco Dios ne, gane niicle peet nond no laa me bzo no quianee no Xtiidz Ndzon me lo miech; ni choot rsaand dziin rii.

<sup>2</sup> Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuaane nacdraa Xtiidz me. Me zobwi ganle niapse diidzli rnee no, niicle grëgaa zha ne rdziunbey no, nan zho rquidieed no.

<sup>3</sup> No grë zha ne ib nëd tsoguic zha nac zhiwseed Dios mine nonee no; sac lëëque grë xtol zho notse lo zho, laa zho zie nëz ne nitlo zho. <sup>4</sup> Nëd zho gliladz zhow, sac ible menox (ma ne nonabey lo guidzliu rii) noyun ncow xquielrien zho; gane riend zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

<sup>5</sup> Laa no quiaseed miech, per rseete no zho gacnan zho

dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me. <sup>6</sup> Ne nligaa tib ngundziin winse nac no! Golwi ganle Dioszhal, men ne bnabey bi-aan biini ne rziini guidzliu, me bdixbiini guic no bien no xquielndzon me ga biaadlu Jesús.

*Rsaand Dios zha ne dib zdoon rnalome*

<sup>7</sup> Ne nlipaa, lega nacse no zig nac tib guies yu ne not-sow grëtaa ncuaane ndzon ne zieneedz Dios lo no. Gase na ganle rlu, Dios nacchea grësew, peet nond no loxaque nose.

<sup>8</sup> Me nacie no, niicle nroob zhgab ne rio no, per racmband no; niicle nroob nac guielxtseeb ne rdzian no, per choot rdziebd. <sup>9</sup> Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib.

<sup>10</sup> Zaatne ziotaa no, quianal miech gut zho no, zigne beenaque zho Jesús; per me rsilaa no lадznia zho. Ga rlu ganle ne men mban nac me, ni me nacie no. <sup>11</sup> Gzataa dze noxtseeb no gut miech no, loxaque ne rdziun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no. <sup>12</sup> Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban

ne gneedz Dios lo to. <sup>13</sup> Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhobneeque lo Xtiidz me, zaatne rnee: "Bliladz naa miñe rnee me, gane rne naaw." <sup>14</sup> Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdziñnie Jesús ne lo me.

<sup>15</sup> Grëse guielñe ne nodzian no, laaw nodzian no sacne nligaa noxco no to; zeena grëse to sëeb xnëz me. Sac telne ndal grë zha ne sëeb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me. <sup>16</sup> Mincocxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racncubraa, laaw riaanmberaa nëz lo Dios. <sup>17</sup> Ni stiba, niicle ne znutaa nodzian no grë guielñe rii, per ncuaane tib rded naca, led ncuaane rnada; sac gon, zeene laa no lozh dieed grë miñ rii, mazdraa nroob nac lo guielndzon ne yгаа no, ni mincosi gdziñdraa dze lozha. <sup>18</sup> Gacxe waa, choot rdziuuncasd grë ncuaane quiadzian no lo guidzliu rii, sinque laa guic no nonie yгаа no grëtaa guielbley ne no gbaa. Sac grë ncuaane ran ne niina, ncuaane tib rded naca; sangue grë ncuaane gard dzian ne ga, led yedraa miñ co nitlo.

## 5

<sup>1</sup> Ni ndion ne ganle, zeene laa xcuerp rii ne nitlo, laa Dios gneedz stib miñe gdziñdraa dze nitlo. Masaque nacse xcuerp rii ne zig nac tib yu guizh win ne rbëz miech lo wгаа; sangue cuerp ne gneedz me lo ne, rrieequia naca zig tib yu ne gbiaazpaa ne gbaa. <sup>2</sup> Blactaa guielñe ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co. <sup>3</sup> Sac gon, led niapdse espíritu gdziñ ga, sinque none gapa cuerp. <sup>4</sup> Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par yгаа ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina yгаа ne guielmban ndzon co. Sca rziaac ne, sac choot rdziladz guet. <sup>5</sup> Dioszhal bzo ne yгаа ne miñ co, ni ible zaca, sac gon laa me pxeelle Espíritu Sant nacie ne.

<sup>6</sup> Tel no, miñ co nagon quiambiaaz no; ndionle no laga mbannie no cuerp rii, grieelod yгаа no miñ co, grieelod gdziñ no zaatne no Jesús. <sup>7</sup> Nli rdziand now niina, per dib zdoo no rliladz no ib laaw none gac. <sup>8</sup> Gacxe waa, haxta nley rac zdoo no quiambiaaz no gdziñ dze co; rziaac no tebaa laa no brieelle len cuerp rii, zeena guiobannie no Jesús. <sup>9</sup> Miñ

co nagon, tibaque noxco no gac no zigne rdziladz me, zigtaa niina ne no no lo guidzliu riiw, zigtagaa zeene gdziin no lo mew. <sup>10</sup> Sac gon, grëse ne zdziin dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa mbana, ga yгаа ne mine guioquia ne tib tib ne.

<sup>11</sup> Min rii nagon nonie guic no, gacxe waa noxco no nonee no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

### *Zaacse golgac lo Dios*

<sup>12</sup> Grë mine blozh bne naa nu, zig bnele naa ga: nacda par dziunnon no no. Laa no rnee grë min rii, zeena guienpaa to ganle cho nac no; ni scagaa, guien to zha ct-sire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho. <sup>13</sup> Nligaa, dib zdoo no noxco no xtsiin Dios, laa miech masaque rzac zho riotsle guic no. Nana nicle tel riotsgaaw, per xtsiin Dios nodziun no. Sangue no, ndionpaa no riotsd guic no; laa no rdziun grë min rii, sacne noxco no cseed to Xtiidz me. <sup>14</sup> Laa no nodziun dziin rii, sacne rleyne no Jesús, maase tel zhataa rzac miecha.

Ndionpaa no Jesús bgaa guielgut ne niogua ne;

scaquegaa, ndion no niina ne laa no bziaab xnëz me, rriequia gutle no lo grëtaa ncuane ndzinlid ne bdziun no glo. <sup>15</sup> Gacxe nagon waa, grëse zha ne rzëeb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdiizh me xtol zho (ni brieaban me), par yгаа zho tib guielmban ndzon ne gdzind dze lozh.

<sup>16</sup> Gotsaa guien sca, zha ne nole xnëz Dios, ziaacd ne zho zig rzac grëraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sangue niina, ndionpaa ne ganle cho nac me. <sup>17</sup> Sac gon, grëse zha ne ne nlipaa dib zdoo rliladz Jesús, stible miech nac zho. Grëse tel zha goc zho glo, laa min co bdedle. ¡Ncube nac lo xquielmban zho! <sup>18</sup> Ni loxaque Diosse gon zrieelo sca gunncub miech. Sac gon, me pxeel Xpëed me Jesús biaadtizh grëse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grieelo guiaanwen zho lo me. <sup>19</sup> Znu gon naca: Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Min rii nagon bzo me no nonee no lo miech. <sup>20</sup> Golgan sca ganle, xmandad Jesús nac no. Me zobwi ganle laa no rnab lo to

niina: ¡Golguiaanwen lo Dios! Golguien ganle, rrieequia gon Dioszhal rso diidz rii lo to. <sup>21</sup> Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

## 6

<sup>1</sup> Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina. <sup>2</sup> Lo Xtuidz me, no tib zaatne znu zhobnee:

Lëetse len dze ne nosilaa naa miech, laa to bnaab gacnie naa to.

Lëetse len dze ne rdeeda didz gac mine quiambëz to, laa grë xliaadz to blanso lo naa.

¡Ni lëe dze co nu nagon bdzin! ¡Nadzegazh quiambëz me gbig miech lo me, zeena csilaa me zho!

<sup>3</sup> Dziin rii quiadziun no, choot quiadziun tald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios. <sup>4</sup> Zigtaa ncuaañe rdziun now, zigtaa grëgaan ncuaañe nodieed now, rlu no ganle ne nli xtsiin me nodziun no. Tel pe nactaa grë guielnë ne nodieed no, tel pe nactaa grë xliaadz no, niicle no zaatne rsacsi miech no, per choot rietede.

<sup>5</sup> Blactaa zaatne rguin zho

no, zaatne rsioogyu zho no, zaatne rriee zho ndal zho racntseeb zho lo no. Blactaa rdib rdzaag no rdziun no dziin, no zaatne rriee zhimcaalo no dipse guieel, no zaatne retgbin no.

<sup>6</sup> Ne nligaa rdzioxco no ndzinli mban no, choot rietede, wen wen rdziunbey no zha nac Xtuidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

<sup>7</sup> Niapse mine nac diidzli min co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziun no dziin. <sup>8</sup> Choot rsaand mine pso Dios no nodziun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech.

<sup>9</sup> Runbeyd miech cho nac no, sanque Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet. <sup>10</sup> Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no grë ncuaañe rap grëraa miech, per ncuaañe



rdziaap no, nroob nona.

<sup>11</sup> Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to. <sup>12</sup> Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie to no. <sup>13</sup> Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsguiel zaacse golgac!

### *Zhaa nac biini lo guielcow*

<sup>14</sup> Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow. <sup>15</sup> Sac gon, tel Jesús, ¿niacxe tipse nac me grë me mendox? Scaquegaa grë zha ne nole xnëz mew, grieelod tipse gac zho grë zho zha ne no lo dol. <sup>16</sup> Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sënie naa to.

Naa gliladz to, ni scagaa to, lo naa ygab to.

<sup>17</sup> Gacxe waa, rbiire me rnee me:

¡Golriee lad grë zha qui, golbiche lo zho!

Gunde to grë ncuaaane ndzinlid ne run zho,

golbig lo naa, naa ycaania to.

<sup>18</sup> Naa gac Pxoz to grëse to, scagaa to, laa to gac xpëed naa.

Lëe xtiidz men ne rnabey to nu.

## 7

<sup>1</sup> Bets, bzian, gotsaa gwi ne ganle zha nactaa ncuaaane psan Dios diidz ygaa ne. Gacxe waa, golgotsaa lozh griee ne lo grë zhgab yozh, lo grë ncuaaane ndzinlid ne runctal xtol ne. None zigsie zie dze dzioxcoraa ne gban ne zigne rdziladz me.

<sup>2</sup> Ne nligaa, zaacse golgac golcaania no stib. Tel pe guielnë ne noded to, tel zha rzac to, to bguiba; zig nac no, choot noquidiede to, choot nosacsie to. <sup>3</sup> Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to. <sup>4</sup> Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoo naa; haxta riats naa ne runbey naa to.

<sup>5</sup> Wlal ne blanso no Macedon nu, ni tib lë notiblid guic no; lala noxtseeb no lo grë zha ne quiana no, lala nonieque to guic no dien yo to. <sup>6</sup> Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu, <sup>7</sup> blansonie me diidz zaacse pcaania to me. Per nli rley no bdzion ndzinlile mban to, në me bio to guielnë grë len dze ne bded ga, ni në me nonie no guic

to, quiambëz to tebaa zha gan̄niob to lo no stib.

<sup>8</sup> Zeene pxel̄ naa guits co lo to glo, mban goc zdoo naa sac bien̄ naa ib zgoguieln̄ew to, sangue niina racmbandraa zdoo naa; sac rien̄ naa niicle ne bio to guiel̄nē tib bla dze, per na laa ncuaaṅ co bdedle.

<sup>9</sup> Gacxe waa rley naa niina, per guiabde to togo rley naa bio to guiel̄nē, sinque rley naa gon̄ naa laa to wbiire wbig lo Dios por guiel̄nē ne bio to ga. Ni sca nagon̄ racladz Dios gun̄ grē zha ne ngab xn̄ez me zeene run̄ctal zho xtol̄ zho, gane rien̄paa naa led psacsid no to ga.

<sup>10</sup> Zeene Dios rdeed diidz sca rio miēch guiel̄nē, lo guiel̄nē co laa zho rbig lo me rsan̄mbe me zho lo xtol̄ zho; rsaan zho tel̄ pe nac ncuaaṅe ndzinlid ne noyūṅ zho. Zha ne sca racwen lo Dios, nodne gacmban zho guiab zho pe nacte bded zho guiel̄nē co. Laa grēraa guiel̄nē ne ran̄ miech, zig nac zha ne nod xn̄ez Dios, loxaque rlozh run̄mbana zho, laa zho bii zie n̄ez ne nitlo zho. <sup>11</sup> Golgaṅ gan̄le, pa lotaa bzhixcuaa to niina ne bio to guiel̄nē co. Haxta biao to biini, bioxco to blee to zha co lo dol̄ ne quiayūṅ zho ga; bien̄ to gan̄le nonguiel̄a rlisqui naaw. Gacxe waa, zeene gon̄ to pa lotaa nac dol̄ co, güeyniew guic to ni wbiṅladz to; gon̄zedraa to zho. Niicle ne gocladz to tebaa i zo naa nedz naa rson dien̄ zha niūṅ to; per tibaque been̄quizh to zho mine been̄ zho ga. Wen ne sca been̄ to, ga blu to gan̄le

rdziguiende to dol̄ ne been̄ zho.

<sup>12</sup> Ne nligaa tibaque noxco no zaacse gac to. Zeene pxeeḷ no guits co lo to, guiabd ne togo zhizhgabpaa zha ne been̄ dol̄ co no no, zhizhgabpagaa pxoz zho; sinque laa no pxeela sac tibaque noxco no zaacse gac to. <sup>13</sup> Gacxe waa, zeene bdzion no bin to diidz been̄ to mine rnee no lo guits co, per nli rley no.

Ni zeene bdzion no grēse to zaacse bl̄ezlo to Tit, mazdraa bley no; niicle megaa rley me ne squi niowse gon̄ to me; haxta nguieeḷ rac me niina. <sup>14</sup> Bzodiidzle naa lo me, ne squitaa wen miech nac to, gane rley naa psande to naa guiel̄to. Tel̄ naa niapse diidzli rne naa, zig nac niina, zig repse naa lo Tit scase gon̄ me rac to. <sup>15</sup> Rleynie me to, rzac zdoo me zeene rsoladz me grēse to ndooladz goc to pcaania to me, ni bin to diidz been̄ to mine bnabey me to. <sup>16</sup> ¡Ne nligaa, rley naa niina bin naa squi zaacse rac to! ¡Nasi, nan̄paa naa racnie to naa zigne racnie naa to!

## 8

### *Dib zdoo to gol̄deed gon*

<sup>1</sup> Bets, bzian, laa no gzodiidz lo to gan̄le pa lotaa quiayacniēṅ Dios grē zha ne ngab lo Jesús n̄ez Macedon nu. <sup>2</sup> Nli nroob grē guiel̄nē ne quiayaṅ zho, per nguieeḷ rac zho. Len̄ dze ne bded nu been̄lo zho tib gon, niicle ne zhis ncuaaṅe rap zho, per nroob gon ne been̄lo zho.

<sup>3</sup> Laa naa rnew lo to, sac naazhal gona. Ne nligaa, dib zdoo zho bleeladz zho grē ncuaañe bloogon zho; ncuaañe rgaataa lo zho laa zho bdeeda. <sup>4</sup> Dzigo bñab zho lo no gdeed no diidz ye xgon zho guey lo grē zha ne nacgrē ne, zha ne guieñd pe yquiuñ. <sup>5</sup> Ni lēdsew ga, bzee zdoo no zeene bdzion no blozhse psañ zho zho ladznia Dios, laa zho wbig lo no nē zho, miñe csiaabtaa Dios guic no gnabey no zho, zun zhow. Ni lalnu gon güeyñied guic no gun zho grētaa miñ rii.

<sup>6</sup> Niina ne bdzion no znutaa biabgan zho nēz rii noyunlo zho gon rii, nacne rdzieets no lo Tit siguiel me guiaad me nēz lo to i stib; zeena lozh gunlo to gon ne bnabeyle me to i quiayunlo to. <sup>7</sup> Rdziuunbey no to: dib zdoo to rnalo to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleyñie to samiech to. Nana sca, zig nac gon rii, scaque dib zdoo to goltsoxco golgunlow.

<sup>8</sup> Laa naa bzeta lo to nu zha been zha Macedon, per guiabde to bod nonabey naa to scapaa gun to. Sinque laa naa bzeta lo to, zeena gacñan to ganle ye zha co pquiabladz bdeed gon co. Nu nagon rdeeda diidz glu to ne nli rleyñie to grēraa zha ne nacgrē ne, led loxaque diidzsew. <sup>9</sup> Golwi ganle, zig nac Jesús pa lotaa noxco me ne. Niicle ne me naccheñ grētaa

ncuaañe no, per bdeed me diidz goc me zig tib zha ne peet rapd; ga bgaa ne grētaa guieñzaac ne rap me. Laa me been miñ co sacne rleyñie me ne.

<sup>10</sup> Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to. <sup>11</sup> Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palaltaa ncuaañe rgaa lo to tib tib to, dib zdoo to goldeeda; <sup>12</sup> sac zeene dib zdoo miech rquiabladz zho cogon zho, tel palaltaa miñe ygaa lo zho, scaania Diosa. Nanle me palal ncuaañe rgaa lo tib tib miech, gnabd me ncuaañe ni quianied zho.

<sup>13</sup> Sac nacda ne ygad to grēse ncuaañe rap to lo stib zho, lozh ga guiaanmban to; laa zha yquianie grēsew. <sup>14</sup> Led scada. Laa miñ rii rac, zeena grēse ne lalga ncuaañe yquianie ne. Niina ne rgaaw lo to, goldeed palala yquiuñ grē zha ne rapd nrooba; zdzingaa dze na pe gunfalt lo to, dzigo laa zho gneedz tel pe nacgaa ncuaañe quianiede to. Sca none dziuunlsa ne xyudar zha ne nacgrē ne, zeena zig rne naa ga: lalga ncuaañe yquianie ne. <sup>15</sup> Golsoladz ganle, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

*Laa Tit guiaad i stib*

<sup>16</sup> Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no. <sup>17</sup> Zeene bnaab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib. <sup>18</sup> Nêz rii, no tib bets ne, nroob yudar quiayun me nogaaz Xtiidz Dios lo miech; zaatne rcaalsataa zha ne no xnêz Dios nu, grêse zho runbey me, tib men nziuu nac me lo zho. Me gacgrop Tit, niina ne laa no cxeel Tit lo to i; <sup>19</sup> ni meque bzooblo zho, sēnal zhits no zeene guiosan no gon rii. Nozhal guiosana, sac ne nligaa dib zdoo no noxco no zha gac xyudar grē zha ne guiend pe yquiu. Nu rlu ganle pa lotaa men nroob nac Dios, sac me quiayacnien ne ne laa dziin rii noyac. <sup>20</sup> Gza no bets co guio, zeena gzadolđ zdoo miech guiab zho nend zha lega zhieen no palal gon rii, sac gon nligaa nroob naca. <sup>21</sup> Dios zobwi ganle mbe lo no, ni racladz no ye miech gan zho ganle ne nli zha legal nac no. Min co nagon, nacne sca guio no gza no.

<sup>22</sup> Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrē ne.

<sup>23</sup> Tel nand new cho gnabdiidz lo to dien cho nac Tit,

golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grē zha ne ne no nêz rii pxeel zho, dib zdoo zho noxco zho mban zho zigne rdziladz Dios. <sup>24</sup> Golguien sca, gza zho zigne ziaad zho lo to i, niowse golcuēzlo zho. Gollu ganle ne nli dib zdoo to rleynie to zho, zigne rleynieque to naa; zeena gacnan grēraa zha ne nacgrē ne nli mine rnee no zeene rzodiidz no lo zho zha nac to.

## 9

<sup>1</sup> Nanle naa, rquiindpaa gni naa lo to zha gdeed to gon ne gaclo nu gac xyudar grēraa zha ne nacgrē ne, sac laa to noyunlolew. <sup>2</sup> Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nêz Macedon nu, rne naa lo zho: wdibizlaa psilo to nêz Acay i quiayunlo to gon co. Min cocxe waa, zeene bin zhow, nzian zho pquiabladz laa zho bdeeda. <sup>3</sup> Per laa no rxeel gza bets rii ziaad i, ziaadguncsoladz zho to lozh gunlo niob tow; zeena glu ganle led lega rneed no zha nac to. <sup>4</sup> Sac gon guielto ga grieequia naa lo zha rii, tel guialnie naa bla zho i, ni gan zho peet gard gaclo. Nli ziaa naa guielto, per mazdraa gon nac guielto ne guiaan to. <sup>5</sup> Min co nagon, ni naa mazd cxel naa zha rii, ziaadnerga zho zeena gun zho xyu-

dar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuane cogon to, dib zdoo to goldeeda. Golguien zha cogon to. <sup>6</sup> Golwi ganle zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho. <sup>7</sup> Tib tib to sca, golcobey palal ncuane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuane rgogon zho, rleynie Dios zho. <sup>8</sup> Ni me ne nac me men ne rrieelo rneedz grese ncuane rquin, me nac men ne gneedz gretaa ncuane yquin to; ni haxta ziaan mine gdeed to gac xyudar greraa zha ne nacgre ne. <sup>9</sup> Zigne raquietaque lo Xtiidz me, zaatne rnee:

Zha ne nguzobdiidz lo Dios, dib zdoo zho rgad zho ncuane rap zho lo gre zha ne guien pe yquin;

ni scagaa seeb diidz ne miech wen nac zho.

<sup>10</sup> Dios gunlay ncuane quianie to, ygaaw gdeed to, ni scagaa me gacnien to nroobraa guielnzaac ne yгаа to. Golwi ganle, zha runlay me zha ne ran: Me psan grese lo bni ne ran zho, ni meque rchooba; rlozh ga, nroob guielnzaac ne rlis zho, rgaaw row zho.

<sup>11</sup> Ne nligaa, Dios nac men ne gunnroob ncuane quianie

to, zeena scagaa nrooba cogon to. Golguien ganle, zeene laa no guiosana lo gre zha ne yquina ga, blactaa gley zho gdeed zho xquizh lo Dios. <sup>12</sup> Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoo zho gdeed zho xquizh lo Dios. <sup>13</sup> Zley zho gan zho gretaa ncuane cxeel to yquin zho; ni zleynie zho Dios gan zho ron to mine rnabey Xtiidz Jesus. <sup>14</sup> Haxta dib zdoo zho gnab zho gacnien Dios to, por gretaa guielnzaac ne gdeed me ga yгаа zho.

<sup>15</sup> ¡Xquizh xquielnzaac Dios, sac gon tel me nroobraa nac guielnzaac ne bneedz me lo ne! ¡Gotsaa gwi ne ganle, haxta Xpeed me bleeladz me!

## 10

*Rieguial gnabey Pabl lo zha Corint*

<sup>1</sup> Ziyon naa rnee zho i, zeene zose naa zit nguieex rzé xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rsogaa naa, ndooladz rne naaw; zig gun Jesus, tel niaca mine mezhall gnee lo to. <sup>2</sup> ¡Tebaa gdzind dze pe yquiaaqui glu naa xquieldox naa lo to! Zha ne squi rzac lalaque nac no gre no greraa miech, rnee zho mine run miech, mincoque rdziuun no, ¡tebaa siguiel zho

zaacse gac zho, sac racladz naa tilnie naa zho!

<sup>3</sup> Nli miehse nac no, per ib zionald no gacndaan no zigne racndaan grëraa mieh guidzliu. <sup>4</sup> Sac tel no, choot rnalod grë guib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guielntseeb ne racladz mendox gac. <sup>5</sup> Con poder rii, zrieelo csioog no ro zha ne squitaa lega rnee, zha ne racndaan nêd zho gacnañ mieh cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib mieh nguzobdiidz lo Jesús. <sup>6</sup> Ni poder co yquiin no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëqew yquiin no par gacnañ zho ganle zha rieguial gac zho.

<sup>7</sup> Zha ne rnee i loxaque rzedz yan naa, laglaase ga ran zho, nanđ zho zhapaa nac naa. Naasi xnêz Jesús no naa; gacxe waa, zha ne rnee xnêz me no zho, none guien zho ganle cho nac naa. <sup>8</sup> Nana no to guiab guielniatsle nu, sac rlu naa ne naa rnabey lo to. Per nacda guielniats, ible Dios bzo naa gnabey naa lo to, ni laa me bzo naa par glu naa zha tsienal to grë mine rnabey me, bzod me naa par yquidiee naa to tsienal to nêz ne nitlo to. <sup>9</sup> Golgacnañ sca ganle Dios bzo naa, guiabde to togo lega rnese naa par ctseb naa to. <sup>10</sup> Sac nanle naa no zha ne rnee i: "Gonde to

mine rnee men qui. Loxaque lo guits ne rxeel me squitaa ndox rzë xtiidz me, per loxaque diidza. jZeene zo me lo ne, tib zha yozhsew, per ni riend me zha gnee me!" <sup>11</sup> Per led scada gon. Niina ne laa naa guial i, laa naa glu lo zho ganle zigne rzë xtidz naa zo naa zit, sca nac naa.

<sup>12</sup> Ib guiabde to, togo ye naa quiayun zigne run zha qui, lëëque lëë zho runniats zho. Tib guieln xen ga, sac gon lëëque zha runnon zho. <sup>13</sup> jTel no, choot rdziuunniatsd no ncuaane ni nacd no! Ni zeene rnee no cho nac no, per mine bzo Dios no nodziun no min co rnee no; ni mecxe waa bzo no quiaseed no to.

<sup>14</sup> Ible rioguial ne no gnabey lo to, sac gon no glopaa biaad i biadseed no to zha nac Xtiidz Ndzon Jesús; choot noziaabd zaatne rioguald no. <sup>15</sup> Stiba, rdziladz no gdaannie no xtsiin stib mieh. Laa no bii cseed to lozh tsoguic to zha nac Xtiidz Dios, zeena haxta ye to gun xyudar no ygaazraa Xtiidz me. <sup>16</sup> Dzigosi nagon laa no guio grëraa guiedz ne ndxie dib nêz qui, guioseed no zho gacnañ zho zha laa zho lo dol; per zig rneque naa ga, guiosiaabd no zaatne psilole stib zho, zeena gan mieh ganle rdaannied no xtsiin stib zho.

<sup>17</sup> Znu ziaad lo Xtiidz Dios, zaatne rnee: "Zha ne zienie guic xobnen lë zho por dziin ne run zho, mazd tsoxco zho xobnen lë Dios." <sup>18</sup> Sac paat rquiinda ne lëëque ne gunnon

ne, mine mazdraa rquiin nacne Dioszhal glu zha non nac ne.

## 11

### *Nlid Dios pxeel zha qui*

<sup>1</sup> Laa naa rnab lo to, igolxew yquiaadiag to mine gne naa nu, niicle tel no mine rzac to rquiind! <sup>2</sup> Golgacnan ganle, zigne rzac Dios to scaque rzaac naa to, ib racladz naa cho guiaadquidie to. Mine racladz naa Jesússe gleynie to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleynie zho, haxta rdzin dze ne rtsieelnia zho. <sup>3</sup> Sca none greequia to lo me; per rdzieeb naa gon nend zha yguib mendox yquuil ma to, gondraa to mine rnabey Dios, dzigo laa to gac zig rac grëraa miech ndzinlid. Sac gon tel Ev, sca pquuil ma Ev.

<sup>4</sup> Laa naa rzet min rii lo to, sac rien naa, zha ne ri-aadtaa i ween rdeed to didz rquiaadiag to zhiwseed zho. No zho rzeet Jesús, rzeet-gaa zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo. <sup>5</sup> Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho. <sup>6</sup> Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni zianlegaa tow ganle.

<sup>7</sup> Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina. <sup>8</sup> To rieguial needz ncuaane nquiin naa, na lel grë zha ne nole xnëz Jesús len dze co, zha co pxeel ncuaane pquiin naa, rrieequia bla naa xtimi zho ga. <sup>9</sup> Niicle bdzin dze ne peet guiendaa lo naa, per ni tib lo to ib psodziind naa; lëetaque len dze co biaad bla zha bets ne zha ne ziaad nëz Macedon, zha co biaadnie ncuaane pquiin naa. Ib peet bnabd naa lo to hor co, ni gdzindgaa dze ne pe gnab naa. <sup>10</sup> Ni golgacnan ganle, ib tedsod sodiidz naa grë min rii dib nëz Gres i. Ible zun naaw, led yed naa rquidie, sac gon runbey naa zha nac Xtiidz Jesús. <sup>11</sup> Per guiabde to togo rlëenie naa to, racladz naa csañ naa to guielto; sac Dios zobwi ganle rleynie naa to. <sup>12</sup> Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now. <sup>13</sup> Sangue no, ndion no nlid Dios pxeel zho, lega noquidiese zho to i squi no zho, rquiaalo zho zig nacne nli xtsiin Jesús quiayun zho.

<sup>14</sup> Ni led ncuaane gzeed zdoo ne ga. Sac ible sca run mendox, no hor rzëeb ma rded ma zig tib xmandad

Dios. <sup>15</sup> Gacxe waa, jzha ne squi run xtsiin ma, mincoque run zho rquiaaalo zho rac zho zig cho miech wen, rquidie zho miech! Per zdzin dze ne laa zho ygaa guielnēdox ne tsieguial zho, zaatne tsietizh zho grētaa mine noyun zho i.

*Blactaa ncuaane zadeed naa*

<sup>16</sup> Laa naa rnab lo to nu stib, golquiaadiag mine gne naa, niicle tel rzē xtudz naa zig rzē xtiudz zha ne rzhiñle guic. Nli lega niats gne naa, per golxecw gon tow, sac laa naa gunnon naa zig run grē zha qui. <sup>17</sup> Led Jesús d rnabey znu gne naa, sinque masaque laa naa gun min rii, zig run tib zha ne riotsle guic. <sup>18</sup> Tel squitaa niats rac zha qui lēēque lēē zho runnon zho, lozhd gool zho lo to dien pe nac ncuaane noyun zho; golquiaadiaggaa mine gne naa nu na ganle:

<sup>19</sup> Conque rzac to name nixbiini to, jzha nac dzigo rdeed to diudz rquiaadiag to ncuaane rnee grē zha yozh qui? <sup>20</sup> jPe ib riende to ganle quianabeyzhoole zho to i, quiasacsi zho to, quiaquidie zho to, quiala zho grē ncuaane rap to, quiasanwin zho to, ya zig zgap zho lo to? <sup>21</sup> jHaxta rtoladz naa gon, sac laa ne naa squi nabey to lel zhale squitaa no!

Grē ncuaane riats zho i nac zho, ye naa zrieelo sca gunniats naa naa (znu nagon rac zha ne rzhiñ guic). <sup>22</sup> jTelne riats zho rnee zho

zha Israel nac zho? Yecxe naa waa zha Israel nac naa. jTelne rnee zho lo dii ne bzooblo Dios ga ziaad zho? Ye naa lo dii co zial naa. jTelne rnee zho Abraham nac xmengol zho? Men cocxe waa nac xmengol naa. <sup>23</sup> jTelne niats rac zho rnee zho xtsiin Jesús quiayun zho? Gacnan zho ganle, naasi xtsiin paa me quiayun naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guielgut. <sup>24</sup> Gaayle vult zisacsi zhiwxtis zha Israel naa, galptsibguieega nia dooguid bneedz zho naa. <sup>25</sup> Tsonle vult zineedzyag zho naa, stib vult bneedzquie zho naa. Tsonle vult zadzieelo naa rdedquie barcw ne no naa len nisdoo; tib vult, tib dze tib guieel bzhoobse naa lo nisdoo. <sup>26</sup> Pa lotaa grē dan ne ziya naa. Nzian vult ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grē menzit, zaatne bdedlaa naa lo grē menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoow, zigtagaa lo grē zha ne laglaase rquiaaalo rliladz Jesús a. <sup>27</sup> Blactaa rdib rdzaag naa run naa dziin, blactaa guieel ni niip raaguiet naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guieñd lar ne



piix naa. <sup>28</sup> Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios. <sup>29</sup> Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiaayunctal xtol stib zho, ni rrieelod galisqui naaw lo zho, scaque mban rac zdoo naa.

<sup>30</sup> Grë mine bne naa nu, nacda guielniats; telne rieguialpaa gunniats naa naa, mazd gzet naa grë mine rlu ganle peet gacd gun naa naase. <sup>31-33</sup> Zig bzhaac naa tib vuilt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenquiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac PxoZ Jesús, men ne rieguial dziuunnon ne gzataa dze, me zobwi ganle diidzli rne naa.

## 12

### *Racniatsd Pabl*

<sup>1</sup> Nanle naa nonguielda lëëque ne gunniats ne, per laa naa sodiidz lo to ganle zha

nac grë ncuaane zinabey Dios zilulo lo naa, ni grëgaa mine zinee me lo naa.

<sup>2-3</sup> Niina rac tsiida iz ga blis Dios naa güeynie me naa gbaa. Nan naa dien pe dib znu naa bia naa, te zhiespirituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co, <sup>4</sup> ga bin naa grë diidz ndzon ne wлтаа gard gon miech, ncuaane guiend zho zha naca, ni nodgaa diidzbey gne naaw. <sup>5</sup> Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase. <sup>6</sup> Ni tel gacladzgaa naa gunniats naa naa por mine blozh bzet naa nu, led guielxend ga gun naa; sac mine nlipaa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

<sup>7</sup> Ne nligaa ndzondoo nac grë ncuaane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa. <sup>8</sup> Tsonle vuilt zinab naa lo Dios ctiche me yoob rii; <sup>9</sup> biontaa vuilt në me lo naa: “Bui ganle laa naa naciele luu, ni min co nac mine rquinnraa lo luu. Peet tsie-

nied guic luu sca, zha ne squi nsis rac, ga rdeeda diidz rlu naa ne nli naa nacnie zho." Miñ co nagon rley naa, sac ne znu nsis rac naa, grëse miech zeene ran zho grëtaa ncuane rrieelo run naa, rien zho nli Jesús nacnie naa. <sup>10</sup> Ne nligaa rley naa, sac niicle ne miech gzhe gzhele rac naa, niicle nroob guieñe ne nodeed naa, niicle rbidzgo miech lo naa, rtsidil zho naa, no hor guiend pe yquii naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequidraa naa lo zhgab ne no naa, hor co laa Dios rlu ne me nacnie naa.

<sup>11</sup> Nligaa lega guieñxenle nu znu rne naa, rac naa zig tib zha ne rzhiñle guic! Per to gon rap dol, sac laa ne cxobnen to nli miech wen no, leñ zhaa miñe noyun to. Nli nacd naa cho zha non, per tsod ncuane csañwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeeñ zho. <sup>12</sup> Golsoladz ganle, zeene bialseed naa to i, blu naa lo to ne nli Dios pxeeñ naa noteed naa Xtiidz me, blactaa grë ncuane bneedz Dios diidz blu naa lo to, blactaa grë milagr, blactaa grë ncuane bzee zdoo to gon to. Biod dze ne nieednie naa to. <sup>13</sup> Lëese miñe bend naa lo to i, nache nab naa needz to pe nquii naa; sac grëraa zaatne ziyaseed naa miech, zha rneedz ncuane rquii naa. ¡Golgun dispensar telne rbiñladz guic to miñ co!

*Nonie zha Corint guic Pabl*

<sup>14</sup> Laa naa nozhixcuuale par guialgan naa to stib. Nu gac tson vuelte guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golguien ganle, niicle ne racladzde to, per rrieequia gon mëed nac to lo naa; ni ndion ne ganle, led mëete rieguial gdeed ncuane yquii dad, sinque dad none gdeed ncuane yquii mëed. <sup>15</sup> Ne nligaa, tib guieñbleya lo naa quiateedlo naa to, laa naa noxco guien to zaacse gban to, zeena gdziñ to zaatne gneedz Dios cuëz to. Xco co no naa, ib rquiad zdoo naa lozh grë ncuane rap naa, o lozhgaa naa lo xco co; maase niicle squi zootne laa ne rleynieraa naa to, leñ nozozit to lo naa.

<sup>16</sup> Nanle naa, no bla zha ne rnee i: "Nli peet bnabd me zeene biadseed me ne, per ne squi miech ndzielguic nac me bod no pa stib mod ne riend ne quiaban me ne."

<sup>17</sup> Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to?

<sup>18</sup> Naa quia bnab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnab zho lo to? Golgacnan ganle nodziuund no miñ co, sac zigtaa naaw, zigtagaa mew, dib zdoo no nodziuun no dziin rii, choot noquidied miech.

<sup>19</sup> Nana gza zdoo to guiab to bod parne guiaanwen no

lo to, gane znu rne naa. Dios zobwi ganle led scada. Bets, bzian, grē minē none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios. <sup>20</sup> Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, lel dil no to; zha ne nē rac zdoo dien cho stib noded, zha ne nozhixcuua diidzguizh, zha ne quianeenē, zha ne quiayacniats; nend haxta chop tson diile nac to. <sup>21</sup> Tel gan naa sca rac to, mbe gon stoladznie naa to ni haxta siaabguielnē to naa; sac nanle naa ni lalnu rdziladzd Dios grē min co. Zig nac grē zha ne squi padzeelale quiayunctal xtol ni rsaand zho grētaa guilyozh, grētaa ncuaane ndzinlid ne bii quiayun zho, mbe gon sigoon zho naa.

## 13

### *Rso Pabl diidz*

<sup>1</sup> Niina nagon ne gac tson vuilt gualgan naa to, tel pe nactaa falt ne cho quiayun i, guiaanda scase. Zigne rnee lo Xtiidz Dios: Tel no chop zho, tsonгаа zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vuilt ne rso naa diidz rii lo to. <sup>2</sup> Laaw nile naa lo to lultm vuilt ne bialgan naa to, ni niina laaw rneque naa stib: Grēse zha ne quiayunctal xtol i, zigtaa zha

ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grēse minē quiayun zho ib tedlaad zho, laa naa gunquizh zhow zigne riegual zho. <sup>3</sup> Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to. <sup>4</sup> Nli nguudz goc me bdeed me diidz pquiaa zho me lo cruz horco, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, perible zгаа no tib guielmban ndzon, sacne me nacie no; ni zrieelo gnabey no to sacne rdziaap no xpoder me.

<sup>5</sup> Nana sca, tozhal golcobey dien zha mban to. Wen wen golcobey dien pe nli dib zdoo to rililadz to Jesús. ¿Pe nli mban to zig none gban zha ne rililadz me? ¿Pe zig zie dze rienraa to ne me nacie to, me rnabey lo to? ¿Te loxaque didzse ye nac ne laa to rililadz me? <sup>6</sup> Sangue no gon, wen wen ndion no zha mban no, ndionpaa no ne lo Jesús ngab no.

<sup>7</sup> Tibaque rnab no lo Dios cxobnia me guic to zaacse gban to. Ni guiabde to togo par guianzuiuu no lo miech gane noxcopaa no zaacse gac to; sinque laa no rdziuuuna parne gban to zigne riegual gban zha ne nli no xnēz Dios. Min co nagon noxco no, niicle tel rzac to lēda nu quiadziuuu no. <sup>8</sup> Sac tel no, laa

no zional gac to miech wen, zha ne zienal mine nac di-idzli; choot ziaate par lega gactox no lo to. <sup>9</sup> Gacxe waa, tib guiebley nroob ga lo no, telne zhal to znuse xix-cuaa to, gac to zha ne nli-paa dib zdoo rleyne Dios; laa ne yquiambëz to guiaadlisqui no grë ncuaane noyun to. Laa no racladz gdziñ dze ne gac to zigne rdziladz Dios, ni mincogaa quianab no lo me.

<sup>10</sup> Laa naa rso diidz rii lo to lo guits ne rxel naa nu, sacne racladzd naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacne lozh tsoguic to zhi-wseed me; ib racladzd naa yquiaago naa to.

<sup>11</sup> Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoo zho; ine niowse golban, tipse golgac. Scagaa Dios zleyne me to, ni haxta zacnie me to zeena peet ctsebde to.

<sup>12-13</sup> Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne rililadz Jesús nëz rii; laa zho rxeel bdiuzh lo to. Golcaania zhibdiuzh zho.

<sup>14</sup> ¡Dios sca guiaannie to! Ine nley golgac, golgan ganle pa lotaa rleyne me to. Peet tsienied guic to, Jesús nac men ne noxco grë zhizhgab to; ni scagaa Espíritu Sant gacnien to tibaque tipse gac to.

Pabl

## GUITS NE PXEEL PABL LO ZHA GALÁS

¡Diuzh to grëse to!

<sup>1</sup> Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoo naa, led miechd pxeel naa, sinque Jesús pxeel naa, me ni Dios Pxoz me, men ne bleeban me.

<sup>2</sup> Laa naa rxel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to. <sup>3</sup> Dios men ne nac Pxoz ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to. <sup>4</sup> Jesús bdeed xquielmban bdiizh me xtol ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxoz me. <sup>5</sup> ¡Gotsaa dziuunnon ne Dios sca, ni gdzind dze ne csaan ne dziuunnon ne me! Sca rieguiala.

<sup>6</sup> Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol. <sup>7</sup> Per guienndraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho

ctsëe zho mine nac Xtiidz Ndzon Jesús.

<sup>8</sup> Grëse zha ne guiaadnie stiblo wseed mine pseete no to, ni gnë zho lëe min co csilaa to lo dol; zha ne sca gun, miech ndziibdeele ga nac zho. Tel chotaa sca gun, niicle tel naazhala, tib anjl ne guietgaa gbaaw, ible zdzibdee Dios zho. <sup>9</sup> Bnele naaw lo to, ni na laaw rneque naa stib: Tel cho zha ne guiadseed to stiblo wseed mine pseete no to, ni gnë zho lëe min co csilaa to lo dol, ible zdzibdee Dios zho.

<sup>10</sup> Nana gon ne znu rne naa, no to guiab parne guiannziiuu naa lo miech gane znu rne naa; per golgacnan ganle, quiaguibd naa guiannziiuu naa lo miech, sinque laa naa noxco gun naa mine rnabey Dios. ¡Sac telne lel ncuane gleynie miech noxco naa, nlid dzigo xtsiin Jesús ga noyun naa!

*Jesús pxeel Pabl gnee Pabl Xtiidz me*

<sup>11</sup> Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba. <sup>12</sup> Paat biad naa nseed miech naaw, sinque Jesús zhal bneedza lo naa.

<sup>13</sup> Led nanle to ganle, zha nactaa grë mine ben naa zeene bii no naa lo zhiwseed zha Israel; ptsidil naa grë miech ne no xnëz Jesús, blëenie naa zho, pquiana naa nloozh naa zho. <sup>14</sup> Bzhoob diidz ne naa nac zha ne pseedraa lo grë menladz naa, zha ne tipse biagrëe naa

scuel; naa nac zha ne neer lo zho, sac naa run grēse mine rnabey zhiwseed zha Israel, ni naa rioxcoraa run grēse mine been grē pxozgol no. Sca nagon goc naa lo zha Israel.

<sup>15</sup> Ible güeynied guic naa, antes ne gal naa laa Dios bzooblole naa gunbey naa Xpëed me; laa me bleextsole naa, niapse porne nquialadz me naa. Zeene bdziñ dze co <sup>16</sup> laa me blu me lo naa, bzo me naa ga naa zaatne ndxie grē miech ne nacdraa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa, <sup>17</sup> ni niicle biadgaa naa Jerusalén, nianabdiidz naa lo grē zha ne pxeelle me nonee Xtiidz me; sinque laa naa bia nēz Arab, wbirele naa nēz co, dzigoraa bdziñ naa Damasc stib.

<sup>18</sup> Gocle tson iza dzigoraa bia naa Jerusalén, hor coraa beenbey naa Pedr; blēz naa lo me ga tsiñ ngbidz. <sup>19</sup> Gaque beenbey naa Jacob bets Jesús, laa grēraa zha ne pxeel Jesús noyun xtsiñ me, ni tib zho gond naa. <sup>20</sup> Dios zobwi ganle diidzli nac grē mine rne naa nu, led lega rned naaw.

<sup>21</sup> Zeene brie naa ga, laa naa bia nēz Siria ni nēz Cilis. <sup>22</sup> Grē zha Judé zha ne nole xnēz Jesús, gard gunbey zho naa len dze co. <sup>23</sup> Diidz ronse zho rnee zla zha ne nacgrē zho: “Men ne scataa pquianañ ne, ye le me

noseed miech Xtiidz Dios, ni glo scataa gocladz me nitlo mew.” <sup>24</sup> Dzigo rley zho, rdeed zho xquizh lo Dios ne ye le naa rliladz Jesús.

## 2

### *Rcaania zho Pabl*

<sup>1</sup> Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit. <sup>2</sup> Laa naa bia, sac ib Dios blu lo naa ne no ga naa. Dzigo ga pcaalsa no grē no zha ne zo rnabey lo grē zha ne no xnēz Jesús ga, bzodiidz naa lo zho zha noseed naa grē zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiñ dziin ne benle naa, ni mine quiayungaa naa. <sup>3</sup> Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grē zha Israel. <sup>4</sup> Per lo zha ne zioobgza no ga, lad co briequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rliladz Jesús, per nlida; ib blud zho cho nac zho, ngeets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziun no mine rnabey ley. <sup>5</sup> Per ni palal bdeete no diidz niac mine rnee zho, laa no racladz guiaannie to Xtiidz Ndzon Jesús mine rlu zha laa miech lo dol, sac miñ co nac diidzli.

<sup>6</sup> Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios) <sup>7-8</sup> ib peet blisquid zho lo naa, niicle peet pseetragaa zho naa. Sinque laa zho gocnan ganle ne ib Dios bzoo naa gun naa xtsiin me, gaseed naa grë zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëëque me bzo naa quiaseed naa grë zha ne nacd zha Israel.

<sup>9</sup> Gacxe waa, zig nac Pedr, Jacob, Juan, zha ne zo rnabey lo grë zha ne riladz Jesús ga, laa zho bien ne ible naa bgaa guienzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieeed zha Israel, laa no guioeed grë zha ne nacd zha Israel. <sup>10</sup> Lëëse mine pso zho diidz lo no, dzioxco no dziuun no xyudar grë zha ne guien pe yquiu; ni nligaa ib nonguiel min co ni laaw noyoxco naa.

### *Ractox Pabl lo Pedr*

<sup>11</sup> Laa zeene bиаad Pedr Antioquí, dzigo ga nli laa naa goctox lo Pedr, sac ncuaane ndzinlidraa quiayun Pedr. <sup>12</sup> Glo, grëse zha ne nacd zha Israel zha ne riladzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, pasëraa Pedr sca

tipse niownie zho, laa Pedr bzozit lo zho. Rdzieb Pedr zha ne bdzin ga, sac lëë zha co racladz, grëse zha zit ne rzëeb xnëz Jesús ib none tso zho bey ne rio zha Israel. <sup>13</sup> Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho. <sup>14</sup> Nacne zeene gon naa sca zienaldraa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?”

### *Zha rlaa miech lo dol*

<sup>15</sup> Golquiaadiaga ganle, tel no desde gol no zha Israel nac no, nacd no zigne nac grëraa miech ngoopdol ne nac stib nacion; ible pseed no grë mine nac xley zha Israel. <sup>16</sup> Sangue niina laa no ndion ganle, niicle mazdraa gun miech mine nac ley grieelod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no riladz no Jesús, nacda porne dziuun no mine nac ley. Sac gon niicle zha ne tsoxcora gun zho grë mine

nac ley, grieelod guiaanwen zho lo Dios.

<sup>17</sup> Nana ne laa no wbig lo Jesús parne guiaanwen no lo Dios, no zha ne rzac dolga. Masaque rzac zho xtol no ga rdziuunctal no porne rililadz no Jesús, per, ¡led scada gon! <sup>18</sup> Mazd dolga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun grë mine nac ley.

<sup>19</sup> Sac tel naa, ib brieelod niun naa grë mine rnabey ley, ni zha ne rguiits ley gon ib none guet zho; gane niina masaque rriequia laa naa gutle. Niina ne laa Jesús gut por grë xtol naa, rriequia ye naa gutnie me ga, zeena grieelo gun naa mine rnabey Dios. <sup>20</sup> Led naadraa nu znu mban, Jesúsle nu mbannie naa, ni guielmban ne mban naa niina, lëë min rii bneedz Dios lo naa porne rililadz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa. <sup>21</sup> Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo biaadguet Jesús. Golgacnan sca ganle, Jesússe nac men ne csañwen ne lo Dios, gacxe waa nonguielda ga csañ ne me tblad, ni pa lotaa ga pquia zdoo Dios ne.

### 3

#### *Jesús none gliladz miech*

<sup>1</sup> ¡Nadzpaa nxen to nac to zha Galás! ¿Pe goc to, cho biaadgunüet guic to squi rac

to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz. <sup>2</sup> Zhal to golcobey dien, ¿pe ne been to grë mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Diosaye? <sup>3</sup> Pa lotaa gon rdziñ lo xquielnxen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley. <sup>4</sup> Pe nliipaa rnee to, ¿pe lega scase nazho gon to grë guielnë ne pteed miech to, zeene psilo bliladz to Xtiidz Jesús? <sup>5</sup> ¡Golzhixcuaa guic to! Golguien ganle, laa Dios bneedz zhiEspíritu me lo to, ni laa me noyun grë milagr lo to, per nacda porne run to mine rnabey ley, sinque porne dib zdoo to rililadz to Xtiidz mew, mine biadseed no to.

<sup>6</sup> Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtold. <sup>7</sup> Golgacnan sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham. <sup>8</sup> Ni mine nodzian ne niina, ib lo Xtiidzle Dios zhobneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëë min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoo



gliladz naa zigne rlliladz luu naa, zunlay naa zho.”<sup>9</sup> Gane grëse zha ne dib zdoo rlliladz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

<sup>10</sup> Sangue zha ne rnalo ley ne lëew csilaa zho, laa zho noyac ndziibdeele ga, sac lo Xtiidz Dios no tib zaatne rnee: “Ndziibdee grë zha ne grieelod gun grëse zigne nac ley.” ¡Ni tsod zha ne gon grielo gun grëse mine rnabey ley!<sup>11</sup> Gase naganle rlu tsod tib zha ne grielo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co ygaa tib guielmban ndzon.”

<sup>12</sup> Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse mine rnabey ley.”

<sup>13</sup> Min co nagon, grëse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquiangaa zho tib lo yag.”<sup>14</sup> Ni por mine sca bded Jesús ga, min co niina grëse miech ne nacd zha Israel, zac ygaa zho grëse guielnzaac ne bzeet Dios lo

Abraham ga; ni niicle tib tib-gaa zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

### *Zha ne nlipaa nac xpëed Abraham*

<sup>15</sup> Bets, bzian, laa naa gzet ncuaañe rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co.<sup>16</sup> Nana gotsaa gwi ne ganle zha been Dios; Psañ me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëbd me: “grë zha xtii Abraham”, sinque tibaque men ne bzeet me, ni lëe men co ga nac Jesús.

<sup>17</sup> Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon, grieelod ctsëe ley trat co; zig nac ley, blozhle tap gayoo galptsii iz biaan xtiidz co me zeene laa ley biaad.<sup>18</sup> Nana, telne por gun ne mine rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne grieequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtii Abraham,

laa me gneedz guiel<sub>in</sub>zaac co lo ne.

<sup>19</sup> Nana gnë to: “¿Pa dzigo rquiin ley ne laa ley biaan, ni tel<sub>ne</sub> nole trat co glo?” Laaw biaan gon<sub>ne</sub> zeena glu ganle zha nac miech, ib rond zho mine rnabey Dios zho, laaw been<sub>ne</sub> dziin laga bdzin<sub>ne</sub> dze ne laa men<sub>ne</sub> ne briequia lo xtii Abraham ga biaad, men<sub>ne</sub> ne bzeet Dios ga zeene psan<sub>ne</sub> me xtiidz me lo Abraham. Ni tel<sub>ne</sub> ley, dze ne pcaania zha Israela tib xanj<sub>ne</sub> Dios pxeel<sub>ne</sub> me bdeeda lo Moisés, dzigo Moisésle psana lo menguedz Israel. <sup>20</sup> Sangue dze ne been<sub>ne</sub> Dios trat co grop me Abraham ne laa me csilaa miech lo dol<sub>ne</sub>, pxeeld<sub>ne</sub> me cho tib miech, cho tib anjlgaa niaadnie xtiidz me; sinque mezhad biadnew lo Abraham.

### *¿Pa rquiin ley?*

<sup>21-22</sup> Nana gnë to: “¿Zig gocladz dzigo lëë nsiooglo xley Moisés lo trat ne been<sub>ne</sub> Dios ga?” ¡Led scada! Sac grieelod ygaa ne guiel<sub>in</sub>mban ndzon ne gdziind dze lozh ga, tel<sub>ne</sub> gnalo ne ley; ib grieelod ley csanwena ne nëz lo Dios. Tel<sub>ne</sub> niaca mine nrieelo ley nsilaaw miech lo dol<sub>ne</sub>, nod pe nacne dzigo nxeel<sub>ne</sub> Dios Xpëed me, biaad me biadbee me miech ladznia dol<sub>ne</sub> (sac rnee lo Xtiidz Dios masaque ngadoo miech lo dol<sub>ne</sub>). Jesússe gon<sub>ne</sub> zrieelo csilaa miech lo dol<sub>ne</sub>, totsaque dib zdoo zho gnalo zho me, mese zrieelo gdeed guiel<sub>in</sub>mban ndzon co lo zho.

<sup>23</sup> Zeene gard guiaad Jesús ga, laa ley co

pquiin pquianapa ne zigne rquianap wxtis zha ne niioogyu, laga bdzin<sub>ne</sub> dze ne laa me biaad. <sup>24</sup> Zig tib ngudziaan ne riaanne mëedwin, sca pquiin ley co lo ne, pseedane zha gban ne, ni gacnan<sub>ne</sub> ne cho nac Jesús, men<sub>ne</sub> ne csilaa ne lo dol<sub>ne</sub> zeene dib zdoo ne gliladz ne me. <sup>25</sup> Sangue niina ne laa Jesús biaadle, led ley codraa gnabey ne, ni niicle rquiindragaa pe cseedane. <sup>26</sup> Gacxe waa, tel<sub>ne</sub> to xpëedle Dios nac to porne dib zdoo to riladz to Jesús, <sup>27</sup> ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienal<sub>ne</sub> gban zho zig racladz me. <sup>28</sup> Min<sub>ne</sub> cocxe nagon<sub>ne</sub> waa, grëse ne tibaque nac ne niina, guiel<sub>in</sub>draa ne goon<sub>ne</sub> cho nac zha Israel, cho nacgaa zha zit; dien<sub>ne</sub> cho nac ngundziin, cho nacgaa zha ne rnabey; goon<sub>ne</sub> dien<sub>ne</sub> cho nonraa pe mguiw te wnaaw ye; sac grëse zha ne naciele Jesús, tibaque nac zho grë zho. <sup>29</sup> Ga nagon<sub>ne</sub>, tel<sub>ne</sub> ngable to lo Jesús, dzigosi nli zha xtii Abraham nac to, ni zгаа to grë guiel<sub>in</sub>zaac ne bzeet Dios zeene psan<sub>ne</sub> me xtiidz me lo Abraham.

## 4

### *Zha ne nac xpëed Dios*

<sup>1</sup> Golgona ganle, nligaa tib mëedwin lëë, niicle guiaanne win ncuaane rap pxoz win, per lega nacse win zig tib ngundziin win ne run<sub>ne</sub> xtsiin

pxoz win. Niicle chen win grē ncuaan co, per grieelod win gnabey wina. <sup>2</sup> Laa win riaan ladznia zha ne ran win, zha ne rseed win dien pe nac ncuaaḅe gun win, laga gdzin dze ne laa win zacle ycaania ncuaaḅe psan pxoz win.

<sup>3</sup> Scadaa nagon bzhiaac ne glo zeene gard guiaad Jesús, rriequia masaque ngadoo ne lo grē ley co, ni lo grēraa ncuaaḅe rac lo guidzliu rii.

<sup>4</sup> Laa zeene bdzin dze ne laa Dios pxeel Xpēed me Jesús lo guidzliu (tib wnaa bded por xniaa me, bzoob me didz been me grēse zigne rnabey xley zha Israel), <sup>5</sup> laa me biaadsilaa ne, biadbee me ne ladznia ley co, bdiizh me grē xtol ne, zeena ycaania Dios ne gac ne mēed lo Dios. <sup>6</sup> Ni parne glu ganle ne nli xpēedle Dios nac ne, pxeel Dios zhiEspíritu Xpēed me blēz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoḅ ne nac me.

<sup>7</sup> Ga nagon, led yedraa niina nac ne zig cholze cho ngundziin, sinque xpēedle Dios nac ne, ible ye ne yгаа grē guielnzaac ne rap Dios.

*Rnee Pabl rnabeydraa ley*

<sup>8</sup> Bets, bzian, golsoladz ganle, zeene bii gard gunbey to men ne nacpaa Dios, masaque rriequia ngadoo to lo ncuaaḅe nac zhimdio to hor co, rdib rdzag to run to grē miḅe rzac to rdziladz grē mdio co. <sup>9</sup> Nana, laa to runbeyle Dios, mazdgni naa ganle ledaa Dios

runbeyle to, ¿pe nac dzigo racladz to gbiire tsiegan to, tsiequitsgzhib to lo grē mdio co, gbiire guiab to ladznia grē ncuaaḅe paat rquiind co, gnabeya to? <sup>10</sup> Rquia to gon run to grē lni, dien pa mēē ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda. <sup>11</sup> ¡Rdziebnie naa to gon! ¡Pe nlipaa zhlēse bialseed naa to, ne squi laa to racladz csaan miḅe bialne naa lo to!

<sup>12</sup> Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaḅdraa naa miḅe nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa. <sup>13</sup> Led rsoladz to ganle, rzacnē naa len dze ne psilo pseed naa to zha laa to lo dol; min co nacne nzianlaa dze blēz naa lo to i. <sup>14</sup> Niicle ne sca rzacnē naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blēzlo to naa pale cho xanjl Dios o Jesúsḅaa, tel niaca miḅe mezhal niaadseed to. <sup>15</sup> ¡Ne nlipagaa rleydox to len dze co! Tel niaca miḅe niac mbee to bziaalo to, zootle zig mbee tow ngad tow lo naa. ¿Yo grē guielbley co na? ¿Yo ne scataa rleynie to naa len dze co? <sup>16</sup> Nana, pe rēb to rlēē naa lo to ne znu rne naa miḅe nacpaa diidzli. ¡Lēda gon!

<sup>17</sup> Golquiaadiaga ganle, grē

zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grë mine bialseed naa to, zeena gbig to lo zho. <sup>18</sup> Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i. <sup>19</sup> iXin, ne nlipagaa gon rdednë naa ran naa squi rac to! Masaque nac guielnë rii lo naa niina, zig tib yoob ne rquia grë men wnaa ne gap mëed. Ni lëe nole naa guielnë rii nu nagon, haxta gdziñ dze ne gan naa laa to wbiire wbig lo Jesús stib. <sup>20</sup> Tebaa niaca mine grielo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuaane noyuu to.

<sup>21</sup> Zha ne racladz gnabey xley zha Israel zho, racladz naa gnë zho dien, ipe ib riend zho zha zhobnee lo guits ne ziaad Xtiidz Dios <sup>22</sup> zaatne raquiet xingan Abraham? Rneew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsieel me. <sup>23</sup> Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsieel me ga, laa win gol porne ib Dios rëb ne laa me yquianie win.

<sup>24</sup> Lo grop wnaa co, tibga me rlu ganle zha nac grop trat

ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho. <sup>25</sup> Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie len dze rii, sac tel grë menguedz Jerusalén, masaque ngundziin nac zho lo ley. <sup>26</sup> Sangue wnaa ne gocpaa tsieel Abraham ga, rriequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëe xniaa ne ga nac wnaa co. <sup>27</sup> Lëe Jerusalén co ga raquiet lo Xtiidz Dios, zaatne znü rnee:

Luu, ne nac luu wnaa ne brieelod niap mëed, bley niina;

nguiel goc, nguiedz broptsie lo guielbley qui,

luu ne bdziñd dze niacnan luu zhā nac yoob mëed.

Sac gon ndalraa xpëed wnaa ne brieelod niap mëed,

lëdle grë xpëed wnaa ne gop mëed.

<sup>28</sup> Bets, bzian, golgacnan sca ganle, laa ne nacle niina zig Isaac, xpëed tsieelpaa Abraham, wnaa ne gacd yquianie mëed ga; sac tel Isaac, ib Dios psan diidz ne laa Isaac gac mëed lo Abraham. <sup>29</sup> Ni zigne sca blëenie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëe ran zho zionald ne mine rnabey ley, sinque laa ne

zional dib zdoo ne riladz ne Jesús. <sup>30</sup> Ni nana, led lo Xtiidzaque Dios zhubnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me grop xpëed me, nonguield ne ye mëed qui guiaannie ncuaane csan luu lo xpëed tsieel luu.” <sup>31</sup> Gacxe nagon waa, tel ne nacd ne zig xpëed wnaa ngundziin co, sinque laa ne nac zig xpëed tsieelpaa Abraham.

## 5

### *Dziits golso*

<sup>1</sup> Peet lo ngadoodraa ne niina, sac gon laa Jesús biaadsilaale ne, sinque to none dziits so zeena ygadoode to lo xley zha Israel. <sup>2</sup> Naa nac Pabl, ni naazhal rne lo to nu. Golgona sca ganle, telne laa to gdeed diidz tso to xbey zha Israel, nacdiedraa to Jesús ga dzigo. <sup>3</sup> Ni laaw gneque naa lo to nu stib, grëse zha bgui ne rio bey co, ib none gun zho grëse zigne rnabey ley co. <sup>4</sup> Zha ne rzac por gun zho grë mine rnabey xley zha Israel, min co laa Dios csilaa zho lo dol, gacnan zho ganle, lel nozozit zho lo Jesús ga; ygaad zho guielnzaac ne yгаа zha ne gnalo Jesús. <sup>5</sup> Sangue tel no, ndionpaa no silaa Dios no lo dol, sacne dib zdoo no riladz no Jesús ni nacie Espíritu Sant no. <sup>6</sup> Sac zha ne nli nole xnëz Jesús, peet liaadz nodraa zho bey ne rio zha Israel. Mine noxcoraa zho nac ne dib zdoo zho gliladz

zho Jesús, ni scagaa grieele gleynie zho samiech zho.

<sup>7</sup> ¡Ese tow nli! ¿Pex goc to waa? Zaacse name rac to zeene psilo to bliladz to mine nac diidzli. ¿Cho pquuil to ne nëdraa to tsienal tow? <sup>8</sup> Mine squi nonie guic to i niina, led zhiwseete Dios i, men ne bredz to griee to ladznia ley. <sup>9</sup> Golguien sca, adel ye to sac zig rëb diidz ne rnee: “Niipaxe ncobi waa runcsibe ncob guietxtil.” <sup>10</sup> Per nanpaa naa, ible men ndzon ne rnabey ne men co gacnie to, zeena csaande to mine nac diidzli; ni zha ne squi racladz gungüet to, tel chotaa nac zho ib tedsod siaabzi Dios zho.

<sup>11</sup> Bets, sangue naa tel niaca mine nli ye naa quianabey tso grë zha ne riladz Jesús xbey zha Israel zig quianee zha qui, bod goonzhe ni ctsidildraa zha Israel naa dzigo, glëedraa zho zig rlëetaa zho niina zeene ron zho rne naa zha nacne biaadguet Jesús lo cruz. <sup>12</sup> Zha ne squi ziaadnabey tsojaa to bey ne rio zha bgui nëz Israel, jtebaa mazd ladaque zho yga zho, niicxe gdib nace zho waa cueniaal zho, led tsod zho noyunneed zho to!

<sup>13</sup> Bets, golguien ganle ne ygadoodraaxe to lo ley waa, min co nacne biaadsilaa Jesús to. Per guiabde to togo ne laa me psilaale to, laa to gun ncuaane guiaabtaa guic to. Gunscade to, sinque tib tib to golleynie samiech to, ine golgun ncuaane rquiin grë zha ne nacgrë to; <sup>14</sup> sac niina totsaque gban to zigne

rnabey Dios nu: “Bleynie samiech luu zigne rleynieque luu luu”; lëële grë minë nac ley ga gun to. <sup>15</sup> Per tel laa ne gleynie to zha ne nacgrë to, lel dil no to, zig run grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. ¡Gunscade to!

### *Zha ne lega mbanse*

<sup>16</sup> Gacxe, laa naa rnab lo to: Goltsoxco golban zigne racladz Espiritu Sant, ni me gacniën to; led tsođe to dien zha gun to grë ncuaane ndzinlid ne racladz xcuerp to. <sup>17</sup> Sac gon grëse ncuaan co, rleynied Espiritu Santa. Laa xcuerp ne run ncuaane raclazd Espiritu Sant, ni ncuaane racladzgaa Espiritu Sant nëd xcuerp ne gac min co. Gunde to minë racladz xcuerp to sca. <sup>18</sup> Telne gban to zigne rnabey Espiritu Sant, dzigosi nodraa pe nacne ygadoo to lo xley zha Israel.

<sup>19</sup> Ni miech ne sca run grë ncuaane ndzinlid, ib paat ngeetsd zho:

rionie zho zha ne led tsieeld zho,  
run zho grë ncuaane ndzinlid  
ne racladztaa xcuerp  
zho,

<sup>20</sup> riegañ zho grë mdio,  
rnab zho pe sac samiech zho,  
rlëënie zho samiech zho,  
rdilnie zho samiech zho,  
rzac zho adel cho glale tsieel  
zho,

rnadse pew laa zho rlëële,  
runctil zho miech,  
rguib zho rtso miech,

rbeextso zho dien cho zha ne gacnie zho,

<sup>21</sup> në rac zdo zho ran zho ncuaane quianie stib miech,

rzudz zho,

rcaalsa zho zaatne loxaque rowcho zho, ni run zho grë guielyozh.

Grë ncuaan co run zho ni grëragaa ncuaane ndzinlid ne sca nac. Laa naa rbire rso diidz lo to, gunde to grë ncuaan co; sac gon grëse miech ngoopdol ne sca rban, grieelod gdziñ zho zaatne rnabey Dios.

<sup>22</sup> Sangue zha ne zienal minë racladz Espiritu Sant, znu nac zha co:

rleynie zho samiech zho,  
tibaque nguieel rac zho,  
peet dzeb nonied guic zho,  
rxecw zho, rievedniobd zho,  
niowse rnee zho lo samiech  
zho,

niapse ncuaan wen run zho  
lo samiech zho,  
run zho minë rnee zho gun  
zho,

<sup>23</sup> miech ndooladz nac zho,  
zha rnabey xcuerp zho.

Ni telne gban ne zigne nac grëse min rii, ni tib ley noguiitsd ne ga. <sup>24</sup> Grëse miech ne nli xnëzle Jesús no, zieniedraa guic zho gun zho grë ncuaane ndzinlid ne bzoobladz zho padzeela, grë ncuaane ndzinlid ne racladznë xcuerp zho, sac rien zho paat rquiind ncuaan co lo zho. <sup>25</sup> Gacxe nagon waa, telne nli mbannie ne guielmban ne rneedz Espiritu Sant, goltotsaa dzion ne minë rnabey me. <sup>26</sup> Dzigosi

gacniatsdraa ne lo samiech ne, tsienaldraa ne dien cho glaaraa guiaan, tso ne nē gac zdoo ne gan ne grē ncuane rap zho, ncuane racgaa zho.

## 6

### *None gacnie ne samiech ne*

<sup>1</sup> Bets, bzian, telne gan to laa cho tib zha ne nacgrē to noyun pe tib dol, dzigo to ne nac to zha ne nlipaa zienal mine rnabey Espiritu Sant, to golnee lo zho. Diidz wen, diidz ndooladz golco zdoo zho gbiire xixcuaa guic zho; ni scagaa tib tib to none nsin so to, sac gon adel nenda yeque to sca sac. <sup>2</sup> Zeene ran to zha ne mban noded, golgun xyudar zho, golchoobladz zdoo zho, sac gon sca rnabey Jesús gban miech.

<sup>3</sup> Tel zha ne rzac zha non nac zho, ni laa zho peet nond zho; lēeque zha noguitnie zho ga. <sup>4</sup> Tib tib to, wen wen golguien dien pe quiayun to, telne ncuane ndzinliw ine golley, per tsode to glēe zdoo to gan to mine run stib zho. <sup>5</sup> Sac tib tib ne, psose Dios ne pe nac xtsiin me mine gun ne.

<sup>6</sup> Grē zha ne noseed Xtidz Dios, ib none ncuane rgaataa lo zho gdeed zhow yquiuin zha ne noluw lo zho.

<sup>7</sup> Tsienie wguite guic to sca, sac gon led yed Dios guiab ne quitnie ne. Tib tib ne, tel pe nac mine run ne mincoque ctsire me lo ne. <sup>8</sup> Zha ne run grē ncuane ndzinlid, lēe mine cueequia zho ga laa zho nitlo. Laa zha ne gun grē mine rnabey Espiritu Sant,

lēe mine ygaa zho ga nac tib guielmban ndzon ne gdzind dze lozh. <sup>9</sup> Gacxe nagon waa, tibaque gotsaa dzioxco ne dziuun ne ncuane ndzinli, ncuane rquiuin, guieete ne; sac telne sca tibaque dzioxco new, zeene gal dze co laa ne ygaa mine guiogual ne. <sup>10</sup> Zeene gdeedtaaw diidz sca, golgotsaa dzioxco ne dziuun ne xyudar grēse samiech ne, ni nana zeene zha ne noque xnēz Dios nac zho, mazdraa rieguial dziuun ne xyudar zho.

### *Rso Pabl diidz*

<sup>11</sup> ¡Golwi ganle, naazhal pquia nu! ¡Golwi ganle mbee mbee nac letr rii pquia naa rso naa diidz lo to! <sup>12</sup> Grē zha ne gon squi racladz tsopaa to bey ne rio zha Israel, laa zho runa zeena glēenied miech zho, zigne rlēenie zho grē zha ne rseed miech ne ib laa Jesús gut lo cruz, psilaa me grēse miech lo dol.

<sup>13</sup> Nana, niicxe grē zha ne nole bey co, rundaque zho grē mine rnabey ley; sinque laa zha qui nagon quiaguib tebaa gdeed to diidz tso to bey, zeena sca lozhd guiats zho ne zha bnabey to bio to bey. <sup>14</sup> Sangue tel naa, ib quiaguibd naa ne dien zha gacniats naa, sinque laa naa quiaguib gacnan miech ganle zha nac ne laa Jesús gut lo cruz. Sac tel naa, por grē mine bded Jesús ga, grētaa ncuane no lo guidzliu laaw psan naa tib lad; ni niicle naagaa, sca rzac grē miech guidzliu naa. <sup>15</sup> Grēse zha

ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquielmban zho.

<sup>16</sup> Grëse to ne nac to zha ne zienal diidz ne rso naa nu, Dios yquia zdoo to, ni me gacniën to ctsebd grë zhgab to; niicle tow ni niicle grëragaa zha ne ngable lo mew.

<sup>17</sup> Bets, bzian, golgacnan sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyun naa.

<sup>18</sup> Jesús men ndzon ne rnabey ne, me tsoxco grë zhizhgab to. Sca gaca.

Pabl



## GUITS NE PXEEL PABL LO ZHA EFÉS

¡Diuzh to grëse to!

<sup>1</sup> Naa nac Pabl, tib zha ne pxeel Jesús nonee Xtíidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblique laa to rliladz Jesús. <sup>2</sup> Dios men ne nac Pxoze ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

<sup>3</sup> ¡Gotsaa dzioolnie ne Dios, Pxoze Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús. <sup>4</sup> Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me. <sup>5</sup> Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdoo me.

<sup>6</sup> Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne. <sup>7</sup> Ne

nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co. <sup>8</sup> Ni led loxaque mincodse, sinque haxta bneedz me guielrien lo ne, bdixbiini me ne, <sup>9</sup> ni bneedz me diidz gocndion ne pe nac mine no zdoo me, mine mese nan, mine nole me gun me. <sup>10</sup> Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús gnabeya grësew; sca gaca zeene laa dze co gdziñ.

<sup>11</sup> Grëse ncuaane bnabeyle Dios no gac, run mew zigne racladz me. Gotsaa gwi ne ganle, glöle bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bzi-aab xnëz Jesús. <sup>12</sup> Ni laa me bzooblo ne, zeena ne ne nac ne zha ne glopaa psilo bnalo Jesús, cxobnen ne lo miech ganle pa lotaa men nroob nac me.

<sup>13</sup> Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bneelee me glo. <sup>14</sup> Ne znu pxeel me Espíritu Sant nacie ne, ga rlu ganle ib nli zgaa ne grë mine bneelee me gdeed me lo grë zha ne ngab lo me, ni lëe min co ygaa ne zeene gal dze ne laa me blozh psilaa grë zha ne ygab lo me;

zeena grē ne gleyne ne me por squitaa men nroob nac me.

*Rnab Pabl guielbiini lo Dios*

<sup>15</sup> Zeene gocnan naa ne nlipaa dib zdoo to rliladz to Jesús, ni ne nli nquialadz to grēraa miech ne no xnēz Dios, <sup>16-17</sup> rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lēē me nac xDios Jesús, lēē me nac Pxoz ndzon ne, <sup>18</sup> Rnab naa lo me quixbiini me guic to, guien to ganle zha nactaa grē ncuane ygaa to ne laa me bredz to, guien to ganle zha ndzontaa, zha nontaa ncuane gdeed me lo grēse miech ne ngab lo me, <sup>19</sup> ni guien to zha nroobtaa guielrnabey ne rap Dios, pa lotaa naca; lēē guielrnabey co nacie ne ne nac ne zha ne no xnēz me. Lēē guielrnabey co ga blu me <sup>20</sup> zeene bleeban me Jesús bzoob me me cue me gbaa, zaatne rieguial sob me ne nac me men rnabey, <sup>21</sup> bzo me me, me rnabey lo grēse zha ne rnabey, lo grēse zha ne non, ni lo grēragaa ncuane no; niicle niinaw, niicle len dze ne naragaa guiaada. <sup>22</sup> Grēse ncuane notaa, laa Dios psana ladznia me, ni bzo Dios me me rnabey lo grēse zha ne no xnēz me. <sup>23</sup> Sac grēse zha ne no xnēz me rrieequia xcuerp me ga nac zho, gacxe waa grēse zha ne nac cuerp co, zha none cxobnen ganle pa

lotaa men nroob nac me. Tel pe lotaaw me nacie zho, sac grētaa ncuane no ladznia me now.

## 2

*Ne noxco Dios miech gane psilaa me zho*

<sup>1</sup> ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol to, masaque nac to lo Dios hor co zig tib zha ne gutle, <sup>2</sup> laa to güeynal niapse grē ncuane ndzinlid ne rac lo guidzliu rii, been to grē mine rnabey ma ne rnabey lo mendox, ma ne rcheep grē zha ne ib nēd gon xtiidz Dios.

<sup>3</sup> Grēse ne sca wban ne glo, bional ne ncuane ndzinlid ne bzoobladztaa ne, bdziuun ne ncuane bdeedtaa guxt xcuerp ngoopdol ne, ncuane biaabtaa guic ne. Ni ne scataa nac ne, ib bioguial ngaa ne lo guielnēdox ne cxeel Dios, lo guielnē ne noxtseeb grēraa miech niina. <sup>4</sup> Per ne nquialadz Dios ne nac ne miech, gane pquia zdoo me ne, <sup>5</sup> ni niicle ne rrieequia mengutle nac ne ne scataa quiadziuun ne grē dol co, per bleeban me ne; lēē min co ga been me zeene bleeban me Jesús. ¡Laa me psilaa ne lo guielgut co, niapse por mezhal noxco ne! <sup>6</sup> Laa me bleeban ne, zeena ygaa ne guiosiobnie ne Jesús zaatne gnabey Jesús. <sup>7</sup> Zigtaa len dze riiw, zigtagaa len dze ne ziaadraaw, ga gan miech ganle pa lotaa nquialadz me

ne, pa lotaa wen me lo ne, sac pxeel me Jesús biaadsilaa ne. <sup>8</sup> Golgan ganle, ne wen me mezhāl noxco guiaanwen miech lo me, gane rsilaa me ne lo dol zeene laa ne riladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech, <sup>9</sup> racda ne por pe guielwen ne gun zho; zeena gdaan-nied zho guielwen ne run zho. <sup>10</sup> Dios nac men ne psan ne, ni niina ne laa ne bziaab xnēz Jesús, laa me bredz ne dziuun ne grē guielwen ne racladz me, mine bzooblolle me ne dz-iuun ne.

*Grēse zha ne ngab lo Jesús, tipse nac zho*

<sup>11</sup> Golsoladz ganle miech ngoopdol, miech ne ngabd lo Dios, miech beed, sca lē to lo grē zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios). <sup>12</sup> Len dze co gard ygab to lo Jesús, gard gac to tipse grē to zha Israel, led yede to no lo trat ne biaan Dios grē me zha Israel, nande to grē diidz ne psan me lo zho. Lega laa to mbanse, runbeyde to Dios, ni tib guielnzaac quiambēzde to ygaa to. <sup>13</sup> Saṅgue niina ne laa to bzēēb xnēz Jesús porne bzhiee xchen me psanmbe me to, laa to ngable lo Dios.

<sup>14</sup> Jesús nac men ne psanwen ne grē ne, ptiche me grētaa ncuane pca zaacse ndzianlsa ne; zigtaa zha Israela, zigtagaa zha zita,

tibaque been me ne lo me niina. <sup>15-16</sup> Zeene pquia me lo cruz, gataa ptiche me grē ley ne zienal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grē zho, ni psanwen me zho nēz lo Dios.

<sup>17</sup> Jesús nac men ne biaad-nie Xtiidz Ndzon me lo ne grēse ne, gocndion ne zha guiaanwen ne nēz lo Dios, zig-taa tow ne nac to zha ne zit zo lo Dios glo, zigtagaa zha Israela ne nac zho zha ne gax zo lo me. <sup>18</sup> Gane niina, niicle zha Israela, niicle zha zita, zrieelo ygab zho lo Dios men ne nac Pxoz ne, zeene laa Espíritu Sant gunquien zho none gbig zho lo me. <sup>19</sup> Gacxe waa, tel to nacdrea to menzit niina, lole Dios ngab to, lal non to, lal nac to grē to grēraa zha ne ngab lo me. <sup>20</sup> Golguien ganle, grēse ne niina gzoob ne nac ne zig tib yu ne noyaa, yu ne psilo grē zha ne pxeel Dios nonee xtiidz me lo miech niina, grē zha ne pxeelgaa me pteed xtiidz me lo miech padzeela, ni Jesús nac quie ne naaz yu co. <sup>21</sup> Grēse zha ne zienal mine rnabey me, rrieequia nosoquiaraa zho yu co ga, haxta guirew gaca tib yadoo ne nlipaa mbe nēz lo Dios. <sup>22</sup> Zig nac to gon, tib tib to ne nac to zha ne ngab lo Jesús, ye to nac yadoo co, za-atne rbēz Espíritu chen Dios.

## 3

*Pabl nac zha ne güeyseed zha zit*

<sup>1</sup> Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu niogyu naa nu.

<sup>2</sup> Nanlaxe to ganle ne wen Dios, laa me bzo naa gun naa dziin rii cseed naa grë menzit. <sup>3</sup> Laa me blu lo naa zha nac grë ncuaañe no guic me gun me, mese nana per laa me blu lo naa zha naca, ni laa palala psilo bzetle naa lo to lo guits rii. <sup>4</sup> Zeene glab tow i, dzigo guien to ganle ne nli nan naa zha nac grë mine gun Jesús, mine mese nan. <sup>5</sup> Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grë zha ne pxeel me noteed xtiidz me. <sup>6</sup> Ni znu naca: grëse zha zit, zgaa zho guielnzaac ne rëb Dios gdeed me lo grë zha ne ngab lo me, tibaque nac guielnzaac ne ygaa zho grë zho zha Israel. Niicle zha Israela, niicle zha zita, laa Dios quiambëz gdeed me guielnzaac co lo zho, totsaque gliladz zho Xtiidz Ndzon Jesús.

<sup>7</sup> Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grëtaa poder ne rap me parne grieelo gun naa dziin rii. <sup>8</sup> ¡Ncuaañe gzee zdoo

new! Golwi ganle, naa nac tib zha ne mazdraa peet nond lo grë zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grë zha zit, zeena gacnan zho ganle pe zhistaa grë guielnzaac ne gdeed Jesús lo zho. <sup>9</sup> Gne naa lo zho gacnan zho ganle zha nactaa grë mine no guic Dios gun me, mine wlaltaa choot gard gacnan; Dios, men ne bzaa grëse ncuaañe no.

<sup>10</sup> Nana gnë to: “¿Pe nacne sca been me?” Laa me beena zeena grëse zha non, zha rnabey ne no gbaa, zeene gan zho tipse nac zha Israel grë zho zha zit ngab zho lo me, ga guien grë zha gbaa co ganle zha ndzielguictaa Dios. <sup>11</sup> Sca nac mine no guic me padzeela, ni zeene laa me pxeel Jesús laaw goc. <sup>12</sup> Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús iblé scaania Dios zho. <sup>13</sup> Laa naa rso didz lo to sca, niicle ne znu-taa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

*Nquialadz Jesús miech*

<sup>14-15</sup> Zeene rsoladz naa grëtaa mine no guic Dios gun me, ni mine beenlegaa me (me ne nac me Dad lo grëse zha ne ngab lo me, niicle lo guidzliu nuw, niicle gbaagaaw); rded naa xquizh lo me. <sup>16</sup> Ni ne

squitaa ndzon, ne squitaa ncuaaṅe lozhd nac grëtaa guieṅnzaac ne rap me, laa naa rnab lo me cxeel me zhiEspíritu me gneedz xfuers to dziits so to. <sup>17</sup> Ni rnab naa lo me tibaque dib zdoo to gliladz to Jesús, zeeṅa scagaa tibaque gbannie to me, parne guieṅ to ganle pa lotaa nquialadz me to. <sup>18</sup> Ga guieṅ to ganle grë to grëraa zha ne ngab lo me, ne nligaa pa lotaa nquialadz me to, nacda ncuaaṅe grieelo ctiix ne, guiab ne lalnuw. <sup>19</sup> Niicle ne znu nacda ncuaaṅe grieelo guiab ne znu znu naca, per laa naa rnab lo me zig zie dze guieṅraa to pa lotaa rleynie Jesús to; zeeṅa glu ganle ne nli nacie Dios to.

<sup>20</sup> Ni Diosi gon ne nac me men ne ndzon, mazdraa ncuaaṅe grieelo gneedz me lo ne, lëdle mine riab guic ne rnab ne lo me; ni ncuaaṅe gaca gon, sac me nacie ne. <sup>21</sup> Grëse ne ne nac ne zha ne no xnëz Jesús, itibaque golgotsaa gleynie ne me sca, ne squitaa ndzon me! Sca rieguiala.

#### 4

*None tipse gac zha ne rliiladz Jesús*

<sup>1</sup> Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to. <sup>2</sup> Gologac tib miech

ndooladz, tib miech wen, tib miech nlëëguicd, tib miech ne guieednied samiech sinque ine gleynie to zho. <sup>3</sup> Wenle na ndxie to niina, ni Espiritu Sant nac men ne gacnieṅ to; zeeṅa tibaque squi tipse gac to. <sup>4</sup> Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne. <sup>5</sup> Tibaque men ndzon ne rnabey ne, tibaque men ne rliiladz ne, tibaque wrobnis ne no par grë ne ne dib zdoo ne rliiladz ne me; <sup>6</sup> tibaque Dios no, me nac Pxoze ne grëse ne, me nac men nroob ne zo lo ne, me racnieṅ ne grëse ne, ni me nacie ne.

<sup>7</sup> Tipse nac ne, per tib tib ne psose Jesús ne pe nac dziin ne grieelo dziuun ne lo me, zigne gola zdoo me. <sup>8</sup> Min rii ga raquiet zaatne znu zhobnee lo guits ne ziaad Xtiidz Dios:

Blozhse psanwin me grëse zha ne rlëë ran me,  
laa me biire zey gbaa stib;  
ni psose me tib tib miech  
pe nac dziin ne grieelo  
gun zho lo me.

<sup>9</sup> Gologotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu. <sup>10</sup> Sac me biet gbaa, ni biire zey me gbaa stib, zeeṅa glu ganle tel pa lotaa zrieelo gdziin me. <sup>11</sup> Ni mezhal rzo ne tib tib ne pe nac dziin ne dziuun ne; me rzo:  
zha ne rxeel me gnee xtiidz me,

zha ne rxeel me cteed xtiidz me,

zha ne rienee Xtiidz Ndzon me tib tib lo miech zha laa zho lo dol,

zha ne rteedlo grë zha ne ngab lo me, ni

zha ne rseed zho zha nac Xtiidz Ndzon me.

<sup>12</sup> Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha gun zho xtsiin me; <sup>13</sup> haxta gdziin dze ne tibaque mine gliladz ne grë ne, grëse ne dziuunbepaa ne men ne nac Xpëed Dios. Laa ne lozh sodziits, haxta gac ne zig me.

<sup>14</sup> Gacdraa ne zig chol cho mëedlas ne beelze pe rililadz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne. <sup>15</sup> Sinque guional ne mine nac diidzli, ine gleynie ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rrieequia xcuerp me nac ne, me nac guic cuerp co). <sup>16</sup> Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

*Guielmban cub ne rneedz Jesús*

<sup>17</sup> Laa naa rso diidz lo to nu, ni golquiaadiaga zig nac zeene men ndzon ne rnabey ne rnew lo to: gbandraa to zigne mban grëraa miech ne zozit lo Dios, grë zha ne mban zigne notaa guic; <sup>18</sup> sac tel zha, ncow nac guic zho. Gard ygaa zho guielmban ndzon ne rdeed Dios, nand zho zha nac guielmban co sacne ndip zdoos zho. <sup>19</sup> Laa zho gocnadle, niapse lo grë ncuane ndzinlid no zho, ib rgobeyd zho run zho grëtaa guielyozh ne no. <sup>20</sup> Sangue to gon, ne nac to zha ne no xnëz Jesús niina, led mincod noseed to; <sup>21</sup> telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

<sup>22</sup> Miech yozh ne goc to glo, grëtaa ncuane ndzinlid, grëtaa guielyozh ne gocladztaa xcuerp to been to, jgolsaana! <sup>23</sup> None gdzëe lo xquielmban to, zigtaa grë mine no zdoos to, zigtagaa grë mine rza guic to, <sup>24</sup> golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

<sup>25</sup> Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

<sup>26</sup> Telne glëe to, code to guielblëe co zdoos to dib dze, sac gon dol ga. <sup>27</sup> Gunde to mine racladz mendox.

<sup>28</sup> Zha ne goc ngbaan lëe, cuandraa zho, sinque

gun zho dziin gdziniaa zho ncuaaṅe yquiiin zho, zeena scagaa grieelo gun zho xyudar zha ne guiend pe yquiiin.

<sup>29</sup> Gneede to diidznē, sinque diidz ne ndzinli, diidz ne yquiiin golṅee, zeena zha ne gona ine cchooblada zdoo zho, ine yquiiina lo zho.

<sup>30</sup> Golṅuien, gunde to ncuaaṅe coguielnē to Espíritu Sant. Golṅan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grē zha ne ngab lo me.

<sup>31</sup> None csaan to: guielṅialadz, tso to gow gzhizh zdoo to;

glēēdraa to,  
sobzhiandraa to,  
coredzdraa to,  
gacntseebdraa to, ni grēragaa guielṅntseeb ne no, gunde tow.

<sup>32</sup> Sinque none: wen gac to lo samiech to, golṅquia zdoo samiech to, golṅun samiech to perdon, zigne beēnaque Dios to perdon zeene laa to beenbey Jesús.

## 5

*None glu cho nac zha ne ngab lo Dios*

<sup>1</sup> To ne laa to nacle xpēēd Dios ni nquialadz me to, goltsoxco gac to zig me.

<sup>2</sup> Zaacse golṅban, golṅleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanṅbe me ne lo xtol

ne, me goc tib gon ne pcaania Dios.

<sup>3</sup> Golṅuien sca, none glu to ne nli xnēz Dios no to;

gunde to grē guielṅyozh ne run grē zha ne zienald zigne nacpaa guielṅsieel,

gunde to grē ncuaaṅe yozh ne run miech ndzinlid,

gunde to grē ncuaaṅe run grē zha ne zienald loxaque dien zha gunlo dimi.

Gunde to grē ncuaaṅ co, per ni gzodiidzde tow.

<sup>4</sup> Gneede to grē diidzguidz, gneede to grē diidz ne paat rquiind,

gneede to grē diidz ro nēz; sac gon rdzieeldraa gnee to grē ncuaaṅ co; sinque Dios golṅgoolnie, golṅdeed xquizh lo me.

<sup>5</sup> Nanle to ganle, grēse: zha ne zienaldraa zigne nac guielṅsieel,

zha ndzinlid ne run grēraa guielṅyozh,

zha ne mbidz (zha ne rleynieraa dimi, laa ne gleynie zho Dios);

ni tib zho grieelod gdziṅ za-atne rnabey Jesús grop me Dios.

<sup>6</sup> Gdeete to diidz lo zha ne gacladz yquidie to gnē zho peet nacd grē miṅ co, sac gon, grēcxē miṅ co waa run grē zha ne nēd gon xtiidz Dios, lozh ga, lēē miṅe tsieguiald zho laa zho yгаа lo guielṅzi ne csiaab me. <sup>7</sup> Golṅuien sca, yquiaadiagde to xtiidz grē zha ne sca rnee, per ni ctsieelsade to zho.

<sup>8</sup> Nli, ḡlēē?, ndzinlid wban to glo, rrieequia lo ncow ga

bio to, gocnie to men<sub>d</sub>ox; san<sub>g</sub>ue niina ne laa to nacnie Jesús men ne nac biini, rrieequia lo biinile no to. Gol<sub>g</sub>uiena sca, zaacse gol<sub>b</sub>an, <sup>9</sup> sac niina ne laa to nole lo biini, none gac to:

tib miech wen,  
tib miech ne zienal gac mine  
nac diidzli,

tib miech ne rnee diidzli.

<sup>10</sup> Gol<sub>t</sub>soxco guien to zha racladz Dios gban to.

<sup>11</sup> Gandzede to grē ncuane ndzinlid ne run grē zha ne no lo ncow, sinque gollisquiw; <sup>12</sup> sac grē ncuane run zho ngeets zhlian, haxta ncuane ctoladz ne gnee new. <sup>13</sup> Grēse zha ne gbig lo biini co, zien zho ganle zha nactaa grē ncuane yozh ne noyun zho; sac gon telne biiniw, tsod ncuane guian<sub>g</sub>ueets low. <sup>14</sup> No tib zaatne znu zhobnee lo Xtiidz Dios, rneew:

Luu ne tibaque guieel no luu,  
blee mcaal lo luu;  
briee lad grē zha ne squi nole  
ladznia guielgut,  
zeena gban luu lo biini ne nac  
Jesús.

<sup>15</sup> Gol<sub>g</sub>uien sca:

Miech nixbiini gol<sub>g</sub>ac,  
ndzinli gol<sub>b</sub>an; gbande to zig  
chol cho grē miech nxen ne  
run mine notaa guic.

<sup>16</sup> Cteed zhlēde to xtse to lo ncuane paat rquiind, niicle ne niapse grē min co zienal grēraa miech len dze rii.

<sup>17</sup> Gunde to ncuane paat rquiind ne rza guic to, sinque gol<sub>g</sub>uien dien pa min<sub>p</sub>aa

racladz Dios gun to, dzigo gol<sub>t</sub>soxco min co gol<sub>g</sub>un.

<sup>18</sup> Gzudzde to, sac gon lo guielgonziu run miech ncuane nonguiel<sub>d</sub>raa; sinque mazd gol<sub>n</sub>ab gneedzraa Espiritu Sant guiel<sub>b</sub>iini lo to, zeena ine:

<sup>19</sup> gool to grē salm, grē himno, grē cant ne csiaab Espiritu Sant guic to; dib zdoo to gol<sub>g</sub>oolnie men ndzon ne rnabey.

<sup>20</sup> Goldeed xquizh lo Dios men ne nac P<sub>x</sub>oz ne, por grētaa ncuane ran to, ncuane rded to; gol<sub>g</sub>uien ganle lo Jesús ngab to.

*Zha none gban zha ne rililadz Jesús*

<sup>21</sup> To ne nac to zha ne ngable lo Jesús, tib tib to gol<sub>g</sub>on mine rnee zha ne nac-grē to, zeena glu ganle me nac men non lo to.

<sup>22</sup> To ne nac to men wnaa ne ptsieelniale, gol<sub>g</sub>on xtiidz tsiel to, zigne rioxcoque to ron to mine nac xtiidz men ndzon ne rnabey. <sup>23</sup> Sac ible tsiel to nac men ne no gnabey lo to, zigne Jesús rnabey lo grē zha ne no xnēz me (ni me psilaa zho lo dol, laa zho nac zig xcuerp me).

<sup>24</sup> Ni zigne sca ron zho xtiidz me, scaque none gon to mine rnabey tsiel to to.

<sup>25</sup> Togaa ne nac to zha bgui ne ptsieelniale, gol<sub>l</sub>eynie tsiel to, zigne rleynie Jesús zha ne no xnēz me. Tel me haxta bleeladz me xquielmban me, <sup>26</sup> blee me zho lo dol, ni biaan<sub>m</sub>be zho zeene laa zho pquiaadiag



xtiidz me, wban zhow ni brobnis zho; <sup>27</sup> zeena gaḷ dze ne laa me ycaania zho, laa zho nacle miech ne rieguiaḷ gdziṅ lo guieḷndzon ne no me, ni tib doḷ rapdraa zho, miech mbele nac zho, zig tib lē lar nquitsbie ne ni tib pxud neyd. <sup>28</sup> Sca nagon none gunḡ mgui, none ganṡsi zho tsieel zho zigne ranṡsi zho xcuerp zho. Mgui ne ranṡsi tsieel, rrieequia xcuerp zho ga ranṡsi zho; <sup>29</sup> sac gon, tsod tib zha ne lēēque zha csacsi xcuerp zho, sinque ran zhow. Ni scadaa nagon rzac Jesús grēse miech ne ngab lo me, <sup>30</sup> sac nac zho zig xcuerp me. Ni lēē tib lē cuerp co nu nac ne.

<sup>31</sup> Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: “Ib none greezhaa mgui lo pxoz zho, lo xniaa zho, zeena gban- nie zho tsieel zho gac zho zig tibaque miech grop zho.”

<sup>32</sup> Rgobey naa ngaṅ tsoguic to zha nacle chop miech gac tibaque cuerp; per ga gonḡ rlu ne niicle nzian ne per tibaque cuerp nac ne, ni lēē xcuerp Jesús ga. <sup>33</sup> Miṅe racladzpa naa csoladz to nu: to ne nac to menḡ bgui, none gleynie to tsieel to zigne rleynieque to xcuerp to; ni niicle togaa ne nac to menḡ wnaa, none gon to xtiidz tsieel to, cueede to xquieḷto zho.

## 6

<sup>1</sup> To ne nac to mēēd, golḡon xtiidz pxoz to, xtiidz xniaa to, sac sca nonguiela, ni scagaa

glu ne nli rleynie to Dios. <sup>2</sup> Golḡan ganḷe, lo grēxley Dios no tib miṅe znu rnee: “Bin xtiidz pxoz luu, xtiidz xniaa luu, zeena ine niowse gac lo xquieḷmban luu, ni nroob dze ne gban luu lo guidzliu rii.” Ni lēēw glopaa rnee ganḷe pe nac miṅe ygaa zha ne gunḡ miṅe rnabeya, <sup>3</sup> sac rneew, niowse gac lo xquieḷmban zho, ni nroob dze ne gban zho lo guidzliu rii.

<sup>4</sup> Togaa ne nac to menḡ nguzan, gunde to ncuaane yquiaaguieḷnē to xpēēd to, sinque golḡcobey dieṅ zha gunḡ to parne gon zho diidz, ni cseed zho gban zho zigne rdziladz Dios.

<sup>5</sup> To ne nac to zha ne ngadoo ladznia benḡ, golḡon xtiidz menḡ ne rnabey to. Golḡuienḡ zha rnabey to, dib zdoo to, golṡsoxco golḡunḡ xtsiinḡ zho, zig nac zeene xtsiinḡ Jesús ga noyunḡ to. <sup>6-7</sup> Gunde to ne loxaque zeene zose zho lo to, dzigose yquiaalo to gunḡ to dziin zeena guianḡnziuu to lo zho, sinque ine nguieelḡ golḡac golḡunḡ xtsiinḡ zho, zig nac zeene xtsiinḡ Jesús ga quia to, ine dib zdoo to quiayunḡ to miṅe racladz Dios. <sup>8</sup> Benḡque nanḷe to, zigtaa zha ne ngadoo ladznia benḡ, zigtagaa zha ne rnabeya, zdeedse Dios miṅe tsieguiaḷ zho tib tib zho telḡ pe nac ncuaane wen ne noyunḡ zho.

<sup>9</sup> Togaa ne nac to zha ne rnabey, niowse golḡac lo zha ne quia xtsiinḡ to, gacntseebe to lo zho. Golḡuienḡ ganḷe, zigne

rzacaque zho, scaque rzac to, no tib meṇ ne rnabey to grē to, lēe me ga zob gbaa; ni tel me gon led yed me guiab dien cho rnabey, chogaa run dziin.

*None nsin so zha ne rliladz Jesús*

<sup>10</sup> Bets, bzian, nu ne laa naa csiaalle, laa naa rnab lo to gon tibaque golnalo Dios; golgan ganle, con grētaa guielrnabey ne rap me, me gneedz grē lose fuerz lo to. <sup>11</sup> Zig nac grē menḡuuiḡ, ible no grē ncuaane rquiin zho zeene laa zho rie lo dil, scaque to niina nagon, golquiin grē lose fuerz ne bneedz Dios lo to, zeena glēbd mendox gungüet ma to. <sup>12</sup> Golgan ganle, led-xe miech guidzliud waa nodilnie ne, sinque laa ne nodilnie grē me yozh ne quianzē zhan gbaa, ma ne quianabey grētaa guielntseeb ne rac lo guidzliu rii. <sup>13</sup> Gane nagon none yquiin to grēse lo fuerz ne zineedzle Dios lo to, zeena guiablode to zeene laa grē me ntseeb co csilo ygaal to; ni scagaa, zeene laa ma biablo, tibaque dziits so to grē to.

<sup>14</sup> Dziits sca golso:

Dziits golso lo mine nac didzli, zigne dziits dziits rzhidoo len menḡuuiḡ zeene laa zho tsie lo dil.

Golgun mine nonguiel zeena ctse to lo mendox, zigne rtse ncuaane racw menḡuuiḡ lo grē ncuaane gnitlo zho.

<sup>15</sup> Nsin golso zeene laa to tsienee Xtiidz Dios lo miech gacnan zho zha guiaanwen

zho lo me, zigne nsinle zo menḡuuiḡ zeene laa zho no tsie lo dil.

<sup>16</sup> Guiaanladzde to, golnalo Dios, zeena peet grielod gun grē me yozh co to, zigne rnalo menḡuuiḡ guiblag ne rsaac zho lo zha ne nodilnie zho.

<sup>17</sup> Golsoladz ganle laa Dios psilaale to lo guielgut, golsaca zigne rzac menḡuuiḡ pchog guib ne rzob guic zho, rsi-laaw zho lo guielgut. Ni golsac Xtiidz Dios mine rneedz Espiritu Sant lo to, zigne rzac menḡuuiḡ xquuiḡ zho.

<sup>18</sup> Nsin sca golso, guiablode to. Tibaque golzodiidznie Dios. Golnab lo me mine rsiaab Espiritu Sant guic to, golnab gacniē me grēse zha ne ngab lo me; ni <sup>19</sup> golnab lo me gacniē me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnand glo.

<sup>20</sup> Ib me bzo naa cteed naa xtiidz rii me lo grē zha zit, ni mincocxe waa rquiaqui znu no grē guib rii nia naa, ngoguiu zho naa nu. Golnab lo me gacniē me naa, gdzieebd naa gne naa ganle cho nac me. ¡Nsin sca golso!

<sup>21</sup> Laa naa rxel Tic lo to, me nac tib meṇ nziuu lo naa, dib zdoo me laa me quiayun xyudar naa lo xtsiin meṇ ndzon ne rnabey ne. Me guiaadnie diidz lo to ganle zha rac naa, zha no naa nu. <sup>22</sup> Mincopaa ziaad me i, ziaadnie me didz zha no no nēz rii, zeena

ine gley to tsoxcoraa to mine  
rliladz to.

<sup>23</sup> Rnab naa lo Dios men ne  
nac Pxo<sup>z</sup> ne, ni lo Jesús men  
ndzon ne rnabey, me gac-  
nien to peet zhgab ctsebde to,  
ine tibaque gliladz to me, ine  
gleynie to samiech to. <sup>24</sup> Me  
gunlay to, grëse to ne nac  
to zha ne nlipaa dib zdo  
rleynie Jesús.

Pabl

## GUITS NE PXEEL PABL LO ZHA FILIP

¡Diuzh to grëse to!

<sup>1</sup> Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

<sup>2</sup> Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

<sup>3</sup> Zeene rsoladztaa naa to, rded naa xquizh lo Dios; <sup>4</sup> ni zeene rzodiidznie naa me, rley naa gon rnab naa lo me gacnien me to; <sup>5</sup> sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. <sup>6</sup> Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

<sup>7</sup> Min co racladz naa, ni ib rieguiala sac ne nligaa rleynie naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz

Jesús. <sup>8</sup> Dios nan ganle pa lotaa nonie to guic naa, rquianë zdoo naa to, zigne rzacaque Jesús ne.

<sup>9</sup> Rnab naa lo Dios gacnien me to, zig zie dze gleynieraa to samiech to, tsabiiniraa to, <sup>10</sup> zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús; <sup>11</sup> zaacse gban to. Ga glu to ganle lëe min co blu Jesús lo to, zeena sca csanglaa to Dios.

<sup>12</sup> Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. <sup>13</sup> Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. <sup>14</sup> Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

<sup>15</sup> Parga nli no stib dii zha ne psilo noyun dziin co, per laa zho noyuna loxaque par dien zha guianzuiuu zho, sac në rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech. <sup>16-17</sup> Lëe zha co nagon rlu

ne nli rleynie zho naa; sac nan zho ib laa Dios bzo naa gnē naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzuiu zho, rzac zho na tel mazdraa glaa guiaan zho lo naa, mazdraa lozh coguielnē zho naa ne laa naa znule no ladzguiib. <sup>18</sup> Per par naa, pex gun naa zho. Tel zha ne zie dib zdoow, zha ne ziedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

<sup>19</sup> Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspíritu Jesús naa. <sup>20</sup> Dib zdoo naa racladz naa, tiblique gac naa lēeb naa gan naa mine tedtaa naa, gdzind dze ne gun naa ncuaane cuee xquielto naa. Racladz naa cxobnen naa ganle zha men rotaa nac Jesús; niicle tel nica por min co yquiaaqui gut miech naa. <sup>21</sup> Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guielbley nroob ne ygaa naa. <sup>22</sup> Per tel laga mban naa, nzianraa ncuaane grieelo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! <sup>23</sup> No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziagaa naa lo Jesús, sac nligaa zoot naa laa naa

bdzinle lo me. ¡Min co mazdraa wen, lēdle cuēz naa lo guidzliu rii! <sup>24</sup> Per rien naa ible none cuēz naa, sac rquiinpa a to naa. <sup>25</sup> Min cocxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to riladza; <sup>26</sup> ni zeene laa naa gbire guial lo to i, rien naa nroob gley to, zdeed to xquizh lo Jesús porne racniē me naa.

<sup>27</sup> Per mine rsopaa naa didz lo to gon: Goltsoxco golban zigne no gban zha ne ngab xnēz Jesús, zeena niicle telne grieelod guial naa, racladz naa gon naa tipse nac to grē to, tiblique dziits zo to lo Xtiidz Dios; ni noxco to dien zha gliladz grēraa miech Jesús, <sup>28</sup> ni lalnu rdziebde to grē zha ne rlēē ran to. Ga guien zho ganle nēz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. <sup>29</sup> Sac gon, ible none gan to guielnē porne no to xnēz me, bzooblod Jesús to loxaque par ygaa to guielnzaac qui gnalo to me. <sup>30</sup> Niicle tow, niicle naagaaw none dzian ne min co. Gonle to ganle zha nactaa grē ncuaane bdeed naa, ni ziyongaa to grē mine nodeed naa niina.

## 2

*Goc Jesús tib men ndooladz*

<sup>1</sup> Nanle to ganle Jesús rchoobladz zdoo to, me rlu zha gleynie to samiech to, tipse nac to ni Espiritu Sant nacie to; nanle to ganle none

yquia zdoo to samiech to.  
 2 Gacxe nana sca, golconley  
 zdoo naa, ine tipse golgac,  
 golleynie grē zha ne nacgrē  
 to, tipse golnee, ni tipse golgac  
 tel pa lo dziin ne gnediidz  
 to gun to. 3 Ncuaaṅe gun to,  
 guiabde to ne laa to gūṅa  
 par dieṅ zha csaṅwin to  
 stib miech, zeṅ dieṅ zha  
 guiaṅnziuu to; sinque ine  
 ndooladz golgac, masaque  
 goltsienie guic ne nonraa stib  
 miech lo to. 4 Ib yguibde to ne  
 lose to yquiin ncuaaṅe gun to,  
 sinque golguib dieṅ zha gun  
 to xyudar grēraa miech.

5 Golsoladz ganle pa lotaa  
 ndooladz goc Jesús leṅ dze  
 ne biaadted me lo guidzliu,  
 scaquegaa nasca ndooladz  
 golgac. 6 Sac tel me:

Niicle ne Dios nac me,  
 per led mincod niab  
 me nriied me lo  
 guielndzon ne no me,

7 sinque grēse zigne nac me,  
 laa me psana tib lad,  
 laa me goc zig tib ngundziin  
 win,

biaad me gol me lo guidzliu  
 rii goc me miech.

Nacle me miech,

8 ni bii psanwin me me lo  
 miech,

haxta bdeed me diidz pquiaa  
 zho me lo cruz,  
 zig run zho cho grē zha yozh.

9 Mincocxe waa, psanglaaraa  
 Dios me,

biaan me meṅ ne mazdraa  
 non, meṅ ne mazdraa  
 nroob;

10 zeṅa zeṅe laa me gaquiet,  
 grēse zha ne no gbaa, grēse  
 zha ne no lo guidzliu,

ni grēse zha ne no nēz len  
 guidzliu, laa zho yqui-  
 itsgzhib,

11 ni grēse zho laa zho cueero,  
 guiab zho ganle ne nli  
 me nac meṅ ne rn-  
 abey.

Ga laa zho cxobneṅ ganle,  
 zha meṅ nroobtaa nac  
 Dios, meṅ ne nac Pxo-  
 z me.

*Zha ne nac biini lo guidzliu  
 rii*

12 Bets, bzian, ne nligaa  
 rleynie naa to. Laa naa rnab  
 lo to (zigne bioxco to bin to  
 xtidz naa zeṅe blēz naa lo to  
 i, scaquegaa niina niicle ne  
 zit zo naa, golgon mine rne  
 naa nu), ib gdeete to diidz  
 guiab to ladznia dol stib,  
 niina ne laa Dios psilaale to;  
 golguieṅ tsieniewguite guic  
 to. 13 Beṅque Dioszhal rsiab  
 guic to rquiabladz to gun to  
 mine racladz me, ni scagaa  
 me racnieṅ to rrieelo run  
 tow.

14 Ni ncuaaṅe rieguial to  
 gun to, ine nguieel golgac  
 golgūṅa, peet glisquide to, ni  
 niicle tilidiidzdgaa to; 15 zeṅa  
 tsod pe nacne cho glisqui  
 guiab zho laa to pe falt,  
 pe dol ne quiayun. Gollu  
 ganle nli xpēedle Dios nac  
 to; zaacse golban, niicle ne  
 ladaque grē miech ntseeb,  
 miech ncow ne ndxie lo  
 guidzliu rii no to. Golgac zig  
 tib biini lo zho, zigne rziini  
 mel gbaa lo ncow ne nac  
 guieel. 16 Ib csaande to Xtiidz  
 Ndzon Jesús, diidz ne rdeed  
 guielmban, lēew golconie guic  
 to. Sca golgac, zeṅa gal dze  
 ne laa Jesús guiaad stib, per

nli gley naa gan naa led zhlöd brie naa bial naa, bialseed naa to. <sup>17</sup> Zig nac niina, tel niaca mine no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to ygaa guielbley. <sup>18</sup> ¡Golley sca! Zigne no guielbley rii zdoo naa, scaquegaa to golco nley zdoo to, zeena grë ne gley.

### *Timoté ni Epafrodit*

<sup>19</sup> Telne gneedz men ndzon ne rnabey ne diidz, racladz naa cxeelnioab naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa. <sup>20</sup> Me cxel naa, sac guienstib zha ne zienie guic zig zienie guic naa, tel led med; sac tel me nonie to guic me. <sup>21</sup> Grëraa zho, ncuaane yquiin lo zho rioxco zho, laa ne tsoxco zho mine nac xtsiin Jesús. <sup>22</sup> Laa Timoté, led nanle to ganle zha ndzinli nac me, tel niina ine tib mөөd nac me lo naa, nroob yudar ne quiayun me noseed no miech Xtiidz Ndzon Jesús. <sup>23</sup> Ible laa guic naa no cxel naa me lo to i, loxaque gacnanse naa dien zha csan wxtis rii xcuent naa nu. <sup>24</sup> Ni ye naa nend pronaque guialso naa i dien yo to, sac rien naa ible zneedz Dios diidz guial naa.

<sup>25-26</sup> Ni rgobey naa nonguielaquew cxel naa bets ne Epafrodit guiaad me nöz qui, sac laa me rbanle to, ni no me zhgab bin me laa to

gocnan ne laa me bzhaacnë. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacnie me naa lo dziin ne nodziun no. <sup>27</sup> Ni nligaa bzhaacnë me, nzhoogoc me zootle laa me nietle; per pquia zdoo Dios me ni pquiaagaa zdoo Dios naa peet god me, sac gon nole naa guielnë, ni tel pe niacaque me mazdraa niac nroob xquielnë naa. <sup>28</sup> Min co nagon laa naa cxelgazh me, zeena gley to gan to lo me stib, ni scagaa niicle naaw zley naa. <sup>29</sup> Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. <sup>30</sup> Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

## 3

### *Ncuaane mazdraa non*

<sup>1</sup> Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuaane yquingaa lo tow: <sup>2</sup> ¡Ib cxende to lo grë mөcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho. <sup>3</sup> Sangue ne, ndionle ne zha nac diidzli,

zha ne rleynie Dios zigne rsiaab Espíritu Sant guic zho, ni dib zdoo zho run zhow, zha co nac zha ne nlipaa no xnéz me. Ne ne nac ne zha ne no xnéz me, Jesús nac men ne rdziunnon ne, sac ndion ne por me laa Dios ycaania ne; rnalod ne grē ncuaane laglaase, <sup>4</sup> sac telne scaw; zig nac naa pe zhistaa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho: <sup>5</sup> Xon ngbidz raap naa laa naa biole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xnial naaw zha Israel nac me. Niicle xleygaa zha Israela, nroob pseed naaw, zha farisé goc naa; <sup>6</sup> bleyniedox naa grē mine ziana zha Israel, gacxe waa pquiana naa grē miech ne no xnéz Jesús; zig nac mine raquiet lo ley, grēsew ben naaw zigne naca, ib biod dze ne cho zha pe nlisqui lo naa.

<sup>7</sup> Lēē grē ncuaan co rnalo naa len dze co, sangue niina Jesús rnalo naa, grēse ncuaan co laaw psanle naa tib lad. <sup>8</sup> Ni led loxaque psandse naaw tibladd, sinque grēsew peet nondraaw lo naa, mine non lo naa niina nacle beenbey naa cho nac Jesús, men ndzon ne rnabey naa. Niina ne laa naa runbey me, grēse ncuaan co rzaac naaw zig rzac ne grē pe guizh beed, sac laa naa racladz gbigras

naa lo me, ni gacniera naa me. <sup>9</sup> Zana draa naa gun naa mine rnabey ley par guiaanmbe naa lo dol, sinque laa naa zana dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. <sup>10</sup> Racladz naa guienraa naa zha nac Jesús, ni gaap naa poder ne pquiin Dios zeene blische me me len baa, ye naa teed grē mine bded me, ni cueeladz naa xquielmban naa zigne bleeladz me xquielmban me; <sup>11</sup> ni scagaa, nanpaa naa ye naa grieeban gal dze ne guiadbeeban me grē zha ne no xnéz me.

*Stsēē Jesús xcuerp zha ne ngab lo me*

<sup>12</sup> Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa. <sup>13</sup> Bets, bzian, gard gun naa gan; per xco co no naa; grēse ncuaane bded laaw biaanladzle naa, laa guic naa zienie ncuaane naraa ziaad. <sup>14</sup> Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne riladz Jesús.

<sup>15</sup> Ni ib znu none tsonie guic grē zha ne nlipaa dziits zo lo Xtii dz Dios; telne no-gaa bla zha ne rzac led scada, per Dios gdeed guielbiini lo



zho guien zho ganle zha naca.  
 16 Ni negaa, grë mine rienle ne  
 zha nac, none gban new.

17 Bets, bzian, golwi ganle  
 zha mban naa, ni zha mban-  
 gaa grë zha ne zienal mine  
 blu no lo to grë to; dzigo  
 sca golban. 18 Sac gon nzian  
 zha ne nacgrë to i (blactaale  
 zizet naa zho lo to, ni niina  
 haxta roon naa rzet naa zho  
 stib), laa zho mban zigne  
 racladztaa zho, rlëë zho ron  
 zho pe nac gut Jesús lo cruz;  
 19 ni nëz ne nitlo zho ga zie  
 zho. Laa ne tsienal zho mine  
 rnabey Dios, laa zho zienal  
 grë ncuaañe gdeed guxt zdo  
 zho, ncuaañe gdeed guxt  
 xcuerp zho. Loxaque grë  
 ncuaañe mbee guielto zienal  
 zho, per zha rlozhd gleynie  
 zhow; niapse grë ncuaañ lo  
 guidzliu rii nonie guic zho.  
 20 Sangue ne, laa ne zional  
 ncuaañe ygaa ne gbaa, sac  
 gbaa nac zaatne ngab ne,  
 ni laa ne quiambiaaz quiet  
 Jesús gbaa guiaad me stib (me  
 nac men ne psilaa miech lo  
 dol, me nac men ndzon ne  
 rnabey); 21 zeena ctsëë me  
 xcuerp ben wiich ne nu, gaca  
 zig nac xcuerp ndzon me. Ni  
 ib zun mew, sac nroob poder  
 ne rap me rnabey me grëtaa  
 ncuaañe no.

#### 4

*Rnab Pabl nley gac zha  
 Filip*

1 Bets, bzian, ne nlipaa gon  
 rleynie naa to, haxta rzaac  
 naa tebaa laa naa ranle lo  
 to; to nac xquielbley naa, to  
 nac zig tib premio lo naa por

grëtaa xtsiin Jesús mine ben  
 naa lo to. Laa naa rso diidz lo  
 to, tibaque squi dziits golso, ib  
 csaande to zhiwseed Jesús.

2 Rnab naa lo bzian ne Evo-  
 dia, ni lo bzian ne Síntique  
 glëëlsadraa zho, none tipse  
 gnee zho; sac gon bel zho,  
 xnëz Dios no zho grop zho.

3 Ni luu gon bets, ne nac luu  
 zha ne tibaque quiayacnie  
 naa lo dziin ne quiadziun  
 ne, laa naa rnab lo luu bnee lo  
 grop wnaa qui gneewen zho  
 stib, sac gon ye zho blactaa  
 mine bded zho zeene bzënal  
 zho zhits naa biotiiz no Xti-  
 idz Jesús, ni zeene güeynalгаа  
 zho zhits Clement, ni zla zha  
 ne rdziuungza no dziin. Laa  
 lë zho zhooble len libr ne  
 quia lë grëse miech ne bgaale  
 guielmban ne gdzindraa dze  
 lozh.

4 ¡Golley sca, tibaque golley!  
 ¡Golgan ganle lo Jesús ngab to!  
 Ni rneque naaw stib: ¡Golley!

5 Golguien zaacse golbannie  
 grëse samiech to, zeena haxta  
 gzëëb diidz ganle ne nli miech  
 ndzinli, miech ndooladz nac  
 to. ¡Golguien ganle, ile ziaad  
 men ndzon ne rnabey ne!

6 Tel pe nac grë ncuaañe  
 quiaded to, tsoode to zh-  
 gab, gdziebde to, sinque  
 golzodiidznie Dios, golsan  
 grësew lадznia me; per led  
 loxaque gnabdse to, sinque  
 golsoladz goldeed xquizh lo  
 me. 7 Ni zeene sca csañ to grë  
 xliaadz to lадznia me, haxta  
 tibliladz guiaañ zdo to, peet  
 dzeb tsoniedraa zdo to, peet  
 zhgab tsoniedraa guic to,  
 masaque Jesús nac men ne  
 nacie to; grëraa miech ib

guiend zho zha nac ne scataa  
tibiladz rac to.

<sup>8</sup> Bets, bzian, nu ne laa naa  
csiaalle guits rii laa naa rnab  
lo to, min rii golconie guic to:

niapse mine nac diidzli,  
niapse grē ncuane nonguiel  
gac,

niapse grē ncuane rac zigne  
nac diidzli,

niapse grē ncuane mbe,  
niapse grē ncuane gleynie  
miech,

niapse grē ncuane gley  
miech gon zho,

niapse grē ncuane yquiin,  
niapse grē ncuane gzee zdo  
miech ni gleynie zho.

Grē min rii golconie guic to, ni  
lëew goltsoxco gun to.

<sup>9</sup> Ni golguien gon, grē mine  
pseed naa to, mine psan naa  
diidz lo to gun to, grē mine  
bin to bne naa lo to, mine  
gon to ben naa, grē min co  
goltsienal; zeena scagaa zac-  
nie Dios to ib peet zhgab ct-  
sebdraa to.

### *Gon ne bdeed zha Filip*

<sup>10</sup> Ne nlipaa rded naa  
xquizh lo men ndzon ne  
rnabey ne, ni rley naa ne  
laa to pxeel grē ncuane  
yquiin naa stib. Nan naa ne  
led biaanladzde to naa, sac  
tibaque noxco to dien zha  
gun to xyudar naa; sinque  
bdeedniobda diidz. <sup>11</sup> Rley  
naa ne laa to psoladz naa,  
maase niicle nodpaa naa  
zhgab co dien pa grie pe  
yquiin naa, sac pseedle naa  
peet zienied guic naa niicle  
tel zhataa nodeed naa. <sup>12</sup> Nan  
naa zha nac guielprob, ni  
nanquegaa naa zha nac zeene

quianie ne nroob ncuane  
yquiin ne. Pseedle naa rzac  
zdo naa mine nodeedtaa  
naa, niicle zeene biodzē zdo  
naaw, zeene rcaabedzгаа  
naaw; niicle zeene nroob  
ncuane yquiin naa no, zeene  
peet guiendgaa. <sup>13</sup> iGrësew  
rrieelo naa, sacne nacnie  
Jesús naa, me rneedz xfuers  
naa! <sup>14</sup> Per wen ga been  
to, pxeel to ncuane pquiin  
naa lëetaque len dze ne peet  
guiend lo naa.

<sup>15</sup> Zeene brie naa nēz xtan  
zha Macedon i, len dze  
ne wriin psilo noseed naa  
miech Xtiaz Ndzon Jesús  
ga, tosaque nac zha ne been  
xyudar naa, beenlo to gon  
pxeel to lo naa, porne rleynie  
to dziin rii. <sup>16</sup> Scasaque len  
dze ne no naa Tesalónica,  
blalaa vuelt pxeel to pe  
pquiin naa.

<sup>17</sup> Guiabde to togo bod  
ne dien zha ygadraa miech  
lo naa gane rzetpaa naaw;  
lëda, sinque rley naa ne squi  
rala zdo to rgad to, sac  
squi nroobraa guielzaac ne  
ygaa to. <sup>18</sup> Tel na gon, grēle  
ncuane yquiin naa no, haxta  
nrooblew nu. Ni ne pxeelaque  
to Epafrodit baaadsan stib  
nēza, haxta bdedsole goclow  
lo naa nu. Grëtaa ncuane  
bgad to lo naa, rrieequia naca  
zig tib gon ne bdeed to lo Dios,  
zig tib gox ndzon ne sac zdo  
me ycaania me. <sup>19</sup> Scagaa  
niina nagon, grëse ncuane  
yquintaa to, Dios men ndzon  
ne riladz ne, me gneedza  
lo to, porne nligaa dib zdo  
to riladz to Jesús; sac gon,

nroobdoo grë guieḽndzon, grë guieḽnzaac ne rap Dios. <sup>20</sup> ¡Lëë xDios ne ga, me nac Pxoꝝ ne grëse ne! ¡Gotsaa dziuunnon ne me sca, mesi gdziḽd dze ne nitlo xquieḽndzon me! Sca rieguiala.

<sup>21</sup> Goḽdeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa goḽcaania zhibdiuzh grë zha bets ne, zha ne no lo naa nu. <sup>22</sup> Goḽcaania zhibdiuzh grëse zha ne no nu, zha ne rliladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

<sup>23</sup> Jesús, meḽ ndzon ne rnabey ne; me noxco to, me nonie grë zhizhgab to. ¡Me gunlay to grëse to!

Pabl

## GUITS NE PXEEL PABL LO ZHA COLÓS

¡Diuzh to grëse to!

<sup>1</sup> Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca. <sup>2</sup> Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdo to rleynie to Jesús.

Dios men ne nac Pxoze, me glu ganle pa lotaa noxco me to, zeena peet dzeb tsonied guic to.

<sup>3</sup> Gzobtaa zeene rzodidznie no Dios, Pxoze Jesús men ndzon ne rnabey ne, rnab no gacnien me to, ni rdeed no xquizh lo me ne squitaa rneedz me guielbiini lo to; <sup>4</sup> sac zidzion no ne nli-paa dib zdo to rliladz to cho nac Jesús, ni rleynie to grëse zha ne no xnëz Dios. <sup>5</sup> Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gocnan ganle no tib guielnzaac nroob ne yгаа to gbaa.

<sup>6</sup> Golgacnan sca ganle, Xtiidz Ndzon Jesús, wseed ne rliladz to, nzianraa zaatne quiagaaza, ni lëew notsëe lo xquielmban miech, zigne bdzëëque lo xquielmban to zeene pquiaadiag tow, laa to bien ganle ne nligaa pa lotaa noxco Dios to. <sup>7</sup> Lëe min co ga biadseed Epafr to; tib men ne

nziuu lo no, ye me rquiagza no dziin; ranaxe to ganle zha rioxcotaa me xtsiin Jesús. <sup>8</sup> Me bzodiidz lo no ne squitaa rneedz Espiritu Sant guielbiini lo to, rleynie to samiech to.

<sup>9</sup> Gane zeene bdzion no squitaa ndzinli mban to, tibaque laa no quianab lo Dios quixbiiniraa Espiritu Sant guic to, guien to zhapaa nac grë mine racladz Dios gun to; <sup>10</sup> zeena grielo gban to zigne no gban zha ne no xnëz Jesús, tibaque gun to ncuaane conley to zdo me; dzigosi grëse ncuaane ndzinli ne gun to, zlupaa ncuaane rquiina, ni zioguicraa to zha nac Dios. <sup>11</sup> Ni rnab no lo me, niapse por poder ne rap me gunndip me zdo to, gunndip me guic to; zeena niicle tel pe nactaa guielne ne gan to, ib peet tsienied guic to, ib sacxuude to, <sup>12</sup> ine gley to gdeed to xquizh lo me nac me Pxoze, ne squi laa me bzooblo to, psanmbe me to; zeena gdziñ to lo biini zaatne yгаа to mine no gdeed me lo grëse miech ne no xnëz me. <sup>13</sup> Sac me nac men ne blee ne lадznia mendox, ma ne rnabey lo guielcow, psan me ne lадznia Xpëed me Jesús, men ne rleynie me ga. <sup>14</sup> Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nëz lo Dios.

*Grë ncuaane been Xpëed Dios*

<sup>15</sup> Niicle ne gard dzian ne Dios, per laa Xpëed me biaad biaadlu lo ne ganle

zha nac me, sac zigne nacse me scaque nac Xpëed me; ni ladznia Xpëed me no grëtaa ncuaane no. <sup>16</sup> Zeene bnabey me tsa grëtaa ncuaane no gbaa, grëtaa ncuaane no lo guidzliu; Xpëed me bzaaw grësew, zigtaa grë ncuaane rdzian new, zigtagaa grë ncuaane grieelod dzian new, zig nac grë "me mban" ne rap guielrnabey, rap poder. Jesús bzaaw grësew, ni ible par me biaaw. <sup>17</sup> Nole Jesús zeene baa grë ncuaan co, me naaza, gane tib tiba nosew zaatne rieguiala. <sup>18</sup> Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieaban; zeena glu ganle me nac men ne mazdraa nroob, me nac men ne mazdraa non; <sup>19</sup> sac ib Dios bnabey zigne nacse Dios scaque nac me.

<sup>20</sup> Niapse por Jesús grëse ncuaane no zigtaa lo guidzliuw, zigtagaa gbaaw, laaw biaanwen lo Dios, ni lëe min co goc zeene sca bzhiee xchen Jesús lo cruz. <sup>21</sup> Zig nac to, glo zit zo to lo Dios, rrieequia rlëenie to me, sac niapse grë ncuaane ndzinlid güeynie guic to been to; <sup>22</sup> sangue nina laa Jesús psanwenle to lo me, zeene sca goc me miech pquaa zho me lo cruz. Ni laa me psanwen to, zeena ine mbele to, ni tib dol rapdraa to gdziñ to zaatne no me. <sup>23</sup> Per parne grieelo gdziñ to ga, none tiblque golgun

guic to, goltsienal Xtiidz Ndzon me mine rliladz to, ib guiaanladzde to guielnzaac ne no ygaa to, zigne raquiet lo Diidz Ndzon ne pquaadiag to ga. Lëe Diidz Ndzon co quia-gaaz dipse lo guidzliu niina, ni ye naa nac tib zha ne quia quianeew lo miech.

*Dios bzo Pabl tsoxco me zha ne ngab lo Dios*

<sup>24</sup> Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me. <sup>25</sup> Ni ible Diosgaa bzo naa noyun naa dziin lo grë miech ne no xnëz me, zig nac to, gocniën me to bzo me naa bne naa grëse zigne nac Xtiidz Ndzon me lo to. <sup>26</sup> Diidz ndzon ne gocnand grëtaa zha gol ne ziyaadmban wlal ne bre guidzliu, laaw gocnan grë zha ne no xnëz me niina. <sup>27</sup> Ible zha gocladz me gacnan grëtaa guielnzaac ne ygaa zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacie Jesús, me gdziñnie zho zaatne nac lo guielndzon ne no me.

<sup>28</sup> Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me. <sup>29</sup> Min co nac dziin ne noxco naa, per led dziin ligada,

gane dib nacse guieḷndaan, dib nacse fuerz ne rneedz me lo naa, noxco naa noyūn naaw.

## 2

<sup>1</sup> Racladz naa gacnan to ganle ne nlipaa tibaque no to guic naa, zigtaa tow, zigtagaa zha Laodicéw, ni grèragaa zha ne gard ganlo naaw. <sup>2</sup> Rnab naa lo Dios ib guiaand zdoo to, tipse gac to ine gleynie to grè zha ne nacgrè to, lozhraa tsaa biini xquieḷrien to guien to ganle zhapaa nac Jesús, sac gon naraa bdeed Dios diidz gunbey miech me. <sup>3</sup> Me nac men ne rap grèse guieḷrac, grèse guieḷbiini nroob chen Dios. <sup>4</sup> Laa naa rne min rii lo to, zeena choot yquidiede to, niicle paraa ndzielguic rzè xtiidz zho. <sup>5</sup> Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zacse mban to, tiblque nac guic to dib zdoo to rliladz to Jesús.

### *Tib guieḷmban cub*

<sup>6</sup> Nana sca, zigne bzëeb to xnèz Jesús gnabey me to, scagaa goltsienal mine rnabey me, <sup>7</sup> masaque ladznia me golsan xquieḷmban to, me gollnalo, gollu ganle ne nli dib zdoo to rliladz to me, zigne pseed no to, ni tibaque goldeed xquizh lo Dios.

<sup>8</sup> Nsin golso: ib gac-wete to lo grè zha ne guiaadnie wseed lo guidzliu rii, grè godiidz ne paat rquiind, sac laa zho gacladz yquidie zho to. Tel zha, ib rzeete

zho lo miech dien cho nac Jesús, sinque leḷ grè ncuane run grè xmengol zho, grè wseed ne rleynie grè miech lo guidzliu, min co rseed zho miech. <sup>9</sup> Sangue ne, ndion ne ganle zigne nac Dios scapaa nac Jesús. <sup>10</sup> Gacxe waa, to ne nacie to Jesús, peet rquiindraa to. Me nac men ne rnabey lo grèse zha ne rap poder, lo grèse zha ne rnabey.

<sup>11</sup> Zeene bnalo to Jesús rrieequia hor co bio to tib bey, per nacda zig nac bey ne rio xcuerp zha bgui, sinque tib bey ne rlu ne laa to psaanle grè dol ne been to glo; ni Jesús nac men ne bloo to bey co. <sup>12</sup> Ni zeene brobnis to, rrieequia bguetsnie to me ga ni brieebannie to me, sacne bliladz to poder ro ne rap Dios men ne blische me len baa. <sup>13</sup> Glo zha gutle nac to nèz lo Dios, lala por grètaa xtol to ni porne gard co Jesús to bey co; laa zeene bleeban Dios Jesús, men ne pxeel me biaadsilaa ne lo dol, laa to wbiire bgaa guieḷmban stib. <sup>14</sup> Ptiche Dios grèse mine rioguial ne, sac bdiits ne mine nac xley me; grèse dol co pcaadz me Jesús zeene laa Jesús pquia lo cruz. <sup>15</sup> Ni zeene sca bded Jesús, ga psiaablo me mendox; grè me yozh ne rap poder, me ne rap guieḷrnabey, psan me ma guieḷto; sac gasi laa me blu lo miech ganle ne nli ladzniale me no ma.

*Grè wseed ne paat rquiind*

<sup>16</sup>Gacxe waa, ib guṅcasde to zha ne rliſqui dien pe nacne pe row to, pe nacne pe rie to, pe nacne runde to grē zhiłni zha Israel, runndade to dze ne rquia mēē yeen, runndade to dze ne rdziiladz zha Israel lo dziin. <sup>17</sup>Grē miṅ co bioxco miech zeene gard guiaad Jesús, per lega gocse ncuaan co zig tib zhiłlē guielbiini ne biaadnie Jesús. <sup>18</sup>Ib gliladzde to xtiidz grē zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grē anjl, rnee zho goon dieen pe ncuaane gbaa ne zielulo lo zho, lēēque lēē zho rlozhd guṅniats zho por grē zhiwseed zho. <sup>19</sup>Led yed zho ngab lo Jesús, men ne rnabey lo ne grēse ne ne nac ne zha ne ngab lo me. Tel ne, me racnieṅ ne, tipse noyun me ne, laa ne noyabiiniraa zigne racladz Dios.

<sup>20</sup>Zeeṅe sca gut Jesús, gataa bnitlo me grētaa miṅe nac to glo, gane niina ngadoodraa to lo grē ncuaane zienal grēraa miech guidzliu. ¿Pe nac dzigo ne bii zienal to grē miṅ co? <sup>21</sup>Zig nac grē miṅe rnabey zho to, rnee zho: “Nod gon yquiin to ncuaan rii, nod gow to miṅ rii, gacd ygaal to ncuaan rii.” <sup>22</sup>Ncuaane tib rded nac grē ncuaane qui, zig nac guielwagw led ncuaane gdiid ga, grēse wseed qui miechse bleebeya. <sup>23</sup>Parga nli na zootle nixbiini nac grē wseed co, sac rioxco zho dien zha tsiegan zho grē anjl, rac

ndooladz zho lo miech, ni rsacsi zho xcuerp zho; per rrieełod grē ncuaan co ctsēēw xpensar zho, zdoo zho, parne gnabey zho xcuerp zho.

### 3

<sup>1</sup>Golguien ganle, stible guielmban rap to niina, lēē guielmban co bgaa to zeene brieēban Jesús; gacxe waa, gołsoxco ygaa to grē guielnzaac ne no gbaa, zaatne zob Jesús cue Dios nēz derech. <sup>2</sup>Grē guielnzaac ne no gbaa miṅ co gołconie guic to, led grēd ncuaane no lo guidzliu rii; <sup>3</sup>sac gon, rrieequia gutle to lo grē ncuaane no lo guidzliu rii, laa to mbanniele Jesús, zigne racladz Dios. <sup>4</sup>Laa ne rdziaap tib guielmban cub niina, sacne nacnie ne Jesús; gal dze ne laa me guiaad stib, laa ne no gdziṅ lo me gban ne zaatne nac lo xquielndzon me.

*Zha gban zha ne rliladz Jesús*

<sup>5</sup>Gacxe nana sca, gołsaan grētaa guielntseeb ne run miech lo guidzliu rii: tsoniede to zha ne led tsielde to, gunde to grē ncuaane mbeeguelto, gdeete to diidz gnabey xcuerp to to, gunde to ncuaane ndzinlid ne racladz to, ni gacblēde to lo dimi (sac tel scaw, dzigo dimi rsaṅ to xługar Dios).

<sup>6</sup>Grē doł rii run grē zha ne nēd gon xtiidz Dios, lozh ga lēē miṅe tsieguial zho laa zho

yгаа lo guie|zi ne csiaab Dios.  
<sup>7</sup> Zig nac to, grē min co been to glo; <sup>8</sup> san|gue niina, none csaan tow, ni lalnu: glēeniedraa to samiech to, sobzhiandraa to, gundraa to guie|ntseeb, gneenēdraa to samiech to, gneedraa to diidzguidz, <sup>9</sup> yquidiedraa to samiech to. Sac gon, nacdraa to zigne nac to glo, laa to brielee lo grētaa mine been to. <sup>10</sup> Stible nac lo xquie|mban to niina: tib miech cuble nac to, ni laa to bii nodzēē haxta que ne gac to zigne racladz Dios men ne psan miech, zeena scagaa lozh gunbey to zha nac me. <sup>11</sup> Zha ne bgaale guie|mban cub rii, led yedraa zho cue dien cho zha nac zha Israel, dien cho zhagaa nac zha zit; dien cho no bey, dien cho nodgaaw; dien cho ziaad guiedz nroob, dien cho ziaadgaa guiedz win; dien cho rac, cho gacdgaa; dien cho run xtsiin ben, dien chogaa nac zha rnabey. Mine rquiinraa niina, nacne grēse zho guien ganle Jesús nac men ne mazdraa non, me none gnalo zho.  
<sup>12</sup> Golgan ganle, zha nquialadztaa Dios to, ib laa me ble to gac to miech ne ygab xnēz me. Zaacse sca golban, ne nli-paa dib zdoo to: golquia zdoo samiech to, niowse golgac lo samiech to, ndooladz golgac lo samiech to, nguudzladz golgac lo samiech to, guieedniede to samiech to.

<sup>13</sup> Guieedniede to samiech to, ni zeene cho zha run pe tib falt lo to, golgun zho perdon. Golguien ganle zha been Dios to perdon; scaque to, none gun to samiech to perdon.  
<sup>14</sup> Ni mine mazdraa none tsoxco to, golleynie zha ne nacgrē to zigne racladz Dios, zeena tipse gac to; ni scagaa gleynie to grēraa samiech to.  
<sup>15</sup> Jesús nac men ne ctiche grētaa ncuane ndzinlid ne no zdoo to, zeena niowse gbannie to samiech to. Lēē tib guie|nzaac co no yгаа to ne laa Dios bredz to, ni scagaa none gban to, zeena tipse gac to grē to. Golsoladz goldeed xquizh lo me.

<sup>16</sup> Niapse mine nac Xtiidz Jesús golconie guic to, golco zdoo to. Golquiin grē guie|biini ne rneedz me lo to, golseed grē zha ne nacgrē to, ni zha ne rxin, golnee lo zho zaacse gac zho. Dib zdoo to goldeed xquizh lo Dios por grētaa mine run me, ine golgoolnie me grē salm, golgoolnie me grē cant ne rdzoolnie ne me. <sup>17</sup> Ncuane guntaa to, niicle zeene gnee tow, zeene gungaa to tib dziina, golguna zigne rdziladz Jesús, men ne rnabey ne; ni tibaque goldeed xquizh lo Dios men ne nac Pxoz to, niina ne laa to ngable lo Jesús.

<sup>18</sup> To ne nac to men wnaa ne ptsieelniale, golgon xtiidz tsiel to, sac ible sca nonguiel gban miech ne no xnēz Jesús.

<sup>19</sup> To ne nac to men bgui ne ptsieelniale, golleynie tsiel to; gacnchogde to lo me.



<sup>20</sup> To ne nac to mēēd, golgon miñe rnee pxoz to, miñe rnee xnīaa to, sac sca rdziladz Dios.

<sup>21</sup> Togaa ne nac to men nguzan, gunde to ncuaane gunḡlēē to xpēēd to, zeena csande to zdoo zho.

<sup>22</sup> To ne nac to zha ne lega run xtsiñ beñ lo guidzliu rii, golgun grēse miñe rnabey zho to; gunde to zeene zose zho lo to dzigose yquiaalo to gun to dziin, zeena guianzīuu to lo zho; sinque dib zdoo to golgun xtsiñ zho, golguien ganle Dios zobwi ran me pe run to. <sup>23</sup> Grēse dziin ne gun to, ine nguieel golgac golguna, zig nac zeene xtsiñzhal Dios noyūn to. <sup>24</sup> Benque nanle to, zgaa to miñe gdeed Dios lo grē zha ne ngab lo me, telne gon to diidz; sac gon Jesús nac men ne nlipaa rnabey to, ni lo me quia to dziin. <sup>25</sup> Golgon diidz sca, sac zha ne gonda, ib tedsod zdeed Jesús miñe tsieguial zho; sac gon, tel me led yed lo me ncuee miech.

#### 4

<sup>1</sup> Togaa ne nac to zha ne quia miech xtsiñ, zaacse golgac lo zho, csacside to zho. Golsoladz ganle, ye to tib ngundziin nac to lo men rnabey ne zob gbaa, ni me zobwi ganle pe run to.

*Gnab zho gacniñ Dios Pabl*

<sup>2</sup> Bets, bzian, tel petaa rzac to tibaque golzodiidznie Dios, nsin golso, goldeed xquizh lo me. <sup>3</sup> Golnab lo me gacniñ

me no, grieelo ziaab no zatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por miñ co znu nioogyu naa nu. <sup>4</sup> Golnab lo me gneedzraa me guielbiini lo naa, zeene cseed naa miech xtiidz me, guien zho miñe rne naa; gun naa dziin co zigne no gun naaw.

<sup>5</sup> Golquiiñ guielbiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me. <sup>6</sup> Golguien tib godiidz ndzinli, tib godiidz niowse, miñ co golzodiidznie zho, ni none guien to zha ctsire to lo xtiidz zho tib tib zho.

<sup>7</sup> Laa bets ne Tic guiaad i, me guiaadnie diidz lo to ganle zha no naa nu. Rleynie no me, tibaque laa me noxco quiadziungza no me xtsiñ men ndzon ne rnabey ne. <sup>8</sup> Ga nagon laa naa rxel me, me gnē lo to ganle zha no no nēz rii, ni gnee me lo to zeena cchoobladz me zdoo to. <sup>9</sup> Ye menladz to Onésimo guiaadgrop me. Rleynie no Onésimo, ye me tibaque noxco me xtsiñ men ndzon ne rnabey ne. Grop zho guiaadnie diidz i ganle zha nac grē ncuaane quiaayac nēz rii.

<sup>10</sup> Golcaania zhibdiuzh Ristarc, men ne nioogyunie naa nu, zhibdiuzh Marcw betsyen Bernabé (laa naa

nile lo to ganle, telne laa Marcw guiaadgan to i, niowse golcuézlo me); <sup>11</sup> ni zhibdiuzh Jesús, tib men ne rneeque zho Just. Lo grë zha Israel ne riladz Jesús, lëese gza zha rii nac zha ne quiayun xyudar naa quiaseed no miech zha sëeb zho xnëz Dios, ni blactaa zichoobladz zho zdoo naa.

<sup>12</sup> Golcaania zhibdiuzh menladz to Epafri, ye me quiayun xtsiin Jesús nëz rii; tibaque rzodiidznie me Dios rnab me dziits so to lo Xtiidz Jesús, ni tiblique gac guic to tsoxco to gban to zigne rnabey Dios. <sup>13</sup> Nanpaa naa ganle pa lotaa nonie to guic me, grë to zha Laodicé ni zha Hierápolis.

<sup>14</sup> Golcaania zhibdiuzh Demas ne, ni zhibdiuzh Luc men ne run rmed, lëe stib men ne nziuu lo no nu.

<sup>15</sup> Goldeed tib zhibdiuzh no lo grë zha ne no guiedz Laodicé, zha ne nacgrë ne. Goldeed zhibdiuzh no lo zhuz Ninf, ni lo grëraa zha ne rcaalsa lidz me i, riegoalnie zho Dios.

<sup>16</sup> Zeene gon lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho. <sup>17</sup> Ni golguiab lo Arquip, tsoxco me zaacse gun me dziin ne bdeed Dios lo me i.

<sup>18</sup> Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

# GUILTS NE GLO PXEEĽ PABL LO ZHA TESALÓNICA

¡Diuzh to grēse to!

<sup>1</sup> Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grēse to ne nac to zha ne ngable lo Jesús, meñ ndzon ne rnabey, ni lo Dios meñ ne nac Pxož ne.

Dios ni Jesús, me glu ganle pa lotaa noxco me to, zeena peet zhgab ctsebde to.

<sup>2</sup> Tibaque rdeed no xquizh lo Dios meñ ne nac Pxož ne, squitaa rneedz me guielbiini lo to; gzobtaa zeene rzodiidnie no me rzeet no to lo me. <sup>3</sup> Ni zeene rzeet no to lo me, rsoladz no grētaa dziin ne ruñ to niina ne dib zdoo to rleynie to me, ni zha quialēb to lo grētaa guielnē ne noyan to, tibaque nonie guic to ne ible zdziñ dze ne laa Jesús guiaad stib.

<sup>4</sup> Bets, bzian, rleyniedox Dios to, ni ndion ne ganle me bzooblo to ygab to lo me.

<sup>5</sup> Zeene biaad no biadseed no to Xtiidz Ndzon Jesús, znuse ptsēew lo xquielmban to, sac gocnie Espíritu Sant to bien to ganle niapse diidzli nac grē diidz ne nonee no lo to; scagaa no, goñ to ganle zha mban no, ga blu ne nli diidzli nac grē mine noseed no miech. Ni gołsoladz ganle zha biaad-bannie no to i, bdzioxco no

bdziuuñ no xyudar to, sac ne nligaa rleynie no to.

<sup>6</sup> Scagaa to, pseed to wban to zigne mban no, ni zigne wban meñ ndzon ne rnabey ne. Laa to pcaania xtiidz me, blozh ga, niicle nroob guielnē ne bded to, per bneedz Espíritu Sant guielbley lo to, ib peet güeynied guic to.

<sup>7</sup> Grēse zha ne riladz Jesús nēž Macedon, nēž Acay, zeene bin zho zha mban to, yeque zho laa zho pseed mban zho zigne mban to. <sup>8</sup> Ni ne squi ndzinli mban to, nzianraa zaatne rzeet miech Xtiidz Ndzon Jesús, led loxaque gropdse lugar rii. Zaatne ziotaa no, zhoob diidz ne squitaa dib zdoo to riladz to Dios, rquiindraa ne no gzodiidza lo zho. <sup>9</sup> Zhale rzodiidz grēse zha biaad no lo to i, zha scataa niow blēzlo to no leñ dze co, ni zha psaan to grē zhiwseed xmenğol to, grē ncuaañe nac mdio lo to, laa to bliladz meñ ne nacpaa Dios ne nguiamban, ni laa to zienal mine rnabey me. <sup>10</sup> Ni rzodiidz zho zha zienie guic to ne ible zdziñ dze guiet Jesús gbaa guiaad me stib, ni quiambēz to gdziñ dze co. Xpēed Dios nac Jesús, Dios bleeban me lo guielgut, ni me psilaa ne lo guielnēdox ne ziaadyob guiaad.

## 2

### Zha güeyseed Pabl zho

<sup>1</sup> Bets, bzian, nanle to ganle zeene biaad no lo to i biaad-zhlēd no, brieelo pseed no to.

<sup>2</sup> Niicle ne wriiñ psacsi zho no

guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacie no. <sup>3</sup> Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to. <sup>4</sup> Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziun no. Nli nzian zha ne rlëeniew, per laa no bii rdziun dziin co; sac zionald no gac mine rdziladz miech, sinque laa no zional gac mine rdziladz Dios, men ne nan ganle pe rza zdoo ne.

<sup>5</sup> Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziun no min co. <sup>6</sup> Wlaltaa ib bguibd no dien zha niacnon no lo miech, niicle lo tow, niicle lo stibgaa miecha. <sup>7</sup> Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne rleynie men wnaa xpëdyeen me, nda nda ran me win; scadaa bleynie no to, <sup>8</sup> bio no bdzioxco no pseed no to Xtiidz Dios. Ne nlipaa bleynie no to, telne niaca mine niedzina haxta mbeeladz no no niët no por to.

<sup>9</sup> Bets, bzian, rsoladzaxe to ganle ni lalnu ib psodziind no to; blactaa, dze guieel bdziun no dziin, nozhal bdziniaa ncuaane pquiin no len dze ne biadseed no to. <sup>10</sup> Dios zobwi ran me

ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziun no ncuaane mbee no diidz ro miech, sinque laa no bdziun mine rdziladz Dios. <sup>11</sup> Masaque rziac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to; <sup>12</sup> pso no diidz lo to zaacse gac to, gban to zigne no gban zha ne no xnëz Dios, men ne bredz to gdzin to lo xquielndzon me, zaatne rnabey me.

<sup>13</sup> Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaane bleebey miech. Ni nligaa Xtiidz Diosa, gacxe waa zha ne riladza zigne rzac tow niina, rzhixcuaa lo xquielmban zho. <sup>14</sup> Per zeene laa to bliladza, laa menladz to psacsi to; bded to zigne bdedaque grë zha Israel ne riladz Jesús, sac tel zhaw psacsi menladz zho zho. <sup>15</sup> Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho benxoon no. Ncuaane rbinladz Dios run zho, rlëenie zho grëse miech, <sup>16</sup> rtsidil zho pe nacne nonee no lo grë zhazit zha laa zho lo dol. Loxaque quiayunctalraa zho xtol zho, per, iprobsaxe zho,

sac guielnēdox ne ziaadyob cxeel Dios yгаа zho!

*Racladz Pabl tsiegan Pabl zho stib*

<sup>17</sup> Bets, bzian, nli gard dzianlolsa ne wlal ne wbii no i, per tibaque rsoladz no to; blactaa rnee no tel<sub>paa</sub> zha guiaaddzian no to. <sup>18</sup> Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnēz no pasēe no niaad. <sup>19</sup> Guiabde to togo quiaa<sub>an</sub>ladz no to, sac gon to rnalo no conley zdoo no gal dze ne laa Jesús guiaad stib. To glu nli bdziun no xtsiin me, to glu ne nli riogual no yгаа no premio ne gneedz me. <sup>20</sup> Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziun no.

### 3

<sup>1-2</sup> Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no biaan guiedz Aten. (Nanaxe to ganle ye Timoté nacgza no quiadz-iun no xtsiin Dios, quiaseed no miech Xtiidz Ndzon Jesús.) Laa no pxeel me bиаadgan me to, biadchoobladz me zdoo to, biadnee me lo to lozh sodziits to lo Xtiidz Dios; <sup>3</sup> zeena niicle tel pe guielnē ne noyanta to, ib guiaand zdoo to. Nanle to ganle grēse ne ne rliladz ne Jesús, ib laa ne no dzian guielnē. <sup>4</sup> Led rsoladz to zeene biaad no i, bneegazh no ne ib laa ne no

dzian guielnē; ni gon to ganle csase goca.

<sup>5</sup> Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to mine nac Xtiidz Dios; sac ni naa nend pquuil mendox to biire zienal to ncuaane rnabey ma, dzigo zhlēse biadseed no to.

<sup>6</sup> Laa niina ne laa Timoté blanso nu stib, blansonie me diidz, nē me niowse mban to, rleynie to grē zha ne nacgrē to, dib zdoo to rliladz to Dios. Ni nē me rleynie to no, ye to racladz tebaa zha gan to lo no, zigne rziaa<sub>aca</sub>que no.

<sup>7</sup> Min co nagon, bets, bzian, niicle ne nroob zhgab, nroob guielnē ne nodieed no nu, haxta biaanladz no grē ncuaan co zeene gocndion no dziits zo to lo Xtiidz Dios, mine rliladz ne. <sup>8</sup> Haxta stib goc zdoo no bdzion no squi tiblīque laa to rleynie men ndzon ne rnabey ne; <sup>9</sup> ni rdzieldraa no diidz ne gnee no gdeed no xquīzh lo Dios por to. Ni ne znutaa bloonley to zdoo no, haxta Dios ran ganle pa lotaa rley no. <sup>10</sup> Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grēraa mine no gacnan to lo Xtiidz me.

<sup>11</sup> Dios men ne nac Pxo<sub>z</sub> ne, ni Jesús men ndzon ne rnabey ne, me gacnien no grieelo guiaaddzian no to. <sup>12</sup> Jesús gacnien to tsaaraa to biini, zeena gleynieraa to grē zha ne nacgrē to ni grēraa samiech to, zigne rleynie

no to. <sup>13</sup> Ni rnab no lo me, gacniē me to tiblīque gac to lo Xtiidz me, zeēna inē mbe zdoo to, ni tib dol rapde to zeēne laa me gzo to lo Dios men ne nac Pxoz ne, gal dze ne laa me guiaad stib con grē zha ne nacie me.

#### 4

##### *Guielmban ne rdziladz Dios*

<sup>1</sup> Zig zobwi Jesús men ndzon ne rnabey, laa no rso diidz lo to: zige zie dze gołtsoxcora gban to zigne rdziladz Dios, <sup>2</sup> beñque nanle to zhaw, sac lēē miñ co bnabey Jesús no biadseed no to guñ to. <sup>3</sup> Sac goñ, laa Dios racladz mbe guiaan to lo me, gunde to guielyozh yquiāngob to zha ne led tsieelde to.

<sup>4</sup> Grē zha bgui, zeēne laa zho gnee lo tsieel zho, none niowse ndzinli gac zho; <sup>5</sup> gund zho zigne run grēraa miech ne nand zha nac Xtiidz Dios; sac tel zha co, rzac zho loxaque par gdeedse guxt xcuerp zho, miñcose rquiin wnaa. <sup>6</sup> Niicle yquiāngobde to tsieel sabgui to; sac zha ne sca run, sabgui zho ga rguītnie zho; ni dol co ible tedsod zunquīzh Dios zhow. Gołsoladz ganle psole no diidz rii lo to glo, ni na laa no rneequew stib. <sup>7</sup> Golguiē ganle, bredzdaxe Dios ne waa parne dziuun ne grē guielyozh, sinque laa me bredz ne gban ne zigne racladz me. <sup>8</sup> Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha

ne ngab lo me) noguiits zho, led xtiidz cholze samiech zhow.

<sup>9</sup> Laa zig nac guielwleynie, nanle to zha no gleynie to grē zha ne nacgrē to. Rquiind cso no diidz lo to dien zha guñ to, sac Dioszhal pseed to zha gleynie to zigtaa zha ne nacgrē tow, zigtagaa grē samiech tow. <sup>10</sup> Zig nac grē zha bets ne, zha bzian ne, zha ne no xtan zha Macedon, zēēb diidz rleynie to grē zha co. Gołtsoxco sca, golleynieraa samiech to.

<sup>11</sup> Ni stib mine rso no diidz lo to: niowse gołbannie samiech to. Mine nac xtsiin to tib tib to, miñ co gołtsoxco, tozhal gołdzinia ncuane yquiin to; <sup>12</sup> zeēna peet gunfalte lo to, ni scagaa grē zha ne gard gliladz Xtiidz Dios, haxta gzee zdoo zho gan zho zha mban to. Gołsoladz ganle psole no diidz rii lo to glo.

##### *Ib ziaad Jesús stib*

<sup>13</sup> Bets, bzian, nu na ganle laa naa gzodiidz lo to zha gac grē zha ne ret, zha ne ngable lo Dios; zeēna tsođe to guielnē zig rzac grē miech ne gard guien gnalo Jesús.

<sup>14</sup> Ne, ne dib zdoo ne rliladz ne nli gut Jesús ni bleeban Dios me; scaquegaa none gliladz ne ible zbeeban Dios grēse zha ne dib zdoo rliladz Jesús, zeēne laa Dios cxeel me guiaad me stib. <sup>15</sup> Golgacnan sca ganle, znu goñ nac xtiidz me: Grēse zha ne ngab lo me, zha ne bii zomban gal dze co (gal dze ne guiaad Jesús)

tednerd zho lo grē zha ne gutle. <sup>16</sup> Zeene laa me quiet gbaa, redz ro ne yquia, zlu zēēb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me quiet gbaa, laa grē zha ne ngab lo me, zha ne gutle, laa zho grieegan. <sup>17</sup> Dzigo tipse gac zho grē zho zha ne bii zomban ga, laa zho soquia laglaa lo xcow tsiedzieelo zho me; dzigosi gdziṅdraa dze ne gbiche zho lo me.

<sup>18</sup> Nana sca mine rne naa nu, golṣodiidza lo grēse zha ne nacgrē to; zeena conley to zdoo zho.

## 5

<sup>1</sup> Bets, bzian, nana par gni naa lo to dien pe guidze te guieel guiaad me, choot ndionda. <sup>2</sup> Golgacnan ganle, lega nacle zeene gan miech laa me ziaadle, zig nac zeene rzēēb ngbaan yu guieel, ¿cho dien nanpaa pa hor sēēb ngbaan? <sup>3</sup> Zeene laa grē miech guiab: “Nasi wen ndxie ne, peet guielxtseeb nodraa”, tibaque zeene guien zho laa dze ne nitlo zho bdziṅle, ni gasi grieelodraa cho csilaa zho. Sac zig znuse rnaaz yoob men wnaa ne bdziṅle dze gap xpēēd; scadaa gdziṅ dze co.

<sup>4</sup> Saṅue to, bets, bzian, nacdrea to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziṅ. <sup>5</sup> Miech ne nole lo xbiini Dios nac to, niini zo to; nacdrea to zha ne

no glowtaa guieel, zha ne no lo ncow; <sup>6</sup> gacxe nagon waa, niini golṣo, tsienalde to mine run zha ne zienal guielntseeb; sac nac grē zha co zig nac zha ne nixguies, tibaque guieel no zho. <sup>7</sup> Sac tel guieela, guieel raaguies miech, niicle zha ne rzuudzgaaw guieel rzudz zho. <sup>8</sup> Saṅue ne ne nac ne zha ne niini zo, none guien ne pe nac ncuaane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaane racw menguiib lo grē ncuaane gnitlo zho; ni csoladz ne ganle laa Dios psilaale ne lo guielgut, gotsaa ziaac new zig rzac menguiib pchog ne rzob guic zho rsi-laaw zho lo guielgut. <sup>9</sup> Sac gon bredzdaxe Dios ne waa yгаа ne guielnēdox ne no guiaad, sinque laa me bredz ne csilaa me ne lo guielnē co. Ni lēē min co rac zeene laa ne rliladz Jesús. <sup>10</sup> Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

<sup>11</sup> Nana sca, tib tib to golṣeed xfuers zha ne nacgrē to, niapse diidz ne gun xyudar zho choobraa zho lo Xtiiidz Dios, min co golṣee lo zho; zigne quiaayunaque to niina.

### *Rso Pabl diidz*

<sup>12</sup> Bets, bzian, laa no rso diidz lo to: Niowse golṣac, niowse golṣee lo grē zha ne pso Dios noyun xtsiin me lo to, zig nac zha ne zo lo to, zha ne rnee lo to zha no gban to.

13 Gol<sub>g</sub>uien gan<sub>le</sub> cho nac zho, gol<sub>l</sub>eynie zho, sac gon<sub>l</sub> led lega nacd dziin ne quiayun<sub>l</sub> zho lo to. Gol<sub>s</sub>oladz sca: ¡Zaacse gol<sub>b</sub>an, til<sub>n</sub>iede to samiech to!

14 Tel<sub>l</sub> cho zha ne nacgrë to i, rsilo quiayacgbech, gol<sub>g</sub>actox lo zho, zeena<sub>l</sub> guien zho gun<sub>l</sub> zho dziin. Grë zha ne quiasaan Xtiidz Dios, gol<sub>n</sub>ee lo zho zeena<sub>l</sub> gleynie zhow stib; grë<sub>g</sub>aa zha ne gard tsoguicpaa zha naca, gol<sub>g</sub>un<sub>l</sub> xyudar zho tsoguic zhow; niicle grëragaa zha ne nacgrë tow, ib guieedniede to zho. 15 Gol<sub>g</sub>uien tel<sub>l</sub> pe guie<sub>l</sub>ntseeb ne run<sub>l</sub> miech lo to, guiabde to ne scaque gun<sub>l</sub> to zho; sinque mazd gol<sub>t</sub>soxco tibaque niowse gol<sub>g</sub>ac lo grëse miech, niicle lo zha ne nacgrë tow, niicle lo grëragaa miecha.

16 Tibaque nley gol<sub>l</sub>co zdoos to.

17 Tibaque gol<sub>z</sub>odiidznie Dios.

18 Gol<sub>l</sub>deed xquizh lo Dios, niicle zeene<sub>l</sub> noyan<sub>l</sub> to guie<sub>l</sub>nëw, zeena<sub>l</sub> nogaa to guie<sub>l</sub>bleya, sac sca racladz me gun<sub>l</sub> grëse zha ne no xnëz Jesús.

19 Gol<sub>q</sub>uiaadiag mi<sub>n</sub>e rnee Espíritu Sant lo to, ni gol<sub>g</sub>una.

20 Gol<sub>q</sub>uiaadiag mi<sub>n</sub>e rnee grë zha ne rnee grë diidz ne rsiaab Dios guic zho; 21 wen wen gol<sub>w</sub>i dien<sub>l</sub> pe nac mi<sub>n</sub>e rnee zho, dzigo mi<sub>n</sub>e rzac to rquinraa lo to, mi<sub>n</sub> co gol<sub>l</sub>seed.

22 Gol<sub>b</sub>iche lo grëse guie<sub>l</sub>ntseeb ne no.

23 Dios, men<sub>l</sub> ne rtiche grëse dzeb, grëse zhgab, mezhal csa<sub>n</sub>mbe to lo grëtaa guie<sub>l</sub>ntseeb; dib nace to (zhiespíritu tow, xalm tow, xcuerp tow) zeena<sub>l</sub> ni tib dol<sub>l</sub> rapde to gal<sub>l</sub> dze ne laa Jesús men<sub>l</sub> ndzon ne rnabey ne gbiire guiaad stib. 24 Me bredz to, ni mesi run<sub>l</sub> me mi<sub>n</sub>e rnee me, gane ndion<sub>l</sub> no ne ib zun<sub>l</sub> me mi<sub>n</sub> rii.

25 Grëse to bets, grëse to bzian, laa naa rnab lo to gol<sub>s</sub>iguie<sub>l</sub> gol<sub>n</sub>ab lo Dios gacnien<sub>l</sub> me no.

26 Gol<sub>l</sub>caania zhibdiuzh no i, ine gol<sub>x</sub>en<sub>l</sub> nia grë zha ne nacgrë to, gol<sub>l</sub>lu ne nli rleynie to zho.

27 Men<sub>l</sub> ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

28 Jesús, men<sub>l</sub> ndzon ne rnabey ne, me glu lo to gan<sub>le</sub> pa lotaa noxco me to.

Pabl



# BROP GUITS NE PXEEL PABL LO ZHA TESALÓNICA

¡Diuzh to grëse to!

<sup>1</sup> Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

<sup>2</sup> Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

<sup>3</sup> Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to rliladz to Xtiidz me, ni rleynieraa to samiech to. <sup>4</sup> Zaatne rdziinta no lo grë zha ne nole xnëz me, ne nligaa rley no rzodiidz no lo zho zha squitaa dziits zo to, tibaque dib zdo to rliladz to me niicle maase rtsidil miech to, niicle maase nroob guielnë ne quiaded to.

<sup>5-6</sup> Nli nroob guielnë noyan to, per scagaa laaw noyan to zeena tsieguial to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zгаа zho guielnëdox ne csiaab me.

<sup>7</sup> To ne nac to zha ne quiaded grë guielnë qui, golgona ganle, gal dze ne

quiet Jesús gbaa guiaad me stib, ible zгаа ne descans ne gneedz me. Gal dze co, laa me quietnie grë xanj me, zha ne rapraa poder; <sup>8</sup> masaque tib beldox ne quietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me. <sup>9</sup> Grëse zho laa me gnabey guey zho lo guielnëdox, zaatne gdziñdraa dze griee zho. Lëe bichele zho lo me ga, ib gdziñd zegañ zho lo xquielndzon me, gangaa zho grëtaa poder ne rap me. <sup>10</sup> Dze co, grëse zha ne no xnëz me laa zho goolnie me, gunnon zho me. Grëse zho see zdo zho gan zho me; ye to gacgrë zho, sacne bliladz to Xtiidz me miñe biadseed no to.

<sup>11</sup> Gacxe waa, tibaque laa no quianab lo Dios gacniñ me to griee lo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena griee lo gun to grëse ncuane rquiabladz to, zeena grieequia grëse dziin ne quiayun to porne rliladz to me. <sup>12</sup> Zeena sca cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

## 2

### Ziaad Jesús stib

<sup>1</sup> Bets, bzian, ib laa Jesús men ndzon ne rnabey ne no

guiaad, ni laa ne gbannie me. <sup>2</sup> Zeene gon to laa miech gnē laa dze co bdzinle, niicle gnē zho Espiritu Sant bneew lo zho, gangaa to palo nonee zhow zaatne ndxie nzian miech, o cxeel<sub>g</sub>aa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to. <sup>3</sup> Ib gdeete to diidz yquidie zho to. Sac gon ansraa ne gdziñ dze co, ib none grieequia grē miech ne gacntseeb lo Dios; lozh ga, laa tib mgui ne nacie men<sub>d</sub>ox grieequiaque, zacntseeb me lo Dios, per gabıl ga nitlo me.

<sup>4</sup> Lēē zha co ctsidıl grēse zhiwseed Dios, grēse ncuaañe naclay lo miech; ni haxta zie zho ziesob zho zaatne nac len xyadoo Dios, guiab zho zhā nac Dios. <sup>5-6</sup> Per no tib men ne notse lo zho niina, laga gdziñ dze ne laa zho guiaad. Go<sub>s</sub>oladz ganle, blactaa bzeet naa miñ rii lo to len dze ne blēz naa i. <sup>7</sup> Grēse ncuaañe no guic zha ntseeb co guñ zho, laaw rsilole; loxaque runfalt gdeed men ne notse lo zho ga diidz guiaad zho. <sup>8</sup> Zeene laa zho guiaad, hor co laa Jesús guiaadaque con grē xquiel<sub>nd</sub>zon me, dzigo me ne grieese ro me gloozh me zho, gnitlo me zho.

<sup>9</sup> Masaque men<sub>d</sub>ox gnabey zha ntseeb co, niapse xpoder ma gap zho, nzian ncuaañe glu zho; zuñ zho grē ncuaañe gzee zdoo miech, per led ncuaañe nlida. <sup>10</sup> Zuñ zho grē ncuaañe lozh yquidie

zho grē zha ne nole nēz ne nitlo, zha ne ib bzhiguiel<sub>d</sub> nliiladz miñe nac diidzli. Tel niaca miñe nliiladz zhow, nleynie zhow, nsilaa Dios zho. <sup>11</sup> Saan Dios tsienal zho grē ncuaañ co, ni zliiladz zhow zig nac zeene diidzliw; <sup>12</sup> per ib siaabzi Dios zho, sac laa ne gliladz zho miñe nac diidzli, lel mazdraa gleynie zho grē guiel<sub>nt</sub>seeb.

### *Zha ne bdedlaale lo dol*

<sup>13</sup> Bets, bzian, gol<sub>g</sub>uien sca tibaque gol<sub>g</sub>otsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to g<sub>l</sub>iladz Xti-idz me, miñe nac diidzli, laa Espiritu Sant csañmbe to lo me. <sup>14</sup> Miñ co nagon nacne pxeel me no biadseed no to xtiidz me, guien to zha laa to lo dol; zeena gdziñ to zaatne nac lo xquiel<sub>nd</sub>zon Jesús, men<sub>d</sub>zon ne rnabey ne. Gacxe waa, zha nziuu nac to lo me.

<sup>15</sup> Gol<sub>g</sub>uien sca, dziits gol<sub>so</sub>, ib csaande to grē miñe pseed no to len dze ne biaad no i, niicle miñe rneegaa no lo to lo guits ne rxeeł no. <sup>16-17</sup> Ni Jesúsaque, men<sub>d</sub>zon ne rnabey ne, ni Dios men<sub>d</sub> ne nac Pxoz ne, me gneedz xfuers to dziits so to; zeena grēse miñe gnee tow, miñe guñ tow, wen grieequiaw. Me blu ganle pa lotaa rleynie me ne, laa me bneedz tib guiel<sub>bley</sub> ne gdziñd dze lozh lo ne, ni psañ me diidz pe nac miñe naraa no ygaa ne. Ga rlu ganle pa lotaa noxco me ne, niicle ne rioguiel<sub>d</sub> new.

## 3

<sup>1</sup> Bets, bzian, nu ne laa no csiaalle, laa naa rnab lo to goḷnab lo Dios gacniēn me no, zeena znuse znuse diiz no Xti-idz Ndzon men ne rnabey ne; ni zha ne gontaaw, guien zho ycaania zhow zigne pcaania tow. <sup>2</sup> Ni goḷnab lo me csilaa me no lадznia grē zha ntseeb, zha ne ruḷ miḷe notaa guic; sac goḷ led grēd miech rliladz Xtiidz Dios.

<sup>3</sup> Dios men ndzon ne rnabey, miḷe rnee me ruḷ mew; gacxe waa, ible zacniēn me to dziits so to lo Xtiidz me, ni squianap me to tsobede to lадznia menḍox. <sup>4</sup> Ndion no ne me noyacniēn to noyuḷ to grē miḷe pso no diidz lo to, ni scagaa me gacniēn to bii guḷ tow. <sup>5</sup> Me gacniēn to grieelo gleynie to samiech to zigne rleynie Dios ne, ni guiuude to lo guielnē, sinque golgac zigne been Jesús.

*None guḷ zho dziin*

<sup>6</sup> Bets zig zobwi Jesús, laa no rso diidz lo to: Teḷ cho zha ne nacgrē to i, nēdraa yquia dziin gdziniaa zho ncuaane gow zho, ib ctsieelsade to zho; sac goḷ pseete no to miḷ co. <sup>7</sup> Teḷ no, goḷ to ganle zha wban no zeene bliiaz no lo to i; ni sca goḷ none gban to. Ib bdeddzed no, <sup>8</sup> biod dze ne lega ndioow zhlē no xcuuḷ miech, blactaa haxta guieel bdiuuḷ no dziin bdziniaa no pe pquiin no; ib psodziind no lo to. <sup>9</sup> Niicle ne ib rieguiāl nab no lo to needz to ncuaane nquiin no, per choot peet bnabd. Miḷe bdiuuḷ

no pquiaa no dziin bdziniaa no pe pquiin no, par gaḷ to ganle zha nonguiel gban to. <sup>10</sup> Led rsoladz to len dze ne bliiaz no i, pso no diidz rii lo to: Zha ne nēd guḷ dziin, scagaa nodne gow zho. <sup>11</sup> Laa niina laaw rzetaque naa stib, sac zidzion no no bla zha ne nacgrē to i, mbe ruḷdraa zho dziin scase quiaded dze zho; loxaque nēzrii nēzrec no zho rzēeb zho lo grē ncuaane rieguiāld zho. <sup>12</sup> Zig zobwi Jesús men ne rnabey ne, laa no rso diidz lo zha ne sca ruḷ: none guḷ zho dziin gdziniaa zho ncuaane yquiin zho.

<sup>13</sup> Bets, bzian, ib guieete to, tibaque goḷtsoxco goḷguḷ niapse grē ncuaane yquiin lo samiech to.

<sup>14</sup> Teḷ cho zha ne nacgrē to i nēd gon diidz gban zho zigne rso no diidz nu, goḷwi dien chow, dzigo ctsieelsadraa to zho; zeena sca ctoladz zho. <sup>15</sup> Per guḷde to zho zig ruḷ zha ne rlēenie samiech, sinque goḷnee lo zho gac-wen zho; goḷguien ganle bets to grē to.

<sup>16</sup> Jesús nac men ne rtiche grēse zhgab, grēse guielxtseeb, me cuee to lo grēse zhizhgab to, lo grēse guielxtseeb gzataa dze. Me gacniēn to grēse to.

<sup>17</sup> Naa goḷ nac Pabl, naazhal pquia bdiuzh rii rxel naa lo to; naazhal pquia lē naa nu. Golgaḷ ganle lēē xletr naa nu.

<sup>18</sup> Jesús men ndzon ne rnabey ne, me gacniēn to, me glu lo to ganle pa lotaa noxco me to.

Pabl

## GUILTS NE GLO PXEEL PABL LO TIMOTÉ

¡Diuzh Timoté!

<sup>1</sup> Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios men ne psilaa ne lo dol, ni Jesús men ne rnalo ne, me bnabey quiayun naa dziin rii.

<sup>2</sup> Laa naa rxeel guits rii lo luu, rzaac naa luu zig tib xpëed naa ne squi dib zdoo luu riladz luu Jesús. Dios men ne nac Pxoz ne, ni Jesús men ndzon ne rnabey ne, me yquia zdoo luu, me tsoxco grë zhizhgab luu zeena peet tsienied guic luu. Min co racladz naa, ni min co rnab naa lo Dios.

<sup>3</sup> Zigne psoque naa diidz lo luu len dze ne laa naa za nëz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, csetraade zho miech grë zhiwseed zho, sac ncuaane paat rquiinda. <sup>4</sup> Bnee lo zho, csaan zho grë cuent gox qui, zhale noyunroobraa goon dien zharaa, peraa been grë xmengol ne. Ncuaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grë guienzaac ne rgaa grë zha ne rquiabladz dib zdoo riladz Jesús.

<sup>5</sup> Laa naa rso diidz rii lo luu, sac racladz naa

guiaanmbe zdoo grëse miech qui, guiaanmbe xquielrien zho ni dib zdoo zho gliladz zho Dios; zeena scagaa grieelo gleynie zho samiech zho. <sup>6</sup> Sac gon, no bla zha ne quiasaanle Xtiidz Ndzon Jesús mine nac diidzli, lel lo grë cuent ncuaane paat rquiind co no zho. <sup>7</sup> Racladz zho zha cseed miech zha nac xley Dios, ni niicle zha riend zha naca; zeene rseed zho miech ni zha riendaque dien pe rnee zho.

<sup>8</sup> Ndionle ne ganle nli wen ley ne psan Dios, per tel niaca mine yquiin miecha zigne psan me yquiina. <sup>9-10</sup> Golguien ganle, biaan ley par gnabeya grë miech ne nole xnëz Dios, sinque laaw biaan par gnabeya grë: zha ne racndaan lo Dios, zha ne rond xtiidz Dios, zha ntseeb, zha ngoopdol, zha ne rzacdraa ne men nroob nac Dios, zha ne rguitnie lë Dios, zha ne rut pxoz, zha ne rut xniaa, zha ne rut samiech, zha ne rionie zha ne led tsieeld, zha ne nac mrazh, zha ne rban samiech rieto zho zho stib nëz, zha ne rquidie, zha ne rzeet lë Dios par gliladz miech xtiidz zho, ni nanpaa zho led diidzlid rnee zho.

Par grë zha rii nagon biaan ley; grë zha ne mband zigne nac Xtiidz Ndzon Dios; <sup>11</sup> wseed ne rlu ganle zha laa

miech lo dol. Ni lëe wseed co gon pso Dios naa none naa lo miech.

*Pquia zdoo Dios Pabl*

<sup>12</sup> Rded naa xquizh lo Jesús men ndzon ne rnabey ne, porne bzooblo me naa gun naa xtsiin me, ni noyacnien me naa ne laaw quiayun naa. <sup>13</sup> Ne nligaa rded naa xquizh lo me, sac glo ntseeb goc naa, bneenë naa me, ptsidil naa grë zha ne no xnëz me, ntseeb goc naa lo zho. Ni niicle ne scataa nac grë ncuaane ben naa, per pquia zdoo me naa; sac len dze co gard gliladz naa cho nac Jesús, lega lo xquieln xen naa ga sca ben naa.

<sup>14</sup> ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me. <sup>15</sup> Mine rne naa nu niina, didzliw, ni racladz naa grëse miech gliladz zho ganle, ible laa Jesús biaad lo guidzliu, biaadsilaa me grëse miech lo xtol zho; ni naapaa gon goc tib zha ne mazdraa ngoopdol. <sup>16</sup> Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdzind dze lozh. <sup>17</sup> ¡Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa niinaw zigtagaa len grëraa izdoo ne ziaada!

Sac gon, me nac men nroob ne rnabey, men ne gdzind dze ne nitlo. Sca rieguiala.

<sup>18</sup> Timoté, xin, laa naa rso diidz lo luu gon: Tibaque dziits bzo, ib guiaand zdoo luu; psoladz ganle scaque nac diidz ne bnee grë zha bets ne zeene psiaab Dios guic zho bzeet zho pe nac grë mine pso Dios luu gun luu. <sup>19</sup> Bien tibaque dib zdoo luu bliladz Jesús, ib gund luu ncuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuaane ndzinlid, ni laa zho runa. ¡Mincoxe waa, grë zha ne sca nac, rsaanga zho mine bliladz zho! <sup>20</sup> Zig nac Himené grop Lejandr, sca been zho; per laa zho bzonëzle naa sca tsie zho xnëz mendox telne sca racladz zho; zeena guien zho ganle nodne gneenë zho Dios.

## 2

*Gac-wnab lo Dios por grë miech*

<sup>1</sup> Laa naa rso diidz lo to: Golguien none gnab to lo Dios por grëse miech ne ndxie lo guidzliu, golnab lo me gunlay me zho, gacnien me zho; ni goldeed xquizh lo me por grëtaa ncuaane run me. <sup>2</sup> None gnab to lo me gacnien me grëse zha ne nac wxtis, grëse zha ne rnabey, gdeed me guielbiini lo zho zaacse gun zho guielwxtis, zaacse gnabey zho; zeena tibililadz cue miech, ine gban ne zigne racladz me, sin choot peet glisquid lo ne.

<sup>3</sup> Sca nagon nonguiel dz-  
iuun ne, ni scagaa rdziladz  
Dios, men ne pxeel Jesús bi-  
aadsilaa grëse miech lo dol;  
<sup>4</sup> men ne racladz grëse miech  
sëeb xnëz Jesús, gacnan zho  
mine nac diidzli. <sup>5</sup> Guien zho  
ganle ne tibaque Dios no, ni  
tibaque men ne zac gdzinne  
grëse miech lo me: lëe men  
co nac Jesús, men ne goc  
miech biaad lo guidzliu; <sup>6</sup> sac  
gon Jesús nac men ne bdeed  
xquielmban, beet zho me, bdi-  
izh me xtol miech. Min rii  
nagon racladz Dios gacnan  
miech len dze rii. <sup>7</sup> Ni laa  
me pxeel naa none naaw lo  
grëse zha ne nacd zha Israel,  
noseed naa zho grëse mine  
nac diidzli, zeena guien zho  
dib zdoo zho gliladz zho Dios.  
(Mine rne naa nu diidzliw,  
rquidieed naa.)

<sup>8</sup> Laa naa racladz sca,  
zaatne notaa zha ne dib zdoo  
rliladz Dios, grëse zha bgui  
none gzodiidznie zho Dios.  
Ni zeene gzodiidznie zho me,  
none ine mbe zdoo zho, choot  
lo zha rlëed zho, choot zha  
nodilnied zho. <sup>9</sup> Laa grë men  
wnaa, racladz naa tsoxco zho  
zaacse gacwxab zho, niowse,  
tibliladzse gac zho. Sac grë  
men wnaa ne rliladz Dios,  
par gluniow zho rquiind ne  
goon dien paraa xixcuaa  
guitsguic zho, dien pe quie  
rbebni, pe or gac xnil zho,  
gac zhibguiaa zho, pe lar  
niazh ne gacwgaa zho. <sup>10</sup> Par  
gluniow zho, rquiin zaacse  
gbannie zho samiech zho, zig  
none gban zha ne nole xnëz  
Dios. <sup>11</sup> Zig nac len yadoo,  
none tibliladzse gac zho,

dzese sob zho yquiaadiag zho  
tel pe nac wseed ne noyac;  
<sup>12</sup> gnedzd naa diidz ne zha  
so cseed miech, o zhagaa  
gnabey lo mgui. None dzese  
sob zho, <sup>13</sup> sac gon zeene psan  
Dios miech lo guidzliu, glose  
bzaa me Adán, dzigoraa bzaa  
me Ev. <sup>14</sup> Ni stiba, pquidied  
mendox Adán, sinque laa  
ma güeyquidie Ev; ni porne  
bliladz Ev xtiidz ma, ga bdiits  
Ev xtiidz Dios. <sup>15</sup> Per silaa  
Dios wnaa lo xtol zho, telne  
dib zdoo zho gliladz zho me,  
tsoxco zho gban zho zigne  
racladz me, guien zho gun  
zho mine riegual wnaa, gap  
zho xpëed zho ni cchoob zho  
win.

### 3

*Zha ne so lo grë zha ne  
ngab xnëz Dios*

<sup>1</sup> Zha ne racladz so gnabey  
zho lo grë zha ne no xnëz  
Dios, tib dziin wen ga  
rquiabladz zho gun zho. Sca  
zëeb diidz rnee miech; ni  
nligaaw. <sup>2-4</sup> Per ga nagon  
rquiin:  
tib zha ne zaacse mban,  
zha ne mbannie loxaque  
wnaa ne nacse tsiel  
zho,  
zha ne tibliladz,  
zha ne nixbiini, rien pe run,  
zha ne mbe lo, choot lega  
gzhidznied zho,  
zha ne ine nley rac, rbëzlo zho  
miech lidz zho;  
zha ne rien zha rseed miech,  
zha ne rquiad lo nziu,  
zha ne rleynied dil,  
zha ne wen zdoo,  
zha ne zaacse mbannie  
samiech,

zha ne rzona<sup>l</sup>d dimi,  
 zha ne zaacse mban lidz,  
 zha ne rrieelo rnabey lidz,  
 rnabey xpëed,  
 zha ne nguzobdiidz nac  
 xpëed, rbeed mëed  
 xqui<sup>l</sup>to zho.

<sup>5</sup> Sac tel zha ne rrieelod  
 gnabey lidz, gnabey xpëed;  
 çpe le<sup>l</sup> ne so zho gnabey zho lo  
 grë zha ne no xnëz Dios dzigo  
 grieelo zho?

<sup>6</sup> Niicle tib zha ne griin<sup>l</sup>paa  
 psilo bliladz Xtiidz Dios  
 grieelod gac zho dziin co; sac  
 nend lëëque lëë zho gun<sup>l</sup>non  
 zho, lozh ga lëëque zha yguib  
 guiabdee zho. Go<sup>l</sup>soladz gan<sup>l</sup>e  
 zha bzhaac mendox. <sup>7</sup> Ni  
 ye rquiin tib zha ne zëëb  
 xtiidz ne miech ndzinli nac  
 zho, haxta lo zha ne nod  
 xnëz Dios; zeena tsod lega  
 pe glisqui miech lo zho,  
 sca gleyd mendox gac mi<sup>l</sup>ne  
 racladz ma.

*Zha ne gun yudar len  
 yadoo*

<sup>8-12</sup> Scaquegaa zha ne so  
 gun xyudar zha ne gnabey  
 ga, ga rquiin:  
 tib zha ne zaacse mban,  
 zha ne rnee niapse diidzli,  
 zha ne rleynied gui<sup>l</sup>gonzui,  
 zha ne ziana<sup>l</sup>d dimi,  
 zha ne dib zdo<sup>l</sup>o rililadz grëse  
 mi<sup>l</sup>ne zhobnee lo Xtiidz  
 Dios (mi<sup>l</sup>ne rililadz ne,  
 mi<sup>l</sup>ne nac diidzli),  
 zha ne mbe lo,  
 zha ne mbannie wnaa ne  
 nacse tsieel zho,  
 zha ne rrieelo rnabey lidz,  
 zha ne rrieelo rnabey xpëed.

Ni stiba, antes ne so zho  
 none glugazh zho die<sup>l</sup>n pe nli

zrieelo gun zho dziin co. Zig  
 nac tsieel zhow, none gac me:  
 tib wnaa ne zaacse mban,  
 wnaa ne rleynied diidzguizh,  
 wnaa ne rleynied nziu,  
 wnaa ne rquidied.

<sup>13</sup> Sac zha ne zaacse gun dziin  
 co, zian<sup>l</sup>nziuuraa zho lo grë zha  
 ne ngab lo Dios, ni scagaa in<sup>l</sup>e  
 mbe lo zho haxta no ro zho  
 gnee zho lo miech zha nac ne  
 laa zho rililadz Jesús.

*Mi<sup>l</sup>ne rililadz zha ne ngab lo  
 Dios*

<sup>14</sup> Ib laa guic naa no  
 gua<sup>l</sup>niob naa i, gua<sup>l</sup>gan naa  
 luu; per laa naa rxel<sup>l</sup> diidz rii  
 lo luu, <sup>15</sup> zeena tel<sup>l</sup>ne grieelod  
 gua<sup>l</sup>niob naa, per laa luu  
 nan<sup>l</sup>e nagan<sup>l</sup>e cho gzo luu  
 yquiaanap grëraa zha ne  
 ngab xnëz Dios nguiamban;  
 zha ne run<sup>l</sup>bey mi<sup>l</sup>ne nac  
 diidzli, ni rlu zho gan<sup>l</sup>e ne  
 nli diidzliw. <sup>16</sup> Ne nligaa  
 nroobdoo nac wseed ne  
 ziaad lo Xtiidz Dios, mi<sup>l</sup>ne  
 rililadz ne, ngan<sup>l</sup> guien<sup>l</sup> miech  
 zha naca. Nu raquiet mi<sup>l</sup>ne  
 been me:

Goc Jesús miech biaad me lo  
 guidzliu,  
 ni blu Espiritu Sant gan<sup>l</sup>e ne  
 nli Xpëed<sup>l</sup>paa Dios nac  
 me;  
 ni gon<sup>l</sup> grë anj<sup>l</sup> me.  
 Briets bliaa<sup>l</sup> Xtiidz me grë  
 guiedz,  
 ndaldoo miech ne bliladz  
 gan<sup>l</sup>e cho nac me,  
 blozh ga biire zey me lo  
 gui<sup>l</sup>ndzon ne no me  
 gbaa.

## 4

*Zha ne rsaan Xtiidz Dios*

<sup>1</sup> Ib laa Espíritu Sant rneele ne len<sub>1</sub> dze ne ziaadyob guiaad Jesús stib, ndal grē zha ne r̄liladzle Xtiidz me, laa zho csaana laa zho tsienal<sub>1</sub> grē mine rnee zha ne r̄quidie, grē mine nac zhiwseed mendox. <sup>2</sup> Grē zha ne guiaadnie wseed co, ni lalnu yquiad zdo zho zeene laa zho yquidie miech. <sup>3</sup> Haxta stsidil<sub>1</sub> zho ctsieelnia miech, znabey zho ycuee ncuane<sub>1</sub> gow miech; zig nac zeene led Diosd psan<sub>1</sub> ctsieelnia miech, zig nac zeene led med psan<sub>1</sub> grē ncuane<sub>1</sub> gow zho. Me psana<sub>1</sub> grēsew, zeena<sub>1</sub> grēse zha ne ngab xnēz me (zha ne beenbey diidzli), zeene laa zho yquiina gdeed zho xquizh lo me. <sup>4</sup> Sac grēse ncuane<sub>1</sub> psan<sub>1</sub> Dios, wena; zig nac grē ncuane<sub>1</sub> rac wagw, peet nacda yquiin new, totsaque gdeed ne xquizh lo me zeene laa ne yquiina, <sup>5</sup> ni gnab ne gunlay mew; sac zeene rdeed ne xquizh lo me ni rnab ne gunlay mew, rsan<sub>1</sub>mbe mew.

*None gun Timoté xtsiin Jesús*

<sup>6</sup> Zeene cseed luu grē zha bets ne, zha bzian ne i, pseed zho grē mine rne naa lo luu nu, tibaque mine nac zhiwseed Dios güeynal<sub>1</sub>; sac sca no gun<sub>1</sub> zha ne squi zo quianap grē zha ne ngab lo Dios. <sup>7</sup> Ib yquiaadiagd luu grē cuent gox, grē cuent nxen ne paat rquiind; sinque Xtiidz Dios bioxco, min<sub>1</sub> co bloonie guic luu. <sup>8</sup> Gzoob ne

zha ne rguit, wguit ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac min<sub>1</sub>cosi squiina lo ne zigtaa lo guiel<sub>1</sub>m̄ban riiw, zigtagaa lo guiel<sub>1</sub>m̄ban ne naraa dzian new. <sup>9</sup> ¡Ne nligaa sca rieguial<sub>1</sub> gun<sub>1</sub> miech, ni grēse zho none tsoxco zhow! <sup>10</sup> Ni gacxe waa, laa ne quia dien<sub>1</sub> zha gliladz zhow, niicle ne nroob grē guiel<sub>1</sub>nē ne quiadzian<sub>1</sub> ne; sac ible Dios nac men<sub>1</sub> ne rnalo ne, men<sub>1</sub> nguiamban<sub>1</sub> ne rsilaa grēse miech lo dol<sub>1</sub>; sac grēse zha ne dib zdo r̄liladz me, rsilaa me zho. <sup>11</sup> Bioxco sca pseed zho grē mine rne naa lo luu nu, ni bnee lo zho gun<sub>1</sub> zhow.

<sup>12</sup> Nli lēē tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, in<sub>1</sub> blynie samiech luu, tibaque dib zdo luu bliladz Xtiidz Dios, in<sub>1</sub> ndzinli wban; zeena<sub>1</sub> gan<sub>1</sub> zho ganle niicle ne zha nguieg luu, per nixbiini luu.

<sup>13</sup> Laga gal<sub>1</sub> dze ne glanso naa i, bioxco blab Xtiidz Dios lo grēse zha bets ne, zha bzian ne i, bnee lo zho zha naca, bnee diidz ne conley zdo zho; zeena<sub>1</sub> in<sub>1</sub> nguieel<sub>1</sub> gac zho. <sup>14</sup> Ib csaand luu grē guiel<sub>1</sub>biini ne bneedz Dios lo luu i (guiel<sub>1</sub>biini ne bgaa luu zeene psiaab me guic grē zha ne rnabey lo grē zha ne no xnēz me, pxobnia zho guic luu). <sup>15</sup> Grēse mine rne naa lo luu nu, bioxcow; zeena<sub>1</sub> gan<sub>1</sub> grēraa miech ganle zigse



zie dze laa luu quiayabiini-  
raa lo Xtiidz Dios. <sup>16</sup> Bien  
zaacse goc, bien mine nac Xti-  
idz Dios, min co pseed miech,  
ib csaand luuw; zeena tedlaa  
luu lo grëtaa guielnë ne no  
guiaad, ni scagaa haxta grë  
zha ne rquiaadiag wseed ne  
rlu luu ni rban zhow, ye zho  
zlaa zho lo guielnë co.

## 5

### *Men wnaa ne gutle tsieel*

<sup>1</sup> Grë zha bgui gol ne nac  
bets ne i, zeene zha rxin  
zho, bien gactoxd luu lo zho,  
sinque zaacse bnee lo zho  
zig nac zeene lo pxoz luu  
nonee luu; niiclegaa zha ngu-  
iega, zaacse goc lo zho, been  
zho cuent zig tib bets luu.  
<sup>2</sup> Scaque grë men wnaa ne  
nac zhagol, ndooladz bnee  
lo me, been cuent lo xniaa  
luu ga zo luu; lo grë wnaa  
nguiega, ndzinli goc, niowse  
bnee lo zho, bien ganle rriee-  
quia tib bzian luu ga.

<sup>3-6</sup> Grë men wnaa ne gutle  
tsieel, men ne nlipaa choot  
rapd, to none cteedlo me; tot-  
saque nli Diosse rnalo me,  
dze guieel tibaque nozodi-  
idznie me Dios. Sac no zho  
mban zigne notaa guic zho,  
laa zho ziana lloxaque grë  
ncuaane gdeed guxt xcuerp  
zho; zha ne sca run, rriee-  
quia gutle zho ga. Laa tel  
men wnaa ne scaque gutle  
tsieel, ni no xpëed me, no xiag  
me, dzigo zha none cteedlo  
me; none cseed zho gan zho  
menlidz zho, gan zho pxoz  
zho, gan zho xniaa zho, sac  
gon me pchoob zho. Sca

nonguiela, ni scagaa rdziladz  
Dios.

<sup>7</sup> Pso diidz rii lo grë zha  
ne nacgrë to i, zeena cseed  
zho sca gban zho, ni sca-  
gaa tsod pe nacne gneenë  
miech zho. <sup>8</sup> Sac zha ne tsox-  
cod gan zha ne nacgrë zho,  
ni mine mazdraa telne niicle  
menlidz zho tsoxcod zho gan  
zho, rdzieeld dzigo guiab zho  
laa zho rliladz Dios, haxta  
mazdraa nac xtol zho que tib  
zha ne gard gliladz me.

<sup>9-10</sup> Ni stiba, grë men wnaa  
viud qui zha ne rquiabladz  
gun pe xtsiin Dios, bien zha  
ne psale tsongal iz zha co  
psëeb lo list. Ni wen wen goc-  
nan telne:

bionied me stib mgui zeene  
bii zomban tsieel me,  
zaacse mban me,  
zaacse pchoob me xpëed me,  
dib zdoo me rbëzlo me miech  
lidz me,  
ndooladz rac me lo grë zha ne  
no xnëz Jesús,  
run me xyudar grë zha ne no  
lo tib guielnë;  
ni run me niapse ncuaane  
wen ne rquiin lo  
samiech me.

<sup>11-12</sup> Laa grë zha ne bii  
nguieg, ib yquiaad luu  
lë zho lo list co; sac nac  
wnaa nguieg, zeene sob guic  
zho ctsieelnia zho, laa zho  
ctsieelnia stib. Loxaque  
gunctal zho xtol zho ga, telne  
glo rquiabladz zho gun zho  
xtsiin Dios ni lozh ga laa zho  
csaanaquew. <sup>13</sup> Ni ye nac  
wnaa nguieg, rdziladz zho  
rquiianzë zho; ni telne peet  
dziin gund zho, racgbech zho;  
ni stiba, zeene sca guieend

pe gun zho dzigo laa zho rzhixcuaa diidzguizh, laa zho rzëeb lo grë cuent ne rieguialdraa zho. <sup>14</sup> Gacxe waa, racladz naa grëse wnaa nguieg ne sca ret tsieel, mazd ctsieelnia zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grë zha ne rlëëniele Xtiidz Jesús, gneenëraa zho zha ne riladza. <sup>15</sup> Sac gon, blale wnaa ne sca gut tsieel zieriee xnëz Dios, lel laa zho zienal grë mine rnabey mendox.

<sup>16</sup> Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioon me; zeena grë ncuaane runlo to i, zgaaw yquiin grë men ne nlipaa guiend cho gan.

*Mine rieguial zha ne zo lo zho*

<sup>17</sup> Grë zha ne zo rnabey lo grë zha ne ngab xnëz Dios, zha ne zaacse noyun dziin co, zig nac zha ne tibaque rnee Xtiidz Dios lo miech, zha ne rseedgaa miech zha naca, tel palal ncuaane rcaa zho, ible rieguial ycaa zho chop lalgaw. <sup>18</sup> Gotsaa gwi ne ganle zha quia lo Xtiidz Dios, rneew: "Code to guiex ro xma to, zeene no ma ye noguiits ma zhobxtil; jgolsaan gow ma!" Laa stib lugar rnee: "Zha ne run dziin, ib none ycaa zho mine non xtsiin zho."

<sup>19</sup> Bien gon Timoté, zeene guiaad zho lo luu, guiaadzo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me. <sup>20</sup> Telne bind me diidz, bii noyun me dol co, dzigo squi ndxie grë zha ne nacgrë to, goctox lo me; zeena sca gdzieb grëraa zho gunscad zho. <sup>21</sup> Zig zobwi Dios, zig zobwi Jesús grë xanj me, laa naa rso diidz lo luu, been mine rne naa lo luu nu. Gdzieebd luu, yquiad zdoo luu, bnee lo zho tel chotaa nac zho.

<sup>22</sup> Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend lëetse zha ne rap pe tib falt gzooblo luu, dzigo laa miech guiab nanpaa luu zha nac zho ni rlisquid luuw lo zho. Ible gdeete luu diidz gun luu ncuaane gunctal xtol luu. <sup>23</sup> (Gnid naa togo ible grieelodraa guie luu vin, zac guie luu niipyeena maase poc poc, laa ne guie luu niab nis; zeena glunëdraa zdoo luu.) <sup>24</sup> Sac grë zha ne no lo dol, no dol co znuse rzhoooben; nogaaw, haxta gal dze ne laa zho gacredz lo Dios, dzigoraaxoobnena. <sup>25</sup> Scaquegaa zha ne run guielwen, no ncuaan co znuse glu; nogaaw, niicle ne rluda niina per ible zdziin dze ne laaw glu.

## 6

*Zha ne quiazhoo xtsiin ben*

<sup>1</sup> Grë zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

<sup>2</sup> Scaquegaa grë zha ne run xtsiin men ne rliladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia grë dziin ne noyun zho; sac gon lo tib men ne no xnëz Dios ga, lo tib men ne rleyne zho ga yquiin xtsiin zho.

Grëse mine none naa lo luu nu, pseed grë miech quiw, ni pso diidz lo zho gun zhow.

<sup>3</sup> Zrieequia zha ne guiaadnie stib wseed, mine ni nacdrea Xtiidz Jesús; sac zhiwseed Jesús rlu zha gban grë zha ne no xnëz Dios. <sup>4-5</sup> Zha ne sca rlu stib wseed, lega: tib miech niats ga nac zho, ible peet riend zho,

runbeyd zho mine nac diidzli, rdziladz zho rdildiidznie zho miech; ga rlan,

laa miech rdillsa,

laa miech rlëëlsa,

laa miech rbidzgonsa; rlozh ga,

rliladzdraa zho pe rnee samiech zho.

Masaque nan zho telne sëëb zho xnëz Dios, nroob dimi ne gunlo zho.

¡Bien ib ctsieelsad luu zha co! <sup>6</sup> Parga nli zha ne rzëëb xnëz Dios, zeene rzac zdo zho mine rzoladztaa Dios lo zho, tib guieinzaac nroob ga

rgaa zho. <sup>7</sup> Ni sca nonguiela, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grielod güey ne. <sup>8</sup> Gacxe waa, none sac zdo ne ni gley ne totsaque gneedz Dios ncuaane gow ne, ni ncuaane gacwxab ne. <sup>9</sup> Sac grë zha ne rzoobladz xen nroob dimi, no zho rquuil mendox zho run zho ncuaane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho. <sup>10</sup> Sac nac dimi, zeene rzoobladzdox miecha, ga rzobni ne laa zho run grë guieintseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guieinë ne ziedzin lo zho.

*Dib zdo Timoté gliladz Timoté Dios*

<sup>11</sup> Sangue luu gon, bien ganle xnëz Dios no luu, gund luu grë ncuaan co. Bioxco zaacse wban, tibaque bioxco gban luu zigne racladz Dios, dib zdo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdo luu.

<sup>12</sup> Bleeladz luu been grë dziin ne run zha ne dib zdo rliladz Dios, zigne run zha ne rie lo dil, rbeeladz zho zho. Gon ganle, laa luu nole nëz ne ygaa luu guieimban ne gdzind dze lozh, ib csaand luu nëz co; sac niicle Dios ible min co bzooblo me luu. Psoladz ganle, squi ndxie miech bleero luu ne dib zdo luu rliladz luu Xtiidz

Jesús. <sup>13</sup> Dios (men ne rdeed xquielmban grëtaa ncuaane no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle <sup>14</sup> laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne. <sup>15</sup> ¡ib laa me no guiaad! Ni Dios cxeel me zeene laa dze co gdziñ. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey. <sup>16</sup> Mesi ib gdziñd dze guet me, lo biini ne no mew, tsod zha ne glëb gdziñ ga; ni tib miech lo guidzliu rii gard gan me, ni grielodgaa gan zho me. ¡Gacxe waa, ible me none dziuunnon ne, sac gon men non, men rnabey nac me! Min co nagon no dziuun ne.

<sup>17</sup> Grë zha ne rapchen, bnee lo zho cseed zho gdaannied zho grë ncuaane rap zho, ib gnalod zho grë ncuaan co; sac gon ncuaane tib rded ga. Dios none gnalo zho, ni mesi rneedz me grëtaa ncuaane wen ne rquiin ne. <sup>18</sup> Gudz lo zho gacmbidzd zho, none gun zho grë ncuaane yquiin lo samiech zho, ycad zho ncuaane quianie zho, ine gun zho xyudar zha ne peet quianied. <sup>19</sup> Zha ne sca gun, tib guielnzaac nroob ne yгаа zho; lëe guielnzaac co gan zho len dze ne ziaadraa. ¡Ni haxta zgaa zho tib guielmban ne gdziñd dze lozh!

<sup>20</sup> Timoté, laa naa rbire rso

diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xti-idz Dios, niicle ne rnee zha ne ziaadniew zha rac nac zho, per nlid ne diidzli rnee zho. <sup>21</sup> Sac gon, blale zha ne ziesaan mine nac diidzli, laa zho zienal wseed co; per riend zho lel znu rziaabnëz zho ga.

Dios men ndzon ne rnabey, me noxco luu, me gzhixcuaa lo grë zhizhgab luu. Me gac-nien luu peet tsienied guic luu.

Pabl

## BROP GUITS NE PXEEL PABL LO TIMOTÉ

¡Diuzh Timoté!

<sup>1</sup> Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëeb xnéz Jesús.

<sup>2</sup> Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Mine racladz naa ni rnab naa lo Dios men ne nac Pxoze ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

<sup>3</sup> ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zana naa mine rnabey me, zigne bioxcoque grë xmengoldoo naa güeynal zhow.

<sup>4</sup> Zeene rsoladz naa blactaa roon luu zeene wbi naa i, zoot naa tebaa zha gan niob naa luu stib; zeena tsonley zdoo naa. <sup>5</sup> Ni rsoladz naa scataa dib zdoo luu riladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu riladz luu me.

<sup>6</sup> Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia

naa guic luu, ni bnab naa beenlay me luu. ¡ib csaand luuw! <sup>7</sup> Sac gon, laa Dios rneedz zhiEspiritu me lo ne, parne sodziebdraa ne, parne dziaapraa ne xfuers me, gleynieraa ne samiech ne, ni tsabiiniraa ne. <sup>8</sup> Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu niioogyu naa nu, loxaque ne riladz naa me. Sinque bloo zdoo luu ne ib laa luu no gan grë guielnë rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne. <sup>9</sup> Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuun ne, sac haxta zeene gard cue guidzliu, laa me psan diidz ne laa me glu ganle pa lotaa rleynie me ne.

<sup>10</sup> Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne ygaa miech tib guielmban ne gdzind dze lozh, none gliladz zho Xtiidz Ndzon me. <sup>11</sup> Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zaatne nodraa zha Israel, gaseed naa zho zha naca; <sup>12</sup> mincocxe waa znutaa grë ncuane nodeed naa. Per

ni lalnu ib rtoładz naa, sac wen wen nan naa cho nac meñ ne riladz naa, ni nan naa mesi zrieelo yquiaanap me naa nitnězd naa haxta gal dze ne laa me guiaad.

<sup>13</sup> Bien, güeynal grē mine pseed naa luu, sac gon min co nac mine rquiin. Tiblique bliladz Dios, ine bleyne samiech luu zigne no dziuun ne ne nac ne zha ne no xněz Jesús. <sup>14</sup> Espiritu Sant meñ ne nacie ne, me yquiaanap luu, me gacnieñ luu ib csaand luu zhiwseed Dios, ib csaand luu dziin ne bzo Dios luu gon luu.

<sup>15</sup> Nanlaxe luu ganle zha been zha Asia, grēse zho bzozit lo naa; zig nac Figel, zig nac Hermoj, mbe psaan zho naa. <sup>16</sup> Sañgue Onesifr, rnab naa lo Dios yquia zdoo Dios me grē meñlidz me, sac blactaa biadchoobladz me zdoo naa. Niicle ne znu nioogyu naa nu, per ib beend me ne ntoladz me niaadgan me naa; <sup>17</sup> sinque zigne blanso me lad guiedz Roma nu, pquiaguib me naa haxta bdziel naa lo me. <sup>18</sup> Ni zoladzaxe luu ganle, pe zhistaa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grēse miech gacredz lo Dios.

## 2

*Dziits so Timoté lo Xtiidz Dios*

<sup>1</sup> Xin, sañgue luu gon tibaque squi dziits bzo lo Xtiidz Dios, gon ganle Jesús noxco grēse zhizhgab luu.

<sup>2</sup> Grēse mine gon luu pseed naa miech, scagaa niina bioxco bneew lo zha ne rgobey luu grieelo tsie tsieneew lo stib miech. <sup>3</sup> Ib gacmband luu zeene noyan luu grē pe guielñe, sinque bioxco been xtsiin Jesús zigne no gon luuw, masaque been cuent xmenguiib me nac luu. <sup>4</sup> Sac gon, tib zha ne nac menguiib, grieelod sēeb zho pe stib lo cuent ne nacd xtsiin menguiib, sac none nsin so zho gon zho tel pe nac mine rnee meñ ne rnabey zho. <sup>5</sup> Bioxco been mine rnee meñ ne rnabey ne, zig run zha ne rie tib lo wguít; sac zha co telne tsoxcd zho quit zho zigne nacpaa lo wguít, ycaaniad zho premio. <sup>6</sup> Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielñzaac ne rac zaatne ran zho. <sup>7</sup> Mine blozh bzet naa nu, blooniew guic luu, ni Jesús nac meñ ne gneedz guielbiini lo luu guien luu zha naca.

<sup>8</sup> Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho. <sup>9</sup> Ni ne nonecxe naa Diidz Ndzon rii waa, gane nroob guielñe ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sañgue Xtiidz Dios led yeda nioogyu. <sup>10</sup> Laa naa quiaxecw mine

quiadeedtaa naa, zeena grëse zha ne bzooblöle Dios gliladz Jesús, grieelo yquiaadiag zho zha laa zho lo dol, ni zha yгаа zho tib guielmban ndzon ne gdzind dze lozh.

11 Ni znu gon naca:

Telne xnëzle me no ne zeene laa ne guet,

ib zгаа ne guiobannie ne me.

12 Niicle nroob guielnë dzian ne porne rililadz ne me, scagaa ible zdzin ne zaatne gnabeynie me ne;

telne guiab ne runbeyd ne me, scaquegaa me ziaб me runbeyd me ne.

13 Niicle telne riaanladz ne me, sangue me riaanladz me ne; mine rnee me run mew, sac mesi rtsëed me xtiidz me.

*Tsoxco Timoté grieequia xtsiin Timoté*

14 Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso diidz lo luu, gudz lo zho tilidiidzniedraa zho miech grë godiidz ne paat rquiind; led ncuaane ndzindida, loxaque rungueta guic zha ne rquiaadiaga.

15 Tibaque bioxco zaacse grieequia xtsiin Dios, mine noyun luu, zeena wen grieequia luu zeene laa luu gdzin lo me. Zigne nace Xtiidz me, sca pseed miecha. 16 Yquiaadiagd luu grë wseed yozh, ncuaane ni lalnu paat rquiind; zha ne zienal wseed co, zig zie dze laa zho rzozitraa lo Dios. 17 Lega nac zhiwseed zho zig nac grë guielguidzdox; sac tel

guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho, 18 sac tel zha zienaldraa zho mine nac diidzli; rnee zho bleebanle Dios grë mengut. No palal zha ne rililadzle Xtiidz Dios, zeene ron zho min co, riendraa zho dien pa mine gliladz zho. 19 Sangue zha ne nlipaa no xnëz Dios, tsod pe nace grieë zho xnëz me sac löle me ngab zho; zigne zhobneeque lo Xtiidz me zaatne rnee: "Runbey Dios cho nac zha ne nlipaa no xnëz me"; ni rneequew: "Grë zha ne nlipaa ngab xnëz Jesús, none csaan zho grëse guielntseeb."

20 Zaatne nac lidz tib zha ricw lëë, no grë xtsiin rotie zho mine niaa or, mine niaa plat, ni noquegaa mine niaa yag, mine niaa beñ. Mine mazdraa niazh, min co rquiin zho rio ncuaane row miech; laa mine beelze niaa, ga rgo zho ncuaane row ma. 21 Scaquegaa miech, zeene csaan zho grëse ncuaane paat rquiind, ible squiin zho lo Dios gun zho xtsiin me mine mazdraa nroob, zigne rquiin grë trast niazh co.

22 Nac lo guielnguieg, ndal grë ncuaane ndzinlid rio guic miech run zho, sangue luu gon tsienied grë ncuaan co guic luu, bioxco zaacse wban, dib zdoo luu bnalo Dios, ine bleynie grëse samiech luu, tilnied luu zho; grë zha ne squi nli mbe zdoo, rbedz zho Dios, zaacse wbannie zho.

23 Ib yquiaadiagd luu grë godiidz ne paat rquiind, sac gon loxaque runctila miech.

24 Zha ne squi run xtsiin Dios, nodne tso zho dien pe tildiidz zho; sinque none wen gac zho lo grëse miech. None guien zho zha cseed zho miech; ib guieednied zho miech, 25 ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grë zha co, yguudz zdoos zho csaan zho grë xquielntseeb zho, gacnan zho mine nac diidzli; 26 zeena tsaa zho biini greec zho ladznia mendox, zaatne ngadoo zho.

### 3

*Len dze ne ziaadyob nitlo guidzliu*

1 Ni none gacnan luu ganle, zeene laa dze ziaadyobpaa nitlo guidzliu, nroob nac guielnë ne gan grë zha ne no xnëz Dios. 2 Zrieequia grë zha ne:

gacladz tebaa lose zho yquiin grëtaa ncuaane no, loxaque dimi gleynie zho, niats gac zho, zdaannie zho ncuaane ni rapd zho, zneenë zho Dios, gond zho xtiidz pxoz zho, xtiidz xnïaa zho; sacd zdoos zho mine gun miech lo zho, laa zho gban zigne notaa guic zho, ib yquiaadiagd zho Xtiidz Dios.

3 Gacnandraa zho pe nac guielwleynie, ib yquiad zdoos zho,

loxaque diidz gzhixcuaa zho, lëbd zho gnabey zho xcuerp zho,

sacsi zho samiech zho, stsidil zho grëse ncuaane rquïin,

4 zgo zho zha ne ndzieeldidz zho nia zha ne quïn zho,

ni lalnu guielto tsod lo zho, loxaque dien zha gdeed guxt xcuerp zho tso zho, laa ne yguib zho xnëz Dios.

5 Squiaalo zho ye zho riladz Dios, per lo grë ncuaane gun zho, ga glu ne riladzd zho me.

Bien, ib ctsieelsad luu grë miech ne sca nac. 6 Sac lëë zha ne nacgrë zho ga, rzëëb yu rietsitnie grë wnaa yozh ne zienal ncuaane gdeedtaa guxt xcuerp. 7 Tibaque no zho dieen peraa rseed zho, per ib rioguid zho mine nac diidzli. 8 Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co niina, rlëeniedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios; 9 per gacdaquew xtse, zeene laa diidz guien ganle pe clas miech nac zho, dzigo lëëque grë ncuaane yozh ne run zho cuee xquielto zho; zigne bzhaacaque zha ne sca blëenie Moisés.

*Csaand Timoté mine pseed me*

10 Sangue luu, nanle luu ganle zha nac grë mine pseed naa luu. Wen wen nan luu



ganle zha mban naa, pe no guic naa gun naa, zha dib zdoo naa rliladz naa Dios, zha dib zdoo naa rleynie naa samiech naa, rieednied naa zho. <sup>11</sup> Nanle luu ganle zha rneedz Dios xfuers naa, rlëeb naa grëtaa miñe rteed miech naa, zig been zho naa guiedz Antioquí, guiedz Icon ni Listr, blactaa pquianał zho naa; per tibaque gocnie Dios naa, psilaa me naa lo grëtaa guielxtseeb co. <sup>12</sup> Ni scagaa naca, grë zha ne rquiabladz gban zigne rnabey Jesús, ible squianał miech zho. <sup>13</sup> Per probsaxe grë zha ne sca quiayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa mendox zho.

<sup>14</sup> Sangue luu gon, csaand luu grë miñe pseed luu. Nanween luu ganle diidzliw, ni runbeygaa luu cho nac grë zha ne bneew lo luu. <sup>15</sup> Ni stiba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnan luu ne Jesús none gliladz miech parne laa zho lo dol. <sup>16</sup> Dib nacse Xtiidz Dios, Espíritu Sant psiaaba guic zha ne pquiaaw, laaw biaan:

rseeda ne miñe nac diidzli,  
rsow diidz lo ne guien ne pa  
lo quiaxin ne,  
rseeda ne zaacse gban ne.

<sup>17</sup> Zeena sca grëse zha ne no xnëz Dios, grieelo wen wen cseed zho, ni guien zho zha

gun zho grëse dziin ne rquiin, dziin ne rieguial zho gun zho.

## 4

*None gnee Timoté Xtiidz Dios*

<sup>1-2</sup> Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuaane been zho, zigtaa zha ne mbana zigtagaa zha ne gutlew, zeene gdziñ dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdoo zho. Bioxco tibaque pseed zho, ib guieednied luu zho. <sup>3</sup> Sac gon, zdziñ dze ne siguieldraa miech yquiaadiag zho miñe nac diidzli; sinque laa zho yquiaguib zhaase zhaase dien cho cseed zho tel pe nac ncuaane rdziladzse zho yquiaadiag zho. <sup>4</sup> Gleyndied zho Xtiidz Dios, laa ne yquiaadiag zho miñe nac xtiidz me, lel laa zho tsoxco yquiaadiag zho grë miñe nac zhiwseed miech guidzliu. <sup>5</sup> Sangue luu gon, nsin bzo gdeete luu diidz gunüet zho luu. Zaacse been grë miñe pso Dios luu gun luu, bnee lo miech zha laa zho lo dol; niicle tel pe nactaa guienë ne noded luu, gacmband luu.

<sup>6</sup> Rien naa ziaadyoble ne laa naa gbi lo guidzliu rii, zhile gdziñ dze ne laa zho

gut naa. <sup>7</sup> Len ngbidz ne wban naa, tibaque dib zdoonaa bliladz naa Dios; xtsiin mew, laaw ben naa zigne bnabey me naa, ni laaw psiaalgaanaa niina. Zigne runda grë menguiib ne rie lo dil, sca bleeladz naa naa ben naa xtsiin me; <sup>8</sup> laa na nagon, mine quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleyne me, grë zha ne dib zdoon quiambëz gdziñ dze ne guiaad me stib, grëse zha co ygaapremio co.

### *Tsienioib Timoté*

<sup>9</sup> Bzhiguiel guiaadniob luuguiaadgan luuna nu; <sup>10</sup> sac zig nac Demas, laa me bichele lo naa. Psañaque me naa nu laa me zie nëz Tesalónica; sac mazdraa nonie grë ncuaane lo guidzliu rii guic me. Bay zig nac Crescent, laa me brie zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho. <sup>11-12</sup> Niicle Tic guiend nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luuguiaad nëz rii bzhiguiel guiaadnie luu me; sac rquiin me nu gun me xyudar naa lo xtsiin Dios. <sup>13</sup> Ni psoladzpaaguiaadnie luu lar ne rbiix naa, mine psan naa guiedz Troas lidz Carp; ni guiaadnie luu grë xquits naa. Ib guiaanladz

luu mine nac grë guits nroob ga.

<sup>14</sup> Tel gan luuganle nzian ncuaane nonguieldraa been Lejandr naa, men ne nac wncadzguiib ga; per Diostaa nan zha gunquizh me Lejandr grë mine been Lejandr ga. <sup>15</sup> Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

<sup>16</sup> Zeene glopaa gocredz naa lo wxtis, choot bzëd nrree xfavor naa, grëse zho biche lo naa; rnab naa lo Dios gunquizhd me zho mine been zho, sca psaan zho naa. <sup>17</sup> Sangue men ndzon ne rnabey ne psaad me naa, me pchoobladz zdoonaa, haxta bdeeda diidz bnee naa Xtiidz me lo grë zha zit rii. Sca gocnien me naa, gun naa cuent role meedz psilaa me naa; <sup>18</sup> ni niicle niinagaa, nanle naa ne ib silaa me naa lo grëtaa ncuaane racladz miech cteed zho naa, ni me yquiaanap naa haxta gal dze ne laa me gdziñnie naa zaatne rnabey me gbaa. ¡Me rieguiel guiaannon gzataa dze, niicle nadzew, gzhew, ni grëragaa len izdoo ne ziaada!

<sup>19</sup> Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr. <sup>20</sup> Gacnan to ganle, laa bets ne Rast biaan Corinth, laa Trófimo biaan guiedz Milet, sac rzacné me. <sup>21</sup> Bioxco gon guiaadniob luu, zeena blansole luu nëz rii zeene laa mëe nal sëeb. Pcaania zhibdiuzh Eubul, zhibdiuzh Pudent, zhibdiuzh Lin,

zhibdiuzh Claud; ni grëragaa  
zha bets ne, zha bzian ne, zha  
ne no nëz rii, laa zho rxeel  
bdiuzh lo luu.

<sup>22</sup> Jesús men ndzon ne rn-  
abey, me gacnie luu. Dios glu  
lo to ganle pa lotaa noxco me  
to. ¡Me gunlay to grëse to!

Pabl

## GUILTS NE PXEEL PABL LO TIT

¡Diuzh Tit!

<sup>1</sup> Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnañ zho zhapaa nac wseed ne zional ne (wseed ne rnee zha none gbannie miech Dios), <sup>2</sup> wseed ne rlu ganle ible laa ne quiambiaaz ygaa ne tib guielmban ne gdzindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie. <sup>3</sup> Ni niina ne laa dze co bdziñ, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

<sup>4</sup> Laa naa rxel guits rii lo luu gon Tit. Rzaac naa luu zig tib xpëed naa, sac nañ naa ni dib zdoö luu rliladz luu Dios zigne rliladz naa me.

Rnab naa lo Dios men ne nac Pxoaz ne, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

<sup>5</sup> Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë

zha ne rliladz Jesús, tib tib guiedz qui. <sup>6</sup> Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;

tibaque wnaa ne mbannie zho, men ne nacse tsieel zho,

zaacse quiachooob zho xpëed zho, rliladz mëed Dios (zëebd diidz pe guielntseeb ne noyun mëed, o rondgaa mëed diidz).

<sup>7</sup> Sac zha ne sca so lo grë zha ne no xnëz Dios, ib none gac zho tib zha ne ndzinli mban, sac gon xtsiin Dios ga gun zho. Nodne gac zho:

zha nlëeguic,

zha ngonziu,

zha nad ron diidz,

zha nguibdil,

zha ne rzonal dimi.

<sup>8</sup> Sinque none gac zho tib zha ne:

ndzinli nac guic,

ine niowse rdeed zho zaatne rbëz miech ne rdziñtaa lidz zho,

rioxco zho run zho niapse ncuaane rquiin lo samiech zho,

zional zho gac niapse mine nac diidzli,

rioxco zho run zho niapse mine rnabey Dios,

rrieelo zho rnabey zho guic zho, rnabey zho xcuerp zho.

<sup>9</sup> Ni none tibaque tsional zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha

ne rlëenie Xtiidz Jesús, guien zha co nonguielda ga glëenie zhow. <sup>10</sup> Sac no ndal grë zha ne nëd gon Xtiidz Jesús niina, ncuaane paat rquiind rseed zho miech, rquidie zho; ni lëepaa zha ne sca run nac zha Israel. <sup>11</sup> Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon, <sup>12</sup> tib menladzaque zho, tib men rac lo zho bzeet ganle zha nac zho zeene znu bnee me: "Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin." <sup>13</sup> Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho. <sup>14</sup> Bnee lo zho yquiaadiagdraa zho beelze pe grë godiidz ne rbeebey zha Israel, ni niicle yquiaadiagdga zho grë mine rnabey zha ne rlëenie Xtiidz Ndzon Jesús.

<sup>15</sup> Golgan ganle, grë miech ne ndzinli nac guic, zha ne mbe xquielrien, ncuaane no-taa, mbe naca lo zho; sangue zha ne rliladzd Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde

xquielrien zho mbed. <sup>16</sup> Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne gun ncuaane yquina.

## 2

### *Znu nac Xtiidz Ndzon Jesús*

<sup>1</sup> Saŋgue luu gon, none gnee luu lo grë miech qui zigne nacse Xtiidz Jesús. <sup>2</sup> Grë men bgui ne nac zha gol lo to i, bnee lo zho:

tibliladz gac zho,

gund zho ncuaane cuee xquielto zho,

quix zho biini, ncuaane ndzinli tsienal zho gun zho;

tiblique gac zho lo Xtiidz Jesús,

gleynie zho samiech zho, ni dziits so zho tel pe nactaa grë guielne ne noyan zho.

<sup>3</sup> Scaquegaa grë men wnaa ne nac zhagol, bnee lo zho:

gban zho zigne no gban zha ne nole xnëz Dios,

gzhixcuaad zho diidzguizh, gzuzd zho.

None zaacse gac zho, <sup>4</sup> zeena zha glu lo grë wnaa nguieg zha gban zho. Cseed zho grë wnaa nguieg:

gan zho tsieel zho,

gan zho xpëed zho,

<sup>5</sup> gac zho tib wnaa nix biini,

quitnied zho tsieel zho;

zaacse gun zho xtsiin zho,

niowse gac zho, niowse gnee zho,

gon zho xtiidz tsieel zho; zeena tsod pe nacne

gneeñe miech Xtiidz Dios.

<sup>6</sup> Ni scaquegaa bnee lo grë zha bgui nguieg, gac zho zha nix biini. <sup>7</sup> Luuzhal zaacse been grëse ncuaane no gun luu, zeena ga gwi zho ganle zha none gban zho. Zeene cseed luu zho, ine tibliladz goc, gund luu ne quitnie luu zho. <sup>8</sup> Bguib diidz ne gnee luu, zeena choot peet glisquid lo luu; ni scagaa, grë zha ne rlëenie Xtiidz Jesús, stoladz zho zeene gan zho guiend pe glisqui zho lo ne.

<sup>9</sup> Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me. <sup>10</sup> Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne ziana Xtiidz Dios, men ne psilaa ne lo dol.

<sup>11</sup> Grë diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa; <sup>12</sup> sac laa me racladz csaan ne grëse guielntseeb, csaan ne grëtaa ncuaane rleynie zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me. <sup>13</sup> Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne rililadz ne, me psilaa ne lo dol. <sup>14</sup> Sac gon, me bgaadz

guielgut ne nioguial ne, me bdiizh grëtaa guielntseeb ne bdziuun ne, psanmbe me ne lo grëtaa ncuaane bdziuun ne; gane niina, lo me ngab ne, ni none dzioxco ne gban ne zigne rnabey me.

<sup>15</sup> Grë min rii nagon pseed grë miech qui, bnee lo zho gban zhow. Zeene riegala gdzieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

### 3

*Znu riegual gban zha ne no xnëz Dios*

<sup>1</sup> Beencsoladz zho ganle none gon zho mine rnee grë zha ne nac wxtis, gac zho tib zha nguzobdiidz, ni ib soliaadzd zho gun zho grë tel pe ncuaane yquiin lo samiech zho. <sup>2</sup> Guien zho gneenëd zho samiech zho, ine zaacse gbannie zho samiech zho, niowse gac zho, niowse gnee zho, ni zeene cho lo gnee zho none ndooladz gac zho, ndooladz gnee zho.

<sup>3</sup> Sac gon haxta ne, ib peet riend ne glo, ntseeb goc ne, bdiits ne grë mine rnabey Dios; laa ne ziole nëz ne nitlo ne hor co, masaque bgadoo ne lo grëtaa ncuaane racladz xcuerp ne, lo grëtaa ncuaane ndzinlid ne bley ne bdziuun ne. Niapse guielntseeb bional ne, në rac zdoo ne rdzian ne ncuaane quianie, ncuaane run stib miech; zigtaa row rzhiizh zdoo zho gon zho ne, scaque ne, zha ne rdziantaa ne, row rzhiizh zdoo ne

bdzian ne zho. <sup>4</sup> Per bdzin dze, zeene laa Dios (men ne psilaa ne lo dol) blu ganle pa lotaa nac xquielwen me, pa lotaa nquialadz me miech, <sup>5</sup> laa me psilaa ne; per guiabd ne togo por pe ncuaane wen ne bdziuun new, sinque porne pquia zdoo me new. Psaambe me ne lo grëtaa xtol ne, rriequia gol ne ga stib, ni bhixcuua Espiritu Sant lo xquielmban ne. <sup>6</sup> Niapse por Jesús men ne psilaa ne ga, laa Dios pxeel Espiritu Sant rneedz me grëse guielbiini ne rquiin lo ne. <sup>7</sup> Por mine been Jesús ni mine been Espiritu Sant laa ne biaanwen lo Dios; ni porne noxco me ne gane bnabey me sca goca. Gane niina, ndion ne ib zgaa ne tib guielmban ne gdziind dze lozh, sac ib sca nac xtiidz me.

<sup>8</sup> Mine rne naa lo luu nu, diidzliw. Racladz naa tibaque gnee luuw lo grë zha qui, zeena grëse zho ne nac zho zha ne rililadz Dios, tsoxco zho gun zho niapse grë ncuaane ndzinli; sac gon, min co nac mine nonguiel, ni mincogaa rquiin lo grëse miech.

<sup>9</sup> Biche lo zha ne racladz tilidiidznie luu grë ncuaan paat rquiind, zig nac grë godiidz dien pe been grë mengol padzeela, dien pe nonguiel tsienal ne ley, te nonguielda ye. Ncuaane paat rquiind ga, loxaque runctila miech; ni lalnu rieguald gaquieta.

<sup>10</sup> Tel cho zha ne rsilo rgodil grë zha ne rililadz Dios, blisquiw lo zho. Bnee lo zho tib, tel gan luu rond

zhow, bnee lo zho stib; telne rondaque zhow, dzigo bzonëz zho gan zho dien pa nëz tsie zho. <sup>11</sup> Zha ne sca run, gase rlu ne zieniedraa guic zho gon zho mine rnabey Dios; sac nanpaa zho dol ga, ni laa zho runa.

<sup>12</sup> Laa naa no cxel tib zha ne guiaad i, yase cxel naa Artem o cxeelga naa Tic. Zeene glanso zho i, siguieel luu guiaad luu Nicópolis ga gdzieel ne; sac ib ga ni naa cuëz naa len mëë nal ne ziaad nu. <sup>13</sup> Laga no luu i, bioxco zaatne grielotaaw been xyudar Apol grop me licenciad Zenas. Bdeed grë tel pe ncuaane yquiin zho nëz; zeena peet gunfalte lo zho, grielo gdziin zho zaatne no tsie zho. <sup>14</sup> Grëse zha ne nacgrë ne ne rililadz ne Jesús, none cseed zho gun zho xyudar zha ne no liaadz; glu zho ganle rquiin zho, led zhlëd mban zho.

<sup>15</sup> Grëse zha ne no lo naa nu, laa zho rxeel bdiuzh lo luu i. Bzhiguiel bdeed tib zhibdiuzh no lo grëse zha ne rlynie no i; sac ye zho rililadz Jesús.

Guiaannie Dios to sca dien. Peet tsienied guic to, me gacnien to; sac gon me noxco grëse zhizgab to.

Pabl

## GUILTS NE PXEEL PABL LO FILEMÓN

¡Diuzh Filemón!

<sup>1</sup> Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús. <sup>2</sup> Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

<sup>3</sup> Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

<sup>4</sup> Ib riaanladzd naa luu, zeene rzodiidznie naa Dios, tibaque rded naa xquizh lo me squitaa noneedz me guielbiini lo luu. <sup>5</sup> Sac ziyonle naa squitaa dib zdoo luu rililadz luu Jesús, rleyne luu me, ni scaque rleyne luu grë zha ne ngab lo me. <sup>6</sup> Rnab naa lo Dios, grëse mine noseed luu grë zha ne no i, tsoguic zhow, zeena ygaa zho grëse guielnzaac ne rdeed Jesús lo grë zha ne ngab lo me. <sup>7</sup> Rley naa gon bets, sac zigtaa naa zigtagaa grëraa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleyne luu no.

<sup>8</sup> Niicle ne rieguala gnabey naa luu mine racladz naa gun luu, sac gon Jesús bzo naa none naa Xtiidz me, <sup>9</sup> per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa nioogyu nu loxaque ne quiayun naa xtsiin Jesús.)

<sup>10</sup> Niina gon ne laa Onésimo glanso lidz luu i stib, bzhiguiel zaacse pcaania me, gon ganle rriequia mëed nac me lo naa niina, sac nu len ladzguiib nu bne naa Xtiidz Dios lo me, xquizhgaad Dios bliladz mew.

<sup>11</sup> Nli glo tib zha peet xtsiind nac me lo luu, sanque niina gon, zigtaa lo luu zigtagaa lo naaw nroob yudar ne gun me. <sup>12</sup> Laa me biire ziaad lo luu i, niowse pcaania me; masaque been cuent naa i zial i. <sup>13</sup> Gocladz naa mbëz me lo naa nëz rii, zeena me niun dziin lo naa nu xcuent luu, ne znu nioogyu naa nu loxaque ne noseed naa miech Xtiidz Ndzon Jesús. <sup>14</sup> Per gocladzd naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

<sup>15</sup> Nli laa Onésimo biche lo luu palal dze; per niina ne laa me glanso lo luu stib, lëe guiaanle me lo luu i. <sup>16</sup> Per bien gon, sacdraa luu me niina zig tib zha ne runse xtsiin luu, gon ganle rriequia tib bets luu i, tib zha ne nz-



iuu lo luu i nac me. Tel naa, sca rzaac naa me, gacxe waa none gleynie luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

<sup>17</sup> Telne nlipaa rzac luu naa zig tib bets luu, porne tibaque men ne rliladz ne, nana sca been cuent naa i zial i, pcaania me zig nac zeene naa glanso lidz luu. <sup>18</sup> Ni tel no pe guielqui ne been me lidz luu, tel pe zëëbgaa me lo luu, lo naa bnaba. <sup>19</sup> Wi ganle, naazhal pquia diidz rii nu: Naa quizha. ¡Zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdziind dze lozh.

<sup>20</sup> Sca gon bets gaca, bzhiguiel been guielnzaac co; bloonley zdoo naa, bien ganle tibaque lo men ne ngab ne.

<sup>21</sup> Laa naa pxel guits rii lo luu, sac rien naa ible zon luu mine rne naa lo luu nu, rgobey naa haxta nroobraa mine gun luu lo mine rnab naa. <sup>22</sup> Lëë nëzle nu rnabaque naa lo luu, siguiel luu gneedz luu lidz luu cuëz naa zeene laa naa guial i; sac rien naa ib zun Dios mine quianab to lo me, zneedz me diidz guial naa guialgan naa to.

<sup>23</sup> ¡Dios guiaannie luu sca! Pcaania zhibdiuzh Epafr, men ne nioogyunie naa len ladzguiib nu loxaque ne rdziun no xtsiin Jesús. <sup>24</sup> Scaquegaa zla zha ne quiadziuunza no dziin, zig

nac Marcw, Ristarc, Demas ni Luc, gza zho laa zho rxeel bdiuzh lo luu.

<sup>25</sup> Jesús men ne rnabey ne, me glu ganle pa lotaa noxco me luu. ¡Me gunlay luu!

Pabl

## GUITS NE BEY LO GRĒ ZHA ISRAEL

<sup>1</sup> Padzeela, ndal vuilt bnee Dios lo grĕ pxozgoldoo ne, pxeel me grĕ zha ne biadteed xtiidz me lo zho, bnabey me grĕ zha co zhaase zhaase mod ne bnee zho. <sup>2</sup> Sangue niina, Xpĕēdpaa me Jesús pxeel me biadnee xtiidz me lo ne. Jesús men ne bzaagrop me grĕtaa ncuaane no, ni men ne bzo me gnabeya grĕsew. <sup>3</sup> Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grĕtaa ncuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zatne rieguial me ne nac me men ne rnabey.

<sup>4</sup> Ga rlu ganle men nroob nac Jesús, led lega lĕd me Xpĕēd Dios; men nroob nac me lo grĕ anjl. <sup>5</sup> Ni tib lo anjl bneed Dios zigne bnee me lo Jesús, zeene rĕb me: "Xpĕēd naa nac luu. Desde nadze laa zho gunbey ne Xpĕēd naa nac luu." Stib vuilt zeene bzeet me Jesús, rĕb me: "Xpĕēd naa nac me, naa nac Pxoze me." <sup>6</sup> Ni zeene biaad Jesús lo guidzliu; men ne nac Xpĕēdpaa me ga, rĕb me: "Grĕse xanj naa, none yquitsgzhib zho lo me." <sup>7</sup> Zaatne raquiet anjl, rneew: Tib mandadse nac zho lo Dios,

pale zigne rzhoon me sca rzhoon zho rie zho zatne rnabey me zho; me rnabey rlu zho zigne rlu bel.

<sup>8</sup> Sangue zaatne raquiet Xpĕēd me, rneew: Dios, luu nac men ne zobnabey, ni gdziind dze ne gree luu; zeene run luu guielwxtis, zigne rieguiala sca run luuw. <sup>9</sup> Ni palal rdziguiend luu grĕ guielntseeb, niapse ncuaane ndzinli, ncuaane nonguiel, min co rleynie luu; min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

<sup>10</sup> Laa stib lugar rnee: Men rnabey nac luu, luu bzaa guidzliu, luu bzaa gbaa dib nacsew.

<sup>11</sup> Nli zdziin dze nitlo grĕ ncuaan co, grĕsew zlozha zigne riozh grĕ lar,

<sup>12</sup> dzigo laa luu ctibĕda, zig rdibĕd grĕ lar, laa luu cuee stib min cub; zigne run zha ne rtsĕĕxab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

<sup>13</sup> Haxta rĕb Dios lo me: Cue naa nĕz derech, nu bzob, nieeda lozh gnaz naa zha ne rlĕĕ lo luu, csañ naa zho ladznia luu.

Nligaa men nroob nac me lo grĕ anjl, sac ni tib lo anjl bneescad Dios. <sup>14</sup> Lo me ga

sca bnee Dios, sac gon grē anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grētaa guielnē ne csaab me.

## 2

<sup>1</sup> Gacxe nagon waa, gotsaa guien ne ganle ib none dzioxcō ne wen wen gwi ne zha nac Xtiidz Ndzon Jesús mine zidzion ne; zeena gnitnēzd ne. <sup>2</sup> Sac gon, niicle zeene xanjlse Dios biadteed xtiidz me lo miech padzeela, ni gocnona; grēse zha ne güeynalda, pteed Dios zho caxtigw ne riegual zho. <sup>3</sup> ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew; <sup>4</sup> niicle Diosgaa, blactaa grē ncuaane quialu me, blactaa grē milagr ne run me, rlu me ganle ne nli diidzli biadseed zho ne; ni zhaagaa grē guielbiini ne ral zdoo me rdeed Espíritu Sant lo grē zha ne dib zdoo rnalo Jesús.

*Jesús nac men ne grieelo gdziñnie miech lo Dios*

<sup>5</sup> Zig nac lo guidzliu cub ne ndion ne naraa gneedz Dios, psand me ne anjl gnabey low. <sup>6</sup> Lo Xtiidz me zhobnee ganle zeene znu rēb David lo me: ¿Cho nac miech ne squitaa noxco luu zho? Zig nac tib men qui, ¿pe nacne squitaa runnon luu me?

<sup>7</sup> Tib blase dze psanwin luu me palal lo grē anjl; na laa luu psanglaa me stib, beennon luu me, bzo luu me mele gnabey.

<sup>8</sup> Grētaa ncuaane no, laa luu psana ladznia me.

Nli gard gac grē mine bnee David ga, <sup>9</sup> per ndionle ne ganle zha psanwin Dios Jesús lo grē anjl tib bla dze, ni blozh ga zeene laa me gut xcuent ne grēse ne, hor co laa Dios bire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me diidz gut Jesús psilaa me ne lo grēse xtol ne.

<sup>10</sup> Ible sca gocladz Dios, men nroob ne bzaa grētaa ncuaane no, ible me bdeed diidz scataa grē guielnē ne gon Jesús; gane niina, Jesússe nac men ne grieelo ner lo grētaa miech guizhiu ne no ygab lo me, gdziñnie Jesús zho lo guielndzon ne no me.

<sup>11</sup> Grēse ne ne nac ne zha ne psanmbe Jesús ngab ne lo Dios, yele ne nac mēed lo Dios. Gacxe waa, rley Jesús rnee me bets me nac ne; <sup>12</sup> no tib lugar lo Xtiidz Dios zaatne raquiet zeene znu rēb me:

Zne naa lo grē bets naa, gacnañ zho ganle cho nac luu;

ni zeene ycaalsa zho grē zho, tipse dzioolnie no luu.

<sup>13</sup> Stib vuelr rēb me:

Dios nac men ne rnalo naa. Ni rēb me:

Laa naa nu, quiayacnie naa grē zha ne nac xpēed Dios.

<sup>14</sup> Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me mendox, sac glo masaque ladznia ma no miech par gnitlo ma zho. <sup>15</sup> Sca psilaa me grë miech ne ngadoo lo guielgut; rriequia ngadoo zho, sac tibaque nonie xtseb guielgut guic zho.

<sup>16</sup> Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios. <sup>17</sup> Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne; <sup>18</sup> nroob nac grë guielne ne bded me, pquianal mendox nquuil ma me niab me lo dol. Ni ne mezhal bded grë min co, nanpaa me zha rzac zha ne nodeda, gane ible zacnien me zho.

### 3

#### *Gundipde to zdoo to*

<sup>1</sup> Bets, bzian, to ne nac to zha ne bredz Dios ngab to lo me; golguien cho nac Jesús, men ne pxeel me biadteed xtiidz me lo miech, men ne bzo me nac pxoz nroob ne rnalo ne niina.

<sup>2</sup> Tib men nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me

grë zha Israel. <sup>3</sup> Per Jesús nac men ne non, sac gon lo me ngab grë miech co, laa Moisés loxaque pquianap me zho. <sup>4</sup> Zig nac zha ne rzhixcuaa tib yu, nli non zho, per mazdraa non men ne bzaa grëtaa ncuaane no; ni lëe men co nac Dios. <sup>5</sup> Nli bin Moisés diidz been me xtiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho. <sup>6</sup> Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque ine nley gac ne dib zdoo ne yquiambiaaz ne gac grë mine nacle diidz gneedz me lo ne.

<sup>7</sup> Ndionle ne sca ganle, men ro nac Jesús, gacxe waa got-saa gwi ne ganle zha raquiet lo Xtiidz Dios rnee Espiritu Sant lo ne, rnee me:

Telne gon to gnee me lo to nadze,

<sup>8</sup> gundipde to zdoo to, gunde to zigne been grë pxoz-gol to, gocntseeb zho lo Dios, zeene sca mban noded zho, no zho grë dan ngan co.

<sup>9</sup> Ga raquiet ganle zeene znu rëb Dios:

Ncuaane lëbdraa guic naa been zho,

per dipse len choo iz, blactaa ncuaane gon zho ben naa.

<sup>10</sup> Zeene gon naa scataa nac zho,

laa ne gon zho diidz tsie zho nëz ne rlu naa lo zho,

lel zhaa ncuaane run  
zho;

nacne nli benngulëe zho guic  
naa.

11 Lo guielblëe co, bdetee naa  
diidz ndziñ zho zaatne  
nded naa ndziiladz  
zho.

12 Bets, bzian, golguien sca  
ganle ib guñdipde to zdoo  
to, zeena sozite to lo me ne  
nac me Dios nguiamban.

13 Gzataa dze, golnee lo grë  
zha ne nacgrë to (nasraa  
laga rdeeda diidz), zeena  
ni tib tsienald grë ncuaane  
runctal xtol miech, lozh ga  
lëew yquiaaqui gacntseeb to  
lo Dios. 14 Sac gon, par gdziñ  
ne zaatne no Jesús, ib none  
tiblique gac ne, tibaque gnalo  
ne Dios zigne bnalo ne me  
zeene psilo bdziuunbey ne  
me. 15 Ni nadzegazh none  
dzioxco ne min co. Golsoladz  
ganle zha rnee lo Xtiidz me:

Telne gon to gnee me lo to  
nadze,

guñdipde to zdoo to,

gunde to zigne been grë zha  
ne sca gocntseeb lo me  
ga.

16 Ni lëe min co gon bzhaac  
zha ne güeybee Moisés Egipt.  
Bin zho bnee Dios lo zho ni  
blozh ga gocntseeb zho lo me,  
17 beenctal zho xtol zho. Dipse  
len choo iz ne sca bio zho dan  
co, bieednie me zho. 18 Zeene  
gon me rond zho xtiidz me,  
nacne bnee me lo zho rëb  
me gdziñd dze ne gdziñ zho  
zaatne ndeed me ndziiladz  
zho. 19 Ni nligaaw bdziñd  
zho, grëse zho gut dan co; sac  
sca beenndip zho zdoo zho, ib  
bliladz zho mine rnee me.

## 4

1 Sca nagon bzhaac grë  
miech co. Gacxe nagon waa,  
zig nac niina ne laa me rnee  
ganle laa me gneedz lugar ne  
gdziiladzga ne, none ndzinli  
gac ne, zeena ni tib choot sacd  
zig bzhaac grë zha co. 2 Sac  
zigne nagon nonee Dios lo  
ne niina dien zha gdziñ ne  
zaatne gneedz me ga, znuque  
bnee me lo zho; per zhlëse bin  
zhow, ib bliladz zhow dib  
zdoo zho. 3 Sac loxaque zha  
ne dib zdoose rliladz xtiidz  
Dios, zha cose zrieelo gdziñ  
zaatne nacle diidz ga gdeed  
me gdziiladz zho. Min cocxe  
waa, zeene gon me bliladz  
zha co xtiidz me, bdeete me  
diidz ndziñ zho ga.

Niaale zaatne gdziiladz  
zho ga, nolew zeene blozh  
bzaa Dios grëtaa ncuaane  
no. 4 Sac gon rnee lo Xtiidz  
me: “Xoop ngbidz bzaa  
me grëtaa ncuaane no, laa  
zeene gol ngbidz gadz laa me  
bdziiladz.” 5 Niaalew nagon,  
sinque ne gocntseeb zho lo  
me gane bdeete me diidz  
ndziñ zho.

6 Grë zha ne glo gocnan  
xtiidz me ga, brieelod ndziñ  
zho; per zig nac niina, laa me  
bii quiambëz sëeb grëraa zha  
ne no sëeb. 7 Gacxe waa, laa  
me biire pso stib dze ne yгаа  
zho guielnzaac co. Lëe min  
co ga znu bzeet David, zeene  
rëb me: “Telne gon to gnee  
me lo to nadze, guñdipde to  
zdoo to.” Ndaldoole iz sca  
bzhaac grë zhagol co, dzig-  
oraa znu bzeet David; 8 ga  
nagon rlu no stib lugar ne

gdziiladz miech. Nacdraaw zaatne bdziñnie Josué grē zha ne biaan zeene blozh gut grē zha ne gocntseeb ga; sac telne lēēle lugar co ga, nsodraa Dios stib dze ne yгаа miech guielñzaac co. <sup>9</sup> Miñ co nagon, ndion ne ible no stib lugar co, ni ga gdziñ grēse zha ne ngab lo Dios. <sup>10</sup> Grēse zha ne gdziñ ga, gasi laa zho gdziiladz lo grētaa xtsiñ zho, zigne bdziiladzaque Dios zeene blozh bzaa me grētaa ncuaane no.

<sup>11</sup> Gacxe nana sca, golgotsaa dzioxcō ne dziuun ne mine rnabey Dios, zeena gdziñ ne ga; dziuund ne zigne been grē zha wladz ne sca bind xtiidz me. <sup>12</sup> Sac Diossi gon, diidz ne rnee me, nona. Zeene rnee me, rien ne grēse mine nac ne. Nan me pe no guic ne, pe rza zdoo ne; niicle ncuaane rzac ne mazdraa ngueetsa, nan mew. <sup>13</sup> Tsod ncuaane tsongueets lo me. Grēse ncuaane rac, me ran; ni tib tib ne, lo me cueero ne grēse tel zha mban ne.

### *Lēē pxoz nroob ga nac Jesús*

<sup>14</sup> Per zig rne naa ga, rdzi-aap ne tib pxoz nroob niina, ni pxoz cosi men ne bzoquia gbaaw. Lēē me ga nac Jesús, men ne nac Xpēēd Dios, me none gnalo ne; none tiblique gac ne. <sup>15</sup> Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grētaa mod ne rquiil mendox ne par gunc̄tal ne xtol ne. Bzhaac me zigne rziaacaque

ne niina, lēēraasi biabd me lo dol. <sup>16</sup> Gacxe nagon waa, ine tibliladz golgotsaa gbig ne lo Dios, ndion ne ganle ible squia zdoo me ne, ni ible zancien me ne zeene rquinpaa ne gun me xyudar ne, sac ne nligaa noxco me ne.

## 5

<sup>1-3</sup> Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grē gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaque-gaa riesan me mine guiooglo lo xtol me; sac gon, miech guidzliuque nac me. Ye me rzac zigne rzac grēraa miech, gane rien me rquia zdoo me grē zha ne peet rien, grē zha ne mazdraa ngoopdol.

<sup>4</sup> Ni zha ne sca rac pxoz nroob, led zhald zho rzēēb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob. <sup>5</sup> Zig nac Jesús, Dioszhal bzooblo me ne laa me nac zhipxoz nroob ne; men ne znu rēb lo me: “Xpēēd naa nac luu. Desde nadze laa zho gunbey ne Xpēēd naa nac luu.” <sup>6</sup> Ni rēb me:

Luu nac pxoz nroob, gdziñd dze ne gdzēē luu,  
luu gac zig pxoz Melquisedec.

<sup>7</sup> Zeene bii zo Jesús lo guidzliu rii, tib vuelt mban rac me zig zet me lo guielñē,

haxta roon me, nguiedz bnee me bnab me lo Dios csilaa Dios me lo guielgut co; sca-gaa Dios psilaa Dios me, sac tib men nguzobdiidz nac me. <sup>8</sup> Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielnë ne bded me. <sup>9</sup> Ni ne sca bin me diidz been me grëse minë bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdzindraa dze lozh lo zho; <sup>10</sup> ni bzo Dios me nac me pxoz nroob niina, zigne gocaque Melquisedec pxoz nroob.

*Gacde to zig cho mëdyeen*

<sup>11</sup> Racladz naa gneraa naa lo to nu pe run zhipxoz nroob ne, zha nac me, per ne squi rac to peet nëde to yquiaadiag to, ngan gne naa lo to zha naca. <sup>12</sup> Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbiire csilo cseed to stib. Rac mëdyeen to i gon, laa ne gow to ncuaaane row zha brooble lel racladz to tibaque nidz guie to. <sup>13</sup> Sac gon, mëdyeen rie nidz, ni rien win dien pe nac ncuaaane ntseeb, pegaa nac ncuaaane wen. <sup>14</sup> Saingue grëloraa guielwagw, min co rquiin grë zha gol, ni zha co niinile zho, rien zho pe nac ncuaaane wen, pegaa nac ncuaaane ntseeb.

**6**

<sup>1</sup>Gacxe waa, none tsoxco to gac to tib zha gol. Guñde to

ne minë pseedse to glo zeene psilo bnalo to Jesús, lo min co ib grieede to. Laa to pseedle ganle:

zha none csaan to guielntseeb gbig to lo Dios,

zha none gnalo to Dios,

<sup>2</sup> zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grë mengut,

zha gon Dios guielwxtis ne gloozh grëtaa guielntseeb.

<sup>3</sup> Grële min rii nan to. Laa niina telne zneedz Dios diidz, laa to cseed minë noraa gacnan to.

<sup>4</sup> Sac gon, no ncuaaane grieelod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoos Dios psilaa me zho, bdeed Espiritu Sant guielbiini lo zho, <sup>5</sup> bien zho zha wentaa nac xtiidz me, zha grieelo sëeb zho zaatne ziaadyob gdziñ zho (zeene glu Dios grë poder ne rap me), <sup>6</sup> ni lozh ga csaan zhow, tsienal zho guielntseeb stib; grieelod nose co guic zho gbiire sëeb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me. <sup>7</sup> Zig nac tib lë liu ne rgaa grëse nisguie ne riab, zeene rrieequia grë ncuaaane ran zho low, runlay Diosa; <sup>8</sup> laa telne niapse yag guiets, niapse grë guizh guiets roob low, paat rquiinda; ib tedsod zdzibdee Diosa, ni lozh ga znabey me tseca. Scaque

nagon nac miech ne runbey Xtiidz me.

<sup>9</sup> Bets, bzian, laa naa rne min rii lo to, per guiabde to togo mine run to rzet naa. Tel to, rien naa brieete lo lo grē guielntseeb, lole Dios ngab to niina. <sup>10</sup> Nanle to ganle, Diossi ncuaane riegual tib tib miech, min co rdeed me lo zho. Grētaa ncuaane noyun to niina ne rleyne to me, grē tel zha rquia zdoo to been to xyudar grēraa zha ne no xnēz me, ni noyungaa tow niina; grēsew ible guiaanladzd mew. <sup>11</sup> Mine rzoobladz naa, tibaque squi nguieel gac to, zeena scagaa zgaa to grē ncuaane nacle diidz gneedz Dios lo to. <sup>12</sup> Sac dzigosi guieete to, ib gbechde to; masaque laa guic to tsienie ycaania to grētaa mine bneele me gneedz me lo ne; zigne been grē zha ne nlipaa bnalo me.

### *Mine rnee Dios run mew*

<sup>13-14</sup> Golsoladz ganle, zeene psan Dios xtiidz me lo Abraham been mew zigne bneese mew. Lēē hor co rēb me laa me gunlay Abraham, ni ndal gun me lo xtii Abraham. Ni lēēque lē me bzeet me, par glu ne ible zun me mine bnee me. <sup>15</sup> Scagaa Abraham, tiblique bliladz me ne laaw gac; lēē gdib pquiambēz me bdzin dze co.

<sup>16</sup> Zig nac miech, par glu ne zun zho mine rnee zho, dzigo rzeet zho lē tib men ne mazdraa non lo zho; ni deque sca run zho ga rlu ne gdzēedraa xtiidz zho. <sup>17</sup> Scagaa Dios, laa

me bzeet lē me sac guien draa stib men ne mazdraa non lo me. Ga blu me ne ible zun me mine bnee me ga.

<sup>18</sup> Zeene sca rsan Dios didz, ni rzeet me lē me, choot grieelodraa ctsēē mine rnee me, ni niicle megaaw nacd me men ne rquidie. Gacxe waa, grēse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz ygaa ne. <sup>19</sup> Min co nagon, none tiblique gac ne zig tib barcw ne dziits zob lo nis, sac no ncuaane naaza len nis; ndion ne ganle, ible zdzin ne len yadoo nroob ne zob Jesús. <sup>20</sup> Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzēē me; laa me nac zig goc pxoz Melquisedec.

## 7

### *Pxoz nroob ne lē Melquisedec*

<sup>1</sup> Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeyguncxoon me zha ne no grē guiedz ne rlēē lo me, Melquisedec goc pxoz ne güeydzieelo me, beenlay Melquisedec me. <sup>2</sup> Dzigo lo grēse ncuaane bla me lo grē zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne



run guielwxtis”; ni rneeque zho me “rey ne rcuëz lo dil”, sac Salem (guiedz ne goc me rey ga) nac diidz co zig nac ne rnee ne “zaatne guieñd dil”.  
 3 Ib raquiete dieñ cho goc pxoz me, dieñ cho goc xniaa me, dieñ cho gocgaa xmengol me; niicle raquietegaa dieñ zha blanso me lo guidzliu, dieñ pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdziñd dze gdzëe.

4 Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec. 5 Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quianie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho. 6 Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuana co lo me.

b) Me beenlay Abraham; ni laa Abraham biaanniele diidz pe nac mine gdeed Dios lo Abraham. 7 Ni ndion ne ganle men nroob nac zha ne runlay.

8 c) Grë pxoz ne sca rcaania gon co, rdziñ dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

9 d) Rrieequia ye grë pxoz ne brieequia lo zha xtii Leví ye zho ga bdeed gon

lo Melquisedec, zeene sca bdeed Abraham gon co lo me. 10 Sac niicle ne gard gal Leví hor co, per racle Leví cuent ga, sac xpëedaque Abraham goc Leví.

11 e) Grë pxoz ne brieequia lo xtii Leví ga, zig nac Aarón; zha co nac zha ne blu ley lo menguedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

12 Zeene sca ptsëe Dios lo dii ne ziaad pxoz, hor co nacne bdzëeque grë xley pxoz. 13-14 Ndion ne ganle, Jesús men ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz. 15 Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec, 16 nacd mew porne ziaad me lo xtii Leví, sinque porne nac me tib men ne gdziñd dze lozh xquielmban. 17 Zigne raquietaque me, zaatne rnee: Luu nac pxoz nroob, gdziñd dze ne gdzëe luu,

luu gac zig pxoz Melquisedec. 18 Gataa laa grë xley pxoz bianañ tib lad, sac grëse mine bnabey pxoz hor co run miech, paat pquiinda. 19 Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalo ne.

<sup>20</sup> Dioszhal rëb Jesús gac tib pxoz ne gdziṇd dze gdzëë, ni haxta bzeet me lë me parne glu ne ctsëed me xtiidz me; <sup>21</sup> laa grëraa pxoz ne ziezo, ib beeṇd me ne sca nzeet me lë me. Sac gon, lose Jesús znu rëb me:

Luu nac pxoz nroob, gdziṇd dze ne gdzëë luu,  
luu gac pxoz nroob zig  
Melquisedec.

Naa rnew, ni naasi ctsëed naa xtidz naa.

<sup>22</sup> Miṇcocxe waa ndion ne, didz ne biaannie Dios miech ga gdziṇd dze ne gdzëëw; sac gon, por Jesús laaw noyac.

<sup>23</sup> Glo, ndaldoo zha ne goc pxoz, sac grëse zho miech nac zho, rdziṇ dze ne laa zho ret, zeene laa tib zho ret laa stib zho rzo. <sup>24</sup> Saṅgue Jesús, led yed me grieë par dien cho stib so, sac mesi gdziṇd dze ne guet me. <sup>25</sup> Gacxe waa, grëse ne ne nac ne miech, zha ne gbigtaa lo me parne ycaania Dios zho, ible silaa me zho lo doḷ, ni lëë blaale zho ga. Tibaque laa me gnab lo Dios por zha, sac gdziṇd dze ne guet me.

<sup>26</sup> Jesús nac tib meṇ ne nli-paa mbe, ni tib doḷ rapd me, ib rdziguiend me guieḷntseeb; gacxe waa, beēṇnon Dios me, ni lëēpaa pxoz nroob co nagon rquiin ne. <sup>27</sup> Led yed me nac zigne goc grëraa pxoz nroob ne bio glo. Grë pxoz co, gzobse dze rut zho ma ne rgogon zho lo Dios, parne csaṇmbe me zho lo xtoḷ zho; ni rutaque zho ma ne riogon lo Dios parne guiaanmbe grëraa meṇguiedz;

saṅgue Jesús, tibaque vuelt bdeed me gon co, ni mezhal goc gon co. <sup>28</sup> Stiba, glo, zha ne rgaa rac pxoz nroob zigne rnabey ley, ye zho ruṇctal zho xtoḷ zho; saṅgue niina ne laa Dios psan stib xtiidz me, laa me bzo Jesús nac me zhipxoz nroob ne, mesi tib meṇ mbe nac me, ni gdziṇd dze ne gdzëë me.

## 8

*Jesúsle nac meṇ ne rteed xtiidz ne*

<sup>1</sup> Lo grë miṇe quiane naa nu, miṇe racladzpaa naa gac-naṇ to nac miṇ rii: Jesús nac zhipxoz nroob ne, ni zaatne zob Dios, meṇ nroob ne rnabey, ga zob me. <sup>2</sup> Gbaa no me, ga quiayun me dziin zaatne nacpaa yadoo, Dios bzaa yadoo co, led yedraa miṇ co bzaa miech.

<sup>3</sup> Ndion ne gaṇle, zha ne rac pxoz nroob, laa zho rzo, zeēna grë ma, grëgaa ncuaaṇe rgogon miech, zha rdeeda lo Dios; scaquegaa Jesús, ye me bdeed me gon lo Dios. <sup>4</sup> Teḷ niaca miṇe bii no me lo guidzliu niina, grieelod gac me pxoz nroob, sacne nole pxoz nroob ne rdeed grë gon co lo Dios, zigne rnabey ley. <sup>5</sup> Grë dziin ne ruṇ grë zha ne rac pxoz nroob lo guidzliu rii, lega nacsew zig zhimplë grë miṇe rac gbaa; yadoo ne rio zho lo guidzliu riiw, lega nacsew zig zhimplë yadoo ro ne zob gbaa. Goḷsoladz gaṇle, zeēne laa Moisés gzaa yadoo, rëb Dios lo me: “Zigne gon bluse naa lo luu guic gui ga,

sca none gzaa luuw.”<sup>6</sup> Gacxe waa, tel Jesús men ne nac zhipxoz nroob ne niina, mazdraa non dziin ne quiayun me; sac gon, zeene pso Dios me gac me pxoz nroob, psan Dios diidz stib zha grieelo ygaa ne grë guielnzaac nroob ne gneedz Dios lo ne, ni me gunctsin ne lo Dios.

<sup>7</sup>Wenraa nac diidz ne psan Dios ga, sac telne niaca nlëb diidz ne biaan glo ga zeene rëb me zha guiaanwen miech lo me, dzigo nod pe nacne mbiire nsañ me stib xtiidz me. <sup>8</sup>Ni bzeetlegaa me ne laa me csañ stib xtiidz me, sac grë zha ne biaan nie xtiidz me glo, loxaque beenctal zho xtol zho. Min co ga raquiet lo Xtiidz me, zaatne znu rnee:

Rnee men ndzon ne rnabey:  
Zdzin dze ne gbiire guiaan no diidz grë no zha Israel, ni zha Judá.

<sup>9</sup>Per gacdraaw zig diidz ne biaan no grë no xmengol zho,

zeene rrieequia bzheen naa nia grë zha gol co, blee naa zho lo caxtigw ne noded zho Egipt;

sac ni lalnu güeyald zho didz ne biaan no ga,

nacne niicle naagaaw, psaanladz naa zho.

<sup>10</sup>Zeene gdzin dze co, znu nac diidz ne guiaan no grë no zha Israel:

Grëse xley naa, nis nis gacnañ zhow,

zig nac zeene haxta len zdoos zho, len guic zho zhobneew.

Dzigosi laa zho gunbey naa ne naa nac xDios zho, ni niicle naagaaw, laa naa gunbey zho ne lo naa ngab zho.

<sup>11</sup>Dzigosi yquiindraa tso zho gnee zho lo menlidz zho, lo menladz zho: “None gunbey luu Dios gon.”

Sac len dze co, grëse zho runbeyle zho naa, niicle zha ne mazdraa wina, niicle zha ne mazdraa nona.

<sup>12</sup>Tel pe nactaa xquientseeb zho, zun naa zhow pardon;

gdzindraa dze csoladz naa grë falt ne been zho lo naa.

<sup>13</sup>Zeene sca bzeet me ne laa me csañ stib xtiidz me, ga rlu ne rquiindraa mine biaan glo ga; sac nac grë ncuaan gox rquiindraaw, laaw nole par nitlow.

## 9

### *Yadoo ne no gbaa*

<sup>1</sup>Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaa yadoo ne gac zaatne tsiegan zho me.

<sup>2</sup>Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nëz ro yadoo, ga nac zaatne Nda, ga rzo tib candler ne niaa niapse or, ni rzo tib mezh ne rbib guietxtil ne naclyle. <sup>3</sup>Laa stib lena, mine riaan nëz zhits lar co, ga nac zaatne Ndadoo; <sup>4</sup>ga rzo tib yag

ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aarón, bar ne bdzib ben ga; leen coque no tib guies win niaa niapse or, len guies co no palal maná, guietxtil ne bguiaan Dios grë mengol co. Lëe guin co biaan par csoladz zho zha nac diidz ne biaan Dios zho. <sup>5</sup> Zhits guin co zoli chop anjl ne bzaa zho, masaque rbebel grop anjl co rtsiig me xiil me rtse me zhits guin co, zaatne rliaal xchen grë ma ne riongon lo Dios, par guiooglo lo xtol menguedz. Par gne naa zha nacraa grë ncuaan co, rneedzraaw diidz nu niina.

<sup>6</sup> Sca nagon biao yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho. <sup>7</sup> Laa stib lena, zaatne Ndadoo ga, loxaque men ne nacse pxoz nroob rrieelo rzëeb ga, ni tibaque vuelt tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guiogloogaa lo grë xtol menguedz, dol ne biend zho been zho. <sup>8</sup> Gase na ganle rlu Espíritu Sant lo ne, gacd sëeb grëraa miech zaatne Ndadoo ga, laga bii sca chop len nac yadoo.

<sup>9</sup> Golgotsaa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho,

per brieelod grë ncuaan co nsanmbew zdoo zho; <sup>10</sup> sac hor co, laa zho güeynal grë ncuaane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacncub diidz ne biaan Dios zho ga. <sup>11</sup> Sanguie niina ne laa Jesús biao, niina ne mele nac pxoz nroob, por me laa miech yгаа grë guielnzaac ne bneele Dios ga. Bdzin dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech), <sup>12</sup> zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vuelt bzëeb me, ni lëe psanmbele me ne lo grëtaa xtol ne ga. <sup>13</sup> Nana, telne scataa pquiin zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par gbiche dol co guiaanmbe zho lo Dios. <sup>14</sup> ¿Pe lel xchen Jesús dzigo? Mazdraa gon nac xchen me, ible sanmbew ne lo grëtaa ncuaane paat rquiind ne bdziun ne glo, niinasi zrieelo dziun ne mine rnabey Dios nguiamban. Sac gon, tel Jesús ni tib dol rapd me, ni Espíritu Sant bloo zdoo me bdeed me me goc me tib gon mbe. <sup>15</sup> Gacxe waa, Jesúsle nac men ne gdziinnie

ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zigtaa zha ne biaanmie diidz glo cow, zigtagaa zha ne nobedz me len dze riw; niinasi grëse zho zrieelo yгаа zho guielmban ne gdzind dze lozh ga, zigne nacle xtiidz me.

16 Gotsaa gwi ne ganle, xtiidz miech, mine rсан zho par dien zha gac grëncuaane rap zho zeene laa zho guet, laga bii mban zho grielod gacnon diidz co; 17 sinque haxta ret zho, dzigo laa diidz co racnon. 18 Scaque nagon, zeene psan Dios xtiidz me glo, gutgazh ma ne brieen ren bzhiee dzigora laa diidz co psilo gocnon. 19 Golgotsaa csoladz ganle, zeene blozh bnee Moisés lo menguedz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co, 20 ni rëb me lo zho: "Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya." 21 Blozh ga, blaalque me ren co gdipse len yadoo, ni blaal mew grëse lad ncuaane racdziin len yadoo.

22 Sca nagon nac ley co, grëse ncuaane no guiaanmbe, ib ren rсанmbew; scaque miech, haxta rzhiee xchen

ma ne riogon dzigora ri-ooglo lo xtol zho. 23 Mincocke waa, sca pxiee Moisés xchen ma biaanmbe yadoo co ni grëncuaane racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëe ren co goc xchen Jesús. 24 Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa. 25 Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vult güeylogon me me. 26 Telne ye me niun zig run grëraa pxoz co, pe zhistaale vult na ziyet me wlal ne bre guidzliu, iper na, led yed me! Zeene laa dze bdzin, laa me baaad, xchenpaa me bzhiee, ni tibaque vult bzhieew psanmbew ne lo dol grëse ne ne nac ne miech. 27 Zigne biaan tibaque vult ret miech, lozh ga zeene laa Dios gun guielwxtis, laa zho none gacredz lo me; 28 scaquegaa tibaque vult gut Jesús bdiizh me xtol grëse miech; ni dzin ne guiaad me stib, per guiaatraa me par biire quizh me xtol miech, sinque laa me guiaadsilaa grë zha ne quiambëzlo me, zeena gand zho grëtaa guielne ne csiaab Dios.

*Tibaque vuelt goc Jesús gon*

<sup>1</sup> Grë mine rnabey ley run pxoz, lega nacsew zig tib zhimlë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieeloda nsañmbew zho lo dol. <sup>2</sup> Tel niaca mine gon cose nsañmbe zho, dzigo tibtaa vuelt ne nisañ zhow lëë niaanmbele zho ga; niicle zhagaaw, nienpaa zho ne laa zho mbele. <sup>3</sup> Per na, gzobse iz zeene laa zho risañ gon co rsoladz zho ne bii no zho lo dol, <sup>4</sup> sac gon, grieelod ne xchense ngon yeen, xchense chiv yeen guiaanmbe miech lo dol.

<sup>5</sup> Mincoxe waa, zeene laa Jesús biaad lo guidzliu, pe led znu rëb me lo Dios:

Grë xchen ma, grë ncuane riaadlogon zho lo luu, racladzdraa luuw; gane bnabey luu goc naa miech, zial naa lo guidzliu.

<sup>6</sup> Grë ncuane rzëëg zho, grë ren ne rxiee zho, par guiaanmbe zho lo dol; racladzdraa luu gan luuw.

<sup>7</sup> Gane niina, laa naa zial nu Dios, zeena gun naa mine gnabeytaa luu; zigne zhobneele lo Xtiedz luu gac naa.

<sup>8</sup> Gotsaa gwi ne ganle, blozhse rëb me racladzdraa Dios tso zho pe ncuane tsielogon zho lo me, tso zho cxiee zho xchen ma, gzëëg zho ma par guiaanmbe zho (niicle ne lo ley sca rnabey gun zho); <sup>9</sup> dzigo rëb me:

“Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psañ Dios ga glo, laa stib diidz cub ne biaanñie Dios miech ga psilo noquiin. <sup>10</sup> Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psañmbe me ne lo dol. Tibaque vuelt sca goc me gon co, ni lëë psañmbele me ne ga.

<sup>11</sup> Grë pxoz, gzobse dze rio zho len yadoo rdziib zho grë gon ne risañ miech; blactaa iz tibaque sca nodziib zho grë gon co, per brieeloda nsañmbew miech lo dol;

<sup>12</sup> sangue Jesús gon, tibaque vuelt bzhiee xchen me goc me gon psañmbe me miech lo dol. Laa niina, cue Dios nëz derech ga zob me, <sup>13</sup> quiambëz me gdzin dze zeene grëse zha ne rlëë ran me, laa zho guiaanwin lo me. <sup>14</sup> Tibaque gon ne bdeed me ga, psañbegazh me grëse zha ne nodziñnie me lo Dios. <sup>15-16</sup> Ni nligaa scaw, haxta Espiritu Sant, zeene blozh bzeet me zha rëb Dios guiaanñie me zha Israel diidz stib, zha nis nis gacnañ zho xley Dios, zig nac zeene haxta len zdoo zho, haxta len guic zho zhobneew; <sup>17</sup> dzigo bzeet me zeene znu rëb Dios: “Tel pe nactaa xquieñtseeb zho, tel pe nactaa xtol zho, gdziñdraa dze ne csoladz naaw.”

<sup>18</sup> Golgotsaa gwi ne sca ganle, rsoladzdraa Dios xtol ne sac laa Jesús bdiizhlew; gacxe waa, nodraa dzio ne

dien pe gon ne gdeed ne par  
csanmbe me ne.

### *None gbig ne lo Dios*

<sup>19</sup> Bets, bzian, glo loxaque  
men ne nacse pxoz nroob  
rzëeb len yadoo zaatne  
Ndadoo ga; sangue niina,  
haxta zaatne Ndadoo len  
yadoo gbaa zrieelo gdziñ ne,  
sac xquizh xquielnzaac Jesús,  
bdeed me me bzhiee xchen  
me psanmbe me ne. <sup>20</sup> Zeene  
sca gut Jesús, rrieequia tib  
nëz cub ga pxal me par gdziñ  
ne zaatne ygaa ne guielmban;  
lëë nëz co ga bzhial zeene  
sca briez lar ne quia len  
yadoo ga. <sup>21</sup> Ni ne me nac  
zhipxoz nroob ne no me  
yadoo gbaa, <sup>22</sup> niinasi zacle  
gdziñ ne haxta lo Dios. Nana  
sca, dib zdoos ne golgotsaa  
gbig ne lo Dios, dib zdoos ne  
golgotsaa gnalo ne me, benque  
laa me psanmbele ne lo grëtaa  
ncuaane yozh ne rza zdoos ne,  
rza guic ne; rrieequia bgaz  
me ne tib nis mbe. <sup>23</sup> Tiblique  
sca golgotsaa gac ne, benque  
ndion ne ganle ible zdziñ dze  
ne gac mine rliladz ne; sac  
Dios psan diidz co, ni ndion  
ne rquidied me.

<sup>24</sup> Golgotsaa dzioxco ne  
cseedlsa ne gleyne ne zha  
ne nacgrë ne, ni dziuun ne  
ncuaane yquiin lo ne grë ne.  
<sup>25</sup> Dze ne nacle diidz ycaalsa  
ne dzioolnie ne Dios, ible  
none ycaalsa ne grëse ne,  
guionald ne mine run grë zha  
ne rzozit. None cso ne diidz lo  
grë zha ne nacgrë ne, conley  
ne zdoos zho dziits so zho lo  
mine rliladz ne; xco co none

dzio ne niina ne laa dze ne  
guiaad Jesús ziaadgaxle.

<sup>26</sup> Zha ne beenbeyle zha nac  
diidzli, ni lozh ga xtsiinpaa  
gunctal zho xtol zho, tsodraa  
gon ne csanmbe zho lo dol co;  
<sup>27</sup> lëëtaa mine tsieguial zho  
nac guielnëdnox ne ygaa zho  
zeene laa Dios gun guielwxtis;  
dze co laa me cxeel zho lo  
guidox, zaatne nitlo grëraa  
zha ntseeb ne gocndaan lo  
me. <sup>28</sup> Gotsaa gwi ne ganle,  
niicxe ley ne na pcaania  
Moisés padzeela ga, zha ne  
rguiits mine rnabeya, ni tel  
no chop tson zha ne gon ne  
nliw, niicle mazdraa mban  
rac zho ib rdedlaad zho rut  
zho zho. <sup>29</sup> Nana, ¿pe lelque  
zha ne dzigo quits mine  
rnabey Jesús? Mazdraa gon  
nac guielnë ne ygaa zho, sac  
noguitnie zho xchen Jesús ga,  
rzhidznie zho Espiritu Sant  
ga sca gun zho. Noguitnie  
zho ren co, ni lëew bzhiee  
biaanmbe zho lo dol, lëew  
bzhiee zeene psan Dios stib  
xtiidz me zha gbig miech lo  
me; rzhidznie zho Espiritu  
Sant, ni men co no zhixco  
zho. <sup>30</sup> Zha ne sca gun,  
ible nroob guielnë ne ygaa  
zho; sac ndion ne ganle  
zha nac xDios ne, me znu  
rnee: “Naa ragual gun  
guielwxtis; naa gded mine  
riegual tib tib miech.” Ni  
zhobneeque lo Xtiidz me:  
“Grëse miech, lo me cuero  
zho grë ncuaane been zho.”  
<sup>31</sup> ¡Ne nligaa ncuaane gdzieb  
ne ted grë zha ntseeb ne  
sca guiab ladznia Dios, men  
nguiamban!

<sup>32</sup> Sangue to, golsoladz ganle zha bded to zeene griinpaap silo bnalo to Jesús, niicle ne scataa nroob guielnē ne gon to, per beenctalde to xtol to.

<sup>33</sup> Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrē to. <sup>34</sup> Grē zha ne biab ladzguiib, mbanse rac zdoos to ran to zha rac zho; niicle zeene biaad zha ne biaadla grē ncuaaane nacchen to, psaan to ptiche zhow, peet güeyniedaque guic to; sac nanle to mazdraa nac guielnzaac ne ygaa to gbaa, ni mincosi gdziind dze ne nitlow.

<sup>35</sup> Nana sca, scaque dziits golso; sac telne tibaque gnalo to Dios, ible zgaa to guielnzaac ne gneedz me. <sup>36</sup> Ible guiaand zdoos to, tibaque dziits golso golgun mine rnabey me; zeena ygaa to grē ncuaaane bneele me gneedz me lo to. <sup>37</sup> Golsoladz ganle, znu zhobnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

<sup>38</sup> Grē zha ne zienal mine nac diidzli, ible zban zho sac rnalo zho naa;

laa telne guiaan zdoos zho sozit zho lo naa, ni lalnu gleynied naa zho.

<sup>39</sup> Sangue ne gon, nozozite ne lo Dios, sinque dib zdoos ne rnalo ne me. Grē zha ne sca rzozit lo me, nēz ne nitlo zho ga zie zho; laa ne gon, ible zgaa ne tib guielmban ne

gdziind dze lozh, sacne znu dib zdoos ne rnalo ne me.

## 11

*Zhapaa nac ne dib zdoos ne gnalo ne Dios*

<sup>1</sup> Znu nac ne dib zdoos ne gnalo ne Dios. Zha ne dib zdoos rnalo Dios, tiblique ziene guic zho ne ible zgaa zho mine quiambēz zho gdeed me lo zho; niicle ncuaaane gard gan zhow, per rzac zho zig nac zeene ranle zhow. <sup>2</sup> Zig nac grē xmengol ne, ne scacxe waa bnalo zho Dios gane bleynie me zho.

<sup>3</sup> Scagaa niina, ne dib zdoos ne rnalo ne Dios, gane rililadz ne me bzaa guidzliu ni grēragaa ncuaaane no, zeene bnabey me biaaw, niicle ne peet guieind hor co.

<sup>4</sup> Gotsaa gwi ne ganle lēē bla zhagol ne dib zdoos bnalo Dios nu:

Zig nac Abel, ne dib zdoos me bnalo me Dios, gane bleynie Dios gon ne bdeed me, lēdle gon ne bdeed bets me Caín. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze, niicle ne gutle me, bii raquiet ganle pa lotaa dib zdoos me bnalo me Dios.

<sup>5</sup> Scaque Enoc, ne dib zdoos me bnalo me Dios, gane gute me, zomban me zeynie Dios me gbaa, choot gon draa me. Zeene bii zomban me lo guidzliu, blu Dios ne rdziladz Dios zha mban me. <sup>6</sup> Sac zha ne rnalod Dios dib zdoos, grieelod gban zho zigne



rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

<sup>7</sup> Zig nac Noé, ne dib zdoo me bnalo me Dios, gane bliladz me xtiidz Dios zeene rëb Dios lo me pe nac ncuaane ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsieel me, blaa zho lo guieñe co. Ni ne sca bnalo me Dios, gane ible zgaa me grë mine gdeed Dios lo grë zha ne biaanmebele lo Dios; laa grë zha ntseeb co, ib bnalod zho Dios, gane sca bnitlo zho.

<sup>8</sup> Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz brie me zie me, niicle ne nand me zha nac dan co. <sup>9</sup> Ni ne sca rnalo me Dios, gane niicle bdziñ me lo liu co, laa me wbanse ga zig tib menzit. Lega nacse len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co. <sup>10</sup> Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

<sup>11</sup> Scaque Sar, wnaa ne goc tsieel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo

me bliladz me ible zun Dios mine bnee me ga. <sup>12</sup> Ye Abraham, mengol-le me, men ne yquianiedraa mëed nac me, ni zeene laa Sar gop mëed co, miech guizhiu ne briequia lo dii co; pale mel ne ndziib gbaa, yuzh ne ndxieгаа ro nisdoo.

<sup>13</sup> Gza zha ne blozh goquiet nu, gardaque ygaa zho grë mine bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zgaa zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nacse zho zig tib menzit. <sup>14</sup> Ni ne sca bien zho tib ziaadtedse zho lo guidzliu rii, ga rlu ne dzigoraa gdziñ zho zaatne gacpaa ladz zho. <sup>15</sup> Sac telne niend zho ne scaw, znuse mbire zho ney zho zaatne brie zho ga. <sup>16</sup> Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne rililadz zho, laa me bzhixcuaale guiedz ne gac ladz zho ga.

<sup>17</sup> Zeene been Dios Abraham prueb dieñ pe nli rnalo Abraham me, rëb me cogon Abraham xpëed Abraham Isaac; ne dib zdoo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon. <sup>18</sup> Ni laa xtiidz Dios nac ne win gunctal lo xtii me! <sup>19</sup> Laa me niut win, sac nanpaa ne nroob poder ne rap Dios, telne niet

win nrieelo mbeeban Dios win; ni nligaa rrieequia gut win ga ni biire brieeban win stib.

<sup>20</sup> Niiclegaa Isaac, ne dib zdoo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

<sup>21</sup> Scaque Jacob, ne dib zdoo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

<sup>22</sup> Scaque José, ne dib zdoo me bnalo me Dios, gane zeene laa me merle guet bzeet me ne ib zdin dze griece zha Israel Egipt; haxta psan me diidz güey zho xtsit me zeene laa zho griece ga.

<sup>23</sup> Zig nac pxoz Moisés, xniaa Moisés, ne dib zdoo me bnalo me Dios, gane bloolan me mëed niow yeen co lidz me tson mëe; ib bdziebd me miñe bnabey rey Egipt.

<sup>24</sup> Niiclegaa Moisés, ne dib zdoo me bnalo me Dios, gane zeene laa me broob bdeetraa me diidz niunbey zho me zig xpëedmiag rey; <sup>25</sup> laa ne niaan me lidz rey nleynie me grëncuaane niunctal xtol me, mazd bleeladz me me psacsi zho me grë menladz me. <sup>26</sup> Bien me ne nonguielraaw ted me guielnë zig pteed zho Jesús, lëdle niaan nie me grëncuaane non ne no Egipt; sacne miñe mazdraa nonie

guic me nac guielnzaac ne gdeed Dios lo me.

<sup>27</sup> Ne sca rnalo me Dios, gane bdziebd me xquieldox rey, tiblique been me guic me briece me Egipt; sac nanpaa me niicle rand me Dios, per Dios nacie me. <sup>28</sup> Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

<sup>29</sup> Grë zha Israel co, ne dib zdoo zho bnalo zho Dios gane wbiig lo Nisdoo Nizhnie, bzhal tib nëz mbidz bded zho; laa zeene gocladz grëxmenguiib rey Egipt nded zho, znuse bdzieel lo nisdoo co stib, grëse zho gut. <sup>30</sup> Ne scaque dib zdoo zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

<sup>31</sup> Zig nac Rahab, wnaa ro nëz ne bio guiedz Jericó, ne dib zdoo me bnalo me Dios, gane peet godc me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

<sup>32</sup> Ni noragaa zha ne sca dib zdoo bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David, zig nac Samuel, ni grëragaa zha ne biadteed xtiidz Dios lo miech. <sup>33</sup> Ne sca dib zdoo zho bnalo zho Dios, no zho beenchen grë guiedz nroob, no zho bnabey grë guiedz

zigne nonguiela, no zho gonlo grē mine bzeet Dios gdeed me lo zho, no zho role meedz bdedlaa zho; <sup>34</sup> no zho lo bel-dox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho bi-ablole lo dil ni biire pcaa zho fuerz stib, haxta benxoon zho zha zit ne nodilnie zho. <sup>35</sup> Grē men wnaa, no zho gonlo brieaban menlidz zho.

Nzian grē zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne ygaa zho zeene laa zho grieaban. <sup>36</sup> Nogaa zho bgaa beennguzee miech zho, bdiñ zho zho, bzoob zho zho lo caden, ni bloo zho zho ladzguiib; <sup>37</sup> no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquian-guzhoon zho lo miech, nēzrii nēzrec zie zho, mbanse rac zho guiend pe gow zho, guiend xab zho, tib lēse guid mēcwxiil, tib lēse guid chiv nriel zho. <sup>38</sup> Miech wen nac zho, ni rieguiald grē miech guidzliu rii guiaadban zha co lo zho, per scataa bded zho. Niapse grē dan bidz, grē dan gui, bio zho; zaatne blēz zho grē len blē, zaatne blēz zho grē len bliee.

<sup>39</sup> Ni golgacnan ganle, niicle nli bianzuiuu zho lo Dios ne sca dib zdo zho bnalo zho

me, per gardaque ygaa zho guielnzaac ne psan me diidz ga ygaa zho; <sup>40</sup> sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

## 12

### *Choot gbiched lo Jesús*

<sup>1</sup> Nziandox grē zha ne sca dib zdo bnalo Dios. Ni niina, grēse zha co laa zho ndxiwii lo ne; sac rriequia tib lo prueb no ne noquiaa ne corr. Gacxe waa, golgotsaa csaan grē ncuaañe runctal xtol ne, zeena ycadraaw parne grielo tiblrique dzio ne nēz gdziñ ne zaatne no gdziñ ne.

<sup>2</sup> Tibaque golgotsaa guionie guic ne laa ne gdziñ lo Jesús ga, men ne zo lo ne grēse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaañe mbeeguelto ga zeene sca quia me lo cruz, per ptoladzd me.

Ni nligaa, zig nac niina cue Dios nēz derech ga zob me gbaa.

<sup>3</sup> Golguien sca, zeene racmban zdo to, zeene racladz guiaan zdo to, ib gdeete to diidz; golsoladz ganle, zha pxecw Jesús bded me grētaa mine pteed grē miech ngoopdol co me. <sup>4</sup> Parga nli, nē noded to noxco to gunctalde to xtol to, per gard

guiab ne ygaa to ne gut miech to. <sup>5</sup> Gol<sub>soladz</sub> gan<sub>le</sub> zha rnee Dios lo grē zha ne nac xpēēd me. Znu raquiet lo Xtiidz me, zaatne rnee:

Xin, zeene rso Dios diidz lo luu gund<sub>raa</sub> luu grē ncu<sub>aa</sub>ne nonguiē<sub>d</sub>, none sac zdoo luuw;

niicle zeene gactoxgaa me lo luu, gacmband luu.

<sup>6</sup> Sac gon<sub>zha</sub> ne sca rso me diidz lo, ga rlu ne rleynie me zho;

zha ne ractoxgaa me lo, ga rlu ne nli xpēēd me nac zho.

<sup>7</sup> Gol<sub>guien</sub> sca, gacmbande to tel<sub>pe</sub> caxtigw ne cteed Dios to. Gol<sub>gan</sub> gan<sub>le</sub>, niicxe miech na, ractox zho lo xpēēd zho zeene rond win diidz. <sup>8</sup> Nana, tel<sub>ib</sub> peet glisquidgaa me lo to, gase dzigo rlu ne led xpēēte me nac to; sac gon<sub>zha</sub> ne nac xpēēd me, rlisqui me zeene rond zho xtiidz me.

<sup>9</sup> Gol<sub>soladz</sub> gan<sub>le</sub>, zeene rac ne mēēdlas rlisqui pxoz ne zeene rdziuu<sub>n</sub> ne ncu<sub>aa</sub>ne nonguiē<sub>d</sub>; scagaa ne, rien<sub>ne</sub> ne me rnabey lo ne. Nana, Źpe lel<sub>pxoz</sub> ne dzigo men<sub>ne</sub> ne zob gbaa gnabeyd me ne? Ni none gon<sub>dzion</sub> ne xtiidz me, zeena ygaa ne guiē<sub>lmban</sub>.

<sup>10</sup> Gotsaa gwi ne gan<sub>le</sub>, zig nac pxoz ne, rquia me rlisqui me zeene rdziuu<sub>n</sub> ne ncu<sub>aa</sub>ne nonguiē<sub>d</sub>, sac racladz me zaacse gban ne, ni chop tson<sub>aque</sub> dze nac lo guiē<sub>lmban</sub> rii; san<sub>gue</sub> Dios gon<sub>laa</sub> me noseed ne par gac ne tib miech mbe zdoo, zig me; ni lēē mi<sub>n</sub> co nonraa. <sup>11</sup> Parga nli, tsod zha ne gley zeene

noded zho caxtigw, sinque nē rzac zhow; per zeene rded ga, zha ne rien<sub>paa</sub> rquiina haxta wen riaan<sub>zdoo</sub> zho, sac rseed zho zaacse rban zho.

*Nodne gbiche miech lo Dios*

<sup>12</sup> Nana sca, tel<sub>ne</sub> bdzagle to, gol<sub>gun</sub> ndip nia to, gol<sub>gun</sub> ndip ni to stib, <sup>13</sup> zaacse gol<sub>sē</sub>, tib nēz gol<sub>tso</sub> zeena gziaabnēzde to; dzigo scagaa zrieelo gacnie to zha ne lega noyobe.

<sup>14</sup> Gol<sub>tsoxco</sub> niowse gol<sub>bannie</sub> samiech to, ib gun<sub>ctalde</sub> to xtol<sub>to</sub>; sac zha ne mbed zdoo, grielod gdzin zho lo Dios. <sup>15</sup> Tibaque gol<sub>teedlolsa</sub> zha ne nacgrē to, gol<sub>guien</sub> gan<sub>le</sub> racladz Dios gacnie me to, napaa na lel<sub>nozozit</sub> to lo me. Sac zha ne rzozit lo Dios, zeene laa mine nac zho rzhoobnen, nzian zdoo zha ne rsan<sub>zho</sub>, rlozh ga grēse zha co run<sub>ctal</sub> xtol.

<sup>16</sup> Ib gunde to grē ncu<sub>aa</sub>ne tsod zdoo Dios, ib quitniede to guiē<sub>lnzaac</sub> ne bneedz Dios lo to; gunde to zigne been<sub>Esau</sub>, tel<sub>Esau</sub>, por tib plat nis scuaan psaan me guiē<sub>lnzaac</sub> ne bgaa me ne nac me mēēdglo; <sup>17</sup> ni nan<sub>wen</sub> to gan<sub>le</sub>, zeene laa me gocladz nab pxoz me niun<sub>lay</sub> Dios me zig mēēdglo, brieelodraaw. Dzigoraa rquia zdoo me, haxta roon me rnab me ygaa me guiē<sub>lnzaac</sub> co stib, per pe xtsi<sub>nraaw</sub>.

<sup>18</sup> Gol<sub>guien</sub> sca gan<sub>le</sub>, nroob nac guiē<sub>lnzaac</sub> ne bneedz Dios lo to niina! Led yede

to ndziñ pa tib cho gui, zig bdziñ xmengol to cho Gui Sinaí padzeela. Grë xmengol to, zeene ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rriee me; <sup>19</sup> ni lala nguiedz rcuedz trompet, ni nguiedz zëëb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gnedraa me. <sup>20</sup> Bdzieb zho bin zho rëb me, zha ne tsep cho gui co none gdeedquie zho zho, gliz lanzгаа zho zho haxta guet zho; scaque grë ma. <sup>21</sup> Ncuaañe gdziebdoo ne gon zho ga; haxta Moisés rzhidz lo dzeb co.

<sup>22</sup> Sangue to, rrieequia haxta Jerusalén, zaatne no Dios nguiamban gbaa bdziñ to, zaatne ndxie grë anjl guizhiu ne roolnie Dios; <sup>23</sup> zaatne ndxie grë zha ne glopaa bzëëb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtold. <sup>24</sup> Laa to bdziñle lo Jesús, men ne rdziñnie miech lo Dios niina ne laa Dios psan stib xtiidz me; laa to bdziñle zaatne rrieequia bliaal xchen Jesús len yadoo gbaa, lëë ren co mazdraa non lëdle xchen Abel.

<sup>25</sup> Min co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel

na dzigo ne mezhal quianee lo ne? Ib diedlaad ne gon telne dziond ne mine rnabey me. <sup>26</sup> Zeene bnee me lo grë zhagol co, haxta beenxidz me guidzliu, ni rnee me: “Zbire naa gunxidz naa guidzliu stib, haxta ye gbaa gunxidz naa.” <sup>27</sup> Gase na ganle rlu, lo grëse ncuaañe bzaa me zdziñ ne laa me csiniw, dzigo laaw nitlo; lozh ga, guiaan mine gdziñdraa dze nitlo; <sup>28</sup> ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me. <sup>29</sup> Golguien ganle, tel me ne nac me Dios ne rliladz ne, nac me zig nac tib beldox ne peet rdedlaad lo.

## 13

### *Golban zigne racladz Dios*

<sup>1</sup> Bets, bzian, golleynie grë zha ne nacgrë to, golguien ganle tibaque men ne nac Pxoz to. <sup>2</sup> Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho. <sup>3</sup> Goltsiegan grë zha ne nioogyu ladzguiib, goltsio xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielnë.

<sup>4</sup> To ne nac to zha ne ptsieel-niale, sacde to guieltsieel zig beelze pe wguut, ib yquidiede

to tsiel to; sac zha ne yquian-gob tib zha ne nonguield tsonie zho o yquiangobgaa zho tib zha ne nole tsiel, ib tedsod zunquizh Dios zho dol co.

<sup>5</sup> Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: "Tibaque gacnie naa to, ib csaand naa to." <sup>6</sup> Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa,  
 ¿pe nac nadien gdzieeb  
 naa?

¡Peet grielod gun miech naa!

<sup>7</sup> Golsoladz zha goc men ne bzo lo to pseed to Xtiidz Dios, ni dib zdoo to golnalo Dios zigne bnalo me Dios.

<sup>8</sup> Golguien ganle, gdzind dze ne gdzëe Jesús, zigne goc me padzeela, scaque nac me niina, ni scaquegaa gac me grëtaa len iz ne guiaadraa.

<sup>9</sup> Ib gliladzde to grë wseed ne ziaadnie stib miech sca, wseed ne ni nacdreaa Xtiidz Jesús. Diosse nac men ne lozh gzodziits ne lo mine rliladz ne; nacda por tsienal to dien pe gow to, pegaa gowde to; sac zha ne zienal min co, paat yquiinda lo zho. <sup>10</sup> Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rrieequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grielod yquiin zho gon co.

<sup>11</sup> Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëëg zhow. <sup>12</sup> Scaque Jesús, zeene bzhiee xchen me psanbe me miech lo dol; ro guiedz ga güeysacsi zho me gut me. <sup>13</sup> Scagaa ne niina, golgotsaa griee ne lo grë ncuaane lo guidzliu rii, golgotsaa cueeladz ne ne guional ne zhits Jesús dzian ne grë guielnë, telne no dzian new. <sup>14</sup> Benque ndion ne ganle, nacd lo guidzliu rii zaatne gbiaazpaa ne, sinque laa ne zional ygaa ne zaatne naraa gneedz Dios gbiaaz ne.

<sup>15</sup> Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëe min co gac zig tib gon ne gdeed ne lo me. <sup>16</sup> Goltsoxco golgun grë ncuaane yquiin lo samiech to, ncuaane rgaa lo to, goldeed palala lo grë zha ne guiend pe yquiin; sac rrieequia lëe stib gon ga gdeed to lo Dios, ni mincogaa rleynie me.

<sup>17</sup> Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

18 Golnab lo Dios gacnien me no tibaque znu dzioxc no dziuun no mine racladz me, me nan ganle mbe zdoo no, mbe xquielrien no. 19 Ni mine rsopaa naa diidz lo to, golsoladz golnab lo Dios gneedz me diidz gbiire guialniob naa i, guialgañ naa to.

20 Jesús nac men ne quianappaa ne, zig rquianap baxtor xpëcwxiil zho; me gut bzhiie xchen me zeene psan Dios diidz stib zha gdzin miech lo me; ni diidz cosi gdzindraa dze ne gdzëew.

Dios men ne bleeban Jesús, men ne racnien miech peet zhgab rtsebd zho, 21 me gneedz guielbiini lo to grieelo to gun to mine rnabey me. Jesús sca golnalo, zeena grieelo gban to zigne rdziladz Dios. Dios nac men ne riegual dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

22 Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

23 Racladz naa gacnan to ganle, laa bets ne Timoté briele ladzguiib; telne zlan-soniob me lo naa nu, grop no me guiaad lo to i.

24 Golsiguieł goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

25 Guiaannie Dios to sca. Me glu ganle pa lotaa noxc me to.

## GUITS NE PQUIAA SANTIAGW

¡Diuzh to grëse to!

<sup>1</sup> Naa nac Santiagw, tib zha ne quiayun xtsiin Dios, tib zha ne quiayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

<sup>2</sup> Bets, bzian, ndal ncuane rded ne parne glu dien pe nli dib zdoo ne rnalo ne Dios. Tel pe nactaa ncuane noded to i, ib gacmbande to, sinque golley. <sup>3</sup> Sac gon, zeene squi ran ne gre pe guielne, ga rseed ne tibliladz rac ne tel petaa noded ne. <sup>4</sup> Golseed sca tibliladz golgac. ¡ib guiaand zdoo to tel petaa nac guielne ne gan to! Sac zeene sca cseed to gan to guielne, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

<sup>5</sup> Zha ne racladz yгаа guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. <sup>6-8</sup> Lëëraasi dib zdoo ne none gnab new, nodne gacchop guic ne; sac zha ne racchop guic, gdziind dze yгаа zho mine rnab zho. Nac zho, tib dze dib zdoo zho rliladz zho zгаа zho mine rnab zho, stibгаа dze na rliladzdraa zhow, ib ractiblid guic zho;

masaque nac zho zig nac gre mtsiin ne rbib lo nisdoo, sac tel mtsiin co loxaque nezrii nezrec zienie mew.

<sup>9</sup> No zha bets ne, zha bzian ne, quianied zho ncuane yquiin zho, par miech peet nond zho; per none gon ine gley zho sac nroob non zho lo Dios. <sup>10-11</sup> Scagaa zha ne rapchen, none ine gley zho niina ne biaanwin zho, sac nez lo Dios gre ncuane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan gre ncuane rap zho. Masaque nacse zho zig nac guieen gre guizh ye, tel guiee cow, zhixtsëese ngbidz rcuidz guizh ne zoba lo, rlozh ga rliaalgaw, gataa rnitlo xquielniowa.

<sup>12</sup> Dichos zha ne ib rrozite lo Dios niicle no nzian ncuane rcheep zho gunctal zho xtol zho, per rund zhow; sac zha cosi zгаа zho tib guielmban ne gdziind dze lozh, guielmban ne bneele Dios gdeed me lo grëse zha ne rleynie me. <sup>13</sup> Zeene sca no ncuane rcheep ne gunctal ne xtol ne, guiabd ne togo Dios noquuil ne gun new; sac gon led yed Dios rzoobladz ncuane ndzinlid, ni niicle rquildgaa me miech gun zhow. <sup>14-15</sup> Gre ncuane ndzinlid ne rzoobladz ne, gre ncuane yozh ne rionie guic ne, min co nac mine rquuil ne. Lëew nac mine rcheep ne runctal ne xtol ne, ni ndionle ne ganle, lëe gdib mine gdeed dol lo miech nac guielnedox ne yгаа zho.



16 Bets, bzian, gac-wete to sca. 17 Golguien ganle, ncuaane rquiin, ncuaane ndzinli, min co nac mine rneedz Dios. Tibaque nac me, led yed me rdzëe par guiab ne meque rnabey rac guieIntseeb. Me nac tib biini ne gdzind dze guiuu, ni tib lë guieIcow guieInd zaatne no me. 18 Zdoo me gola bneedz me tib guieImban ndzon lo ne niina ne laa bliladz Xtiidz me, masaque rreequia ne nac mëedglo lo me.

*Nacdayquiaadiagse miech Xtiidz Dios*

19 Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcora ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëele. 20 Sac gon, zeene rlëe ne, grieelod gun ne ncuaane rdziladz Dios. 21 Golguien sca, golsaan grëtaa ncuaane ndzinlid ne ziyun to, golbiche lo grë guieIntseeb ne znutaa quiyac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

22 Per guiabde to togo lox- aque yquiaadiagse to Xtiidz Dios lëelew ga; sinque ib none gban to mine rquiaadiag to, sac tel ib gbande tow lëëque to noquidie to ga. 23 Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: 24 Sac zeene nowi ne lo quiewan, hor cose ran

ne zha rac ne; zeene laa ne rbiche low rsoladzdraa ne zha rac lo ne. 25 Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

26 Gacxe waa, zha ne rnee xnëz Dios no zho ni rgobeyd zho pe rnee zho, lëëque zha noquidie zho ga, ga rlu nlid zienal zho mine rnabey Dios.

27 Sac gon, par Dios men ne nac Pxoze, zha ne no xnëz me none tsie zho tsiegun zho xyudar grë mëëdbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaane ndzinlid ne run grëraa miech.

## 2

*Lëda ga run zha ne rbe*

1 Bets, bzian, gunde to ne ncueese lo miech ne gnee to, sac zha ne sca run, zha dien guiab zho xnëz Jesús no zho. 2-3 Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëëlëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzgaa luu sob luu, lo liuse i bzob." 4 ¿Pe sca na rac zha ne no xnëz Jesús? Zha ne gon sca run, ga rlu zho niapse guieIntseeb no guic zho.

5 Lëda ga gon bets, lëda ga gon bzian. Golgacnan ganle, ible Dios ble miech ne peet

rapd lo guidzliu rii, zeena dib zdoo zho gnalo zho me, zeena ygaa zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; <sup>6</sup> laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riego zho to lo wxtis; <sup>7</sup> haxta rdzibdee zho Jesús, men ndzon ne nacie to niina.

<sup>8</sup> Ib none gban ne zigne rnabey Xley Dios, lo xley me zhobnee: “Bleynie samiech luu, zigne rleynie luu luu.” <sup>9</sup> Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaguiits to. <sup>10</sup> Golgacnan ganle, zha ne rguiits tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguiits grëw. <sup>11</sup> Sac tibaque men ne psana grësew. Gacxe waa, tel zha ne zienal mine rnee: “Gute luu samiech luu”, per rguiits zho mine rnee: “Yquiangobd luu zha ne led tsieeld luu”, laa zho beenctal-le xtol zho ga. <sup>12</sup> Niowse sca golgac, niicle zeene gneegaa tow, niowse golnee; sac gon, zdzin dze cxobdol ne dien pe wban ne zigne rnabey Jesús, te wband new ye. <sup>13</sup> Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible dzedlaa zho lo guielnedox ne cxeel me.

*Zha ne rnalo Dios none glu zhow*

<sup>14</sup> Bets, bzian, ¿pa dien rquiin guiab ne dib zdoo ne rnalo ne Dios, xnëz me no ne, ni tel rund ne xyudar samiech ne? ¿Niacxe scase laa Dios csilaale ne? <sup>15</sup> Gzoob ne no zha ne nacgrë to i, yase tib bets tow, tib bziangaa tow, ranlo to guiend xab zho, niicle quianied zho ncuaane gow zho; <sup>16</sup> ni guiab to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquiin diidz co? <sup>17</sup> Scadaa nagon paat rquiinda guiab ne rnalo ne Dios, ni tel rund ne mine rieguial ne gon ne. <sup>18</sup> Gacxe waa, zha ne rnalo Dios ni run zho mine rieguial zho, no zho gnë lëda i run zha ne rnee lëëlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

<sup>19</sup> Nli wena run zha ne rililadz tibaque Dios no, per grielod guiab zho lëëlew ga, sac gon zig nac mendox ye ma rililadz tibaque Dios no, per led por mincod laa ma lo guielnë ne cxeel me, sinque haxta rdzieb ma me. <sup>20</sup> Nadzpaa nxen zha ne sca rzac, pe ni lalnu riend zho paat rquiinda guiab zho rililadz zho Dios ni telne rund zho mine rieguial zho. <sup>21</sup> Golgan ganle, zig nac pxozgol ne Abraham, porne been me mine rieguial me

gane pcaania Dios me zig tib zha ne peet xtol. Led rsoladz to ganle, zeene rëb Dios lo me tsielogon me xpëed me, güey me zaatne pxeel Dios me. <sup>22</sup> Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. <sup>23</sup> Lo Xtiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtold; zëeb diidz, tib zha ndzieeldiidz Dios goc me.

<sup>24</sup> Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rliladz zho me, gun zho mine rnabey me zho. <sup>25</sup> Golsoladz ganle, scaque wnaa ro nëz ne brieelë Rahab, por been me xyudar samiech me, gane pcaania Dios me zig tib zha ne peet xtold; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nëz ne wbire zho, bgaad zho. <sup>26</sup> Gase na ganle rlu, paat rquiinda guiab ne rliladz ne Dios ni tel rund ne mine riegual ne, nacse ne dzigo zig tib xcuerp ngutoo, tel cuerp cow, ¿pa dien yquiina?

### 3

#### *Ncuaañe run ludz miech*

<sup>1</sup> Bets, bzian, guiabde to lega tso to glisqui to ncuaañe run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech,

per gacnan zho ganle zha ne rseed miech, mazdraa nroob ncuaañe tsasqui lo zho gal dze ne laa zho gacredz lo Dios.

<sup>2</sup> Grëse ne nzian mod ne rxin ne lo samiech ne. Tel niaca mine no tib zha ne grieelo ycuëez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow. <sup>3</sup> Gotsaa gwi ne ganle zig nac guay, con tib lë win guiib ne rgo miech ro ma rrieelo rnabey zho ma, rienie zho ma nëz ne racladz-taa zho. <sup>4</sup> Scaque barcw, nicle ne nrooba, no hor rrieemedox lo nis rcheepa, per con tib lë yag lag win ne rsëe miecha, rrieelo rienie zhow nëz ne racladztaa zho. <sup>5</sup> Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan! <sup>6</sup> Ni tel ludz ne gon, rrieequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne brieegabil naca; ni dipse lo xquielmban miech noxtseeb zho low.

<sup>7</sup> Golwi ganle, rrieelo miech runndoo zho grë ma ne rsiibe, grë ma ne rzëlen liu, haxta grë ma ntseeb, haxta grë ma ne no nisdoo, rnabey zho ma. <sup>8</sup> Per guiend zha ne gon grieelo gnabey ludz; ncuaañe ntseeb naca, choot grieelod gnabeya; masaque laaw no par gnitlow miech, zigne run grë guizh ncuaan. <sup>9</sup> Lëew name rquiin ne roolnie ne Dios men ne nac Pxoz ne,

ni rlozh ga lëëquew rdzibdee ne samiech ne, ni lalnu riend ne me bzaa zho, biaan zho zigne rlu me. <sup>10</sup> ¿Pe ga nadien, ro ne roolnie ne Dios, ni roque ne rgodee ne samiech ne?

<sup>11</sup> Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? <sup>12</sup> Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

### *Zha ne nixbiini*

<sup>13</sup> Lo grë zha ne nacgrë to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini. <sup>14</sup> Per tel tibaque në rac zdo zho ran zho zha ne stib noded, tibaque noguib zho csañwin zho samiech zho; gacnan zho ganle, led scad rac zha nixbiini. Ni lalnu rieguald tso zho csañzuiuu zho zho. <sup>15</sup> Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu. <sup>16</sup> Zeene sca në rac zdo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga. <sup>17</sup> Zha ne nli rap guielbiini ne rdeed Dios, rund zho min co, laa zho zienal; ndzinlise gban zho, rleynied zho dil,

rguib zho zaacse rnee zho lo miech, wen rac zho lo grëse miech, rquia zdo zho samiech zho, rund zho cue zho zha ne mazdraa gacnie zho, ncuaane run zho dib zdo zho run zhow, niapse ncuaane ndzinli rioxco zho. <sup>18</sup> Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeene laa grë miech co rac tib miech wen.

## 4

### *Zha ne rleynie guielntseeb*

<sup>1</sup> Ne squi tibaque rlëëlsa to, tibaque quiadil to, lëë min qui gon riegat por grë guielntseeb ne rio guic to. <sup>2</sup> Rio to riogui to ncuaane grieelod yquianie to, rlozh ga, haxta rut to samiech to parne yquianie tow. Në rac zdo to ran to cho zha quianie ncuaane quianiede to, zeene ran to rriyelod yquianie tow laa to rlëënie zho, haxta rdilnie to zho. Rriyelod yquianie to ncuaane racladz to, sacne rnabde tow lo Dios. <sup>3</sup> Niicle tel rnabgaa tow lo me, rneedzd mew, sacne laa guic to zienie yquianie tow loxaque par gdeedguxt zdo to, gdeedguxt xcuerp to.

<sup>4</sup> ¿Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guielntseeb? Sac miech ne squitaa rleynie guielntseeb, lo Dios ga racntseeb zho. <sup>5</sup> Golgan ganle, zha rnee lo

Xtiidz Dios: “Espíritu Sant, men ne pxeel Dios nacnie ne, rleynie me ne, ni racladzd me zhaa ncuane gleynie ne laa ne gleynie ne me.”

<sup>6</sup> Ni tel Dios gon, noxco me ne, ib zacnie me ne griee ne lo guielntseeb; sca rnee lo Xtiidz me, zaatne rnee: “Zacniel Dios grē zha ndooladz, sangue grē zha niats, rdzigu-iend me zho.”

<sup>7</sup> Golguien sca, ine ndooladz golgac, golgon mine rnabey Dios. Gdeetraa to diidz yquuil mendox to, sca golgun zeena zhal ma gbiche ma lo to. <sup>8</sup> Dib zdoo to golsēeb xnēz Dios, zeena scagaa me zacnie me to. Goltsoxco guiaanmbe to lo grētaa xtol to, golnab lo me csanmbe me zdoo to, mese gnalo to, gacchopdraa guic to. <sup>9</sup> iGolguien ganle, ndzinlid i squi mban to! iMban golgac, goltso guielnē, golgoon, laa ne tso to gzhidz to, laa ne tso to gley to! <sup>10</sup> iNdoooladz golgac lo Dios, zeena cuee me to lo grē ncuane nac to, csanglaa me to!

<sup>11</sup> Bets, bzian, ib gneenēde to zha ne nacgrē to. Zha ne rneenē bets zho, bzian zho, bel zho, ni rdziibdol zho zho, Xley Dios ga rguiits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey ley. <sup>12</sup> Golguien ganle, Dios psan ley, ni mese riegual gun guielwxtis, me nan zho cuib-dol, chogaa csilaa me; per to nadien, i cho nac to par gdziibdol to samiech to?

<sup>13</sup> Togaa ne nac to zha ne rnee: “Na gzhe widz dien pa tib guiedz ne guioo ne, guobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle. <sup>14</sup> Ne sca rnee to, ipe wen wen nan to dien yo to gzhe widz co! iPe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow. <sup>15</sup> Mazd golguiab: “Telne zneedz Dios diidz gbanraa ne, min rii, min rii dziuun ne.” <sup>16</sup> Led tsoode tibaque guielniats qui zienie guic to, golguien guielntseeb ga run zha ne rac niats. <sup>17</sup> Ni golsoladza ganle: Grēse zha ne nanaa pe nac ncuane ndzinli ne no gun zho ni rund zhow, xtol zho ga runctal zho.

## 5

*Zha ricw ne zienal guielntseeb*

<sup>1</sup> iGrē zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnē ne gan to. <sup>2</sup> Grē ncuane beenlo to i, peet nonda, lega naca zig nac grē ncuane biodzle; grē xab to i, rrieequia ncuane dowle mxila. <sup>3</sup> Grē guiib or, grē guiib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuane riab lo gui.

Laa to beenlo grētaa dimi qui, rzac to lēew yquiin to

len dze ne ziaad, ni nande to gon laa dze ne nitlo to ziaadyoble. <sup>4</sup> Lëë grë dimi qui gon zëëb to lo grë zha ne quia xtsiin to, noquidie to zho rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsacsi to zho, laa Dios binlew. <sup>5</sup> Lo grëtaa iz ne mban to lo guidzliu rii, loxaque grë ncuaane gdeed guxt zdo to, grë ncuaane gdeed guxt xcuerp to noxco to, ncuaane yozh ne riaabta guic to laa to runa, ib riende to laa dze ne nitlo to ziaadgaxle. ¡Lëë to noyun xcuent ma ne noro par guet ma! <sup>6</sup> Pe zhistaa guielntseeb ne quiayun to, haxta zha ne peet xtold, zha ne nand glis nia lo miech, rquiaqui to zho ncuaane rund zho, rnabey to ret zho.

### *Nodne guieed zha ne rnalo Dios*

<sup>7</sup> Bets, bzian, sangue to gon tiblrique golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mëë guie, rquiambëz zho haxta rdzin dze ne rlaap zho. <sup>8</sup> Tiblrique sca golgac. ¡ib guiaand zdo to, sac gon zhile gdzin dze ne laa men ndzon ne rnabey ne guiaad stib!

<sup>9</sup> Ib tso de to guieednie to grë zha ne nacgrë to, zeena gunctalde to xtol to; sac zhile gdzin dze ne laa men ne no gun guielwxtis

guiaad. <sup>10</sup> Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tiblrique goc zho. <sup>11</sup> Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega rand zhow; sac nquialadz me miech, rquia zdo me zho. Dichos grë zha ne sca nac.

<sup>12</sup> Bets, bzian, zeene tsiegala glu to diidzli rnee to, tso de to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nliidgaaw, golguiab: “Nliida”, zeena gunctalde to xtol to; sac gon zha ne runctal xtol, ible zgaa zho guielnë ne csiaab Dios.

<sup>13</sup> Lo grë to, zha ne no pe tib lo guielnëw, gnab zho lo Dios gacnien me zho. Zha ne no pe tib guielbleya, goolnie zho me. <sup>14</sup> Zha ne rzacnëgaaw, gnabey zho gacredz bla zha ne zo lo to, zha co quëëb nceit guic zho gnab zho lo Dios guiac zho. <sup>15</sup> Telne dib zdo zha co gnab zhow lo Dios, zunguiac Dios zha rzacnë co. Zlische me zho lo xquielguidz zho, ni tel por pe falt ne beengaa zho lo me sca rzacnë zho, zun me zhow perdon.

<sup>16</sup> Gacxe waa, tib tib to zeene run to pe tib falt,

yqueetsde tow, golzodiidza lo zha ne nacgrë to, lozhse ga golnab lo Dios gun me to perdon, zeena guiaanmbe to lo me. Sac tib zha ne biaanwenle nëz lo Dios, zeene sca pë rnab zho lo me run mew, niicle ncuaane mazdraa ngaṇa.

<sup>17</sup> Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz groḷ ni tib lab nis guie biabd; <sup>18</sup> haxta bnabraa me lo Dios guiaba stib, dzigoraa biaba, laa guidzliu biire bdeed guielnzaac.

<sup>19</sup> Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho nëz yozh ne zie zho ga; <sup>20</sup> golgacnan ganle, ladz-niale guielgut ga rsilaa zho zho, grëse xtol zha co zun Dios zhow perdon.

Santiagw

## GUITS NE GLO PQUIAA PEDR

Bets, bzian, jdiuzh to grëse to!

<sup>1</sup> Naa nac Pedr, tib zha ne rxeel Jesús nonee Xtiidz Ndzon me lo miech. Laa naa rxeel tib guits rii ziaad lo to grëse to ne nac to zha Israel, no to stib ladz beñ: zig nac nëz Pont, nëz Galás, nëz Capadós, nëz Asia ni nëz Bitin.

<sup>2</sup> Dios men ne nac Pxoze, ible me bzooblo to mazd padzeela, sac nanle me laa to gac xpëed me. Bdziñ dze, zeene laa me pxeel Espiritu Sant bleextso to laa to ngab xnëz me, zeena gban to zigne rnabey me, ni lozh csanmbe Jesús to; sac ible miñ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

<sup>3</sup> Xquizh xquielnzaac Dios, Pxoze Jesús men ndzon ne rnabey ne, sac gon pquia zdoo me ne ptsëe me lo xquielmban ne, rriequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne, <sup>4</sup> guielnzaac cosi ncuaane mbe naca, nacda ncuaane nitlo, nacda ncuaane gdzëelo, ni gbaa ga quianie mew.

<sup>5</sup> Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdziñ,

zanlo to ganle zeene laa me ycaania to.

<sup>6</sup> Gacxe waa ine nley golgac. Nli zan to grë pe guielnë, per ncuaane tib rded ga. <sup>7</sup> Ib none gan to grë guielnë, parne ga glu dien pe nli dib zdoo to rnalo to Dios. Zig nac guiib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuaane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me. <sup>8</sup> Me i squitaa rleynie to, me i squitaa rnalo to, niicle ne gonde to me, niicle ne rande to me. Tib guielbley nrooba lo to, tib guielbley ndzona, nacda ncuaane grieelo gnee to zha naca; <sup>9</sup> sac gon, ne squi dib zdoo to rnalo to me, ib scaania me to.

<sup>10</sup> Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me.

<sup>11</sup> Zeene bdeed zhiEspiritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac miñ co. <sup>12</sup> Nacne blu Dios lo zho gocnan zho nacda ncuaane gac len dze co, sinque haxta



nele ygaa dziana. Sangue niina, nanwen to ganle laa grē min co gocle, lēē diidz cub co i gocnan to niina, gbaa biet Espiritu Sant bdeed me guielbiini lo zha ne biadneew lo to. ¡Ncuaañe ndzona, haxta grē anjl racladz tebaa zha gacnanraa zho dien zha naca!

*None gban ne zigne racladz Dios*

<sup>13</sup> Golquix biini xquielrien to sca. Tiblique golgun guic to ne laa to ygaa grētaa mine ral zdoo Dios gneedz me lo to, zeene laa Jesús guidaad stib. <sup>14</sup> Zig grē mēēd ne ron xtiidz pxoz, sca nguzobdiidz golgac lo Dios; gundraa to grē ncuaañ ndzinlid ne been to zeene gard gunbey to me ga. <sup>15</sup> Goltsoxco golban zigne racladz me, zeena ine mbe guidaan to lo dol; sac gon tel me, men mbe nac me, nacd me men ne rdziguien dol. <sup>16</sup> Zigne zhobneeque lo Xtiidz me, zaatne rnee: "None guidaanmbe to lo dol, sac gon men mbe nac naa." <sup>17</sup> Pxoz to nac me, me rnalō to, nanle to zeene laa me gun guielwxtis, led yed me cue; mine been tib tib miech, zunquizh me zhow. Golguien sca, golgon xtiidz me gzataa dze ne gbanse to lo guidzliu rii.

<sup>18</sup> Golsoladz me blee to lo grē wseed ndzinlid ne psan grē xmengol to; nanwen to gozh brieē to ga; per pquiind me ncuaañe rnitlo zig nac pe dimi or, pe dimi plat; <sup>19</sup> sinque laa me pquiin xchen ndzon Jesús. Ren ne bzhiee goc zig tib gon, zigne

rgogon miech carner yeen ne mazdraa niow, carner yeen ne mazdraa ndaan parne guidaanwen zho lo Dios. <sup>20</sup> Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzin laa me biaad, biaadsanwen me to lo Dios; laa Dios been min co sacne rleynie me to. <sup>21</sup> Gacxe waa, zrieelo dib zdoo to gnalo to Dios, mese none gliladz to. Me nac men ne bleeban Jesús, blu me ne men non nac Jesús.

<sup>22</sup> Ni niina ne laa to mban zigne nac XTiidz Dios, mine nac diidzli, laa zdoo to biaanmbele lo dol; nasi zrieelo gleynie to zha ne nacgrē to. Dib zdoo to sca golleynie zho, <sup>23</sup> golguien ganle, tib guielmban cuble rap to niina, rrieequia gol to stib; per nacdraaw zigne gol to glo, sinque lēē guielmban qui bgaa to zeene bliladz to Xtiidz Dios, diidz ne rneedz guielmban, diidz ne gdziñd dze nitlo. <sup>24</sup> Zigne zhobneeque low, zaatne rnee:

Grēse ne nac ne miech, zdzin dze ne lozh ne,  
lega nace ne zig nac grē guizhye,

grē xquielndaan ne, lega nacsew zig nac guieen guizh co.

Sac tel guizhyew, zeene laaw rbidz, laa guieena rli-aalake;

<sup>25</sup> sangue Xtiidz Dios, gdziñd dze ne nitlow.

Ni lēē diidz co ga gon biadseed zho to, lēew rlu zha laa miech lo grē xtol zho.

## 2

<sup>1</sup> Nana sca:  
 gun<sub>u</sub>draa to grē guie<sub>l</sub>ntseeb,  
 yquidiedraa to samiech to,  
 gun<sub>u</sub>draa to ne laglaase glu to  
 guie<sub>l</sub>wen,  
 gacnēd zdoo to gan<sub>u</sub> to cho zha  
 stib noded,

gzhixcuaadraa to diidzguizh.

<sup>2</sup> Sinqe Xtiidz Dios gol<sub>u</sub>soxco,  
 zeena lozh tsotibli guic  
 to dziits so to low. Zig  
 rzac mēdyeen<sub>u</sub> ne wriin<sub>u</sub> ral,  
 nidzpaar dziladz win guie  
 win; scadaa gol<sub>u</sub>sac Xtiidz  
 me, zeena ygaade to grē  
 guie<sub>l</sub>nēdox ne csiaab me.

<sup>3</sup> Laa to gon<sub>u</sub>le gan<sub>u</sub>le zha  
 wentaa zdoo me, Xtiidz me  
 sca gol<sub>u</sub>soxco.

*Jesús nac zig tib quie mban*

<sup>4</sup> Gol<sub>u</sub>big lo Jesús, gol<sub>u</sub>gan<sub>u</sub>  
 gan<sub>u</sub>le lēē me nac zig tib quie  
 ne rio squin yu, per tib quie  
 mban. Ib bleynied miech  
 me, sangue Dios, men<sub>u</sub> non,  
 men<sub>u</sub> nziuu nac me lo me.

<sup>5</sup> Gol<sub>u</sub>big lo me sca, zeena ye  
 to gac quie mban ne tsaa  
 xyadoo me. To gac grē pxoz  
 ne nlipaa mbe zdoo, gun<sub>u</sub> to  
 dziin len<sub>u</sub> yadoo co; gol<sub>u</sub>ban  
 zigne rdziladz Dios, zeena  
 guie<sub>l</sub>mban co gac zig tib gon<sub>u</sub>  
 ne gdeed to lo me, ne nac to  
 zha ne ngab lo Jesús. <sup>6</sup> Zigne  
 zhobneeque lo Xtiidz Dios,  
 zaatne znu rnee:

Men<sub>u</sub> ne bzo naa cxel<sub>u</sub> naa  
 Jerusalén,

me gac zig tib quie nroob  
 ne gnaaz dziits xyadoo  
 naa,

ni lēē yadoo co nac grē zha ne  
 ngab lo naa.

Men<sub>u</sub> non nac me, ni grēse  
 zha ne gnalo me, ible  
 csaand naa zho.

<sup>7</sup> Ne nligaa tib men<sub>u</sub> non  
 nac me lo ne, sangue grē zha  
 ne rliladz me cholze miech  
 rzoob zho me; zigne zhob-  
 neeque lo Xtiidz Dios, zaatne  
 rnee:

Quie ne sca bron<sub>u</sub> zho tib lad  
 zeene quiazaa zho yu,  
 laaw bron<sub>u</sub> zho sac rzac zho  
 paat rquiinda,

ni niina lēēpaaw nac quie ne  
 nlibdziits xcox yu.

<sup>8</sup> Ni ziaad stib zaatne znu  
 rnee:

Quie co griel<sub>u</sub> ni miech, quie  
 co gron<sub>u</sub> zho.

Grēse zha ne nēd gliladz Xti-  
 idz me zaatne rnee cho nac  
 me, scapaa sac zho me, ni  
 ib zhobneelee ne min<sub>u</sub> co yгаа  
 zho.

<sup>9</sup> Sangue to, lo Diosle ngab  
 to, me ble to, zigne rnee lo Xti-  
 idz me: tole nac zhipxoz me,  
 tole nac zha non ne quiayun<sub>u</sub>  
 xtsiin<sub>u</sub> me; miech ne mbele lo  
 dol<sub>u</sub> nac to lo me, mele rnabey  
 to sac me bredz to laa to brieē  
 lo guie<sub>l</sub>cow bzēēb to lo xbiini  
 ndzon me; zeena gnee to lo  
 miech gan<sub>u</sub>le zha nactaa grē  
 ncuaane run<sub>u</sub> me. <sup>10</sup> Glo peet  
 nonde to, sangue niina non  
 to sac gon<sub>u</sub> lo me ngab to; glo  
 nan<sub>u</sub>de to pa lotaa rquia zdoo  
 me to, sangue niina rley to ran<sub>u</sub>  
 to gan<sub>u</sub>le squitaa rquia zdoo  
 me to.

*Tibaque gol<sub>u</sub>gun<sub>u</sub> mine  
 racladz Dios*

<sup>11</sup> Bets, bzian, rleynie naa  
 to. Ndion<sub>u</sub> ne gan<sub>u</sub>le, nacse  
 xquie<sub>l</sub>mban ne lo guidzliu rii  
 zig zha ne tibrded stib ladz  
 ben<sub>u</sub>; gane rso naa diidz lo to,

ib gzoobladzde to gun to grë ncuaañe ndzinlid ne racladz xcuerp to; sac min co rsacsi xalm miech. <sup>12</sup> Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuaañe run to, haxta zleynie zho Dios gal dze ne laa Jesús guiaadgun guielwxtis.

<sup>13</sup> Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa, <sup>14</sup> zigtagaa grë zha ne nacie me dziina, sac zha run guielwxtis, rdeed zho caxtigw ne rieguial grë zha ntseeb, ni scagaa runnon zho grë miech ne run ncuaañe rquiin. <sup>15</sup> Ible laa Dios racladz zaacse gac to, zeena grë zha nxen, grë zha yozh ne rien d pe rnee, haxta ni ro zho tsod pe gneenë zho to.

<sup>16</sup> Gollu ne peet lo ngadoodraa to, per guiabde to ne peet lo ngadoodraa to laa to gun grë ncuaañe ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

<sup>17</sup> Zaacse golgac lo grë samiech to, golguien cho lo zo to. Golleynie grë zha ne nacgrë to, ndooladz golgac lo Dios, golguien ne men ro nac me; ni scagaa golgon xtiidz grë zha ne nac wxtis nroob.

<sup>18</sup> Bets, bzian, to ne nac to zha ne quia xtsiin ben, golgon mine rnabey men ne

ree to; tel zhataa nac zho, zigtaa men wena, zigtagaa men ne ntseeba. <sup>19</sup> jNley golgac, goldeed xquizh lo Dios, tel porne noyun to mine rnabey me, laa zho rsacsi to! <sup>20</sup> Sac gon, telne nosacsi zho to por xquielntseeb to, niicle paraa cxecw to paat yquiinda; sangue tel rxecw to nosacsi miech to porne noyun to ncuaañe rdziladz Dios, dzigosi zleynie me to.

<sup>21</sup> Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielne ne bded me bdiizh me xtol ne. Glo me sca bded, nana negaa ible none sca dieed ne.

<sup>22</sup> Tel me ni tib dol beend me, ni tib miech pquidied me.

<sup>23</sup> Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guielwxtis zigne no gaca.

<sup>24</sup> Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been min co, zeena grieelo grie ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielne ne. <sup>25</sup> Glo lega nac to zig nac grë mëcwxiiil ne zonziaab, sangue niina mele quianap to. Me nac tib baxtor ne rleyniepaa to.

### 3

*Zha gban zha ne ptsieel-niale*

1-2 Bzian, to ne nac to men wnaa ne ptsieelniale, golgon xtiidz tsiel to. Niicle tel nēd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gneew lo zho.

<sup>3</sup> Golguien sca, tsođe to ne goon dieñ pa xixcuaraa to par gluniow to lo miech; dieñ pa xixcuaraa guitsguic to, dieñ pe bguiaa or ne yquia diag to, dieñ pe grē guiib or tso yan to, tso nia to, dieñ pe lar niazh ne gacwraa to. Tsienalde to grē guielniow co, sac gon ncuaan laglaase ga; <sup>4</sup> sinque none xixcuaa zdoo to, gac to tib zha tibliladz, tib zha ne ndooladz. Lēē guielniow co nac mine niowraa nēz lo Dios, ni min co gdziñd dze nitlo.

<sup>5</sup> Lēē guielniow co bioxco grē men wnaa ne biaadban padzeela, zha ne brieel lo dol wban zho zigne racladz Dios; tel zha, dib zdoo zho bnalo zho Dios, ni bin zho xtiidz tsiel zho. <sup>6</sup> Zig nac Sar, sca goc me, bin me xtiidz tsiel me Abraham, haxta rēb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpēēd me; haxta ni tsoxtseebde to pe glisqui tsiel to lo to.

<sup>7</sup> Scaquegaa to bets, ne nac to zha ne ptsieelniale, goltssoxco tsoquic to zha nac tsiel to. Golgan me zigne

nonguiela gan to me, golguien ganle nda men wnaa; ni lala, non me lo Dios, sac gon ye me ygaa guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

<sup>8</sup> Nana sca, tipse golgac grē to. Ine niowse golleynie zha ne nacgrē to, miech wen, miech ndooladz golgac. <sup>9</sup> Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to. <sup>10</sup> Zigne zhubneequel lo Xtiidz me, zatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuēēz zho ro zho, gneenēdraa zho, yquidiedraa zho;

<sup>11</sup> none csaan zho grētaa guielntseeb, niapse ncuaan wen tsoxco zho gun zho,

yguib zho cuewen miech, niicle zhagaa wen gac zho lo grēse miech.

<sup>12</sup> Sac grē zha ne sca wen rac nēz lo Dios, tibaque quianap me zho,

ni rquiaadiag me xtiidz zho tel pe rnab zho lo me;

sanque grē zha ntseeb, ni lalnu rdziguiend me ncuaane run zho.

*Dichos zha ne mban rded lo samiech*

<sup>13</sup> Golguien sca, ncuane yquiu golgun; scagaa tsod pe nacle ctsidil miech to.

<sup>14</sup> Laa telne ncuane yquinaquegaa noyun to, ni laa miech rtsidil to, idichos to ga! Ib gdziebde to grë miech guidzliu, niicle peraa gnë zho gun zho to. <sup>15</sup> Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacle rnalo to Jesús; ine niowse golgac, diidz ndooladz golnee lo zho.

<sup>16</sup> Zaacse sca golban, zeena grë zha ne rneenë to porne nac to zha ne no xnëz Jesús, zdziñ tib dze ne ctoladz zho, zeene guien zho lega bnexuu zho to. <sup>17</sup> Wen zie zha ne ran guielnë, telne Dios rnabey gan zhow zeene noyun zho ncuaan wen; lëdle gan zhow por xquielntseeb zho.

<sup>18</sup> Golgan ganle niicxe Jesús, zha nactaa grë guielnë ne gon me. Niicle ne ni tib dol beend me, per haxta beet miech me bdiizh me grëse xtol ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew; <sup>19</sup> gane güeyted me zaatne nioogyu zhiespíritu grë zha ne wban padzeela, güeynee me lo zho. <sup>20</sup> Lëë grë zha co ib bzhiguield nililadz Xtiidz Dios, niicle ne dipse len dze ne nozaa Noé barcw nroob co pquiambëz Dios niac-wen zho. Nanlaxe to ganle, xon-aque nac zha ne bdedlaa lo nis co. <sup>21</sup> (Lega rriequia

goc nis co zig nis ne rrobnis ne. Zeene rrobnis ne, ga rlu ne laa ne brielee lадznia dol, ygaadraa ne guielnëdox ne tsieguial zha ngoopdol, sac gon por mincopaa gut Jesús ni brieeban me; ni guiabd ne togo nis co rsanmbe ne lo xtol ne, sinque ga rxobnen ne ne laa ne rnab lo Dios ctsëë me lo xquielmban ne.) <sup>22</sup> Sañgue niina gbaa ga no Jesús, ga zob me cue Dios nëz derech, grëse anjl non, grëse zha non ne no gbaa, rquitsgzhìb zho lo me ni run zho miñe rnabey me zho.

#### 4

<sup>1</sup> Golguien ganle, zha nactaa grë guielnë ne bded Jesús bdiizh me xtol ne; nana sca, scaque to gdziebde to golcueeladz to gan to guielnë. Ib rquiu guielnë, sac zha ne no tib lo guielnë, rioguid zho grë ncuane gunctal xtol zho, <sup>2</sup> zëëb rguib zho gban zho zigne racladz Dios. <sup>3</sup> Grëtaa ncuane ndzinlid ne run grëraa miech, golguiaanladza. Golguiaanladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grë lni, bleynie to grë mdio.

<sup>4</sup> Grë zha co, rien naa rlëë zho ran zho rtsieelsadraa to zho lo grë ncuane ndzinlid co, gane haxta rneenë zho to. <sup>5</sup> Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me miñe tsieguial tib tib miech, zigtaa zha mbana,

zigtagaa zha ne gutlew. <sup>6</sup> Sac niicle zha ne gutlew, no zho gocnanpaa zho zha nac Xtiidz Dios zeene bzomban zho. Ible rquiinpaa Xtiidz me, sac zha ne rquiaadiaga, niicle ne zetaque zho, per nēz lo Dios mban zhiespíritu zho.

*Golgacnie zha ne nacgrē to*

<sup>7</sup> Zhile gdziñ gdze ne laa grē ncuaane rac lo guidzliu rii nitlo; golquix biini zaacse golban, tibaque golzodiidznie Dios. <sup>8</sup> Ine golleynie grē zha ne nacgrē to, sac zeene nli-paa rleynie ne samiech ne, tel pe falt ne guntaa zho zrieelo cteed new zdoo ne. <sup>9</sup> Zha ne guiaad lidz to, goldeed zaatne cuēz zho; ine golcuēzlo zho, guieedniede to zho.

<sup>10</sup> Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrē to! Ib ga rquiin guielbiini co bneedz mew lo to.

<sup>11</sup> Zha ne rseed miech Xtiidz Dios, none gnee zhow zigne racladz me. Zha ne runгаа pe stib xtsiñ Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuaane guntaa to, goltsienie guic to ne laaw gun to par csañnon to lē Dios. Ga glu ne xtsiñ Jesús quiayun to, men ndzon ne rnabey, men ne gdziñd dze dzēē. Sca rieguiala.

<sup>12</sup> Bets, bzian, ne nligaa rleynie naa to. Golsoladz sca, tel pe guielnētaa gan to porne no to xnēz Jesús, peet tsienied guic to, sac ib scale no gaca. <sup>13</sup> Mazd ine golley; sac

gon ye Jesús sca gon guielnē, ni scagaa nroob guielbley ne tso to gal dze ne glu ganle zha nactaa guielndzon ne rap me. <sup>14</sup> Zeene rgodee miech to, rquiaago zho to loxaque ne no to xnēz Jesús, nley golgac; wen zie to ga, sac gon zhiEspíritu Dios nacie to.

<sup>15</sup> Guieltow sca csacsi miech to, telne bgaa to laa to beet, laa to wban, laa to bzēēb lo cuent ne rieguialdraa to, pe stib guielntseeb ne noyunragaa to. <sup>16</sup> Sangue telne rsacsi zho to loxaque ne no to xnēz Jesús, led guieltod ga. Laa ne ctoladz to, igoldeed xquizh lo Dios, sac gon tib guielnzaac nroob bgaa to ngab to lo me! <sup>17</sup> Golgacnan ganle, grēse ne ne nac ne zha ne ngab lo Dios, len dze rii laa ne csilo dzian guielnē. Nana, telne ye zha ne ngab lo me ted guielnē, ¿zha naczhe mine ted grēraa zha ne nēd gliladz Xtiidz me, gal dze ne laa me gun guielwxtis? <sup>18</sup> Zigne zhobneeque lo Xtiidz me, zaatne rnee: “Niicle zha ne wenle nēz lo Dios, nroobaque nac guielnē ne ran zho haxta gdziñ dze ne ycaania me zho, ¿pe lelgue grē zha ne dzigo racntseeb lo me?” <sup>19</sup> Gacxe nagon waa, niicle tel pe nactaa guielnē ne gnabey Dios ted to, tibaque golban zigne rnabey me, golsañ xquielmban to ladznie me; sac gon me nac men ne rneedz xquielmban to, ni mesi ib csaand me to.

*Golgon xtiidz zha ne rnabey lo to*

<sup>1</sup> Laa niina nagon, laa naa cso choplan diidz lo to, ne nac to zha ne rnabey lo grë zha ne no xnëz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

<sup>2</sup> Rso naa diidz lo to gon, zaacse golquianap grë zha ne bgaa to noquianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho. <sup>3</sup> Gunde to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho. <sup>4</sup> Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdziind dze lozh lo to.

<sup>5</sup> To ne nac to zha nguieg, golgon xtiidz grë zha ne zo rnabey lo to. Tib tib to, golgon xtiidz zha ne nacgrë to, sac gon: "Grë zha niats, rdzigu-iend Dios zho, sangue grë zha ndooladz, racniën me zho." <sup>6</sup> Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdziin. <sup>7</sup> Tel pe nactaa grë zhizhgab to, grë xliadz to, ladznia me golsana, sac gon me quianap to, noxco me to.

<sup>8</sup> iNsin golso lo mendox, sac gon tibaque quiana ma gnitlo ma ne! Masaque rac

ma zig rac grë meedz ne rgobeedz quiaguib ma ne gow. <sup>9</sup> Dziits golso gdeete to diidz yquiil ma to. Tibaque dib zdoo to gonalo Dios. Nanle to ganle dipse lo guidzliu, zha ne notaa xnëz me, scaque quiaded zho. <sup>10</sup> Tel pe nactaa guielne ne noyan to, ible csaand Dios to sacne rleyniedox me to, zeene laa dze co gza, hor co laa me gzhixcuaaraa lo xquielmban to, gzodziits me to, guntibli me guic to. Me nac men ne bredz ne ygaa ne lo guielndzon ne no me grop me Jesús, guielndzon ne gdziind dze nitlo. <sup>11</sup> Mese nac men ne rnabey grëtaa ncuane no, ni gdziind dze ne gdzëe me. Nligaa sca nac me.

<sup>12</sup> Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tibilique gac to gbichede to lo me.

<sup>13</sup> Grëse zha ne riladz Jesús Babiloin nu, zha ne bzooblo Dios gac xpëed me zigne bzoobloque me to, laa zho rxeel bdiuzh lo to; scaque Marcw, men ne rzaac naa nu zig tib xpëed naa, ye me laa me rquiaabdiuzh to. <sup>14</sup> Laa naa rnab lo to, golquiaabdiuzh grëse zha ne nacgrë to, ine golxen nia zho.

Dios gacniën to peet zhgab ctsebde to, nac to zha ne no xnëz Jesús.

**Pedr**



## BROP GUITS NE PQUIAA PEDR

Bets, bzian, ¡diuzh to grëse to!

<sup>1</sup> Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne rliladz ne, sac gon me gocien to squi rnalo to me niina; sac mesi mine nonguiel gac, min co run me.

<sup>2</sup> Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeena scagaa zig zie dze zunlayraa me to, zacnienraa me to, parne peet zhgab ctsebde to. <sup>3</sup> Sac zeene gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. ¡Got-saa gwi ne ganle zha nactaa ncuane ro, ncuane gzee zdoo ne been me parne gbig ne lo me! <sup>4</sup> Ni psan me didz pe nac grë ncuane ndzon ne gneedz me lo ne. Psan me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

<sup>5-7</sup> Nli laa to rnalole Dios, per parne yгаа to min co, none tsoxco to:

zaacse golban,  
goltsoxco guien to zha nac  
Dios,  
golseed gnabey to xcuerp to,  
guieete to,  
tibaque goltsoxco golgun mine  
racladz Dios,  
ine niowse golbannie grë zha  
ne nacgrë to, golsac zho  
zig tib menlidz to;  
golleynie samiech to.

<sup>8</sup> Nana, telne tsoxco to znu gban to, dzigosi mazdraa tsoguic to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. <sup>9</sup> Sac zha ne tsoxcoda, rrieequia rchool lo zho ga, rrieequia rowle guic zho ga, sac gon rsoladz zho zha nactaa lo grë dol ne blee Dios zho.

<sup>10</sup> Bets, bzian, golguien sca, niina ne laa Dios bzooblote to, laa me bredzle to ngab to lo me, goltsoxco sca golban, parne guiabde to lo dol stib. <sup>11</sup> Niicle par gdzingaa to zatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhial nëz zaatne ted to gdzin to ga.

<sup>12</sup> Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow. <sup>13-14</sup> Laa Jesús men ndzon ne rnabey ne, blule lo naa zhile gdzin dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; <sup>15</sup> zeena niicle wbile naa

lo guidzliuw, tibaque csoladz tow.

### *Gonpaa Pedr Jesús*

<sup>16</sup> Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me <sup>17-18</sup> guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: "Lëë Xpëed naa i gon, rleynie naa me, nziuu me lo naa."

<sup>19</sup> Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiazini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. <sup>20</sup> Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, <sup>21</sup> sac gon tel zha co, bneed zho ncuaane biaabtaa guic zho; sinque laa zho bnee mine bnabey Dios psiaab Espiritu Sant guic zho.

## 2

### *Zha ne rquidie (Judas 4-13)*

<sup>1</sup> Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha

ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nannd zho zha nactaa guielndox ne yгаа zho, tibaque zeene guien zho laa zho nole lo caxtigw co.

<sup>2</sup> Ndal miech ne greequia tsienal grë ncuaan yozh ne gun zho, niapse por zha laa grëraa miech csilo gneenë Xtiidz Dios. <sup>3</sup> Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielndox ne yгаа zho; <sup>4</sup> sac Diossi gon, mine run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho. <sup>5</sup> Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me. <sup>6</sup> Scaque len dze ne wban Lot, bdziguiend me grë miech yozh ne bio guiedz

Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho. 7-8 Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho. 9 Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnëdox ne cteed me zho gal dze ne laa me gun guielwxtis.

10 ¡Zig nac zha ne guiaadquidie to ga, mincopaa ygaa zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidnie zho mine rnabey Dios, ni lalnu dzeb guien lo zho rdzibdee zho grë men non ne no gbaa. 11 Per ni grë anjl, niicle ne zha nroob nac anjl, niicle ne rap anjl poder, per rdzin anjl lo Dios gdzibdee anjl zho. 12 Per zha, lo xquielyozh zho ga, haxta ncuaane rien zho zha nac, rdzibdee zho. Lëëdaa grë ma nac zho, tel ma laa ma ralse par ygaa ma nitlo ma; guien draa xquielrien zho, ncuaane racladzta zho run zho. Per zdzin dze ne nitlo zho, zigne rnitlodaque grë

ma, 13 por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieltow, rquiaalose zho miech wen nac zho zeene riaadsobnie zho to lo zhilni to. 14 Wnaa ne gantaa zho, pe na gzoobladd zho tsonie zho wnaa co, tibaque quiaayunctal zho xtol zho. Rio zho rquiil zho grë zha ne gard sodziits lo Xtiidz Dios; rienle zho zha gla zho ncuaane rquiin lo zho. Miech ndziibdeele nac zho, 15 sac laa zho psaanle xnëz Dios, nëz ne nitlole zho no zho; lëe zho run xcuent Balam, xpëed men ne lë Beor. Tel Balam, haxta mine nonguiel draa been me par gun me gan dimi; 16 per bdzin tib dze zeene laa Dios blisqui lo me grëtaa ncuaane quiaayun me ga. (Bnabey Dios lëeque xpurr Balam bnee, dzigora bien Balam psaan me xquielyozh me ga.)

17 Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guielcowdoo ne rieguial zho, zaatne gdzindraa dze gree zho!

18 Niats rzë xtiidz zho, per ncuaane paat rquiind rnee zho. Mine mazdraa mban run zho, rio zho lëeque lo grë guielyozh ne rdeed guxt xcuerp zho rquiil zho grë zha ne pense brie lo dol, rlozh garbiire riab zha co lo grë dol co stib. 19 Rnee zho zac tel zhataa gban ne, nodne

gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guielyozh ne run zho, lëele grë ncuaan co rnabey lo zho. <sup>20</sup> Tib zha ne sca briele lo grëtaa ncuaane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho. <sup>21</sup> Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuaan yozh ne been zho glo. Nroobdox caxtigw ne gan zha co, mazd zhi mine ygaa zha ne gocnand zha nac xtiidz me. <sup>22</sup> Zha copaa nagon run mine rnee diidz ne znu rëb: “Nandraaque mëcw, ncuaane bdzible ma rbiire ma row maw”; ni stib mine znu rnee: “Ngutzshe, rlozhle raz ma nis mbe, ni rlozh ga riegaaque ma lo nis ben.”

### 3

*¿Zha nacne gard guiaad Jesús?*

<sup>1</sup> Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. <sup>2</sup> Golsoladz ganle, zha nac grëse mine bnee grë zha ne biadteed xtiidz Dios padzeela;

golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

<sup>3</sup> Racladz naa gacnan to ganle, len dze ne ziaadyob guiaad Jesús, zrieequia zha ne gzhidznie xtiidz me, csilo zho gun zho grëtaa guielyozh ne gzoobladz zho; <sup>4</sup> guiab zho: “iPe gliladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

<sup>5-6</sup> Squiaalo zho rsoladzd zho zha bnitlole guidzliu tib vuilt, ni zhagaa nitlo mine no niina. Wen wen nan zho ganle zha bnabey Dios biao guidzliu, me bnabey brieew lo nis, ni masaque lo nis now; mincocxe waa nis bnitlow glo. <sup>7</sup> Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielntseeb ted zho caxtigw.

<sup>8-9</sup> Zha ne rzac quiayaanladz Jesús diidz ne psan me ga, per led quiayaanladzd mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane gun ne tib milraa iz, tib dzeque gun mew; nroob rzac ne tib mil iz, per par

me rzacse mew, lal ne rzac ne tib dze. <sup>10</sup> Ib laa me no guiaad, per choot nand dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacsew laaw tsec.

<sup>11</sup> Scataa nagon nitlo guidzliu rii, ni grëraa ncuaane rdzian ne niina, igolguien sca golban zigne racladz men ndzon ne rnabey ne, gunctaldraa to xtol to!

<sup>12</sup> Tibaque golconie guic to ne ib laa me no guiaad; tibaque ndzinli golban, gollu ne quiambëz to gdziinniob dze ne sca gazbel grë ncuaane ran ne gbaa, dze ne sca tib guiaalse grë ncuaane niaaw.

<sup>13</sup> Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zaatne tsodraa guielntseeb.

<sup>14</sup> Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me.

<sup>15</sup> Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me,

zineele me lo to grë mine none naa nu. <sup>16</sup> Parga nli no mine rnee me ga, ngan guien ne zha naca; grë zha ne rdziinpaa racladz ctsëë Xtuidz Dios, zeene laa zho rneew, laa zho rneew zigne racladz zho; zigne runaque zho grëraa mine zhobnee lo Xtuidz Dios. Zha ne sca run, lëëque zha noguib nitlo zho ga.

<sup>17</sup> Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquuil zho to csaan to mine nac diidzli, csaan to nëz ne ziele to i. <sup>18</sup> Goltsoxco zig zie dze guienraa to pa lotaa rleyne Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me riegual gunnon miech, zigtaa niinaw, zigtagaa grë izdoo ne ziaadraaw. Sca rieguala.

Pedr

# GUITS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

<sup>1</sup> Jesús nac Diidz Ndzon ne rdeed guielmban. Notaque me, nole me zeene bre guidzliu. Bdziñ dze biaad me lo guidzliu; grop diag no bdzion no grē mine bnee me, grop lo no bdzion no grē mine been me; sac bdzionpaa no zha rac me, zha rnee me, haxta bzhieen no nia me. <sup>2</sup> Ni niina laa no quianee lo miech ganle cho nac me; golgacnan ganle, me rneedz tib guielmban ne gdziñd dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziunbey no me. <sup>3</sup> Gacxe waa, mine rnee no lo to led lega rneed now; nozhal bdziõna, nozhal bdziona. Laaw rnee no lo to, zeena tipse gac ne grē ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpēed me. <sup>4</sup> Laa naa rnee grē min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

<sup>5</sup> Znu nac mine bdzion no pseed Jesús miech, rēb me: Nac Dios zig nac tib biini, ni tib lē guielcow guiend zaatne no me; laa grē dol, masaque naca zig nac guielcow. Ni mincoque gon rnee no lo to.

<sup>6</sup> Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo. <sup>7</sup> Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grē ne; ni scagaa, xchen Jesús nac mine csanmbe ne lo grētaa xtol ne.

<sup>8</sup> Nana tel guiab ne: Tel naa ib peet dol rapd naa. Lēēque ne noquidie ne ga, rneelid ne ga zha nac ne. <sup>9</sup> Sangue telne cxobdol ne grēse xtol ne lo Dios, ible tedsod silaa me ne lo grētaa dol co, sanmbe me ne lo grētaa guielntseeb ne zidziun ne; sac ible laa Jesús gut par csanmbe me ne. <sup>10</sup> Telne sca guiab ne rapd ne dol, rriequia dzigo rzoob ne Dios zig tib men ne rquidie; sac tel me, nanpaa me grēse ne miech ngoopdol nac ne.

## 2

<sup>1</sup> Xin yeena, laa naa rso didz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze yquia zdoo me ne, lēē men co nac Jesús, lo me golbig (tel me ni tib dol rapd me).

<sup>2</sup> Sac me bded grētaa guielne ne riogual ne ndieed ne por grētaa xtol ne, psanwen me ne lo Dios; me goc zig tib gon ne pcaania Dios gozh grēse xtol ne, ni xtol grēraa miech ne ndxie dibdoose lo guidzliu.

*Golleynie samiech to*

<sup>3</sup> Gologona ganle: Telne run ne grēse mine rnabey Dios,

gase rien ne ne nli xněz me no ne. <sup>4</sup> Laa tel zha ne rnee: "Xněz me no naa", ni rlozh ga ruṅd zho grē miṅe rnabey me, rquidie zho ga. <sup>5</sup> Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xněz me no ne. <sup>6</sup> Gacxe nagon waa, zha ne rnee xněz me no zho, ib none zaacse gban zho, zigne wban Jesús zeene biaad me lo guidzliu.

<sup>7</sup> Bets, bzian, golgacnan ganle, none gleynie to samiech to. Guiabde to togo ncub miṅe rne naa lo to nu guṅ to, laa naa rzet miṅe binle to glo zeene psilo pquiaadiag to Xtiidz Dios. Niicle ne padzeelale zhubneew, niicle ne pquiaadiagle tow, <sup>8</sup> per rrieequia ncuba niina; sac goṅ zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb něz lo xbiini Dios.

<sup>9</sup> Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho. <sup>10</sup> Zha ne rleynie samiech, zha cosi nli lo biini co mban zho, noxtseebd lega tsobe zho, sac ranpaa zho pa lo zie zho; <sup>11</sup> saṅgue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha rienḍ dien pa něz tsie zho, sac guielcow co quiantse lo zho.

<sup>12</sup> Xin yeena, laa naa rne grē miṅ rii lo to, sac goṅ, tel to laa Jesús bdiizhle tel pe

nactaa grē xtol to. <sup>13</sup> To ne nac to dad, laa naa rxel diidz rii lo to, porne nac to zha ne rliladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rrieeodraa mendox yquuil ma to. To ne nac to mēēdas, xin yeena laa naa rxel diidz rii lo to, porne nac to zha ne nole xněz Dios meṅ ne nac Pxoz ne.

<sup>14</sup> Nana sca, zigtaa tow ne nac to dad ne ruṅbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdras mendox yquuil, <sup>15</sup> golguien, gleyniede to grē ncuaane rap to, gleyniede to grē ncuaan ndzinlid ne rac lo guidzliu rii. Zha ne rleynie grē ncuaan co, nlid rleynie zho Dios meṅ ne nac Pxoz ne; <sup>16</sup> sac grēse ncuaane rac lo guidzliu rii (zig nac zha ne zienal ncuaane gdeedguxt xcuerp, zha ne rzoobladz yquianie ncuaane rdziladztaa, zha ne racniats lo samiech), grēse ncuaan co led Diosd rnabeya, sinque lëe miṅe rzonal grëraa miech lo guidzliu ga. <sup>17</sup> Ni na tel zig nac guidzliu, zig zie dze laaw qualozh grëw grë ncuaane rleynie miech low; saṅgue zha ne mban zigne rnabey Dios, laa zho bgaale tib guielmban ne gdziṅd dze lozh.

*Zha ne rlëenie Jesús*

18 Xin yeena, zhile gdzin dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndal-le zaatne norieequia grë zha ne rsilo quiatsidil Xti-idz me; gane ndion no ne laa dze co ziaadgaxle. 19 Nli ladaque zha ne nacgrë ne brieegrë zha co, per nlid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nlid nacgrë zho ne.

20 Sangue to, nacle to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli. 21 Guits ne rxel naa lo to nu, nacle par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

22 Grë zha ne rnee i nlid lëe Men ne zëëble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca riladzd zho cho nac me, yelexoz me ga riladzd zho. 23 Sac zha ne rlëenie men ne nac Xpëed Dios, garlu ne nlid riladzd zho cho nac Dios; sangue zha ne rxobnen cho nac Xpëed me, zha cosi nli riladzd zho cho nac me. 24 Laa naa rso diidz lo to sca: Goltzial grë mine pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me.

25 Golsoladz ganle, laa Jesús psanle diidz ne ib zgaa ne tib guielmban ne gdzind dze lozh; lëe guielmban co ygaa grëse zha ne nacie me.

26 Laa naa rzet min rii lo to, sac ne squi no grë zha ne ziaad racladz yquidie to. 27 Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac grëraa ncuaane no gacnan to, ni mesi gon mine nac diidzli min co rseed me to, led yed me rquidie. Golgen sca, Jesús golbannie, golbannie me zigne noseed Espiritu Sant to.

### *Zha ne nac xpëed Dios*

28 Xin yeena, nanle to sca sozite to lo Jesús, sinque tibaque golgacie me; zeena ine tibladz gac to gal dze ne laa me guiaad. Sac zha ne sozit lo me gban zho zigne gacladzta zho, zeene laa me guiaad mban gac zho; sac guielto ne guiaan zho lo me. 29 Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me mine rieguial zho.

## 3

1 Golwi ganle pa lotaa rleynie Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech riladzd zhow, sacne runbeyd zho cho nac me.

2 Bets, bzian, ne nligaa xpëedle Dios nac ne. Nli ndiond ne niina dien zha glu



ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne. <sup>3</sup> Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaane runctal xtol zho, sac tel Jesús ranzed me dol.

<sup>4</sup> Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho mine rnabey me. <sup>5</sup> Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me. <sup>6</sup> Gacxe waa, zha ne nlipaa nacie me, zienaldraa zho ncuaane gunctal xtol zho; laa grë zha ne tibaque noyuncal xtol, gase rlu ne gard guien zho cho nac me, gard gunbey zho me.

<sup>7</sup> Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios; <sup>8</sup> sangue grë zha ne tibaque quiaayuncal xtol, xnëz mendox ga ngab zho; sac tel mendox, desde padzeela tibaque guielntseeb quiaayun ma. Ni min co nagon nacie biaadpaa Xpëed Dios lo guidzliu, biaadnitlo me grëtaa ncuaane run ma. <sup>9</sup> Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne

nacie zho; rienle zho nodne gunctal zho xtol zho, sac laa zho nacle xpëed Dios.

<sup>10</sup> Nienenpaa cho nac xpëed Dios, chogaa nac xpëed mendox, sac grëse zha ne run guielntseeb, grëse zha ne rleynied samiech, led xpëete Dios nac zho; <sup>11</sup> sac gon, desde dze ne psilo bliladz to Xtiaadz Dios, bingazh to ib none gleynie ne samiech ne. <sup>12</sup> Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guielntseeb run me. Ib gunde to mine been Caín. <sup>13</sup> Gacxe waa, bets, bzian, zeene gan to laa grëraa miech rlëenie to, ib tsoode to zhgab guiab to pe nacie sca run zho. <sup>14</sup> Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdzindraa dze lozh; sac zha ne rleynied samiech, nëz ne nitlo zho ga zie zho. <sup>15</sup> Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard yгаа zho guielmban ndzon ne gdzind dze lozh ga. <sup>16</sup> Ndion ne zha gleynie ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuaane rap zho, gacnie zho samiech zho. <sup>17</sup> Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiin

tib zha ne nacgrë zho, per ib rdeete zho palal pe yquiin zha co. ¿Niacxe na nli rleynie zha co samiech zho ga? <sup>18</sup> Xin yeena, golgacnañ sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

<sup>19</sup> Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me. <sup>20</sup> Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nañ me. <sup>21</sup> Xin yeena, laa zha ne desde zdoo zho nañ zho noguiitsd zho mine rnabey me, scagaa tibiladzse gbig zho lo me; <sup>22</sup> hor cosi ncuaane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuaane rdziladz me. <sup>23</sup> Ni lëe min rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. <sup>24</sup> Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espíritu Sant nacie ne.

#### 4

<sup>1</sup> Bets, bzian, zha ne gnë zhiEspíritu Dios nacie zho, goon ye zho quianee Xtiidz

me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspíritu Dios nacie zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho. <sup>2</sup> Parne guien to dien pe nli zhiEspíritu Dios nacie zho, golwi dien zha rzac zho Jesús: Tel zha ne rliladz ne nli zig tib miech goc me biaad me lo guidzliu, ga rlu ne nli zhiEspíritu Dios nacie zho. <sup>3</sup> Laa tel rliladz zho ne nli sca biaad me, nlid dzigo zhiEspíritu Dios nacie zho; sinque lëele espíritu ne rtsidil Jesús ga nacie zho. Laa to binle ganle ib laa espíritu co guiaad; ni lëele espíritu ntseeb co nacie grë zha ne squi quianzë lo guidzliu niina.

<sup>4</sup> Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacie to, lëdle espíritu ne nacie grë zha ne sca zienal grë wseed yozh ne no lo guidzliu. <sup>5</sup> Grë zha co, ncuaane rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleynie grë ncuaan co, zha co rliladz zhiwseed zho. <sup>6</sup> Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne

ziaadquidie miech.

*Rleynie Dios miech*

<sup>7</sup> Bets, bzian, golgotsaa gleynie ne samiech ne, sac gon, tel Dios grëse ne rleynie me ne. Gacxe waa, zha ne rlu nli rleynie zho samiech zho, gasë rlu ne nli xpëed Dios nac zho, nli runbey zho me. <sup>8</sup> Laa grë zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleynie ne samiech ne. <sup>9</sup> Gotsaa gwi ne ganle, pa lotaa rleynie me ne: Tibpaa Xpëed me, ni pxeel me me biaadtizh me xtol ne, zeena yгаа ne tib guielmban ndzon ne gdziñd dze lozh. <sup>10</sup> Led guiabd ne togo glo miech bleynie Dios gane rleynie me zho niina; led scada, sinque ible zdo me gola rleynie me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleynie Dios ne.

<sup>11</sup> Bets, bzian, zigne scataa rleynie Dios ne, scaquegaa ne nagon none gleynie ne samiech ne. <sup>12</sup> Gard tso tib zha ne gan Dios, per zha ne rleynie samiech, me ga nacie zho; ni zigse zie dze dib zdooraa zho rleynie zho samiech zho.

<sup>13</sup> Me nac men ne pxeel zhiEspíritu me nacie no, parne glu nacie me no, ni scagaa no nacie no me. <sup>14</sup> Ni stiba, grop lo no bdziñ no biaad Xpëed me biaadsilaa me miech lo dol; ni min co

nonee no lo miech niina. <sup>15</sup> Grëse zha ne rililadz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

<sup>16</sup> Ndion ne ganle nli rleyniedox Dios ne, sac rienpaa ne rleynie me ne, ni rililadz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho.

<sup>17</sup> Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñd dze ne laa me gun xquielwxtis me; sinque haxta gley ne dzian ne me gal dze co. <sup>18</sup> Nod pe nacie gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

<sup>19</sup> Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne. <sup>20</sup> Tel zha ne rnee, rleynie zho Dios, ni rlozh ga rlëene zho samiech

zho, rquidie zho ga. Sac gon, tel nanđ zho gleynie zho samiech zho, zha ne ranlopaa zho, ¿pe lel Dios dzigo gliladz ne nli rleynie zho, ni nac me men ne ranđ zho? <sup>21</sup> Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

## 5

*Zac csaan ne ncuaañe runctal xtol ne*

<sup>1-2</sup> Grëse zha ne dib zdoo rliladz ne ible lëe Men ne zëeble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed. <sup>3</sup> Sac zeene rleynie ne Dios, zun ne grëse mine rnabey me. Ni grë mine rnabey Dios, nacda ncuaañe guiab ne grieelod gun ne; <sup>4</sup> sac grëse zha ne nacle xpëed Dios, totsaque rnaló zho ne Jesús gun xyudar zho, gacwetraade zho lo grë ncuaañe gunctal xtol zho. <sup>5</sup> Golgacnan sca: zha ne dib zdoo rliladz Xpëed Dios nac Jesús, zrieelo zho csaan zho grëtaa ncuaañe runctal xtol zho.

<sup>6</sup> Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho

nac me. Ni ye Espíritu Sant nolu ganle ne scaw, ni mine rnee me diidzliw.

<sup>7-8</sup> Gotsaa gwi sca ganle, tson mod rlu cho nac Jesús: Tiba por mine nolu Espíritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me. <sup>9</sup> Mine rnee Dios, none gliladz new. Xtiidz samiech ne name rliladz ne, ¿pe lel mine rnee Dios dzigo gliladz ne? <sup>10</sup> Zha ne gliladz mine rnee Dios, rrieequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús. <sup>11</sup> Laa me bneele ganle: zha ne gnalo Xpëed me, zgaa zho tib guielmban ndzon ne gdzind dze lozh; sac Xpëedse me rdeed guielmban co. <sup>12</sup> Gacxe waa, zha ne rnaló Xpëed me, laa zho bgaale guielmban ndzon co; sangue zha ne rnalod Xpëed me, gard ygaa zhow.

*Bgaale to guielmban ne gdzind dze lozh*

<sup>13</sup> To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdzindraa dze lozh ga. <sup>14</sup> Ni scagaa, ndionpaa ne rquiaadiag Dios xtiidz ne, zeene ncuaañe rio zdoo me rnab ne lo me; <sup>15</sup> ni zigne ndion ne rquiaadiag me xtiidz ne, scaquegaa

none gliladz ne ib zneedz me ncuaaṅe rnab ne.

<sup>16</sup> Zig nac zeene gaṅ to cho tib zha ne nacgrë to been pe tib dol, ni rlu nacda dol ne gnitlo zho, zac gnab to lo Dios guṅ me zho perdon; ni gacnan to ganle, ible zuṅ me zho perdon. Sac goṅ no dol ne rnitlo, ni zha ne guṅ dol co, nodne gnab to lo Dios guṅ me zho perdon. <sup>17</sup> Nli grëse guielntseeb dol naca, per no mine rnitlod miech. <sup>18</sup> Ni ndiõṅ ne ganle, zha ne nacle xpëed Dios rundraa zho ne lega guṅctal zho xtol zho; sac Jesús meṅ ne nac Xpëed Dios, meṅ co quianap zho, grieelodraa lega pe guṅ mendox zho.

<sup>19</sup> Zig nac ne, ndiõṅpaa ne xnëz Dios no ne. Nli ndalraa zha ne zienal ncuaaṅe rnabey mendox, <sup>20</sup> sangue ne, laa Xpëed Dios biaad bdixbini me xquielrien ne bdzi-uunbey ne meṅ ne nacpaa Dios. Niinasi laa ne ngable lo meṅ ne nacpaa Dios ga, ni lëe me ga nac Jesús. Me nac Dios nguiamban, ni me nac meṅ ne rdeed guielmban ndzon ne gdziṅd dze lozh.

<sup>21</sup> Xin yeena, golguien Diosse nac meṅ ne gleynie to; gunde to ne lel grë ncuaaṅe no lo guidzliu rii gleynie to, laa ne gleynie to Dios.

Juan

## BROP GUILTS NE PQUIAA JUAN

¡Diuzh to grëse to!

<sup>1</sup> Laa tib zhagol rii rxeeł tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleynie naa to gon, ni led naadsegaa, sinque ye grëraa zha ne runbey diidzli ne nac Xtiidz Dios. <sup>2</sup> Rleynie no to sacne tibaque nac diidzli ne rliladz ne, ni tsod dze ne csaan new.

<sup>3</sup> Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoos me to; ni zunpaa mew, sac rleyniedox me to.

<sup>4</sup> Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoz ne.

<sup>5</sup> Bets, bzian, laa naa rnab lo to, golgotsaa gleynie ne samiech ne. Guiabd ne togo ncub mine rne naa lo to nu gun to; sac gon, lëequew ga bdzion ne zeene psilo bliladz ne Xtiidz Dios.

<sup>6</sup> Telne nli rleynie ne Dios, dzigo none gban ne zigne rnabey me; gacxe waa, none niowse gban ne, ine gleynie ne samiech ne, sac gon min co rnabey me.

<sup>7</sup> Ndal zha ne quianzë lo guidzliu niina, noquidie zho

miech, rnee zho nliid goc Jesús zig tib miech zeene biaad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho. <sup>8</sup> Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblrique golgac, zeena yгаа to grëtaa guielnzaac ne no gneedz Dios lo to. <sup>9</sup> Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne zienalpaaw zigne naca, zha cosi xnëz Dios ga, xnëz Xpëed me Jesús ga no zho. <sup>10</sup> Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsoode to gnee to pe diidz ne csaunziuu to zho; <sup>11</sup> sac telne sca gun to, rrieequia yele to rleynie grë zhiwseed yozh zho ga.

<sup>12</sup> Ndal grë ncuane no gne naa lo to, per racladzd naa gzet naaw lo guits rii. Laa guic naa no gualgan naa to i, dzigo mazd hor co naazhal gnew lo to; zeena nroob guielbley ne dzio ne grë ne.

<sup>13</sup> Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeeł bdiuzh lo to grëse to.

Juan

## BION GUILTS NE P̄QUIAA JUAN

¡Diuzh bets!

<sup>1</sup> Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

<sup>2</sup> Bets, rnab naa lo Dios zigne squi wen mban luu nēz lo me, scaque zaacse grieequia grētaa ncuaañe guñ luu, ni gneedz me guieñdaan lo luu. <sup>3</sup> Ne nlipaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu miñe nac diidzli. <sup>4</sup> Ne nligaa, nodraa pe stib conley zdoonaa zigne rleytaa naa zeene ron naa ine niowse mban grē zha ne biane naa xtiidz Dios lo, zienal zho miñe nac diidzli.

<sup>5</sup> Bets, ziyon naa squitaa tibaque noxco luu run luu xyudar grē zha ne nacgrē ne, ni mazdraa zeene nac zho zha ne ziaad stib guiedz. ¡Wen ga! <sup>6</sup> Squi ndxie grēraa zha ne riladz Jesús, rzodiidz zho squitaa nquialadz luu zho. Bzhiguieñ sca, bioxco tibaque squi been xyudar zho zeena grieelo gdziñ zho zaatne no tsie zho. Sca rdziladz Dios. <sup>7</sup> Sac gon, niapse porne rleynie zho Dios, laa zho brieegun zho xtsiin Jesús, ni ib rziguieñd zho ycaania zho ncuaañe rdeed grē miech ne riladzd

Xtiidz Dios. <sup>8</sup> Miñ co nagon, ib none ne yquiambiaazlo zho, ne none gdeed ncuaañe yquiin zho, zeena dziuun ne xyudar zho ygaaz Xtiidz Dios.

<sup>9</sup> Pxelle naa tib guits lo grēse zha ne no xnēz Dios i, per zig nac Diótrefes gon, men ne racladz so gnabey lo to i, rond me miñe rnee no. <sup>10</sup> Gacxe na, telne laa naa guial i, dzigo laa naa glisqui lo me dien pe nacne quianeenē me no.

Ni tebaa mincose, na haxta run me ib rbēzlod me grē zha bets, zha bzian ne rlanso i; niicle rdeetegaa me diidz cho gdeed zaatne cuēz zho. Zha ne rund miñe racladz me, rbee me zho lad grē zha ne nacgrē zho.

<sup>11</sup> Bets, sangue luu gon ib tsienald luu miñe run grē zha ne sca run guieñtseeb, sinque bioxco güeynal ncuaañe ndzinli. Sac gon, zha ne run niapse ncuaañe ndzinli, xnēz Dios no zho; laa grē zha ne run ncuaañe ntseeb, gard seēb zho xnēz Dios.

<sup>12</sup> Zig nac Demetr, grēse miech rnee ganle zaacse mban Demetr. Ni rlugaa nliw, sac gon tibaque zienal me miñe nac diidzli. Niicle nogaaw, miñcoque rnee no, ni nan luu ganle led yed no rquidie.

<sup>13</sup> Ndalraa ncuaañe no gne naa lo luu, per racladzd naa gzodiidz naaw lo luu lo guits rii; <sup>14</sup> sac laa guic naa no guialgan niob naa luu i, dzigo hor co ziodiidz ne grop ne.

<sup>15</sup> Guiaañnie Dios luu sca; peet tsienied guic luu. Grēse

xamigw luu zha ne runbey  
luu nu, laa zho rxeel bdi-  
uzh lo luu. Scagaa bzhiguiel  
bdeed tib zhibdiuzh naa lo tib  
tib zha ne nac xamigw ne nēz  
qui.

Juan



## GUITS NE PQUIAA JUDAS

<sup>1</sup> Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quiapan Jesús to.

<sup>2</sup> Dios glu ganle pa lotaa rquia zdoo me to, pa lotaa rleynie me to, ni pa lotaa noxco me to zeena peet tsienied guic to.

<sup>3</sup> Bets, bzian, mine gocladz naa nzet naa nu ganle zha nactaa mine been Dios psilaa me ne lo xtol ne; per na rgobey naa nonguielraaw cso naa diidz lo to, ib gandzede to grë zha ne rtsidil mine rliladz ne. Dios bneedz diidz gocndion new, ne nac ne zha ne brie lo dol bziaab ne xnëz me. <sup>4</sup> Sac gon, blalaa zha ne rquiaalo rliladz Dios, ngueets zhlian laa zha bzëëb lad to i. Miech yozha, niapse lo dol no zho, rnee zho zac gun ne ncuaane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

<sup>5</sup> Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz

tow: Zeene psilaa Dios grëse menladz ne lo guielnë ne noded zho Egipt ga, zha ne brieequia ib bnëd niunbey me, ib gondzed me zho, bnitlo me zho. <sup>6</sup> Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdziin dze ne laa me gun guielwxtis. <sup>7</sup> Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal mine nacdreaa guieltsieel, tel chotaa pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdzind dze guiuu, ni ga nitlo zho. <sup>8</sup> Ni zha ne gon blanso lo to i, scadaa run zho; sac tel zha, niapse guelyozh zienal zho, laa zho nosanbeed xcuerp zho, ib rond zho mine rnee zha ne rnabey, haxta rdzibdee zho grë men non ne no gbaa. <sup>9</sup> Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: "¡Dios nac men ne gunquizh luu mine run luu i!" <sup>10</sup> Laa grë zha qui, haxta grë ncuaane run Dios, ncuaane ni rioguicd zho zha nac, laa zho rdzibdeew; masaque mban zho zigne mban grë ma, laa zho run ncuaane rdeedtaa guxt xcuerp zho; lëëque zha

nonitlo zho ga. <sup>11</sup> jProbsaxe zho! Sac gon, nēz ne zey Caín ga zienal zho. Lo guielblē dimi, laa zho brieē xnēz Dios zigne brieē Balam; ni zigne gut Coré zeēne gocntseeb me lo Moisés, scaque nitlo zho.

<sup>12</sup> Zeēne riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guiend lo zho. Nēzrii nēzrec quianzē zho, masaque nac zho zig nac xcow ne ziaadnied nisguie, loxaque nēzrii nēzrec rienie mew; zig nac tib yag bgool ne guiend nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliaadzle dib lo; sac tel yag bidza, gdzindraa dze ne yguiaw. <sup>13</sup> Zigne nēzrii nēzrec rchoon nisdoo grē mtsiin beed ne ndziib low, scadaa nēzrii nēzrec nolu grē ncuane mbeeguielto ne quiaayun zho. Laa zho ziele nēz lo guielcowdoo ne rieguial zho, zaatne gdzindraa dze griee zho; zig tib mel gbaa ne bnitnēzle, laa ma nonziaabse lo guielcow.

<sup>14</sup> Lēēle zha qui ga bzeet Enoc (men ne brieequia lo dii ne rac xoop xtii Adán), zeēne psiaab Dios guic me, rēb me: “Golwi ganle laa Dios ziaad, pe zhidaa grē anjl ne ziaadnie me, <sup>15</sup> ziaadgun me guielwxtis. Grēse miech ntseeb, laa me gunquizh zho grētaa dol ne beēn zho, grētaa

diidz dox ne brieē ro zho bneenē zho me.” <sup>16</sup> Ni nligaa sca nac grē zha qui, ib nod ncuane tso zho conform, tibaque wlisqui no zho; laa zho zienal grētaa guielyozh, ncuane racladztaa xcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho minē racladz zho.

*Laa naa rso diidz lo to*

<sup>17</sup> Sangue to bets, bzian, golzoladz minē bnee grē zha ne pxeel Jesús bnee Xtiidz me, zeēne biadseed zho to; <sup>18</sup> led znu rnee zho: “Zeēne zhile gdzin dze ne laa guidzliu rii nitlo, zrieequia grē miech ntseeb ne gzhidznie zhiwseed Jesús, laa zho gban zigne nactaa grē zhgab yozh ne guiab guic zho.” <sup>19</sup> Ni nligaa ran to niina ganle sca quiaayaca, lēē grē zha co i squi nogodil grē zha ne no xnēz Jesús. Nacnied zho Espiritu Sant, gane niapse grē ncuane dol ne racladz xcuerp zho, min co run zho.

<sup>20</sup> Bets, bzian, golguien sca tibaque dziits golso lo Xtiidz Dios mine rliladz to. Golzodiidznie Dios, zigne csiaab Espiritu Sant zdoo to. <sup>21</sup> Sozite to lo Dios, golguien ganle zha rleynietaa me to; golquiambēz dzian ne gal dze ne ygaa ne guielmban ne gdzind dze lozh, minē ndionpaa ne gneedz Jesús men ne rnabey ne, porne rquia zdoo me ne.

22 Tel cho zha ne racchop guic lo Xtiidz Dios, golnee lo zho biire sodziits zho stib. 23 Zha ne bii no lo dol, golnee lo zho guien zho csaan zhow; golcuee zho lo gui ne noxtseeb zho ygaa zho ga; scagaa grëraa miech, golquia zdoo zho, per ib cxende to lo zho. Ni lalnu gdziguiende to grë dol ne run zho, golsaca zig rzac to tib ncuaane rbixne zdoo to ran to.

24-25 Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacnien me to guiabde to ladznia dol stib; zeena ine mbe to, ine rley to laa me gdzinne to zaatne nac lo guieIndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guieInabey. Tibaque nac me, niicle mazd glow, niicle niinaw, ni gdziind dze ne gdzëe me.

Judas

## MINE BDEED DIOS DIIDZ GON JUAN

<sup>1</sup> Nu raquiet grë ncuaañe ziaadyoble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanj me biaad bi-aadluw lo ngundziin win ne nac naa nu, parne sca gacnañ zhow. <sup>2</sup> Grëse miñe gon naa, grëse miñe bin naa ga, laaw gne naa zigne gonse naaw, zigne binse naaw. ¡Diidzliw! <sup>3</sup> Dichos grë zha ne glab lo guits rii, ni dichos grë zha ne yquiaadiag grë miñe zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grë miñe rzeeta nu, ziaadgaxle.

<sup>4</sup> Naa nac Juan, laa naa rquia guits rii rxel naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios men ne no padzeela, men ne no niina, men ne nacle diidz guiaad, me gacnien to lo grë zhizhgab to, me cchoobladz zdoo to peet tsienied guic to; me ni Espíritu ne zo lo me zaatne nac lo xcan ndzon ne zob me; Espíritu ne rlu zha nac gadz guielbiini ne rap me; <sup>5</sup> ni Jesús men ne rnee niapse diidzli, men ne glopaa brieaban lo guielgut, men ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me

ne, bleeladz me me bzhiee xchen me psanmbe me ne lo grëtaa xtol ne, <sup>6</sup> tibaque been me ne, psannon me ne; bzooblo me ne gac ne pxoz ne gun dziin lo Dios men ne nac Pxoz me. ¡Mese nac men ne rap guielndzon, mese rap grëtaa guielrnabey! ¡Tsod cho stib zig me, ni gdziñd dze ne nitlo xquielrnabey me! Sca nac me.

<sup>7</sup> ¡Bii zanaque to ganle zeene laa Jesús ziad-zëëb lo xcow! Grëse miech zan zho me, zig nac zha ne sca bdiñ me, zha ne sca bliz lanz cue me, zanlo zho me; dibdoo guidzliu, horco mbanse gac miech, haxta zoon zho, haxta zdieb zho. Ible sca none gaca.

<sup>8</sup> Znu rnee Dios, men nroob ne rap grëse guielrnabey: “Grëse ncuaañe notaa, naa psilow ni naa csiaala; naa nac zigne nac letr “a” ni letr “z” lo grëse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial stib.”

### *Gon Juan Jesús*

<sup>9</sup> Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guielnë ne noded to. Zigne rneedz me paciens lo to lëb to lo grëtaa guielnë ne no gan to, scaque racnien me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lëëtaa que no naa lo guidzliu win ne lë Patmos, ga ngoguiu zho naa loxaque ne noseed naa

miech Xtiidz Dios, mine biaadlu Jesús zeene biaad me lo guidzliu. <sup>10</sup> Tib dze, lëëtaque nacnie Espiritu Sant naa nozodiidznie naa Dios, tibaque zeene nguiedz zëëb tib tsi men co, pale tsi tib trompet; <sup>11</sup> nē me lo naa:

—Grëtaa ncuaane ran luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nēz Asia: Efés, Smirn, Pérgamo, Tiatir, Sardis, Filadelf, ni Laodicé.

<sup>12</sup> Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guib or. <sup>13</sup> Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdzina haxta yan ni me, ni ndxie tib cinch niaa niapse guib or ngali ro zdoo me. <sup>14</sup> Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me. <sup>15</sup> Ni mew, masaque rquiabniw zigne rquiabni guib brons zeene rlozh rianmbew, zeene rrieenēzgaaw lo gui; tsi mew, masaque rio bi rnee me zig rio bi grë guiubee nroob ne zhoob naal nis. <sup>16</sup> Nia me mine nēz derech, nzhen me gadz mel gbaa; ni zob tib spad ro me, zigtaa nēz zhits spad cow zigtaa nēz low, gropse nēza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

<sup>17</sup> Zeene gon naa me, mbe

biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—jGdzieebd luu! Naa psilo ni naa csiaal, naa psan grëtaa ncuaane no, ni naa gnitlow; <sup>18</sup> ni mban naa. Nli gut naa per briebaan naa, mban naa niina, ni gdziindraa dze ne guet naa; ladznia naa no guielgut. jGdzieebd luu sca! <sup>19</sup> Grëse ncuaane noyan luu nu niina, pquiaaw lo guits grësew, niicle mine noyaclew, mine naragaa gaca. <sup>20</sup> Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

## 2

*Diidz ne bnee Jesús lo zha Efés*

<sup>1</sup> Blozh ga nē me lo naa:

—Mine gni naa lo luu nu niina, pquiaaw pxeela Efés, lo zha ne quianap grë zha ne ngab xnēz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuilt lo gza gadz candeler ne niaa niapse guib or ga, rnee me:

<sup>2</sup> 'Nan naa zha mban to, nan naa pa lotaa noxco to run to xtsin naa, ni nacde to zha ne lega znuse guiaan zdoo; stiba, ib ranzede to grë zha ntseeb. Grë zha ne ziyaad i rnee zho Dios pxeel zho ziadnee zho xtiidz me, per pquia

to been to zho prueb, haxta gocnan to rquidie zho. <sup>3</sup> Nan naa zha nactaa guielnē ne noded to loxaque ne rliladz to naa; per niicle scaw tibaque dziits zo to, ib riaand zdoo to.

<sup>4</sup> 'Loxaque naca no tib ncuaane glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa! <sup>5</sup> Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac gon, telne gac-wende to, ible zial naa i zialtichee naa xcandeler to zaatne zow.

<sup>6</sup> 'Nli rleyniedraa to naa scataa, per rley naa ran naa ib rdziguiende to grē ncuaane ndzinlid ne run zha Nicolaít, sac tel naa, ni lalnu ib rdziguiend naa ncuaane run zho.

<sup>7</sup> 'Zha ne rioguicle godiidz rii, yquiaadiag zho ganle zha rnee Espíritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaane gunctal xtol zho, zha co ygaa gow xnex yag ne rdeed guielmban ga, mine zob leñ huert ndzon ne rap Dios ga."

*Diidz ne bnee Jesús lo zha Smirn*

<sup>8</sup> Blozh ga nē me lo naa:

—Pquiaa mine gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: "Znu nac xtiidz meñ ne psilo grētaa ncuaane no, meñ ne csiaala, meñ ne gut ga ni brieaban me, rnee me:

<sup>9</sup> 'Ran naa zha nactaa grē guielnē ne noded to. Ran naa mban rac to guieñd grē ncuaane yquiin to (nligaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nlid gon xpēed Dios nac zho, sac zhiwseed mendox zienal zho.

<sup>10</sup> 'Nroob grē guielnē ne zi-aadyob gan to, per gdziebde to. Squiil mendox miech, gnab zho tso to ladzguiib; ga nagon glu to dien pe nli dib zdoo to rliladz to naa. Nli nzianlaa to guiab ladzguiib, per tib tsiise ngbidz sca yquiaanañ zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

<sup>11</sup> 'Zha ne rioguicle godiidz rii, yquiaadiag zho ganle zha rnee Espíritu Sant lo zha ne no xnēz naa, rnee me: Zha ne tiblrique tsoxco gun mine rnabey Dios, led yedraa zha co tsoxtseeb guey gabil."

*Diidz ne bnee Jesús lo zha Pérgamo*

<sup>12</sup> Blozh ga, nēque me lo naa:

—Mine gni naa lo luu nu, pquiaaw pxeela Pérgamo, lo zha ne quianap grē zha ne ngab xnēz naa ga, gudz lo zho: "Znu nac xtiidz meñ ne nzobro tib spad lots ne ndox gropse nēz, rnee me:

<sup>13</sup> 'Nanpaa naa masaque mendox rnabey lad guiedz ne

no to i, per ran naa tiblque dib zdoo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

<sup>14</sup> 'Per no chop ncuaane gon glisqui naa lo to: Leda i run to randze to gre zha ne squi run zigne been Balam, men ne pquii Balac bloo Balac guic gre zha Israel beenctal zho xtol zho, dow zho xpeel gre ma ne biogon lo mdio, ni pquiangob zho zha ne led tsieeld zho. <sup>15</sup> Lee tiba ga, laa stiba, randze to zha ne bii zienal zhiwseed yozh zha nicolaat; tel naa, ni lalnu rdziguieend naa wseed co.

<sup>16</sup> 'Laa naa rso diidz lo to: golnab perdon, ni golnee lo gre zha co csaan zho gre ncuaane ndzinlid ne run zho; sac gon, telne gond zho diidz, ible zial naa zialtynie naa zho con spad ne zob ro naa nu.

<sup>17</sup> 'Zha ne rioguicle godidz rii, yquiaadiag zho ganle zha rnee Espiritu Sant lo gre zha ne no xnz naa, rnee me: Zha ne gdeete diidz lo gre ncuaane guntal xtol zho, zded naa guielwagw ne rap naa gbaa yquii zho; ni zded naa tibga quie nquits lo zho, lo quie co quia le cub zho, ni zhase gacnan zha nac le co zho."

*Diidz ne bnee Jesus lo zha Tiatir*

<sup>18</sup> Blozh min co, ne me:

—Ye lo zha ne quianap zha ne no xnz naa guiedz Tiatir, pxeel diidz rii, gudz lo zho: "Znu nac xtiidz Xped Dios, men ne masaque riaazbel

bziaalo, men ne masaque rquiabni ni zigne rquiabni guieb brons ne tibaque riar; rnee me:

<sup>19</sup> 'Nan naa grese zha mban to; ran naa pa lotaa rleynie to naa, dib zdoo to riladz to cho nac naa, noxco to quiaun to xtsin naa, tiblque rac to dziits zo to lo xtidz naa; ran naa noxcoraa to quiaun to xtsin naa niina.

<sup>20</sup> 'Per no tib ncuaane no glisqui naa lo to: leda i gon run to randze to wnaa ne le Jezabel i, rnee me Dios rsi-aab guic me gre ncuaane rnee me, per nlida; sac gon, lox-aque noquidie me gre zha ne no xnz naa, noquii me zho rquiangob zho gre zha ne led tsieeld zho, ni row zho xpeel gre ma ne riogon lo mdio.

<sup>21</sup> Blactaale pquiambez naa nab me perdon, ntsae me lo xquielmban me; per ned me csaan me gre guielyozh ne run me i.

<sup>22</sup> 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grese zha ne zienal zhiwseed me, nroob guielne ne gnabey naa ted zho, tel laa zho csaand gre guielyozh co. <sup>23</sup> Ni haxta zut naa zho, zeena sca gan grese miech ne no xnz naa ganle, naasi nan naa pe rza guic miech, pe rza zdoo zho; gacxe waa, tel pe ncuaane run zho, zdedse naa mine rieguial zho tib tib zho.

<sup>24</sup> 'Sanguue to gre to zha ne zienald guielyozh ne rlu wnaa qui (wseed ne rnee zho i rdeed nroob guielbiini,

per nand zho gon zhiwseed mendoxa), peet glisquidraa naa lo to. <sup>25</sup> Per none gon tiblifique golgac, zeena ine dib zdoo to rnalo to naa gal dze ne laa naa guial stib. <sup>26-28</sup> Sac gon, grese zha ne gdeete diidz lo gre ncuane gunctal xtol zho, sinque tibaque tsoxco zho gban zho zigne rnabey naa, haxta gdziñ dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho gre guiedz. Naa gded guielrnabey co lo zho, zigne bneedz Pxoza naaw lo naa; ni lalnu yquiad zdoo zho, grese miech ntseeb, zunquizh zho zho greetaa guielntseeb ne been zho.

<sup>29</sup> 'iGrese zha ne rioguicle godiidz rii, yquiaadiag zho ganle zha rnee Espiritu Sant lo gre zha ne no xnëz naa!"

### 3

*Diidz ne bnee Jesús lo zha Sardis*

<sup>1</sup> Blozh ga, në me:

—Mïne gni naa lo luu nu, pquiaaw pxeela guiedz Sardis, lo zha ne quianap gre zha ne ngab xnëz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspiritu Dios, Espiritu ne rdeed gadz guielbiini, rnee me:

'Nan naa gon pe nac gre ncuane run to, niice zëeb diidz mban to, per par naa miech gutle nac to. <sup>2</sup> 'iGolcuee zhimcaalo to sca! Golsodziits lo spalalse xtiidz naa mine rsoladz to, sac gon zhile laa to

lozh guiaanladza. Ne nligaa, ran naa quiaayunde to xtsiin Dios zig none gaca. <sup>3</sup> Golsoladz ganle zha nac gre wseed ne gocnan to, gre wseed ne bin to; dzigo goltsienala, ni golanab lo Dios gon me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzëeb ngbaan lidz.

<sup>4</sup> 'Sca nac to, per lo to i gon no bla zha ne bii mbe zdoo, sac zienald zho gre ncuane run to; rriequia rdeete zho diidz guiacebed xab nquits zho ga. Ni zha co nagon rieguial senal zhits naa, sac gop zho xab zho cuidad.

<sup>5</sup> 'Golgona ganle, grese zha ne gdeete diidz lo gre ncuane gunctal xtol zho, scaania zho tib lar nquitsbie gacw zho; lë zhow, lëe quialew lo guits ne quia lë gre zha ne ygaa tib guielmban ndzon ga; haxta zanie naa zho lo Pxoza naa ni lo gre xanj me, guiep naa: Lëe zha rii gon no xnëz naa.

<sup>6</sup> 'Zha ne rioguicle gre godiidz rii, yquiaadiag zho ganle zha rnee Espiritu Sant lo gre zha ne ngab xnëz naa."

*Diidz ne bnee Jesús lo zha Filadelf*

<sup>7</sup> Blozh ga në me:

—Mïne gni naa niina, pquiaaw pxeela guiedz Filadelf, lo zha ne quianap gre zha ne ngab xnëz naa, gudz lo zho: "Men mbe ne rapd ni tib dol, men ne rnee niapse diidzli, men



ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

<sup>8</sup> 'Nan naa grëse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rililadz to naa. Gacxe waa, rrieequia laa naa rxal tib puert ted to, ni choot grielod csioog puert co. <sup>9</sup> Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhib zho lo to, zha ne noquidie i rnee zho xnëz naa no zho. Ga gan zho ganle nli rleynie naa to. <sup>10</sup> Ne squi tiblque rac to ron to xtidz naa, peet güeynied guic to niicle pquianał miech to, ible squianaap naa to, gande to guiełnëdox ne gan grë miech ne ndxie lo guidzliu.

<sup>11</sup> 'Gol̄soladza ganle, merle guial̄ naa. Gol̄guien̄ csaande to xtidz naa mine nanle to, zeena tsod stib zha ne ctiche mine riegual̄ to gnedz naa lo to. <sup>12</sup> Grëse zha ne gdeete diidz lo grë ncuaane gunctal̄ xtol̄ zho, so naa zho gac zho zig grë pilar nroob ne zo len̄ xyadoo ro Dios, ni gdzindraa dze ne grieë zho ga; cho pilar co, ga yquia naa lë Dios, ga yquia naa tib lë cub naa. Laa zho ngable guiedz ne rnabey Dios ga; lëë guiedz co nac Jerusalén cub ne gnabey me quiet gbaa.

<sup>13</sup> 'Zha ne rioguicle godiidz rii, yquiaadiag zho ganle zha

rnee Espíritu Sant lo grë zha ne no xnëz naa."

*Diidz ne bnee Jesús lo zha Laodicé*

<sup>14</sup> Ni në me:

—Mine gni naa niina, pquiaaw pxeela guiedz Laodicé, lo zha ne quianap grë zha ne ngab xnëz naa ga, gudz lo zho: "Men̄ ne rnee niapse diidzli, men̄ ne run̄ grëse mine rnabey Dios, men̄ ne bzo Dios psan̄ grëse ncuaane no, znu nac xtiidz me, rnee me lo to:

<sup>15</sup> 'Nan naa grëse zha mban to. Ran̄ naa noxcode to grë mine rnabey naa to, ni niicle rsaandgaa tow; nac to zig nac tib ncuaane loxaque ndzëyopse, niicle niagda ni niicle nlëëdgaaw. ¡Tebaa nac to zig tib nis yag, zig tib nis lëëgaa! <sup>16</sup> Per na gon̄ ne squi nac to zig tib nis ndzëyopse, ni lalnu rdziguiend naa ncuaane run̄ to. ¡Zhile gon̄ laa to gunct̄sib naa!

<sup>17</sup> 'Rnee to grëse ncuaane rquiu to laaw quianiele to, ible peet liaadz racdraa lo to, ¡ni riende to gon̄ ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rrieequia haxta ni lo to roldraa. <sup>18</sup> Laa naa rso diidz lo to: Tel̄ne racladz to nlipaa gapchen̄ to, goltë lo naa, naa cto guuib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo

to, naa gnedza, zeena gbiire gan to stib.

<sup>19</sup> Grë zha ne rleynie naa, rliisqui naa grë ncuaañe nonguield ne run zho, rteed naa zho tib caxtigw parne cseed zho ndzinli gban zho; gacxe waa golgac ndzinli stib, gołsoxco mine rnabey naa. <sup>20</sup> Laa naa quiambëz to gon gbiire gbig to lo naa. Rriequia ro lidz to zo naa, quiabedz naa to. Zha ne yquiablaz cxal ro lidz sëeb naa, zded naa, ni haxta sobnie naa zho diowxtsee no grop no. <sup>21</sup> Grëse zha ne gdeete diidz lo grë ncuaañe gunctal xtol zho, zded naa diidz sob zho cue naa, zaatne sob naa gnabey naa; zigne zoob naa cue PxoZ naa niina nonabey no; sac tel naa, bdete naa diidz niun naa mine rnabey menđox.

<sup>22</sup> "Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa."

## 4

### *Roolnie zho Dios gbaa*

<sup>1</sup> Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi men ne bnee lo naa ga glo, men ne nac tsi ga zig tsi tib trompet, në me:

—Biep, dë nu ganle, zeena glu naa lo luu zha nac grë ncuaañe ziaadyob gac.

<sup>2</sup> Zigne sca në me, hor co blu Espíritu Sant lo naa, gon naa laa tib xcan zo gbaa, tib xcan ne rzob men ne rnabeya. Lo xcan co, ga zob tib

men co, <sup>3</sup> masaque rbebni me zigne rbebni quie ne rnee zho jasp, quie ne rneegaa zho cornalin. IgoSe xcan co quia tib guitye, rbebniw zigne rbebni quie ne rnee zho smerald; <sup>4</sup> ni zo zgalptap xcan igow, tibga menđol zob tib tib lo xcan co, dib nquitsbiese rna xab me, ni zob tibga coron or guic me. <sup>5-6</sup> Masaque riab belye, ratsie rnee nguzi, ni zëeb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebel a zig rbebel quie zed; ni noquia gadz biini nroob ga, lëe gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhitsaquew zob bziaalow. <sup>7</sup> Tiba rlu zig rlu meedz, stiba rlu zig rlu tib ngon yeen; laa schop mine riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe. <sup>8</sup> Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëeb tsiw, rneew:

¡Men ndzondoo nac Dios!  
¡Men rnabey nac me, nroob poder ne rap me!

Notaque me, me ga no padzeela, me no niina, ni lëeque me ga no guiaad.

<sup>9</sup> Gza tap bult mban co, roolniew men ne zob lo xcan co, (men ne gdziñd dze guet) rsañnona me, ni rdeeda xquizh lo me. Zigse sca run gza bult co, <sup>10</sup> scasaque gza

galptap mengol ne zob ga, rquiitsgzhib me lo men ne zob lo xcan ro co, gzase me, rgob me xcoron me rguix mew nēz lo men ne zob lo xcan co, ni rnee me:

<sup>11</sup> Luu nac xDios no, luu nac men ne rnabey no.

Luuse nac men ne rieguiāl dziuunnon no, ni gnee no grē diidz ndzon lo luu.

Nroob poder ne rap luu, sac grētaa ncuaane no, luu bzaaw;

laaw bīaa sac ible sca go-cladz luu, ni laaw nīaa-gaa nīina, sac ible sca racladz luu.

## 5

*Tib guits ne nzhidoo gadz lē cint*

<sup>1</sup> Zeene bui naa stib, gonpaa naa men ne zob lo xcan ro co, nōse tib guits nroob nīa derech me. Gropse nēz guits co quia, ndībēdsew, nzhidoo gaw gadz lē cint. <sup>2</sup> Ni gon naa tib anjl, tib men macis rlu me, nguiedz zēēb tsi me, bnabdiidz me rēb me:

—¿Cho rieguiāl cchug cint ne nzhidoo guits qui, cxal zho low?

<sup>3</sup> Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

<sup>4</sup> Mban goc naa, psilo naa nguiedz roon naa, gon naa sca brieequiad tib zha ne rieguiāl nxal lo guits co, nlab zho low. <sup>5</sup> Dzigo bnee tib

mengol ne zo gax lo xcan co, nē me lo naa:

—Goond luu. Lēz ganle, men ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguiāl, sac gon psiaablo me grēse zha ne rlēē lo me; rrieequia nac me zig tib meedz.

<sup>6</sup> Horco bui naa zaatne nac lo xcan ro co, gon naa glow-taa lo gza bult mban co ni lo gza mengol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz ma, ni zob gadz bziaalo ma, rrieequia gza gadz bziaalo ma ga, min co nac gadz guielbiini ne rdeed zhiEspíritu Dios.

<sup>7</sup> Dzigo wbig men ne nac Carner yeen co, bnaaz me guits ne no nīa derech men ne zob lo xcan ro co. <sup>8</sup> Zigne bnaaz me guits co, laa gza bult mban co, ni gza galptap mengol co pquiitsgzhib lo me. Tib tib mengol co nzhenēse me tib arp ni tib ptsigui or, rso tib gox ndzon len ptsigui co (rrieequia gox co nac grē diidz ndzon ne rnee grē zha ne no xnēz Dios zeene rzodiidznie zho me).

<sup>9</sup> Dzigo psilo gza mengol co biil me tib cant cub. Znu rnee lo cant co:

ible luu rieguiāl ycaania guits qui, luu rieguiāl cchug gza cint ne nzhidooow i!

Sac luu bded grētaa guielnē co psacsi zho luu, haxta bzhiee xchen luu;

sca psilaa luu grëlose dii  
miech,

tel pa guiedztaa nac zho, tel  
pa diidztaa rnee zho,  
tel pa naciontaa ngab  
zho.

<sup>10</sup> Laa luu bzhii no grë no gac  
no tib guiedz cub,

guiedz ne gnabey Dios;  
no gac pxoz ne gun dziin lo  
me,

masaque tipse gban no zeene  
gnabey me lo guidzliu.

<sup>11</sup> Zeene bui naa, gon naa  
anj l guizhiu ne ndxie zaatne  
zo xcan ro co, led zha ne  
grieelod glab new. <sup>12</sup> Nguiedz  
zëeb tsi zho grë zho gza bult  
mban co, ni grë mengol co,  
rnee zho:

¡Men non nac men ne nac  
Carner yeen ne squi  
rlu beet zho!

Me riegua l gnabey, men ro  
nac me, choot grieelod  
csiaablo me.

Ladznia me no grëse  
guie l nzaac, me rap  
grëtaa guie l rien,

Men ndzon nac me, me  
none dziuun non ne,  
me none dziool nie ne.

<sup>13</sup> Horco grëse miech,  
grëse ma, grëse ncuane  
bzaa Dios, zigtaa gbaaw,  
zigtagaa lo guidzliuw; zigtaa  
zhan guidzliuw, zigtagaa lo  
nisdoow; nguiedz zëeb tsi  
zho, rnee zho:

¡Nliw, men ne zob lo xcan  
ro qui, ni men ne nac  
Carner yeen qui,

ible riegua l dziuun non ne  
grop me!

¡Me rnabey, lo me none gnee  
ne grëtaa diidz ndzon;

nadzew, gzheew, ni grëragaa  
izdoo ne ziaadraaw!

<sup>14</sup> Pquiab gza tap bult co,  
rëb zho:

— ¡Scaw, sca no gaca!

Dzigo gzase mengol co, laa  
zho pquitsgzhib lo men ne  
zob lo xcan ro co; psilo zho  
rnee zho grë diidz ndzon lo  
me.

## 6

### *Gza gadz sell co*

<sup>1</sup> Blozh ga, gonpaa naa  
zeene laa men ne nac Carner  
yeen co pchug primer cint  
ne nzhidoo guits co. Horco  
laa tib bult mban co bnee;  
masaque nac tsiw zig rio bi  
rnee nguzi, nëw lo naa:

— ¡Dë ganle gwi luu!

<sup>2</sup> Dzigo wbig naa, gon naa  
tib guay nquits. Zhits guay  
co zob tib men co nzhen me  
tib yag arcw ne rquiaa zho  
flech; blozhse pcaania me tib  
coron ne rzob guic zha rn-  
abey, dzigo laa me brieë. Ine  
zob nzë me lad guay co, laa  
me zie ziegun me gan lo grë  
zha ne rlëë lo me.

<sup>3</sup> Blozh ga, laa men ne  
nac Carner yeen co pchug  
stib cint ne nzhidoo guits co.  
Dzigo bredz stib bult co naa.

<sup>4</sup> Dzigo bia naa, gon naa laa  
stib guay nizhnie brieë, zob  
stib men co lad ma. Blozhse  
pcaania me tib spad nroob,  
ni pcaa me diidzbey tsielodil  
me miech lo guidzliu, zeena  
gutlsa zho; laa me brieë ga,  
laa me zie.

<sup>5</sup> Zeene laa men ne nac  
Carner yeen co pchug bion  
cint ne nzhidoo guits co,

dzigo bredz stib bult co naa,  
nēw lo naa:

—iDē ganle gwi luu!

Dzigo gon naa tib guay  
ngas, scasaque zob stib men  
co lad ma, nzhen me tib  
zhiguiib. <sup>6</sup> Ni groltaa zaatne  
zo gza bult mban co, zēēb tsi  
tib men co, rnee me:

—Tib kiltāa zhobxtil gon  
ycaa zha ne gun dziin tib  
dze; tel zhobgaaw, tsontāa  
kila ycaa zho; sangue nceit ni  
vin ib ygaald luuw.

<sup>7</sup> Laa zeene goc cint co tap  
ziechug men ne nac Carner  
yeen co, dzigo laa stib bult  
mban co bredz naa.

<sup>8</sup> Horco, zeene bui naa, gon  
naa tib guay nguets; lad guay  
co zob tib zha co lē Guielgut;  
zhiits co nal stib zho lē Gabil.  
Lo tap lal ne nlē miech ne  
ndxie lo guidzliu, pcaa grop  
zha co diidzbey tsiegut zho  
tib lal grē miech co; zha ne  
guet lo dil, zha ne guet lo gbin,  
zha ne guet lo guielguidz, zha  
ne guetgaa lo grē ma ntseeb.

<sup>9</sup> Dzigo pchug men ne nac  
Carner yeen co stib cint co,  
goca gaay. Horco, zaatne nac  
zhan mezh ne nac mezh lo  
pcoog, ga gon naa grēse zha  
ne psacsi miech, beet miech  
zho loxaque ne bnee zho Xti-  
idz Dios, ni dib zdoos zho  
bliladz zhow. <sup>10</sup> Nguiedz zēēb  
tsi zho rnee zho:

—Luu ne nac luu men  
nroob ne rnabey, luu ne  
nac luu men ne rnee niapse  
diidzli, ¿pa hor dzigo cuedz  
luu grē miech ne ndxie lo  
guidzliu, zha ne scataa psacsi  
no? ¿Pa hor gunquizh luu zho  
grētaa miñe been zho ga?

<sup>11</sup> Dzigo bdeed me lar  
nquits got zho; rēb me lo zho  
no cuēz zho zniip, sac grēraa  
zha ne nacgrē zho ngab zho  
lo Jesús, no spalal zha ne  
naraa csacsi miech zigne  
psacsi miech zho; haxta  
gza zho dzigo laa me gun  
guielwxtis.

<sup>12</sup> Blozhse ga, laa Carner  
yeen co pchug stib cint co,  
goca xoop; hor co laa tib zho-  
dox bni. Gonpaa naa zeene  
laa lo ngbidz pcow, zig nac  
zeen tib lar ngas pquia lo ng-  
bidz; laa mēē zig rludaa ren,  
sca nizhnie rlu lo mēē; <sup>13</sup> grē  
mel ne ndziib gbaa, masaque  
bliaal ma lo guidzliu zig rliaal  
grē guigw yeen zeene rree  
medox. <sup>14</sup> Znuse bdibēd gbaa,  
goca zigne racse grē guits  
ne rdibēd; grē gui, grē guid-  
zliu win ne no lo nisdoo,  
nēzrii nēzrec biana. <sup>15</sup> Dzigo  
grēse zha ne nac zha rnabey  
lo guidzliu, grē zha ne nac  
zha non, grē zha ne rapchen,  
grē zha nroob ne rnabey lo  
menguiib, grē zha nroob ne  
non xtiidz, ni grēragaa miech,  
niicle grē zha ne run xtsiin  
beña, niicle grēgaa zha ne run  
xtsiin zhala, grēse zho biolan,  
zha ne biolan len grē bliee,  
zha ne biolangaa len grēraa  
quie ne no dan; <sup>16</sup> nguiedz  
roptsie zho rnee zho lo grē  
gui co, lo grē quie co:

—iGolliaal lad no, golcolan  
no, zeena gandraa men ne zob  
lo xcan ro co no! iGolcolan  
no, zeena dziand no grētaa  
guielmē ne cxeel men ne nac  
Carner yeen co! <sup>17</sup> iSac nasi  
laa dze ro co bdzin! iLaa

guielñēdox co nagon ziaadle!  
 ¡Ncuaañe lēēbd no low!

## 7

*Zha ne pcuee lo grēse zha Israel*

<sup>1</sup> Bded ga, gon naa tap anjl. Lo gza tap lad guidzliu, tibga anjl co zo tib lad nocuēēz me me. Wdzeepaaw, per ni tib zhiblag yag rnidraa, niicle lo nisdoow dzese biaca; sac ni palal rriedraa me lo guidzliu.

<sup>2</sup> Tibaque zeene briequia stib anjl nēz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga guñguielqui lo guidzliu ni lo nisdoow) rēb me:

<sup>3</sup> —¡Golcuēz zniip! Gunde to guielqui lo guidzliu niina, niicle lo nisdoow, niiclegaa grē yaga; sac naraa lozh guioquiaa no xsell xDios ne quia grē zha ne ruñxtsiin me.

<sup>4-8</sup> Zeene blozh pquia sell co quia grē miech co, bin naa lo grē zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,  
 tsiipchop mil zha xtii Rubén,  
 tsiipchop mil zha xtii Gad,  
 tsiipchop mil zha xtii Aser,  
 tsiipchop mil zha xtii Neftalí,  
 tsiipchop mil zha xtii Manasés,

tsiipchop mil zha xtii Simeón,  
 tsiipchop mil zha xtii Leví,  
 tsiipchop mil zha xtii Isacar,  
 tsiipchop mil zha xtii José,  
 stsiipchop mil zha xtii Benjamín.

<sup>9</sup> Zeene bui naa zaatne zo xcan rō co, zaatne zo men ne nac Carner yeen co, miech guizhiu ne gon naa ndxie ga; grē lose dii miech ne ndxie dib lo guidzliuw. Ne nligaa miech guizhiuw, led miech ne lēbd ne glab new; grēse zho niapse lar nquits nacw zho, ni no tiblēga zin nguia nia zho; <sup>10</sup> nguiedz zēēb tsi zho, rnee zho:

Dios, men ne rdziuunbey ne, men ne zob lo xcan ro qui,

me nac men ne psilaa ne lo grētaa xtol ne;

me ni men ne nac Carner yeen qui.

<sup>11</sup> Horco grēse anjl ne ndxie igo xcan ro co, igo zaatne zob grē mengol co, ni zo gza tap bult mban co; grēse zho laa zho pquitsgzhīb nēz lo xcan co, haxta bzooblo zho lo liu, rdeed zho xquizh lo Dios <sup>12</sup> rnee zho:

¡Scaw! Luu none dzioolnie no, none tibaque gneedz no xquizh lo luu,

luu riegual dziuunnon no; sac luu nac xDios no.

Luu nac nac men ne rienraa, men ne rap poder;

gacxe waa luu none ycaania grēse diidz ndzon,

gzataa dze, niicle nadzew, gzataa dze, niicle nadzew, gzhew, ni grēragaa izdoo ne ziaada. ¡Sca none gaca!

<sup>13</sup> Dzigo bnaiddz tib mengol co, nē me lo naa:

—¿Pe nan luu sca cho nac grē zha ne nacw lar nquits qui? ¿Pe nan luu pa nēz ziaad zho?

<sup>14</sup> Dzigo rep naa lo me:

—Nand naaw. Bzhiguiel  
bnēw lo naa.

Nēchaa me:

—Lēè grē zha qui gon bded  
grētaa guielnēdox ne goc lo  
guidzliu. Laa zho nacw lar  
nquits qui, sac wbig zho lo  
Jesús psanmbe xchen me zho  
lo dol. <sup>15</sup> Gacxe waa squitaa  
ndzon ndxie zho gax lo zhix-  
can ro Dios, dze guieel quia-  
oolnie zho me len xyadoo ro  
me. Me nac men ne quianap  
zho grēse zho; <sup>16</sup> led yedraa  
niina guet gbin zho, guet nis-  
gaa zho; led yedraa niina  
ctsuu ngbidz zho, sonēggaa  
zho. <sup>17</sup> Men ne nac Carner  
yeen ne zo delant lo xcan ro  
qui, me gdeed ncuaane gow  
zho, ni zigne rienie baxtor  
xpēcwxil zho ro guiuu, sca  
zienie me zho zaatne quiada  
nis ne rdeed guielmban. Led  
yedraa niina goon zho.

## 8

<sup>1</sup> Laa zeene laa men ne nac  
Carner yeen co pchug stib  
cint ne nzhidoo guits co, cint  
ne naca gadz ga, dzese biac  
gbaa; xtselaa sca biac dze  
gbaa.

<sup>2</sup> Blozh ga, gon naa zeene  
pcaania gadz anjl ne rzo lo  
Dios, tibga trompet. <sup>3</sup> Ni  
briequia stib anjl nzhen tib  
ptsigui niaa niapse guieb or.  
Zigne bdziñ me, bzo me de-  
lant lo xcan ro co, zaatne zo  
mezho or ne nac lo pcoog; ga  
pcaania me nroob yaal parne  
ctsiel mew grē diidz ne rnee  
grē mieh ne no xnēz Dios  
zeene rzodiidznie zho Dios.  
<sup>4</sup> Dzigo bzēeg anjl co yaal co,  
tipse goc gox co grēw xtiidz

grē zha ne no xnēz Dios, laaw  
bdziñ lo Dios. <sup>5</sup> Blozh ga,  
ptop me grē gui ne ndziib lo  
pcoog co bloo mew len pt-  
sigui ne nzhen me ga, blaal  
mew lo guidzliu; dzigo psilo  
masaque rnee nguzi, rio bi,  
riab belye ne, ni bni tib zho-  
dox.

*Pcuedz gadz anjl trompet*

<sup>6</sup> Horco laa gza gadz anjl ne  
pcaania gza gadz trompet co,  
laa zho nsinle nzhenā, parne  
ycuedz zhow.

<sup>7</sup> Zeene laa tib anjl co  
pcuedz zhitrompet zho, hor  
co psilo bliaal guiequie lo  
guidzliu ni bliaal guilēē  
notsa ren. Gzoob ne telne  
glē guidzliu tson lal, dzigo  
masaque tib lala bnitlo,  
bnitlo grēse yag, grēse lo  
guizh nguia ne no low.

<sup>8</sup> Blozh ga, zeene laa stib  
anjl co pcuedz xquib, hor  
co biab tib ncuaan co nis-  
doo, masaque rluw zig rlu  
tib gui nroob ne quiazbel.  
Gzoob ne tel glē nisdoo tson  
lal, bnitlo tib lala, bialow  
niapse ren zeene laa ncuaan  
co biab low. <sup>9</sup> Bnitlo grēse ma,  
grēse guizh ne no lo tib lalga  
nis co, haxta grē barcw ne no  
low bnitlo.

<sup>10</sup> Loxaque blozh goc  
min co, laa stib anjl co  
pcuedzaque xquib zho, hor  
co laa tib mel nroob bringaa  
gbaa, masaque rso ma bel zig  
razbel tib lē guier, biab ma lo  
guidzliu. Lo grē guibee, lo  
grē zhlian ne no lo guidzliu,  
lo tson lal ne gzoob ne naca,  
pxin ma tib lala. <sup>11</sup> Grēse nis  
co goc nlayag, ndal mieh ne

gut low. Nacne bleelë zho mel co Nlayag.

<sup>12</sup> Zeene laa stib anjl co pcuedz xquiib goc zho tap, hor co zigtaa lo ngbidza, zigtagaa lo mëew, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacгаа guieel, ni palal peet rlud.

<sup>13</sup> Laa naa nowi, tibaque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiedz zëeb tsi me rnee me:

—iProbsaxe grë miech ne ndxie lo guidzliu! Sac ncuaane ntseebraa gac, zeene laa stson anjl qui ycuedz xquiib me.

## 9

<sup>1-2</sup> Zeene laa anjl ne nac zho gaay ga pcuedz xquiib, hor co gon naa laa anjl ne brieegbaa padzeela ga pcaania tib liow, pxal zho ro tib guierdoo ro. Zeene laa ro guieer co bzhial, per nli goxdoo ne brieeg, tib psioogsew zhan gbaa, per ni palal rludraa lo ngbidz. <sup>3</sup> Lo gox co, ga brieeg tiblo metso bliaal, bioogse ma gdipse lo guidzliu, grëse ma zob xcots ma, zig zob xcots meegu. <sup>4</sup> Nacle diidz, peet gund ma grë guizh nguia, grë yag ne zëeb lo guidzliu, sinque laa ma tsie tsiesacsi ma grëse miech ne quiadxbey Dios quia. <sup>5</sup> Yoobdox ne yquia zaatne yquiaaxcots

ma, zigne rquia yooob zaatne rquiaaxcots meegu; per gute ma zho, loxaque sca csacsi ma zho dipse len gaay mëe. <sup>6</sup> Len dze co, haxta zhal miech yguib zho dien zha guet zho, per grieelod guet zho; soobladznë zho, tebaa zha gdziñ guielgut lo zho, per lel sozita.

<sup>7</sup> Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or; <sup>8</sup> zëeb guitsguic ma zig zëeb guitsguic men wnaa, ni zëeb lay ma zig zëeb lay grë meedz. <sup>9</sup> Dipse lad ma ntse tib ncuaan co, rluw zig rlu guib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

<sup>10</sup> Lëedaa meegu, sca zob xcots grë metso co lo xcol ma, mine yquiaaxcots ma miech dipse len gaay mëe co. <sup>11</sup> Lëe grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsë ne: Zha ne rnitlo.)

<sup>12</sup> Lëe tib guielnë ne gan miech ga, per bii ziaad schopa.

<sup>13</sup> Gon naa zeene laa anjl ne nac zho xoop ga pcuedz xquiib, hor co bin naa zëeb tsi tib men co lo mezh or ne nac lo pcoog ne zo lo Dios ga. <sup>14</sup> Zëeb tsi men co rnee me lo anjl ne blozh pcuedz xquiib ga:



—Güey, güeyxadz gza tap anjl dox ne quiadoo ro guiubee nroob ne nac guiubee Eufates.

<sup>15</sup> Ible bzole gza tap anjl dox co par guṅ ma guielqui zeene laa dze co, laa hor co gdziṅ; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma. <sup>16</sup> Bin naa chop gayoo millon zhaguiib ne gacnie ma, niapse guay sob grē zhaguiib co; masaque ma gnabey lo zho.

<sup>17</sup> Goṅpaa naa zha rlu grē zhaguiib co zob zho lad grē guay co. Grēse zho quiantse tib lē guiib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grē guay co, niaa guic ma zig niaa guic meedz, masaque rriee bel, rriee gox, rriee zufr ro ma; <sup>18</sup> lo gza ncuaan ne sca rriee ro ma, miṅ co beet lalga miech co.

<sup>19</sup> Lala rap grē guay co xquielntseeb ma ga nēz ro ma, ni rapaque maw nēz lo xcol ma; masaque nac xcol ma zig nac grē meel dox, rias xcol ma rquiaa maw lad miech.

<sup>20</sup> Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grē zhindio zho, mdio ne niaa guib or, mdio ne niaa guib plat, mdio ne niaa guib brons, mdio ne niaa quie, mdio ne niaagaa yag; ncuaane randa, ncuaane

ronda, ncuaane rzēda, per laa zho no tibaque ziegan zhow. <sup>21</sup> Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, jni palal zienied guic zho csaan zho grē guielntseeb co gbig zho lo Dios!

## 10

### *Anjl ne nzhen tib libr win*

<sup>1</sup> Blozh ga, goṅ naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lēēdaa lo ngbidz; scasaque ni me, masaque ri-aazbela. <sup>2</sup> Nzhen me tib libr win, nzhialse lo libr co.

Bdziṅ me lo guidzliu, bzo me ni derech me lo nisdoo, laa miṅ revés bzo me lo guidzliu. <sup>3</sup> Ga zo me pquiaa me tib redz nroob, lēēdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

<sup>4</sup> Laa naa zale yquia naa miṅ bnee gza nguzi co, tibaque bin naa tsi tib meṅ co gbaa, nē me lo naa:

—jCoo, yquiaad luu miṅ bnee gza nguzi qui! Sac nodne gacnan miecha.

<sup>5</sup> Dzigo goṅ naa blis anjl co nia derech me nēz gbaa, <sup>6</sup> bzeet me Dios (meṅ ne gdziṅd dze guet, meṅ ne bzaa gbaa, bzaa guidzliu, bzaa nisdoo, ni grētaa ncuaane no low), rēb me:

—Dios zobwi ganle, nasi gon laa dze co bdzin. <sup>7</sup> Grëse mine bnee me lo zha ne biadteed xtiidz me, laaw gac niina zeene laa stib anjl qui ycuudz xquib zho. Grëse mine no guic me gon me ni gocnand miecha, niina laa zho gana.

<sup>8</sup> Dzigo wbiire bnee men ne zëeb tsi gbaa ga, në me lo naa:

—Güey, bnaaz libr win ne nzhen anjl ne squi zo i.

<sup>9</sup> Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëëraasi none gow luuw. Zeene laa luu noyowa, nex sac luuw; per zeene gdzina zdo luu, laaw gacnla.

<sup>10</sup> Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdzin zdo naa, beenëw. <sup>11</sup> Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuaane ted grëraa miech, zigtaa zha ne no guiedz wina, zha ne no guiedz nrooba, zha ne rnabeygaaw.

## 11

<sup>1</sup> Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegan zho Dios. Pso me diidz lo naa, në me:

<sup>2</sup> —Lëëraasi ctiixd luu nëz ley, sac laa lugar co nole ladznia zha zit; zha gnabeya, zha

gnabey guiedz ndzon ne nachen Dios i; dipse len tson iz grol ne ziaad nu, gon zhow zigne gacladztaa zho. <sup>3</sup> Gane len dze riique laa naa cxel chop zha ne runbeypaa cho nac naa, tib lar beelze gacw zho, zig racwxab zha ne no guielnë; dipse len tson iz grol co gnee zho ganle pe nac grë ncuaane ziaadyob gan miech.

<sup>4</sup> Lëë zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu). <sup>5</sup> Zeene laa grop zha co bdzin, choot brielod lega nsacsi zho, sac grëse zha ne wbig gocntseeb lo zho, tib bieese zha co lo bel ne brieer ro zho. <sup>6</sup> Bdeed Dios poder lo zho ycuëez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gacaren; ni horne gacladztaa zho, zrieelo ndalraa grë guielzi ne gnabey zho gan miech.

<sup>7</sup> Zeene bbase dze ne bnee zho lo miech ga, hor co laa tib madzabdoo brieer len guierdoo co; ntseeb rac ma lo zho. Mbe blëbd zho lo ma, beet ma zho. <sup>8-9</sup> Tson ngbidz grol goot xcuerp zho grol len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz ngeets zho, grëse miech ne no dib lo guidzliu gon sca nix zho ga; <sup>10</sup> dipse lo guidzliu, masaque tib guielbleydoo ne bio miech gza

dze co, gon zho laa grop zha co gut, sac nroob be<sub>n</sub>need zho miech. Lo guie<sub>l</sub>bley co, haxta bioxco miech pe ncuane bgadlsa zho lo samiech zho.

<sup>11</sup> Zeene blozh tson ng-bidz gro<sub>l</sub> co, tibaque zeene laa zhiEspíritu Dios bdeed guie<sub>l</sub>m<sub>ban</sub> lo grop zha co stib, laa zho guche ga; grése miech ne ndxie lo guidzliu, zeene gon zhow, per nli bdzieb zho, rdziendraa zho zha gu<sub>n</sub> zho.

<sup>12</sup> Horco nguiedz zëeb tib tsi men co gbaa, bredz me grop zha co. Gon<sub>lo</sub> grè miech ne rlëe ran zho ga, masaque no zho tib lo xcow, laa zho bzoquia gbaa; <sup>13</sup> loxaque laa zho bzoquia gbaa, zeene laa tib zhodox bni. Gzoob ne telne nlë guiedz ro co tsi tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo rool<sub>nie</sub> zho Dios.

<sup>14</sup> Sca gan miech stib guie<sub>l</sub>në co. Lëe bropa ga, per znusaque guiaad stiba. <sup>15</sup> Sac loxaque blozh ga, zeene gon naa laa stib anjl ne nac zho gadz ga, pcuedzlaque xquiib; hor co nzian tsi men co zëeb gbaa, nguiedz rnee me:

Nasi nagon,

laa Dios gnabey grése guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

<sup>16</sup> Psiloque gza galptap mengol ne zob lo xcan ne zo lo Dios ga, pquitsgzhib zho lo me, haxta bzooblo zho lo

liu, rdeed zho xquizh lo me, <sup>17</sup> rnee zho:

Xquizh xquie<sub>l</sub>nzaac luu, sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

<sup>18</sup> Grése guiedz, brieequia zha ne gocntseeb lo luu;

per nasi laa dze bdzi<sub>n</sub>, laa luu glugaa xquie<sub>l</sub>blëe luu lo zho.

Grése zha ne gutle, niina laa luu gdeed mine rieguia<sub>l</sub> zho tib tib zho.

Grè zha ne been xtsiin luu, pteed zho xtiidz luu lo miech,

grè zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guie<sub>l</sub>ntseeb been, niinataa laa luu gnitlo zho.

<sup>19</sup> Loxaque blozh sca bnee gza mengol co, zeene laa yadoo ne no Dios gbaa bzhal, nieen<sub>paa</sub> guin ne notsow quie lag ne pquia diidz ne psan me lo miech. Horco psilo blia<sub>l</sub> tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co nolial, zeene laa tib zhodox bnique.

## 12

<sup>1</sup> Horco gon naa blu tib ncuane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia

tsiipchop mel cho coron co; ngali ni me zob mēē. <sup>2</sup>Rlupaa zoney me mēēd, rquiaadan me redz, laa me rquiaale yoob ne gap me xpēēd me.

<sup>3</sup>Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsi zhoz ma, tibga coron zob tib tib guic ma. <sup>4</sup>Znuse bzieecw ma xcol ma, blaal ma palal mel gbaa lo guidzliu; gzoob ne nlē mel tson tant, masaque tib tant mel co blaal ma. Wbig ma lo wnaa co, quiambēz ma gal xpēēd me, parne gow ma win.

<sup>5</sup>Per zigne gol mēēd co, znuse bdziñ win nēz lo Dios, zaatne zob me rnabey me; tib mēēdbguiw, nacle diidz tib men ndip xtiidz gac win, win gac men ne gnabey grēse guiedz ne ndxie lo guidzliu.

<sup>6</sup>Horcogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

<sup>7</sup>Nacne bio tib dil gbaa. Psilo anjl Miguel, grē me grēraa anjl ne nacie me, bdilnie me ma ngol co grē ma xanj dox ma; <sup>8</sup>per blēbd ma, benxoon zho ma gbaa. <sup>9</sup>Lēē ma ngol co ga nac meel dox ne notaque padzeela, lēē mendox ga, lēē Satanás ga, ma ne scataa tibaque noquidie miech; hor co laa zho bzonēz ma nēz lo guidzliu, grē xanj dox ma.

<sup>10</sup>Dzigo bin naa, nguiedz zēēb tib tsi men co gbaa, rnee me:

¡Lēēw nagon!  
 ¡Nasi laa dze ne ycaaniapaa Dios zha ne ngab lo me, laa dze co bdziñ!  
 Nasi laa me blu poder ne rap me,  
 nasi laa Men ne pxeel me lo guidzliu ga gnabey lo grēse zha ne ngab lo me.

¡Laa me benxoonle mendox!  
 Ma ne scataa dze guieel nolisqui dien pe run zho, nac zho zha ne nacgrē ne.

<sup>11</sup>Peet brieelod ma niun ma zho,  
 sacniapse men ne nac Carner yeen ne gut lo cruz ga bnalo zho;

ni lalnu ib bdziebd zho, bnee zho lo miech cho nac me,  
 bleeladz zho xquielmban zho, no zho haxta beet miech zho.

<sup>12</sup>¡Gacxe waa tib guielbley nroob ne rac gbaa niina!

¡Grēse to ne nac to zha ne no gbaa, golley!

¡Per probsaxe grē zha ne no lo guidzliu, sac laa mendox co tsiesaci zho!

Ntseeb rac ma laa ma zie nēz co,  
 rien ma riaandraa nroob dze ne sonlaa ma.

<sup>13</sup>Zeene gon ma sca bzonēz zho ma lo guidzliu, dzigo ptsidil ma wnaa ne gop mēēdbgui co. <sup>14</sup>Nacne bzoob zho chop xiil me, lēēdaa xiil msidoo; par grieelo xoon me lo ma, guey me dan zit ne nole diidz gan zho me dipse len tson iz grol co. <sup>15</sup>Gocladz ma nsiloow ma me, blee ma tib nis naal ro ma, pale tib

guiubee ro, <sup>16</sup> per psaand guidzliu me, znuse bzhial low psi grëse nis naal co.

<sup>17</sup> Horco mazdraa blëënie ma me, psilo ma noguib ma zha csacsi ma grëraa zha ne ziaad lo xtii me. Lëë grë zha co zienal miñe rnabey Dios, ni rdziebd zho rlu zho xnëz Jesús no zho. <sup>18</sup> Nacne güey ma, bzo ma ro nisdoo.

## 13

### *Brieequia chop ma ntseeb*

<sup>1</sup> Tibaque zeene gon naa laa tib ma nroob brieequia lo nisdoo co, ntseeb niaa ma. Ncuaañe gdzieb ne rlu ma, gadzraa guic ma zob ni zob tsii zhoz ma; tibga coron zob tib tib zhoz ma. Gzase guic ma quia diidznë ne rneenë ma Dios. <sup>2</sup> Rna ma zig rna grë meedz rabon, per ni ma niaa zig niaa ni os, laa ro ma niaa zig niaa ro meedz. Dzigo bzo ma nizhnie co ma guiaan ma xlugar ma co, male gnabey.

<sup>3</sup> No tib guic ma no tib mdel nroob, rlu mer niet ma zeene sca goc guic co ma. Miñ co gon miech, grëse zho psilo zho rleynie zho ma, miñe rnabeytaa ma zho, run zhow. <sup>4</sup> Horco grëse zho rleynie zho ma nizhnie co, rquitsgzhib zho lo ma, rdeed zho xquizh lo ma bzo ma ma ntseeb co; scasaque rquitsgzhib zho lo ma ntseeb co, rnee zho:

—jTsodraa stib zha zig luu!  
¿Cho dien grieelo tilnie luu?

<sup>5</sup> Dzigo rëb ma nizhnie co lo ma gnee ma grë diidz dox, grë diidznë, gneenë ma Dios; bdeed ma co diidz gnabey

ma lo guidzliu dipse len tson iz grol. <sup>6</sup> Nacne psilo ma rneenë ma Dios, rdzibdee ma me, rdzibdee ma grë zha no gbaa ne. <sup>7</sup> Grë zha ne no lo guidzliu, zha ne ngab xnëz Dios, bdeed me diidz psacsi ma zho, haxta beet ma zho; masaque ma bnabey grëse miech ne ndxie lo guidzliu. <sup>8</sup> Laa grëraa miech, güey zho güeygan zho ma, lëë grë zha co quiad lë lo xlibr men ne nac Carner yeen ne gut ga. Haxta zeene biao guidzliu no libr co, lo co quia lë grëse zha ne ygaa guielmban ne gdzind dze lozh.

<sup>9</sup> Lo grë to ne nac to zha ne rnalò Dios, zha ne no liaadz miñe none naa nu, golquiaadiag miñe gne naa nu ganle: <sup>10</sup> Zha ne gnaaz to co zho to ladzguiib, yeque zho zio zho ladzguiib; zha ne csacsigaa to, tel zha gut zho to, scaque gut miech zho. Gacmbande to sca, sac gon ga glu to nli rnalò to Dios, nli zleb to tel pe nactaa guielne gan to.

<sup>11</sup> Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaañe gdzieb ne zeene laa ma roptsie. <sup>12</sup> Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grëse miech lo ma co. <sup>13</sup> Ncuaañe gzee zdoò miech run ma, haxta brieelo bnabey ma biet gui gbaa bliaala lo guidzliu. <sup>14</sup> Ne

scataa grē ncuaañ ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

<sup>15</sup> Blozh ga, bdeed ma xquielmban mdio co, parne grieelo gneew. Bnabey ma guet grēse zha ne soliaadz yquitsgzhib low, <sup>16</sup> ni bnabey ma grēse miech güey zho tib bey, yase yquiaaw nia derech zho, yquiaagaaw quia zho; grēse zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin beña, zigtagaa zha ne choot rnabeyda. <sup>17</sup> Zha ne tsod bey co, grieelod gun zho wzi niicle grieelodgaa cto zho; sac bey co rlu cho nac zha ne ngab lo ma, lēē lē ma ga, lēē número co rlu zha lē ma. <sup>18</sup> Tib lē miech nac número co; xoop gayoo tsongal xoop naca. Zha ne ligier, zha ne niini, zien zho cho nac ma co.

## 14

*Biil tib gayoo chooptap mil zho*

<sup>1</sup> Tibaque zeene gon naa laa men ne nac Xcarner yeen Dios ga zo guic Gui Sión, miech guizhiu ne zonie me ga; lēē grē zha co nac tib gayoo chooptap mil zha ne quia lē me guic ga, grop me Pxoz me. <sup>2</sup> Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa grē nguzidox, ni bin naa ndal tsi

zha co zēēb noyool zho tib cant, rlu niapse arp noyoolnie zho cant co. <sup>3</sup> Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob grē mengol co. Loxaque tib gayoo chooptap mil zha ne pcuee lad grē miech guidzliu ga, zha cose brieelo pquiab lo cant co. <sup>4</sup> Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glopaa riet riogon lo me. <sup>5</sup> Biod dze ne nquidie zho, mbe zdo zho, mbe lo zho nēz lo me.

<sup>6</sup> Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grēse miech ne ndxie dipse lo guidzliu. <sup>7</sup> Nguiedz zēēb tsi me, rnee me:

—¡Golguien golgon mine rnabey Dios, ine golleynie me, sac gon laa dze ne gun me guielwxtis bdzine! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grēse zaatne rlan nis.

<sup>8</sup> Zhits anjl co nal stib anjl, nguiedz rnee me:

—¡Nasi laa guiedz Babiloin nitlo! ¡Guiedz nroob ne scataa pquiil grēraa guiedz, been grē menguiedz co ncuaañ ndzab ne beña, pxina guic zho!

<sup>9</sup> Zhiits co nalaque stib anjl, scaque nguiedz zëeb tsi me, rnee me:

—iGrëse zha ne yquitsgzhìb lo ma ntseeb ne brieequia lo nisdoo ga, yquitsgzhìb zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho, <sup>10</sup> ib tedsod ye zho ygaa lo grëtaa guielnëdox ne csiaab Dios! Squi zobwi grë xanjì me, squi zobwi Men ne nac Xcarner yeen me, laa zho guey lo guidox ne rieguaì zho, zaatne tibaque quiayazbel tiblo ncuaane rtsuu lë zufr. <sup>11</sup> Dze guieel cso laan ne tsec guidox co, ni palal gapd zho descans ga; sac sca pquitsgzhìb zho lo ma ntseeb co, pquitsgzhìb zho lo mdio ne niaa zig niaa ma ga, ni pquia zho xbey ma. <sup>12</sup> iGagananle gan grë zha ne ngab lo Dios, zha ne mban zigne rnabey me, zha ne tiblique zianaì zhiwseed Jesús, zeena gacmband zho niicle tel pe nactaa grë guielnë ne noyan zho!

<sup>13</sup> Dzigo bin naa zëeb tib tsi men co gbaa, në me:

—Pquiaa mine gni naa nu.

Nëchaa me:

—Dichos grëse zha ne rnalo Jesús, niicle niinaga guet zho.

Pquiabaque Espíritu Sant, rnee me:

—Nligaa dichos zho, sac grë guielnë ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

<sup>14</sup> Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

<sup>15</sup> Dzigo brieetib anjl len yadoo ro ne zob gbaa, nguiedz bnee me rëb me lo men ne zob lo xcow co:

—iNiinaga blooyaguiits grë zhob ne squitaa zëeb lo guidzliu! iSac gon gol-lew, laa dze ne tsasa bdzinle!

<sup>16</sup> Dzigo pteed men co yaguiits dipse lo guidzliu, ptop me grëse zhob co.

<sup>17</sup> Blozh ga, brieetib anjl len yadoo ro co nzhen me tib guib hoz, rlupaa per nli ndox low.

<sup>18</sup> Loxaque brieetib anjl co, laa anjl ne quianap gui ne ndziib lo pcoog brieequet; nguiedz bnee me rëb me lo anjl ne nzhen hoz ga:

—iNiinaga pchug grëse mzhiig uv ne squitaa zëeb lo guidzliu, sac gon laaw gule!

<sup>19-20</sup> Horco znuse pteed anjl co hoz lo guidzliu, pchug me grëse mzhiig uv co, güeycodzëe mew tib len pil nroob ne zob tib lad ro guiedz. Ga güeyzëeni zho grë uv co, ptaadz zhow; dzigo ren naaldox ne brieetib zhan pil co, masaque lal ne rzëni miech xoop ngbidz, lal ga wbiig lo ren co igo pil co; tel niaca mine sëeb tib guay low, zdziña haxta zhan cho ro ma. Rrieequia sca nagon gac mine gnabey Dios ted grë zha ntseeb.

## 15

<sup>1</sup> Tibaque zeene gon naa, ncuaane ro, ncuaane gzee zdoo ne goc gbaa. Brieequia gadz anjl, tib tib anjl co tibga guielne guiaadnie me ted gre miech ne ndxie lo guidzliu; guielne co lozh cueezhian Dios miech.

<sup>2</sup> Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nezrii nezrec rac lo co, pale lo nisdoo. Lee gre zha co been gan, pquiitsgzhibd zho lo ma ntseeb co, pquiitsgzhibd zho lo zhimdio ma, niicle biodgaa zho xbey ma. Grese zho tibga xarp Dios nzhen zho, <sup>3</sup> quiayoal zho zig biil gre zha ne psilaa Moises Egipt. Rley zho, sac niina laa Xcarner yeen Dios psilaa zho lo ma ntseeb co; rnee zho:

Dios, luu ne nac luu men ne gresew rrieelo run,  
ncuaane nroob, ncuaane gzee zdoo miech, nac gre ncuaane run luu.

Luu nac men ne rnabey,  
lo grese zha ne ngab lo luu,  
niapse diidzli rnee luu,  
niapse mine nonguiel rnabey luu.

<sup>4</sup> ¿Zha rna zha ne dien dzieebd luu?

¿Zha rna zha ne gleyd goolnie luu?

Sac luuse nac men mbe zdoo,  
men ne ni tib dol rapd.

Grese guiedz ne ndxie lo guidzliu,

zriee miech guiaad zho yquiitsgzhibd zho lo luu;

sac nasi laa luu blu zha run luu guielwxtis.

*Gadz anjl ne pxeel guielne lo guidzliu*

<sup>5</sup> Horco gon naa bzhiat zaatne nac Lugar Nda len xyadoo Dios gbaa, <sup>6</sup> ga brieegza gadz anjl ne guiaadnie guielne ne no guiaad lo guidzliu ga. Ine nquitsbie rna xab gza anjl co, haxta rzeeg lada, ndxiega tib cinch or haxta ncaan len zhiw me.

<sup>7</sup> Dzigo wbig tib bult mban co, bdeeda tibga cop nroob niaa niapse guib or lo tib tib anjl co; len cop co ga nodze grese guielne ne nac xquielblee Dios, men ne gdzind dze guet. <sup>8</sup> Horco grese xquielndzon Dios, grese poder ne rap me, biodze len yadoo co, rluw zig rlu tib gox; choot brieelodraa nezeeb len yadoo co, haxta blozh gon miech gza gadz guielne ne gueynie gza anjl co.

## 16

<sup>1</sup> Dzigo bin naa nguiedz zeeb tib tsi men co len yadoo ro co, bnee me lo gza gadz anjl co, reb me:

—Goltsie, goltsixiee gza guielne ne nac xian Dios i lo guidzliu.

<sup>2</sup> Dzigo brieetib anjl co, guey me, gueylaat me xcop me lo guidzliu, hor co grese zha ne noquiitsgzhibd lo zhimdio ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

<sup>3</sup> Guैयाque stib anjl co, bdzin me blaata me xcop me lo nisdoo, zeene laa ncaan co bzhiie lo nisdoo, grese nis



co bialo ren ctoo; ni stib ma ne no low biaan draa.

<sup>4</sup> Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne grëse nis co bialo ren. <sup>5</sup> Dzigo bin naa tsi anjl ne rnabey nis, rëb me lo Dios:

—Dios, ible rieguial minë been luu i; luu ne nac luu men mbe ne ni tib dol rapd, men ne tibaque nac, men ne gdziind dze gdzëë. Lëew i been luu, squi beenquizh luu grë miech qui minë zëëb zho, <sup>6</sup> sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquiin zho, guie zho grë ren qui na.

<sup>7</sup> Zëëbaque tsi stib men co zaatne nac lo pcooglen yadoo co, rnee me:

—iDios, luu ne nac luu men ne nroob ne grësew rrieelo run, nligaa ible rieguiala squi beenquizh luu grë zha qui minë been zho!

<sup>8</sup> Blozh ga, brieë stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech. <sup>9</sup> Niicle scale nodzu grë miech co, per ib biablod zho, laa ne nsaan zho xquieintseeb zho, nleynie zho Dios, leļ psilo zho rneenë zho me, pe nacne noxeel me grë guieñe co.

<sup>10</sup> Zeene brieë stib anjl co, güey me güeylaat me xcop me zaatne zobnabey ma ntseeb ne brieëquia lo nisdoo ga,

dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho; <sup>11</sup> per niicle scaw, ib psaaand zho xquieintseeb zho, leļ psilo zho rneenë zho Dios, pe nacne scataa rquia zho yoob, pe nacne scataa quiayaal gdib lad zho.

<sup>12</sup> Zeene laa anjl ne rac zho xoop ga güey, güeylaat me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

<sup>13</sup> Horco gon naa tson me yozh, niaaw zig niaa mbiich, tiba brieë ro ma ngol nizhnie co, tiba brieë ro ma ntseeb ne brieëquia lo nisdoo ga, laa stiba brieë ro zha ne noteed xtiidz ma ntseeb co. <sup>14</sup> Chen mendox nac gza me co, runa grë ncuane nroob ne rzee zdoo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me minë rieguial tib tib miech.

<sup>15</sup> Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnaand bizhuan yu pa hor sëëb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa

glanso, ni lala tib guiel̄todox ga grieequia zho.

16 Dzigo pcaalsa grē zha rnabey co grē xmenguiib zho, zaatne rnee zha Israel Armagedón.

17 Horco güey anjl ne nac zho gadz ga güeylaa me xcop me lo me ne rree lo guidzliu; dzigo bnee tib men̄ co zaatne nac lo zhixcan Dios len̄ yadoo gbaa ga, nguiedz zēeb tsi me rnee me:

—iNasi nagon̄ ledaaw blozh bza!

18 Dzigo psilo nēzrii nēzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min̄ co. 19 Grē guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson̄ lē goca. Horco been̄quizh Dios zha Babiloin, grētaa guiel̄ntseeb ne zēeb zho; psiaabzi me zho por grētaa zhian ne pquiaa zho me. 20 Grēse guidzliu win ne no lo nisdoo, rludraa dien̄ yow; grē gui glaa, loxaque nēzrii nēzrec bliaala. 21 Min̄ co blozh, zeene psilo bliaal̄ tib guiequiedox lad grē miech co, tib tib guiequie co nēw maase choo kil. Goñ zho scataa noyab guiequie co, laa zho noque rdzibdee zho Dios.

## 17

*Zob tib wnaa yozh lad tib ma ntseeb*

1 Lo gza gadz anjl ne sca blaas grē guiel̄nē co lo guidzliu, lad co brieetib me biaad, nē me lo naa:

—Dē ganle, zeena glu naa lo luu zha nactaa caxtigw ne ygaa wnaa yozh ne ran̄ luu squi zob lo grēse nis ne no lo guidzliu. 2 Lēē wnaa qui pxin̄ guic grēse miech ne no lo guidzliu güeynal̄ zho grētaa guiel̄yozh ne been̄ me; haxta grē zha rnabey, güeynal̄ min̄ co.

3 Sca nolu Espíritu Sant grē ncuaan̄ co lo naa, dzigo güeynie anjl co naa tib dan zit. Ga goñ naa laa wnaa co zoble lad tib ma nroob, ntseeb niaa ma co, zob gadzraa guic ma ni zob tsii zhoz ma; gdipse ma rna nizhnie, gdipse lad ma quia grē diidz ntseeb ne rneenē ma Dios.

4 Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grē guieb or, grē quie rbebni, grē quie perl, ngal̄guiee lad lar co. No tib cop nroob niaa me, niaaw niapse guieb or, rrieequia leen̄ co nodzē grētaa guiel̄ntseeb, grētaa guiel̄yozh ne run̄ me. 5 Ni quia bla lan diidz quia me, rneew: “Lēē guiedz nroob ne nac Babiloin nu, guiedz ne nac xniaa grēse wnaa yozh, guiedz ne nac xniaa grēse zha ne run̄ ncuaane mbixladz.” Lēē lē me ga, hor coraa bzhoobnen̄ zha nac lē me. 6 Dze rwi naa lo me, dzigo goñ naa rac me zig rac zha ne rzudz. Nziandox zha ne no xnēz Jesús beet me, rrieequia

grëtaa ren ne pxiee me ga sca noyūn me. Bzee zdoo naa, ni bdzieeb naa gon naa zha rac wnaa co. <sup>7</sup> Dzigo nēchaa anjl co lo naa:

—¿Pe nacne rdzieeb luu? Na ganle gni naa lo luu cho nac wnaa co, cho nac ma ne sca zob me lad ga. <sup>8</sup> Padzeela no ma ntseeb co, guiend ma niinapaa, per zhile laa ma griee len guierdoo ne nio-ogyu ma, laa ma griee ga parne diunavez nitlo ma; grë zha ne quiad lë lo libr ne zhobnee cho nac zha ne ygaa guielmban ga, seedox zdoo zho zeene gan zho laa ma grieequia stib, sac tibaque nan zho gutle ma. <sup>9</sup> Wen wen pquiaadiaga ganle: gza gadz guic ma ga, rrieequia lëew nac gza gadz gui win ne zob wnaa co zobnabey me. <sup>10</sup> Ni rrieequiaque lëe gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho. <sup>11</sup> Lozhse gnabey zha co, laa ma gnabeyaue, ma gac zha rnabey co xon, niicle ne ye le ma ga goc zha co gadz; gataa laa ma nitlo.

<sup>12</sup> 'Zhoz ma, rrieequia lëe tsii zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho, <sup>13</sup> dzigo laa gza tsii zha co guiaan diidz gzo zho ma, ma gac zha nroob lo zho. <sup>14</sup> Zacnie zho ma, grëse zho tsie tsietilnie zho Xcarner yeen Dios, per znuse

gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëe grë zha co nac zha ne bzooblo Dios bredz me zho bgab zho xnëz me, ni ib psaand zho me.

<sup>15</sup> Blozh ga, nēchaa anjl co lo naa:

—Lo grëtaa nis ne gon luu sca zob wnaa yozh co, rrieequia lëe nis co nac grëse guiedz, grëse dii miech ne ndxie lo guidzliu. <sup>16</sup> Per zdzin dze lëeque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlëeniedox zho wnaa co, sanwin zho me, haxta xab me cuee zho, znitlo zho me, sëeg zho me lo gui. <sup>17</sup> Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse mine bneele me no gac. <sup>18</sup> Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

## 18

<sup>1</sup> Blozh ga, gon naa laa stib anjl ziad-zëeb gbaa, rlu tib anjl nona, dipse lo guidzliu biabbiinidoo ne ziaadnie me, <sup>2</sup> nguiedz zëeb tsi me rnee me:

—¿Nasi laa guiedz nroob ne nac Babiloin ga nitlo! ¡Loxaque mendox yquianzë ga, loxaque grë ma guix, loxaque grë ma mbixladz cuew! <sup>3</sup> Laaw nitlo, sac

noquiila grēse miech ne ndxie lo guidzliu, grēse zha ne rnabey, quiayun zho grētaa guielyozh ne runa. Lo grētaa guielyozh co quiayun ricwa grēse zha ne run wto; quiaxin grē ncuaan co zho, masaque quiayuna zho zig run nziu.

<sup>4</sup> Dzigo zēēb stib tsi men co gbaa, rnee me:

—jGrēse to ne nac to miech ne ngab xnēz naa, golgon diidz, golree guiedz qui! Ib gunde to dol ne quiayuna; zeena ygaade to grētaa guielnē ne ygaaw, <sup>5</sup> sac nroobdox nac grē dol ne quiayuna, telne niaca ncuaane cue monton, rrieequia haxta gbaale rdzin guic monton co; gane ib tedsod zunquizh Diosa grētaa guielntseeb co.

<sup>6</sup> 'Gacxe na grēse mine beena miech, mincoque saca. Grēse tel zha psacsiw miech, chop lalga mine teda. <sup>7</sup> Zigne squitaa now lo grētaa ncuaane racladza; scagaa na guielnēdox ne gana, haxta goona lo grētaa guielnē co. Niats raca rneew: “Naa rnabey. Nacd naa cho zha ne zotib, zig rzac grē wnaa viud; naasi gdzind dze ne tso naa guielnē.”

<sup>8</sup> 'Nli squitaa niats raca, per zeene guiaba ladznia guielgut, ladznia gbin, ladznia grēraa guielnē ne gana, tib dzeque lozha. Ni lozh ga, haxta zeca lo gui; min co gnabey Dios teda. jMe nac men ro ne gunquizha grētaa mine beena! <sup>9</sup> Grē

zha ne rnabey grē guiedz, zha ne scataa bley been grē guielyozh ne runa; zeene gan zho goxdoo ne rso noyeca, mban gac zho, zoon zho zio zho xquielnēw. <sup>10</sup> Zdzieb zho gan zho grētaa guielnē ne nodeda ga, lo dzeb co, ni lalnu gbigd zho. Lēē gdib so zho goptsie zho, guiab zho: “jProbsaxe luu Babiloin, guiedz nroob, guiedz non nac luu! jPa brie guielnē qui squi znuse nitlo luu!”

<sup>11</sup> Grē zha ne run wto dipse lo guidzliu, ye zho zio zho xquielnēw, mban gac zho guielndraa cho si lo zho. <sup>12</sup> Sac masaque lēēw rzi:

guiib or,  
guiib plat,  
grē quie non,  
grē perl,  
grē lar niazh,  
grē lar sed,  
grē lar nizhnie nlaan,  
grē yag ne nex rlaa,  
grē ncuaane niaa marfil,  
grē ncuaane niaa grē yag  
wen,  
grē ncuaane niaa guiib,  
grē ncuaane niaa brons,  
grē ncuaane niaa quie  
mármol,  
<sup>13</sup> grē blad canel,  
grē guizh scuaan,  
grē yaal ne ndzon rlaa,  
grē guizh, grē nceit ne nex  
rlaa,

grē nziu,  
grē nceit,  
grē zhobxtil,  
grē rin niazh,  
grē ma ne rey yo,  
grē mēcwxiil,  
grē carret,

haxta grē miech ne runzhoo  
dziin lo samiech.

<sup>14</sup> 'Zrieequia zha ne guiab  
lo guiedz co: "¡Bdzinaque dze  
ne blozh luu, pa sēraa scataa  
yquianie luu grē ncuane  
rdziladz luu! ¡Grētaa ncuane  
niazh, grētaa ncuane rap  
luu, gdzindraa dze ne gbiire  
gan luuw!"

<sup>15</sup> 'Grē zha ne run wto ga,  
zha ne scataa gocricw lo grē  
wto ne been zho guiedz co,  
zdzieb zho, zit so zho gan zho  
grētaa guielnē ne nodeda. Zio  
zho xquielnēw, haxta zoon  
zho <sup>16-17</sup> guiab zho: "¡Prob-  
saxe guiedz ro qui, squi znuse  
bnitlow! Biopaa dze goc-  
nona, masaque goca zig tib  
wnaa ne racw grē lar niazh,  
grē lar nizhnie nlaan; wnaa  
ne rna grē guib or, grē quie  
non, grē quie perl, rio yan, rio  
yan nia."

'Grē zha ne rnabey barcw,  
grē zha ne rsēw, zha ne  
no lena, ni grēragaa zha ne  
run dziin lo nisdoo, zit so  
zho gan zho tsec guiedz co;  
<sup>18</sup> zeene gan zho goxdoo ne  
rso noyeca, ziab zho: "¡Zha  
rnaraa dze ne dzian ne stib  
guiedz nroob zig guiedz  
qui?" <sup>19</sup> Mban gac zho, zio  
zho xquielnēw, zoon zho,  
squiaadan zho redz, guiab  
zho: "¡Probsaxe guiedz ro qui  
squi znuse bnitlow! Lo grētaa  
dimi ne pquaniew, blactaa  
beenricwa ne grē ne grēraa  
zha ne run dziin rii."

<sup>20</sup> 'Sca nagon nitlo guiedz  
co. Grēse to ne nac to zha  
ne no gbaa, grēse to ne nac  
to zha ne ngab lo naa, grēse

to ne nac to zha ne pxel  
naa güeynee xtidz naa, zha  
ne güeyteed xtidz naa, zeene  
gan to laa guiedz co nonitlo,  
golley, sac gon ga gunquizh  
Dios miech ne no ga grētaa  
mine been zho to.

<sup>21</sup> Zeene blozh bnee men  
co, dzigō gon naa tib anjl,  
rlu tib anjl macisa, znuse blis  
me tib quie nroob, niaaw  
zig niaa quie molin zhobx-  
til dipse gan bron mew lo  
nisdoo; blozhse bron mew,  
nēchaa me:

—Squi nagon nitlo guiedz  
ro ne nac Babiloin ga,  
gdzindraa dze ne gbiire  
gan miecha. <sup>22</sup> Masaque  
nroobladzdoo ne raca niina,  
loxaque di noyac grē ro  
xnēza, zaatne noyool zho  
vihuel, zaatne noyool zho  
bzie, zaatne nocuedzгаа  
zho trompet, nēzrii nēzrec  
rac miech zie zho lo xtsiin  
zho, loxaque lo grē quie  
molin rzedz nozuu zho  
zhob; per gal dze co grēsew  
lozh. <sup>23</sup> Squitaa biini

ne rquiaw niina, squitaa  
tibaque quiayac guieltsieela,  
per gal dze co ncowse gnaw,  
pa sēraa gac lniw. Laaw  
nitlo, sac blactaa noyungüeta  
miech ne no grēraa guiedz  
ne ndxie lo guidzliu lo grē  
zhiwseed mendox; pe zhidaa  
noyunricwa grē zha ne run  
wto por grē wseed co; <sup>24</sup> pe  
zhidaa miech zēēba. Nzian  
zha ne ngab lo Dios, nzian  
zha ne riadteed xtiidz me,  
rnabeya ret zho.

## 19

<sup>1</sup> Zeene blozh ga, bin naa

zëeb ndal tsi men co nëz gbaa,  
rlu miech guizhiuw, nguiedz  
rnee zho:

¡Zha ndzontaa xDios ne! Me  
nac men ne rsilaa  
miech, parne ygaad  
zho lo caxtigw.

Me nac men ne rap poder,  
me nac men ne rieguial dzi-  
uunnon ne;

<sup>2</sup> sac gon mesi run me  
guielwxtis zigne no  
gaca.

Gacxe waa, sca gunquizh  
me guiedz qui grëtaa  
guielyozh ne noyuna,  
grëtaa xchen zha ne  
ngab lo me, zha ne  
bnabeya gut;

rrieequia naca zig tib wnaa  
yozh,

quiayungüeta miech quiayuncta  
zho xtol zho.

<sup>3</sup> Blozh ga, biire bin naa tsi  
zho, rnee zho:

¡Zha ndzontaa Dios! ¡Min  
qui nagon rieguiala, gdzind  
dze ne lozh csow gox!

<sup>4</sup> Horco laa gza galptap  
mengol co, ni gza tap bult  
mban co pquitsgzhil lo Dios  
lo xcan ne zob me ga, haxta  
bzooblo zho lo liu, beennon  
zho me, rnee zho: “¡Nliw!  
¡Luuse nac men ne ndzon!”

<sup>5</sup> Zëëbaque stib tsi men co  
zaatne nac lo xcan co, rnee  
me:

¡Grëse to ne nac to zha ne  
quiayun dziin lo me,  
zha ne rien men non nac me,  
zigtaa zha wina, zigtagaa zha  
nona, golgoolnie me!

<sup>6</sup> Dzigo wbiire bin naa tsi  
grë miech guizhiu co nëz  
gbaa, rio bi zëeb tsi zho, pale  
zeene rio bi nisdoo, zeene

riogaa bi rnee grë nguzidox,  
rnee zho:

¡Golgotsaa dzioolnie ne me!

¡Me nac xDios ne, me nac men  
nroob ne rnabey!

<sup>7</sup> Golgotsaa gley ne, golgotsaa  
dziuunnon ne me,  
sac gon laa dze bdzin laa  
Carner yeen ne nac  
Xpëed me ga ctsieel-  
nia;

grë zha ne ngab lo me,  
zha ne rrieequia nac ndzoop  
ne ctsieelnia Carner  
yeen co, laa zho  
nacwxable.

<sup>8</sup> Masaque rlu zho zig tib nd-  
zoop ne ctsieelnia,

ine nquitsbie, ine rbebni lar  
niazh ne nacw zho;

me bdeed diidz got zho lar co,  
ga rlu ganle mban zho zigne

racladz me.

<sup>9</sup> Dzigo rneechaa anjl ne  
sca bron quie co lo nis:

—Wen zie grë zha ne bredz  
Dios tsie lo xquieltsieel men  
ne nac Carner yeen co.

Bnabey me naa pquia naa  
diidz co, blozhse ga, nëchaa  
me lo naa:

—Xtiidz Dios ga gon, me  
rneew.

<sup>10</sup> Horco pquitsgzhil naa  
lo anjl co ni naa gunnon naa  
me, per bzhiguield me.

—¡Coo! —në me lo naa—.

¡Guso i! Gocnan ganle ye naa  
tib ngundziinse nac naa lo  
Dios, nac naa zigne nacaque  
luu grë luu grëraa zha ne  
squi noxco zienal mine nac  
zhiwseed Jesús. Dios none  
gunnon luu, sac gon tib  
ngundziinse nac naa bzet naa  
min co, lëe gdib bne naa ganle  
zha nac xtiidz Jesús.

11 Dzigo hor co gon naa bzhial zhan gbaa, ga brieequia tib men co zob me lad tib guay nquits, zëeb diidz niapse diidzli rnee me, sac run me guielwxtis zigne no gaca, ni rdilnie me zha ne rieguialtilnie me. 12 Masaque rbebel bziaalo me, nzian xcuaa coron zob guic me, ni quia stib lë me quia me, loxaque mese nan dien zha nac lë co me. 13 Rnadraa xab me di ren, lëe me ga rnee zho: Xtiidz Dios. 14 Ndal grë menguiib ne no gbaa nal zhits me, ye zho niapse guay nquits zob zho; niapse lar niazh nacw zho, ine nquitsbie rna grë lar co. 15 Rlu choot grieelod gacndaan lo me, masaque zob tib spad lots ro me, laa me nzobro spad co parne tilnie me grë guiedz ne gacntseeb lo me. Masaque me gnabey grëse guiedz, ndip gac xtiidz me, ni tib choot quiitsd mine gnabey me; zeene laa me gunquizh miech grë xquielntseeb zho, cxeel me zhian ne csiaab Dios ygaa zho, zun me zho zigne run miech uv zeene rzëeni zhow. 16 Lad lar ne nacw me ga, ni tib cho cor me, ga quia cho nac me, rneew: "LËË MEN RII NONRAA LO GRËSE ZHA NON, ME RNABEY LO GRËSE ZHA NE RNABEY."

17 Blozh ga gon naa zo tib anjl lo ngbidz, nguiedz zëeb tsi me rbedz me grëse maxiil ne row grë magut, rnee me:

—iLigier golcaalsa! iGoltë zeena yquiin to guielwagw ne gneedz Dios lo to niina!

18 Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëeb diidz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

19 Dzigo gon naa ma nroob ne brieequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me. 20 Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zatne noyec zufr. 21 Laa grëraa zha ne scataa gocnie ma ga, grëse zho gut lo spad ne nzo-bro men ne zob lad guay nquits co, hor co bdzinbe grëse maxiil ne row magut, güeytow ma grëse ngutoo co haxta biel ma.

## 20

*Bnabey Jesús tib mil iz*

<sup>1</sup> Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden. <sup>2</sup> Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co; <sup>3</sup> con liow ne nzhen me ga pxal me tib ro guierdoo, psëeb me ma len guierdoo co. Blozh ga dziits dziits psioog mew, zeena grieelod greee ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no greee ga, sonlaa ma zniip.

<sup>4</sup> Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguield nquiits-gzhib lo ma ngol ne briequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brieegan zho grëse zho, par gbannie zho Jesús, gnabey me grë me zho dipse len tib mil iz.

<sup>5</sup> Lëe grë zha co nac miech ne glopaa grieegan, laa grëraa mengut, zha co grieegan zeene laa tib mil iz co gza. <sup>6</sup> Dichos grë zha ne glo grieegan ga; lo Diosle ngab zho ga, noxtseebdraa zho guey zho gabil, masaque

lo Dios, lo Jesús gon zho dziin, gac zho zig tib pxoz lo me; tipse gnabey me grë me zho len tib mil iz co.

<sup>7</sup> Zeene blozh tib mil iz co, dzigo gon naa laa mendox brieë zaatne niogyu ma ga, <sup>8</sup> güey ma güeyquidie ma zha Gog, güeyquidie ma zha Magog, grëse guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, gon ne cuent yuzh ne ndxie ro nisdoo, <sup>9</sup> ntseeb rac zho, grëse zho laa zho bdzin zaatne ndxie guiedz ne rleyne Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëega zho grëse zho. <sup>10</sup> Laa mendox, bnabey me bga ma bey ma lo guidox ne nac gabil, zaatne nole ma ngol ne sca briequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne greee ma ga; caxtigwdox ne ted ma.

*Beenquizh Dios miech mine been zho*

<sup>11</sup> Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me. <sup>12</sup> Grëse zha ne brieegand glo ga, zigtaa zha nona, zigtaa zha wina, laa zho bdzin lo me. Laa



zho ndxie ga, zeene laa lo bla libr co bzhial, ni bzhialaque lo mine quia lē zha ne bgaaguielmban cub ne rdeed Dios ga; hor co bgaase zho mine rieguial zho tib tib zho tel zha zhubnee lo libr co wban zho. <sup>13</sup> Grēse zha ne biaan len nisdoo, blieequia nisdoo zho, grē zha ne bioliu blieequia baa zho; grēse zho blieequia guielgut zho. <sup>14-15</sup> Blozh ga, zigtaa guielguta, zigtaa zha ne quiad lē len libr ne no lē zha ne bgaaguielmban ga, laa zho biobe lo guidox ne nac gabil; lēē guielgut brop ga.

## 21

<sup>1</sup> Dzigo gon naa tib gbaa cub, ni tib guidzliu cub; sac zigtaa gbaa ne rdzi-uunbey ne, zigtaa guidzliuw, zigtagaa nisdoo grēsew bnitlo. <sup>2</sup> Grop lo naa gon naa laa Jerusalén, guiedz ne nacchen Dios ga, ziad-zēēb zhan gbaa brieew zaatne zob me; tib guiedz cuba. Tib guiedz nzhixcuaa naca, pale tib ndzoop nguieg dze ne rtsieelnia zho. <sup>3</sup> Dzigo bin naa nguiedz zēēb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuēz lo miech, nasi laa me gban-nie zho; zanlo zho me, peet gunfaltraade lo zho. <sup>4</sup> Led yedraa niina pa glunē zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grēse nis ne zo lo zho zeene biin

zho, niina laa me gunmbew. Grēse ncuaan co, gdziandraa dze gan zhow.

<sup>5</sup> Zēēb tsi men ne zob lo xcan co, rnee me:

—Grēse ncuaane no niina ncuble naca, ni naa beenncuba.

Blozh ga, nēchaa me lo naa:

—Grēse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca. <sup>6</sup> jLēēw nagon, grēse mine no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grēse letr, “a” rsilow “z” riala!

jZha ne nē rnab zhis, naa gded nis ne rdeed guielmban guie zho, ygad naa nis co lo zho, peet gacnonda! <sup>7</sup> Ni golgacnan ganle, grēse zha ne gdeete diidz lo grē ncuaane gunctal xtol zho, ible zgaa zho grē guielnzaac ne noyaquiet nu, naazhal gbannie zho peet gunfalte lo zho, masaque tib mēēd gac zho lo naa. <sup>8</sup> Saŋgue grē zha ne rdzieb gban zigne rnabeynaa, grē zha ne rbiche lo naa, grē zha ne run grē ncuaan mbixladz, grē zha ne rut samiech, grē zha ne rionie zha ne led tsieeld zho, grē zha ne rleynie guielbruj, grē zha ne rleynie grē mdio, grē zha ne tibaque noquidie samiech, grēse zha co mine ygaa zho nac lo guidox ne noyec zufr ga; lēē guielgut brop ga.

*Guiedz ne gdziñ zha ne ngab lo Dios*

<sup>9</sup> Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzooop nguieg ne gac tseeel men ne nac Xcarner yeen Dios i.

<sup>10</sup> Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa. <sup>11</sup> Masaque rbebela guielndzon ne rap me, lëedaa grë quie niazh ne lë jasp, ni rol rnaw lëedaa grë vidr. <sup>12</sup> Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë mengoldoo ne goc xpëed Israel. <sup>13</sup> Tson puert co quia nëz ya, tsona quia nëz quiet, tsona quia ngali nëz ne rlan ngbidz, stsona quia ngali nëz ne rzëeb ngbidz. <sup>14</sup> Lo tsiipchop quie nroob ne zob biedz co, tibga lë xpoxtl men ne nac Xcarner yeen Dios ga quia lo co.

<sup>15-16</sup> Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nëza no gaay gayoo choo kilómetro, lal ne rzëni miech tsiipchop ngbidz; lal ne ziola lalga nzhena, ni lalgaque glaaw;

<sup>17</sup> laa xquielnaal biedz co nzhena lal ne rgaa tsiipchop docen dzit nia ne; ptiix mew zigne rtiixaque ne nac ne miech.

<sup>18</sup> Niapse guiib or niaa guiedz co, zigne rne naa ga, rol rnaw lëedaa vidr. <sup>19-20</sup> Biedz ne ndze igow ga, niapse quie niazh ne lë jasp niaaw; scaque gza tsiipchop quie ne naaz biedz co, niapse quie niazh ngalguieew:  
tiba ngalguiee quie niazh ne lë jasp,  
tiba ngalguiee quie niazh ne lë zafir,  
tiba ngalguiee quie niazh ne lë ágata,  
tiba ngalguiee quie niazh ne lë smerald,  
tiba ngalguiee quie niazh ne lë ónice,  
tiba ngalguiee quie niazh ne lë cornalin,  
tiba ngalguiee quie niazh ne lë crisólito,  
tiba ngalguiee quie niazh ne lë beril,  
tiba ngalguiee quie niazh ne lë topás,  
tiba ngalguiee quie niazh ne lë crisoprás,  
tiba ngalguiee quie niazh ne lë jacint,  
tiba ngalguiee quie niazh ne lë amatist.

<sup>21</sup> Gza tsiipchop puert ne quiaaw ga, tibga quie perl niaa tib tib puert co; nëzyu ne rded grol guiedz co, niapse guiib or niaaw, masaque mbe rol rnaw.

<sup>22</sup> Ni tib yadoo gond naa, sac dipse lad guiedz co rleynie zho Dios, rleynie zho men ne nac Xcarner yeen me.

<sup>23</sup> Led yedraa ga rquiin xbiini ngbidz, rquiin xbiini mēē, sac masaque xquielndzon me, ni xquielndzon meṅ ne nac Xcarner yeeṅ me ga nac biini.

<sup>24</sup> Grēse miech ne ngab lo me, ine gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeene gdziṅ zho ga ye zho zuṅnon zho me.

<sup>25</sup> Led yedraa ga ycow liu, tibaque niini gnaw, tibaque gzhiäl gza xpuerta. <sup>26</sup> Grēse ncuaane mbe ne gocnon lo grē guiedz ne bre lo guidzliu, laaw gdziṅ ga; <sup>27</sup> sanque grē ncuaane mbixladz gdziṅda ga. Zig nac grē miech ne ruṅ grē guielntseeb, grē zha ne tibaque noquidie, gdziṅd zhow; loxaque zha ne zhoob lē leṅ xlibr meṅ ne nac Carner yeeṅ co (libr ne no lē zha ne ygaa guielmban cub ne gdeed Dios ga), zha cose gdziṅa.

## 22

<sup>1</sup> Blozh ga, blu anjl co tib guiubee lo naa, nē me zha ne guie nis co, zгаа zho guielmban; mbe rolṅ rnaw, haxta rbebel low. Merse zhan xcan ne zob Dios ni zhan xcan ne zob meṅ ne nac Carner yeeṅ co, ga rriee guiubee co, <sup>2</sup> rdeda groṅtaa nēzyu ne rded leṅ guiedz co. Gropse nēz ro guiubee co zēēb yag ne rdeed guielmban, gzobse mēē rquia nex low, tsiipchop vuelt rdeeda nex tib leṅ iz, haxta ye zhiblaga rquiin grē zha

ne no ga, parne sacnēd zho.

<sup>3</sup> Led yedraa ga no ncuaane ndziibdee, ga zo zhixcan Dios ni zo zhixcan meṅ ne nac Carner yeeṅ co; grēse miech ne ngab lo me, rleynie zho me runnon zho me. <sup>4</sup> Raṅlo zho mē, grēse zho quia lē me quia zho. <sup>5</sup> Led yedraa ga yquiin zho pe gziini lo zho, yquingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziṅdraa dze ne grieve zho ga.

### *Ile ziaad Jesús*

<sup>6</sup> Dzigo nēchaa anjl co lo naa:

—Grēse ncuaane quiayan luu nu, ible ncuaane no gaca. Bui ganle Dios meṅ ne rdeed guielbiini lo grē zha ne rieteed xtiidz me lo miech, rnee zho ncuaane naraa gac, mezhal pxeelxanjṅ me ziadnee lo luu, zeena gacnanṅ grēse zha ne ngab lo me ziaadyoble gac grē ncuaanṅ rii. <sup>7</sup> Ible nacle xtiidz meṅ ne rnabey ne, zhile laa me guiaad. ¡Dichos grē zha ne gliladz grē miṅe noxobneṅ Dios nu!

<sup>8</sup> Grop lo naa gonṅ naa grē ncuaanṅ rii, naazhal bin znu bnee anjl co. Nacne pquitsgzhib naa lo me ni naa guṅnon naa me; <sup>9</sup> dzigo nēchaa me lo naa:

—Guso i, rieguald guṅnon luu naa, laa naa nile lo luu ye naa tib nguṅdziinse nac naa lo Dios, nac naa zigne nacaque luu grē luu grē zha ne noteed xtiidz meṅ ne rnabey ne lo miech, ni grēraa zha ne gliladz miṅe noxobneṅ me nu. Me none guṅnon luu.

<sup>10</sup> Blozh ga, nëchaa me:

—Bien, grëse minë quiayan luu nu, yqueetsd luuw, sac zhile gdziñ dze ne gaca.

<sup>11</sup> Lo spalalse dze ne riaan niina, grë zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne runгаа guielyozh, telne mincotaa rleynie zho, maase gunraa zhow. Sangue grë zha ne noxco gun minë rnabey Dios, none tsoxcoraa zhow; zha ne ngableгаа lo me, none gunraa zho minë racladz me, gbiched zho lo me.

<sup>12</sup> Horco bin naa tsi men ne nac Carner yeen co, në me:

—Psoladza sca gon, ible zialniob naa; zeene laa naa guial, hor co gded naa mine rieguial tib tib miech, tel zha wban zho. <sup>13</sup> Notaque naa, zig nac grë ncuaan rii naa psilow ni naa csiaala; nac naa zig nac letr “a” ni letr “z” lo grë letr, “a” rsilow, “z” riala. <sup>14</sup> Dichos grë zha ne noxco guiaanmbe zho nëz lo Dios, sac rrieequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga. <sup>15</sup> Sangue grë miech ne racntseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co. <sup>16</sup> Naa gon nac Jesús, naa pxel xanjil naa ziaadlu

grë ncuaan rii lo luu, zeena grëse zha ne no xnëz naa gacnaa. Naa ga brieequia lo xtii rey David, per naa psan grëse xmengol me. Rrieequia naa nac mel ngol ne rziini ral sil.

<sup>17</sup> Zigtaa Espiritu Sant, zigtaa grë zha ne no xnëz me, zha ne rrieequia gac tsieel me ga, laa zho quiambëz me; niicle zha ne gacnanragaa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

<sup>18</sup> Grëse zha ne gon grë minë pxobnen Dios nu, laa naa rso diidz lo zho: Gneed zho ncuaane nacda, sac zha ne gdziibraa diidz zeene gnee zhow, scagaa me, lo grë guielnë ne raquiet nu yгаа miech, zdziibraa me minë yгаа zho; <sup>19</sup> zha ne cticheгаа palala zeene gnee zhow, scaque stiche me lë zho lo libr ne zhubnee cho nac zha ne yгаа guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

<sup>20</sup> Men ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

<sup>21</sup> Me nac men ne gacnien to grëse to, me gunlay to.

Juan